

沈雲龍教授主編

近代中國史料叢刊

第二十九輯

文海出版社印行

# 近代中國史料叢刊

沈雲龍教授主編

近代中國史料種類之繁，卷帙之多，遠過其他時代。就內容而論，可別爲原始資料（Primary sources of materials）與次要資料（Secondary sources of materials）兩類。前者如歷朝實錄、東華錄、政治官報、大臣奏疏、外交檔案、名臣專集、函牘手扎、日記、自訂年譜、回憶錄等；後者如官書傳記、行狀、碑誌、新聞記載、雜誌論文、私人筆記、以及參用史料，專題研究所得而成之史籍，與夫總合敘述史蹟之真相，而使讀者明瞭一事，或一時代之政治外交社會經濟情況及人民生活之專著等，均其明例。

本社向以搜集史料影印流傳爲職志。其卷帙較多之大清實錄、東華錄、十朝聖訓、清季外交史料，政治官報等鉅製，均已先後出版，甚獲好評。茲再商得近代史學家沈雲龍教授之同意，就上述範圍，代爲搜羅選輯卷帙較少而有價值之史料，陸續影印，並承惠允將其所藏罕見之孤本若干種先行借出攝印，以供海內外學人治近代中國史者之參考。

文海出版社謹識

中華民國五十五年十月

# 近代中國史料叢刊

第二十九集

## 目錄

陶文毅公(澍)集	許喬林編
還讀我書室老人手訂年譜	董恂著
冬暄草堂師友牋存	仁和陳氏藏
可園文存	陳作霖著
譚瀏陽全集 附：年譜	譚嗣同著
椒生隨筆	王之春著
瓜圃叢刊敘錄	金梁著
瀛譚	關賡麟著
宦海伏波大事記	陳福齡輯著
宣統三年冬季職官錄	內閣印鑄局編

124/96/1221

陶文彙  
公集

淮北士民公刊



雲於先生三十歲小像



韓范經緯愈窮風較識星波福斷暮淵混  
 變披昂登長壘陟蹠贊議醇姚嵐謀遠  
 蕩競越持鎖闥畫典心望蒼生  
 詔乘月樓輝灑月徑仁揚滿所不遠冷山  
 競趨炎熱深滄流新漢通潛轉子翠  
 不致泮青名顯岷丘風漳專清浩簡台曜  
 中輝蓋然志展體重而歲與和乙壽是貴  
 尚相芟禱絲然

道光戊子秋

海鹽朱方增敬題



陶文毅公奏疏總目

兩淮淮北十二民公稱

卷首

御製祭文

御製入賢良祠祭文

御製碑文

恩准淮北建立專祠並祀名宦祠

諭旨

恩准崇祀海州儒學名宦祠

諭旨



卷一

進呈文

卷二

奏疏  
謝摺

卷三

奏疏  
謝摺

卷四

奏疏  
赴任 請 覲 回籍

卷五

奏疏  
選政 吏治

卷六

奏疏 倉庫

卷七

奏疏 漕務

卷八

奏疏 海運

卷九

奏疏 災賑

卷十

奏疏 沙洲

卷十一

奏疏 鹽法

卷十二

奏疏 鹽法

卷十三

奏疏 鹽法

卷十四

奏疏 鹽法

卷十五

奏疏 鹽法

卷十六

奏疏 鹽法

卷十七

奏疏 鹽法

卷十八

奏疏 鹽法

卷十九

奏疏 祀典 旌表

卷二十

奏疏 科場

卷二十一

奏疏 修志 書院

卷二十二

奏疏 營制

卷二十三

奏疏 海防

卷二十四

奏疏 緝捕

卷二十五

奏疏 緝捕

卷二十六

奏疏 保甲

卷二十七

奏疏 河工

卷二十八

奏疏 水利

卷二十九

奏疏 工程

卷三十

奏疏 告病 遺摺

卷三十一

文集 經說

卷三十二

文集 史說

卷三十三

文集 記

卷三十四

文集 記

卷三十五

文集 序

卷三十六

文集序

卷三十七

文集序

卷三十八

文集序

卷三十九

文集序

卷四十

文集書



卷四十一

文集 書

卷四十二

文集 跋 書後

卷四十三

文集 辨 考 雜說 策問

卷四十四

文集 贊 銘

卷四十五

文集 神道碑 墓誌銘

卷四十六

文集 墓表 墓碣 傳

卷四十七

文集 行述 哀詞

卷四十八

文集 告文

卷四十九

文集 祭文

卷五十

文集 告示

卷五十一

文集 賦

卷五十二

文集 賦

卷五十三

詩集 五言古詩

卷五十四

詩集 五言古詩

卷五十五

詩集 七言古詩

卷五十六

詩集 七言古詩

卷五十七

詩集 五言律詩

卷五十八

詩集 五言律詩 五言長律附

卷五十九

詩集 七言律詩

卷六十

詩集 七言律詩 七言長律附

卷六十一

詩集

五言絕句

六言絕句附

卷六十二

詩集

七言絕句

卷六十三

詩集

七言絕句

卷六十四

詩集

賦得體詩

卷末

請淮北建立專祠並祀名宦祠摺子

請崇祀海州儒學名宦祠題本

行狀

墓誌銘

神道碑銘

右 陶文毅公全集六十四卷恭錄

恩綸於簡端末附建祠原奏及行狀碑誌總六十六卷

凡八十餘萬言淮北士民公棐

喬林

任校字維

公深仁厚澤徧洽三江而淮北尤感再造既祀海

州儒學復建專祠於板浦壯麗甲於江淮又從

公壻周君

詒樸

求得遺集而彙棐之皆所以報也

謹案 公自訂奏疏七十六卷印心石屋文集三十五卷中闕第十六卷至第十九卷印心石屋詩鈔初集四卷二集三卷撫吳草四卷俱先槩行其未槩者縹緗盈尺傳寫滋譌 喬林 掃葉尋根博稽羣籍彌歎文章雖 公之餘事亦如少陵昌黎無一字無來歷也其有原藁所漏而真蹟碑版確可據依者始爲寫定至奏疏原刻排日編年卷帙繁富茲謹分類編錄而 公之遠謨大猷更爲條貫分明易資考鏡較李鄴園郭華野諸公所槩奏議爲得體要矣昔韓魏公安陽集漏載早夏三詩見

吳師道禮部詩話司馬溫公傳家集漏載論西夏  
事見劉元城語錄皆難辭編次之疏喬林校錄是  
集期於賅備無遺惟壽序時文序及幕府代擬之  
篇未著於錄固 公之意也後之君子若欲舉奇  
觚贖墨而悉彙布之自有范文正公別集補編之  
例在雕版既成敬記其緣起

道光庚子嘉平之望門下士海州許喬林謹識



The image shows a blank ledger page with 11 vertical columns. The columns are defined by vertical lines, and a horizontal line runs across the top of the page, creating a header row. The page is otherwise empty of any text or data. There is a small, dark, irregular mark on the right side of the page, which appears to be a stamp or a mark from the scanning process.

陶文毅公全集卷首目錄

御製祭文

御製入賢良祠祭文

御製碑文

恩准淮北建立專祠並祀名宦祠

諭旨

恩准崇祀海州儒學名宦祠

諭旨

												1000			
--	--	--	--	--	--	--	--	--	--	--	--	------	--	--	--

御製祭文

晉贈太子太保銜原任兩江總督陶澍祭文

保障重巖疆之寄軫念成勞苾芬流琬俎之輝導揚  
寵命惟勤事而靖其匪懈斯飾終而恩卹維優聿考  
彝章式陳馨薦爾晉贈太子太保銜原任兩江總督  
陶澍端直宅心勇敢任事起家詞苑遷職言官程材  
疊掌夫冰衡出使早持夫漕節遂由給諫出任監司  
朕慎選賢能首隆簡擢陳時臬事祥刑昭明允之稱  
樹作藩邦敷政著旬宣之績用是畀之節鉞委以封  
疆開府皖江量移吳會飛輓試行於滄海酬勳而吉

羽增華逋逃迅獲於郵亭嘉績而端闈晉秩洎乎連  
圻作督總制宣猷統三省之師于整綱肅紀筦兩淮  
之禺筴剔蠹釐奸有守有爲允副股肱之倚賴任勞  
任怨倍殫心力之勤劬渥眷方殷沈痾忽遘勉俞休  
沐許調攝以專心冀獲安痊効馳驅而有日遺章遠  
告悼悃殊深銜贈巍階賞延後嗣桂祠特耐詔妥侑  
於秩宗柳翼將移飭護持於疆吏嘉名爰錫蠲餼斯  
頒於戲睠東南財賦之邦永懷良弼備存沒哀榮之  
禮宜沛溫綸靈而有知庶其歆格

道光十九年七月

日

御製入賢良祠祭文

晉贈太子太保銜原任兩江總督陶澍入賢良祠祭  
文

臣子宣猷布化念篤忠貞國家崇德報功恩隆典禮  
旂常紀錄允垂竹簡之名鼎俎流芬式是桂祠之祀  
爾晉贈太子太保銜原任兩江總督陶澍才儲幹濟  
力矢精勤初依詞館以簪毫輶車奉使繼履諫垣而  
執簡驄馬蜚聲巴蜀巡方不負輶軒之寄河汾陳臬  
聿消獄訟之風皖江則岳牧開藩吳會則封圻移鎮  
旋總師干之任懋膺節鉞之榮惟汝來旬來宣任勞

任怨凡謨猷之入告每利弊之必陳憶昔冰泮崇朝  
矢精誠而上格爲念瀾安九載沛德意以旁流籌海  
運之飛芻功歸督率祗淮巖之積習人鮮侵牟吏畏  
其明子嘉乃德昨以積勞成疾乞退陳情予休沐之  
餘閒俾從容而調攝每咨詢之下逮冀毗倚之方長  
何意沈痾竟乏岐黃之術忽披遺疏猶餘精白之忱  
用捐吏議以寵嘉爰準朝常以賜卹眷成勞而特延  
世賞錫峻秩而晉贈宮衛宜列賢良聿隆禋祀丕光  
懿典勿替前勲於戲砥柱常存中外咸知其數歷雕  
筵式啟春秋永報以馨香靈而有知尙其歆格

道光十九年七月

日





御製碑文

晉贈太子太保銜原任兩江總督陶澍碑文

朕惟宣力四方持節重封圻之寄尊賢九德銘旗崇  
華袞之褒生有自來良弼張歸乎星次沒勤所事成  
勞懋紀乎功宗宜樹豐碑式揚偉績爾晉贈太子太  
保銜原任兩江總督陶澍器資端亮學術淹通居蓬  
觀而能文章歷蘭臺而宏建白始掄材於蜀國繼視  
漕於淮壩著望羣僚足備馳驅之選受知

先帝遂邀

簡畀之恩迨朕寶祚寅承溫綸渥沛備荷諸艱之試頻加

不次之遷任以疆圻而遇事倍形勇敢寵之節鉞而  
殫忱益矢公忠挽離綱於積弊之餘獨排衆議奠河  
流於既平之後務策萬全殊榮旣晉夫宮銜異數益  
叨乎翠羽猶憶趨朝述職詢故里而親灑宸章復因  
賜壽加恩祝耆齡而遠頒珍物方謂精神素裕甫周  
甲之未衰豈期心力交殫竟積辛而致疾雖肩承暫  
釋尙思勿藥之占而手詔頻頒虛望加餐之勉聞薰  
臣之溘逝覩遺疏而愴懷軫悼有加優崇特異有功  
德於民則祀爰祔祠以薦馨香惟賢哲之後必昌更  
髮世而綿弓冶綜生平而定論諡文毅以易名於戲

績著旂常萬里重江淮之寄神歸箕翼千秋傷柱石  
之摧聿垂永譽於螭趺用表崇封於馬鬣昭茲來許  
播厥休聲

道光十九年七月

日



恩准淮北建立專祠並祀名宦祠

諭旨

道光十九年十一月二十三日內閣奉

上諭陳燮奏地方紳士請以原任總督入祀名宦並建專祠一摺陶澍前在兩江總督任內整頓漕綱修復水利遺愛在民除入祀名宦循例具題外所有該紳士等懇請捐建專祠之處著准其擇地建立以順輿情而彰政績欽此

陽明家心三十一  
名

一ノ

恩准崇祀海州儒學名宦祠

諭旨

道光二十年六月初三日內閣奉

上諭原任兩江總督陶澍前在任內整頓漕綱修復水利辦事認真不辭勞怨前已加恩入祀賢良祠茲據裕謙題請入祀名宦俯念勛勤允宜妥祀陶澍著准其入祀名宦祠毋庸再交部議欽此



A large rectangular table with 10 empty vertical columns and a header row. The table is oriented vertically on the page. The header row is at the top, and the 10 columns are empty. There is some faint, illegible text or markings on the right side of the table, possibly in the header row.

陶文毅公全集卷一目錄

進呈文

皇上五旬萬壽恭紀 五經闡福論 謹序

聖駕再詣

盛京祇謁

祖陵禮成恭紀 擬上陵歌二十章 謹序

聖駕南苑大閱恭賦 謹序

聖駕巡幸五臺山恭賦 以行慶省方為民祈福為韻 謹序

東巡賦 以昭茲來許繩其祖武為韻 乙丑散館

帝京賦 以春色滿皇州為韻 壬申大考

印心石屋山水全圖說

印心石屋南崖圖說

印心石屋北崖圖說

嶽麓印心石屋圖說

金陵印心石屋圖說

滄浪亭印心石屋圖說

金山印心石屋圖說

焦山印心石屋圖說

進呈文

皇上五旬萬壽恭紀

五經闡福論  
謹序

臣

澍稽首頓首言恭逢

皇上五旬萬壽慶辰薄海內外鳧藻闡歡

微臣

供職西

清親依

福寓飫景含和莫名高厚遠惟三極彛訓其書言經經

者恒久之至道不刊之鴻教

皇上精德立中淵心汲古

御論焯焯彌綸聖籍竊意以

聖人之論發聖人之經卽以聖人之經闡

聖人之福親切宜莫如茲昔漢臣王褒作四子講德論  
謂欲推主上宏風俗而騁太平 臣生

堯舜之世視褒所稱何啻霄壤爰斟其式綴儒臣敷繹  
之辭爲五經闡福論一篇每條謹宗

御論而以五經之言福者緯之行鑠鋪芬敬祝

聖天子億萬禩無疆之福文曰

歲紀祝犁月在橘陽

壽寓延洪

福林普汜迺有五經儒臣翔泳題期嘔嘔滄滄卽肄業  
所及敷茂矩而繪龐禡於是業易者肅然曰蓋聞

聖人之紹登大寶位也嘗

御經筵而論易其於元亨之義曰諸福滙集於惠心之  
義曰錫福靡有涯涘煌哉言福乎悉經六繇之碩  
畫矣

臣試繹之

聖人握乾符闡坤珍巽令廳發兌澤湧流經文緯武則  
離以燭而震以警焉選政調風則坎以勞而艮以  
成焉用是條修葉貫醇美譽然享

帝尊

親爲旣濟之禴祭受福簡賢登俊爲井之王明受福道懋  
裁成爲泰之于食有福而猶際鬼神福謙之旨貌

一三集 卷一 二一  
號不已虔鞏搗勞日慎一日微天下之

至聖其孰能與於斯且夫飛龍在天黃裳元吉凡易之  
爻五爲君德而衍著之數起於五十計過揲之策  
九其四爲三十六則爻爲奇六其四爲二十四則  
爻爲偶奇爻百九十有二策六千九百一十有二  
偶爻百九十有二策四千六百有八二篇之策凡  
萬有一千五百二十引伸觸類粲乎盛矣而皆陰  
茅大衍與

聖壽五旬之生生延福以至申錫無疆者繩執而契司  
也語竟業書者起曰是河圖之祕也猶有洛書焉

是演福疇載在尙書臣觀尙書之文渾渾爾灑灑

爾噩噩爾皆帝王輯福之大源是以

皇上於五十八篇皆系以詩實以心法治法先後同揆

如書言作福不敢動用非德則

皇上之執中建中也言允升大猷膺受多福則

皇上之釐工熙績也言澤潤生民永膺多福則

皇上之俟志從欲也然而不釐

景命烏奕麻祥開闢之門罕從蠡測蓋讀

御製是彝是訓論而恍然曰懿鑠哉粵若稽古紹天闡

繹其孰有如我



皇上之默通錫福之原者乎夫福疇一日壽而握其樞  
者皇極由初一遞之中於五由六九源之中於五  
協五紀以順五行極之建以五又三德以推五福  
極之行以五五建極而福以歛五保極而福以錫  
允若茲作福惟辟所由仰

天子作民父母也若夫疇數四十有五主五用九由七  
八九六參互成十循環不息暢流地符又與河圖  
之五十居中隨在見十者表裏棣通惟

帝相協極實平康曰五日十豈非粲

皇上之豐福者哉業禮者越席起日得其數矣未暢於

理也夫

聖人之福悠久無疆而索劍鐔艦惟五之云將由百齡  
至萬歲由萬歲至億兆京垓其奚辭以述臣嘗讀  
味餘書室隨筆之第四十一章言中庸位祿名壽之理  
謂尊榮福厚非天有私而歸本於德爲福基休哉  
券壽以理

聖人所以禋福中外者可知矣蓋先王有大福必有禮  
以樂之禮者理也所以興福祥之本觀曲臺所記  
日祭則受福日爲民祈福日富也者福也日福者  
備也備者百順之名與

皇上泰元增筴壽以政年者類若畫一而周禮太宰詔  
王生以馭福都宗人致福於國行人國有福事則  
令慶賀之梓人爲侯辭曰諸侯百福則

皇上廓紘恢綱均禧九有之經也而尤莫燭於春官六  
祝祈福祥之文曰順祝我

皇上化光金鏡之福也日年祝和調玉燭之福也日吉  
祝春臺熙衆之福也日化祝桑田沛澤之福也日  
瑞祝絢雲灑露之福也日筴祝炳符光緯之福也  
洋洋乎若德

帝者之上儀疇能亘之而辭日六祝適與六寓臣民臚

歡祝釐者旨相印也儀禮有曰壽考維祺介爾景福承天之慶受福無疆願以敬祝

聖人焉業春秋者進曰媿哉論乎其道首首然萬世爲

福者乎抑猶華離其辭也於實際靡微微臣學於

史氏親見

聖主一切實心實政踰繩越契請得展采錯事效魯史

例書之夫承天撫籙纂聖膺圖傳所謂如天之福

也則嘗綜

聖主寅承之實書

授

附方家之公在之先

王

受禮成書

東巡恭謁

祖陵書每歲

親祀

郊

壇書每晨恭誦

實錄至於辛

祈戊

社占雨量晴

聖德

神功卽景紀事蓋不勝書也夫統輯羣元薰風潛鬯傳所  
謂民和而神降之福也則嘗綜

聖主惠民之實書

賜民爵粟帛有差書普免直省地丁錢糧書賑貸災民  
書給貧民棉衣至於矜恤庶獄惟允惟明範俗甄

風

旌褒節孝又不勝書也夫右規左準任杖稱材傳所謂

國受其福蕃釐老壽爲信君使者也則嘗綜

聖主官人之實書

加恩晉贈師傅書

優禮老臣書

錄用賢良大臣子孫書

覃恩封贈臣僚祖父至於每日

召見廷臣引

見白爾織善必錄酷墨必懲又不勝書也夫黼藻太平

色授六服傳所謂不僭不濫湯以之獲天福者也

則嘗綜

聖主懿文鑠武之實書

御經筵書

臨雍釋菜書

幸翰林院書

特開恩科廣鄉會試中額書增輯

皇清文穎書平苗匪書平教匪書平洋匪至於組仁織

義

御集萬言射麇逐鼠矢無虛發又不勝書也夫聲教諧

燮雷風通響傳所謂同福祿來遠人也則嘗綜

聖主綏遠懷方之實書

頒敕廓爾喀書

敕封越南國王書

詔增琉球國曆度入時憲書至於高麗西藏蒙古外藩



萬樹園宴歲蒙

恩賚者又不勝書也蓋

聖人訓深稽古而尤精於春秋如

論能者養之以福則究極體信達順之微

論國之興也以福則深探天命民畀之本彼交匪敖福

將焉往載筆之臣所爲大書特書屢書不一書也

業詩者有睟其容作而曰德至矣福盛矣侯其禕

而臣無辭以益之雖然和於倪者天也鬯於節者

人也言之不足則長言之咏歎之手之舞之足之

蹈之如是者莫如歌詩伏讀

御製既醉備五福論辨析感應之幾而歸諸法

說行仁以凝承

寶命固以詩言徵福符也 臣觀三百五篇中言福之文五

十有二言壽之文三十有一而互文見義日報以

介福萬壽無疆者三焉誠以匪德福無由致匪壽

福無由徵也 臣請祓飾厥文廣為新什敬祝

鴻釐拜手稽首颺言可乎則應曰諾於是為之歌風曰

皇斟乃澤衢而酌之樽馨以醴和以醇醴乎哉兆人

皇振乃俗春而風之風日以煦膏以融豫乎哉九鴻

皇錫乃福壤而鼓之腹嵩以呼華以祝莘乎哉百祿為

之歌雅曰穆穆

昊天煌煌日月於煜其福緝於有德我

皇之德抱一構巍我

皇之福躡五騰徽徽之頌矣光于

列祖民之熙矣式歌且舞式歌且舞

皇之世多祐謂天蓋高以莫不覆謂地蓋厚以莫不畜

慶有道長祝無疆

壽爲之歌頌曰於鑠

列聖累洽重熙不顯矣我

皇撫之不麻矣萬福觝之翼汝左右天工亮之釐汝士

女簪僖饗之哺之節之被之纈之禮義維之詩書  
餉之我

皇之福自

天賦之旭日暹矣集於龍旒瑤星焜矣貞于上宙敬之敬  
之

天壽平格我

皇允惟德之懋歌既闕相與歡呀其凝目胎心醉愔愔  
乎颺虞韶之音颯颯乎暢鈞天之韻咸含和而吐  
氣日盛哉乎

聖人之福請書之以爲論

隆一ノ家ノ台身  
老一

ナ

--	--	--	--	--	--	--	--	--	--	--	--

→5171, 37 立板 60Y3A

聖駕再詣

盛京祇謁

祖陵禮成恭紀

擬上陵歌二十章  
謹序

臣聞聖人之孝莫大於繼述太廟之內敬矣雅頌所歌侯其禱而至若寢原重地靈魄是依史記載武王九年上祭於畢是卽謁陵之始而詩缺有閒漢嘗以正月上陵百官四姓諸大夫外國朝者侍子計吏咸會自後其禮遂顯明帝分樂爲四品一曰大予典郊廟上陵之樂章帝元和中有宗廟食舉六曲加重來上陵二曲爲上陵食舉顧重來辭

不傳上陵曲侈語神怪無當於僂見愼聞之旨識者陋焉洪惟我

朝

發祥朱果

謹按長白山有池曰布勒瑚哩相傳天女三人浴焉有鵲銜朱果置季女衣吞之生男是為我朝發祥之始天女錫以姓曰愛新覺羅名曰布庫哩雍舜子以柳船蒿楫順流而下時有三姓爭長見而奇之遂奉為滿洲國主

啟宇東方

國初居寧古塔之俄朶里城在長白山東麓地近吉林烏拉古肅慎氏之墟

列祖

列宗

肇造區夏

滿洲開基後傳數世至肇祖原皇帝始遷居赫圖阿拉國語寬甸也在今興京稱

南距俄朶里城  
一千五百餘里

### 二京遞建

興京 盛京皆  
太祖所建

### 三陵在望

肇祖衣冠 永陵在 興京西北十里尊藏  
興祖直皇帝居中

景

祖翼皇帝居左

顯祖宣皇帝居右

太祖高皇帝福陵在

盛京東二十里

太

宗文皇帝昭陵在 盛京西  
北十里相距均在三百里間

### 世祖章皇帝定鼎燕京

### 恭申祭告

### 聖祖仁皇帝三舉鴻儀

康熙十年二十一年三十  
七年凡三謁 祖陵

### 親製碑頌

### 留貽寶劍

仁皇帝親製 太祖  
太宗聖德神功碑頌又留寶劍於實勝寺



世宗憲皇帝潛藩代祀於赫孔虔康熙六十年秋憲皇帝時在雍邸奉

命代祀

福陵

高宗純皇帝四詣

祖陵禮制大備乾隆八年十九年四十二年四十四年凡四詣盛京

訓諭周詳乾隆戊戌九月後世子孫不可不躬親閱歷周覽風土自當惕

然動念感

祖功並

天祐而仰諭尚書房存記

煌煌乎禹謨周

誥之遺已

皇上握符闡珍道光

授

受唐虞以來未有斯盛而追溯

付畀之隆實自癸卯

侍

驛東巡

面稽

列聖之日始

伏讀

高宗純皇帝歸政禮成詔曰自

上帝並於盛京恭謁

祖陵敬告

列

祖蓋乾隆四十八年我

嘉慶十年秋七月會舉謁

陵大典至是十有三年矣霜露既濡

宸衷有惕緬維

創業維艱守成匪易安不忘危古之訓也戊寅七月甲子

六飛再涖

陪都肅將祀事行慶施惠

德音孔昭冬十月

駕還

京師

大禮告成普天同慶 微臣 給事黃門職專

綸綍軒轅倍切摹繪難名爰斟漢曲之遺用補周詩之

義為上

陵歌二十章謹拜手稽首以獻

龍旂緜纏五雲開曉霽千山淨宿埃

連日多雨  
啟鑾日始霽

一十三年秋露思重瞻

車駕上

陵來

清廟生民太史詩千秋

帝業繫敷思夕陽鞞琫垂秋影猶是依京遡澗時

百年瞻就切堯民

輦路會傳頹類辛

詔許披雲闕日角果然

天子本天人

詔許沿途士  
庶跪仰天顏

虎踞龍蟠此

舊邦蒼垠風俗總敦龐澄鮮太子河邊水仍照金根

豹尾雙

崎嶇

締造每思艱日月猶森虎豹關

三關一日雅爾哈漢語豹也二日代岷三日札哈

萬葉星榆峩

寶頂極天

啟運是高山

永陵山周十里

興祖陵頂上

產瑞榆一株圓蔭城匡順治十年封其山曰啟運  
帝親製神樹賦以紀之純皇

玉柱擎天聳絳霄

福陵山周二十五里順治八年封其山曰  
天柱

山深木古萬靈朝鷄鳩聲裏安居樂猶記當年

拓藩遼

太祖自興京遷瀋有鷄  
鳩羣集遼陽迺外藩歸順之兆

載瞻

隆業翠周遭

昭陵高六丈有奇順治  
八年封其山曰隆業

鬱鬱

昭陵地位高終古

英謨存想像嘶風二白立拳毛

昭陵前鐫石馬二  
一名大白一名小白乃

文皇帝御以破敵者

帝體

豐碩乘小白日行百里大白日五十里

香升

闕殿啟

隆恩

謁前

陵次日於隆恩殿行大饗禮

陵九拜

心殷洞屬存曉炬萬行煙五色丞嘗長此篤

蜀文設公全集

卷一

進呈文

五

文孫

儉勤渠獲稟

高

會冠鎧重捫思不勝

長寧寺尊藏

太宗冠服實勝

宗所遺弓壯士弗能開矢長四尺有餘

欲識

神謨垂裕遠霞縹炳處卽心燈

國初舊俗以糠和膏傅蓬梗爲燭日霞縹又曰葛

燈行宮設之以示無忘儉樸

懷柔分

命辦香拈

謁陵後遣官祭海暨渾河遼河太子

親祭北鎮

鑿巫閭山

澤被高深効職僉滄海爲杯山作豆呼三聲起屋籌添

河山帶礪重勲銘奔奏長懷沐櫛情旨雨

君王親酌墓

謁

陵後

親奠

國初功臣費

英東揚古利之墓至額亦都墓大雨仍

酌爵

親臨

故山喬木倍欣榮

閭闔晨開拜

冕旒

駕至

盛京

御崇政殿受朝賀

衣冠星謚五諸侯從

臣

顏色

瞻

天近繚繞熾煙上

綵旂

國語呼爐

煙爲熾煙

苾芬匏豕展親親

宴

盛京宗室於

篤恭殿謂之敦叙筵

飲食



君宗荷

聖仁怡啟

崇謨尊

玉牒定例十年修纂玉牒一次尊藏盛京崇謨閣本年適值告成恭送謹度歌詩

先為譜振麟

燕衍

君王在鎬宮賜王公大臣及盛京官宴於大政殿蓼蕭喜咏福攸

同丹楓也醉

天家露葉舞階前一色紅

橐鞬負弩効前驅萬部名藩扈

屬車蒙古四十九旗還有東風占海外魚龍拜舞邊

天書朝鮮國王李瑛遣使起居甚恭特

風上聲風雨去聲雨日陽陽轉歉為豐

帝降康禾黍如雲仍

賜復蹕路所經蠲免錢糧十分

恩波何處不汪洋

分金給綺樂

恩寬賜從臣額廣青衿赦放竿奉天承德俱廣學

及弁兵金帛齊向十亭秋色外額並太祖建大政殿

以下減為諸王議政之所心歌腹咏奉

宸歡

澄海樓高接翠微詩成禁體

睿毫揮

澄海樓在  
山海關外

命從臣聯句倣宋人禁體凡字涉水

純皇帝嘗登以望

旁者不用此次

是體

迎春柳色關門曉帶得陽和

一路歸

三巡四至

典欽承

家法由來重

繼繩為溯

堯心增

舜慕迴

鑾重此詣

東陵

皇帝裕陵皆在直隸省遵化州之  
章皇帝孝陵 仁皇帝景陵 昌瑞山是純

為東陵回

鑾日恭謁行禮

啟

蹕剛逢七月天

元旋

告至小春前

啟鑾前日祇告 先殿 駕旋告成事如初禮 奉羔羊朋酒觥

稱

壽

十月初六日 萬壽慶期駐蹕玉田縣之興隆寺行禮 賜名萬壽興隆寺併賜寺前河名

司之之之集 卷一 進呈文 七

榮輝河越  
四日回京敬上幽風第一篇

謹按嘉慶二十三年

聖駕東巡再舉謁

陵大典吾師時爲吏科掌印恭進此冊特邀

睿賞將全詩二十章

選入

南書房詩架圖以供

幾餘丙覽喜起拜颺之盛視唐人十聯詩在御屏風何  
啻倍屣洵乎盧牟乾坤之手彪炳雲日之光已此

詩渥蒙

御選且於我

朝

肇基之迹尤詳高文典冊人思先覩爲快爰因肄業所及

注釋以公同好

受業鄭際昌

謹按王充有云鴻文在國盛世之驗也吾師依光  
日月摘藻星雲茹古涵今韶英軼響此冊曾經

御覽

選登排架藝苑芬談尤足規和聲之應云

受業奎照



聖駕南苑大閱恭賦

謹序

臣聞治天下有大柄武緯協於文經同六合爲一家仁育因而義正在昔風雲演陣龍蛇傳軒帝之經千羽宣威鳥獸舞虞階之化三十六扶胥之乘折衝而簡螳車二十一小雅之才鞠旅而賡魚服蒐聞石鼓西京則趨趨摛芬野有干城南國則爬縱矢咏况夫淬兵繕甲校技程能安不忘危整宜以暇周家之歌載纘是繼三單管氏之語能諧必先五教作旗振鐸講攻戰進取之方提鼓執鐃習疏數疾徐之節同袍同澤義主綏心如虎如貔功



資練識載在方策有可徵焉欽惟

皇帝陛下得一奉宸斟元履極三精耀采八表騰輝蚩

尤之尾全摧庭氏之弓弗設光宣日月九埏歸白

阜之圖響答風雷十曲奏黃神之樂往者山藏槃

瓠曾迪帷籌苗匪蠢動藪聚荏蒲頻勞網祝教匪

蔓延豫楚蜀三省櫬槍一掃軍中之猛氣先揚角

鼓齊鳴釜底之游魂悉懾關荆榛為道路豈有蠶

叢達州餘匪既平改牖饗餐以詩書遂遷鶯谷苗

向學近復其地為綏定府長鯨就戮樓船標橫海之名洋匪

加恩予以中額出沒海島大兵追至魚文雉遙來溟澥有不波之

山下殲之餘匪悉平

瑞越南請封得 版圖

天府編重譯之壘民貴德嚙隴麻里野番峩眉西南野

人販圖以示 昕鼓橋門列三山之侍子琉球諸國

九功煜爚

七德昭宣出二十八宿以占星五方軌順統四十九旗

而就日萬樹園開蒙古諸藩歲至熱河瞻 延喜珍

鑄茗華玉刻烏弋驗風之使齊尉堠以瞻

天白狼向化之臣抃衣裳而粹地威讐無外極建於中

迺猶無逸

厯懷習勞秉則占行師於義易考教旅於周官豹尾垂

蕤既見於

心法

親承之日 嘉慶三年冬 魚麗合隊更徵於  
車駕閱兵

橋山

展謁之年 十年秋東 巡謁 盛京閱兵 方古北口之停車

龍旂肅簡 七年秋古 迄五臺山之返旆

鳳輅平臨 十六年春 巡幸 至於蒐舉湯山夾路

則花迎芝蓋 獮行灤水入哨而草貼莎茵歲以為

恒事立於豫蓋戎兵致詰關

聖主之經營而弧矢以威實我

朝之

家法溯自

帝謂詢仇之始甲甫十三

癸未征尼堪外蘭有兵三百甲十三

副迨及

天麻右序之時旗分二四

設黃白紅藍四旗外又增四旗太祖既削平諸國於原

參其色鑲之行軍時地廣則分爲八路地狹則合爲一隊

九國咸歸率服葉赫烏拉

九姓之國合師來侵

太祖戰破滅之由是遠近懾服

萬年遂擴

洪基

萬於薩爾滸自此

太祖以數千人破明兵二十

帝業日隆素練生風吼龍

媒而蹴踏

所乘馬曰大白小白

紅衣吐焰炸雷鼓

以碎訇

天聰五年造紅衣礮

柳箭分行崇德六年

王貝勒大臣子弟習射壯者角弓羽箭幼者木弓柳箭不可荒廢

教誨深於冠服

射舊制毋效漢人服飾 太宗訓守冠服騎

金厄拜

賜攻遵化城時小卒薩克哈圖先登

太宗親酌金厄以勞

褒寵逮夫螯弧

攻永平時副將阿山葉臣肯火登城

毋再令攻城以示愛惜之意 太宗諭曰此我國家第一等材勇人也

勲紀八圖奮

天戈而颯爽

乾清宮尊藏 太宗戰圖八册

功成一戰廓

帝業而焜煌

順治元年破闖賊於一片石其年九月 世祖章皇帝入關定鼎 乾絡鏡

清泰紘砥定旌麾所指塗山無後至之邦風雨來

臨海內有其蘇之望然猶挽烏號以

示訓

順治十年

世祖幸南臺持弓顧謂諸臣曰我

暇常念肅馬政以修戎上駟院初名御馬監至

於沙漠風清追至朔漠見明永樂中碑文有永清

臣曰真永清矣坤維日麗康熙六十一年

坦潛往西藏劫掠又遣大兵擊敗之今策妄阿喇布

武備勤於訓練之所致若憚勞

御神槍以刺虎飛長箭以射麋聖祖常以三眼神

十二把長箭圍中射鹿率貫腋洞胸

睿畧遠揚青海於西域最遠世宗憲皇帝遣師平之

豐規世守雖宵衣旰食未暇

巡行

世宗諭有云子之不往避暑山莊及木蘭行圍者蓋因日不暇給後世子孫當遵

皇考所

行習武木蘭毋忘

家法也

而賞春罰秋

特頒綸綍

游等

世宗有特諭提鎮副將參若乃早承

諭旨三道頒行天下

聖眷

熊突起奔前

聖祖嘗

命

聖祖御虎鎗殪之事畢入武帳

曰伊命

貴重

揭四知以燭幾

高宗御製四知堂記謂知微知彰知柔知剛其卦辭乃利建侯行師知幾實

握用兵

之要也默運

神樞備

十全而

紀烈全 高宗武功十地窮八柱甌金昭有截之休職

御製有記 効百靈磐石鞏無疆之慶

恩昭捷伐以萬方共底生成

章凜率由惟

聖主克勤纂紹偉茲

南苑近拱

北辰包五海以紆迴是稱海子南苑又曰南海 控二河

而縈帶遠制河流海子外有團鳳二河流至天津

刷綠野平鋪紅門九達苑有東西南北四紅蓋元

明之舊園至



皇代而彌新鐵馬金戈景雄圖於

開國

太宗伐明圍燕京分兵南下過南海子射銀黃羊鹿兔順治十三年十四年均於此舉行閱兵

花火樹仰同樂於

當時

康熙十二年十六年十九年三十四年四十年四十二年皆幸南苑閱兵又元宵於此陳放烟火

作有

世基

雍正七年幸南苑大閱車騎營兵繩宜

祖武

乾隆四年二十三年幸南苑大閱小試信閑之步入兔齊蹲乾隆二年

高宗御信閑旁環西域之人千旂共颯乾隆

二十三年大閱哈薩克布魯特塔什罕回人等皆許預觀蓋

祖

三三三

宗之大閱廿三次

我

朝舉行大閱

太宗三次

世祖二次

聖祖十二次

世宗二次  
高宗四次

而在

南苑者十有一焉神泉沃衍宜屯細柳之營芳甸周

環詎數長楊之榭茲者草肥水暖金絡嘶風絮點

香霏玉鞭耀日

皇上爰以省春之吉謁

珠邱而載辰旂遂於返旆之期飭戎行而開甲帳八風嘹

響摩空颺赤羽之旌五緯分芒拂地舞黃龍之纛

激火珠而沸海掣金汁以排山九天九地之師十

盪十決之陣堂堂乎正正乎保大定功之

駿業安民和衆之

鴻猷也微臣測管難名簪毫是職臚情采韻敷事成篇

頌

景祚於京垓六軍鳧藻和凱歌於鞭鐙三月鶯花謹拜

手稽首以獻

粵以元默涪灘之歲候大梁而司太皞

皇帝乃肄良辰飭羽葆選中黃馭飛阜簡七萃以懋和

詰五兵而拓造

聖武靈靈

天威電掃徒御不驚旌旗載道門開

苑北祥雲占紫極之花天近城南旭日麗春田之草

邁大成於展也句咏車攻答戩穀以宜之詩成天

保夫其包海淀以源瀦擴仁虞而院大苑中有元時仁虞院

舊址區團鳳以洗汪蠹瞭鷹而杳靄瞭鷹臺高六丈徑十九丈周徑

百二十七丈恭值閱之典例於此處舉行臨煙樹遙拱乎關門析木

近環乎襟帶九十四泉之跨突漢湧神漿舊稱苑有七十

二泉實則團河之一百廿里之逶迤地當都會舊稱

海子周一百六十里實止一百二十里溯始基於元代會置泊苑在元時

為飛泊而限芻蕘編

訓武於

先朝每選徒而歌旌旆

皇猷布濩因知震疊之在茲

家法

欽承羣仰規模之無外先是司天練吉以貞期按大閱之禮兵

部奏請舉行得旨移欽天監司馬陳兵而簡

誼閱武吉日乃下所司戒備如式

乘前期二月八旗佐領各出兵卒為大閱之衆入

練兵於張演武場

黃幄之琴麗啟紅門之峻嶒周廬列而蟬聯馳道開

而虹亘前二日有司豫於行宮供帳列御

內八旗將校甲軍令既申部分斯定若網在綱有

兵依式布列

策必應雙雙翼比音聲已禁千官六六營開意氣

直操全勝屆日會食列陣建大纛為軍表左翼以

為火器營次而東西上右翼以次而西東上最前

委散秩官禁約御營外左右設鑾儀衛蒙古畫角

六營卒一萬八千奏車響素擊斗心雄軍容嚴整

七百七十餘人歌大樂作奏壯軍容之章

雅奏冲融軍陣既嚴司礮舉礮三鏡

天子於是擐綠油之金鎧佩紫阿之珣弓歷九成之崇

阜從萬乘之元戎兵部尚書奏成列皇帝旌

麾彗景組練捎空尾搖竿豹蹄躡花驄鳧履追陪

繞陣圖而自左兵部尚書奏請閱兵皇

王公大臣前引後扈親軍舉黃龍大纛有執事王

公隨豹尾班後皇帝入自左翼出右翼

進呈文

周視隊伍畢還至

營釋橐鞬

御

龍旂璀璨拱大纛以居

中馳驟欣瞻乎

帝則周旋宛象乎元功爾乃一聲燔葉萬隊纓繁殷山

靄動沸海螺寒鳴地中之鼓角吼松外之風湍紅

旗一展火器齊灑飛冰花於暑路裂礮石於雲端

及金鳴而焰息猶光炸以星攢結陣孔堅一氣望

煙雲之合撼山弗動四維成風雨之安

兵部奏聞

營前蒙古畫角先鳴海螺以次遞鳴司礮三舉礮  
乃行陣擊鼓鳴螺昇鹿角前進領隊甲士麾紅旗  
槍礮齊發如是者九及至第十進  
大小礮連環槍齊發鳴金三乃止既而八門齊闢

八隊分陳中開鹿角旁貫魚鱗按次以前若東西

五二一〇九三三三三三三三三

輪之行於中道聯行而進若左右角之繫於司民

大聲發而谷應盛氣作而山岫繼開鹿角為八門諸軍出鹿角外統

成列入旗齊鳴螺譟而進左右翼兵鴈綴斜行陰成列並進鳴金止乃振旅還立於初成列之地

闔陽開不愆於五六七伐陸讐水惛用輯乎億萬

千春禮成有翼師練在和

天子乃至圓幄而釋甲胄兵部奏禮成 皇帝入御營釋甲胄扈從諸臣咸

退解甲具吉服

命建橐而載干戈鬯

皇威而奏清樂迴

御輦而作饒歌聖駕還行官饒歌清樂作奏 崩收皇威之章將士依次入城

御文設入全集 卷一 進呈文 三



畫隼鼓肅靈鼉轂藏霹靂陣斂鴛鴦洞九門而豁  
達銜萬馬以經過飲醴羣游

福海投醪允飫

恩波吉已占乎地水洗欲挽乎天河井鉞參旗如覩垂

芒之作作

堯勲

軒烈倍欽善將之多多馳大丙以威宣張箕舒翼蕩由

庚而履接戛玉鳴珂頌曰

聖主當陽道磨德礪施普乘龍律調諧鳳瑞啟瑤圖祥

呈銀甕茲白乘黃瞻風采貢玉潤金聲咸歸折衷

精益求精習勞縱送爰簡車徒程其飛鞚萬卒鱗  
游三軍翼控匪日勞民師以畜衆

澤洽蒿宮

心懷松棟敬祝

昇平長依

旃幪



聖駕巡幸五臺山恭賦

以行慶省方爲民祈福爲韻  
謹序

臣

聞帝德體天挈珠囊而理化聖人在上調玉燭  
以延禧泰皇六羽之駿禮光金輅伯萬雙龍之御  
會肅璿臺譜樂府而時邁登歌懷柔澤洽命太史  
而年祥順紀耕鑿心厓矧星雲告瑞之辰正雨露  
方濡之際馨香懋典上陵披漢氏之文俎豆流輝  
祭畢廣周家之慶以妥以侑惟

一人永念繼繩無怠無荒與萬姓同游熙皞瞻依伊邇  
鼓舞彌形欽惟

皇上抱一式圍函三立極亶聰明而作后

潛哲性成敷愷樂以登春

慈祥施普

蘿圖允固

履綏昭奕奕之休

芝檢長凝

鼎祚茂昌昌之緯包靈囊於次五下際上蟠

位大寶以中參前張後極

淵衷合漠凝禋而同樂與民

至孝通神慎憲則聿修念

祖湖自隨

駕謁

陵之始

列聖久協於

面稽迨及

大廷

授璽之時

一德允孚於

心法三年

訓政

欽承瞻

司文之受

進呈文

屏展之

書五夜

籌功守

典切羹牆之慕春原秋補無時非耕織爲勞盱食宵衣几

事以

祖

宗爲法比以臺懷勝境實稱山右名區遠衛

神京繚幽燕而若帶高臨塞漠控恒代而爲藩是文

殊師利之道場爲摩騰法蘭之初地拓祇林於金

界智炬長然闢覺路於珠庭慧燈無盡偕五百應

眞而宏法化合一萬菩提而發光明碧樹栖深水

晶谿宇青蓮相好金粟開園勾龍爽之畫圖勾龍爽蜀

人有清涼山圖舊推紫府阿育王之寶塔摩騰竺法蘭東漢時入中國見

清涼山中有阿育王所造寶塔因居之近拱丹青昔當

世祖之年兩

命進香之使粵若

仁皇之歲三瞻

効駕之儀龍象承

恩林泉增潤列伊蒲而給供薰篤耨以凝煙聲是步虛百

日演梵王之唱世祖在五臺道場百日光眞澈漢九霄



開菩薩之容

聖祖幸五臺五色雲見中有文殊像

五範金熙難於

紺園礪石焜煌於法界逮

世宗之秉德有

雍邸之

天章安穩而度青城迤邐而登寶地我

高宗純皇帝三奉

安輿六勤

法駕

祝洪釐於

多壽頻占天上之光明敷愷澤於曼陀徧作人間之功德

禪林忍草匾額入

宸咏以生春德水香林映

天題而煥采圖呈瑞雪

命董邦達圖五臺雪景

開函則樹樹皆花

義指毘雲啟鏡則心心是月  
藝名香而四色

供四色香

仙花襲優鉢之華揭福字而三方

御墨照那羅之窟

有那羅延窟

人依淨土

恩暉與慧日長輝數紀恒沙

德意共慈雲廣蔭

皇上以繩

先之

聖宏錫羨之

仁妙闡上乘會真如而納祿

運光下武遵

往烈以

巡原方置臣請

幸之初正薄海祝

釐之日歡臚動植山呼應

萬歲之三

瑞紀平康

帝錫協九疇之五遂承

特旨

俯允

巡行皈依用慰夫諸藩瞻就俾綏夫億衆

龐禡是迓凝承而匝宇歌仁

茂矩斯斟哀對而敷天有

命乃猶

念太平不資於粉飾古風宜屏夫繁華苔榭松廊

行殿謝葳蕤之采村簫棚笛沿途無點綴之文古刹

流輝

敕要工則

丹毫

親注

御筆點出五臺要工十處其餘之寺皆仍舊不加粉飾

名藩扈

蹕

塵遠勞則

諭旨先頒十行遠沛

龍章隔歲有蠲租之

詔四業永恬鳩戶盈衢聞後后之歌茲當春序方融詔

華倍麗杏花菖葉農事維勤鳥語蛙聲田功正茂

爰以

謁

陵之便聿舉

金根遂於

咨岳之餘

親臨玉府禮明樂備

湛恩允洽於

鴻龐愛著愨存

茂典彌光於

駿烈

昊天其子三靈叶而共慶

昇平

先祖是皇百祿道而式昭維肅川修岳効

釀化潛孚蝸動蠓飛

題期載鬯合綿區而飶

德宇游合雒之初統亘璿而臚誠壤擊康衢之上洪範

之文九五福衍萬策以祝

崇祺小雅之才廿一人賡九如而稱

戩穀微臣欣逢

聖世仰睹

宸旂木樹十年化雨荷

作人之盛花開三月春風當鼓物之辰

命太師以陳詩菁莪

澤渥效華封而進頌葵藿心傾謹饗忱抒思仰釋  
行慶

省方爲民

祈福之意摘韻成賦一篇拜手稽首以

獻

伊

聖人之

錫福仰寰海之鏡清四序調而極正五緯協而階平  
聲教光於日出



號令捷於風行九垓悉暢百室咸盈

泰柄扶而運占當午

乾綱廓而物咏由庚四極四和闢闔妙寰中之應一游

一豫壺漿觀道左之迎監

成憲以無愆攸行率

祖祝

太平於有象所利惟氓繩

武

心殷不憚捫參而厯井

巡方

典懋依然課雨而量晴維時歲紀重光月占陽令禊修  
已而春深景候寅而晷正青疇之翠浪初交紫陌  
之香塵乍淨柔桑枝妥天邊之雨露尤多嫩柳烟  
霏郭外之清明正盛綠波碧草春水新生翠樹蒼

松

橋山遠眺望

寶城而瞻謁

世德作求

脊壘巘以登臨

大君有命蓋將

薦肝饗於

珠丘遂乃

幸神皋而展慶也爾乃肅中黃馳大丙策追風躡流影

翠葆垂蕤飲飛傳警

龍罕琴麗

鸞鑣修整紫燕回翔而陸離斑蚪蹴蹋而精罔星廬

環拱以羅羅露寃旁隨而井井清風曉汎

躡路烟凝好雨晨敷征途塵靜黃圖三輔春生

御輦之光綠罽千層翠射晴山之景玉河冰泮嘉魚含

沫以嬉遊聖水波開寶馬臨流而葱靚景

鴻軒於蕙坂地暢

宸懷映

華蓋於芝田歌聞春省

帝車臨處祥雲開寶刹之天

仙仗行來勝蹟豁金剛之嶺夫其山蟠震旦地號清

涼鏤銀作嶧斲玉爲岡蓮浮佛座藥茁仙房炎天

雪積燠谷冰藏磎迴磴復棧轉厓長矗蒼霄而上

狷俯紫塞以平望三色是香雲之路六時皆花雨

之鄉奈苑宏開妙德栖禪之地竹林高啟竺蘭選

佛之場拓祇樹之瑰觀金城肅穆湧闡浮之化宇

玉碣輝煌青髻雲中繞天龍於八部白毫光裏現

靈鷲於十方燦瓔珞之紅樓慧炬永光初地啟琉

璃之淨域相輪長轉齋廊則有峯屹研伽名山山高

秦戲名山厓聳秘魔厓名泉流品字泉名石談二聖之奇

有三聖冰結萬年之瑞萬年冰地名印明月而池空明月

池對談石燭紫霞而谷邃紫霞谷洞深則七佛洞名垂輝澗古

則三珠泉名表異螺城地名峯律以環青獅窟地名龍葱

而拱翠清冷功德功德池之源燼灼莊嚴華嚴谷之地

栖賢谷口地名開法會於前三現聖臺邊地名表宗門

於不二香林寶月匾名碧山之法殿巍峩定水心蓮

黑峪之靈根清閼玉池地名雲滿切利匾額稱天金閣

山名煙霏羅喉寺名起寺景高山而歌

聖德大孚寺名之院額長懸宏覺路而演

皇禔普樂菴名之菴名有為

天子於是駐玉駟憩文駟凌業巖俯嶙峋陟寶陞際神

齋挹射虎之川流

興懷

神武神武泉在射虎川之上履臥虹之梁石西巡橋

聖祖射虎於此得名建時聖祖

緬想

進呈文

前巡

寶墨高輝景

天懷於

靜寄

齋名  
高廟御書

層巒遠峙攬

聖蹟於

恒春

堂名  
高廟御書

地古而華林伊邇山空而斗室維新殿

若泉名綴雁堂之

御匾華嚴

海名耀龍海之

溫綸西來則慧照空圓

書懸月鏡

高廟御書  
鏡空圓匾額在西臺

東望則霞光晃漾

額表天闈

霞表天城  
額在東臺圖南

標錦繡之峯仙花證果

四字額  
在南臺拱北

揭衡杓之義禪窟應真

四字額  
在北臺

惟中臺之內岌納五頂以

高峻八解源通漚龍參於性海三明路廣耀

鴻藻於花茵

俱  
御製聯中語高廟

誦自在二字匾額之

璇題

心原印佛

賡

引懷堂名之



瑤什事本勤民處處

憑臨悉仰

祖功而

宗德殷殷

咨度羣欽

舜哲而

堯仁斯時也峯巒貢秀邱壑呈暉祥氛密布瑞靄輕霏吼

華鯨於丹嶂歌珠鳥於翠微慧日光乎十地台星

拱乎

六飛於焉闢四明之館啟八達之扉進河汾之章服

來雲代之儒衣茂三登以

錫愷

命九扈以

勅幾丹紱

頒而冠裳煜彩

紫泥賁而黼黻增輝吉士矢飄風之咏羣工吟湛露  
之晞白叟黃童和氣共徵乎鼇抃青山綠水清光  
遠映乎

龍旂莫不頌厥猶於翼翼而歌來假之祈祈

微臣

恭

逢

盛典快遂瞻依沐有腳之陽春心歌腹咏祝無疆之

景祚

文煥

功魏乃作頌曰

天作高山太行矗矗萬疊千尋趨於臺麓五頂中蟠山迴

嶺複厥號仙都是稱靈谷泉轉花霏峯圍錦簇瑞

氣所貞

秦陵是毓日月周環雲煙紛郁

祚我

大清

景命有俶敬惟我

皇誠祈典肅春祀秋嘗苾芬薦馥松柏

親瞻

喬陵往復歆格所昭

神光燭煜

祀事孔明

推恩率育聿舉

時巡載勤

華轂以

省冀方以綏藩服

蕃祉是延羣黎在鞠

治洽登三禮光

御六九有均禧百朋懋福北里登禾西疇足穀山無獮

飛林有仁圃並樂

生成同歸

疇覆茹醴含和飫心饜腹嗶矣嵩呼襲乎華祝

帝德姚姚

聖風穆穆於萬斯年

受

天百祿

東巡賦

以昭茲來許繼其祖武爲韻  
乙丑散館

蓋聞達孝之情首崇繼述邇隆之世兼采風謠是以雙龍賁夫夏姒五瑞輯夫虞姚畢邑修儀演姬宗之寶錄沛都整駕驟漢氏之金鑣監成憲以無愆禮交樂舉念舊典以時式武穆文昭斯盛事堪稽諸古帙而隆文尤重於我

朝懿夫

舊京之啟宇也天開靈域地闢神基岫巖熊岳堅其衛混同鴨綠導其支長白摩穹聳嵯峨而作鎮巨瀛環浸跨浩淼而爲池辨方則震取諸生雷出叶

長人之瑞正位則丑言乎紐樞臨昭應運之奇念  
沐雨而櫛風

四聖之經營伊邇緬兌松而拔棫千年之

精爽在茲規模既富形勝特開鞏金湯而內固擴玉壘而

外恢維昔

聖祖撫基輶軒曾至亦越

高宗御宇旃旆頻來刻玉披圖證遺文於冊府鳴珂戛珮

修盛會於璿臺蓋

本朝之家法所在實萬禩之洪度所該我

皇上心切觀光情殷纘緒維

舊制之宜循遂隆儀之具舉際十年而考典怡符成數之  
期當七月而啟行更應清光之序先期淨道金風  
送雨而霏霏按候迎旌玉露垂條而涓涓執轡集  
從容之彥技奏鄒枚簪毫簡侍從之材班推燕許  
爾乃金根雷動玉軸雲承豹尾鬘鬘其若舞龍媒  
蹀躞以俱騰太乙揚旃而晻藹大丙扶馭而鞫較  
謹扈從則如衆星之環璇極遵指使則如四序之  
仰玉繩當年少海承流曾侍

龍旂之遠蒞此際上台攜朗更欣

鸞輅之時乘於是歷凌河而前驟指寬甸以遙馳經



瀋陽之迢遞望肅慎之逶遲

靈殿岩巖以山峙

橋陵葱鬱以雲垂優見非遙景

衣冠而起慕駿奔咸在撫

弓劍而興思塵旅麇宗物其有矣雞尊象勺禮亦宜之因  
展義以薦歆允矣孫謀之貽厥本觀民以設教依  
然

皇極之建其典禮是將綱維悉樹

一人慶有道之長萬國頌無疆之祐亘河山之百二盡  
列輿圖周道路之三千咸親

鹵簿協時同律懷柔徧及於山川賜酺蠲租瞻就如  
臨乎風雨篤本支於百世澤洽振麟齊步伐於三  
驅威宣桓虎凡斯

聖德之宜人悉本

孝思之法

祖所以治極登三勲推成五閭闔盡樂夫豐盈遐邇俱歸  
夫鎮撫迓景祺於上宙物咏由庚臻洪鬯於中天  
日欣當午慰父老瞻依之念以豫以游宏  
國家樂利之庥乃文乃武握金闡化長看尉候之來  
同泐石紀功又何亭云之足數

降下家公三三  
夕一

四

帝京賦

以春色滿皇州為韻  
壬申大考

洪惟我

國家紹

天闡繹度地居民泰紘砥定乾幕禧均煜珠囊而照宇和

玉燭以調辰三能煥采九有登春同軌之休斯在

會極之路咸遵緬維

開國之初

肇丕基而有赫迨及

陪都是作

擴宏造以維新

卷之二 名一  
聖  
睿命自東既首出而綏四國宅

京於北爰體正而馭九垓懿夫

帝京之有制也地拱黃圖天臨紫極俯九州而稱上腴  
納四海而歸內闕星占箕尾通津敷析木之華垣  
應杓衡上道炳瑤樞之色左瀛渤之湧汪右太行  
之巒崩恒山涿水襟帶於其前鐵嶺居庸繚繞乎  
其北語和會則陰警陽開示周行則準平繩直蓋  
從來宅中圖大必南面以聽夫羣民而

聖朝奠麗安邦遂高拱而朝夫萬國爾乃呀重郭之巍  
巍豁九遠之坦坦屹

殿閣之峩峩蔚

園林之款款

瀛臺峙以烟霏

太液波而水滿通衢四闕駁擊而薈衣冠芳甸芻周  
壤錯而縈組纂會車書於一統允宜六合爲家啟  
閶闔於千門詎比五鄉爲鄴程恢監亥八方就日  
以扞葵路識由庚萬里瞻風而候瑄若乃春鼙鼓  
物春旭載陽煙浮鴈綠露綻鶯黃桃緋吐萼李縹  
含芳泮

御河之春水藹

宸苑之春光處處樓臺萬戶儼瀛洲之景行行錦繡百  
花傳天上之香聽睨睨於流鶯晴暉正麗咏陸離  
於紫燕細雨微颺春色宏敷於大地春祺普汜於  
我

皇於焉

御金輅載玉旂沛

愷澤懋

宸猷咏中田而藉舉候大采以祀修賚五鳩而厘春省  
練七萃而校春蒐

恩覃宙合

澤洽神州康樂之書齊上醇鬯之氣同游仰精一之宅  
心道光玉鏡契苞符而合撰業鞏金甌頌日翼翼  
皇輿視履所由

天眷有德

列聖貽謨我

皇受之鏡仰萬流陸讐水慄岳効川修甸昀歌禹原臚  
懷周庠登俊又畝服農疇工商旣萃冠蓋相攸東  
西玉帛大小共球肖翹蠕動莫不咸休八絃綱紀  
四極虛牟延洪錫羨億禩千秋





印心石屋山水全圖說

謹按資水發源都梁爲禹貢荊州九江之一凡過郡二州縣九東會湘水北會沅水入洞庭湖源流長一千八百里從寶慶府城外納邵水西逕新化縣轉神山東北入安化境以次收納山溪之水數十條水經注謂資水一名茱萸江迸流山峽臣所居資江濱之小淹正在山峽稍東三里許石壁對立兩岸如重門澄潭滌洑深十數丈有石出於潭心方正若印名曰印心石臣父曾結屋授書其上茲荷

御賜

寶書大小二幅

寵及林泉光生蓬蓽實臣下難逢之

異數謹繪全圖以識榮遇焉

印心石屋南崖圖說

謹按印心石之南崖卽恭摹

御書處也高七丈餘廣二十餘丈聳峭峻嶒如神鰲負  
圖當江流洄折處舟行遙望邈若天際其趾有广  
側磴一綫可脈以登稍東高巖插江岌然長城與  
北崖對峙是爲南崖門四處鑿路以度其山脊綿

延直上有石筍林立曰觀音巖谿壑幽深層巒迭  
起達於山頂曰陰功齋一支西出如大波軒起爲  
石峯頂秀出雲表其下有市曰小淹又南爲天馬  
山笏山各以形肖其西有神山遠影碧空一名辰  
山則資水所環繞而來也水至石潭月印澄澈疊  
巘嵌空遂擬圓嶠至是仰邀

天藻遂使山川發潛耀焉

### 印心石屋北崖圖說

謹按印心石之北崖有門二重厓崿峭竦控扼江  
干其門上一重卽臣幼從臣父結屋授書之所也

恭建

御碑亭以垂不朽下一重建石塔均在層崖之頂上平  
下削壁立千尋迤而上兩崖復合爲一犖确森環  
曰穿雲巖千子山在其後四時聞瀑布聲山脈西  
從香爐山來過陽石巖爲大屏崙樺香三台紅蘗  
諸山皆在其下微臣先廬亦在焉東距北崖僅三  
里許巖居圭竇荒烟在牖茲蒙

奎翰下頒當有榮光炳燭霄漢

嶽麓印心石屋圖說

謹按衡山七十二峯綿亘七百餘里訖乎長沙湘

江之西則衡麓也宋朱子建嶽麓書院與張栻講學其中今江岸有朱張渡經白卑亭至書院有乾隆九年

御書道南正脈扁額右旁有唐李邕麓山寺碑循而登入清風峽崎嶇曲折松杉滿山寺在山坳有六朝松相傳晉陶侃手植其上爲白鶴泉泉之右爲飛來石其前爲大天馬山湘水經其東從嶽麓寺轉西而北至山頂曰雲麓峯最上爲赫曦臺有高明亭稍右有禹碑亭摩崖蝌蚪七十七字其下爲道鄉臺詠歸橋濯清泉道鄉臺之東爲屈子祠北趨東

下曰小天馬山道林寺在其北山之半有陶太尉  
井亦侃所鑿又北至龍牙寺渡江而東經水陸洲  
入長沙城臣嘗隨父讀書嶽麓茲於清風峽上敬  
謹摩崖恭鐫

御書湖湘綴學之士仰瞻

魏煥咸謂與神禹岫巒之碑永峙天南云

金陵印心石屋圖說

謹按金陵城西清涼山前突起山阜曰博山岡巒  
秀特羣山環繞冶城案其前牛首山獻花巖峙其  
南三山二水繚其西蔣山青龍山障其東石頭城

雞籠山雨花臺與青溪秦淮諸水前後盤互映帶  
儼如圖畫茲構屋博山之陽勒石恭奉

宸翰

龍光煥奕遠望天印山卽方山在數十里外蒼翠欲浮  
如卿雲之拱

日焉

滄浪亭印心石屋圖說

謹按滄浪亭在蘇州府學之東宋臣蘇舜欽所構  
坊題滄浪勝跡積水彌數畝上有小山高下曲折  
與水相縈帶前松後竹澄流碧幹光影會合於戶



牖之間前撫臣宋榮續修頃復重葺亭峙小山頂  
虛敞而臨高城外靈巖天平支硯諸山蒼翠吐欬  
若浮於檐際南禪寺在其西循北麓稍折而東有  
軒曰自勝迤西十餘步有屋三楹前巨土岡後環  
清漪曰觀魚處南廊敬鐫

列聖南巡時

御賜諸臣句聯今於杠南臨水建屋恭奉

御書印心石屋石刻俾三吳之士同遂瞻仰焉

金山印心石屋圖說

謹按金山在鎮江府揚子江心一名浮玉山山頂

日妙高峯有妙高臺最高爲江天一覽亭慈壽塔  
東麓有朝陽洞操江樓飲虹跨壑曰玉帶橋宋蘇  
軾留帶處迤南有大藍若爲六朝時建

聖祖仁皇帝南巡賜名江天寺並屢

賜御書墨寶

高宗純皇帝翠華南幸疊

賜天章宸翰敬謹摹勒寶藏寺中寺俯瞰大江有石屹立

江心中冷泉在其下山東有多寶塔盤陀石下有  
欽巖聳出波心曰善財石東望海門瀾漫無際螺  
髻一點出沒烟靄中則焦山也玉帶橋稍西數武

懸崖傑竦有磴平曠北對瓜洲澄江如鏡今於其地建印心石屋恭勒

御書與

列聖寶翰焜耀江山豈不盛哉

焦山印心石屋圖說

謹按焦山在金山東十五里大江中俯控滄瀛謂之海門漢處士焦光隱此上有焦仙嶺西麓有三詔洞其下有釣魚臺山石餘脈東出爲松山寥山並峙波心焦山有寺在山之腹近臨江岸康熙二

十八年

聖祖仁皇帝南巡賜名定慧寺並

賜法書墨寶寺右卽焦處士祠左爲水晶菴海門菴山頂  
則雙峯閣其東有亭亭之北步磴而下爲別峯菴

高宗純皇帝屢

賜宸章寶翰勒石菴中定慧寺南對象山西望金山蒜山

北固甘露可挹而有也茲謹於寺東江岸建亭恭  
勒

御書並嵌詩文壁間以識賡載之忱千載一時云

右印心石屋圖八幀臣陶澍敬謹摹繪每圖各繫

以說恭呈

御覽紀

恩遇也臣於乙未冬入

觀蒙

恩召對

聖誨周詳並及家世里居

御書齋額四字以

賜時嘉平四日也越五日復蒙

垂詢江岸石壁之勝重

賜肇窠大字臣泥首祇領摩崖於安化縣資江之濱

天文魏煥永峙崇崖其初次所奉

賜書亦

俯允臣請留爲世守刻石附圖用垂不朽而江南人士

聞臣疊邀

異數咸思仰覩

日星因亦擇地建亭重摹

寶書大字恭泐貞珉以遂其就瞻之悃昔唐田游巖得

御書題門宋范成大得御書石湖二字傳爲盛事

我

朝

列聖頒賞

御筆如魏象樞之寒松堂王士正之帶經堂高士奇之西

溪宋犖之西陂沈荃之家帖首載

御題落紙雲烟劉墉之清愛堂天香深處則刻諸筆管以

識

御賜亦古人銘勒鼎鐘之意也微臣渥荷

殊施兩叨

宸翰仰

奎章而知

訓矢介石以鏤心圖成謹函

寶墨於前而敬識其緣起於後我

聖主文思光被匪特臣里之榮且永以炳耀寰區昭示

無極臣曷勝感幸權抃之至道光十六年丙申秋

臣陶澍恭紀





陶文毅公全集卷二目錄

奏疏 謝摺

恭謝

頒賜

御論摺子

恭謝

頒賜

御製養正書屋全集摺子

恭謝

頒賜

欽定大清會典摺子

恭謝

頒賜

欽定春秋左傳摺子

恭謝

欽頒大清通禮摺子

恭賀平定回疆生擒張逆摺子

恭謝

頒賜

御書受俘禮成詩刻摺子

恭謝

頒賜

仁宗聖訓全部摺子

恭謝

頒賜

御製詩初集全部摺子

恭謝

頒賜

御製巡幸盛京詩一部摺子

恭謝

頒賜

御製文初集一部摺子

恭謝

頒賜康熙字典摺子

恭謝

頒賜平定回疆勦擒逆裔方略摺子

恭謝

頒賜回疆戰圖摺子

恭謝

御賜印心石屋四字扁額摺子

恭進

御書印心石屋墨寶圖冊並謝

恩摺子

安徽省志告成議敘謝

恩摺子

恭謝

賞戴花翎摺子

恭謝京察奉

諭議敘摺子

恭謝

聖恩賞壽摺子

奏疏 謝摺

恭謝

頒賜

御論摺子

奏爲恭謝

天恩事頃 臣 齋摺差弁回院奉到

欽頒

御論二篇 臣 謹卽恭設香案叩頭祇領跪誦之下仰見

我

皇上德孚誠正



道闡精微

本治己以治人

揭心法爲治法

教宏洙泗衍之爲十六字之真傳

盛協唐虞垂之卽千百王之令範蓋惟

聖不自聖而

聖學必極其精因之

心以印心而

心契愈昭其合

微臣

學漸蠡測識類管窺仰

數極於

皇謨

訓行彌凜效颺言於

帝世贊頌難名所有微臣感佩下忱理合繕摺恭謝

天恩伏祈

皇上聖鑒謹

奏

道光三年四月十七日奉到

硃批知道了欽此



恭謝

頒賜

御製養正書屋全集摺子

奏爲恭謝

天恩仰祈

聖鑒事竊

臣

齋摺差弁回皖捧到

頒賜

御製養正書屋全集謹郊迎至署望

闕叩頭焚香跪讀欽惟我

皇上德秉生知

學承

彙訓嘉名

肇錫

元良罕

默簡之心養正

親題

聖教揭誠存之本迪

心傳而

念典紹

皇極以

敷言

賡和

天章復旦著星雲之燄

闡揚經義爲章垂日月之華論世知人義歸懲勸因文

見道體貫箴銘蓋游藝所以

養心聿徵志道據德依仁之效而

作聖必先正己爰括興詩立禮成樂之全

聖德備極其形容

雅化宏敷夫

聲律竊幸

句文斐然

奏疏

鴻文先覩勝誦湯盤禹鼎之詞伏原

聖敬日躋彌光

樂善

味餘之盛所有臣忭誦欽感下忱理合恭摺叩謝

天恩伏乞

皇上聖鑒謹

奏

道光四年二月二十五日奉到

硃批知道了欽此

恭謝

頒賜

欽定大清會典摺子

奏為恭謝

天恩事頃由提塘遞到

頒賜

欽定大清會典全部臣謹即出郊跪迎至署望

闕叩頭祇領欽惟

皇上紹

庭出治纘

奏疏



聖綏猷始和懸象魏之書陳常時夏無逸式康田之

訓敷錫庶民

實聰明而作之

君

師政惟由

舊觀會通以行其典禮善必稱

親仰惟

仁宗睿皇帝拊本引綱斟元

立極

大廷

授璽

一心孚

六聖之傳冊府鑄珍四輯會

三朝之典百九十餘年之掌故咸按採而入

裁成千一百餘卷之牙籤悉緝而歸

折衷規模既富典則咸昭

謨不顯而

烈不承聿著

經綸於

駿造

述者明而

作者聖爰徵

佑啟於

鴻圖臣獲覩

崇編欽承

渥賜安上治民莫如禮體本

心精經天緯地謂之文粲如眉列嚮以福威以極敷

彝教而是訓是行遠乃猷裕乃民紹

德音而用康用保變而通之盡利損益可知識其大者爲

賢方策具在若稽古重華協于帝迪乃

前光繼自今立政用以人

聖惟時憲所有臣欽誦感怍下忱理合繕摺叩謝

天恩伏乞

皇上聖鑒謹

奏

道光四年二月二十五日奉到

硃批知道了欽此



恭謝

頒賜

欽定春秋左傳摺子

奏爲恭謝

天恩事竊臣奉到

頒賞

欽定春秋左傳讀本一部當卽恭設香案望

闕叩頭祇領欽惟我

皇上直聽懋學

稽古同文

陶文毅公全集 卷二十一 奏疏

道闢麟符既擴元苞於

景命模垂

鴻則更傳

鉅製於儒林緬春秋本經世之書獨左氏得屬辭之要

軼公羊穀梁之曲說所見各殊紹

彙纂

直解之遺篇其文具在由古哲敷求古哲

君本兼

師惟

聖人能知聖人作仍善述元元本本列眉而傳自爲篇

是是非非綴尾而篇皆有注抉地志山經之奧道  
里無遺訂別風淮雨之譌形聲必協尊王之義大  
一統敷施悉載於

皇言良史之職備三長折衷爰歸於

至教臣質慚抱蝨識等測蠡幸窺

乙覽之精微獲奉

宸編而肄誦願書萬本用識中心悅服之誠莫贊一辭

彌仰

盛世觀文之化所有臣感佩欣忭下忱謹繕摺恭謝

天恩伏乞



皇上聖鑒謹

奏

道光四年六月二十四日奉到

硃批知道了欽此

恭謝

欽頒大清通禮摺子

奏爲恭謝

天恩事頃摺弁回蘇齋奉

欽頒大清通禮到臣謹卽恭設香案望

闕叩頭祇領欽惟

皇上德隆抱一

治懋函三

纂承綿

燕翼之

謨敕

天基

命

制作應

鴻文之運軌物納民惟我

朝通禮之編邁歷代惇庸之典溯

初垂於

純廟典則堪徵

詔續輯於

睿皇紀綱大備

光昭

嗣服陳常則率

祖攸行

訓稟

紹衣道變則使民不倦哀五十卷之書而增以四帙萃

六十年之故而彙爲一篇若網在綱如泥從印辨

名辨色辨數辨位監于

成憲無愆貴多貴少貴質貴文由乃

舊典時式知其說者既易掌視諸斯舉而措之咸宜

心傳宛在

臣

習疎綿蕞記乏曲臺仰

象魏之書懸識睢麟之

澤遠經而等也必於禮政以人存推而行之存乎通道與

時達中以規中以矩譬模範於良工作之

君作之

師亶聰明惟

元后相小民是彝是訓曰允惟

皇極之敷言繼自今不愆不忘敢對揚

天子之

庶命所有微臣欽怵忻幸下忱理合繕摺叩謝

天恩伏祈

皇上聖鑒謹

奏

道光六年九月三十日奉到

硃批知道了欽此

二二三ノイ

三

三

恭賀平定回疆生擒張逆摺子

奏爲叩賀

天喜仰祈

聖鑒事茲臣接閱耶抄欣悉逆回張格爾就擒欽奉

上諭長齡等奏生擒首逆由八百里加緊馳報覽此捷奏實深嘉悅寅感之餘與中外臣民同深慶幸等因欽此逃聽之下曷勝忭舞歡忻之至欽惟

皇上德隆泰運

道洽師貞若日月之照臨恬冒弗遺西土卽雨風之調  
變會歸早協



皇圖屬小醜偶肆披猖致

天討遠勞撻伐

簡元戎而宏

廟算有將皆飛策勁旅以振

國威無堅不破士氣倍增奮迅

神功默運扶持鹿險欲窮黨項願爲先導虎嶠旣失

谷渾遂報生擒雪嶺塵清玉關春曉計鬼方之克

何待三年洗瀚海之兵弗遺一矢將軍訝從天而

下壯士歌入塞而還臣快誦露章歡臚星庶當

北闕獻俘之日正東風應律之時

大德曰生殲渠魁而

恢仁網止戈爲武綏邊徼而慶

春臺

經綸遠邁夫漢唐干羽直追夫虞夏有不戰戰必勝其

仰堂堂正正之師不言功功最高彌欽蕩蕩巍巍

之

聖所有

微臣

踴躍欣忭下忱謹率同江寧布政使

臣賀

長齡蘇州布政使

臣

梁章鉅署江蘇按察使

臣

潘

恭常繕摺恭賀

天喜伏乞

皇上聖鑒謹

奏

道光八年三月二十日奉到

硃批知道了欽此

恭謝

頒賜

御書受俘禮成詩刻摺子

奏爲恭謝

天恩仰祈

聖鑒事頃由摺弁齋奉

御書受俘禮成詩刻

頒賞到臣謹卽恭設香案望

闕叩頭祇領跪誦之下欣忭難名欽惟

皇上勅諭猷者定

聲教覃敷

抒遠畧以揚威龍堆萬里應清鏡而入吹鼻藻三軍惟  
九重以保大定功斯薄海慶止戈為武銀河洗雨全歸

瀚海之師金鐙敲風生繫樓蘭之頸儀成授馘憤

泄同仇有成功必有文章

堯天魏煥告禮明亦告樂備

舜陞賡颺玉振金聲

宸咏發鈞天之響星輝雲潤

璿毫垂寶墨之光夫以鐵勒來庭調翻鷺曲燕然刊石

跡補狼居鬼方深入以三年獫狁徂征於六月猶

煩作頌每見陳詩矧夫馳到紅旗自禹貢析支渠  
搜而外牽來白組廣周庭每牛雖馬之圖擒頡利  
於行閒不詡秦王破陣縛兜題於馬上長歌壯士  
入關凡茲迅奏之

虜功悉本如神之

勝算

御樓俯視知此虜早在目中

天藻親揮以大義布告天下覆昏暴乃以同遠邇歎  
聖人戢武之慮長恢

舊服卽以煥新猷仰

盛世

觀文之化洽

微臣

獲瞻

奎什敬睹

瓊鑄景

聖製之高深洵遠軼於酌桓般賚繹

淵懷之虔輦彌用惕乎疏附後先十二宮十二候誦十

二韻於鑠之

鴻篇風宣凱樂億萬里億萬民祝億萬年無疆之

駿業慶普洪延所有

臣

感幸欣忭下忱謹繕摺恭謝

天恩伏乞

皇上聖鑒謹

奏

道光八年十一月初八日奉到

硃批知道了欽此





恭謝

頒賜

仁宗聖訓全部摺子

奏爲恭謝

天恩事竊臣摺弁回蘇齎奉

仁宗睿皇帝聖訓全部

頒賞到臣當卽恭設香案望

闕叩頭祇領欽惟

仁宗睿皇帝

治協重熙

道隆繼運

秉

元后聰明之哲隆

大廷

授

受之儀乃

聖乃

神從欲慶四方之治是

彝是

訓無疆垂萬世之庥我

皇上烈以承

謨

明能述

聖

念億萬姓飲

和食

德

聖治常昭溯廿五年

宣諭

批章

前文及公已息

卷一 奏疏

嘉言具在

模範雖修於

寶籙寰區未覩夫

宏編爰

命館臣纂修

聖訓書成百有十卷視典謨訓誥而彌著光華類分三十

六門合

綱紀

文章而悉臻美備輝生卷帙

遺徽經

乙覽之勤

頒及臣工

垂誠作寅清之勗臣叨蒙

知遇感慕

生成仰今茲刊

賜之

典章都曩昔欽承之

詔令展

德音之魏煥重覩

絲綸誦

附三教公三集 卷一 二  
鉅製之敷揚彌傾葵藿惟有竭茲愚鈍稍體

聖人纂

緒之心勉期仰答

仁慈用宣

盛世紹衣之治所有臣感激下忱謹繕摺恭謝

天恩伏乞

皇上聖鑒謹

奏

道光九年五月十二日奉到

硃批覽欽此

恭謝

頒賜

御製詩初集全部摺子

奏爲恭謝

天恩事頃差弁回蘇齎奉

御製詩初集全部

頒賜到臣謹卽郊迎至署望

闕叩頭祇領跪誦之下忻佩難名玉振金聲宛覲鈞

天之驩奏星輝雲潤宏開

盛世之光華欽惟我



皇上稽古垂謨

敷言

錫極

泳仁游藝緝熙繼日月之功

握符闡珍煥發啟乾坤之祕緬昔

璫編養正咸美哉而頌始基迄茲

奎製緘初更裒然而成

鉅集天下之文在於是莫匪親賢樂利之遺

聖人之情見乎詞彌深

夙夜幾康之警

發號施令豈乏咨詢

享

帝尊

親如聞般賚相小民安於耕鑿敢忘靈雨桑田知大計重  
在河漕不唱秋風瓠子千尋玉海南船興挽粟之  
歌十曲金欄西極送吹鏡之響若乃於臺於沼同  
樂亦及禽魚偶爾在水在山振籟非關絲竹是蓋  
聖惟時憲聲與政通經天緯地之謂文無非事者化民  
成俗必由學於此徵之

鴻疇既省歲爲程

龍紀復按年可考比隔八而生六律是日黃鍾大呂之  
音欲襲六而成一經快誦清廟明堂之什臣學慚

窺管心切近

光仰惟

制作之

高深倍切軒轅於鼓舞憶昨趨承

芝殿十二番親領

堯言睹茲阜解

薰廷廿四卷載歌

舜律唐虞之際斯爲盛允欽蕩蕩巍巍雅頌所稱何以

加益識元元本本從此

宸篇愈富

聖敬恒躋三百篇可蔽一言願誦詩而聞

政教一二日維熙庶績景

勅命而效賡颺所有

微臣

感佩忭幸下忱謹繕摺恭謝

天恩伏祈

皇上聖鑒謹

奏

道光十年閏四月十二日奉到

硃批知道了欽此

皇朝詩林

卷之二

三

恭謝

頒賜

御製巡幸盛京詩一部摺子

奏爲恭謝

天恩仰祈

聖鑒事頃由差弁齎奉

御製巡幸盛京詩一部

頒賜到臣謹卽出郊跪領至署盥誦之下仰見我

皇上志切繩

先心殷紹

同文發  
奏疏

聖善爲繼而善爲述

神模悉稟夫

高

曾格有

廟而格有家

法駕爰臨夫豐鎬奉

慈輿而將

茂典

養侍維勤因耆定而

告成功

勲歸有赫

橋山弓劍當年之風雨如聞

原廟衣冠率土之共球畢萃升香而

隆恩殿啟酌匏則

惇敘筵開霜馬雲梯

英謨髣髴糠鎧土壁

儉訓留貽十亭二木之間想見

一心

一德四塔三關之外長環千水千山允惟

帝業之艱難敢忘歌頌彌益



聖功之巍煥盛有文章寫登樓出塞之雄風宛爾秋橫

馬上聽

賜復

獨租之藪諺帶回春到人間凡此聲金振玉之

鴻詞莫匪法

祖勤民之

實蹟幽館流觀而後鮮睹嗣音高山荒度之餘頓開

制作

微臣

緣慳豹尾測抱蠡衷譜卿雲復日之辭難名

舜孝誦清廟生民之什倍郁

周文記第頌於金門十聯詩在願長歌夫玉檢

萬歲籌增所有臣佩頌欣忭下忱謹繕摺恭謝

天恩伏乞

皇上聖鑒謹

奏

道光十年六月十六日奉到

硃批覽欽此

附  
之  
考  
之  
三  
全

卷  
一

三

恭謝

頒賜

御製文初集一部摺子

奏爲恭謝

天恩事頃摺弁回江捧到

恩賞

御製文初集一部當卽望

闕叩頭敬謹領誦欽惟我

皇上道契乾苞

治隆離照

陶文毅公全集

卷一 奏疏



情殷纘

緒

頌

聖母無疆之

壽慶篤

思齊

序通禮以膺民渾樸遠超漢詔

揭武功而示後裔皇不數唐碑

特獎殊庸

褒贊倍榮夫召虎

酌蠲常貢

訓詞更切於旅葵卽息兵罷役之章

周知民隱

申曲法徇私之戒益勵官箴至若

賦軼凌雲辭成喜雪

美天閑之翔玉選備駒駉

銘藝苑之澄泥珍逾鸚鵡豈僅多文以爲富實乃體物

而不遺臣識愧管窺學窮益贊記往歲

崇編寵錫已欽

詩教之淵涵喜今茲

宸帙遙頒復荷

文思之光被

瓊函乍啟彩煥非煙玉檢初披

恩叨垂露從此

鴻裁日富由五十九篇而遞衍爲京垓允宜蛾術時勤

合三五六經而共遵夫

典則所有微臣感佩悅服下忱謹繕摺恭謝

天恩伏乞

皇上聖鑒謹

奏



道光十一年十月初三日奉到

硃批知道了欽此

恭謝

頒賜康熙字典摺子

奏爲恭謝

天恩事頃臣接奉

頒賞康熙字典一部謹卽望

闕叩頭祇領欽惟我

皇上道懋寅承

謨敷

乙覽苞符聿啟

憲章允迪夫

前徵

作

述相承

念典不遺於小學洪惟

聖祖仁皇帝字典一書參聲氣於譯鞮考淵源於篆籀萃

唐宋元明之音韻極析毫芒擷經史子集之訓詞

務窮根柢比字彙而補遺更博較說文而分部彌

精洵官府之準繩為士林之圭臬茲際

治隆繩

武

教洽同文爰

詔<sup>臣</sup>工敬加剗劂既無魚魯烏焉之誤亦免紂紅許綠之疑或遵

御纂之經缺末筆以昭敬謹或仿科場之例照原書以便

訓行百餘年舊籍仍鐫輝騰奎壁四十部新函

特賚慶溢簪裾<sup>臣</sup>功謝囊螢識慙窺豹木天曩到籤題

雖睹夫瑯嬛玉笈重披簿領久荒夫鉛槧迺復仰

叨

寵錫與沐

光榮幸承

優渥之施益切鑽研之志惟有三薰傳寫期俊造以同  
珍還應什襲尊藏俾子孫而永守所有

微臣欽感

欣幸下忱謹繕摺恭謝

天恩伏乞

皇上聖鑒謹

奏

道光十一年十月初三日奉到

硃批覽欽此

恭謝

頒賜平定回疆勦擒逆裔方畧摺子

奏爲恭謝

天恩仰祈

聖鑒事頃臣奉到

欽頒平定回疆勦擒逆裔方畧一部謹卽恭設香案望

闕叩頭祇領欽惟

皇上思文光被

聖武懋昭

隆七德以宣威恢宏

奏疏

駿績

攬九功而敘事焜燿

鴻編戰紀八圖

算先十策蓋止戈爲武撻伐皆

廣運之神斯保大定功

制作極

憲章之嫩方道也畧法也一自

奎文揭示光華炳著以千秋

謨顯哉

烈承哉仰惟

祖武克繩史籍昭垂於百代蠢茲霍集占之回孽乃有張  
格爾之元克假和卓以率獯豸花門嘯聚結浩罕  
而爲狼狽蕙嶺橫行紀本妄干辜由自速我

皇上幾操指掌

命策股肱九天九地之師四正四奇之畧霆驅電掃地  
水貞符雪沃冰摧天山唱凱紅旗飛處獻泮則鐘  
鼓流音白組牽來

告

廟而馨香

舉典上



慈闈之

徽號懿矣

尊親銘冊府之勲庸煌茲帶礪四十人

閣光繪紫旅肅瑀弓百千仞山色鑱青

詩標鐵蓋凡此

膚功之迅奏悉緣

帷畫之周詳允宜大一統而作春秋善後匪同於戊己

尤喜奉重編而稽歲月承

先恰紀乎庚寅

製仰同文體由

獨斷臣未親敵愾獲暗編摩定識花牛打坂之遐荒無  
遠弗屆况際白犬獠民之皈嚮連類堪書料有萬  
全遺無一失

天之所助者順也知

盛世服以心誠兵不得已而用之惟

聖人情由辭見八十函臨風盥誦莫贊

高深億萬禩就

日枕輪長殷頌禱所有臣欽感榮幸下忱謹繕摺恭謝

天恩伏乞

皇上聖鑒謹

奏

道光十二年十一月二十三日奉到

硃批覽欽此

恭謝

頒賜回疆戰圖摺子

奏爲恭謝

天恩事頃臣奉到

頒賞新疆戰圖十幅謹卽恭設香案叩頭祇領欽惟我

皇上智由

天錫道闡

前光

秉七德以戢干戈安民和衆赫九垓而昭震疊近悅遠

來蠢爾回首敢干

附錄卷之二  
三  
天討六師旣出萬里斯同底須劍斬樓蘭長纓繫得已  
報生擒吐谷巨艦驅來遂開

紫閣以延勳吏

命丹青而入繪神傳阿堵揮戈則毛髮俱森勇賈吾餘  
聚米而山川在列極狐兔踰蹌之狀霆擊風號窮  
鯤鯢宛轉之情沙飛水立計自渾巴什河之首捷  
以泊喀爾鐵蓋之擒渠八戰成功全神在握地水  
寫師貞之象筆浣銀河天山傳凱唱之聲春回玉  
帳遄馳捷布爰譜佇功

五鳳樓前望

黃衣而知

聖六龍

輦外扶

翠罕以瞻

天凌烟羽箭之班頓開生而湛露彤弓而上高倬

宸章凡茲迅奏之

膚功悉稟

遠謨於

心畫

十條

策授早權十勝之先幾十幅圖成允紹

十全之

大烈

典禮彌光於泮獻

寵頒載逮夫官聯臣獲捧

球函叨分

寶墨思行間戰則必克披圖而壯志頻增仰

聖主安不忘危展卷而深情如繪從識

九重熙化象胥惟

舜律之從還欣咫尺瞻

顏豹尾慕

堯堦之近所有微

臣

感激折林下忱謹繕摺恭謝

天恩伏乞

皇上聖鑒謹

奏

道光十五年十月二十九日奉到

硃批知道了欽此





恭謝

御賜印心石屋四字扁額摺子

奏爲恭謝

天恩事本月初四日軍機大臣恭捧

御書印心石屋四字扁額傳

旨賜臣謹卽叩頭祇領

天題寵錫卿雲增石墨之華

宸翰

親頒喬采發山川之色感深鰲戴慶溢蝸廬伏念臣楚

省菲材山鄉下士昨於

奏疏

召見之頃蒙

垂詢家世兼及里居比經縷悉具對臣家洞庭西南資

水之濱兩岸石壁屹立如門潭心有石方正若印

名曰印心石幼隨臣父結屋讀書其上門臨活水

喜尋溥博之源石借他山常凜琢磨之義逮涉蓬

瀛而窺中秘旋綰符綬而領兼圻介切銘心敢擬

中流一柱

恩深繫肘欣瞻朗映千潭每思若谷之

淵懷虛受有如投水愧乏迴瀾之厚力實行無補擎天

乃承齋額之

榮頒

特賁印心之嘉號拜易簡玉堂之貺飛白騰芳開文翁  
石室之圖汗青在望從此摹懸素壁用箴如水之

臣心還當鐫泐貞砥長煥輝山之

御寶所有微臣感激榮幸下忱謹繕摺恭謝

天恩伏乞

皇上聖鑒謹

奏

道光十五年十二月初五日在京具

奏本日奉到

附錄卷之三十一

硃批知道了欽此

恭進

御書印心石屋墨寶圖冊並謝

恩摺子

奏爲恭摹

御書墨寶併圖冊進

呈仰祈

聖鑒叩謝

天恩事臣聞河洛闡先天之秘一畫宣苞圖書流東壁

之光三能煜采是以赤文綠字炳十瑞而魏

堯玉檢金泥糺重華而慕

穿珠囊肇啟石墨爰鐫欽惟

皇上宥密單心

緝熙懋學

勅命幾康之暇庸有賡歌

怡神道德之餘兼資游藝圖標蒙養

題詞早播於前編檢切身修

志額彌殷於新宇偶爾觀瀾聽雨

抒懷總在民依無妨繪水模山

深意隱存臣鑒式瞻

鴻藻靡罄微臣依渥荷

釣堦身親

高厚比以朝

天述職因之乞假旋鄉蒙

詢里居在茱萸江之山峽遂邀

宸翰有印心石之

璿題若作室乃念肯堂承

賜書而標通德劉向傳經之地敢云樂在山林晏嬰更

堦之餘庶幾居於廉讓

天花灑處蓬華生春

琅管揮來松楸煥色旣而



附三卷之三  
卷一  
三  
霽顏屢接

清問頻蕃知兩岸有若重門千尋壁立復四字仍煩

大筆萬丈芒垂

特書屢書遂荷稠施而拜

賜一

命再

命更加佻僂以承

恩以視尹玘常參獲一通而光榮已極卽論孫奭直閣

兼兩紙而寵幸猶希載奉

恩言允

臣

勒石捧出雲霞

天上畫麗銀鈎修來日月巖邊山開玉斧

體乾坤而爲法象

神模畢現於毫芒肖圭璧以成方圓元氣渾含於橐籥  
南崖旣選北牖旋凭念諸生就

日之忱岳麓無殊鄒魯况

列聖藏書之府瑯嬛宛在金焦爰亟重模快資咸覩蓮花

峯下別通營道之潺流岫巘碑前更廣夔門之鑿

刻

大觀有耀經天緯地謂之文

盛蹟長留河岳日星壯其氣微臣夙叨鯉對忝荷

龍光景

庶命以凜對揚仰

奎文而知

訓誨精懷鍊石慙無寸補於

雲天感切銘心長紀

殊恩於奕禩臣無任瞻幸屏營之至謹裝潢成軸並繪

刻圖冊綴記附後進

呈

御覽恭謝

天恩伏乞

皇上聖鑒謹

奏

道光十七年正月初七日奉到

硃批知道了欽此

隋文帝公全集

卷一

三

安徽省志告成議敘謝

恩摺子

奏爲恭謝

天恩事頃准安徽巡撫鄧廷楨咨照到臣道光九年六

月初六日內閣奉

上諭鄧廷楨奏創修安徽省志告成一摺安徽自分省  
以來未經輯有通志道光五年陶澍奏准予限纂輯  
現據鄧廷楨奏稱業經修輯完竣竝繕寫正本呈覽  
此書由陶澍具奏創修鄧廷楨督辦蕆事陶澍鄧廷  
楨均着加恩交部議敘欽此欽惟我

皇上德隆不旨

治洽同文廓絃振絡之餘莫非

聲教航海梯山之衆悉入輿圖

御書鐫鐵蓋山前西極恢而琳瑯煥色

宸製綴

玉瀾堂上東壁啟而翰墨流輝惟

皇朝大一統之規聿昭版籍知

聖人見天下之曠不下堂階臣隅見多封咫尺間未遠廿

年簪管虛窺宛委之藏十載觀風敢效輶軒之採

曩者備藩皖服持節舒州偶流覽於山川閒訪尋

夫人物畺分楚紀無由讀三墳五典八索九邱地  
控吳都亦徒賦重關復江四會五達良由江分上  
下未有專書遂致世閱春秋難按墜簡盛美所在  
文獻缺如旣非體國經野之宜尤乏訓俗型方之  
要文武之政在方策豈曰無徵

堯舜之世有文章未遑多讓欣叨

聖訓

俯允輯修俾存掌故於蒲編爰訂程期於筴歲適臣易  
地未及成書鉛槧甫操詎足當三篋之補規模粗  
具實僅同一簣之登善歌有待於繼聲條理咸資



御律集議羣依乎

折衷始終允賴

宸謨茲者全帙告成正編進

覽總二百七十卷之富綜括靡遺自五年三四月以來

編摩罔懈地圖地事地俗敦土訓而一省攸關史

學史識史才罄臣力而三長早愧迺荷

絲綸特沛

甄敘偕頒弗曾手繪圖經亦拜賈耽之賜迄未自隨書

局儼分君實之褒追維屢歲之前

恩超異數計及造端之始

寵竝同人從知一技必庸於討論修飾潤色之初謀思  
適野願祝

萬齡有道以康樂和親安平之俗書上行人所有  
臣感  
激忭幸下忱謹繕摺恭謝

天恩伏乞

皇上聖鑒謹

奏

道光九年八月十九日奉到  
硃批知道了欽此



恭謝

賞戴花翎摺子

奏爲恭謝

天恩事竊照海運全竣經臣會同督臣琦善

奏報請將出力人員鼓勵一摺於六月二十四日奉  
到

硃批汝總辦此事請凡妥順朕深嘉悅另有恩旨欽此  
並准兵部火票遞到道光六年六月十七日內閣  
奉

上諭海運事屬創始辦理維艱仰賴

神靈垂佑在事臣工竭誠宣力雇船兌運籌畫周詳  
 兩次絡繹開放穩抵津門朕心深為嘉悅自應卽沛  
 恩施以昭獎勵琦善督飭有方可嘉之至著交部議  
 敘陶澍親駐督辦深協機宜著賞戴花翎等因欽此  
 跪領之下感悚交縈伏念臣職効鳧趨才慚鳩拙  
 屬以漕河之偶阻議由瀛海以試行千帆張鷁首  
 而飛聯行滬浦六月運鵬程而息銜尾津門鸚粒  
 全輸烏旂不警

護由

神佑

御香賁而

藻翰同頒

訓稟

宸謨

天寵綏而花翎

特賜象析羽而加之首彩溢簪纓慶彈冠而尙以瓊輝

主弁冕金枝絢日遙分鶴頂之文章翠羽影風何

幸鴻毛之際遇舉頭知重附尾增榮翮朝日以翔

衛和聲並應觀雲霄而傳翮勵翼彌殷從占達羽

爲儀允戴

聖恩之高厚還其山龍耀袞載颺

盛世之光華所有臣感激榮幸下忱謹繕摺恭謝

天恩伏乞

皇上聖鑒謹

奏

道光六年八月初五日奉到

硃批知道了欽此

恭謝京察奉

諭議敘摺子

奏爲恭謝

天恩事頃

臣

於二月二十五日接准吏部咨開道光十

四年正月二十二日欽奉

硃諭三載考績大典攸關滿漢諸臣中有爲國宣勤盡  
心職守者允宜甄敘年老而精力未衰者仍應留任  
本年京察吏部將京外各大員具題請旨朕詳加酌  
定大學士長齡功宣絕域同德同心大學士曹振鏞  
久任軍機克勤克敬年登八袞精力如常大學士富



俊宣力有年公勤清慎年已八十有六精神頗健洵  
爲盛朝人瑞協辦大學士文孚戶部尙書穆彰阿王  
鼎承旨精詳匡勳是賴禮部尙書耆英管理步軍統  
領事務諸事認真頗知振作兩江總督陶澍辦事實  
心兩淮漕務日有起色陝甘總督楊遇春中外宣勞  
功勳懋著俱著加恩交部議敘特諭等因欽此臣跪  
聆之下感悚交臻時屬當三載之期

龍光共覲日贊荷

九重之

眷驚策同登伏念

臣

鞅綫非長衣袂夙凜過蒙

知遇忝領封圻十三年江國承流毫無報稱一二日  
天工時亮倍切敷宣屬當積潦在途啓野而哀鴻滿目  
更值熬波乏術巡場而形虎煎心小大事必由之  
與百爾勉修職業東南力已竭矣惟

一人允念艱難典守徒殷方自愧制事制心之要

主恩彌篤豈期預懋官懋賞之班是蓋伏遇我

皇上哲秉知人

誠能開物有馮有翼有孝有德官必惟其人汝明汝聽  
汝翼汝爲

皇則錫之福官方澄敘

釐工實熙績之源府事修和

慎憲極

省成之效 臣仰承

埏埴幸列馳驅

天高

地厚之餘效職莫酬乎萬一益贊夔咨之下圖功彌暢

乎二三所期黼藻山龍永弼

盛時之熙皞庶藉鹽梅鼎鼐長調

聖世之祥和所有 臣感激悚凜下忱謹繕摺恭謝

天恩伏乞

皇上聖鑒謹

奏

道光十四年三月二十六日奉到

硃批知道了欽此



恭謝

聖恩賞壽摺子

奏爲恭謝

天恩事道光十七年十一月二十九日

臣齋摺并回奉

到

恩賞臣六十生辰

御書綏疆錫祐扁額一面

御書福壽字各一方 梵銅壽佛一尊 紫檀嵌玉如意一

柄 洋晶朝珠一盤 緞絲蟒袍一襲 小卷江綢十端

綵綾十端 壽意陳設十件 臣當卽恭設香案望

關叩頭祇領伏念臣材本駑駘姿同蒲柳渥承

雨露游領疆圻迨鷹節鉞之榮倍重江淮之寄任兼鹽

鐵方期積弊之徐回職統河渠且幸安瀾之普慶

溯自飛芻海上翠羽

榮頒嗣蒙

晉秩宮端冰銜

特錫

虞廷考績荷

珠緯之優褒

軒陛來朝仰

璇毫之親灑方謂蟻忱勉竭莫報

殊恩豈期馬齒加增更邀

異數披來

鳳藻倬日星雲漢以昭回捧到

鸞縑與圭瓚璜琮而煥發敬繹綏綏疆之義瞻

寶翰而倍切冰兢欽承

錫祐之麻仰

奎章而彌殷軒舞福之言備欣共託夫

龐祺壽訓爲酬冀永勳夫

駿烈禮莊嚴之寶相握溫潤之瓊枝拈一串以勻圓蕊



珠記事楊二英而晏粲藻火章身綵絢雲霞錦綺  
交緝於前席輝生金碧鼎彝羅列於中庭比桓生  
車服之陳榮分稽古銘考父僕僂之命凜切循牆

臣惟有勉矢愚忱恪遵

恩訓冀初心之不負期晚節之益堅振刷精神百事更

增夫勇敢捐除積習一心倍凜夫真誠依

壽寓而頌升恒疆清九服登

福林而歌昌熾

祐篤萬年所有微臣感激榮幸下忱謹繕摺恭謝

天恩伏乞

皇上聖鑒謹

奏

道光十八年正月初二日奉到

硃批知道了欽此

附  
二  
三  
四  
五  
六  
七  
八  
九  
十  
十一  
十二

三  
四

陶文毅公全集卷二目錄

奏疏 謝摺

恭謝

御賜福字麇鹿摺子六件

恭謝

御賜福壽字麇鹿摺子二件

恭謝

御賜福壽字鹿肉摺子三件

恭謝

御賜福壽字麇鹿摺子二件

恭謝

御賜藥錠摺子八件

奏疏 謝摺

恭謝

御賜福字麇鹿摺子

奏爲恭謝

天恩事道光三年十二月二十一日摺并回省齋奉

恩賞

御書福字一幅暨麇肉鹿腿等件謹卽出郊跪迎至署

望

闕叩頭謝

恩祇領欽惟我

皇上昭景延釐

撫辰納祿

鴻疇嚮五

福錫而

帝範平康鹿雅歌三

德飽而人情和樂迎年

履吉

璇毫標百順之名隔歲

頒春

嘉貺表四靈之瑞臣親依

聖世渥荷

稠恩每念厯碌於庸材策駑而慚方穀況聽磬音於中

澤懸貺而凜素餐

福祿同沾竊共皖民而拜

賜

升恆共祝欣同僚案以向

榮從茲彩溢

龍鸞五色煥圖書之府更卜祥呈麇麇八方瞻

仁壽之符所有

臣

感忭下忱謹繕摺恭謝

天恩伏乞



臣等奉命查辦  
卷二

皇上聖鑒謹

奏

道光四年正月二十二日奉到

硃批知道了欽此

恭謝

御賜福字麇鹿摺子

奏爲恭謝

天恩事頃臣摺弁回院齎奉

頒賞臣

御書福字一幅麇肉鹿腿等件謹卽出郊跪迎至署望

闕叩頭謝

恩祇領欽惟我

皇上錫羨延釐

膺禔布闔疇開五福平康胥近乎

陶文毅公全集

卷三 奏疏

三

龍光

天保九如戩穀式符乎鹿雅九有鬯

均禧之化

軒管頒春百僚飫

推食之

恩

堯廚飽德臣珍承

嘉貺渥荷

隆施幸豈樂之攸宜令德惟賡燕譽沐

寵榮之疊被素餐倍凜貺懸

錫本同民喜共子黎而拜

賜嘗先正席爰偕寅案以分甘欣瞻

御墨高懸鳳翥仰

鴻題之煥計日

宸階展

觀鸞鏘隨豹尾之班所有臣感忭下忱謹繕摺恭謝

天恩伏乞

皇上聖鑒謹

奏

道光五年正月二十五日奉到

殊批知道了欽此

恭謝

御賜福字麕鹿摺子

奏爲恭謝

天恩仰祈

聖鑒事道光五年十二月二十一日摺并回蘇齋奉

御書福字及麕鹿等肉

頒賞到臣謹卽恭設香案望

闕叩頭祇領欽惟我

皇上調泰延洪

履和錫羨福者富也標百順以

頒春祿以綏之軼八珍而

詔食

茂祉協鴻來之應

禹範徵麻

崇祺昭磨至之祥

堯廚徧

德徵臣

福衢就觀久睹

奎文

仁圃同登欣承

渥賜記

均視於頻歲三錫

恩多表

吉祝於迎年百道

祐懋際此熙臺肇慶儼偕衆志以享牢還應夾轂行春

共飫

皇仁而布凱所有上感忭下忱謹繕摺恭謝

天恩伏乞

皇上聖鑒謹

奏



道光六年二月二十三日奉到

硃批知道了欽此

恭謝

御賜福字麇鹿摺子

奏爲恭謝

天恩事道光六年十二月二十日摺弁回蘇齋奉

御書福字及麇鹿等肉

頒賞到臣謹卽恭設香案望

闕叩頭祇領

奎光煥耀雲螭昭捧

日之心香氣細縑天麇表迎年之

瑞欽惟

皇上乘乾布凱

調泰延洪上康樂安平爲一書綿區戴

福合麟鳳龜龍爲四畜匝宇遊

仁俾以昌俾以熾燕喜則

嘏原

申錫維其旨維其時魚麗則

道協庚由序應始和時逢肇紀

庠凝戩穀增如山如阜以

均禮

澤洽誠和廣宜民宜人而受祿

徵臣

職司播

德臺共登春瞻普汜於

福林星輝

寶墨驗蕃滋於

祿囿露湛

瓊廚際茲

念切宣防

嚮範而鴻流克奠定卜

勲宣撻伐食肉而狡窟全除

吉迪

祥來願效魚藻賡歌之意民熙物阜載頌鴛鴦福祿之

附三身之卷三  
卷三  
六

章所有微臣感激忻幸下忱謹繕摺恭謝

天恩伏乞

皇上聖鑒謹

奏

道光七年正月二十九日奉到

硃批知道了欽此

恭謝

御賜福字麕鹿摺子

奏爲恭謝

天恩事道光七年十二月二十六日摺弁回蘇齎奉

御書福字暨麕鹿等肉

頒賞到臣謹卽恭設香案望

闕叩頭祇領欽惟我

皇上泰祉駢臻

龐禱麕集平康用錫

鴻疇徵嚮五之麻

司文及八公集  
奏疏

七

戩穀罄宜鹿雅叶肄三之奏挹

奎光於

義畫

寶字宜春扇瑞脯於

堯廚珍饈飽

德臣渥叨

嘉貺屢沐

均禔記拜

賜於迎年門增五福屆服官而

詔祿頌進三多書思用勵夫丹忱鼎養彌慚夫素食華

鐫石墨文章聯卿裔之輝  
腴摘山膚膏澤飫馨香  
之

治冀共吳民而樂凱韻譜

熙臺還借衆志以享牢

恩宣

仁囿所有微臣感激下忱謹繕摺恭謝

天恩伏祈

皇上聖鑒謹

奏

道光八年二月二十七日奉到



上三卷之三

硃批知道了欽此

恭謝

御賜福字麇鹿摺子

奏爲恭謝

天恩事道光八年十二月二十四日摺并回蘇齋奉

御書福字暨麇鹿等肉

頒賞到臣謹卽恭設香案望

闕叩頭祇領欽惟我

皇上洪疇錫五

泰運開三

龍章紀定遠之勛光昭

義畫

螭陛賜慶成之宴

德徧

堯廚

受祿宜人共頌

九重戩穀

推恩逮下方  
臚萬國歡心  
微臣幸沐

均禔欽承

嘉貺

奎文景耀春生  
垂露之書  
瑞脯香分

恩湛同民之囿仰金題而就

日倍切丹忱調玉鼎以宣和彌慚素食際此登臺樂凱  
聽康衢鼓腹之歌還應夾轂行春溥

聖世同文之化所有臣感激下忱謹繕摺恭謝

天恩伏祈

皇上聖鑒謹

奏

道光九年二月初一日奉到

硃批知道了欽此

下ノ家ノ三ノ  
三ノ

三

恭謝

御賜福壽字麕鹿摺子

奏爲恭謝

天恩事頃摺弁回省齋奉

御書福字一幅壽字一幅麕鹿肉一分

頒賞到臣謹卽恭設香案望

闕叩頭祇領迎年標百順之名百道

曼羨獻歲普三江之澤

三錫

恩多欽惟我

陶文毅公全集

卷三

奏疏

三

皇上調泰延洪

臨宸播凱九五福曰壽欣開

壽寓以均禔八千歲爲春更

廣春臺而納祿當瑞雪紛敷之際龍鸞飛灑於

璇臺正

威霆迅掃之時狐兔獮登於

御俎微臣

星雲快睹

膏露親嘗展

義畫以宜春飫

堯廚而徧

德戩穀上

東海

南山之頌笙簧用答鹿鳴

惠迪應安平康樂之書官禮無非麟意情殷華甸

三多敬祝

聖人春到江城萬戶羣游

皞日所有臣感激忭幸下忱謹繕摺恭謝

天恩伏乞

皇上聖鑒謹



奏

道光十一年正月二十一日奉到

硃批知道了欽此

恭謝

御賜福壽字麕鹿摺子

奏爲恭謝

天恩仰祈

聖鑒事道光十一年十二月二十三日臣齋摺差弁回

江捧到

恩賞福字壽字二方暨麕鹿肉一分當卽恭設香案望

闕叩頭祇領欽惟我

皇上德備福基

釐延壽寓啟韶年而

匄文受八公八上表

卷二 奏疏

錫羨

澤普春臺協吉日以

頒珍

恩推冬勝當此

龍光下逮適逢鳳紀更新

義畫親瞻

堯羹如見

奎文星煥光生大地之陽和仙脯霞蒸色滉

九天之沆瀣臣自維譎劣忝領封圻疊荷

鴻施渥叨豢養凜

褒題於幹國在梁則福祿鴛從逐

景貺於宜年多祉而壽昌燕喜念天濂具辟邪之性口

豈羣調惟雲龍昭捧

日之心輝常近接所願河清海晏祝

一人之介景延洪更欣民樂年豐合三省而飲

和食

德所有臣感激下忱謹繕摺恭謝

天恩伏乞

皇上聖鑒謹

奏

道光十二年二月初九日奉到

硃批知道了欽此

恭謝

御賜福壽字鹿肉摺子

奏爲恭謝

天恩仰祈

聖鑒事道光十二年十二月二十九日臣齋摺差弁回

省奉到

御書福字一幅壽字一幅暨鹿肉一分

頒賞到臣謹卽恭設香案望

闕叩頭祇領欽惟我

皇上寅階普祐

泰寓延洪飲和同六合之春喜見

龍光煜采播凱上

三多之頌更歌麟趾呈祥當師旋渡澳之時犀甲洗而  
福原有海正士洽登臺之日兕觥祝而

壽更如山歡聲早逮於三江

佳貺爰將於

九陛睹鳳翥鸞鸞之體格

寶墨騰輝寫鴛梁魚藻之殷勤珍饈飽

德名昭百順隱符六祝於周官

瑞應長生更廣四靈於

虞囿和親康樂惟

一人永茂

蕃釐豢養

生成以萬姓同躋

仁壽所有

臣

感激榮幸下忱謹繕摺恭謝

天恩伏乞

皇上聖鑒謹

奏

道光十三年二月二十一日奉到

硃批覽欽此





恭謝

御賜福壽字鹿肉摺子

奏爲恭謝

天恩仰祈

聖鑒事頃臣摺弁回江齎奉

御書福字一方壽字一方鹿肉一分

恩賞到臣謹卽恭設香案望

闕叩頭祇領欽惟我

皇上福祚延洪

壽釐介景啟韶年而

錫羨

義畫輝騰

頒吉日以分甘

堯廚澤溥

麻凝鴻範登歌齊上乎春臺慶叶兕觥躋祝早殷於冬

獻當瑞雪繽紛之際

璇毫灑而彩炫天花正

祥雲馥郁之時華黍吹而馨流

御膳

多凱遙瞻乎斗北

殊施遠逮乎江南臣思竭鏤丹凜深餐素仰叨  
渥眷迭荷

榮光奉

龍蟠

鳳翥之

書欣孚逢吉賡虎拜燕譽之雅喜聽臚歡所有臣感激  
榮幸下忱謹繕摺恭謝

天恩伏乞

皇上聖鑒謹

奏

道光十五年正月十九日奉到

硃批知道了欽此

恭謝

御賜福壽字鹿肉摺子

奏爲恭謝

天恩事道光十六年十二月二十七日臣齋摺差弁回

江捧到

御書福字一方壽字一方暨鹿肉一分謹卽恭設香案

望

闕叩頭祇領欽惟我

皇上福林納祿

壽寓延洪陽光回大地之和獻歲而春先一日協氣普

自天之慶迎年而瑞應

三多溯升香

默禱祥霏正登臺乍書雲物花飛六出映

軒毫鸞鳳之翱翔藪有四靈驗

仁囿麟騶之暢遂

均視九有

福惠三江微臣地切依

丹懷深餐素憶前番兩拜

雯霞之

賜摩崖生色梅山復此際雙瞻

奎壁之輝飶

澤怡情萃野所願頌安平於府修事敘

禹範咸徵長茲熙飲食於鑿井耕田

堯天永戴所有微臣感幸下忱謹繕摺叩謝

天恩伏乞

皇上聖鑒謹

奏

道光十七年二月初五日奉到

硃批知道了欽此





恭謝

御賜福壽字麕鹿摺子

奏爲恭謝

天恩仰祈

聖鑒事道光十七年十二月二十九日摺弁回省齋奉  
到

恩賞

御書福字一方壽字一方暨麕鹿肉一分臣謹卽恭設  
香案望

闕叩頭祇領欽惟我

皇上福林納祿

壽寓延禧

祐錫康平

衍鴻疇而嚮五

景昭和樂譜鹿雅而歌三當春回玉律之時正

澤沛璇霄之候

芝泥捧出輝生

寶墨之華

蕙脯頒來珍飫

天廚之味微臣每慙素食疊荷

洪施前當甲子初周已沐

殊恩於格外此際光華復旦更邀

寵賚於履端將書雲物之祥拜手而

雲章適賁競聽衢歌之樂鼓腹而衢酒還斟榮

賜徧及同僚保

極用偕兆庶荷

龐禔於頻歲倍切瞻

雲就

日之忱慶燕喜於元辰彌凜敬事後食之義所有臣感

激榮幸下忱謹繕摺恭謝

天恩伏乞

皇上聖鑒謹

奏

道光十八年二月初十日奉到

硃批知道了欽此

恭謝

御賜福壽字麕鹿摺子

奏爲恭謝

天恩事頃於嘉平月之十九日摺弁回省齋奉

御書福字一方壽字一方麕鹿肉一分

頒賞到臣謹卽

闕叩頭祇領欽惟我

皇上撫辰凝績

建極延釐轉一氣之洪鈞祥開鳳紀

播萬方之美利道握

龍符

壽寓成昌瑞應昭於雲日

福疇時歛敷錫徧於寰區春回送臘之先際嘉辰而羣

欣

受祿

寵荷迎年之始渥

醴膏而益慶

均禔

巨筆揚輝鸞舞螭騰之彩

大庖飫德鹿鳴魚麗之榮

微臣

忝陪行省適染微疴已

叨休沐之

殊恩復遇匪頒之

嘉貺

奎光吐耀來

天上之貞祥

祿囿給鮮勝壺中之丹波展拜高懸之後吉曜憑臨親

嘗熟薦之餘孱軀頤以健惟有竭十駕飛黃之力勉

酬

稠疊之隆施尤當祝八紘蒼赤之豐其樂

昇平於



盛世此日安平康樂已沾

一人有慶之庥羣看紉纓昭回更進

萬壽無疆之頌所有臣感激榮幸下忱謹繕摺恭謝

天恩伏乞

皇上聖鑒謹

奏

道光十九年二月初三日奉到

硃批願卿身體康彊爲國宣勤也欽此

恭謝

御賜藥錠摺子

奏爲恭謝

天恩仰祈

聖鑒事本月十六日摺弁回院齋奉

御賜藥錠一匣臣當卽恭設香案叩謝祇領伏念臣材

慚苓勃渥荷

甄埏際茲大夏之陽辰

寵賁

上方之珍劑

頌來

楓陛一緘貯

天上之雲捧出芝泥五色耀江城之露滌靈符而辟暑  
懷馨則蓄比仙蘭吹丹粒以團砂投赤則功逾神  
棗謹分遺於寮案用宣

惠於黔黎疵癘潛消贊

大造均調之化平康用

錫宏

聖人長養之心所有微臣感激榮幸下忱理合恭摺

奏謝

天恩伏乞

皇上聖鑒謹

奏

道光三年五月二十八日奉到

硃批知道了欽此

1. THE STATE OF CALIFORNIA

1871

恭謝

御賜藥錠摺子

奏爲恭謝

天恩事頃臣齋摺差弁回省奉到

御賜藥錠一匣謹卽恭設香案望

闕叩頭祇領伏念臣苓通抱質葵藿抒誠際茲懸艾

之良辰倍仰調薰之

郅治澤下尺而苗上尺芳腴正沐夫

醲膏乾大生而坤廣生

嘉貺更邀夫珍劑秘馥襲三霄之露潤帶花泥葳蕤纏

五色之絲蒸餘石火分馨寮案勝六壬六癸以佩  
符宣

惠黔黎比一粟一絲而戴

德欣

聖世人無疵癘

錫福而象協咸和擬周官書上安平

養化而

功宏大造所有臣感激忭幸微忱理合繕摺恭謝

天恩伏乞

皇上聖鑒謹

奏

道光四年六月二十四日奉到

硃批知道了欽此





恭謝

御賜藥錠摺子

奏爲恭謝

天恩事頃臣齋摺差弁回院奉到

御賜藥錠一匣謹卽恭設香案望

闕叩頭祇領伏念臣質愧苓黃心輸葵赤際此蕃蘭

之令序欣承保艾之

隆施九穗麥而六穗禾

福疇告慶五日風而十日雨

壽寓延釐

司文之史  
奏疏

醱膏已遍乎寰區

珍劑更承夫

渥脫迎風解慍金泥纏五色之絲啟篋懷馨丹粒襲三

霄之露謹分遺于寮案共沐

甄埏用宣

惠于蒸黎潛消疵癘

對時育物敬仰

聖人長養之心食

德飲

和益宏

大造均調之化所有臣感激忭幸下忱理合繕摺

奏謝

天恩伏乞

皇上聖鑒謹

奏

道光五年七月初六日奉到

硃批知道了欽此

1. 2. 3. 4. 5. 6. 7. 8. 9. 10. 11. 12. 13. 14. 15. 16. 17. 18. 19. 20. 21. 22. 23. 24. 25. 26. 27. 28. 29. 30. 31. 32. 33. 34. 35. 36. 37. 38. 39. 40. 41. 42. 43. 44. 45. 46. 47. 48. 49. 50. 51. 52. 53. 54. 55. 56. 57. 58. 59. 60. 61. 62. 63. 64. 65. 66. 67. 68. 69. 70. 71. 72. 73. 74. 75. 76. 77. 78. 79. 80. 81. 82. 83. 84. 85. 86. 87. 88. 89. 90. 91. 92. 93. 94. 95. 96. 97. 98. 99. 100.

1111

恭謝

御賜藥錠摺子

奏爲恭謝

天恩事頃臣摺弁回蘇齋奉

御賜藥錠一匣當卽恭設香案叩頭祇領欽惟

皇上德隆康濟

道洽生成四時調玉燭之和八表潤珠囊之色喜占勿

藥烝民之疵癘潛消

念軫如傷

聖主之恫瘝彌篤茲值蒲樽節屆欣叨芝檢

榮頒鍊冶八瓊還丹九轉擎來

闕北香凝寶鼎以分煙捧到江東彩映吳絲而續縷

臣職慚蘭蓄識愧苓通每當大夏之良辰屢拜

上方之珍劑感

恩逾重徧

德靡涯分馨爰逮於羣僚布凱尙思乎黎庶甘同粒食

慰

九重保赤之心質重砂團勵百爾披丹之愫所有臣感

激忭幸下忱謹繕摺恭謝

天恩伏乞

皇上聖鑒謹

奏

道光六年六月十八日奉到

硃批覽欽此

奏疏

三





恭謝

御賜藥錠摺子

奏爲恭謝

天恩仰祈

聖鑒事頃臣摺弁回蘇奉到

御賞藥錠一匣謹卽恭設香案望

闕叩頭祇領欽惟

皇上醇涵六合

康濟四生氣靖龍沙奠瘡痍而播讎

恩覃鴻澤普康樂以成書八表同孚勿藥之占

九重倍切如傷之念節逢地臘

寵賚天珍

壽寓萸英蕭露釀八瓊之液

洪鈞鍊冶芝雲呈五色之輝依寶鼎以縈煙擎來

闕北映吳絲而續縷捧到江東臣識愧苓通職慚艾

蓄每屆恢台之令序屢邀靈劑之

榮頒秘馥遙分是

天上金蟾之髓葳蕤乍啟開人間玉燭之祥分馨爰逮

夫寅寮布惠尙思夫子庶從此和平載

福慰

一人保赤之忱還應調燮論功勵百爾披丹之隙所有

臣感激悚幸下忱謹繕摺恭謝

天恩伏乞

皇上聖鑒謹

奏

道光七年閏五月二十日奉到

硃批知道了欽此

|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |

1175

1111

恭謝

御賜藥錠摺子

奏爲恭謝

天恩仰祈

聖鑒事頃臣摺弁回蘇奉到

御賞藥錠一匣謹卽恭設香案望

闕叩頭祇領欽惟

皇上甄埏六合

亭育九垓色潤珠囊正

北闕獻功之際和調玉燭奏南薰解愠之歌起瘡痕

於象譯鞞胥

皇仁一視蠲逋累於通都禕邑

聖澤覃敷歡情孚勿藥之占

帝念軫如傷之隱節逢地臘

貺賚天珍開

壽寓以寡英八瓊釀液轉

洪鈞而鍊冶九轉還丹

賜出天衢潤浥金莖之露擎來江國香分寶鼎之煙

臣

情切依蒲職慚蓄艾屢拜

榮恩於

日下重

頒靈劑於天中綵縷縈時映吳絲而煥色砂團捧處懷  
粒食以殷心爰分

愷澤於羣寮用警恫瘝於子庶物無天札疵癘仰慰

一人保赤之忱書成康樂安平敬伸百爾披丹之悵所

有<sub>臣</sub>感激忭幸下忱謹繕摺恭謝

天恩伏乞

皇上聖鑒謹

奏

道光八年六月二十九日奉到



附之身之台自之  
卷二

硃批覽欽此

三

恭謝

御賜藥錠摺子

奏爲恭謝

天恩事頃臣摺弁回蘇奉到

御賞藥錠一匣謹卽恭設香案望

闕叩頭祇領欽惟我

皇上保艾綏猷

調薰鬯物

沖和在抱陰陽宣七舉之宜

仁壽同躋老幼被四生之澤人占勿藥

帝念如傷際茲地臘之辰敬拜

天珍之貺神砂鍊就有屑皆霜靈藥研成無苗不玉恰

值芳香之節序荷淨三庚拈來綵縷之輝光粽新

九子臣質慚蘭蓄情切蒲依忝叨佳劑之

寵頒快共羣黎而

德徧十三次

上方賜食草記冬榮百千粒寶鼎分馨

恩宏夏庇比壬癸六符而製佩消暑功多燮丙丁五政

以凝辰

當陽

治普所有臣感激忭幸下忱謹繕摺恭謝

天恩伏乞

皇上聖鑒謹

奏

道光十年六月十六日奉到

硃批覽欽此



恭謝

御賜藥錠摺子

奏爲恭謝

天恩事竊臣齋摺弁回捧到

恩賞藥錠當卽恭設香案望

闕叩頭祇領欽惟我

皇上治握珍黃

麻凝保赤

風行解盪

虞絃之化育宏宣

旬七

奏疏

澤洽好生

堯糞之和甘普被準燮調於寒燠

念軫民依辨佐使於陰陽劑量物性金砂燦爛剛披德  
水以澄鮮玉屑紛敷遠裏神苗而馥郁采上池之  
靈液允宜百和香含分

中禁之仙方尚帶三瀛露潤臣才慙蔭暘志凜飲冰  
曾未効於涓埃屢仰承於

寵賚精同鍊冶榮叨

天上之光華功在醫瘡粒憶盤中之辛苦所願慎節旨  
而羣生永賴愆伏全消長此歌保定於

聖壽無疆

康疆逢吉所有臣感激下忱謹具摺恭謝

天恩伏乞

皇上聖鑒謹

奏

道光十一年六月初四日奉到

硃批覽欽此





陶文毅公全集卷四目錄

奏疏

赴任

請

覲

回籍

恭報巡視南漕任事摺子

恭謝奉

旨補授川東道摺子

恭謝奉

旨補授山西按察使摺子

恭報馳抵山西接受臬篆兼署藩篆摺子

恭謝奉

旨調任福建按察使摺子

恭謝奉

旨補授安徽布政使摺子

恭報接受安徽藩篆摺子

恭謝奉

旨補授安徽巡撫摺子

奏請封印後赴京

陛見附片

欽遵

諭旨暫緩

陛見附片

恭報交卸撫篆赴京

陛見摺子

恭報

陛辭出京回皖撫任摺子

恭謝奉

旨調補江蘇巡撫摺子

恭報接受江蘇撫篆摺子

抵蘇後陳奏地方情形摺子

感受潮溼昏眩趕緊調治附片

覆奏微疴漸愈勉力辦公附片

欽  
請

陛見附片

欽  
請

陛見摺子

恭  
報

陛辭出京回蘇撫任摺子

恭報兼署兩江督篆並謝

賞加宮銜摺子

恭報交卸兼署兩江督篆摺子

恭  
謝  
奉

旨陞授兩江總督摺子

恭報接受兩江督篆摺子

恭繳

硃諭摺子

恭報接受兩淮鹽政印務摺子

籲請

陛見摺子

籲請

陛見摺子

恭報交卸兩江篆務赴京

陛見摺子

請假回籍修墓摺子

途次聞運司出缺折回江省摺子

恭報折回江省接受督篆摺子

奏明前赴皖西閱伍順道回籍修墓附片

恭報交卸兩江篆務前赴皖西閱伍順道回籍修

墓摺子

恭報皖西閱伍事竣回籍修墓假滿  
赴任摺子

恭報由籍回抵江省接受督篆摺子

奏疏 赴任 請 覲 回籍

恭報巡視南漕任事摺子

奏爲恭報任事日期並江境水勢回空糧船各情形

仰祈

聖鑒事竊臣於九月二十六日恭請

聖訓仰蒙

皇上海示諄詳跪聆之下感悚莫名旋卽起程於十月

三十日行抵清江浦維時漕臣李奕疇尙在黃林

莊一帶督催尾幫河臣黎世序迎赴途次跪請

聖安卽同臣赴河口一帶察看水勢及開壩情形現在



黃水漸消洪湖水勢尙旺暢出刷黃裏外河一律  
深通回空糧艘已渡黃河七十幫計船二千六百  
七十餘隻俱皆暢行無滯惟在後尙有八幫計船  
四百餘隻必須趕緊飛催俾得早歸早兌以速全  
漕臣謹於十一月初二日在清江拜印視事一面  
派員作速迎提後幫一面親自督趲前船遄赴瓜  
口俟回空將竣臣卽赴徒陽運河查辦挑工一應  
事宜惟有竭誠辦理斷不敢蹈因循積習以副我  
皇上委用之至意所有臣任事日期並江省水勢回空  
船隻各情形理合恭摺具

奏再

臣

自出京後沿途麥苗均已苗發十月二十五

日

臣

乍入江境宿遷地方適遇雪澤厚積一二寸

不等次日仍陸續得雪豐年預兆百姓極爲歡忭

合併附摺以

聞伏乞

皇上睿鑒謹

奏

嘉慶二十年十一月二十五日奉到

硃批覽欽此

陽明家ノミイ集 卷四

一

|  |  |  |  |  |  |  |  |  |  |  |
|--|--|--|--|--|--|--|--|--|--|--|
|  |  |  |  |  |  |  |  |  |  |  |
|--|--|--|--|--|--|--|--|--|--|--|

恭謝奉

旨補授川東道摺子

奏爲恭謝

天恩叩請

聖訓事嘉慶二十四年閏四月二十五日內閣奉

上諭四川川東道員缺著陶澍補授欽此竊臣楚南下

士知識庸愚由嘉慶七年進士改庶吉士授職編

修充

國史館纂修典試四川分校會闈十九年改江南道

御史擢戶科給事中游歷吏科掌印給事中疊奉

恩命巡視南漕巡視中城巡視東城二十三年四月俸

滿截取奉

旨記名以繁缺道員用涓埃未効兢惕方深迺荷

恩綸補授今職聞

命之下感悚交縈伏念川東爲巴蜀鎖鑰之區道員有

督率巡查之責臣自維駑下深懼弗克勝任惟有

籲求

聖訓敬謹遵循庶於地方一切公務得以認真辦理仰

酬

高厚鴻慈於萬一所有微臣感激下忱謹繕摺恭謝

天恩伏乞

皇上睿鑒

訓示謹

奏

嘉慶二十四年閏四月二十六日具奏

The image shows a table with 12 vertical columns. The header row contains Chinese characters: 一, 二, 三, 四, 五, 六, 七, 八, 九, 十, 十一, 十二. The table is otherwise empty.

| 一 | 二 | 三 | 四 | 五 | 六 | 七 | 八 | 九 | 十 | 十一 | 十二 |
|---|---|---|---|---|---|---|---|---|---|----|----|
|   |   |   |   |   |   |   |   |   |   |    |    |

恭謝奉

旨補授山西按察使摺子

奏爲恭謝

天恩籲請

陛見事竊臣接署督臣行知准吏部咨開本年十一月

初七日內閣奉

上諭山西按察使員缺著陶澍補授欽此伏念臣南楚

菲材由嘉慶七年進士改庶吉士授職編修典試

四川分校會闈改江南道御史游歷吏科給事中

巡視中城東城巡視淮安漕務上年閏四月奉



旨補授四川川東兵備道到任以來甫經一載方冀駑駘

自策稍酬

先皇簡畀之

恩豈期犬馬無能驟荷

聖主遷除之

寵問

命之下感悚難名竊思晉省爲

畿近要區臬司乃刑名總滙懲奸剔蠹責重事繁

臣

識淺才疎深懼弗克勝任惟有籲懇

聖恩准臣入京瞻仰

天顏親承

訓示敬謹遵循庶免隕越除將川東道印遵照署督

臣

檄行移交重慶府知府花杰接護外謹專摺恭謝

天恩臣卽日起程由川陝陸路迎摺赴

闕跪聆

訓示伏乞

皇上聖鑒謹

奏

道光元年二月初三日奉到

硃批准來見欽此

平三子家之全



ノ

恭報馳抵山西接受臬篆兼署藩篆摺子

奏爲恭報微臣到任日期並兼署藩司緣由仰祈

聖鑒事竊臣於二月中旬瞻覲

天顏疊蒙三次

召見跪聆

聖訓剴切周詳倍增感悚旋奉

諭速赴新任於三月初一日馳抵山西准署臬司冀寧

道百貴將

敕印文卷委員齎送前來當卽恭設香案望

闕叩頭謝

恩祇領任事隨奉撫臣成格札知藩司邱樹棠調任江

西應行赴任新授藩司葉世倬到晉尙需時日飭

臣兼署布政使印務於初七日接篆署理伏念臣

一介庸愚上年冬月首被

寵命擢授臬司特達之

恩非臣夢想所敢期抑豈捐糜所能報迺荷

鴻慈獎勵

訓勉有加臣雖駑鈍敢不凜遵

聖誨加倍出力矢公矢慎以陳臬事至藩司爲通省官

員表率於吏治尤關緊要臣斷不敢因暫時署理

稍涉因循惟有隨同撫臣督飭所屬激發天良努  
力趨公以冀稍答我

皇上教誨成全之至意所有微臣感激下忱並到任日

期暨兼署藩司緣由理合繕摺恭謝

天恩伏乞

皇上聖鑒謹

奏

道光元年三月十五日奉到

硃批汝歷任伊始諸事均宜留心查看毋忘面訓之言  
勉之慎之欽此

夾片一件

再前蒙

欽交案件三起除平遙縣民間尙珏臨汾縣民王本志

尙未解到外其御史梁中靖參奏陽曲知縣武告

成介休知縣陸元鏞一摺現同撫臣密查確訪俟

得有實據卽行核辦覆奏謹附片以

聞

同日奉

硃批秉公審辦欽此

恭謝奉

旨調任福建按察使摺子

奏爲恭謝

天恩籲請

陛見事竊臣接巡撫行知准吏部咨開道光元年八月

二十七日內閣奉

上諭陝西布政使員缺著唐仲冕補授福建按察使員  
缺著陶澍調補所遺山西按察使員缺著程贊清調  
補等因欽此臣聞

命之下感悚交增伏念臣湖湘下士識淺才疎上年冬



附三考之三集  
卷四  
二  
月初間由川東兵備道首被

寵命擢授山西臬司於本年三月到任兼署藩篆半載  
以來勉竭駑駘毫無報稱遽荷

鴻慈調補俾按全閩地當海澨允涵

聖澤之汪洋天遠長安彌仰

宸階而眷戀查閩屬刑名甲於各省釐奸戢暴整刷尤

難當茲繁劇之區倍切冰淵之凜惟有籲懇

恩施准臣入

見庶幾親承

誨示獲有遵循再臣自接印後疊奉

欽交案件俱已隨同撫臣次第查訊

奏結現在惟有王本志陳泰等二起人證已齊數日  
內即可全行審結趕緊交代星馳赴

闕請

訓謹先繕摺恭謝

天恩伏乞

皇上聖鑒謹

奏

道光元年九月二十日奉到

硃批准來見欽此

陸方孝公全集

卷四

十

恭謝奉

旨補授安徽布政使摺子

奏爲恭謝

天恩事本月初二日內閣奉

上諭安徽布政使員缺著陶澍補授欽此竊臣湘楚庸

材毫無知識由道員

特擢晉臬涓埃未効卽蒙

簡調閩省繁劇之任當卽專摺奏請

陛見奉到

硃批准來見欽此遵卽交卸起程茲甫於到京之日卽

奉

恩編聞

命自

天感悚無地伏念安省居兩江之上游藩司繫百城之

表率旬宣任重整飭事繁臣由京職敷歷外任僅

閱兩年疊蒙

優擢知遇既由於

特簡圖報倍矢於寸衷惟有益勵冰兢實心實力以冀

稍酬

高厚鴻慈於萬一所有微臣感激下忱謹繕摺恭謝

天恩叩請

訓誨伏乞

皇上聖鑒謹

奏

道光元年十月初四日



恭報接受安徽藩篆摺子

奏爲恭報微臣到任日期叩謝

天恩仰祈

聖鑒事竊臣自十月初間抵京欽奉

上諭授臣安徽藩司當經具摺謝

恩連日仰蒙四次

召見備荷

鴻慈獎勵

誨勉有加跪聆之下感悚難名旋經

陛辭就道於十一月初八日馳抵皖城准署藩司安徽



按察使惠顯將

敕印文卷移送到臣謹恭設香案望

闕叩頭祇領任事伏念臣以菲材首被

寵綸擢授臬司涓埃未報復蒙

簡畀藩司重任

恩施本由於特達

聖訓倍切於恒常臣雖愚鈍敢不敬謹服膺實心實力

矢公勤以率羣寮別賢否以端吏治除稂莠以安

良善剔猾蠹以慎勾稽此則區區犬馬之忱所夙

夜兢惕以冀稍酬

高厚於萬一者也至安徽錢糧虧空輾轉甲於各省從  
前五次清查仍多不實不盡疲玩因循遂成纍痼  
卽稍知自愛者亦無以自拔吏治之靡多由於此

業經前撫臣李鴻賓

奏明設局清查一切事宜容臣次第經理恪遵

面諭輕重緩急相機妥辦一俟查明頭緒卽當隨同撫

臣分別應參應補應豁務俾舊累一清而新虧盡

杜庶幾正本清源吏治可期整飭再臣自出京後

經過山東江南地境麥田均已播種齊全而安徽  
之宿州靈璧鳳陽等州縣凡被水之區俱漸次涸

退現據辦賑各員查驗被災戶口察看民情甚爲

安帖堪以仰副

宸厪所有

微臣

感激下忱并到任日期謹繕摺恭謝

天恩伏乞

皇上聖鑒謹

奏

道光元年十二月十九日奉到

硃批知道了欽此

恭謝奉

旨補授安徽巡撫摺子

奏爲恭謝

天恩仰祈

聖鑒事竊臣於正月十四日由撫臣孫爾準行知接准

部咨內開道光三年正月初三日奉

上諭葉世倬年力衰邁著以原品休致孫爾準著調補

福建巡撫陶澍著補授安徽巡撫徐承恩著補授安

徽布政使欽此臣跪讀之下感悚交增謹卽恭設香

案望

闕叩謝

天恩伏念臣樗櫟庸材由道員首被

恩綸擢授山西臬司調任福建未及到任旋擢安徽布

政使莅任以來甫逾一載兢兢釐剔寸效毫無遽

蒙

皇上簡畀封疆重任

鴻施疊被實夢想所弗期駑鈍滋慚豈捐糜之能報查

安徽地方水陸交衝俗兼吳楚大江以南人文稱

盛而刁狡亦多江北各屬民情尙質而獷悍難免

鳳泗一帶時有湖河之患潁亳諸處交錯豫境紅

鬍捻匪出沒其間加以錢糧輻輳正在清釐一切  
民風吏治河務兵防均須整飭臣知識濇昧深懼  
弗克勝任惟有勉矢愚誠倍加策勵以冀稍酬  
聖主特達之知再臣初肩鉅任亟應趨叩

丹墀籲求

訓誨庶幾獲有遵循惟現辦春賑堰工兼清查緊要之  
際刻須督辦且一時藩臬俱係署事臣應俟新任  
藩司徐承恩到皖將巡撫印務暫令護理卽當星  
馳北上恭覲

天顏跪聆

臣等奉 聖訓

三

聖訓所有 微臣 感激下忱謹繕摺恭謝

天恩伏乞

皇上聖鑒謹

奏

道光三年二月十八日奉到

硃批著於本年十二月封印後來京陛見欽此

奏請封印後赴京

陛見附片

再臣於本年正月仰蒙

皇上簡任安徽巡撫當卽具摺奏謝並懇入覲

天顏跪聆

訓示奉

硃批著於本年封印後來京陛見欽此現距封印之期

僅及兩月查皖省州縣大半被災將來接奉

恩旨核放賑銀稽查戶口以及籌畫兵糧督修江壩各屬被水後城垣倉監營汛報有坍塌須委勘興修



且本年冬間

計典屆期考察各官關繫尤重臣現在次第辦理務歸迅速亦不敢草率從事致有舛誤除俟封印後束裝起程躬詣

闕廷跪請

聖訓外合將應辦事務趕緊查辦至期北上緣由附片

陳明伏乞

聖鑒謹

奏

道光三年十一月二十一日奉到

硃批另有旨欽此同日承准

軍機大臣字寄道光三年十一月初五日奉

上諭本日據陶澍奏現將應辦事務趕緊查辦遵旨於  
封印後來京陛見等語本年安徽省州縣大半被災  
現在挨放賑銀稽查戶口以及籌畫兵糈督修江壩  
事務較繁且係大計年分考察各官關係尤重著該  
撫督率認真辦理毋庸來京俟明年封印後再來京  
陛見可也將此諭令知之欽此

陽明家公全集

卷四

欽遵

諭旨暫緩

陛見附片

再臣前將趕辦要務俟封印後遵

旨入

覲緣由附片具

奏十一月二十一日承准軍機大臣字寄道光三年  
十一月初五日奉

上諭本日據陶澍奏現將應辦事務趕緊查辦遵旨於  
封印後來京陛見等語本年安徽省州縣大半被災

現在揆放賑銀稽查戶口以及籌畫兵精督修江壩  
事務較繁且係大計年分考察各官關係尤重著該  
撫督率認真辦理毋庸來京俟明年封印後再來京  
陛見可也將此諭令知之欽此跪誦之下仰見我

皇上慎重災區整飭吏治

訓誨周詳莫名欽感伏查本年皖省二十九屬被災內

中應行給賑及散放口糧之處稽查戶口實爲目

前至要之務稍有疎率卽難免遺漏混冒臣屢次

嚴飭印委各員務須戶必親到口必親驗極貧次

貧細爲體察於查竣一保之後卽將通保飢口姓

名及應領銀數張榜曉示俾災黎共見其聞刁民  
猾吏自無從染指現據各屬陸續領銀散放臣與  
藩司徐承恩商酌卽飭該管道府就近抽查將榜  
示與災册按地按人細爲核對稍有混冒無難立  
時查出仍一面密訪察訪如果印委各員實心實  
力弊絕風清卽分別存記留俟保薦倘辦理不善  
卽撤省

奏參另行委辦至來歲緩缺兵糧已據委員曹攀華  
萬年淳等將採買江楚米石陸續載回分撥本省  
及江寧等處兵匠之用足供支放其江壩工程亦

已催飭勘估迅速動工至本年

計典現據各道府將所屬各員賢否密函開報臣復

就其平日之辦事官聲細爲參考務當一秉至公

明昭激勸使觀感儆畏共勉循良以仰副

聖主澄敘官方之至意所有接奉

諭旨欽遵辦理緣由理合附片覆

奏伏乞

皇上聖鑒謹

奏

道光四年正月初八日奉到

硃批知道了欽此



淋淋淋淋

恭報交卸撫篆赴京

陛見摺子

奏爲恭報交卸撫篆并起程日期仰祈

聖鑒事竊臣於本年十一月初五日將封印後入

覲緣由先期奏

聞奉到

硃批知道了欽此聞

命之下欽感難名現屆封印所有一切年例

題奏事件均已次第辦竣於十二月二十日將安徽

巡撫印務交藩司徐承恩暫行護理其藩司印務

飭令臬司劉斯崑兼署臣卽於二十一日由皖起

程北上叩覲

天顏跪聆

恩訓除恭疏

題報外所有臣交卸撫篆及起程日期理合恭摺  
奏

聞伏乞

皇上聖鑒謹

奏

道光五年正月二十五日奉到

硃批知道了欽此



恭報

陛辭出京回院撫任摺子

奏爲恭報

微臣

回任接印日期叩謝

天恩仰祈

聖鑒事竊臣前奉

硃批准令

陛見遵於封篆後北上本年正月十九日趨詣

闕廷恭覲

天顏

召見四次

訓勉有加欽感微衷莫名依戀比蒙

恩命回任於二月二十四日行抵安徽省城准護理撫

篆布政使

臣

徐承恩委安慶府知府汪恩撫標遊

擊趙承德齋送巡撫兼提督關防一顆蕪湖關關

防一顆暨

王命旗牌并文卷等項前來

臣

恭設香案謝

恩祇領訖伏念

臣

以川東道員荷

皇上特達之知甫一載間由臬司擢授藩司旋蒙

簡畀封疆重任受事以來始則辦理清查剔釐數十年

之轆轤繼因沿江被水流離載道專意拊循勉竭

庸愚兢兢補救於一切吏治民風尙未能極意整頓茲承

溫諭回莅皖疆倚裳稚齒欣載

德以南來鏤版臣心益瞻

天而北企惟有凜遵

聖訓彌矢精誠期駑策之毋忘冀

鴻慈之稍答所有微臣感激下忱理合繕摺恭謝

天恩再臣經由直隸山東地方民氣救恬自入安徽省

界雨澤較多菜麥俱已茁秀近省一帶尤極青葱

茂豫糧價中平人情歡悅足慰



宸厪合併附陳伏乞

皇上聖鑒謹

奏

道光五年四月初二日奉到

硃批所奏俱悉欽此又於辦理清查及專意拊循於一

切吏治民風尙未能極意整頓等句上奉

硃批旣知之不可一日釋諸懷也勉之又勉以副委任

欽此

恭謝奉

旨調補江蘇巡撫摺子

奏爲恭謝

天恩事竊臣接准部咨道光五年五月十八日內閣奉

上諭張師誠著調補安徽巡撫陶澍著調補江蘇巡撫  
該撫等俱各帶印起程於途次交代卽赴新任毋庸  
來京請訓欽此當卽恭設香案望

闕叩頭謝

恩伏思臣蒙

皇上特達之知

簡畀封疆重任勉竭庸愚涓埃莫効本年正月內趨詣  
闕廷仰蒙

訓勉有加莫名欽感茲復渥荷

恩綸調補江蘇巡撫聞

命旨

天感悚無地查蘇省爲江河要區政務殷繁財賦甲於

他省日下議籌海運及漕米事宜尤關緊要責任

綦重報稱尤難臣現將經手事件趕辦完竣卽遵

旨帶印起程於途次迎交調任撫臣張師誠接收臣卽

由彼迅速赴任所有感激下忱理合恭摺

奏謝

天恩伏乞

皇上聖鑒謹

奏

道光五年七月初六日奉到

硃批勉力爲之以副委任欽此

平山家ノノノノ

ノノノノ

111

|  |  |  |  |  |  |  |  |  |  |  |
|--|--|--|--|--|--|--|--|--|--|--|
|  |  |  |  |  |  |  |  |  |  |  |
|--|--|--|--|--|--|--|--|--|--|--|

2011. 10. 14. 1. 106

恭報接受江蘇撫篆摺子

奏爲恭報微臣行抵江蘇鎮江地方接印任事日期

仰祈

聖鑒事竊臣恭承

恩命調補江蘇巡撫業將經手應辦事件趕緊料理完竣隨卽遵

旨帶印起程由水路赴任於六月十五日行抵江蘇鎮江府丹徒縣地方准前撫臣張師誠將江蘇巡撫關防并

上諭書籍文卷移交前來臣卽恭設香案望

關叩頭祇領任事伏思臣才質庸愚受

恩深重值此河漕棘手之際尤不敢不勉竭駑庸冀酬

高厚於萬一臣接印後卽順路赴清江浦察看漕運情

形與督臣漕臣河臣面商一切然後赴蘇除到任

日期另行恭疏

題報外所有臣行抵江蘇鎮江地方接篆任事日期

暨感激下忱理合繕摺具

奏叩謝

天恩伏乞

皇上聖鑒謹

奏

道光五年七月十五日奉到

硃批盡心盡力以副朕簡調之意欽此



DEPARTMENT OF JUSTICE

**X**

11/11

|  |  |  |  |  |  |  |  |  |
|--|--|--|--|--|--|--|--|--|
|  |  |  |  |  |  |  |  |  |
|  |  |  |  |  |  |  |  |  |
|  |  |  |  |  |  |  |  |  |
|  |  |  |  |  |  |  |  |  |
|  |  |  |  |  |  |  |  |  |
|  |  |  |  |  |  |  |  |  |
|  |  |  |  |  |  |  |  |  |
|  |  |  |  |  |  |  |  |  |
|  |  |  |  |  |  |  |  |  |
|  |  |  |  |  |  |  |  |  |

抵蘇後陳奏地方情形摺子

奏爲恭報進省任事並陳地方情形仰祈

聖鑒事竊臣欽奉

恩命調補江蘇巡撫於本年六月十五日在鎮江途次

接印當將接印日期並順道赴清江緣由恭摺奏

聞在案茲臣由清江起程於六月二十五日抵蘇任事

除河漕二項及現議海運各務事體重大容臣同

督臣及河漕諸臣次第妥籌辦理外至通省吏治

民風尤臣專責臣由皖來吳接見各屬非無留心

實際之人而才猷超出者頗少卽如州縣爲親民

之官必須得人而理乃蘇省因有河工其大挑等班知縣每以輪補無期借補縣丞州判而捐納之縣丞主簿反以保薦應陞驟膺繁劇現在六十八州縣中由捐班補由佐貳陞者已屬不少沿河各縣以縣丞署理者竟十居其七雖甲科捐納人才原無區別然進階太雜卽難免無倖進之輩濫廁其間始基未立安望其留心民事有益地方此吏治之不可不亟爲整頓者也

臣

往來淮揚及江鎮

蘇常一帶閭閻非不稠密民物非不安恬然淮揚被水之後民氣未舒江鎮蘇常等處小民生計外

雖見其有餘內實形其不足衣冠文物燦然可觀  
而浮靡之餘漸流詐僞以致市井訛騙則有搭臺  
之目生監把持則有破靴之稱良楛難齊日滋獄  
訟此民風之不可不亟爲整頓者也臣材質疏庸  
膺茲重任惟有勉竭愚誠與督臣悉心商辦隨時  
隨地督率兩司極力整頓務在綜覈名實分別賢  
否並諄諭司道府廳州縣力崇節儉盡心勸導以  
期吏治民風漸有起色所有臣抵蘇任事日期及  
地方大概情形理合恭摺具

奏伏乞

皇上聖鑒訓示謹

奏

道光五年八月初十日奉到

硃批朕所以調任江蘇者觀汝頗可幹濟藉資整頓汝  
其實力實心以漸而入通省吏治民風全繫於汝一  
身而用人更爲當事之急勉之慎之欽此

感受潮溼昏眩趕緊調治附片

再臣自上年秋間監臨鄉試闈中猝患傷寒轉成瘧疾偃臥至冬其勢甚劇時值河漕阻滯議辦海運勉強力疾從公未敢請假曾經

### 奏蒙

聖鑒本年入春以來往返海上積受潮溼爲風邪所中腿足時形麻木旋因江北各屬被水親往勘撫經歷敗圩積潦之中酷暑薰蒸所受潮溼更甚以致舊疾復發時寒時熱間有昏眩現在服藥調理深恐孱病之軀稍有貽誤不勝惴慄所有微臣現患

潮溼昏眩趕緊調治緣由謹附片具陳伏乞

聖鑒謹

奏

道光六年九月二十四日承准

軍機大臣字寄道光六年九月十五日奉

上諭本日據陶澍奏現患潮熱昏眩趕緊調治等語已批令安心調理矣陶澍年力方盛辦事實心前以江蘇地方事務繁重特加簡調深資倚任上年該撫雖染時疾聞已早就痊愈現卽小有不適無難刻日醫痊第恐該撫於地方應辦事務或有掣肘作難之處

不妨據實直陳卽或露章未便亦當密摺陳奏斷不可遽思引疾爲推諉地步有負委任現在河湖爲江省要務所辦擇培大隄工程是否委辦得人致仍前草率前開河湖各壩曾否集料興工尅期堵閉其被災地方前以淮揚所屬各州縣爲重迨開放減壩後海州安東等州縣被淹情形自亦不減於淮揚各屬該撫及前此琦善所奏祇稱現辦撫恤究應如何給賑不致流離失所無誤春耕亦當詳查妥籌據實具奏吏治民生爲巡撫專責不比總督現辦河務不能兼顧也將此諭令知之欽此又於道光六年九月



三十日奉到

硃批安心加意調理所奏知道了欽此

覆奏微疴漸愈勉力辦公附片

再臣於九月二十四日接到

廷寄奉

上諭一道又於本日奉到

批摺以臣感患微疴上煩

慈注

諭令安心加意調理並奉

諭江蘇事務繁重或有掣肘作難之事不妨據實陳

奏斷不可遽思引疾有負委任等因捧誦之下不勝

感激涕零伏思臣渥蒙

皇上特達之知年方四十有九精力未衰正宜竭力圖報祇以上年大病之後適值事繁失於調養以致偶感仍發迺荷

聖主曲體入微

恩同大造臣何人斯膺茲

篤眷自念受

恩之深此身不敢爲臣有亦惟受

恩之深此身不敢不爲臣有現在力疾辦公一面服藥

調治潮熱已退頭目漸清惟有腰腿未愈醫言積溼受風深入腠理尙須由漸疏解加以補劑可冀

徐瘳勉圖駑策斷不敢稍萌諉卸致負

鴻慈至湖河各有專司一切勘估工程開閉閘壩及員

弁姓名履歷並不知會臣衙門無由深悉本年淮

揚水災咸言百數十年所未有被淹甚久顆粒無

收因思河工雖非臣職一經決裂其害卽歸於地

方若河工一日不安卽地方一日不靖不敢避越

俎之嫌每有見聞輒據所知札商督臣河臣彼此

意見多同現在王營減壩開後黃水已落清水不

患不消但須早蓄而河流旣斷尤須挑挖深通免

致積淤未淨將來又形倒灌海州安東流陽各屬

雖有損傷若今臘明正能將減壩尅期堵合當可  
無誤春耕至災民前因水深無住紛紛逃避經臣  
飭屬設廠分養均屬安靜日內卽當彙案懇

恩蠲賑而漕務爲東南一大端軍船回空已入蘇境尤  
須整頓章程早爲備辦以速河運仰副

宸厪合併據實附摺覆

奏伏乞

聖鑒謹

奏

道光六年十一月初二日奉到

硃批所奏均悉勉力爲之以副信任欽此又於受

恩之深此身不敢爲臣有亦惟受

恩之深此身不敢不爲臣有等句傍奉

硃批爲臣不易朕豈不知然朕用人之苦心汝亦不可

不諒也無改前轍佐臻上理慎勉毋懈又於能將減

蠲尅期增合當可無誤春耕句傍奉

硃批此一節不必過慮日前已諭知琦善等矣欽此



額請

陛見附片

再臣自道光五年六月由安徽巡撫蒙

恩調任江蘇扣至本年六月三年期滿例得入覲

天顏藉伸犬馬瞻戀之忱適奉

諭旨派臣監臨秋闈未敢冒昧瀆請一俟場後謹當具

摺額請

陛見合併附片陳明伏乞

聖鑒謹

奏



道光八年八月二十七日奉到

硃批毋庸前來明歲秋間再行奏請欽此

籲請

陛見摺子

奏爲遵

旨籲請

陛見仰祈

恩准藉達下忱事竊臣前於道光三年正月蒙

恩擢授安徽巡撫五年正月始得入都恭聆

聖訓旋即回皖其年六月接奉

諭旨調任江蘇卽赴新任扣至八年六月已滿三年適

因江南鄉試屆期安徽巡撫鄧廷楨以本籍迴避

欽奉

特旨派

臣

監臨未敢瀆請曾經附摺陳明俟場後入

覲奉到

硃批毋庸前來明歲秋間再行奏請欽此在案計

臣

自

蒙

恩簡任巡撫以來惟在皖時一近

天顏及抵江蘇又閱五載犬馬之戀實深時望

闕廷而佇慕駑鈍之慚彌積惟資

訓誨以遵循現查秋錄久竣奏銷亦訖地方救謚暘雨

均調別無緊要事件欽遵前奉

殊旨專摺具陳仰懇

聖恩

俯俞所請俾

臣

稍舒依戀之忱

臣

前者備員京秩從未

預班隨扈此次迎謁

行在獲侍

屬車而承

訓示尤深慶幸

臣

不勝瞻

天翹企之至爲此瀝情籲懇伏乞

皇上聖鑒謹

奏

道光九年八月十九日奉到

硃批計算程途於十一月初間抵京陛見可也欽此

恭報

陛辭出京回蘇撫任摺子

奏爲恭報微臣回任接印日期敬陳感激下忱叩謝

天恩仰祈

聖鑒事竊臣蒙

恩准令

陛見於道光九年十一月初五日趨詣

闕廷恭覲

天顏連日塵蒙

召見十二次

訓誨周詳仰邀

聖主期勉生成逾分溢量五中感激莫可名言臣於十

八日

陛辭遵卽束裝起程於十二月二十一日回抵蘇州省

城在護理撫臣梁章鉅將江蘇巡撫關防并

王命旗牌及文案卷宗委員齎送前來臣卽恭設香案

望

闕叩頭祇領任事伏念巡撫責任綦重江蘇政務尤

繁臣以菲材時虞隕越茲蒙

溫諭回省任事旣欣瞻就之稍抒復荷

提撕之倍摯淪肌浹髓渥被

鴻慈

臣

敢不殫竭血誠慎終如始以承

聖訓以答

高深所有

微臣

回任接印日期及感激下忱理合繕摺

恭謝

天恩再

臣

經過直隸山東一帶俱屬敕靜十二月初七

日甫抵江境適值晨雪紛敷積厚三寸有餘查自

入冬以來雨澤稀少河道多淺得此喜雪深符農

望各處糧價平中民情恬鬯足慰

宸廑合併附陳伏乞



皇上聖鑒謹

奏

道光十年正月二十三日奉到

硃批知道了留覽附片一件欽此

恭報兼署兩江督篆並謝

賞加宮銜摺子

奏爲恭謝

天恩仰祈

聖鑒事竊照督

臣

蔣攸銛因病告假兩月所有兩江總

督印務

奏交

臣

暫行兼署於六月二十日委員齎送

欽頒總督關防并文案卷宗等項前來

臣

當卽恭設香

案望

關印頭祇領同日適由遞接到道光十年六月十一

日內閣欽奉

上諭一道以臣緝獲假照案內要犯仰蒙

特旨賞加太子少保銜聞

命之下感悚交增

恩光來一日之中迴非夢想喜氣迓三江之表彌切兢

懷伏念臣質木凡庸才尤駑鈍過蒙

知遇承乏封疆復叨總制之兼權載荷崇銜之

晉錫連圻任重雖暫攝而竊負肩孱列棘班清幸附綴

而鴛聯隊肅記十載江沿上下馳驅絕少微勞惟

九重念切東南

眷倚頻煩異數現在地方救謚暘雨均調惟河工秋汛  
將臨漕艘回空亦近蹙籌捕務尙待經營臣惟有  
殫盡愚誠益加奮勉與督臣及諸同寅遇事籌商  
妥辦務極審詳不敢因暫署而稍涉疎虞致負再

三之

渥寵庶幾竭寸忱而勉圖報稱冀酬萬一於

鴻慈所有微臣感激下忱謹繕摺恭謝

天恩伏乞

皇上聖鑒謹

奉

道光十年七月二十三日奉到

硃批覽欽此

恭報交卸兼署兩江督篆摺子

奏爲恭報交卸兼署督篆日期仰祈

聖鑒事竊臣前奉

上諭蔣攸銛著賞假兩月兩江總督印務著陶澍暫行

兼署欽此臣當將兼署日期恭摺

奏報在案五旬以來倍竭駑駘刻深謹凜以

天心爲心以民事爲事勉期稱職正愧無能茲於八月

初七日接准臣蔣攸銛信知體氣漸次復原

奏請銷假於十三日接印等因臣卽於初八日飭委

蘇州府知府蘇廷玉臣標中軍參將吉祥保將總

督關防及文卷等項齎送 臣 蔣攸銛接受任事所

有 臣 卸署督篆日期除另疏

題報外謹恭摺具

奏伏乞

皇上聖鑒謹

奏

道光十年九月初九日奉到

硃批知道了欽此

恭謝奉

旨陞授兩江總督摺子

奏爲恭謝

天恩仰祈

聖鑒事竊臣頃因勘工孟瀆出省九月初三日於江寧

途次接到道光十年八月二十五日內閣奉

上諭兩江政務殷繁蔣攸銛著來京供職陶澍著補授

兩江總督仍兼署江蘇巡撫毋庸來京陛見等因欽

此跪聆之下感激涕零悚惶無地伏念臣楚南下

士才識疎庸蒙



皇上特達之知由道員游莅封疆十載江南兢兢奉職

毫無報稱迺復渥荷

恩綸畀茲鉅任臣自顧何人篤邀

高厚受

恩愈重圖報愈難伏思兩江總督統轄三省地廣務繁

兼應協理河鹽正值艱難之際恐非臣之駑鈍所

能勝任至於蘇撫事件雖臣舊職而雙符竝綰

負滋孱揣分循衷彌增凜慄惟有竭臣慮之所及

盡臣力之所能一寸血誠矢諸寤寐以答

鴻慈於萬一臣因蘇城尙有緊務由水路暫還俟接印

再行恭報外所有 接奉

諭旨感激下忱謹繕摺叩謝

天恩伏乞

皇上聖鑒謹

奏

道光十年九月二十八日奉到

硃批三省任重自不待言矣兼以河鹽疲敝汝既知汝  
係特達之知付以重任矢血誠於寤寐之中朕亦無  
可再論當今之要首在得人汝宜殫竭心力公慎察  
查斷不可因循姑息貽誤將來再現在之急武備尤

當整飭想汝亦必見及於此矣勉之慎之欽此又於  
兼以河鹽疲敝句下奉

殊添更當加意講求六字

恭報接受兩江督篆摺子

奏爲恭報微臣交送撫篆接受兩江總督印務日期

叩謝

天恩仰祈

聖鑒事竊臣前於勘工途次接奉

諭旨陶澍著補授兩江總督仍兼署江蘇巡撫毋庸來

京陛見等因欽此臣當卽恭摺叩謝

天恩茲准吏部咨欽奉

上諭盧坤昨已調補江蘇巡撫到任尙需時日其未到

任以前著梁章鉅護理欽此臣遵於道光十年九月

十五日將

欽頒嘉字十六號江蘇巡撫關防一顆

王命旗牌八面桿竝節次奉到

上諭書籍文卷等項委員齋送蘇州藩司臣梁章鉅接

收護理並准大學士臣蔣攸銛將兩江總督關防

一顆委員齋送前來臣卽於是日恭設香案望

闕叩頭謝

恩祇領任事伏念臣以凡庸猥荷

聖慈封圻游莅涓埃未効兢惕方深茲復仰邀

特簡畀以總督兩江

榮施非夢想所期

龐恩汪濊感激豈言辭可喻駑策慚惶臣惟有勉矢愚

誠將地方營伍鹽漕水利宣防一切事宜認真經理竭力盡心永盟夙夜以答

高深而修臣職所有微臣交送撫篆接受兩江總督印

務日期及感激下忱理合恭摺叩謝

天恩伏乞

皇上聖鑒謹

奏

道光十年十月十一日奉到

殊批知道了欽此

恭繳

硃諭摺子

奏爲恭謝

恩訓仰祈

聖鑒事竊臣承准軍機大臣字寄欽奉道光十年八月

二十六日

硃諭一封

諭兩江總督陶澍知之朕看汝人爽直任事勇敢故畀以兩江重任汝當益勵才猷實力整理膺封疆重寄者勿避嫌怨勿憚勤劬自不待言矣然當今之勢憲



章具在法令森然若能大法小廉奉行以實不以文  
何患政事不理百姓不安乎無如世風日下人心益  
澆官不肯虚心察吏吏不肯實意恤民遇事則念及  
身家行法不計及久遠朕所懼者在此所恨者亦在  
此欲求一堪膺重寄者不可多得河工鹽務均係兼  
轄尤當實力講求破除一切積習漸復舊規曰如何  
而能若是日在得人毋忽毋忽欽此跪誦之下感惶  
無地伏念臣出自草茅自祖父以上耕讀相承未  
嘗出仕絕無攀援惟有愚誠我

皇上拔臣

於庸衆之中不三四年由道員擢至封疆此

徵臣  
夢想所不到也辛巳春冬兩次入

見疊邀

聖誨諄諄

鴻慈獎掖蒙

諭汝操守好辦事認真又

諭汝學問人品俱好臣俯聆

天語神魂飛越且感且慙鐫石鏤瓊凜嚴對越上年冬

月述職入

覲待漏朝房十有四日渥蒙

召見十二次

奏疏

隆慶朝卷之五

三

訓辭周摯上而

敬

天法

祖之

宏謨下而察吏安民之實績以及河工鹽務漕運兵防

刑法政令一一備叨

指示而要以敦行實踐得人共理

聖謨洋洋永銘心版茲者捧展

殊函

勅臣手啟言言

訓誥字字

典謨盟誦回環猶儼然身覲

天顏依咫尺而聞

提命受

恩至此粉骨難酬臣敢不益勵操持於察吏恤民諸務

虛心講求實力整理破除一切積習以冀羣材勵

翼其贊

昇平惟是

臣

心無窮

臣

才有限當斯艱鉅之際膺茲重

大之任恐無以仰副

宸厪不勝戰慄隕越之至所有接奉

周文受公全集

卷四 奏疏

五

附錄卷之三十一  
硃諭理合恭繳謹繕摺仰謝

天恩伏乞

皇上聖鑒謹

奏

道光十年十月十二日奉到

硃批知道了片留覽欽此

恭報接受兩淮鹽政印務摺子

奏爲接受兩淮鹽篆竝陳現辦情形恭謝

天恩仰祈

聖鑒事竊

臣

於本年正月初二日接准吏部知照內閣

鈔出道光十年十二月二十一日奉

上諭兩淮官引滯銷難務疲敝現據王鼎等奏稱由鹽政無管轄地方之責文武員弁均非所屬疏銷巡緝難期令行禁止着將兩淮鹽務改歸兩江總督管理所有鹽政一缺着卽裁撤鍾靈着回京當差其會議酌定章程着照所議辦理等因欽此欽遵轉行知照

茲於正月十三日由臣鍾靈將兩淮鹽政印信文卷等項委員齎送到省臣謹卽恭設香案望

闕叩頭祇領任事伏查兩淮鹺務攸關六省民食爲引一百六十九萬餘道爲課四百餘萬兩加以外支各款每歲不下二百餘萬兩合計錢糧足抵數省之地丁我

朝體恤商丁至優極渥緩急輸將亦惟兩淮爲最盛雖中間偶有衰歇從未有如近時之竭蹶異常溯其潰壞之由自二十年前已逐漸就頽有江河日下之勢迨及近歲而決裂日甚至上年而掃地罄

盡庫儲業已全空外欠猶然叢集四千餘萬之舊  
逋無從歸完一千餘萬之借本悉化烏有而且商  
情疲乏浮議繁多把持咀嚼無敢過問公私倒置  
遂至於斯臣於上年九月接奉

恩旨簡擢兩江總督卽經察訪利弊縷悉具陳旋蒙

欽派戶部尙書王鼎侍郎寶興來江會議兩月以來益

悉其中敝壞情形齟纓難盡所議酌定鹽務章程  
十五條業蒙

俞旨准行惟是積弊之餘章程甫立節目尙多如裁浮  
費去根窩慎出納禁淹消散輪規減價敵私諸條



皆商情所不樂訪口所易騰一時未必帖然自應  
申明

國法從實妥辦一有瞻玩卽併其從前弊混之罪追  
革查抄究治方足以資整頓至文武員弁向於鹽  
務往往視同膜外疏銷巡緝不肯認真出力甚至  
得規包庇尤堪痛恨

功令森嚴必應整飭所難者兩淮彫弊已極現在商  
人力能辦運者不過二三十家而新商辦運稍生  
非刪減繁文禁除科派絲毫不令受累不足以廣  
招徠展轉僉募尙需時日兼之漢口積引不下數

千萬祖非三兩月所能罄盡江西情形亦然前綱  
既滯則辛卯新鹽卽截清界限於春月開綱而行  
抵楚西各岸已在夏秋之際明歲奏銷勢不能如  
期完竣不得不預行陳明其餘未盡事宜容臣隨  
時察看奏咨辦理俾歸有濟總之鹽務敗壞至此  
本由數十年來積漸而成此時整頓舊章實與重  
新起造無異亦必由漸而入始能復原臣渥受  
特恩捐糜圖報分所當然任勞任怨更不敢辭而辦理  
不能無序兼臣管理三江職任較繁吏兵河漕刻  
費經營茲復以鹽務兼轄之責改爲專管駑駘勉

策深懼弗堪惟有仰懇

恩慈

俯賜訓誨俾資循奉庶幾力圖振刷藉期起色裕

國便民漸復舊制所有臣感凜下忱謹繕摺恭謝

天恩伏乞

皇上聖鑒謹

奏

道光十一年二月初六日奉到道光十一年正月

二十七日內閣奉

上諭陶澍奏接受兩淮鹽篆竝陳現辦情形一摺據稱

兩淮鹽務積弊之餘章程甫立節目尙多如截浮費  
去根窩慎出納禁淹消散輪規減價敵私諸款皆商  
情所不樂應申明國法從實妥辦一有膽玩卽併其  
從前弊混之罪追革查抄至文武員弁向於疏銷巡  
緝不肯認真出力甚至得規包庇必應整飭等語現  
當整頓之際功令森嚴該督務須實心查辦力除積  
弊俾各商及員弁等咸知儆畏於銷引緝私方有裨  
益至所稱現在商人力能辦運者不過二三十家新  
商僉募尙需時日兼之漢口積引不下數千萬祖非  
三兩月所能罄盡江西情形亦然前綱旣滯則辛卯

新鹽卽截清界限於春月開綱而行抵楚西各岸已  
在夏秋之際明歲奏銷勢不能如期完竣等語自係  
實在情形所有明歲奏銷著准其稍寬時日屆期奏  
明辦理此後仍當年清年款不得復蹈故轍其餘未  
盡各事宜竝著該督隨時察看分別奏咨核辦該督  
身受重恩總當任勞任怨悉心籌辦力圖振刷以期  
鹽務日有起色勉副委任方爲妥善將此諭令知之  
欽此又於

方爲妥善句下奉

殊添諒該督亦必不肯甘蹈曾燠等之覆轍也欽此又

於道光十一年二月初十日奉到

硃批另有旨欽此

卜三易之卷三



卷四

三

籲請

陛見摺子

奏為微臣抵任兩江已逾三載謹陳瞻戀下忱恭摺

籲請

陛見仰祈

聖鑒事竊臣於道光十年八月蒙

恩簡畀兩江總督竝奉

諭旨毋庸來京陛見臣感荷

渥恩凜遵

聖諭未敢瑣瀆其時地方公務叢繁鹽鹺尤為棘手臣



奉

命兼理亟需整頓嗣復三省同災疊遭水患流離百萬  
待哺嗷嗷繼而馬灣龍汎接次決漫籌運籌河刻  
難就緒緝私詰伍奔走未遑凡此數年之內實爲  
諸艱竝集之時竭駑支持日不暇給是以上年已  
屆述職臣未敢循例陳請而瞻念

闕廷實無刻不縈寤寐茲幸仰叨

福庇陽雨依時閭閻救靖全漕穩渡河汎安瀾鹽務漸  
有起色凡地方應辦之事俱已次第就理藉紓

宵旰蟻慕微忱彌增企戀計臣自道光九年獲睹

天顏親承

訓誨旋回蘇州撫署現在總督任內雖祇三年通前實已五載蒲柳之姿鬚髮皆霜已非舊質而犬馬戀主之誠尤宛轉於中而不能自己兼地方一切庶務有

愚慮所不能及奏牘所不能詳者尤須面陳

聖主之前庶幾仰稟

宸謨獲資遵守合無仰懇

聖慈准臣入都展

覲葵藿私衷不勝翹佇如蒙

俞允所有兩江總督篆務可否卽交江蘇巡撫臣林則

徐署理俾臣得以迅速俶裝恭候

諭旨遵行所有臣期屆述職依戀下忱謹繕摺具

奏伏乞

皇上聖鑒謹

奏

道光十三年八月初一日奉到

硃批可暫緩來京下屆奏請可也欽此又於地方一切

庶務有愚慮所不能及奏牘所不能詳者尤須面

陳

聖主之前旬劄奉

硃批所論雖是然職守綦重祇可暫緩欽此



籲請

陛見摺子

奏爲微臣述職已逾六載謹陳瞻戀下忱遵

旨奏請

陛見仰祈

恩允事竊臣於道光十年蒙

恩補授兩江總督欽奉

諭旨毋庸來京迨至十三年籲請入

覲欽奉

硃批可暫緩來京下屆奏請可也欽此又於摺內地方

一切庶務有愚慮所不能及奏牘所不能詳者尤

須面陳

聖主之前旬苟奉

硃批所論亦是然職守綦重祇可暫緩欽此臣欽遵

慈諭未敢再瀆頻年以來籌災改票竭蹶未遑肆武防

河奔馳載道每引領於

闕廷願親承夫

訓誨蟻私日積又已三載於茲計自道光九年冬月臣

於蘇撫任內蒙

恩准見旋卽備員江督違遠

宸階已經七載衰鈍愈形駑駘勉策顧寸草之涓誠未  
報與日俱深念

九重之宵旰維殷瞻

天倍切茲幸地方收謐轉歉爲豐河鹽各務漸臻就緒  
三省營伍校閱將竣頗亦整齊其餘公務無多謹  
遵

前旨縷陳積悃籲請

陛見比嬰兒之思哺乳依戀難名類遠旅之望門間瞻  
懷靡及伏冀

恩慈准臣入



見所有總督篆務現在江蘇撫<sub>臣</sub>林則徐監臨秋試可

否於出闈後交令就近接署伏候

諭旨遵行如蒙

恩允<sub>臣</sub>即於九月內迅速北上恭

覲請

訓俾犬馬微忱獲遂瞻依曷勝翹企待

命之至謹繕摺具

奏伏乞

皇上聖鑒謹

奏

XXI-1114 CLASS 001114

道光十五年九月初二日奉到

硃批另有旨欽此同日奉到道光十五年八月二十日

內閣奉

上諭陶澍奏懇恩請覲一摺陶澍著俟本年漕船回空  
全竣後來京陛見所有兩江總督印務屆時著林則  
徐署理江蘇巡撫印務著陳鑾護理欽此

中三象ノ三三三

三三三

恭報交卸兩江篆務赴京

陛見摺子

奏爲恭報交卸兩江篆務起程日期仰祈

聖鑒事竊臣述職已逾六載

奏奉

恩旨俟回空漕船全竣後來京陛見所有兩江總督印  
務著林則徐署理等因欽此茲回空漕船督飭催僱  
隨到隨行於十月二十八日江廣尾幫掃數渡黃  
完竣南下正值運河水勢充裕船行順利沿路安  
靜陸續出江歸次臣卽將任內一切應辦事件趕

緊次第清理於十一月初八日遵

旨將兩江總督關防及兩淮鹽政印務委員齋送江蘇

撫<sub>臣</sub>林則徐接署<sub>臣</sub>卽於十一日由清江起程趨

赴

闕廷恭聆

聖訓瞻

天未遠欣幸難名所有交卸督鹽篆務起程日期理合

恭摺具

奏伏乞

皇上聖鑒謹

奏

道光十五年十二月初八日奉到

硃批知道了欽此

|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|--|--|--|--|--|--|--|--|--|--|

請假回籍修墓摺子

奏爲籲懇

天恩給假回籍修墓事竊臣籍隸湖南安化縣前於嘉

慶二十四年赴任四川川東道時曾順道請假省

墓一次迄今已逾十七年之久服官在外家無次

丁聞祖父墳墓間被續葬所損臣感念松楸望雲

隕涕屢擬陳情乞假歸省祇以受

恩深重服官地方距原籍較遠自

簡畀兩江總督以來事務殷繁尤未敢冒昧陳請茲屆

述職之期仰蒙



恩准來京

陛見適值封篆期內合無仰懇

皇上天恩賞假回籍修墓臣計算程途由京至江寧限

期係二十八日由京至湖北限期亦係二十八日

臣由湖北至湖南本籍不過十餘日請假在籍一

月即可趕緊修理墳墓俾遂烏私兼查上年二月

奉

旨差派大臣查閱山東河南等省營伍其兩江各營伍

卽

特派臣校閱兩載以來因諸務蝟集僅閱江蘇及安徽

省北等營尙未盡歲其江西一省則全未及閱緣  
江西各營距江寧遠者幾及一月臣由籍修墓事  
竣卽東裝取道長沙至江西境不過十餘日可到  
程途旣省且兩江總督印務現有江蘇撫臣林則  
徐署理臣卽謹遵

特旨專理閱兵沿途均可借印辦事藉得周歷各營逐  
細校閱並可遠及南贛廣信等屬巡閱邊防一俟  
江西閱竣卽順流而下以次校閱安徽各營伍回  
至江寧與署督臣交代篆務於公事亦屬甚便不  
致耽延所有臣請假回籍修墓下忱理合據實縷

附  
三

陳伏乞

皇上聖鑒謹

奏

道光十五年十二月十二日奉

旨賞假一月欽此

途次聞運司出缺折回江省摺子

奏爲途次聞運司出缺折回江省並請

旨簡放以重公務事竊臣由兩江述職入

覲敬陳下情乞假回籍修墓並順道閱兵仰蒙

聖恩允准臣一路南行於道光十六年正月初八日旅

次鄭州適護理兩淮鹽運司南監掣同知姚瑩專

差送來急稟臣接閱之下驚悉鹽運使俞德淵因

患病暫假調養仍念念在公口講指畫日夜不息

至十二月二十日痰壅氣喘出缺伏查俞德淵由

庶吉士散館改知縣蒙

恩濬擢今職循良篤實官聲最優在兩淮五年適當疲  
敝之後殫精竭力刻苦支持以致積勞成疾竟至  
一病不起該員有親子已回甘肅應試僅有幼孫  
在署身後蕭然姚瑩現爲照料惟是兩淮鹽務經  
該員一手料理甫經得有頭緒正擬疏新導滯愈  
期起色臣於淮驛因阻隔長江且所管較繁僅總  
大綱未及細爲經理茲該員旣逝主持乏人實恐  
甫經扶起之局又有頓蹙悼惜之餘轉增焦灼因  
思告假修墓臣子之私情在  
聖主體卹下情無微不至得荷

恩施格外而公務緊要情形朝夕不同在臣職又當權

量緩急先公而後私計臣順道回籍閱兵兩省周

歷須至半年之久臣於

陛辭之際仰蒙

垂厯諄諄計算路程

諭以爲時較久兩江各務能否放心臣敬聆之下欽欽

在抱旋於直隸境內接奉

廷寄始知漢岸缺鹽之語兼聞冬令久晴徒陽乏水

漕兌緊迫海塘方修諸務紛乘署督護撫諸臣日

不暇給忽又運司出缺巽務綦難臣再四思維此

時公務爲重應卽由汴梁改道歸德至臨淮抵江  
寧省城不過十餘日卽到趕回本任籌商料理一  
切所有江西及安徽南路奉

命閱兵臣應俟鹽務得人料理粗遂並催送全漕渡黃

後臣卽趕趁秋涼前往校閱屆期仍懇乞

天恩准臣於江西事竣送印交江蘇巡撫暫行兼署臣

卽順路回家省墓由水路回江月餘可到不致稍  
有耽延合併陳明所有臣現在途次折回緣由並  
兩淮鹽運使缺關繫緊要謹繕摺具

奏請

旨簡放以重職守伏乞

皇上聖鑒訓示謹

奏

道光十六年正月二十六日准

軍機大臣字寄道光十六年正月十七日奉

上諭本日據陶澍奏途次聞運司出缺折回江省一摺

上年陶澍來京陛見奏懇賞假回籍修墓當經加恩

允准茲行抵河南鄭州知鹽運使俞德淵因病出缺

兩淮鹺務疏新導滯現當喫緊之時主持乏人關繫

緊要陶澍接奉此旨著卽折回江寧省城督同新任



運司劉萬程籌商料理務期釐政日有起色統俟鹽務得人並催送全漕渡黃後再赴江西及安徽南路閱兵將來江西事竣卽將兩江總督印務交林則徐暫行兼署該督卽順道回籍省墓再由水路旋抵本任將此諭令知之欽此又於道光十六年正月二十七日奉到

硃批知道了片留覽欽此

恭報折回江省接受督篆摺子

奏爲恭報

微臣

折回江省接篆視事日期叩謝

天恩仰祈

聖鑒事頃臣入

覬請假回籍修墓行至鄭州聞兩淮運司出缺

奏明改道折回江省辦事自正月初十日曉發汴梁

一路遡行是月二十二日馳抵江浦途次接准署

督臣林則徐劄委署江寧府海州知州王用賓督

標中軍副將沙序元將

欽頒兩江總督關防一顆兩淮鹽政印信一顆並

王命旗牌等項齎送到臣隨卽恭設香案望

闕叩頭祇領任事伏念臣以菲材蒙

恩擢任兩江總督已歷六年之久去冬始得述職入都

泥首

宮門叩謝

天恩面聆

訓誨備極周詳蒙

賞賜克食麕鹿

加賞福壽字

御書印心石屋及摩崖大字

詢臣里山居之地

宸翰親頒

鑒人子邱木之思

鴻慈允假凡此至渥至優之

曠典實屬難逢難遇之

榮施臣自顧何人膺茲異數敢不殫精竭力倍勵駑駘

以期仰報

高厚於萬一現在春水方生漕艘次第開行江運鹽船

連帆上達臣與撫臣面商一切後卽赴揚州料理

漕務所有督署日行事件委江寧布政使楊簧代

拆代行其緊要過堂案件俟臣督同新任運司劉萬程料理離務粗就再行回署辦理至臣前請閱兵安徽江西順道回籍修墓應俟全漕渡黃後再行遵

旨前往所有臣現在接受督篆視事日期理合繕摺恭謝

天恩伏乞

皇上聖鑒再臣自豫省改道由皖北一帶折回汪寧濠途經過地方俱皆得有瑞雪麥田滋潤米價平減閭閻均各安恬堪以仰紓

塵注合併陳明謹

奏

道光十六年二月二十五日奉到

硃批知道了欽此

陸二家ノ三ノ  
三

三

奏明前赴皖西閱伍順道回籍修墓附片

再臣於上年十二月入都展

覲陳情乞假回籍修墓蒙

恩賞假一月本年正月途次聞運司出缺奏奉

諭旨上年陶澍來京陛見奏懇賞假回籍修墓當經加

恩允准茲行抵河南鄭州知鹽運使俞德淵因病出

缺兩淮鹽務疏新導滯現當喫緊之時主持乏人關

繫緊要陶澍接奉此旨著卽折回江寧省城督同新

任運司劉萬程籌商料理務期鹽政日有起色統俟

鹽務得人并催送全漕渡黃後再赴江西及安徽南



路閱兵將來江西事竣卽將兩江總督印務交林則  
徐暫行兼署該督卽順道回籍省墓再由水路旋抵  
本任欽此跪聆之下仰荷

聖慈體卹周至不勝感激涕零比卽欽遵咨照江南江

西及臣原籍各省臣於抵任後卽赴揚州督同新

運司劉萬程將疏新導滯各務逐一悉籌商復回省

料理署務督催各省新漕次第渡黃至五月二十

五日渡竣卽赴泰州將狼山鎮所轄通泰各營校

閱全竣六月初四日回抵省城現在趕緊清釐各

務擬於七月內卽由皖省之太平廣德寧國徽瀘

安慶等處一路赴江西校閱事竣遵

旨順道回籍請假一月修墓送印交江蘇撫臣兼署惟

思兩江事務本繁臣於江西送印至蘇中多空閒

之日兼以管理兩淮鹽務各場捆運開江及徵解

餉鞘一切咨移牌票刻須用印難於數千里外懸

待慮滋貽誤應請卽於臣啟程時交印與撫臣林

則徐署理其江蘇巡撫印務藩司怡良已由江西

卸護撫篆前來堪以委令護理臣卽謹遵前奉

特旨閱兵無須帶印前往遇有最要事件仍可彼此札

商倘有需印之處沿途均可借用並無窒礙而臣

校閱稍寬藉資周歷於贛南袁吉各府接連粵廣  
之區均得巡視以重邊防及入楚境並得與湖廣  
督撫臣籌商准鹽緝銷各務趕緊回江不致稍延  
合併縷悉陳明伏乞

聖鑒訓示謹

奏

道光十六年七月初四日奉到

硃批如所請行欽此

恭報交卸兩江篆務前赴皖西閱伍順道回籍修墓摺子

奏爲恭報微臣奉到

硃批交卸督鹽篆務日期叩謝

天恩仰祈

聖鑒事竊臣前

奏赴安徽江西一帶校閱營伍事竣遵

旨順道回籍請假一月修墓並請將兩江督篆移交撫

臣林則徐署理欽奉

硃批如所請行欽此仰荷

聖恩體恤周詳無微不至跪讀之下感激難名臣當將

經手事件次第辦理清楚卽於七月十五日檄委

江寧府江防同知周維新臣標中軍副將沙序元

將總督關防鹽政印信及文卷等項齎送撫臣林

則徐接署臣卽於是日自江寧起程前赴安徽江

西一帶校閱營伍事竣卽遵

旨回籍修墓並就近與湖廣督撫臣籌商准鹽緝銷各

務假滿趕緊回江不致延誤所有臣接奉

硃批交卸督鹽篆務起程閱伍順道回籍日期除另行

恭疏

題報外謹繕摺恭謝

天恩伏乞

皇上聖鑒謹

奏

道光十六年八月初十日奉到

硃批知道了欽此

陸文襄公全集

卷四

三

恭報皖西閱伍事竣回籍修墓假滿由鄂赴任摺

子

奏爲恭報

微臣

順道回籍修墓假滿起程由鄂赴任

各情叩謝

天恩仰祈

聖鑒事竊

臣

前奉

諭旨派赴江西安徽一帶校閱營伍

奏請順道回籍一月修墓並乘便會同湖廣督撫

臣

籌商准鹽緝銷各務欽奉

硃批如所請行

臣

於七月十五日交卸赴皖至九月初



九日江西閱伍事竣由萍鄉水路入湖南界十九日入安化縣境二十一日抵里謁祭祖先及臣父母祠墓恭捧

覃恩贈給

誥軸敬謹焚黃卽日督工修築墳塋刊建碑石悉如典

禮伏念臣 疇恃早失一弟亦故繼母無出迎養在

署臣 一子一姪均幼臣 服官數十年惟於嘉慶二

十四年冬赴川東道任曾乞假省墓一次迄今十有八載每念松楸望雲隕涕茲蒙

聖恩俯鑒蟻私許臣 歸省鄉音無改兒童之笑問維殷

宰木已蒼父老之扶攜宛在雖鼎牲莫逮錦衣不  
比萊衣而

綸綍同沾

國慶遂貽家慶叨承

寵眷感極捐糜臣高曾祖逮臣父母俱厝公山房族蕃

衍續葬如鱗掘圯損傷實堪愴切惟厯時既久礙

難改遷現已插葬無隙呈明地方官公同封禁俾

資保護臣修墓事竣卽於十月二十日自籍起程

由資江水路東下俟至洞庭南口或順帆渡湖或

登陸赴鄂臨時察看風色擇便迅速行走一抵湖

北卽與督撫諸臣會商巇務趕緊回江辦事不敢  
稽延所有假滿起程各緣由理合繕摺叩謝

天恩伏乞

皇上聖鑒再臣路過長沙各屬今歲秋收極稔本月初  
十等日瑞雪紛剪尤爲豐年預兆民情懽帖洵堪

仰慰

宸懷謹

奏

道光十六年十二月初三日奉到

硃批知道了欽此

恭報由籍回抵江省接受督篆摺子

奏爲恭報微臣假滿由籍回抵江省接篆視事日期

叩謝

天恩仰祈

聖鑒事竊臣前經

奏明於安徽江西一帶校閱營伍事竣遵

旨順道回籍於九月十九日入境二十一日抵里謁祭

祖先修築墳塋假滿於十月二十日由籍起程當

卽具摺叩謝

天恩並

奏明順道湖北等商離務嗣抵楚省晤督撫諸臣詢

悉離務事宜籌商後卽由水路東下行抵江寧省

城准署督臣林則徐於十一月二十六日檄委署

江寧府知府王用賓督標中軍副將沙序元將

欽頒兩江總督銀關防一顆鹽政印信一顆並

王命旗牌等項齎送到臣謹卽恭設香案望

闕謝

恩祇領任事伏念臣南楚菲材供職江表仰蒙

賞假旋里修墓藉盡私情

殊施涯被於桑楸銜感益深於葵藿臣惟有隨時隨事

矢慎矢勤以冀仰報

鴻慈於萬一除將回任日期照例恭疏

題報並將一切事件次第盡心查辦外所有

臣接受

督篆視事日期理合繕摺恭謝

天恩伏乞

皇上聖鑒謹

奏

道光十六年十二月二十七日奉到

硃批知道了欽此

陽明家範卷之三十一

身

二

陶文毅公全集卷五目錄

奏疏 選政 吏治

請禁吏部重籤名目摺子

陳奏州縣積弊摺子

酌改題調知縣并佐雜簡要各缺摺子

江蘇裁汰文職閒員摺子

安徽裁汰閒員摺子

金山縣知縣典史移駐洙涇鎮其原駐洙涇之巡

檢卽移駐衛城摺子

海州州判衙署移建響水口摺子





奏疏 選政 吏治

請禁吏部重籤名目摺子

奏爲縷陳吏部重籤之弊請

旨查明嚴禁以肅選政事

臣

惟立法期於畫一法不一

則弊竇叢生吏部總司選政近年來檢舉之案不一而足而且爭缺之案有之配籤作弊之案有之然或意見偶岐或防範不及未有明目張膽別立一法以待弊混之來如重籤之甚者也其法於掣籤既定之後將續到應附在後之員重爲設籤令其補掣如掣得第一名則插入初掣第一名之後

謂之重一籤掣得第二名則插入初掣第二名之後謂之重二籤以有定之籤復作爲無定之法巧爲鑽入不公孰甚吏部向無此例聞自嘉慶十年捐納道員呂昌會始爲開端現在投供候選人員內卽有補掣重籤之張毓秀一員查張毓秀係嘉慶九年舉人十三年議敘縣丞十四年始改歸知縣補掣重籤第二名插入十三年議敘知縣第二名之後此外補掣重籤如張毓秀者恐復不少非澈底查明無以公選法而杜弊端伏思部務一切以例爲主今重籤非例所有舍例言案其弊一也

呂昌會以捐班而掣重籤張毓秀以議敘比照而掣重籤既無專條又無限制人人可以比照卽人人不可以比照可以比照既開濫倖之門不可以比照勢必起賄託營求之漸其弊二也掣籤之員每班或數人或數十人多者或數百人一經掣定人心帖然今既補掣名雖重一其實初掣第二名以後盡爲所壓後來居上於理未平且聞呂昌會亦係掣得重三名次與張毓秀之掣重二相似以滿筒之籤並不掣向稍後形跡疑似之間易滋物議其

弊二也掣籤以文書到齊爲憑例應奏定限期踰限不到卽無庸查辦其行查及續到人員祇准附於初掣人員之末原以昭畫一而防怠玩今以上年之案遲至次年始到復插入上年籤掣前三名之內是吏部奏定限期全不爲憑而踰限不到者轉得補掣在前易啟趨避取巧之端其弊四也重籤之掣或以遺漏爲名或以錯誤爲名不知遺漏錯誤在吏部則應自行檢舉在別部則應處分別部在本員則爲自行貽誤更應附在末後方昭平允何得設此活法預爲遺漏錯誤地步其弊五也

現開豫東事例報捐人員難保無冊結遲延及遺漏錯誤之事若似此紛紛比照書吏人等得以上下其手勢必藉端訛索又釀事案不可不早爲滌除應請

敕下該部查明從前掣重籤者共有幾員詳悉開列事由應否更正伏候

聖裁其重籤名目請嗣後概行禁止倘有本員自行遺漏錯誤者祇准附於初掣人員之末若遺漏錯誤與本員無干卽一而將遺漏錯誤之官吏參處一面專摺具奏請

旨定奪不得牽引成案率行比照庶法歸一定而吏胥  
不能爲奸矣臣爲防弊起見是否有當伏祈

皇上睿鑒謹

奏

嘉慶十九年十月十九日奉

硃批所奏甚是吏部堂官各矢天良明白回奏欽此

陳奏州縣積弊摺子

奏爲州縣之錮弊日深州縣之疲頑有自請治其源  
以端吏治事伏見我

皇上兢兢業業無刻不以吏治民生爲念而尤以因循  
怠玩揭中外臣工之積弊凡有人心自應洗滌肺  
腸仰承

聖誨乃近日風氣因循者尙復因循怠玩者依然怠玩  
卽如虧空之案甫經查辦而新款又有虧空科派  
之案屢經懲創而外省猶多科派此固由州縣官  
之昧良而亦其源未治也夫所謂其源者何督撫



藩臬各上司是也上司不能正己率屬則不肖之  
州縣既有所挾持以無恐而循良之州縣又有所  
牽掣而不能前弊端不一臣請摘其尤甚者爲

皇上陳之

一勒接交代也一官纔莅豈能卽般庫項無如前  
任虧空已多上司懼干失察之咎必欲新官接  
受少者數千多者數萬桃僵李代不接不能到  
任其有稟揭前任虧空者則必致上司之隱怒  
或以才力不及而調簡或以辦事迂拘而改教  
甚至別假事端劾而去之是以甫登仕籍卽入

債鄉始基不立而望以清廉難矣

一多難捐款也州縣廉俸有數乃無端藉公科派其名曰籌補曰幫助曰貼賂曰使費總名曰捐款因其出之自公故不甚愛惜每由首府首縣墊出然後攤派各州縣每歲數百數千兩不等各州縣力不能應有時延緩則上司卽於其徵解錢糧時准作某項捐款而錢糧則批令另解是以

國家惟正之供抵私款也虧空之積由此深矣

一預備賞號也凡上司有事或練兵或巡邊或公

讌則州縣預備賞封及緞疋銀牌之類上司隨手揮霍無非慷他人之慨然當場進賞猶可言也有等上司竟將賞項先收入已臨時自行發出於是家人吏役節節又添規費出數少而入數多而賞號之名適足爲巧取之目矣

一派辦供給也凡上司入境出境送往迎來則有夫馬有酒席有站規有門包其同城居住者則有輪月之供給有包月之供給甚至一窗一扉一廚一廁皆於附郭之州縣是問復派他處之州縣協濟焉此等供給名目近來頗知斂戢然

尙未能盡革也

一 壓薦幕友也州縣事務較繁刑名錢穀原不能不借助爲理乃一官尙未到任而幕友之舉薦已多其賢否無從辨也但擇其情面較大者而受焉道府所薦者旣受則藩臬所薦者不能不受督撫所薦者更不敢不受且有並未見面但送束脩者謂之食坐俸此所以人愈多費愈繁而事愈勞也

一 濫送長隨也長隨不必皆上司舊人或夤緣上司之親串或鈎結上司之門丁邀求吹薦在上

司不過泛然一語而州縣則以上司所薦而不  
敢辭長隨又以薦自上司而罔所忌未離省會  
早已百十成羣及至抵任人浮於事既難人人  
飽慾必至事事生端或外勾吏役或內通劣幕  
百弊自此叢生矣

一委員需索也州縣固多無良委員豈皆可靠假  
以耳目易致需索乃一紙文書可辦之事動輒  
派委數員在上司不過爲調劑閒官起見不知  
一來一往盤費不貲在委員所得無幾而州縣  
之累已深甚至因饋送不遂而簸弄是非則掣

肘之事更多矣

一提省羈留也州縣各有職守不容曠廢卽使因公晉省亦當飭令速歸乃或因細故而提省羈候轉委他人前往署事迨一年半載之後始令回任以致無累者生累有累者增累不思州縣果不勝任卽應參劾徒令往返奔波是重其敝也安能不虧空乎

以上數條督撫藩臬中雖賢者或亦不免至於作福作威不公不法橫索屬員者則又不待言矣夫今之州縣疲精於奔走承應之中救過於紙札文

書之上十人而聚無語田桑者焉百人而聚無語  
教化者焉其於百姓則魚肉也百姓視之亦幾虎  
狼也抑思果何由而致是哉各省大吏受

恩深重若不正本清源以身率屬而徒以不肖之州縣

爲解恐吏治終無起色也

臣仰覩

聖人宵旰焦勞未敢緘默謹據實縷陳伏祈

睿鑒訓示謹

奏

嘉慶十九年十二月初七日奉

上諭御史陶澍奏外省州縣積習請治其源以端吏治

一摺各州縣爲親民之官惟在牧養有方教化有法  
斯吏治端而民生日裕乃因循疲玩相習成風若不  
亟加整頓何以革做習而勵官方如該御史所稱州  
縣交代虧空上司懼干失察之咎勒令新任接收又  
藉公科派有籌補幫貼使費等款及預備賞號派辦  
供給壓薦幕友濫送長隨並委員需索提省羈留種  
種苦累皆各省實在情形總緣外省大吏不以吏治  
爲事其始稍開其端久之揚波逐流日甚一日陋習  
相沿遂至成爲銅弊雖有一二自好之士亦不能卓  
然自拔今欲清其源責在大吏著通諭直省督撫藩



臬等務各洗心滌慮飭紀整綱伊等養廉優厚一切  
賞需供頓不可絲毫累及屬員其州縣因攤捐羈候  
橫被苦累之處查明悉予裁革俾賢能者得以自立  
中材以下亦無所藉口庶幾大法小廉吏治日有起  
色以厚民生以興民行胥於此端其本焉欽此

酌改題調知縣并佐雜簡要各缺摺子

奏爲酌改題調知縣并佐雜簡要各缺以歸核實而重地方仰祈

聖鑒事竊照知縣繁要各缺例應分別題調俾治理得人各適其宜向例應調知縣出缺於現在人員內揀選調補不准以應陞人員題陞其並無題缺省分及題缺僅止二三者亦准以應陞人員題請陞用其有應題出缺只准以應陞人員題陞概不准以初仕試用人員請補誠以治理必資練達之才而揀用尤貴人地相宜也現在定例應調出缺必

於現任人員內揀調如現任實無堪調之員准以候補人員內揀補不准以佐貳請陞應題出缺先儘候補正途題補如正途無人方准以佐雜題陞其候補一項無論何項出身凡有應歸候補者俱爲正途等語是遇有題調出缺自應於現任及候補人員內分別揀調題補惟是地方情形不一人材優絀不齊必須因才任使方克收治理之效免致貽誤地方是以

國家定制如人地實在相須卽與例稍有未符准督

撫專摺

奏請於限制之中仍寓變通之道立法實爲盡善茲查安徽省懷寧縣知縣係衝繁難兼三要缺於乾隆十三年議定在外揀選題補查該縣地當省會水陸交衝爲通省州縣領袖時有發審案件且附郭僅止一縣較之尋常要缺政務尤爲殷繁非精明歷練賢能兼擅之員不足以資治理必須於通省現任人員內揀選調補檢查嘉慶元年以後歷次出缺均以現任人員

奏請調補並無以應陞人員題陞之案是該縣之爲題缺係屬有名無實又靈璧縣知縣係沿河兼三

要缺本係在外揀選題補嗣於嘉慶十九年奉部定爲調缺查皖省沿河沿湖知縣除靈璧盱眙要缺外並無沿河中簡之缺無可揀調各屬現任人員堪膺繁劇而又兼諳河工者實難其人臣等酌核地方情形往返札商應請將懷寧縣知縣改爲調缺於對品現任人員內揀選請調靈璧縣知縣改爲題缺先儘候補知縣人員擇其才堪繁劇兼諳河務者題請補用如候補知縣內實無人地相宜之員似應量爲變通於曾經保薦應陞人員內揀選賢能題請陞補仍遵人地相須之例於疏內

分晰聲明恭候

聖裁如此則題調名實相符而因才任使不拘一途亦足收治理得人之益再懷寧縣典史一缺本係選缺惟地處省會其所管監獄不止本邑罪囚凡各屬解省審轉并提省發審案犯均須分發監禁人數衆多迥非外縣囹圄可比一切稽查防範尤關緊要實非初任人員所能勝任應請改爲要缺於現任對品人員內揀選調補惟選缺改調應以調缺改抵安省典史並無調缺惟有舒城縣曉天鎮巡檢向係調缺該處地非衝要並無餉鞘及遞解

人犯事件居民亦不甚多易於稽查彈壓應請改  
爲選缺一轉移間各得其宜洵於公務有裨據藩  
臬兩司會詳前來臣等因慎重地方起見謹會同  
河臣張文浩合詞恭摺具

奏伏乞

皇上聖鑒訓示

敕部議覆施行謹

奏

道光四年十一月二十一日奉到

硃批吏部議奏欽此

江蘇裁汰文職閒員摺子

奏爲遵

旨酌裁文職閒員據實覆

奏仰祈

聖鑒事竊准吏部咨開欽奉

上諭各直省督撫於所轄文職閒員如有可裁者酌量  
裁汰據實奏聞請旨用副朕慎簡官僚勤恤民隱至  
意等因欽此伏查江蘇省地方遼濶賦重政繁邇來  
生齒日多民事增劇原設道府丞倅州縣正印各  
官分任地方事宜凡徵收錢糧及審辦命盜等案



在在均關緊要各有專司實無閒冗可裁之缺教職雖僅司訓課而江蘇學額較廣啟迪是資亦難裁汰惟於佐雜各缺中逐加酌核查得華亭縣主簿一缺僅管水利如遇挑河等事仍應移縣詳辦此外並無巡防分汛專責堪以裁汰該主簿所司水利事務應就近改歸該縣縣丞兼管又鎮江府照磨一缺祇有稽查渡江救生船隻別無專管事務亦屬可裁其所司稽查救生船事宜改歸鎮江府知事兼管又金壇縣湖溪司巡檢一缺該處居民甚少並無衙門巡檢在縣城賃房居住殊無分

防之實又江寧府照磨一缺除差委外並無專管事宜又揚州府檢校一缺祇有稽查邗溝閘座督夫啟閉事宜可以改歸揚州府經歷就近兼管此外別無專司之事以上三缺亦可一併裁汰所有各缺額設辦事書役汰令歸農一切文卷概行移交改歸衙門管理所遺衙署及應繳

敕書印信等件俟奉准之日照例查辦至此外佐雜各缺今昔繁簡時有不同仍當體察情形隨時酌量辦理再現任華亭縣主簿黃榜業經請陞婁縣縣丞所遺華亭縣主簿無庸再行揀員請補其現任

鎮江府照磨余錫溥金壇縣胡溪司巡檢陳皓江  
寧府照磨章春奎署揚州府檢校林鳳喈均請照  
例撤回留省遇缺卽補據江蘇藩臬各司會詳前  
來臣往返札商意見相同理合據實奏

間請

旨俯准將華亭縣主簿鎮江府照磨金壇縣湖溪司巡  
檢江寧府照磨揚州府檢校五缺裁汰以副

聖主慎簡官僚循名核實至意所有酌裁閒員緣由謹  
合詞恭摺具

奏伏乞

皇上聖鑒訓示謹

奏

道光十二年八月二十日奉到

硃批另有旨欽此同日奉到道光十二年八月初五日

內閣奉

上諭陶澍等奏酌裁文職閒員一摺江蘇華亭縣主簿一缺無巡防分汛專責著卽裁汰該主簿所司水利事務著改歸該縣縣丞兼管鎮江府照磨一缺無專管事務著卽裁汰其所司稽查渡江救生船事宜著改歸鎮江府知事兼管金壇縣湖溪司巡檢無分防

之實江寧府照磨一缺無專管事宜揚州府檢校一  
缺無專司之事所有稽查刑溝閘座督夫啟閉事宜  
著改歸揚州府經歷兼管以上三缺俱著一併裁汰  
其鎮江府照磨余錫溥金壇縣湖溪司巡檢陳皓江  
寧府照磨章春奎署揚州府檢校林鳳喈均著撤回  
留於該省遇缺卽補該部知道欽此

安徽裁汰閒員摺子

奏爲遵

旨裁汰通判縣丞各缺恭摺

奏祈

聖鑒事竊臣等接准吏部咨開內閣奉

上諭國家設官分職原以保乂民生必使閭閻獲益方足收指臂之效若令冗員濫竽充數其本任既無事可辦而各員官廨一切公用不能盡出已資勢必取之民間是多設一官百姓反多受一官之累著各直省督撫悉心核議於所轄文職閒員如有可裁者酌

量裁汰據實奏聞請旨用副朕慎簡官僚勤恤民隱  
至意等因欽此臣等隨與藩臬兩司悉心酌議查安

徽省濱江阻淮幅幘遼濶撫馭巡防均關緊要原  
設道府直隸州丞倅州縣統轄分管各有專司其  
教佐各員均有本任應辦事件未便輕議裁汰惟  
查有徽州府通判係屬簡缺該員僅司休寧黟縣  
婺源祁門四縣緝捕並無監兌督運之責該府尙  
有同知一員事務亦簡若將該四縣捕務歸併同  
知兼管可期無誤又蕪湖縣縣丞一缺該縣雖地  
處江濱時須稽察巡查第督捕事宜現有同駐縣

城之太平府同知專司其事該縣丞本任無事可  
辦頗屬閒冗以上二缺應請裁汰如蒙

俞允卽將候補知州借補徽州府通判任壽世蕪湖縣  
縣丞林均二員撤回留於皖省遇缺卽補此等裁  
汰人員本係實任其未補缺以前凡遇委署別缺  
准其接算俸次以示公允至徽州府通判原設步  
快八名卽歸併該府同知衙門差遣其餘門子阜  
隸等役同蕪湖縣縣丞額設門子阜隸概行裁除  
所有編徵廉俸役食解司報撥充餉裁遣衙署估  
變充公除未盡事宜咨部核辦外據安徽藩臬兩



附  
司暨該管巡道會詳請

奏前來臣等往返札商意見相同謹合詞恭摺具

奏伏乞

皇上聖鑒訓示謹

奏

道光十二年九月初五日奉到

硃批另有旨欽此同日奉到道光十二年八月十七日

內閣奉

上諭陶澍等奏遵旨酌裁閒員一摺安徽徽州府通判  
一缺並無監兌督運之責著卽裁汰其所司休寧縣

縣婺源祁門四縣緝捕事務著歸併該府同知兼管  
蕪湖縣縣丞一缺本任無事可辦實屬閒冗著卽裁  
汰所有候補知州借補徽州府通判任壽世蕪湖縣  
縣丞林均俱著撤回留於該省遇缺卽補並准其接  
算俸次餘著照所議辦理該部知道欽此

二二五ノ五ノ二ノ

七

金山縣知縣典史移駐洙涇鎮其原駐洙涇之巡檢卽移駐衛城摺子

奏爲金山縣知縣典史駐劄地方偏臨海濱官民非便敬陳今昔不同情形請於適中常駐之處互換移駐並將衙署監獄指貲辦理以資彈壓而順輿情仰祈

聖鑒事竊照江蘇松江府屬之金山縣於雍正四年由婁縣分設因縣境之東南隅濱海地方向有衛城爲水師駐防之所遂將設立之知縣典史就便在該城駐劄而縣境適中之洙涇鎮民居最爲稠密

惟以巡檢一員分駐其地嗣因民間完納錢漕衛城偏遠往來不便因於洙涇鎮就近建立漕倉每年收漕時知縣卽駐該鎮收兌旋經屢議將洙涇改爲縣治祇因未建城垣其議復寢迨乾隆五十九年間衛城遭被風潮縣署坍塌該縣辦公無所從此常駐洙涇民皆稱便惟監獄原建衛城止留典史駐守與洙涇相去六十餘里歷任督撫臣均臣以知縣典史分駐兩地體制不宜檄飭該縣仍回衛城與典史同駐不得常在洙涇臣等亦屢經照案飭催節據該縣及紳士等稟詳請將縣治移駐

洙涇並據前後知府等勘明衛城地濱海汊居民  
寥落駐有將備營兵居其大半城南卽係大海東  
距華亭縣界僅一里西距浙江平湖縣界僅九里  
而該縣全境田土人民俱在城之西北洙涇鎮之  
西南故洙涇實爲金山一縣適中之地該鎮烟戶  
旣繁四鄉往來無不稱便前因徵收漕米於此建  
倉繼則完納錢糧又經設庫卽

壇廟各所亦久經就地捐建今若仍飭知縣般回衛  
城不特衙署久坍又須籌建且於闔境公事均甚  
不便如因印捕不宜分駐莫若以洙涇巡檢與典

史互換駐劄則彼此皆有衙署不必另建祇須在  
洙涇添建監獄一座又知縣向駐倉署規模尙未  
全具今若卽以倉署爲縣署尙應添設科房等項  
所需一切經費各紳董情願捐貲自行經理該縣  
亦請捐廉湊辦等情臣等復飭司道詳加察看悉  
心妥議去後卽據蘇州藩司陳鑾署江蘇臬陞司  
怡良蘇松太道吳其泰會詳以事係便民應請俯  
如所稟准其移駐所有衙署監獄等項一併准其  
捐辦無須開銷經費詳請具

奏前來臣等覆查該縣移駐洙涇鎮之議自乾隆二

十四年卽經前任撫臣陳宏謀

題准在案其時倉庫監獄俱已設立祇因城垣未建復於三十二年蘇州布政使蘇爾德奏寢其議飭令仍回衛城但地勢實以洙涇爲便且自衛城衙署坍塌之後該縣常在洙涇辦事名爲暫駐實已久居雖經檄飭般回而民情厯久相安礙難强行復舊查各省縣治亦有無城處所卽如江蘇之清河縣地居衝要兼有河庫並未建立城垣今金山縣駐劄地方與其僻處於縣境之一隅致使輿情閼隔莫若移駐於適中之要地卽爲衆志成城至



衛城向設武職參將今已改爲遊擊守備各一員帶兵駐守足資防衛再將巡檢一員移駐彼文武交資布置更爲周密如此一轉移間公事民情兩得其便並無窒礙臣等面商無異相應恭懇

聖恩俯准將余由縣知縣移駐該縣適中之洙涇鎮并將典史隨同移駐其原駐洙涇之巡檢卽換駐衛城典史署至洙涇添建衙署監獄等項旣據該縣暨紳民等情願捐貲辦理並照成案請

旨免其造冊報銷臣等爲因地制宜起見謹合詞恭摺具

奏伏乞

皇上聖鑒訓示謹

奏

道光十四年十一月初三日奉到

硃批該部議奏欽此



海州州判衙署移建響水口摺子

奏爲海州州判移駐響水口應行動項建設衙署以  
資棲址辦公恭摺

奏祈

聖鑒事竊照海州所屬之響水口地方緊要前於道光

八年經前督臣蔣攸銛會摺

奏請添設武弁移撥兵丁並將州判移駐該處以資  
彈壓接准兵部咨令將其餘一切未盡事宜分別  
題咨報部辦理等因當經轉行遵照茲據江寧布  
政使楊簧詳稱前據海州具詳移駐州判彈壓地

方甚爲救謐祇須建設衙署餘無應議事宜卽經  
飭據該州知州王用賓州判龔照琪會詳查得響  
水口有捐職李樹欣等基地一區形勢平濶堪以  
建立衙署飭匠確估實需工料銀兩造具冊結詳  
送隨經移道勘轉今准淮海道加結移送到司所  
有冊開估需工料銀一千九百八十四兩四錢八  
分三釐應請准其在於司庫存公銀內照數動給  
建造詳請具

奏前來臣等伏查海州州判移駐響水口地方前經  
奏明試行一年著有成效再行議建衙署今自移駐

以來彈壓得力地方安靜頗有成效自應建設衙署以資辦公所有估需工料銀兩既據該州等確勘由道覆核結轉合無仰懇

聖恩俯准在於司庫存公銀內照數動給飭令上緊建造工竣報候委員驗收不任稍有偷減除飭取造冊結另行詳

題並將該州判原設衙署估變繳價解司報撥詳咨外謹合詞恭摺具

奏伏乞

皇上聖鑒謹

奏

道光十五年二月初六日奉到

硃批該部議奏欽此

陶文毅公全集卷六目錄

奏疏 倉庫

清查皖省倉庫虧空並酌擬追補章程摺子

勸設豐備義倉摺子

會同蘇撫籌設江寧省城豐備義倉摺子

會同蘇皖兩撫覆奏招商販米由海運京收買不

無流弊惟官運尙可行於豐年摺子



附  
考  
三  
卷  
ノ  
名  
ノ

奏疏 倉庫

清查皖省倉庫虧空並酌擬追補章程摺子

奏爲遵

旨清查安徽省倉庫虧缺完欠各確數酌擬追補章程

恭請

聖訓事竊照道光元年正月欽奉

諭旨安徽省倉庫錢糧虧數甚多著將舊虧實在數目

逐案詳查究其致虧之由或應執法或應著追或應

彌補酌定限期於何時可以辦理完善不得以一奏

塞責等因欽此當經前撫臣李鴻賓

奏請派員設局查辦在案道光三年二月又接  
廷寄奉

上諭據孫爾準奏皖省六次清查除實係捐賠業經造  
冊咨部核辦外其各員虧缺抵缺各款尙有輻輳款  
目並隨時追繳應行劃收清款者必須根查底案沿  
流溯源得其實在致虧之由然後可以酌定追補之  
法以杜續虧之漸所奏甚是著陶澍再行逐細確查  
籌定章程核實奏明辦理欽此伏查此案臣於前年

冬間蒙

恩簡授安徽藩司

陛見時面承

訓諭輕重緩急相機妥辦跪聆之下敬謹銘心抵任後  
卽檢閱舊卷從前五次清查俱以州縣開報之數  
入冊定案其開報數內每有前後任轆轤未清之  
款並未逐一釐正而開報數外亦未查其有無欠  
解別款故多不實不盡歷久愈棼迨前撫臣孫爾  
準莅任經臣時時稟商熟籌扼要之法因思州縣  
虧缺或係正雜或係捐賠藩司衙門俱有檔案可  
稽先應檢核司案將州縣欠款截清界限俾欠款  
得實而虧數自明隨督率局員將嘉慶二十五年

以前凡州縣欠解正雜錢糧並應捐未解各款無論已入清查未入清查按地按員按年按款分晰開出以司庫之檔案核州縣之冊報虛實立見其間有州縣自行立議攤捐及前後任互相轆轤之款司案所不能詳者卽調取交代底冊議單欠據層層考核始得條分縷晰澈底查明凡原報舛錯者悉行釐正遺漏者悉行補出臣次第核定分造款冊隨時呈送前撫臣孫爾準覆核將次齊全值前撫臣調任福建臣蒙恩擢任巡撫當將款冊移交署藩司惠顯接辦並將查

辦情形備細告知飭令再加稽核茲據該署司督  
同局員將各州縣倉庫完欠各數造冊呈送前來  
臣覆加確核查得安徽省倉庫兩項自嘉慶五年  
九年十四十六至十九年十月止歷五次清查原  
報虧抵攤捐共銀五百五十一萬四千七百四十  
三兩零穀米麥豆四萬三千四百三十石零節次  
追補截至道光元年二月初前撫臣李鴻賓

奏明設局查辦之日止已完銀二百六萬五千三百  
二十九兩零又咨交外省查辦銀一百五十五萬  
五千一十三兩零穀米麥豆六百三十六石零因

其人已離皖省存沒未定應追應免聽各旗籍照  
依部議條款自行辦理其餘尙有未完銀一百八  
十九萬四千四百一兩零穀米麥豆四萬二千七  
百九十四石零內除有款可領應由司劃收銀五  
萬三千五百二十四兩零又查豁案內已奉准免  
銀二十二萬二千五百六十九兩零穀米麥豆一  
千七百石零及准部行查詳經前撫臣孫爾準查  
明覆

奏請免銀一百四萬九千五百六十二兩零穀米麥  
豆一萬五千四百九十三石零又原報列抵墊完

民欠一項并林泰增監追無完銀款應歸另案追  
賠銀二十六萬一千五百九十八兩零穀米麥豆  
一萬一百三十八石零仍未完銀三十萬七千一  
百四十八兩零穀米麥豆一萬五千四百六十三  
石零自<sup>臣</sup>等此次查辦以來復追完銀二十八萬  
七千九百五十四兩零穀米麥豆一萬五千四百  
六十三石零核實在安各員仍應追銀一萬九千  
一百九十四兩零內除周之桂呈繳房屋作抵銀  
三千三百九十一兩實應追銀一萬五千八百三  
兩零此十九年以前虧缺完欠之確數也今自十



九年十月以後至二十五年歲底止除捐賠各款確在二十五年八月二十七日欽奉

恩旨以前核與部議准免條款相符者業經詳明前撫

臣孫爾準具

奏請豁外現在查出從前漏報及續經虧抵各款共銀五十七萬六千七百七十七兩零錢一百九十七千零穀米麥豆二萬七千五百九十九石零內核實查明有款可領者一十七萬二千五十一兩零有物可變者一萬七千一百八十一兩零又有款可以徵扣歸補者一十萬三千九百四十四兩

零穀豆一千六百七石零有款可以追解歸補者  
六萬八千九兩零錢一百九十七千零穀米麥豆  
八千七百五十四石零並有因公墊用在此縣爲  
抵款在彼縣爲捐款應俟查免案內銷款劃還者  
九萬八千二百五十一兩零穀米六千四百一十  
石零共銀四十五萬九千四百三十六兩零錢一  
百九十七千零穀米麥豆一萬六千七百七十三  
石零應飭現任分別追變領解歸款追變不足著  
落分賠計實在十九年以後虧缺倉庫正雜錢糧  
共銀一十一萬七千三百四十一兩零穀米麥豆

一萬八百二十六石零并十九年以前應追舊虧  
未完銀一萬五千八百三兩零統計嘉慶二十五  
年以前虧數共銀一十三萬三千一百四十四兩  
零穀米麥豆一萬八百二十六石零此項人員卽  
執法嚴辦立予參革查抄變抵監追治罪亦屬咎  
所應得第察其致虧之由多係因公賠累以及衝  
途歉區入不敷出輾轉那墊成虧尙非侵盜入已  
合無仰懇

皇上格外

天恩俯予勒限著追請將虧數在一萬兩以上之原任

寧國縣計參知縣蘇景眉等二員五千兩以上之  
原任定遠縣候補知縣任慮衡等七員三千兩以  
上之原任六安州潁州府同知恒山等八員一千  
兩以上之原任霍邱縣降革知縣李寶中等十九  
員同一千兩以內之原署績溪縣試用通判傅懷  
江等二十六員一併定限勒追限滿無完查抄變  
抵監追治罪至現虧之員兼有舊欠者併數勒追  
不准另起追限致滋懸宕伏思追補舊欠必先杜  
絕新虧杜絕之法亦惟有嚴交代提存庫減捐款  
禁流攤數端而扼要尤以有犯必懲俾後來不致

效尤臣在藩司任內已將州縣捐款分別裁減歸提解三成養廉案內詳

奏遵行並通飭各屬將私議流攤之款永遠禁革凡遇交代不許混列存庫濫行接受如績溪縣清愷交代虧短元年錢糧一經查出立即參辦以示懲創總不使屬庫有徵存未解銀款以絕那掩之弊至安省歷次清查有議捐節省彌補津貼半廉等項名目在各前撫臣原爲籌補無著調劑苦缺起見惟安省缺多瘡苦往往補於前而虧於後劑於此而缺於彼有名無實徒資藉口現在舊虧無著

並捐賠各款已奉

恩旨查免無須州縣捐賠至實在衝途苦缺辦公賠累  
之潛山鳳陽靈璧三處臣已核定津貼銀數詳經

前撫臣奏奉

諭旨遵行亦可無須再議臣受

恩深重斷不敢以一奏塞責惟有殫竭血誠極力整刷  
務使從前之宿累全清此後之章程悉定清舊欠  
卽以杜新虧庶幾錢糧無紊吏治亦可期澄敘矣  
臣與督臣孫玉庭往返札商意見相同謹合詞具  
奏並酌擬追補章程查明各員致虧之由繕具清單

恭呈

御覽伏乞

皇上聖鑒訓示謹

奏

謹將安徽省州縣倉庫虧缺酌擬追補章程恭

呈

御覽

一虧數既已查清應立限勒追以重

帑項也皖省此次清查自嘉慶十九年起至二十五年歲底止凡各州縣那抵各款並十九年以前

歷次清查未完及漏報之款俱已詳查案據沿  
流溯源分晰款數核實登載所有新虧舊虧自  
應并計勒追不必再分先後應請將虧數在一  
千兩以內者暫免議處勒限一年全完一千以  
上至三千者降一級留任勒限二年全完開復  
三千兩以上至五千兩者降二級留任勒限三  
年全完開復五千兩以上至一萬有零者革職  
留任勒限四年全完開復逾限無完及完不足  
數革職監追查抄備抵不足數勒限一年全  
完免罪如再無完除本員照例治罪外所有欠



項仍照那移定例在於從前歷任各上司名下  
分賠歸款

一追補人員限期應量爲區別也查此次虧缺銀  
數尙不甚多追限分作四年亦稍寬展原以追  
補須有實濟限期稍寬庶得從容彌補免使剗  
肉補瘡又蹈那移積弊此內有陞任道府以上  
者亦有候補試用丁憂告病降革無缺者情形  
既有不同追限亦宜區別應請將陞任道府以  
上人員照現任限期酌緊一半候補試用丁憂  
告病降革無缺人員照現任限期酌展一半逾

限無完照現任章程一律辦理丁憂病故降革等員如有子孫出仕係現任知縣以上者亦照現任定限著追如係候補及知縣以下者均酌展一半限期追繳在院各員以奉

旨之日起限其回籍及陞任各員以接准院皖省咨會之日起限追繳銀兩卽解安歸款

一上司分賠銀兩應一體立限追繳也查州縣經手錢糧那移虧缺固咎有應得而該管上司不能認真稽查致倉庫虛懸亦咎無可辭故例載分賠所以重考核也應請將該管上司賠項查

明年月久暫一體立限賠繳數在五千元以下者限三年五千元以上者限四年一萬兩以上者限五年賠不足數奏明請

旨交部分別辦理

一交抵物件應趕緊勒變歸款也查州縣交代本不應將什物作抵乃節次清查均有房屋鋪墊衣物等項作抵此等物件果可移交何難自行售變是其高擡價值以少抵多顯而易見臣在藩司任內業已通飭禁止如此後交代一經查出隨時參辦外所有此次查出抵款應照上次

定限著落現任之員趕緊變繳一千兩以下限  
半年一千兩以上限一年三千兩以上限二年  
掃數變價歸款變不足數著落原抵之員與承  
變之員各半分賠如有意延宕全不變繳以致  
房屋坍塌什物霉爛者咎在承變之員卽著落  
獨賠其承變限內遇有交卸各照在任月日計  
算分賠勒限一年完繳逾限無完及完不足數  
照例參革抵缺銀款著落該管道府州賠補  
一書役借欠應分別追賠也各州縣書役承辦案  
件緝匪解犯一切緊要差使透支工食以爲盤

經紙飯之用在彼時原擬按季扣還及至案件繁多借欠日重一經革故逃亡遂成無著前此五次清查會議革除此次查出仍有此項抵缺銀款卽嚴參著賠亦咎所應得惟其中多有歷次清查漏未查出之款且究係因公墊給情非得已如概令官賠置原欠書役於不問轉使奸胥猾吏得計將來更難整飭應仍照五次清查原辦分別勒追賠補無論銀數多寡概限二年在原欠書役名下嚴比追完逾限無完及完不足數照例治罪一面抄產變抵不足數著落

原借之員名下賠十分之六情追各員名下賠十分之四如接追限內遇有交卸各照在任月日按數分賠其應賠之數在五千兩以內者限三年完繳五千兩以上限四年一萬兩以上限五年如再逾限無完原借及情追各員一併照例參處追不足數之欠項直隸州在於該管道員名下州縣在於該管府州名下著賠歸補嗣後地方遇有公事應由州縣自行辦理各歸各任不許抵交至差役墊完掣串易致侵蝕尤應嚴禁以除積弊

一倉項宜核實買補也查倉儲原以備緩急之用如有動缺自應隨時歸還不容延緩但從前採買係按照州縣缺穀之多寡發價買補內中派買較多之處卽遇價平之年加以轉運水腳就每石六錢之例價僅敷市價之半設穀價昂貴賠貼更多州縣力不能支往往那動正雜款項補於倉而缺於庫此亦實在致虧情形臣思與其多買而不能交有名無實莫若稍寬時日分作數次買補遇豐稔之年就各屬情形核定數目發價購買年豐則穀價自平買少則挽運亦

易卽有賠貼在州縣亦易於爲力庶倉項漸以充實而庫項亦不致虧那矣

一流攤宜禁革也查各州縣流攤如墊修衙署倉廩監獄驛號橋道歲科修理考棚棹凳緝拏捻匪棍徒設卡巡防及例價不敷各項往往稟求本管府州批准分年流攤或交代之際憑監盤說合立議分攤或以抵款不敷將交項剔出數條歸入攤捐或以前攤未交又請展攤以爲延宕之計迨收接之後又視爲攤款無關緊要並不交出陳陳相因愈積愈多此等名爲攤款實



即正項誠致虧之一大端流攤一日不止積弊  
一日不除臣自到任以來即經剴切通飭應請  
嗣後不准再有流攤名目違者前後任一併嚴  
參究追如該管府州批准流攤或經監盤說合  
私議流攤查出一併參處

一捐款應嚴提也查捐款名目不一皆係辦公不  
可少之件從前各州縣捐款爲數甚鉅又有彌  
補節省津貼等項名目多者數千少者數百各  
州縣養廉幾何安得而不虧缺臣自到任以來  
首將此項捐款分別應裁應減核數在養廉三

成以內詳經前撫臣奏奉

諭旨遵行在案州縣去此大累如釋重負實已無可藉  
口惟前所定之數催敷辦公而止本無餘剩若  
提解不前辦公又必掣肘且係

奏定之款未便稍任延宕計各州縣每年捐數僅在

二百兩內外零星批解亦於州縣非宜是以臣

經通飭各屬於批解上忙錢糧時隨同解司備

用如有未清卽於耗羨內劃扣庶得年清年款

公私兩益至酌提羨餘一項溯從二次清查彌

補無著每年各州縣提銀十五萬兩皖省虧空

之愈積愈多實起於此上年經<sub>臣</sub>遞減爲一萬

兩詳請

奏明辦理專以津貼衝途最苦之潛山鳳陽靈璧三縣亦係斷不可少之數應按四季提解以免拖欠

一嚴存庫款日以重交代也查嘉慶二十五年以前各州縣欠解一切正雜捐款現俱報入清查已可按冊而稽至道光元年以後各清各款無許絲粟虧欠第恐考核不嚴仍蹈虧那故轍查從前州縣交代冊內每將前任短交之款列作

存庫造報彼此商同將無作有積欠愈多遂成  
虧缺是前任之得以支飾後任之敢於通融皆  
存庫二字爲取巧藏拙之方也臣前在藩司任  
內卽通飭各屬凡前後任交代務將現存銀兩  
悉數批解冊內不准開列存庫故如績溪縣虧  
缺元年錢糧立卽顯露業經照例參

奏但必須明定章程以垂久遠應請嗣後州縣交代  
冊內不准開列存庫如已報入清查者或虧或  
抵均於冊內逐一載明倘有應領銀款作抵交  
項者亦於冊內明晰登注俾得核實稽考卽時

查辦至於紙張飯食一切無關正雜額捐之款  
不得列入交代冊內以免紊雜

一交代案內議單欠票應嚴行禁革也查州縣交  
代如果款目清楚何須議立單據倉庫無虧更  
無所用其欠票此等名目原係州縣通融交接  
之弊此次清查前撫臣李鴻賓因各州縣開報

款冊易致朦混或將本任虧缺捏報前任是以  
奏請調查議單欠票原以鈎稽舊虧之是否確實並  
非交代案內應有此名目也今清查告竣自宜  
明定章程俾知遵守應請嗣後州縣交代責成

接任之員據實盤收倘再私立議單欠票徇情  
接受一經發覺卽將前後任嚴參治罪該管道  
府州及監盤各官一併查參懲辦庶通融之弊  
既除而續虧自可杜絕矣

道光三年四月十四日奉到

硃批另有旨欽此又章程十條奉

硃批所議十條均係核實辦理亦屬周詳另有諭旨欽  
此同日承准

軍機大臣字寄道光三年三月三十日奉

上諭陶澍奏清查安徽省倉庫虧缺完欠確數酌議追

補章程一摺安徽省倉庫虧缺款目繁多據該撫查  
明嘉慶十九年以前除節次追補及豁免外實應追  
銀一萬五千八百三兩零十九年以後至二十五年  
止有從前漏報及續經虧抵各款共銀五十七萬六  
千七百七十七兩零錢一百九十七千零穀米麥豆  
二萬七千五百九十九石零所議追補章程十條朕  
詳加披閱均係核實辦理亦屬周詳著照所請虧數  
在一萬兩以上之蘇景眉等二員五千兩以上之任  
慮衡等七員三千兩以上之恒山等八員一千兩以  
上之李寶中等十九員同一千兩以內之傅懷江等

二十六員均按限著追現虧各員兼有舊欠者併數  
勒追不准另起追限致滋懸宕其各屬私議流攤之  
款永遠禁革如遇交代有混列存庫濫行接受者查  
出立即參辦以杜新虧該撫此次奏定章程務卽認  
真核辦實力整刷毋得稍有瞻徇仍致有名無實也  
將此諭令知之欽此





勸設豐備義倉摺子

奏爲敬陳勸設豐備義倉章程請

旨永遠遵行以防荒歉而厚民生仰祈

聖鑒事

臣

惟民以食爲本事須豫則立前年皖江被水

哀鴻遍野仰蒙

恩旨賑撫兼施並經

臣

勸諭有力之家捐輸助賑流離

數十萬獲就安全事後猶深憫惻因思博施濟衆

自古綦難徹土綢繆宜先陰雨常平之制善矣然

待惠者無窮至社倉春借秋還初意未始不美而

歷久弊生官民俱累變而通之惟有於州縣中每

鄉每村各設一倉秋收後聽民間量力捐輸積存  
倉內遇歲歉則以本境所積之穀卽散給本境之  
人一切出納聽民間自擇殷實老成管理不經官  
吏之手以冀圖匱於豐簡便易行自上年酌議章  
程通飭各屬出示勸行已據青陽銅陵望江太平  
懷遠婺源等處捐有成數各屬亦皆踴躍擬俟今  
年秋熟後一律辦理臣於正月入

覲曾經纒達

天聽茲臣蒙

恩調任江蘇念此垂成之緒必須奏奉

諭旨庶可久遠遵行謹將所議章程十二條敬爲我  
皇上陳之

一 鄉村無論百餘家十數家總以里居聯絡者公  
設一倉每年秋收後各量力之盈絀捐穀存倉  
出者毋吝勸者毋勒或數十石或十數石多則  
一二百石少卽數石數斗數升均無不可收穀  
時公同立簿登記擇一老成殷實人總管再擇  
一二人逐年遞管仍設立四柱交冊分別舊管  
新收開除實在明晰登載互相稽查連年豐稔  
日積日多則穀不可勝食矣

一 鄉村零戶有難於聯絡者或每族各爲一倉或  
一族中每房各爲一倉或以散戶歸入附近鄰  
保共爲一倉均聽民便總在隨地制宜多多益  
善果能一處行之有效久而他處自仿照行之  
矣

一 穀倉宜擇善地不宜近水不宜近市以防不虞  
建議之初倉廩未立或神廟或公祠或老成殷  
實之家倉屋有餘者均可借儲但須本人情願  
不得強借一俟穀石稍充即可另自置倉

一 倉穀由於樂捐間或有溼有糝不能拘泥畫一

應於收倉時先爲曬乾車淨公同登記耗蝕若干或收貯年久又須公同出曬一次復量上倉再逐一登記實數以便查考

一設倉本係義舉司事之人不容稍有侵蝕亦不許藉端開銷惟看守倉廩之人係屬雇覓常川在倉不能不給予工食責令巡查遇有風摧雨漏倉板損破之處立即告知經管之人及時修理其鎖鑰等項不得交守倉人佩帶

一捐穀既有成數卽赴地方官呈明立案以免匪徒阻撓擾亂章程以後捐多捐少收放出入官

吏概不與聞卽里長甲長亦無許越俎倘有吏役託名稽查藉端需索查出照詐贓例從重懲治

一積穀旣饒止須添建倉廩不必推陳出新以求滋長亦不必春借秋還以權利息戢爭杜紛此爲最要惟餘穀置田收租尙可並行不悖然必積穀實在充裕有餘以少半置田乃可否則不必蓋此穀原爲備荒而設至捷至便推陳出入易滋濛混借出難歸漸歸烏有置買產業雖屬經久之計然不能救濟目前亦非急務也

一每遇災荒總管分管外添擇公正司事計穀之多寡先儘本村中鰥寡孤獨無告之人次及極貧又次及次貧或五日一散或十日一散事竣憑衆確算至家計稍可支持者不必分給卽小歉之年亦不必動用以歸實濟

一捐穀之家此穀旣捐卽係公物遇有災歉不得以從前甲多乙少致啟爭端或先在此村捐穀之家其後移居他處遇此村散放不得以曾經捐穀回向轉索新來之戶從前雖未捐穀遇有散放亦應酌給些須不得獨任向隅蓋各保各



境以鄉村爲斷雖救卹無分彼此而穀少人多亦不得不稍爲限制其各族各房積穀者則不必以鄉村爲斷

一年豐時和勸捐較易果能積有三年五年之蓄又不妨畧爲變通邀同衿耆劃分若干於鄉間添設卹養育嬰等會或於冬間就村莊中鰥寡孤獨與外來無告窮民量爲賑濟亦所以廣任卹也

鄉村紳士克知大義者多自必首捐爲倡如有能捐穀千石者或捐銀千兩以上買穀歸倉者

或捐置基產倉厰及斗斛諸器物用銀千兩以上者均當照例請

旌以資鼓勵倘慮書吏索費卽逕赴院司衙門呈明捐數以便行查確實立予請

旌斷不令善舉稍有阻格

一勸捐之外尙有因事樂施一節如民間演戲酬神及嫁娶喜期慶祝生日儘可將糜費折穀捐入義倉擴而充之不特安貧卽以保富將型仁講讓之風亦由此而興起矣

以上各條積少成多衆擎易舉所以圖便民也各

保各境人心易齊耳目亦周所以免牽掣也擇人經管立冊交代所以防侵蝕也紳民自理不經官員吏役之手所以杜騷擾也不減糶不出易不借貸專意存貯以備歉時所以斷轆轤而弭爭端也凶年不妨盡用樂歲仍可捐輸以一鄉濟一鄉之衆而不患其不均以數歲救一歲之荒而不虞其不給可小可大無窮匱也取錙銖於狼戾之時求水火於至足之地捐穀者不以爲難司事者不以爲累行所無事不求其利而弊自除預防其弊而利乃久也臣爲此章程

籌思經歲簡便直捷似可爲備荒之一助如果  
各州縣能實心實力勸導有成是亦不費之惠  
也再臣所議章程與社倉之法有異本以豐歲  
之有餘備荒年之不足可否卽以豐備二字仰  
懇

天恩

賜爲倉名俾垂永久所有勸設義倉緣由謹繕摺具

奏伏乞

皇上聖鑒謹

奏

道光五年七月初十日奉到

硃批另有旨欽此同日奉到道光五年六月二十三日

內閣奉

上諭陶澍奏勸設義倉章程一摺國家養民之道足食  
爲先而裕民之原積貯尤重前年安徽偶遇荒歉賑  
撫兼施該撫請設立義倉爲未雨綢繆之計所議章  
程如州縣中每鄉村公設一倉秋後聽民捐輸歲歉  
酌量散給出納悉由民間經手不假官吏防侵蝕以  
禁騷擾矜貧寡而杜爭端各條著卽移交新任巡撫  
照議妥爲經理仍督飭各州縣實心實力勸導有成

總期經久無弊不必另立倉名欽此



會同蘇撫籌設江寧省城豐備義倉摺子

奏爲江寧省城籌設豐備義倉城鄉捐輸稻穀以防  
荒歉而廣

皇仁仰祈

聖鑒事竊照大江南北頻年被水成災仰賴

鴻慈不惜數十萬帑金撫賑兼施

恩宏大造其有例賑所不能徧者各地方紳耆富戶感  
荷

生成義激於色莫不同心救助捐貲解囊或按戶散錢  
或設廠煮粥凡此乏食窮黎實已普被



皇仁同登社席惟思年歲之豐歉無常而陰雨之綢繆

宜豫與其臨時捐湊博濟尤難曷若先事圖維蓋

藏有備臣陶澍前在安徽巡撫任內勸設豐備義

倉籌畫積貯臣林則徐於蘇州城內仿照而行並

經恭摺會

奏在案江寧爲省會重地尤宜先事籌備臣陶澍前

因緝私賞項存有餘銀五千兩劄發江寧府轉發

上元江寧兩縣以爲倡建義倉備穀之用旋據藩

司楊簧轉據前署上元縣知縣高郵州知州馮思

澄署江寧縣知縣李金芝詳稱遵經率同上元縣

訓導楊會昌並在城紳士李恩元沈琮程鍾慶王  
鼎輔孫廷松萬甫廷汪度等在於城鄉廣爲勸捐  
並據該紳士等呈稱前次發交銀兩因新建義倉  
所費甚鉅覓得民間舊有貯米礮坊坐落漢西門  
大街計房屋倉廩共三十九間可貯稻二萬石呈  
報府縣勘明議價銀二千一百兩立契承買以作  
義倉餘銀二千九百兩除修葺並添置器具之用  
其餘儘數購得稻穀三千一十石存貯在倉又城  
郭紳富捐輸穀九千五百餘石已收貯四千餘石  
餘俱陸續運倉又各鄉捐輸穀二萬三千八百餘

石仍各存本村選擇殷實之家收貯以爲本村歉  
歲所需總計城鄉共已認捐稻穀三萬六千三百  
餘石其城郭紳富捐數內有每石折交銀一兩者  
俟積有成數卽於糴賤之時代買入倉其平日看  
守倉廩及曬晾人工一切費用另行募捐辦理不  
動捐穀正項各等情具詳前來臣陶澍前自清江  
回省順道親詣倉內勘驗地基尙高廩舍亦甚堅  
固所貯稻穀查照道光五年

奏定豐備倉章程辦理遇有歉年方准動用舉凡減  
糶出易春借秋還易滋流弊之處概不准行惟稻

穀長貯在倉每年必須曬晾方可無虞霉變其曬  
晾必有折耗每次每石定以三升爲率准其註冊  
以備稽查庶經手者亦無虞賠累章程釐定弊竇  
毫無此次承辦各紳士數月以來實心任事業已  
收有成效卽各紳富捐輸踴躍尤爲嚮義急公克  
敦任卹均屬可嘉除飭查明尤爲出力之人並捐  
數在三百石以上者俟查冊到日照例分別奏咨  
另請

恩施外所有籌備義倉現貯稻穀實數以備荒歉緣由  
理合恭摺具

奏伏乞

皇上聖鑒再此次建倉備貯係官民捐輸歸民間承辦並不經官吏之手應免其造冊報銷合併陳明謹奏

道光十五年十一月二十三日奉到

硃批另有旨欽此同日奉到道光十五年十一月十九日內閣奉

上諭陶澍等奏籌設義倉以防荒歉一摺江南省連年被水撫賑兼施茲據該督等奏於江寧省會地方籌設豐備義倉積貯穀石以防荒歉共計捐穀三萬六

千三百餘石業已收有成效此項建倉備貯係官民  
捐輸承辦著免其造冊報銷該部知道欽此

附 考 考 考 考 考 考 考 考

卓

會同蘇皖兩撫覆奏招商販米由海運京收買不  
無流弊惟官運尙可行於豐年摺子

奏爲准咨查明會議覆奏仰祈

聖鑒事竊臣等於本年二月接准戶部咨軍機大臣會

同戶部議奏御史胡長庚預籌積貯一摺請

旨飭交臣等查明江南米價是否平減如由海販運是

否可無流弊如到天津後約計若干價值可以收

買其川米一項是否能招諭商民販運北來俱令

詳悉議奏等因前來臣等當卽分飭江寧江蘇安

徽各藩司並蘇松太道會同詳查妥議去後茲據



該司道等詳稱各就地方情形悉心體察江蘇所屬四府一州漕糧甲於他省江寧所屬漕糧亦屬不少誠如部臣會奏所稱卽遇年歲豐收除辦漕外僅敷本處民食查上年江蘇全省秋禾均屬中稔登場之際糧價雖平尙須紋銀二兩以外現當漕糧開兌之後已漸加增向來本藉川廣商販運米接濟近因價值相仿商販甚稀移查蘇淮各關米船經過俱少於往年京口一帶亦無米船聚集若皖省地濱江淮產米原屬無多上年秋收亦有歉薄之處現據各州縣所報米價自一兩一二錢

至三兩七錢不等雖升斗有大小不同亦尙未爲平減若再令販運北上誠恐市價增昂有妨民食此現在米價高下不同之情形也至招商販買由海輪運自較之從前採買糧船搭解費省期捷惟銀米往返宜防偷漏出洋查道光六年試行海運原係額漕既有定數復派委員弁沿途管押會哨護送號令森嚴故弊無從作今若招商自運米石旣無定數難保無以多報少影射偷漏卽官給印票南北查對而或詭稱砂礁淺阻鬆艙拋棄或將印票藏匿捏報遇風漂失皆無從查考其回棹之

時或託販貨物將所得收買紋銀私行出洋亦未  
可定蓋招商販運先係自出已貲若嚴加查察則  
將畏縮不前若寬於盤查又恐滋生弊竇此由海  
販運之難免流弊也臣等復核該司道所查現有  
米價各處高低不同並未一律平減所議招商由  
海販運恐有偷漏銀米等弊均屬實在情形至米  
到天津約計若干價值可以收買一節此須辦理  
販運之時按照米價低昂方能核計多寡今販運  
既不可行卽可不必議及其川米一項既據移查  
各關商販米船稀少其情願販運北上與否亦無

從查詢招諭惟據署江蘇藩司李象鵬蘇松太道周祖植另會詳稱商運固多不便而籌備

天庾積貯總宜設法辦理除距上海較遠地方不議外擬請嗣後遇大熟之年於秋成穀賤時撥發銀兩派委委員於蘇松常鎮太近海州縣按照時價收買米石雇用上海沙船裝載前赴天津交卸運倉一如道光六年海運額漕辦法此項運京米石及發給米本或卽在本省災緩截留漕米案內查核融辦如此則京倉米多而運去之米又非每年新賦實於積貯有裨且米由官運不經商販可期有

利無弊臣等覆加商酌商運之難以稽查自不若  
 官運之猶有把握該司道所議事屬可行惟現在  
 米價已較去冬漸昂且業交夏令已趕辦不及若  
 今秋各省收成再稔川楚來販又復聚集糧價一  
 例平減臣等察看情形酌量採買委員由海  
 運解其米本等項或即於江蘇省災緩截留漕米  
 案內查核融辦亦屬變通盡利俱俟臨時再行籌  
 議奏明請

旨辦理所有本年未便採買並商運不無流弊惟官運  
 尚可行於豐年緣由謹會同恭摺覆

奏伏乞

皇上聖鑒訓示謹

奏

道光十八年五月二十四日奉到

硃批軍機大臣會同戶部議奏欽此

三才圖會卷之十一

三十一

陶文毅公全集卷七目錄

奏疏 漕務

申禁幫船加索津貼並酌擬調劑旂丁摺子

嚴禁衿棍包漕橫索陋規附片

請將漕船改由丹徒橫閘出江附片

覆奏現辦漕運情形附片

查覆太倉等處並無漕書毆辱生監摺子

再陳太倉州漕書並無毆辱生監實情附片

蘇省辦漕無庸另定收數附片

覆奏蘇省錢漕查禁幫費陋規摺子



卷之三

卷七

50/96/12M

籌勘回空漕船改由大江至丹徒橫閘試行入口

摺子

回空漕船俱由橫閘進口附片

會同總漕恭報重運二進漕船渡黃完竣摺子

會同總河總漕恭報重運漕船全數渡黃摺子

冬雪放晴漕船出江清高於黃各情形附片

會同蘇撫籌辦蘇松等屬漕務情形摺子

酌定江廣幫船過關查驗章程摺子

籌議約束水手章程摺子

奏疏 漕務

申禁幫船加索津貼並酌擬調劑旂丁摺子

奏爲申嚴幫船加索津貼舊案並酌擬調劑旂丁緣

由恭摺

奏祈

聖鑒事竊照江蘇省各屬現屆道光六年辦理新漕之

期經 臣將歷年積弊確切指飭嚴督司道府州各

縣等預爲籌畫實力整頓伏查各屬漕務首禁浮

收而浮收之源每由於旂丁索加幫費緣幫船領

運漕糧沿途過關起剝添裝扛具雇覓人夫在在

需用往返經年所領漕項銀米不敷是以歷屆兌  
漕州縣有協濟旂丁一項原屬格外津貼特因積  
習相沿該幫丁視爲應得妄思逐漸加添每以倡  
率停兌爲挾制之端以措勒通關爲刁難之具而  
江淮興武二幫藉口向無屯田橫索尤甚經前督  
臣孫玉庭於嘉慶二十二年九月內  
奏明將江淮興武二幫籌款生息調劑仍同蘇松常  
鎮各幫統以米石多寡按水次舊章酌給津貼毋  
許苛索欽奉

諭旨允行並奉

論漕糧受兌之時如米色潮溼攪和者准其稟報糧道查  
驗參辦若米色純潔該弁丁等仍敢停兌吵鬧及措不  
出結者立即從嚴懲治以杜刁制等因欽此在案惟是  
日久舊弊仍滋兼上年漕糧阻滯河北接運本年  
各省漕糧不無疲累近來水手舵工人等往往勒  
加雇價正須懲創而糧船出外兩年甫得歸次修  
艙一切更得有詞需索若幫丁託詞多索於州縣  
則州縣亦必藉口浮收於小民因而刁生劣監包  
攬串抗弊竇叢生動滋延誤自應申明舊例欽遵  
前奉

諭旨於酌定津貼之外不許絲毫需索倘或該幫丁等仍  
 蹈積習無端停兌措不出結定當按律從嚴治罪  
 以肅漕政而挽刁風惟是剔弊固應從嚴卹丁尤  
 為切要臣再四思維別無調劑之法惟查幫船重  
 運本有例帶土宜一百五十擔回空土宜八十四  
 擔若水勢果足尚可量為加增卽偶值淺阻亦無  
 難相機剝送以南北有餘之物備彼此相需之用  
 事不勞而費不增於旂丁卽可藉資調劑自為營  
 運而州縣少一分需索卽閭閻少一分浮收似屬  
 權宜之一端可否仰乞

天恩准其於例帶土宜之外每船重空二運各添帶若干擔以資貼補之處恭候

敕下漕臣核議請

旨施行再漕委各員原爲催重趲空而設但沿途碁布星羅年來員數太多難免需索實爲丁船之累亦應請

旨敕下漕臣按例酌委毋庸多派員弁以杜滋擾而需索旣省丁力亦舒於漕務似有裨益所有臣等酌查辦緣由謹繕摺具

奏伏祈

皇上聖鑒訓示謹

奏

道光六年十一月初二日奉到

硃批另有旨欽此又於例帶土宜之外添帶若干擔句

傍奉

硃批添帶土宜事尙可行若致船身笨重遲延則大不可又於漕委員數太多難免需索句傍奉

硃批實在情形又於毋庸多派員弁句傍奉

硃批甚是同日奉到道光六年十月十七日內閣奉

上諭陶澍奏申禁幫船加索津貼並酌擬調劑旗丁一

摺向來兌漕州縣有津貼旂丁一項原爲幫船領運漕糧沿途過關起剝等項之用近來積習相沿幫丁輒藉口疲累託詞多索著該撫嚴行申禁如幫丁等於酌定津貼外輒行需索卽從嚴究辦以儆刁風至漕委各員往往藉催重趲空爲名任意添派員數太多難免婪索殊爲幫丁之累各省軍船行走沿途催趲稽查辦理已屬嚴密何必增派多人徒加紛擾著楊懋恬查明漕船經過地方酌定章程派委員數分別重運回空開單奏明立案總期可省則省毋得多派致滋擾累其幫船本有例帶土宜該撫請量爲加



增自屬權宜調劑事尙可行惟攜帶過多恐船身笨重遲延於漕行不免有礙並著該署漕督體察情形每船除例帶擔數外約可添帶若干核定具奏一面通飭各幫照辦俟漕運照常丁力稍裕仍照舊例攜帶以符定制欽此

嚴禁衿棍包漕橫索陋規附片

再臣陶澍查江蘇漕務疲敝已久在閭閻則每苦浮收在州縣則又患刁抗緣江蘇漕額最重一州縣之地廣袤不及百里而漕米則有三五萬七八萬至十餘萬不等小民終歲勤動完漕而外所餘無幾以故持升斗赴倉者一遇風篩折耗已不勝其苦加以使費倍覺繁難而蠹書漕總復多賸削近來生齒日增食用日貴尤屬支持不易此所以完納難前而深病浮收之實情也其在州縣則終年之用度在此通省之攤捐在此兼有

奏明彌補舊虧酌提羨餘接運銅鉛木料船隻歲挑徒陽運河均須協貼歷有成案在

國家經費有常不能不藉資津貼而合算卽以萬計其需用尤急者則旂丁津貼一項前任督撫臣荆道乾阿林保等均經奏及復經孫玉庭成齡陳桂生等奏定以每米一石津貼銀二三錢多者不得過五錢然計漕多之處裝載軍船百五六十號總須用銀三四萬至六七萬不等非必藉以入已而抗玩者卽因此挾制以爲控端或船已開行米尙未完謂之漕尾展轉那墊釀成參案此又州縣用

費較繁深患刁抗之實情也斯二者在顛預之州  
縣未必諒百姓之苦在顛愚之百姓亦未必悉州  
縣之難互相詬病而皆不爲無因祇有寬一分得  
一分以養閭里之元氣辦一事省一事以免州縣  
之藉口由漸而理非可程功於旦夕也惟有一種  
病官病民大爲潛害革除不可不亟者則包漕橫  
索陋規之生監是已大約富豪之家與稍有勢力  
者皆爲大戶亦有本非大戶而詭寄戶下者至刁  
生劣監平日健訟者則爲訟米其完納各有成規  
而訟米尤甚每於開徵之始兜收花戶由單以同

姓爲一家集零戶爲總戶一經攬收入手或醜米  
搯交或掛籌短數或任意遷延捱至漕船緊迫時  
勾通胥吏不呈由單硬開戶名包交呼朋引類晝  
夜喧呶稍不遂意非逞兇鬪倉卽連名捏控不休  
竟有田無一畝而包攬至數百石者亦有米無升  
合而白食漕規自數十兩至數百兩者人數最多  
之處生監或至三四百名漕規竟有二三萬兩實  
駭聽聞在州縣因漕事方亟稍遲卽罹處分不免  
買靜圖安其貪狡者卽因此勾結紳士通同漁利  
其庸懦者但仗漕書爲之抵禦而權旣下移弊更

叢出漕書或轉借刁徒之勢以恫本官層層脅制  
陋規日添而費無所出則惟有取償於鄉曲之淳  
良小戶爲牽長補短之計以致浮者益浮苦者益  
苦在小民方痛心疾首莫悉作俑所由而不知該  
生監所訛之陋規卽鄉里窮黎之膏血也伏查嘉  
慶十年五月二十六日刑部議覆鐵保等審擬吳  
江縣勒休知縣王庭瑄那移虧缺數至累萬皆因  
刁生劣監在倉鈔鬧勒索陋規所致欽奉

上諭朕聞各省劣衿以收漕一節持地方官之短長而江  
蘇爲尤甚各該州縣或平日與之交結遂其取求慾壑

既盈卽遇不肖官吏實有罔利營私等事亦復袒庇不言徒使鄉里小民暗遭腴削設稍不遂意則遇事輒生枝節每屆開徵時掙交醜米藉端滋事動卽以浮收漕糧列名上控其實家無僭石無非包攬交收視爲利藪此等惡習大壞名教今吳江一縣分得漕規生監已有三百餘人其餘郡縣可想而知朕培養士子至優且渥原望其束身自愛鍵戶讀書並當勸化閭里愚民知所觀法方不愧四民之首乃蕩檢踰閑至於此極尙靦然廁身士林乎所有吳景修等三百十四名朕卽概加以扑責亦其自取但欲養其廉恥此次姑免責處予以自

新之路着鐵保汪志伊會同莫晉督飭該教官等嚴切  
教導隨時管束務使該生監等痛除前非安分守法如  
遇收漕時該州縣果有浮收入已情事自應據實劾參  
倘該生監等不知悛改仍蹈故轍或此外刁劣紳衿有  
把持漕務訛詐陋規等事砌詞控告審屬子虛者一經  
查出卽當奏明從嚴治罪決不寬貸欽此仰見

聖明洞燭無微不至凡有人心自應永遠恪遵無如刁劣  
之徒難期悛改溯查數年以來無歲不有告漕之  
案自百起至二三百起不等惟今歲漕糧改由海  
運提用津貼無多無可阻撓挾持是以控案較少



然亦不下數十起此等積習相沿既藉控爲抗以  
遂其包攬之私尤仗訟分肥以長其白規之數若  
不將此項衿棍陋規痛行裁革糧戶大小一例兌  
收則辦漕之經費日細小民之浮削日增害伊何  
底惟是積弊已深人繁勢衆一經整頓羣然觖望  
大則糾衆鬧漕小則造謠興謗而京控之案必且  
紛紛更多臣斷不敢因此稍避嫌怨而辦理不容  
無序現已通飭各州縣嚴革蠹書不許入倉如敢  
仍前縱恣立即提省究辦因思衿棍所執爲訟柄  
者無非以違例浮收爲詞如果州縣假公濟私賧

削民膏自飽囊橐則是天良喪盡

國法難容查明後自應欽遵前奉

諭旨該州縣果有浮收入已情事據實參劾原係正辦臣

職在安民必當執法嚴懲以儆貪墨倘或米未清完而遽行驀告則虛實未辨其告漕之人未必非包漕之人才風實不可長臣與督臣暨藩臬等酌

商嗣後控告漕案必須查其有無抗欠尤須查其是否糧戶方可酌量准理倘係無糧之戶其爲包攬何疑或有漕而米未交清亦當飭令完漕再予審辦其集審時或原告避匿或不候訊結潛逃驀

控毋論審虛應辦卽所控不爲無因亦當治以驀  
越刁訟之罪如此力挽頽風庶衿棍無可挾持而  
陋規可革費用自省不致因大戶而浮加於小民  
閭閻稍可蘇息矣所有現辦漕務情形合併附陳  
伏乞

聖鑒謹

奏

道光六年十二月十五日承准

軍機大臣字寄道光六年十二月初六日奉

上諭陶澍奏現辦漕務情形嚴禁衿棍包漕橫索陋規

等語所奏甚是江蘇漕務疲敝已久閭閻每苦浮收而各州縣用度浩繁不能不藉資津貼抗玩者卽因此挾制以爲控端積習戒風互相詬病必應力加整頓務令兩得其平旣不使不肖官吏婪索病民亦不容矜棍把持藉端訐告庶可官民相安而刁風漸息如所奏旂丁津貼一項前經奏定每米一石給銀二三錢多者不得過五錢漕督統轄旂丁自應飭屬嚴查不准絲毫多索而地方大吏深知疲丁苦累亦不得不照奏定數目令各州縣酌量給發俾漕船得以適行此項銀兩計漕多之處卽須用三四萬至六七

萬不等各州縣稍有淨收原非必藉以入已而包漕  
矜棍藉此橫索陋規不可不亟行革除據奏富豪之  
家與稍有勢力者皆爲大戶亦有本非大戶而詭寄  
戶下者其刁生劣監平日健訟者則爲訟米完納各  
有成規而訟米尤甚稍不遂意非逞兇鬧倉卽連名  
捏告藉控爲抗包攬分肥人數最多之處生監或至  
三四百名漕規竟有二三萬兩實駭聽聞各州縣費  
無所出自必取償於鄉曲之淳良小戶爲牽長補短  
之計而窮民不堪腴削樂於詭寄糧名大戶生監等  
包攬愈多盤剝并吞勢所不免將至小戶之糧田日

少辦漕之經費日絀不釀成巨案不止該撫旣經見  
及自必能早爲之計力挽頽風著卽督同藩司將收  
漕章程體察情形分別酌定毋許浮多並嚴禁道府  
需索漕規及上司同僚揠薦幕友長隨等弊一面飭  
屬遵照一律兌收衿棍陋規痛行裁革此項積弊已  
久人數衆多當整頓之初怨謗沸騰甚或糾衆肆鬧  
捏詞京控固爲勢所必至該撫惟當不避嫌怨不稍  
偏徇無庸預存畏蕙之見遇有控告漕案者卽查其  
有無抗欠是否糧戶如實係生監包攬或大戶紳士  
恃符刁抗或有漕而米未交清或集審時原告藏匿

或不候訊結潛逃驀控均卽提拏嚴審奏明分別治罪朕必從重懲辦並著該撫移咨學政一體查察如浙江學政朱士彥於貧生拖欠錢糧無論數目多寡悉行扣考固覺過重若拖欠較多實係有心抗糧者亦應停其考試俟完清後再行補考倘有仍前縱恣者該學政亦卽查明斥革移咨該撫審辦不得稍涉徇縱至各州縣被控浮收銀米總宜查明是否格外增多有無侵吞入己分別辦理惟在該撫一秉至公實心整飭不徒出示曉諭仍成誥誡之虛文也將此諭令知之欽此又於道光六年十二月二十日奉到

硃批所奏甚是必應整頓之事另有諭旨欽此





請將漕船改由丹徒橫閘出江附片

再臣查徒陽運河水無來源歲仗挑挖以引江湖

然挑挖止能及於河底而江水之起落無常一遇西風或雨水稀少卽不免陡落或一二日間落至數尺雖挑挖深通而亦無潮可入是以向來漕船經過必俟春深水發始能暢行本年因湖河水勢難定欽奉

諭旨明年新漕四月內掃數抵壩以便趕早渡糶是江浙漕船尤須節節催早與往年行走情形迥不相同現經臣嚴飭各工員趕緊挑切寬深毋稍懈怠

並將著名古淺之豬婆灘另行籌款雇夫挑深至  
二丈有餘淤泥軟沙爲之一罄漕船諒可無阻惟  
開行須早潮水難恃萬一淺滯不得不預切綢繆  
查明代漕船由武進縣之孟瀆河入江逆流而上  
經黃牛山圖山門過焦山以達瓜洲嘉靖六年始  
濬丹陽至京口諸處淤淺令運船避孟瀆風濤之  
險事載明代會典足徵往時漕船本可由江直上  
不專恃徒陽運河也第從孟瀆沿江至瓜洲計程  
百里而遙且孟瀆已淤塞刻難議復臣往來丹徒  
境內見有橫閘越閘均係由運河通江之路民商

船筏出入甚便其地在焦山南岸稍東數里較孟  
瀆達瓜洲舊路約近十之七八橫閘視越閘尤近  
若漕船從此出江用紅船引帶過焦山抵瓜洲口  
不過三十餘里半日可到詢諸土人兼查舊卷前  
此嘉慶二十四年冬間因潮小阻滯漕艘未能歸  
次會將浙江回空船隻不入京口逕從橫閘試行  
議者紛紛以爲船經焦山旁多礁石設有疏損誰  
執其咎遂將各船截回其時先到之船業已過閘  
駛入運河並無妨礙可見橫閘出江非不可行實  
由人情之畏難而苟安也臣思江廣漕船由長江

千數百里始抵瓜洲所過崖磯如焦山者甚多是  
江浙漕糧由閘出江亦祇須設法防護不必因此  
畏縮至漕米經由江河損壞之事亦所時有自應  
照例辦理惟事係預籌必須

奏明庶免臨事觀望所有來年漕船仍由京口運行  
原不必鯁鯁過計倘或潮枯淺滯臣卽當親詣江  
閘相機籌辦斷不敢稍涉輕疎亦不敢坐視延誤  
理合附片陳明伏乞

聖鑒謹

奏

道光六年十二月二十三日承准

軍機大臣字寄道光六年十二月十五日奉

上諭陶澍奏徒陽運河挑切寬深惟來年江浙新漕須  
趕早抵壩渡黃恐屆時潮小淺滯難行另籌由閘出  
江之路等語本年徒陽運河業經該撫飭屬挑切寬  
深並將古淺之豬婆灘雇夫挑辦來年江浙漕船經  
行諒不至有阻滯茲該撫慮及彼時潮水尙小恐誤  
漕行查有橫閘越閘均可由運河通江而橫閘尤近  
若由此出江經過焦山抵瓜洲口僅止三十餘里半  
日可到係爲先事籌備之計惟江浙漕船經臨徒陽

自應照常由正河行走最爲穩妥著該撫察看情形  
倘屆時潮水不旺實在淺阻難行該撫當親往江閘  
相機籌辦務令漕艘迅速暢行不可稍有延誤將此  
諭令知之欽此又於道光七年正月初二日奉到  
硃批另有旨欽此

覆奏現辦漕運情形附片

再臣前奏徒陽運河估挑寬深惟新漕開行須早誠恐屆時潮小難行查有丹徒縣之橫閘可以另籌出江承准軍機大臣字寄道光六年十二月十五日奉

上諭徒陽運河業經該撫飭屬挑切寬深並將古淺之豬婆灘雇夫挑辦來年漕船經行諒不至有阻滯茲該撫慮及彼時潮水尙小恐誤漕行爲先事籌備之計惟江浙漕船經臨徒陽由正河行走最爲穩妥倘屆時潮水不旺實在淺阻難行該撫當親往江閘相



機籌辦務令漕艘迅速暢行不可稍有延誤等因欽  
此除恭錄轉行欽遵外伏查徒陽運河原係鑿山  
而成兩岸陡立崖土易傾兼之潮汐挾沙而行水  
去沙停動形淤塞定例每年小挑一次六年大挑  
一次而挑濬時又必俟江浙回空過竣之後夫役  
人等每因天寒期促挑出之土未能遠送別處多  
有墊崖貼腮之弊一遇雨雪仍行坍卸入河以致  
河身淤淺船行阻滯此次輪屆大挑工段綿長經  
臣嚴除積弊疊飭道府督率工員認真挑挖現已  
如式報竣長河一律深通連日雪雨應期運河有

水此後江潮旺盛自應照常由正河行走以臻穩妥倘或屆時潮水微弱淺滯難行臣卽當親詣江閘相機籌辦務俾漕船穩速趕赴禦壩趁早渡河免致盛漲經臨又有借黃倒灌之虞以全大局臣於挑河竣事時沿途諄飭各幫弁毋許需索支延現在鎮江常州各船業已兌開次第渡江駛入瓜口蘇州首幫亦已就道計各屬漕船早開且多爲向所未有察看水勢亦足資浮送各船跟接前行足慰

宸厪理合將奉到

諭旨暨現辦漕運情形附片覆陳伏乞

聖鑒謹

奏

道光七年正月二十九日奉到

硃批辦理甚好欽此又於夫役人等每因天寒期促挑  
出之士未能遠送別處多有墊崖貼腮之弊句旁  
奉

硃批此等積弊最爲可惡夫役人等無足深怪大小官  
吏天良何在必應嚴飭所屬以收實效勉之又於趕  
赴禦壩趁早渡河免致盛漲經臨又有借黃倒灌之

虞等句旁奉

硃筆連點並奉

硃批此是要緊處又於現在鎮江常州各船業已開兌

次第渡江駛入瓜口句旁奉

硃批好欽此

一  
二  
三  
四  
五  
六  
七  
八  
九  
十

|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|--|--|--|--|--|--|--|--|--|--|

查覆太倉等處並無漕書毆辱生監摺子

奏爲遵

旨查訊太倉鎮洋青浦等州縣並無漕書蓄養打手專  
毆控漕生監之事據實覆

奏仰祈

聖鑒事案查本年二月承准軍機大臣字寄奉

上諭辛從益奏漕務積弊情形一摺該學政奏稱近日  
太倉鎮洋青浦紳士各公呈漕書蓄養打手專毆控  
漕之人恐亦不盡無因著該撫嚴行查訪隨時究辦  
等因欽此臣查州縣收漕遵照歷年成規辦理如果

刁抗之徒包攬索規藉端滋鬧不難治以官法豈容縱令漕書肆行毆辱自應嚴訊究辦檢查歷年控漕案卷並無呈告完漕被毆之案惟上年七月內有太倉州職員俞世英等以請禁太倉鎮洋書役私行毒毆等情赴學政衙門具控經學臣辛從益批飭以紳士等事不干已聯名具呈蹟類扛幫咨臣委員查辦當經臣飭行兩司秉公查訊隨據詳稱按照原呈內牽涉情節逐細查明或係本無控案或係已結詳銷均無實據並據委員等查覆相同經臣咨覆學臣在案又上年十一月內淮學

臣 咨據青浦縣貢監胡道怡等呈請飭禁書役毆辱生監等情一案亦卽飭司查禁並令將指出之漕書蔡錕標飭縣先行斥革解省歸案訊明究辦亦在案茲蒙

聖諭指示 臣 恐先後查訊各情尙有不實不盡復飭提兩案應訊人證及各原呈等來省札委兩司督同蘇州府知府陳鑾候補知縣李鴻鈞虛衷研鞫毋許稍涉偏徇去後現據藩司梁章鉅臬司覺羅慶善詳稱提訊該州縣漕書吳誠等並無蓄養拳勇之事質之俞世英等僉稱誤聞有完漕被毆之事



實未眼見亦不能指出憑據自認冒昧具結詳銷  
前來臣以俞世英等公呈內稱有監生陸鑿被鎮  
洋漕書毆辱並稱拳勇毆人有隔年傷三年傷等  
名目監生王寶文於道光二年三月被毆延至五  
年六月傷發身死文生王之楨於四年被毆回家  
身故事關人命情節重大何以當時屍屬並不報  
驗訊究迄今已久始據該職員等從旁援爲訟柄  
而又不赴地方官控告據所牽列事在數年以前  
於現任人員無涉無庸迴護復飭委員提省諭令  
俞世英等據實指出以憑究辦反復駁審該原呈

等毫無指證均稱王寶文王之楨實係病故懇求  
矜全等語其陸塗兄弟係太倉監生並無鎮洋應  
完錢漕所稱經過倉外被毆不能指出毆係何人  
至胡道怡等所呈亦據該委員等確訊詳覆盡屬  
子虛伏查太倉州鎮洋縣職員俞世英青浦縣生  
監胡道怡等以事不干已摭拾浮言先後聯名具  
呈難保非串通扛幫挾制以爲需索漕規地步本  
應究辦姑念到案卽行供明堅稱並非有心誣捏  
從寬免其置議俾予自新吳誠訊無毆人情事惟  
查其平日不善辦公業已另札斥革亦無庸議

臣

惟有欽遵

諭旨隨時隨地據實稽查無許蠹役稍滋事端按照收  
漕成規毋得格外苛浮亦不容生監包攬刁抗藉  
端需索以清漕務而息訟紛所有查訊俞世英等  
各案緣由謹繕摺覆

奏伏乞

皇上聖鑒謹

奏

道光七年六月二十三日奉到

硃批所奏知道了秉公勉力爲之欽此

再陳太倉州漕書並無毆辱生監實情附片

再臣查學臣所陳漕務情形原係泛論並無指實

惟所稱拳勇毆人一節指明太倉鎮洋青浦等處紳士連名具控如果屬實必須嚴查重辦俾資整飭茲經一一訊明仍係無情之詞藉端捏控卽如詞內所列王寶文王之積二案均關人命重情而當時屍親何以不控保長何以不報其無情一也不報不控而里鄰亦無聞見兇手亦未畏避其無情二也不控於屍親而控於毫不相涉之職監且不控於登時而控於數年之後其無情三也刑名

重案例須檢驗不控於有司不控於督撫而控於  
不理刑名無案可查之學政衙門其無情四也定  
例傷痕最重保辜或二十日或三十日極重之傷  
加以餘限至七十日爲止今據稱王寶文以道光  
二年被毆至五年六月傷發身死卽照保辜亦在  
數年之外爲律例所不載洗冤錄所未有其無情  
五也此等呈詞不待識者而知其僞卽學臣原批  
亦以迹類扛幫駁斥矣乃復據以爲言未免自相  
矛盾又學臣言告漕之人必實有頑抗乃予押追  
今一例發回押追地方官恨其上控倍加抑勒仍

科以抗糧之罪等語查良民負屈求伸與刁徒藉  
端捏告名同而實異其間或一畝全無而妄稱措  
勒或升斗未交而遽行騫控或一人而包攬至數  
十戶或一控而匿不赴審此等伎倆無非以控爲  
抗藉訟分肥與良民之控漕者各別臣前摺聲明  
謂必須查其是否糧戶有無抗欠正學臣所謂實  
有頑抗並非凡遇告漕者卽行押發也况押發完  
漕係嘉慶十六年前任督撫通飭舊章不自近日  
始臣任內押發之案亦不過十之一二並無一例  
押發之事不知何所據而云然臣前言刁徒橫索

陋規庸劣之員但仗漕書爲抵禦權旣下移弊更  
叢出層層挾制陋規日添勢必取償鄉曲之淳良  
小戶爲補短牽長之計以致浮者愈浮苦者愈苦  
乃此間受敝之實在情形言之可勝太息而學臣  
以爲官吏婪索是其常態縱無此等生監而小民  
之被苛徵亦不能爲稍減此正刁生劣監所執爲  
口實者殊不思陋規卽出於浮收欲減浮收先裁  
陋規實一定之理若逆料有司之不減而謂陋規  
可存而不論已非釜底抽薪之計况整頓士習首  
嚴義利之辨以主持教化者而爲此論似非所以

訓士也學<sup>臣</sup>又稱年來生監因漕被革者多從未  
聞有漕書獲咎查生監被革或因漕事或因他案  
部中有冊可稽計<sup>臣</sup>兩年來審結漕案僅革去武  
生費長春費震雷二名監生朱心灼一名而漕書  
則斥革甚多如朱心灼案內卽革去漕書吉惠嘉  
蕭永瑞俞蘭言姜佩蘭姜定符倪顯揆六名奏咨  
有案其餘隨案斥革者不一而足係屬尋常事件  
例不咨會學政衙門學<sup>臣</sup>目所未見宜其詫爲事  
所未有也學<sup>臣</sup>奏藁自明奉

上諭後至今未見移送而外間傳述殆遍正恐刁生劣



監恃以無恐則白規終難盡革而小民之累無窮  
甚或釀成事端則所傷實多轉非所以保全善類  
伏讀前奉

諭旨此項積弊已久人數衆多當整頓之初怨謗沸騰  
甚或糾衆肆鬧捏詞京控勢所必至該撫惟當不避  
嫌怨不稍偏徇無庸預存畏葸之見仰見我

皇上鑑空衡平無微不至一切阻撓牽掣情形早在  
聖明洞照之中夫徇衆沽名其勢順而易力挽頽波其  
勢逆而難臣來自田間受

恩深重斷不敢畏難而避怨致令刁風日長民困難蘇

所有遵

旨查訊漕案實在情形合併縷晰附陳謹

奏

道光七年六月二十三日奉到

硃批所奏俱悉勉副委任無恤其他欽此又於徇眾沽

名其勢順而易力挽頽波其勢逆而難四句奉

硃筆連點又奉

硃批是欽此

三才圖會

卷一

三

蘇省辦漕毋庸另定收數附片

再<sub>臣</sub>前奏嚴禁衿棍包漕橫索陋規接奉

上諭江蘇漕務疲敝已久閭閻每苦浮收而各州縣用  
度浩繁不能不藉資津貼抗玩者卽因此挾制以爲  
控端包攬分肥人數最多之處生監或至三四百名  
漕規竟有二三萬兩實駭聽聞生監等包攬愈多盤  
剝併吞勢所不免不釀成巨案不止該撫旣經見及  
著卽督同藩司將收漕章程體察情形分別酌定毋  
許浮多並嚴禁道府陋規及揜薦幕友長隨一面飭  
屬遵照兌收衿棍陋規痛行裁革並著移咨學<sub>臣</sub>一

體查察等因欽此嗣於本年二月內學臣辛從益條  
奏浮收積弊復奉

上諭該撫遵照前旨將收漕章程酌中定制等因伏思  
漕務事體重大弊竇多端自水次兌開以至通倉  
交卸皆有費用臣所言者白規學臣所言者浮收  
浮收之弊人人能言而不能除正以費用浩繁而  
幫費與白規尤其大者幫丁訛索必以米色爲詞  
漕棍挾制必以浮收爲詞皆假正論以行私不遂  
不休臣因漕務費重則收數亦重其害獨歸於小  
民是以去歲首請

敕禁幫丁勒索加費次卽禁生監包攬橫索陋規以冀  
稍清浮收之根爲補偏救敝不得已之苦衷今學  
臣所奏多係正論其所舉浮收諸弊亦與臣前奏  
所陳大意相同惟於費用一節一字不提似非揣  
本齊末之道古云不患寡而患不均漕務收數之  
浮正由不均所致茲蒙

諭旨督同藩司查明歷年收漕章程酌中定制洵屬持  
平類一永戢紛爭之至意惟查收漕一節前於嘉  
慶年間督撫諸臣屢有八折完漕之議迄未能行  
蓋緣年歲之豐歉不齊地方之繁簡亦異情形未

能一例此時酌定收數原爲津貼而設萬一不肖官吏久且視爲定額而更有所加則作法於涼非整頓之初意且刁徒訐告其意不在浮收而在需索即使定爲加二亦無難以加五加六捏詞妄控臣與藩司等細加商榷漕米收數總以費用之多寡爲輕重幫規之外惟包攬與白規最爲漕害凡包攬與白規最多之處其收數自浮如江北各屬此風甚少故收數亦輕江寧及鎮江之徒陽金壇亦然常州則有包攬而白規尙少故收數亦不甚多若蘇屬之常熟昭文已實繁有徒吳江震澤自

嘉慶十年懲辦生監吳景修等三百餘人之後此風稍息如松江之青浦南匯等處太倉之鎮洋嘉定寶山等處食規之生監多至數百名且有舉貢在內銀數動以萬計前經臣奏奉

諭旨飭禁之後卽移咨學臣一體出未曉諭並飭各屬嚴查蠹書不許入倉其收漕分數一體量減是以漕務甚急而輸將踴躍於正月望間幫船掃數開行趕副四月內渡黃

欽限較往年辦漕完竣早至一月有餘此卽革陋規以減收數之明效方冀陋規果能革盡更可逐漸遞



階  
三  
減以卹小民而清漕務嗣後惟有恪遵

聖諭力加整頓既不使不肖官吏浮勒病民亦不容矜  
棍把持藉端訐告遇有控案仍查其有無抗欠是  
否糧戶虛實無難立辨卽予懲治庶幾陋規可革  
包攬可息辦漕之費旣省收漕之數自平似不必  
另議章程轉虞窒礙所有蘇省辦漕仍循舊章毋  
庸另定收數緣由合併附片覆

奏伏乞

聖鑒謹

奏

道光七年六月二十三日奉到

硃批所奏是隨時秉公認真辦理欽此又於旣不使不肖官吏浮勒病民亦不容衿棍把持藉端訐告遇有控案仍查其有無抗欠是否糧戶虛實無難立辨卽予懲治八句下每句奉

硃圈又奉

硃批所見甚是總要行之以實漸加整頓方好欽此



覆奏蘇省錢漕查禁幫費陋規摺子

奏爲江蘇省徵收錢漕查禁幫費陋規恭摺覆

奏仰祈

聖鑒事竊<sub>臣</sub>等承准軍機大臣字寄道光七年閏五月  
十八日奉

上諭據御史錢儀吉奏稱江南辦漕州縣津貼旂丁運  
費前經該督等議定數目每船二百兩至四百不等  
旂丁並未遵依十數年來逐漸增加每船多至千兩  
實爲該省一大積弊緣幫費旣重則浮收亦多今欲  
嚴辦浮收誠爲正論但幫費不除州縣從何取給若

使酌中定數不問紳民良莠一概均勻敷派則竟以私費爲正供尤斷不可行若竟不加限制習爲故常強索者不敢違困弱者不加卹官方何由而肅民力何由而繼請飭該督撫詳察情形妥議章程等語江蘇漕務積弊較他省爲尤甚在旂丁則藉口於長途之繁費在州縣則藉口於幫丁之需索而刁紳劣衿因得持其短長有所挾制惟安分士子良懦鄉民則任其苦累而不之卹尙復成何政體著該督等將該御史所奏情形悉心體察如何盡蠲宿弊官民旣可相安旂丁足資辦運詳細妥籌奏明遵辦等因欽此

又於本年六月二十二日奉

上諭御史蔣泰階奏請嚴禁包漕劣衿添食忙規一摺  
據稱江蘇省漕務之弊由於浮收而不肖生監等藉  
此挾制分肥近來更甚於前漕規之外又添忙規名  
目各州縣徵收錢糧時置立號籍每人應得若干按  
名照給南匯鎮洋二縣爲尤甚竟有就職舉貢故紳  
弟姪視爲成例首先瓜分自番銀一二百圓至二三  
十圓以人之等差爲數之多寡一縣不下百數十人  
需銀三四千兩不等再閱數年人旣日衆數亦愈多  
請飭嚴行查禁懲辦等語州縣經徵錢糧本不許浮

收婪索其地方刁劣矜監坐索漕規歷經嚴旨飭禁  
近復新增忙規如該御史所稱一縣之中竟有多至  
百數十人需銀數千兩者公然坐食分肥按簿散給  
肆行無忌尤不可不嚴行懲辦著蔣攸銛等通飭各  
州縣實力整頓除漕規勒令裁革外并將新增忙規  
於開徵前嚴密查禁永遠革除如實有恃符抗違著  
名劣矜卽嚴拏從重究辦以儆其餘至州縣官旣無  
此項額外耗費倘仍有截留印票剋扣平餘等事亦  
卽嚴參懲辦毋稍徇縱俾不肖生監等無所藉口以  
息刁風而杜流弊將此各諭令知之欽此遵

旨寄信前來均經臣等恭錄轉行欽遵在案伏查江蘇  
賦額甲於天下在閭閻本屬支持不易而蘇松太  
三府州尤甚其幫費亦較重於他處緣此三屬皆  
濱近海隅產米潮嫩選剔維艱內如江淮興武等  
幫向無辦公屯田難免藉口賠累丁索之官官問  
之民刁生劣監遂起而持其短長訐控分肥包攬  
牟利白規之風由此益熾輾轉相持其害獨歸於  
小民實屬有乖政體不得不設法整頓是以臣陶

澍前經

奏請



敕禁幫丁需索並嚴禁生監白規無許包攬訛索誠以  
民爲邦本欲卹小民必減浮收欲減浮收先減浮  
費欲減浮費則幫規與白規尤其大者實有如御  
史錢儀吉所言費重則浮收亦多欲嚴浮收而規  
費不除則正論亦止空言僅爲刁徒挾制之文而  
已前蒙

諭旨令將收漕章程體察情形酌中定制等因經臣陶  
澍以酌定收數原爲津貼第恐不肖官吏久且視  
爲定額而更有所加則法立弊生不得不慮之於  
始當與藩司細加商榷漕米收數總以費用之多

寡爲輕重幫規之外以包攬與白規最爲漕害惟  
有力加禁革俾辦漕之費稍省則收漕之數自平  
不必另議章程轉虞窒礙奉到

硃批所奏是隨時秉公認真辦理欽此是蘇省收漕情  
形已在

聖明洞鑒之中臣蔣攸銛於本年閏五月奉

命南來卽經飭諭各屬務須禁戢刁徒裁減收數以利  
漕務而靖地方復與臣陶澍再四籌商實惟有裁  
省規費一法可以清淨收之根雖拂愆者不能無  
怨而小民藉資蘇息係屬正辦捨此亦別無長策

現查軍船人等自屢經申禁之後兼值試行海運  
與州縣隔絕無從需索將來河運復舊其幫費當  
可遞減至需索漕規一節自上年欽奉

上諭飭禁刁劣生監亦頗知斂迹惟陋習相沿之處人  
繁勢衆稍縱卽逝在所不免如御史蔣泰階所奏  
漕規之外又添忙規名目竟有就職舉貢故紳弟  
姪亦視爲成例公然坐食瓜分實屬爲害地方該  
御史籍隸江蘇熟知本地情形言之確鑿爲保恤  
鄉里窮黎起見臣等職在安民尤應時加察訪力  
矢肅清惟有督同司道恪遵

諭旨實心整頓不避嫌怨嚴行禁革斷不容矜棍需索  
無忌亦不容官吏浮勒病民有犯必懲庶流弊可  
除而地方自臻救帖矣所有臣等核議緣由謹合  
詞恭摺覆

奏伏乞

皇上聖鑒謹

奏

道光七年十月十四日奉到

硃批知道了實力奉行毋畏難毋苟且毋避嫌怨焉欽  
此

PLANTAIN

PL

籌勘回空漕船改由大江至丹徒橫閘試行入口

摺子

奏爲丹徒運河水淺潮枯回空船隻難行臣親往籌

勘改由大江至橫閘入口恭摺具

奏仰祈

聖鑒事竊照鎮江府屬丹徒運河自入冬後江潮微弱

兼以久晴風燥底水枯耗該處別無水源接濟回

空糧船淺阻難行經臣疊飭常鎮道鎮江府丹徒

縣設法罟撈催趲並將幫船所帶貨物飭令起卸

一面咨商漕臣先提浙船進口其松江幫船或由

橫越二閘行走或在壩外守候先行挑河臨時再行酌辦當將情形附片奏

聞在案嗣據該府縣先後稟報運河口外及瓜口未渡各幫尙有一千二百餘隻因京口內河水淺僅及數寸松江幫船俱停泊江邊浙省各幫離江口更遠亦難漫越行走其橫閘至江口雖亦間有淺處現已一律挑平約計大汛每日可進船六七十隻至越閘尙在橫閘以下七里進口之路較遠閘門亦狹而高可作民船分走之路惟幫船拘於成例多有遲疑觀望等情臣隨於十一月十六日自蘇

起程帶同護理蘇松糧道陳鑾親至鎮江督同該  
府縣逐一查勘自京口至甘露港三里甘露港至  
象山五里象山至橫閘江口十二里沿江南岸均  
係蘆灘刻已全刈多有緯道中間惟象山一處下  
係石腳不能上緯不及一里風順一帆可過江船  
亦能帶行對面卽係焦山冬令水淺並無急溜象  
山以下仍是緯道直至橫閘船傍南岸行走惟東  
北風須折戩其西南東南西北等風俱可順流而  
下南岸帶緯並無險阻商民船隻往來不絕惟幫  
船向未經過必須先爲試行臣當飭該府縣多備



熟諳江船引帶遴委文武員弁押送並經督臣漕

臣委員前來於十八日將松屬之興武八幫船二

十七隻興武七幫船一隻由京口開行是日晚潮

全行進開一路風恬浪靜行走平穩十九二十日

風色稍勁仍每日進船十餘隻復經臣帶同該道

將府縣等由江口乘船逆流而上適新授浙江糧

道宋其沅路過一同登焦山高處觀看見北岸水

平無石路亦可行遂將松白幫船四十五隻山北

岸用緯東行計自瓜洲大口五里至佛紺洲又十

里卽焦山北岸又五里益課洲轉南十里與橫闡

江口對渡踰時卽至是兩岸皆可行走如果風色  
平順潮水不致再落則在後浙江各幫自可接續  
由閘進口總使多進一船卽得一船之益以期趕  
緊歸次兌運新漕用副來歲早抵禦壩之

欽限其已入京口淺阻之船尙有一百餘隻現飭該府  
縣等設法催挽出淺刻日熬壩挑河併飭瓜口京  
口至橫閘各委員相風督催勿稍支延外

臣因新

漕緊急卽日回蘇辦事所有回空糧船改由橫閘  
行走緣由謹會同大學士兩江總督臣蔣攸銛漕

運總督臣訥爾經額合詞恭摺具

奏伏乞

皇上聖鑒謹

奏

道光八年十二月二十四日奉到

硃批知道了欽此

回空漕船俱由橫閘進口附片

再臣承准軍機大臣字寄道光八年十一月二十四日奉

上諭訥爾經額奏江廣各幫漫越浙江空船全出瓜洲口並鎮江一帶船行水淺情形一摺現在節逾冬至鎮江一帶水淺船行不能迅速該漕督擬照陶澍咨會或改由橫閘進口南下或先行築壩挑河俟開壩鋪水再行進口著卽相機妥爲辦理至浙江幫船阻守壩外水手人等聚集一方必應巡防彈壓著該漕督會同陶澍飭屬妥辦毋任再滋事端欽此查入冬

以來西風晴燥水落潮枯回空軍船阻淺京口以內至豬婆灘一帶共計一百四十餘艘寸步難移其未經入口掛江冒險復有六百餘艘餘俱停泊瓜洲一帶水手人等刻虞滋事經臣咨商督臣漕臣帶同護糧道陳鑾親往籌催飭令鎮江府趙光祿丹徒縣吳浚轉飭各幫船改由橫閘進口當將辦理情形恭摺具

奏並以橫閘爲向來漕船屢議未行之路各幫不免畏難勘得焦山南岸一道雖中間有象山石腳里許船由中洪半帆可過其上下均係沙灘可以帶

繼又北岸自瓜洲至益課洲迤南並無石腳更可  
用纜至橫閘江口對渡當卽派委護鎮江營參將  
金萬全等文武大小各員弁將停泊大江金山鮎  
魚套一帶船隻分頭齎持令箭催提其停泊江北  
瓜洲一帶船隻飭令京口水師副將莊芳機會同  
揚州府江都縣等巡防彈壓陸續押放出江一面  
飭令府縣多備帶江紅船察看風色引帶各幫進  
閘復飭丹徒閘官每日俟江船引帶幫船行抵橫  
閘江口卽催令出江接引後船不許稍有停延茲  
據該道將府縣等稟報自十一月十八日起至十

二月初九日將江浙幫船一千一百三十六隻由  
大江催進丹徒橫閘掃數銜尾南下一無疎失等  
情其京口內河膠淺之船亦經催送出淺南下查  
橫閘以內水路寬展此後毫無阻滯惟恐進閘幫  
船又復任意停泊現又飭令護參將金萬全及  
標千總劉燦等尾趲迎提以期迅速歸次兌運新  
漕謹遵來歲四月初十日早抵禦壩之

欽限仰副

宸厯再查回空幫船歷因京口冬底潮枯淺滯或車水  
灌塘或築壩罽撈或截留江外遲至春間開壩始

得回歸自嘉慶九年至道光四年屢議由橫閘行走皆以江路險阻爲辭甚至船已試行仍復截回此次經臣親往籌勘並經督臣漕臣委員前來督同文武將幫船一千一百餘號於二十日間連檣安穩過渡於漕運頓開捷徑不特回空迅速可免糧船水手聚集滋事兼得騰空趕辦挑河於新運事宜大有利益所有鎮江府丹徒縣及文武各委員實係分外出力與常年催趲糧船迥不相同自應酌加鼓勵容俟查明尤爲出力之員會同督臣漕臣另行奏請



獎敘合併陳明謹

奏

道光九年正月十三日奉到

硃批所辦甚好前此朕亦懸念此舉曾經面詢額騰伊  
據云橫間甚可行走可保無虞該府縣及文武等自  
應量加鼓勵奏到時再降諭旨毋許冒濫欽此

會同總河恭報重運二進漕船渡黃完竣摺子

奏爲重運二進漕船渡黃完竣日期恭摺具

奏仰祈

聖鑒事竊照本年首進漕船渡黃完竣及首幫挽出江

境日期前由

臣張井

奏報在案查二進船隻先經

臣

陶澍專委提催又於

前來清江時沿途親爲催趲押令星夜行走惟因

洪澤湖水勢浩大清江浦以上至運口各關壩溜

勢湍激高下懸殊提溜上行其勢不能迅速截至

三月三十日清晨趲入臨清堰內漕船尙不足一

塘之數收放正需守待臣張井在壩次察看河湖情形竝順黃壩誌椿存水核計清水已高黃水七寸因思高下無幾其力縱不足以刷黃而現在洪湖異常盛漲藉行漕以資分洩亦屬兩有裨益當將臨黃壩堰啟除清水卽時外注清黃交匯處所立見跌刷深通存壩船隻銜尾放渡後船隨到隨行至本月初三日將二進尾幫浙江杭嚴三幫船渡黃北上查二進共三十六幫計船一千五百一十隻全數完竣連前共過船二千五百七十五隻計五十九幫仍催令三進在前之寧波後等幫跟

接行走較去歲有閏之年二進船隻於四月二十三日渡竣本年計早二十一日伏查江境本年清黃竝漲月前適至相平辦理倒塘實虞遲滯今因湖水太旺反得暢出敵黃儻此後託蒙

聖明福庇黃水再能暢落或不再形加長則三進全漕竟可望清水浮送但節氣已交夏令黃水長發靡常臣等惟當隨時斟酌情形相機辦理以期運行妥速早登

天庾仰慰

宸厯其邳宿運河循照向例飭令套塘提放現在開河

水勢充裕據報首進船二十五幫於三月二十六日挽出江境船八百零九隻計二十幫所有二進漕船渡黃完竣日期謹會同漕運總督臣吳邦慶循例由驛具

奏伏乞

皇上聖鑒謹

奏

道光十一年四月十四日奉到

硃批覽奏欣慰辦理甚屬得宜欽此

會同總河總漕恭報重運漕船全數渡黃完竣摺

子

奏爲恭報重運漕船全數渡黃完竣循例會摺具

奏仰祈

聖鑒事竊照本年漕船行走順利并下游運河因啟壩洩水險要情形節經恭摺奏

聞在案查三進軍船自浙江寧波後幫起至湖南三幫止共船一千八百一十二隻計三十九幫自三月三十日啟放禦壩清水暢出順流放渡極爲順利惟因揚糧廳鳳凰橋一帶吸溜甚大慎重挽渡倍

極艱難兼之江廣船身笨重窮一日之力僅得挽過三四十隻故河口一帶非不清水敵黃而待船過渡總覺零星臣等節次添委幹員前往下游會同參將張兆等無分晝夜併力催提截至四月二十八日已過三進船一千五百零五隻適黃水於二十九日至初二日節次報長後船又未全行跟接雖僅餘船三百有零亦未敢拘泥守候致使黃水裏漾內塘受淤卽於初二日將草閘及臨黃堰暫行堵閉併將禦黃壩上下東岸緯隄掣塌舊護埽長一百零七丈九尺一律補鑲完整一面嚴催

各船陸續抵壩趕緊起除草開臨黃堰次第放渡  
截至五月初十日三進尾湖南三幫船四十八隻  
渡黃完竣統計本年全漕除黃河以北兌運二幫  
外實渡黃船九十八幫共四千三百八十七隻上  
年重運船九十八幫計船四千五百一十五隻係  
於閏四月十九日渡黃完竣本年計早九日道光  
九年重運船九十六幫計四千四百七十一隻係  
於四月二十九日渡黃完竣本年計遲十日道光  
八年重運船九十八幫計四千五百六十四隻係  
於四月十一日渡黃完竣本年計遲二十九日伏



查本年江浙漕船春間雨水甚多蘇常一帶河水充足渡江尙不遲滯惟南船半入運河而洪澤湖水驟見異漲淮揚一帶岌岌可危勢不得不於歸江各處急籌分洩而溯查舊案從無於重運盛行之時啟壩洩水之事臣等分投照料實有顧此失彼之憂因創爲簽椿搭橋設關加緯之法節節擺渡溜力東趨船行北上橫流緯挽萬夫雲屯在事文武員弁無不各効全力如三閘之高下懸殊揚糧之急溜湍激惟以力求慎重又不得不較之往年添委員弁多雇緯夫雖時日稍覺稽遲幫丁亦

不無多費而至險之處未損一船間有被溜吸入  
口門仍復挽提入運全數北來實非臣等始願所  
敢豫期尤幸清水暢出各船順流渡黃歷一月之  
久免於啟閉壩堰俾臣等得以西防洪湖異漲之  
工東籌運河至險之地雖往來奔走頭緒繁多較  
之往年照常辦理者難易迥殊然竟得於夏至以  
前全漕渡黃完竣而洪湖水勢當盛漲之時天晴  
無風旋即按日消落應行防護事宜又得從容籌  
備卽下游洩水之處除歸江各路飭令接啟外其  
高郵之車南中新等壩并可無庸早啟以保民田

漕行順速湖河安恬實賴我

皇上福庇所致臣等欣慶之餘尤深感幸現在邳宿運

河至楊莊一帶水仍充裕足資浮送截至五月初

五日止已出江南黃林莊境船三千零五十隻此

後江廣各幫經行喫水較多如水勢見消照例由

東省添啟湖口閘板俾資接濟亦不致稍有阻滯

所有重運漕船渡黃完竣緣由謹循例由驛會摺

奏報伏乞

皇上聖鑒再臣陶澍拜摺後卽回省辦事臣吳邦慶督

押尾幫前進臣張井亦卽前赴上下游各廳查驗

工程合併陳明謹

奏

道光十一年五月二十五日奉到

硃批所辦甚合機宜深慰朕心欽此

|  |  |  |  |  |  |  |  |  |  |  |  |  |  |
|--|--|--|--|--|--|--|--|--|--|--|--|--|--|
|  |  |  |  |  |  |  |  |  |  |  |  |  |  |
|--|--|--|--|--|--|--|--|--|--|--|--|--|--|

三ノノノノノ

冬雪放晴漕船出江清高於黃各情形附片

再江省自秋冬以來雨雪連綿漕米多損兌運甚艱連日天氣放晴人情歡忭其回空各船經過揚關惟江西船隻頗多夾帶私鹽內有贛州幫旗丁周張鍾竟以一船帶至萬斤之多業經撥起將失於覺察之運弁邵廷魁先行摘去頂戴押船回次交糧道審訊懲辦以儆將來仍將各船迅速督催隨查隨放於本月十二日全數出江完竣趕緊歸次裝兌新漕至黃河水勢現已涸落清高於黃二尺餘寸計日春風解凍儘有暢出刷沙之望氣象

甚好堪以仰慰

聖懷合併附片縷陳謹

奏

道光十四年正月十三日奉到

硃批知道了欽此又於江西船隻頗多夾帶私鹽內有

贛州幫旗丁周張鍾一船帶至萬斤之多業已按

起等句旁奉

硃批所辦好又於清高於黃二尺餘寸計日春風解凍

儘有暢出刷沙之望等句旁奉

硃批可謂喜出望外之事欽此

會同蘇撫等辦蘇松等屬漕務情形摺子

奏爲蘇松等屬新漕因雨雪連綿兌開有逾冬限兼米質受傷未能一律圓淨現在設法趕辦各緣由據實奏祈

聖鑒事竊臣陶澍於上年十二月三十日覆奏常州府

屬緩徵摺內聲明蘇松等屬勘辦較早隨後亦被雨雪此時業已晴霽情形能否不致加重新漕能否不致竭蹶容與臣林則徐妥籌趕緊辦理在案茲自拜摺以後雖復春雪連朝幸天色已霽各處運米上倉俱知緊急查蘇松等屬上年勘辦較早



核定歉收分數現尙不致加重惟新漕起運事宜  
辦理甚形竭蹶有不得不據實陳明者歷來收漕  
惟恐米色之不純而現在並患米數之不足向來  
辦運惟恐開行之不早而現在業已兌限之有踰  
種種情形均非意料所及卽非成式所有緣上年  
夏秋間蘇松等屬暘雨依時田禾暢茂原可期年  
穀豐登不意於築場納稼之時陰雨兼旬天寒漿  
凍顆粒未能飽綻以致分數頓減然猶冀天色晴  
朗趕收趕曬或可期其乾潔奈又雨雪纏綿晴霽  
日少以致收穀者或用火烘焙而米質已酥春糶

卽碎或帶溼堆貯而未會曬晾霉變生芽或攤貯  
幸未霉爛而究屬潮嫩一經試碾米色無不灰暗  
青腰白臍尤所不免未能純潔實由於天時之不  
齊也至蘇松等四府一州漕額甲於天下其實地  
域縱橫不過三四百里按畝納漕所餘無幾雖豐  
歲不敷日食茲旣普律被歉雖不至遽成重災而  
分數暗傷通計各屬所缺已不下百十萬石之多  
閭閻生計日蹙朝夕不飽輸納維艱其編戶小民  
更恐納漕未及足額卽已瓶罄不得不買米交兌  
質色更難純潔此又因急公而未能一律實亦天

時偶值之所致也又新漕起運例應冬兌冬開卽  
遇災歉之年亦不敢有違定限今如期開倉而各  
業戶或未會礱米無可交倉或碾無好米難以收  
納或竟爲雨雪所阻不能依期趕運赴倉而各州  
縣更不敢於雨雪之下帶溼徵收致米色無可揀  
選貯倉有發變之虞是徵收不克依期而兌開卽  
不能依限此又幫船之兌開有差亦由於天時所  
值也伏查例載徵收漕糧米色顆粒務須一律乾  
圓潔淨倘實在水旱歉收米色不能一律圓潔者  
該督撫預行題明請

旨辦理等語又嘉慶九年江省各屬歉收欽奉

上諭徵收漕糧米色過於揀選固爲慎重天庾起見但該省本年究經被災晚收之米未能一律純淨若過於挑剔小民輸將仍屬竭蹶且恐胥吏乘機舞弊著傳諭留心察看倘有實在不能純潔之處不必苛求或米色稍次皆可酌量收兌等因欽此在案伏查本年歉收係在秋災題報之後而情形更重實非向來所有現在爲期已促不得不設法辦理以全大局除各糧戶有米可納爲數較多者自應循照定例揀選米色純潔以重

天儲至於零星小戶有日食不敷米難足數者自不得不酌量買米完納冀資如額運送趕緊斛收以恤農艱而速漕運惟米色未能一律純淨并兌開未能盡如冬限實出天時臣等惟有趕緊設法辦理無分晝夜兼期趲兌趲運以速補遲源源北上仰

副

宸注所有現在設法籌辦蘇松漕務情形臣等謹會同署漕運總督臣恩銘恭摺具

奏伏乞

皇上聖鑒謹

奏

道光十四年二月初七日奉到

硃批知道了欽此

五十一

五十一

酌定江廣幫船過關查驗章程摺子

奏爲遵

旨酌定江廣幫船過關查驗章程俾資迅速恭摺覆

奏仰祈

聖鑒事竊臣接准部咨欽奉

上諭朱爲弼奏遵旨籌議剔弊速漕各事宜酌擬條款  
請旨辦理一摺所稱飭提浙江江廣船隻無分省分  
幫次先到先進瓜洲口趕趲來淮盤驗等語著陶澍  
林則徐妥議具奏又稱灌塘幫船應酌減數目並加  
寬塘河等語著陶澍麟慶妥議具奏又稱江廣各幫



經過九江蕪湖等關應迅速查驗等語著陶澍酌定  
章程具奏等因欽此臣查漕船渡黃總須在伏汛未  
發趕緊完竣本年重運抵黃因江廣後船過關稍  
遲以致臨河漲發挽渡維艱必須預爲籌議俾來  
歲新漕趕於黃水未漲前全數抵壩以資趲渡仰  
副

聖主慎重漕務之至意所有灌塘幫船酌減數目加寬  
塘河一條已經南河督臣麟慶會臣

奏覆其浙江江廣各船無分幫次先進瓜口一條臣

與江蘇撫臣林則徐熟商議

奏至江廣各幫經過九江蕪湖等關迅速查驗一條  
當經轉行各關監督分別議覆前來臣查江廣船  
隻例帶土宜一百八十石船旁跨木例准高寬各  
二尺之多節省稅銀恤丁不爲不厚乃奸丁刁舵  
罔利營私於例帶之外仍復多帶包攬甚或違例  
於艄後拖帶木仔闖關漏稅自應嚴查惟查出截  
留或遵例拆卸或留丁補稅爲時已屬稽遲於漕  
行大有窒礙因思湖廣船隻向於九江上游田家  
鎮武穴等處爲齊幫之所屢有九江關委員往彼  
查驗糧船所帶木植高寬已足二尺卽會同押運

廳弁及地方官將客販木簾封固俟糧船開行再行開封以杜夾帶應於查驗後卽開具貨單於漕艘過關時委員按單嚴查給票放行江西幫船於九江姑塘上游青山地方爲候風之所向由江西糧道飭丁開明貨單陸續赴關報驗應由九江關立刻派委員役前赴青山亦按單查驗給票放行以下蕪湖等關卽照前關所驗之單按船迎驗給票不准一日停留倘查有例外多帶及艚後拖帶木仔若一一起卸入官大江風浪堪虞守待必延時日與其辦理掣肘莫若將多帶貨木立時核明

應稅銀兩卽於印票內當面註明發給放行不必  
拆卸亦不必留丁質算統俟幫船過竣將何丁船  
隻違例多帶之處由關彙報漕運總督查核並移  
各糧道將應納稅銀照數追齊解關歸款仍將押  
運員弁參處丁舵治罪如各關員役需索留難准  
各省糧道飛稟以憑嚴飭立時放行仍將失察之  
各關監督

奏請議處倘徑直過關不候給票卽照前督臣蔣攸  
鈞奏案俟糧船到通由該省總運丞俸查明無票  
之船立即具稟從嚴懲辦無許顛預支飾亦不必

追驗耽延如此定立章程庶丁舵知所做畏員弁  
各顧考成關稅不致短絀而漕船亦無阻行程矣  
除分別咨行漕運總督湖廣江西各督撫暨各省  
糧道外臣謹恭摺覆  
奏是否有當伏乞

皇上聖鑒訓示遵行謹

奏

道光十五年十一月二十三日奉到

硃批依議行欽此

籌議約束水手章程摺子

奏爲遵

旨籌議約束水手辦理章程恭摺覆

奏仰祈

聖鑒事竊臣前接軍機大臣字寄道光十五年九月二

十二日奉

上諭朕聞糧船水手類皆無籍匪徒性成獷悍均由習教之老管師父招雇上船各分黨與恃衆逞強以致在途互鬪殺傷劫奪行旅之案層見疊出卽如上年山東清平縣地方有廬州二幫水手王汶舉等鬪殺

多命今春鎮江前後兩幫水手復敢藏匿刀械施放  
火器各案是水手逞兇滋事江浙幫船爲尤甚而此  
外各省恐亦不免有此惡習朕因科道陳奏屢經降  
旨諭令有漕省分及沿途各督撫漕運總督嚴行查  
察隨時懲辦不啻至再至三乃兇悍之風至今愈熾  
推原其故總由此等匪徒愍不畏法卽遇有重案審  
明後正法數人該匪徒等亦祇視爲故常毫無警畏  
幾成積重難返之勢現在辦理新漕若不乘此痛加  
振作力清其源年復一年伊於胡底倘將來釀成巨  
案尙復成何事體因思各省幫船爲數衆多糧道總

運各員稽查容有未周且運弁旣慮生事端旂丁復受其挾制其沿途州縣營汛各員弁又因漕船行走不准停泊卽有械鬪搶劫各案祇得將就了事無誤漕行因而化大爲小化有爲無雖奉嚴旨飭查輒以並無案據爲詞一奏塞責而居民商旅隱受其害者實不知凡幾矣又何怪該匪徒等肆行不法有恃而無恐耶似此積習相沿深堪痛恨與其懲治於事後莫若防患於未然嗣後各幫漕船受兌之先如何責成旂丁雇募確有籍貫之人充當水手不由老管師父盤踞把持私相庇護至所過地方如何令幫弁旂



丁認真管束毋許滋事倘有鬪毆搶劫等案州縣營  
汛立即捕擒治罪不得因屍身拋棄首告無人輒爲  
諱匿不究其一種竊賊名爲放散風者如何設法稽  
查不許隨船行走著有漕省分各督撫漕運總督接  
奉此旨即將近來所有弊端虛衷商榷實力講求得  
其致患之源破其久沿之習通盤籌畫因地因時毋  
畏難而苟安毋因噎而廢食所有一切章程總期提  
綱挈領簡便易行俾匪徒無敢混迹而漕政永保肅  
清方爲妥善有治人而後有治法該督撫等均有兼  
轄漕務之責其各體察情形悉心妥議據實詳晰具

奏至江廣各幫向募本籍之人充當水手惟江浙幫船係雇他省水手類多無賴之徒把持盤踞沿途往往滋事嗣後水手應如何責成該旂丁等招募本籍之人充當著該撫一併查明妥議具奏將此各諭令知之欽此在案茲臣以述職恭

觀仰蒙

召詢及此臣伏思糧船水手兇悍之徒倚恃人衆逞兇肆暴仇殺劫搶均所不免而江浙幫船爲尤甚捧誦

聖諭洞若觀火情形畢照今若另募良善不任盤踞誠

爲拔本塞源之計惟江浙人多懦弱於撐駕笨重  
軍船本非所習且軍船水手每幫多者數千少亦  
不下千餘一時恐難更換况該水手之爭奪仇殺  
本爲爭窩而起若換懦弱之人必遭其魚肉若換  
強梁之人仍然以暴易暴轉滋事端至於防範之  
法漕運則例原載有雇募時正丁取結十船連保  
戶部則例亦載有頭舵水手互保具結及各給腰  
牌等語皆祇可以防良懦而不足以戢兇暴臣思  
更換另募必須行之以漸而禁暴除奸惟當持之  
以嚴請敬爲

皇上陳之

一嚴查兇器也長刀利矛本非糧船所當用至於火槍擡槍尤爲禁物豈容水手收藏應請

飭漕臣於每年淮安盤糧時逐船按括一次俟抵天津回船又查一次其餘經過地方遇有事故隨時按查以絕逞兇之具

一嚴寘重典也定例糧船水手夥衆十人以上執持兇器搶奪爲首者照強盜律治罪爲從減一等如十人以下又無器械者照搶奪律治罪立法不爲不嚴惟此例專爲搶奪而設且必須十

人以上至於劫奪殺人及仇殺慘殺之犯應無論人數多寡審明得實卽恭請

王命正法河干其同惡相濟之人但經殺人卽請照強盜律立正典刑游幫匪棍冒充水手劫奪傷人持刀拒捕亦卽照辦以昭炯戒其藏有火槍擡槍者雖未點放傷人亦應從嚴加發新疆俾兇徒遣散庶資懲儆

一酌寬處分也糧船過境地方文武俱有催趲之責一經停泊例有處分而糧船水手卽因以爲挾制之端以致逞兇無忌應請嗣後水手殺人

滋事地方官聞信查拏如罪人已得自應將糧  
船催令前行倘敢倚恃人衆不服查拏停船抗  
拒卽一面稟知漕務本管各官將該船暫泊以  
便查拏懲辦俟交出兇犯再令開行倘敢棄船  
走散卽另雇水手駕送尾隨各幫行走不必拘  
定本幫仍將拏辦認真之地方官邀免處分庶  
兇惡水手無可挾制而查辦可期得力矣如此  
從嚴從實辦理庶幾刁風可戢而就案辦案不  
致擾動大局自可俾資斂迹日就肅清矣所有  
遵

旨體察妥議緣由謹繕摺具

奏伏乞

皇上聖鑒謹

奏

道光十五年十二月十六日奉

硃批另有旨欽此道光十六年四月二十日准

戶部咨內閣鈔出大學士等會議兩江總督陶澍  
等奏籌議約束糧船水手章程一摺道光十六年  
三月二十六日奉

上諭本日據大學士軍機大臣會同該部議奏約束糧

船水手章程一摺已依議行矣漕船水手人等類皆無業游民獷悍性成劫奪是其故技全在漕河及地方文武員弁認真查察嚴行懲治庶兇頑羣知斂戢而漕政得以肅清此次會議各條俱臻詳備惟是防弊之法不患立法之不善而患行法之無人果能實力奉行不致日久生懈則懲一警百自可立挽頽風著有漕各省督撫漕運總督及沿河各督撫務當遵照奏定章程嚴飭各該糧道遇案卽辦有犯必懲並隨時查察押運員弁及地方文武催趲各員等倘敢仍前玩泄虛應故事不能認真查拏卽行指名嚴參



從重懲處不得稍存姑息致日久又成具文經此次  
諄諭之後各該督撫如再狃於積習不能從嚴從實  
講求整頓將來積久生玩該水手等再滋事端別經  
發覺惟該督等是問恐不能當此重咎也將此通諭  
知之欽此

陶文毅公全集卷八目錄

奏疏 海運

籌議海運摺子

請仿照唐代轉運之法沿淮沿河建倉附片

會同江督漕督籌議海運陸續應辦事宜摺子

會同江督奏交米委員不能到通緣由附片

敬陳海運圖說摺子

請收買沙船餘米附片

會同江督請將積年緩帶漕米留備民食摺子

請飭催沙船以速海運摺子

恭報海運全竣摺子

海運較河運所省甚多附片

海運默邀 神佑請加封號扁額摺子

覆奏接奉

御書扁額并

敕加 天后封號遵辦摺子

會同江督酌議新漕海運章程摺子

會同江督漕督議覆海運未盡事宜摺子

蘇省白糧請仍歸海運附片

奏疏 海運

籌議海運摺子

奏爲遵

旨籌議海運及暫收折色停運治河各情形分別可行  
不可行恭摺覆

奏仰祈

聖鑒事竊 臣於五月二十九日承准軍機大臣字寄道

光五年五月二十二日奉

上諭前據英和奏通籌漕河全局請暫雇海船以分滯  
運酌折額漕以資治河當降旨交魏元煜等悉心計

議尙未據該督等覆奏本日復據英和奏雇商分運及折漕治河各章程據稱雇商船海運應令兩江總督江蘇巡撫專委幹員先期剴切曉諭每官糧一石給運腳銀若干淨照漕斛兌交仍令該委員親身押運抵津時分出倉場侍郎一人並派戶部堂官一人赴津按官給執照米數漕斛兌收應給商船腳價銀兩由該委員具結承領漕標員弁酌撥河標差委津貼旂丁按照減歇之例辦理安插舵工水手人等援照江浙成案給與盤費歸籍當上海交代時由該督撫等先期咨照江南浙江山東提鎮會哨以資彈壓

明歲除豫東照常徵運外江浙漕糧或海運一百萬石或一百五十萬石其餘按照時價暫收折色以濟工需至改收折色酌照市價由該督撫奏定藩司出示曉諭不許科索其隨漕輕齎席木贈截等項亦應折徵併數彙解協濟工需等語治河所以利漕裕國尤當便民英和所奏係屬一時權宜之計朕周諮博訪擇善而從並不預存成見著各該督撫等查照英和原奏章程是否可行悉心妥速議奏毋得遷就游移致多窒礙務須計出萬全期於公事有濟或此外更有良法美意可以利漕濟運者並著該督撫各抒

所見據實奏聞不可徒以空言塞責也英和摺並著鈔給閱看將此由四百里各諭令知之欽此仰見我皇上厯念河漕勤劬宵旰屬在臣工孰不感凜交增況

臣  
渥蒙

簡畀調任江蘇爲錢糧最重之區當河漕棘手之際發蹤所由責無旁貸更何敢遷就游移致滋貽誤竊以爲漕米關繫

國家根本重計而治河卽所以治漕上年洪湖決口一瀉無餘其始祇因堵壩稍遲遂致諸事牽掣及今歲而借黃不足繼以開挑開挑不足繼以剝船

剝船不已繼以車運現在時日已迫而漕米之在淮南者尙有一百數十萬石勞勞半載竭蹶倍形然則變通之方奚可以不豫也查海運之法自元逮明行之有效止以閱時旣久章程難復協辦大學士臣英和前摺所陳四難之說言之甚詳然全漕由海運則不可而商船未嘗不可分載臣細閱英和條議誠識時之要著目前籌運之策無踰於此自屬可行惟現交秋令西北風多船行不便止可預爲布置以運新漕其章程一切則摺內所舉照斛兌交官給運脚及派委大員赴津兌收各條



均極周密臣甫莅蘇境與督漕諸臣尙未晤面倘  
條款猶有未盡自當隨時安商辦理以期行之有  
益至折漕一事向值歉歲偶一行之或山區米少  
離水次太遠之地意在便民爲

朝廷格外之恩今若徧行各屬則格礙甚多所難者尤  
在銀無所出蓋米爲民間所自有而銀則不能盡  
有惟待於穀米之糶售漕米改徵折色卽與地丁  
無異以江蘇一省言之額漕幾及二百萬倘以百  
萬徵米由海運而百萬折色約計應折銀二三百  
萬平時一百數十萬之地丁分爲上忙下忙官有

悔徵之處分民有抗糧之責罰猶且催徵不前積  
爲民欠矧於數月之內頓加逾倍之正銀勢必穀  
賤傷農有糶無售比戶需銀而銀不可得閭閻之  
氣騷矣況一省之漕或徵或折辦理參差尤多掣  
肘竊意漕米折色他省情形不一若江蘇則勢在  
難行至停運治河一勞永逸最爲上策惟在去冬  
洪湖初決時行之則甚易此時石工將竣蓄水漸  
深沙泥在底挑挖難施如微山湖則現在本能蓄  
水又未便涸洩其水以施挑挖也至於漕運渡黃  
喫緊惟在禦黃壩一處其餘工段均不與運道相

連不必停運而始能興工況京師萬方輻輳漕米而外需用甚多若停運一年將南方之貨物不至北方之棗豆難消物情殊多未便是折色與停運二者均有不可行也竊思來歲當以海河並運爲宜廣招商船分作兩次裝載計可運米百五六十萬石其餘俱由運河而行秋冬之間卽由河臣派員將運河挑挖深通俾資順利計來春湖水益增自可引導濟運不至如借黃之累矣大抵專辦海運則恐商船之不足專辦河運又恐清水之難恃惟有兩者相輔而行可期無誤且米運旣分則運

道舒而治河亦易於

天儲仍可擴充揆之有備無患之道更屬相宜所有  
臣  
遵

旨籌議河漕大概情形謹據實分別可行不可行恭摺  
覆

奏伏乞

皇上聖鑒訓示謹

奏

道光五年七月初九日承准

軍機大臣字寄道光五年六月二十九日奉

上諭陶澍奏籌議海運及暫收折色停運治河各情形  
據稱折色與停運二者均不可行來歲當以海河並  
運爲宜廣招商船分作兩次裝載計可運米百五六  
十萬石其餘仍由運河而行秋冬之間卽由河督派  
員將運河挑挖深通計來春湖水益增自可引導濟  
運等語太倉儲蓄本應陳陳相因停運之說原未可  
輕爲議及至漕糧改徵折色卽與丁地無異以江省  
額徵漕糧核計應拆之銀爲數甚鉅民間以米易銀  
遽難出糶必致穀賤傷農是折漕一節江省尤難施  
行此事竟無庸置議海運一事旣據該撫奏稱目前

籌運之策無踰於此與琦善意見相同著俟藩司賀長齡赴海口查勘情形籌畫到日卽將一切章程會同妥議具奏惟明歲海運漕米不過一百五六十萬石其餘漕糧亦應及早籌蓄清水仍由河運方爲盡善昨琦善所議將海運餘剩米石酌量變價存貯亦非萬全之策著與陶澍從長定議相機妥辦勿存成見總期於國計民生實有裨益用副委任其另片奏仿照唐代轉運之法於沿淮沿河一帶建置倉廩一節現在旣籌河海並運此事暫緩籌辦該督等總當先其所急也將此諭令知之欽此又於道光五年七

臣等奉旨欽此

月十五日奉到

硃批另有旨欽此

請仿照唐代轉運之法沿淮沿河建倉附片

再海運係暫時試行將來河道全通自應仍由河  
運萬一淺阻亦事所時有應請仿照唐代轉運之  
法於沿淮沿河一帶建置倉廩遇有阻滯暫爲存  
貯俟水足時或由剝船載運或由原船次年搭運  
即使存貯稍久而距京較近緩急究有可恃惟建  
倉之初所費頗多但以般運各策計之其所費差  
足相等而倉廩歷久尚在其利較長似亦轉漕之  
一法可以濟運道之窮緣奉

諭旨此外有可利漕濟運者各抒所見謹就

臣管見所



及附片具陳伏乞

訓示謹

奏

道光五年七月十五日奉到

硃批另有旨欽此

會同江督漕督籌議海運陸續應辦事宜摺子  
奏爲會籌海運陸續應辦各事宜請

旨遵行事竊照本年海運漕糧業經臣等將應委驗米  
交米道府各員並籌款協貼天津雇剝及通倉經  
紀人等飯食各項

奏奉

諭旨飭行欽遵在案現屆新漕啟徵商船陸續歸次一  
俟明年二三月間即可次第兌運開行所有海運  
陸續應辦各事宜謹列條款恭呈

御覽

一驗米應責成糧道會同蘇松太道監兌也查驗米爲漕運要務糧道有監兌專司應請卽派蘇松督糧道宋潢暫駐上海會同蘇松太道潘恭常逐細查驗兌交商船並封貯樣米隨船帶赴天津由交米委員稟送

欽派大臣在於沙船比對米色按冊交收但商船趁風開行先後不齊該糧道勢不能隨船前往應請無庸押運赴津以免顧此失彼

一赴津交米應分別委員前往也查蘇省漕糧旣多商船次第開行不便壓前等後該糧道旣須

驗米不能押運自應先派大員齎帶冊籍前赴天津經理交兌事宜查有前經

奏派會議海運章程之原任河南河北道鄒錫淳揀發道府慶玉李湘蒞堪以委赴天津辦理交米事宜又查有泰州知州王有慶蘇州府管糧通判清平堪以委赴天津幫辦交米事宜以上各員俱令各帶佐雜一員先由陸路赴津妥爲經理均俟漕糧全數到彼兌交剝船方准回蘇銷差

一交米委員應以到天津爲竣事無須再至通倉

臣查來年蘇屬漕糧由海運送事屬創行本不能與往歲軍船視同一例而經紀人等不能無弊必得從嚴約束使沙船無所畏累庶次運不致稽遲惟沙船僅能到津而止前此道光三年閩商所運臺灣米石俱於天津交卸並未逕送通倉此次業經臣等奏奉

諭旨屆期

欽派大臣在津驗收並由戶部議定章程奏請

敕下倉場侍郎督飭坐糧廳於經紀吏役內揀擇誠實之人派令辦剥奉

旨飭行在案是漕糧之純潔與否既經

欽派大臣在於天津水次驗明到通以後即可無庸覆  
驗應請將過剝事宜責成通倉各監督帶同各  
倉經紀人等一手經理押運赴通其江省交米  
委員一俟天津兌給剝船卽已交卸竣事無須  
再至通倉庶彼此均無推諉第剝船自津赴通  
盤量不無折耗則耗米在所必需兼查剝船向  
皆酌給飯米此次自亦未便短少查有例應給  
丁耗米十八萬餘石業經

奏請撥給商船十二萬餘石尙有節省耗米六萬餘

石除此項搭運節省耗米內亦應劃給商船耗米外實存米五萬九千六百餘石隨正起運赴津所有天津剝船盤耗飯米等項應請卽於此項節省耗米內酌量撥給仰懇

敕下倉場侍郎會同直隸督臣妥議辦理

一協貼天津通倉銀兩現由蘇省籌款解交也通倉派往天津之經紀人等飯食雜費及盤量身工各款臣等已於前摺聲明除將旂丁到通應領銀米等款撥抵外由蘇另籌津貼茲擬按照起運米數每石給銀四分措解銀六萬餘兩交

倉場衙門分別發給又天津雇剝不敷等項除  
應由直隸督臣

奏明動撥外尙有例不准銷各款甚多茲擬措解銀  
六萬餘兩交天津道庫俾資協貼以上二款現  
在委員先期解往其帶徵各米應俟確核儘徵  
數目計歸海運若干再行籌款協貼

一押運宜遴委武職大員也查商船自蘇赴津既  
有各省沿海水師會哨巡防足資護送前經臣  
等

奏明派委武職大員二人押坐商船赴津以資稽察



彈壓茲查有川沙營參將關天培堪以委押頭  
運船隻京口協副將湯攀龍堪以委押次運船  
隻惟洋面巡護旣已專責沿海水師該二員祇  
須酌帶隨從數人不必多派弁兵以節糜費

以上數條謹就臣等管見所及合詞具

奏伏乞

皇上聖鑒訓示謹

奏

道光五年十二月二十一日奉到

硃批另有旨欽此同日奉到道光五年十二月初五日

內閣奉

上諭琦善等奏會籌海運應辦各事宜一摺江蘇現漏  
新漕啟徵商船陸續歸次來年二三月間即可次第  
兌運開行著責成蘇松督糧道會同蘇松太道查驗  
米色兌交商船並封貯樣米隨船帶赴天津由交米  
委員送交欽派大臣比對米色按冊交收其到津以  
後遇剝事宜責成坐糧廳帶同經紀人等一手經理  
押運赴通所有江省交米委員在津將漕糧兌給剝  
船卽已交卸竣事無庸再至通倉以免推諉惟剝船  
自津赴通盤量不無折耗有例應給丁耗米十八萬

餘石業經奏准撥給商船十二萬餘石尙有節省耗米六萬餘石除此項搭運節省耗米內應劃給商船外實存米五萬九千六百餘石隨正起運赴津所有天津剝船盤耗飯米等項該督等請於此項節省耗米內酌量撥給著倉場侍郎會同直隸總督妥議辦理至直隸雇剝不敷等款著該督等查照戶部議覆直隸總督具奏銀數分別籌撥解赴直隸備用餘俱照所議辦理該部知道欽此

會同總督具奏江省交米委員不能到通緣由附  
片

再江省交米委員以到津爲竣事<sub>臣</sub>等已於正摺  
聲明其實在不能到通之故緣通倉經紀人等無  
論米色好醜概不免需索苛求由來已久其弊斷  
難盡除而其人數又復不少向來起運漕糧皆由  
旂丁按米領運分幫照料赴通每船正副二丁以  
蘇屬新漕一百五十萬石而計旂丁不下數千人  
皆係歷年出運熟悉情形是以辦理較易而所費  
頗屬不貲本年州縣津貼旂丁幫費一項前經<sub>臣</sub>

琦善附片具

奏撥作海運經費而各幫軍船又俱截留河北接運  
盤壩漕糧該丁等應在本船照料勢難分身押運  
卽酌爲抽派隨同沙船赴津而津貼之費亦無所  
出現在江省所派交米委員僅止數人其料理一  
切萬不能如衆旂丁之周密而直隸官員雖照料  
較易若經紀一涉需索則畏累之心亦與江省委  
員相似況已在

欽派大臣驗收米色之後亦無又任通倉經紀再驗之  
理臣等公同商酌已將經紀人等飯食雜費各款

除將應領銀米撥抵外另籌津貼銀兩解交倉場  
分別給發惟有仰懇

皇上天恩俯准查照部議由倉場衙門督飭經紀吏役  
人等派令辦剝則漕米到津一經

欽派大臣驗明在江省交米委員已屬竣事應請免其  
前至通倉庶交兌事宜各有責成而海運經費亦  
無短絀臣等因津貼幫費一項事涉陋規未便於  
正摺聲明謹將江省交米委員實在不能到通緣  
由合詞附片具陳伏乞

聖鑒謹

奏

道光五年十二月二十一日奉到

硃批另有旨欽此

敬陳海運圖說摺子

奏爲敬陳海運圖說仰祈

聖鑒事竊照蘇松常鎮太五府州額漕因運河阻滯改  
由上海沙船運赴天津現已辦有成局依次開行

臣伏思海運與河道原相表裏禹貢載揚州貢賦

沿海達淮冀州夾右碣石入海卽海運之始秦唐  
雖亦偶行其道難稽明則由膠萊內河轉般登州  
實爲勞費惟元代海運最久然至元十九年初次  
運米僅止四萬三千石明年始抵直沽行之六七  
年猶歲祇運米三四十萬不等旋因其路險惡另



開生道運米漸多蓋海船畏淺不畏深畏礁不畏風而畏淺尤甚於礁明人沿嶼求道非礁卽淺無怪其難自不若元代所開生道卽今沙船所行爲最善查元明入海之道或由瀏河轉廖角沙或由灌河口至鷹游門今俱壅塞惟吳淞口至十激一路爲宜而由此運米入海實勗自今年<sub>臣</sub>因初次試行卽須裝米一百五六十萬倍蓰從前不敢不倍加慎重每遇熟習海洋之人詳加詢問證以紀載得其徑道至於大洋浩瀚本無畔岸雖舟人定之以更香驗之以水色格之以鍼盤究難確指其

道里數目惟有就西岸對出之州縣汎地比照核計不相逕庭其小島微嶼亦難盡載謹摘敘大凡畧分段落并繪圖貼說恭呈

御覽

第一段海船自上海縣黃浦口岸東行五十里出吳淞口入洋繞行寶山縣之復寶沙迤至崇明縣之新開河計一百一十里又七十里至十澍是爲內洋十澍可泊船爲候風放洋之所崇明

縣地

第二段自十澍開行卽屬外洋東迤一百八十里

至佘山一名蛇山又名南槎山係荒礁上無居民不可泊但能寄碇爲東出大洋之標準蘇松鎮所轄

第三段自佘山駛入大洋向正北微偏東行至通州呂泗場對出之洋面約二百餘里水深十丈可寄碇從此以北入黑水大洋至大洋梢對出之洋面約一百四十餘里係狼山鎮右營所轄又北如阜縣對出之洋面起至黃沙洋港對出之洋面約二百六十餘里又北泰州對出之洋面起至黃家港對出之洋面約二百二十里係

狼由鎮掘港營所轄又北至鬪龍港對出之洋面約二百里又北至射陽湖對出之洋面約一百二十里係鹽城營所轄又北至黃河口對出之洋面約一百二十里係廟灣營所轄黃河口稍南有沙埂五條船行遇東風則慮淺閣宜避之又北至安東縣灌河口對出之洋面約九十里係佃湖營所轄又北至海州贛榆縣鷹游門對出之洋面約一百八十里係東海營所轄計自奈山大洋以北起至鷹游門對出之洋面止約計一千五六百里統歸狼山鎮汛地凡舟行

過奈山卽四顧汪洋無島嶼可依行船用羅盤  
格定方向轉鍼向北畧東行如東南風則鍼頭  
偏東一箇字如西南風則鍼用子午查江南奈  
山與山東鐵槎山南北遙對謂之南槎北槎行  
船應用子午正鍼因江境雲梯關迤東有大沙  
一道自西向東接漲甚遠暗伏海中恐東風過  
旺船行落西是以鍼頭必須偏東一箇字避過  
暗沙再換正鍼此沙徑東北積爲沙埂舟人呼  
爲沙頭山若船行過於偏東一直上北便見高  
麗諸山故將至大沙時仍須偏西始能對成山

一帶也

第四段行過鷹游門對出之洋面往北卽山東日照縣界山東水師南洋汛所轄又北至文登縣之鐵槎山一名北槎山自柰山至此始見島嶼又北至文登縣之馬頭嘴入東洋汛界經由蘇山島靖海衛及榮城縣之石島養魚池石島居民稠密可泊惟島門東南向春時乘風易入難出自鷹游門至石島約六百餘里大洋中雖舵工以鍼盤定方向猶須常用水托水托者以鉛爲墜用繩繫之探水取則也每五尺爲一托查

十激開船試水自十托至二十托上下行過奈山試水均在三十托上下順風二日餘均係黑水再試至十托上下即知船到大沙洋面行過大沙試水漸深至五十托上下視水綠色則係山東洋面順風再一日視水二十托上下水仍綠色遙望北槎及石島一帶山頭隱隱可見再行半日即至石島洋面此商船赴北一定鍼路也

第五段自石島至俚島洋面約一百六十里俚島至成山洋面約一百四十里俱榮城縣地爲南

北扼要之所可泊水綠色鉞盤仍用子午略偏  
東從成山轉頭改鉞向西略北入北洋汎界至  
文登縣之劉公島約一百餘里又西至威海衛  
一百餘里又西至福山縣之之罘島一百餘里  
又北至蓬萊縣廟島二百餘里以上自石島起  
至廟島止約共九百餘里之罘島西北一帶有  
暗礁船行偏東以避之又廟島之東有長山頭  
淺灘宜避試水在十五六托至二十托不等船  
至廟島以東南風爲大順計東省洋面共一百  
零五島中有二十五島最爲海道要地而廟島



尤大可以停泊

第六段自廟島過掖縣小石島卽入直隸天津海口約九百里鍼對大西偏北沿途試水在十四五托再試水至六托上下水黃色水底軟泥卽可拋錨候潮進口約計天津海口逆流挽纜一百八十里卽抵天津東關外

以上海運水程自吳淞口出十激東向大洋至朶山北向鐵槎山歷成山西轉之朶島稍北抵天津總計水程四千餘里伏查我

朝自康熙年間開海禁以來商船往還關東天津等

處習以爲常凡駕駛之技趨向之方靡不漸推漸  
準愈久愈精是海運雖屬試行海船實所習慣而  
春夏之時東南風多行走尤爲順利臣謹就見聞  
所及臚陳大概伏祈

皇上聖鑒謹

奏

道光六年二月二十一日奉到

硃批所奏均悉圖留覽欽此





海運圖

陶文選公全集

卷八 奏疏

三






明代嘗議開膠萊運河因疏濬難深重運未便不能行漕

轉成山正西至威海衛宜東二面風沿途島口多可寄旋煙台廟島之采尤便

石島北行至石島均可成泊至成山三面風龍地東島三西風



大沙古云萬里長沙自西至東橫亘甚長南北約寬五十里水深九丈行至沙南針用偏東過此五十里至沙北水深二十丈針用正北又行二百里水深二十餘丈係黑水洋面宜南三面風


五條沙 五條沙易于淺闊 舟行遇東風宜防

大沙東有沙頭山如舟行太東見此山則在北必見高麗諸山又須偏西方對成山


黑水大洋

沙頭山

鐵槎一名北槎與江南台山對謂之南槎北槎自余山至此約二千里始見海星







請收買沙船餘米附片

再蘇松常鎮太四府一州每年起運漕糧例給旂  
丁耗米一十八萬餘石原以備途中折耗之需前  
因海運較速無須與漕船一例全給當經臣等議  
除省出耗米六萬餘石卽隨正運赴津以爲到通  
剝船飯食等用外所有載米沙船每裝運白糧一  
石仍酌給船戶耗米一斗裝運糙米一石仍酌給  
耗米八升以備折耗之用查現在各州縣起運漕  
糧斛兌足數各沙船順風赴津卽有折耗爲數無  
多此項給船耗米將來兌交額糧之後應有餘剩

合計不下十萬餘石在該船等業已到津交卸所得餘米自須就地變價易貨臣思沙船赴津總以迅速回南趕裝二運爲務若餘米投行變糶輾轉議價收銀難免耽延時日自不若查照收買糧船餘米之例於沙船到津兌交額糧後將此項餘剩耗米就近官爲收買在各沙船得價易貨回檣可期迅速而漕糧正額之外又可增米十萬之多於倉儲運船均有裨益惟收買糧船餘米例價向有一定今沙船應得耗米如交兌正額並無短少原聽其自行食用變糶而沙船與糧船軍商各別較

收買糧船餘米之例稍有不同似應按照時價酌給以示體卹如蒙

俞允應請

敕下戶部並直隸總督會同倉場衙門一面查照天津

米價出示曉諭如沙船到津有願將耗米變價者

卽照市價就地給銀收買俾期迅速臣爲利漕起

見謹會同督臣合詞附驛具

奏伏乞

訓示遵行謹

奏

道光六年三月十二日奉到

硃批只可聽其自便難於勒令另有旨欽此旋准天津

收米大臣咨鈔道光六年三月初三日奉

上諭陶澍奏海船初運兌竣仍接續趕辦一摺本年初  
次試行海運據該撫奏截至二月二十一日止共兌  
過正耗米一百一十二萬二千餘石事機極爲順利  
惟海運米石除正耗漕白等米尙有給船耗米通計  
米數有一百六十三萬三千餘石各船不敷裝載不  
能不分兩次運送一過春夏之交南風司令北船回  
滬較難自應令初運沙船迅速回棹俾二運得資趕

辦本日據天津鎮總兵克什德奏報長洲縣第十三號船一隻於二十九日早潮引進天津海口日內諒已陸續前來穆彰阿等接奉此旨卽飭該鎮道等遇有海運抵津隨到隨剝不准片刻延滯並嚴飭坐糧廳稽查吏胥經紀人等如有刁難需索立即重懲毋稍姑息總令沙船卸米前往奉天買豆迅速回南以便趕辦二運又陶澍另片奏給船耗米將兌交額糧後應有餘剩合計不下十萬餘石請查照糧船餘米之例就近官爲收買等語向來南糧餘米俱准在通變賣惟例價向有一定沙船糧船軍商各別若官爲

收買轉啟勒指諸弊自應聽其自便著穆彰阿等查照天津時價出示曉諭如有願將耗米變價者卽聽該處民人照市價收買該商旣可藉以沾潤於該處市價民食亦有裨益將此各諭令知之欽此旋又據協辦大學士英和奏海運沙船到津餘米仍應官爲收買一摺道光六年三月十九日奉

旨海運現已陸續到津沙船餘米不下十萬餘石前經降旨照南糧餘米例聽天津民人照市價收買茲據英和奏沙船宜令速歸趕運二次米石恐該商等希圖賤價售買觀望不前請由部動用銀二十萬兩官

爲收買著順天府卽派委妥員赴部領銀分起解往  
天津暫存道庫并著穆彰阿等於正米收竣後卽傳  
諭江南委員如有船戶願賣餘米聽該處民人照市  
價收買倘該處不能銷售卽動項照市價官爲收買  
其價銀由江南委員轉發船戶毋得假手吏胥致啟  
勒指短發諸弊俾沙船得以早歸毋誤二次接運欽  
此





會同江督請將積年緩帶漕米留備民食摺子

奏爲蘇省徵存積年緩帶漕米擬留本省糶濟民食  
請

旨遵行事竊照蘇松常鎮太四府一州五年分新漕全  
歸海運尙有帶徵三年初二限及歷年災緩米石  
前因新舊並納民力拮据仰蒙

皇上天恩將長洲等州縣帶徵二限米石遞緩一年催  
徵其餘各年緩帶之米有早已徵存在倉及陸續  
徵收者伏查倉儲原應陳陳相因前奉

諭旨毋庸折色變價是以臣等於議覆海運章程摺內

聲請將緩帶米石隨同新漕一併搭運赴津在案  
惟查本年起運全漕米數本多此項緩帶米石間  
有徵存在倉已歷歲時者江南梅雨易蒸積久漸  
黯未能一律乾潔兼查蘇屬漕額甲於各省向來  
民間除納糧外本境之米每不敷本境之食全賴  
客米接濟本年上游江廣各省來米無多兼因剝  
運同時雇船甚衆米販益稀而本境自三年水災  
之後倉儲動缺民鮮蓋藏上年秋稼適又爲風霧  
所傷米質未能飽綻日下全漕起運民間存米無  
多現當青黃不接之際糧價漸增並恐此後尙有

騰貴據司道查明情形詳請核辦前來臣等仰體

皇上軫卹民艱慎重地方之至意不能不先事圖維因

思前項緩帶米石據各州縣具報徵存在倉計有

十五萬餘石現在陸續接徵均係應行搭運之款

而本年蘇松等屬除起運全漕一百五十餘萬石

外尙有節省耗米四五萬石經臣等

奏明作正交倉現又接奉

諭旨發帑收買沙船耗米以卹商情計亦不下十萬石

內外是全漕正額之外儘有贏餘而蘇省民食正

值艱貴之時若將前項帶徵緩漕米石留備本省

糶買卽以蘇省糶出之項抵補天津收買沙船耗  
米之價一轉移間於

太倉無損毫末而民食得以充裕裨益良非淺鮮合  
無仰懇

天恩俯准將蘇省海運應行搭解緩漕米石乘此青黃  
不接之時按照時價出糶以資民食如蒙

俞允臣等卽飭藩司將糶易銀兩刻期提解司庫報撥  
不許絲毫存留屬庫至米質存倉間有經歷霉天  
未能一律倘糶不足數應卽責成收貯之員照價  
賠補以符定例所有蘇省徵存緩漕請留備糶濟

民食緣由謹會同總漕臣陳中孚合詞具

奏伏乞

皇上訓示遵行謹

奏

道光六年五月初四日奉到

硃批另有旨欽此同日奉到道光六年四月十九日內

閣奉

上諭琦善等奏請將積年緩帶漕米留備民食一摺江蘇省各年緩帶米石前經該督等奏請隨同新漕一併搭運惟該省本年起運全漕米數甚多民間蓋藏

未裕現值青黃不接之際自應量加調劑以恤民艱  
著加恩將該省海運應行搭解緩漕米石卽飭藩司  
按照時價出糶俾民食有資所糶銀兩刻期提解司  
庫報撥如存米未能一律糶不足數卽責成收貯之  
員照價賠補該部知道欽此

請飭催沙船以速海運摺子

奏爲請

旨飭催沙船以速海運事竊照海運米石前經臣於會  
報初運摺內聲明接續辦理現計存留各屬及寄  
存上海棧房之米尙有三十餘萬石專待前船回  
棹方能全行起運現據押運川沙營參將關天培  
稟稱抵津沙船已有五百餘隻隨後各船亦跟接  
前進又據在津交米委員稟稱有程聚泰等十四  
船於交卸後情願不赴關東運豆卽放空回南候  
裝二運等語該船商等仰沐



皇仁感奮趨公逾常踴躍現在天津收米極爲迅速其餘各船卽令交兌後趕赴奉天裝豆計算程途亦不過四月底可回上海受載五月內卽可將未運米石掃數運北臣前在上海時歷詢耆舵僉稱海船行走全仗風色按照時令各有一定大約自南赴北總以四五月夏至前後南風司令最爲相宜六月上旬尙堪行駛及至六月中旬以後風暴靡常卽難行走一交七月西風更多商船失事多在此時以故大半停泊候至冬初乃開俗語謂之屯秋是五月正宜放洋未可遲誤爲海運第一關鍵

惟商船衆多其中爭先趨事者固不乏人而取巧  
自便者恐亦不免當此各船俱運官糧或冀乘間  
多攬客貨可以擡高脚價壟斷居奇因而到處逗  
遛且四月回南多係頂風折戣人力較勞稍存省  
力之心或竟安坐候風遲遲解纜兼沙船向係裝  
豆從未裝米少所試驗或慮夏月米有發變意存  
趨避亦未可定萬一借此支延卽恐錯過風汛別  
滋貽誤竊思蘇省漕糧歷係軍船裝運經時抵通  
照米交兌不因夏熱歇運沙船行走較速抵津不  
過旬日自可無虞霉變縱使海氣蒸黯亦不過浮

一面分寸間無礙食用比之錯過風汛乘危冒險得  
失懸殊况現屆梅雨沙船回次受兌已在米質發  
熱之後一經斛量吹晾更加堅實無庸以悶艙為  
慮且南北辨運一切員役人夫亦須及早竣事方  
可裁撤以節經費臣與督臣札商所見相同並據  
藩司賀長齡查明情形詳議前來相應請

旨敕下直隸總督奉天府尹轉飭所在地方官催飭沙  
船交卸漕米迅即裝貨回南趕裝二運俾得順趁  
風汛妥速蕝事實於漕務有裨謹會同督臣琦善

漕臣陳中孚合詞具

100 344 100

奏伏乞

皇上聖鑒謹

奏

道光六年五月初四日奉到

硃批另有旨欽此同日承准

軍機大臣字寄貴撫奏前事一件已奉寄信

諭旨交

欽差穆直督那將軍晉等迅速飭催矣

隋文帝家公白集  
卷八

三

2012.3.15.18.001

恭報海運全竣摺子

奏爲恭報海運漕糧全數兌開完竣船行順利仰祈  
聖鑒事竊照本年蘇屬辦理海運所有初運米石及二  
運絡繹開放情形節經臣等

奏報在案茲臣陶澍因商船回棹業有成數復自省  
馳抵上海督同委員等慎選米質尅期斛交各船  
踴躍逾恒爭先受兌總計蘇州松江常州鎮江太  
倉等四府一州額徵道光五年分起運漕白正耗  
米一百四十五萬一千三十一石零又節省歸倉  
候撥耗米五萬九千六百七十五石零又給船耗

米十二萬餘石通計裝載正耗各米共一百六十  
三萬三千餘石前後用沙船及浙江蛋船三不像  
船共一千五百六十二隻截至六月初五日止掃  
數斛交完竣伏念

國家河運已數百年暫因河務艱阻分由海運創始  
甚難人情觀望誠以

天庾重大向不航海舵工水手皆非官役可比既虞  
壓雇復懼難交畏縮弗前或相避匿其難一也河  
運弁丁數千各司其事沿途催趲層層照料尙不  
免風火沉失之虞今以新定章程責之素不相習

之委員保無疎損其難二也各州縣米赴上海多者八九萬少者二三萬同時雇剝船隻難數倘紛紛封捉卽爲行旅商民之病其難三也各州縣距黃浦水次或六七百里或一二百里遠近不齊旣恐停船待米守候需時又恐米到船稀無從寄頓況商行斛手無多盤量稍稍卽誤風汛其難四也海運用費初無成式籌畫稍疎更恐不肖官吏借端擾累易致刁民藉口其難五也商船赴津風利東南及至回帆又宜西北一往一來非祇旬期萬一停阻有妨二運其難六也以上數條辦理稍有



未慎易滋貽誤至於波濤之險更屬人所難防當  
此河道淺阻般剝維難臣等仰體

宵旰焦勞再四圖維舍海運別無良策是以上年六月  
到任之始卽經會議意見相同臣陶澍隨赴上海  
開誠曉諭招徠商船復經臣琦善

奏派藩司賀長齡前任降調河北道鄒錫淳續往添  
雇船隻會同各員詳議章程奏奉

諭旨允行臣琦善因河工緊要不克分身屢次函商務  
期周妥臣陶澍親駐督辦數月以來商情感奮民  
廩安堵自開兌以至蕞事諸極順利仰仗

聖主如天之福共效于來不日之成惟

宸謨早定於幾先俾海道咸歸於坦蕩臣陶澍現在親

詣海口督飭放行會同提臣王應鳳諄飭沿海水

師梭織巡防並派京口副將湯攀龍押尾前進連

日南風正利洋面波恬船行穩速約計六月下旬

即可全抵天津所有海運辦竣緣由臣等謹合詞

繕摺由驛馳

奏伏乞

皇上聖鑒再漕臣陳中孚押運北上未及會銜合併聲

明謹

奏

道光六年六月二十四日奉到

硃批另有旨欽此又於琦善因河工緊要不克分身屢

次函商務期周妥等句飭奉

硃批究係卿督飭有方可嘉之至欽此

海運較河運所省甚多附片

再本年海運由外籌款卽以向來辦漕雜費充用  
並未請

帑所有常年河運例應給丁漕項銀米除疊次撥解  
天津應用及調劑旂丁案內全支月糧外尙有節  
省銀十餘萬兩米十餘萬石現將節省給丁贈五  
等米

奏請糶變易銀解道其餘節省漕項並飭糧道查明  
徵存實數報部候撥又有節省耗米五萬餘石搭  
運赴津除撥給經紀耗米外尙剩米四萬餘石歸

倉是蘇省辦理海運不但絲毫未費

帑項且較常年河運所省之數甚多至商船搭載二成客貨仰蒙

恩旨准其免稅以示體卹現據委管海關道潘恭常稟稱約計海運商船所免稅銀不過一萬餘兩應在該關額徵稅銀項下劃除現飭該道逐細查明另冊咨部外合併附片陳明伏祈

聖鑒謹

奏

道光六年六月二十四日奉到

硃批所辦甚好欽此

司文及人... 奏疏

三

下三象の白身  
老ノ

三

海運默邀 神佑請加封號扁額摺子

奏爲海運默邀

神佑化險爲平恭懇

天恩賜加封號扁額仰祈

聖鑒事竊照海運自南赴北經歷重洋數千餘里茫無

畔岸偶值風濤人力難施臣前於沙船初次開行

時恭詣寶山縣海口地方致祭

風神

海神並因上海縣黃浦江岸建有

天后廟歷著靈應率屬虔誠齋禱祈保平安迨二月



二十五六七等日西北風暴大作勢甚猛烈三月初一十二三等日又起北風大暴其時初運之米一百數十萬石業已開行出洋臣亦回抵省城目擊陸地狂飈揚沙折木遙想海洋風浪彌覺寢食難安悚惕之餘載申默禱嗣據押運參將關天培稟報沙船一千餘隻正抵黑水大洋疊遭風暴各船齊下太平筐簞隨風漂淌歷數日數夜危急之頃若有

神助及至收日竟未損失一人逮先後駛抵天津上園水次查驗米石惟蔣永順吳裕隆徐茂順彭承

和周昇泰五船因風鬆艙拋去漕米十餘石數十石不等趙聯盛一船在廟島沉濕米六百餘石通共損失糧米八百餘石以到津米數計之不及千分之一其餘彭巨隆陳隆泰張元庚何恒新閻聚泰吳恒發袁慶發張茂利八船業因遭風斫斷大桅米石毫無漂失祇有錢元森一船尙未抵津所裝僅止四百餘石且春夏南風司令北回須用折餞本年夏令間有北風是以來去各船均皆穩速分風劈流不爽時日計自初運以逮告竣往返水程幾及萬里在船耆舵水手不下二三萬人現查

到津各船並未傷損一名尤爲向來未有之事良

由

聖明在上百靈効職嘉生翊

順利漕安瀾屬在臣民同深感凜伏查

天后之神在元代至元年間卽以護衛海漕加封致

祭載在元史我

朝靈貺宣昭疊蒙

敕賜封號本年海運化險爲平顯應尤著合無仰懇

皇上天恩

賜加封號以表

麻嘉其海口之

風神廟

海神廟並懇

御書扁額

頒發恭摹一體懸掛俾

靈佑長昭洋情允戴據辦運委員李景嶧許乃大等

具詳前來謹會同兩江總督

臣琦善合詞恭摺附

驛具

奏伏乞

皇上聖鑒謹

奏

道光六年六月二十四日奉到

硃批所奏甚是另有諭旨欽此同日奉到道光六年六月十七日內閣奉

上諭陶澍奏海運默邀

神佑請加封號扁額一摺所奏甚是本年試行海運該撫陶澍恭詣寶山縣海口致祭

風神

海神並詣上海縣黃浦江岸虔禱

天后廟沙船正抵黑水大洋疊遇風暴危急時若有

神助並未損失一人卽有遭風斷桅各船米石毫無  
漂失利漕安瀾覽奏實深欽感著發去大藏香十炷  
交陶澍祇領遣員詣各處

神廟敬謹祀謝

天后之神疊彰靈應我朝屢加封號本年海運化險  
爲平顯應尤著著禮部察例擬加封號候朕酌定以  
昭

靈貺海口

風神廟

海神廟並發去御書扁額交該撫敬謹懸掛以答

神麻欽此

覆奏接奉

御書扁額并

敕加 天后封號遵辦摺子

奏爲恭摺覆

奏仰祈

聖鑒事恭照本年海運默邀

神佑欽奉

御書

風神廟

海神廟扁額并大藏香十炷



頒發到臣遣員祀謝因黃浦江岸

天后之神顯應尤著

特敕禮臣議加封號旋准禮部咨開上海縣黃浦江岸  
天后之神請加封號於六月二十二日奉

硃筆圈出安瀾利運欽此即經臣恭錄轉行敬謹繕入

該處

天后神牌並恭摹

御書製扁遴遣護上海道署松江府知府李景嶧齋赴

海口

風神廟

海神廟敬謹懸掛並恭齋藏香詣各處

神廟虔誠祀謝以答

神庥而昭

聖貺所有接奉

諭旨敬謹遵辦緣由理合恭摺覆

奏伏乞

皇上聖鑒謹

奏

道光六年九月初八日奉到

硃批知道了欽此



會同總督酌議新漕海運章程摺子

奏爲酌擬新漕海運章程恭摺具

奏仰祈

聖鑒事竊照蘇州松江常州鎮江太倉四府一州道光

七年漕白二糧業經臣蔣攸銛會同河臣

奏請仍由海運欽奉

諭旨江蘇省來年新漕除江寧揚州淮安徐州通州海  
州等四府二州照舊各歸本幫兌收轉運外其蘇州  
松江常州鎮江太倉等四府一州仍雇用海船運赴  
天津一切海運事宜除成案可循外此內如須量爲

變通著通盤籌畫定議俟奏到時再降諭旨等因欽  
此當經恭錄轉行欽遵出示曉諭各船商受雇具攬  
并以來年必須春間一運完竣以免夏秋風汛靡  
常致有延誤節次咨明浙江撫臣示諭三不像船  
蛋船各商直隸督臣示諭天津船商一體前赴上  
海受雇並經咨會奉天府尹暨直隸山東督撫臣  
轉飭各關津口岸諭令江浙出口商船趕緊回南  
領運去後旋據各船行稟稱上屆各船商初次領  
運誠恐抵北交收或有羈累未免稍存畏難嗣蒙  
皇仁體恤優加無不倍深感激今聞仍由海運情願趕

辦船隻備用其糧米到津兌收事宜仍懇悉照上  
屆章程辦理等語當經批令該司道剴切曉諭衆  
商毋庸顧慮臣等核查上屆海運漕糧會蒙

欽派大臣在天津驗收凡有運米船隻到津隨到隨收  
毫無阻滯該船商等無不欣感今次海運仰懇  
聖恩屆期仍

欽派大臣驗收其到津兌收事宜悉請循照舊章辦理  
至蘇省經理各務間有應須參酌之處據各司道  
核議會詳請

奏前來臣等謹就所議悉心酌核分別條款敬陳

御覽

一沙船運送漕糧交代盤量難免折耗應照舊給予耗米也查上屆道光五年海運每漕米一石給耗米八升白糧一石給耗米一斗在於節省例給旂丁應得耗米內動給今次均請循照給發仍有節省給丁餘耗米石一併運津聽候撥用

一商船運米給發水腳等項仍由外籌給也查上屆商船運送糧米無論正耗給予水腳等銀今次應循照舊章由外籌給毋庸請動

帑項並請免其報銷

一天津通倉需用經雜各費應由蘇省籌款解交也查上屆通倉派往天津之經紀人等飯食雜費以及盤量身工各款除將旂丁到通應領銀米等款撥抵外其餘不敷由蘇省籌解分別給發此次天津通倉兩處需用經費已有定數仍應照舊籌撥分別解交濟用以節

帑藏再查上次海運議恤幫丁係將應支月糧全行給發今次自應照辦惟應否再行量加調劑之處俟將來體察丁力情形另行辦理



一驗米交米仍應專派大員經理也查上屆於上海總滙之地驗收兌裝除總局內派委幹員督率經理外另派丞倅二員於各州縣運米到次時隨同糧巡各道驗兌每船提出樣米裝貯木桶帶津比驗並派道府三員丞倅二員各帶佐雜一員由陸路赴津籌辦收米事宜今次仍應派員南北分辦並於驗兌米石時公同每船提出樣米一斗裝貯木桶粘貼印花卽交沙船帶津較驗一經兌交剝船卽與沙船無涉其天津交米道府大員及隨帶佐雜應俟臨時酌派所

有派往委員應請循照舊章以天津交米爲竣  
事毋庸再赴通倉庶得各歸專責

一 余山應派武職大員駐劄以資彈壓稽查也海  
氛久靖原可無虞而

正供涉歷重洋自宜倍加嚴肅應請於商船放洋之  
前先期令蘇松鎮總兵移駐崇明迤東之余山  
督率防護則聲勢旣得聯絡而船行更臻安速  
矣

一 海運漕糧宜飭沿海水師會哨巡防也上屆凡  
商船經歷洋面欽奉

諭旨飭令直隸山東督撫轉飭沿海水師提鎮各按汛地多撥哨船分派將弁兵丁巡防護送夜間於島嶼處所多掛號燈日間多豎號旗俾商船停泊守風不致迷於所往並經

奏派武職大員二人押坐商船赴津巡防甚爲周匝此次仍應照辦惟蘇省所委武職大員前次係分兩運是以派委二員今次擬以一運全完祇須專委武職大員一人酌派隨弁於米船放洋時押坐赴津仍於米船定期開行之前派弁先往天津照料

一海運漕糧如有短少霉變及鬆船等事應分別  
豁免賠補也查上屆沙船運米如在洋遭風到  
津時驗有砍桅鬆船及傷斃人口其短缺米石  
查照糧船失風之例

奏明免其賠繳並照例優恤倘並無事故而有短少  
霉變等弊卽令於備帶餘耗米內如數補足再  
有不敷勒令買補今次應卽照案辦理如有實  
係砍桅而並未鬆船於米石毫無短損者亦應  
酌量議恤以示區別

一商船獎敘宜酌量分別也查上屆海運商船運

米一萬石至五萬石以上均經

奏請獎敘其運米一萬石以下者在外賞給扁額原

屬鼓勵商人之至意但上屆事屬創始今擬量

加核實凡上次運米一萬石以上已沐

恩獎者此次須每萬石再加米五千石以次遞加准照

上次遞邀議敘若上次已加至五品職銜者准

其另給子姪如有新商攬運米石自一萬石以

上至五萬石者仍照舊章請獎一萬石以下者

仍在外給扁以昭限制

一商船不准攬帶客貨如有自帶零星土宜應查

明仍准免稅也查上屆海運各船准其帶貨二成由海關查明免稅放行關東裝豆回南仍照例輸稅惟沙船攬載客貨客商議給水脚其沿途關稅卽包納在內是稅銀本出於客商免稅獲利與船商無涉今次漕糧現擬一運完竣自應儘數裝米不准再帶客貨如船商自帶零星土宜核實查明不及一成者仍准其免稅以示體恤

一通倉席竹二項仍請折銀購辦也查通倉所需蘆席毛竹二項例由糧道動項給發幫丁買帶

交倉上屆海運因恐未能合用奏明由蘇省折銀解赴倉場衙門酌量購買今次請仍由舊章俟核定銀數解北購辦

一漕白糧米自津運至通倉宜加慎遮蓋查禁攪水并令各經紀親自押運到通交納以免霉變而專責成也查上次海運米石到津節准驗米大臣咨會米色乾潔奏明在案嗣聞到通之後閒有霉變不能久貯總因自津剝運日曝雨淋到通之後經紀人等又不免攪水偷漏之弊是以入倉不無霉變此次運米到津應請責成通

倉經紀人等於剝船多用蘆席遮蓋不使日曬  
雨淋並嚴禁攪水偷漏仍令各經紀親自押運  
到通交納以專責成而昭慎重

以上各條臣等往返商酌意見相同此外如尙有  
應行奏咨事宜容隨時陸續辦理謹合詞恭摺具  
奏是否有當伏乞

皇上聖鑒訓示謹

奏

道光七年九月初六日奉到

硃批另有旨欽此同日奉到道光七年八月十九日內



閣奉

上諭蔣攸銛等奏酌議新漕海運章程一摺前據蔣攸銛等奏稱來年漕務議請將蘇州松江常州鎮江太倉等四府一州新漕俱雇用海船運赴天津以免貽誤當經降旨准行茲據該督等查照上屆章程間有參酌之處分別條款具奏著照所議務須妥爲經理勿致臨時周章至海船運米到津屆期仍著軍機大臣奏請欽派大臣一二員前往查驗一切兌收事宜悉照舊章辦理欽此

會同江督漕督議覆海運未盡事宜摺子

奏爲遵

旨議覆海運未盡事宜仰祈

聖鑒事竊臣等承准軍機大臣字寄道光七年九月十

一日欽奉

上諭據穆彰阿奏海運章程八條朕詳加披閱如各州縣津貼旣從減省其徵收民間漕糧不得藉口增益應由江督等隨時參懲米數旣多雇用民船撥運胥役等難保無勒捐需索情事亦令江省按照市價計日給費嚴禁胥吏刁難尅扣此次雇募沙船水手人

等應由江省查明或於運腳內撥出若干或於到津收買餘米內每石劃出若干作爲水手賞項或諭該商等加給身工總令一律踴躍其兌米時按船全數給與耗米咨明直省將來天津收米時除有事故以耗米抵補無存查詢屬實外如商船耗米無故短少卽嚴追懲辦其緯夫應由江省按每米一石津貼緯費若干給與沙船自行雇募若土棍把持擡價訪拏嚴懲船到最多之時剝運不及酌分撥船載至北倉暫卸輪轉起運俟沙船全數起竣再將北倉暫貯之米陸續起運總令一律運通完竣方爲畢事民船旣

可少雇回費仍不多糜所有米石既於沙船起卸時  
由經紀等眼同斛兌剝船應由倉場侍郎轉飭坐糧  
廳責令經紀等承運承交如稍推諉卽行懲革其剝  
船運脚應由直督轉飭地方官全數核給水脚如有  
攙和盜賣潮溼短少官剝將船戶嚴懲民剝亦一併  
治罪仍令按數賠補沙船挽至上園起米完竣必須  
挖土壓載方能出口應由直督飭地方官預撥官地  
准挖若地棍把持嚴拏究辦所奏均屬可行著詳查  
妥議辦理穆彰阿摺並著鈔寄閱看欽此當經欽遵  
行據各司道會議詳覆前來臣等伏查上年蘇松

常鎮太倉四府一州漕糧試行海運仰荷

宸謨指示中外協心得以悉臻平穩茲因不得已復行  
海運曷敢謂成效已著稍存大意誠如

聖諭必須在南不致以津貼病官以徵賦擾民在北不  
致以刁難累商以剝運傷米庶於去弊存利之道  
有所裨益前經臣等將上屆章程有慮變通之處  
公同參酌開列條款具

奏在案尚書穆彰阿上屆曾蒙

欽派驗米大臣會同倉場侍郎經心調度船商人等同  
聲感激

皇恩故此次具覽受雇倍形踴躍今穆彰阿將身所涉  
歷確有見聞者揭要具陳所稱籌經費則爲民商  
留其有餘慎剝運則爲倉儲杜其流弊準情酌理  
纖悉咸周洵屬切中利弊之言足補前議章程所  
未逮<sub>臣</sub>等公同查核除原奏內海運米石到津後  
毋庸露囤以及剝船運脚毋庸預扣三成二款應  
由直隸督臣查辦外如各商船運米應給水脚等  
項及一切經費除天津通州兩處用款按照上屆  
章程應動漕項銀兩湊撥濟用外其餘在南用款  
若再全用漕項實多不敷且現挑吳淞江已預將

節省漕糧糶價動撥爲辦理農田水利之用則海  
運經費勢不能不仍由各州縣將向來辦漕貼費  
照舊支用然較之河運年分節省已多豈容浮取  
病民況蘇省徵收漕糧自上年

奏奉

諭旨嚴行整頓業已禁絕格外加收臣等仍當隨時查  
察如有不肖官吏借端浮勒定卽嚴懲參辦決不  
稍事姑容至州縣運米前赴上海雇用民間剝船  
本係按照市價計日給發毋許胥役人等封捉尅  
扣現復飭行司道出示嚴禁有犯必懲又商船承

運官糧在船戶得有水脚餘米已屬極優而水手人等雇價無多遠涉風濤亦應一體調劑臣陶澍業已飭行司道議覆俟上海設立總局後令委員傳諭各董事公同酌定章程由各船自行分給津貼俾船商與舵工水手兩情相安似可毋庸另行籌款官爲限制其船商得受耗米原以備盤量折耗及到津補償短缺之用自應嚴禁私行折價以杜短交應俟兌米時委員押令將耗米全數上船方准開行又商船到津由海口挽至上園需雇縴夫現經議定各州縣於上海兌米時每米一石隨



給船戶制錢四文作爲該船到津自行雇夫拉挽  
工價之用一面咨明直隸省嚴飭地方官禁止緯  
夫擡價把持自可無虞延誤至商船卸米後挖泥  
壓載<sub>臣</sub>等先已咨明直隸由官酌量買地立定界  
址准各商船在界內挖取以杜爭競其地價卽在  
解北經費內支銷今若飭令地方官預撥官地若  
千畝准令挖土無須購買自覺更爲便捷應由直  
隸省照議辦理所有漕白米石自津運通前議章  
程令經紀親押交納米色如有潮雜卽惟經紀是  
問惟聞上年運通漕米因蠹役需索間有攙水霉

變之事現經御史吳敬恒條奏奉

諭一併妥議查該經紀自津至通既需盤費或因人數不敷另雇親信幫夥代爲押運尤須貼給工食等項未便令其藉口滋弊應由倉場侍郎直隸總督就近查議或卽於隨正解津餘耗米石內酌量撥給若干俾辦公得資寬裕以上各條有<sub>臣</sub>等已經議奏者自宜復加詳核斟酌損益飭令實力奉行其未經議及者遵卽次第舉辦務期在南在北兩無窒礙以副

聖主利運惠民至意<sub>臣</sub>等往返酌議意見相同謹合詞

恭摺覆

奏伏乞

皇上聖鑒訓示謹

奏

道光七年十月二十九日奉到

硃批另有旨欽此同日奉到道光七年十月十七日內

閣奉

上諭蔣攸銛等奏遵旨議覆海運事宜一摺各商船運米應給水脚等項及一切經費除天津通州用款按照上屆章程應動漕項銀兩湊撥濟用外其在南經

費仍由各州縣將向來辦漕貼費照舊支用如有不肖官吏借端浮勒著卽嚴參懲辦毋稍姑容州縣運米前赴上海雇用民間剝船著按照市價計日給發毋許胥役人等封捉剋扣並著出示嚴禁有犯必懲其水手人等著各船自行分給津貼俾船商與舵工水手相安毋庸官爲限制其船商得受耗米原以備盤量折耗及到津補償短絀之用著嚴禁私行折價以杜短交兌米時務令將耗米全數上船方准開行其商船到津由海口挽至上園需雇絳夫現經該督等議定各州縣於兌米時每米一石給船戶制錢四

文作爲該船到津雇夫工價並著直隸嚴飭地方官  
禁止縴夫擡價把持毋許延誤其商船卸米空土壓  
載著直隸地方官預撥官地若干畝准令空土如有  
地棍把持情事立即嚴拏究辦其自津運通令經紀  
親押一節前已降旨仍由直隸派委員弁分撥押運  
實力巡查毋許經紀等訛索滋弊總期在南不致以  
津貼病官以徵收擾民在北不致以刁難累商以剝  
運傷米方爲妥善欽此

旋因河道漸通經兩江總督蔣  
奏明停止海運

蘇省白糧請仍歸海運附片

再臣等承准軍機大臣字寄欽奉

上諭據那彥成奏稱江蘇白糧一項米質鮮嫩海洋風信靡常若貯船時久恐易發變不若仍由河運較爲妥便等語此項白糧能否仍由河運著熟商妥議據實具奏等因欽此當卽欽遵飭據該司道會議詳請核

奏前來臣等伏思直隸督臣所奏白糧河運係爲慎重起見仰蒙

諭令熟商妥議自應詳加籌酌未敢稍有草率查蘇松

常鎮太四府一州漕糧既歸海運各州縣剝赴上海交兌應歸一例若將白糧改由河運又須於本境水次交兌幫丁恐難兼顧且蘇屬漕船來年均係停歇若將白糧船隻另行提出修造起運白糧道以至衛幫一切造費及行月苫蓋等項勾稽文冊支領銀款均須分別辦理而各州縣於漕白二糧一切文案亦須劃分事極繁碎又驗米爲糧道專責蘇松糧道必須親駐上海若白糧不親加查驗殊不足以昭鄭重如令專管白糧則一百五六十萬之全漕俱在上海該道又鞭長莫及雖米數

無多原可派令江淮各幫船灑帶然漕船均在長江及江北一帶停泊蘇松各州縣旣以剝船運送漕米南赴上海又剝送白糧北出大江彼時雨雪載途南北各數百里實恐照應難周轉致或有損傷再四籌維實多窒礙白糧爲

天庾正供倍宜慎重臣等亦知遠涉溟洋風色原難預

必惟春間北運究係東南風多米貯海船爲日不致過久卽或偶有阻延在河運之時亦所時有又非止海船獨形濡滯溯查上屆海運係儘先裝袋運至海口選擇堅固寬大沙船首先運送及早抵



津尙無霉變傷損之事明歲新漕本議一運完竣  
現在具攬船數足敷裝運所有白糧於來年二月  
內儘先兌開其時正值東南風當令揚帆北上可  
期迅速抵津不致在途耽擱卽可無須改由河運  
致多周折臣 訥爾經額職司漕運盤驗米色慎重  
收藏稽察督押河運本係專責未敢以海運事不  
涉手諉卸仔肩惟州縣兌米旣難分交糧道驗米  
又不克兼顧改由河運難免窒礙且江蘇現定章  
程白糧於來年二月內儘先兌開不致在船久貯  
則同歸海運似可無蒸變之虞臣 等往返籌商意

見相同所有蘇省白糧請仍歸海運緣由謹合詞

附片覆

奏伏乞

聖鑒謹

奏

道光七年十月二十九日奉到

硃批知道了欽此



陶文毅公全集卷九目錄

奏疏 災賑

陳奏湖南山田旱歉情形摺子

會同總督等議皖省各屬被水事宜摺子

撲捕蝗蝻淨盡附片

備陳災區利害請速堵減壩摺子

收養江北災民並籌議勸捐章程摺子

縷陳辦災積弊摺子

縷陳江蘇辦災章程摺子

體察賑務情形摺子

世に家之を在る  
久ナ

奏疏 災賑

陳奏湖南山田旱歉情形摺子

奏爲敬陳湖南山田旱歉情形請

旨飭查預防滋生事端事竊湖南一省半山半水濱湖

之田畏水不畏旱五六月卽可收穫近山之田一

旱輒槁七八月方收至於深山窮谷地氣較遲全

賴包穀諸芋雜糧爲生九月後方收地形既有高

低暘雨亦復異宜本年三月以後雨澤稀少雖有

得雨之處亦未能十分沾足惟濱臨洞庭湖一帶

隄垸及附近省城之長沙湘陰等縣夙稱卑溼俱

獲豐收其餘如澧州慈利桃源安化及寶永所屬  
皆不免花旱歉收而辰沅兩府爲甚辰州府屬之  
沅陵瀘谿沅州府屬之麻陽爲尤甚百姓以草木  
及神仙土充食斗米價錢五六百文不等此時甫  
屆收穫卽已如此將來冬春以後更不知若何昂  
貴伏思湖南山多田少刀耕火種之民終歲勤動  
雖遇有秋之年猶必借助於茶蓼薇蕨最稱艱苦  
濱湖之田遇豐歲尙可有餘但舟航四達般盤者  
多民無蓄聚閒有穀多之家則又貪圖厚價不肯  
零糶以致近處貧民挑負空囊奔走終日而不能

購買升斗有錢無糴年豐而啼飢者比比然也前此嘉慶六年省城一帶偶因荒歉卽有奸民喻次山等乘機劫搶聚衆幾於千百幸彼時卽行捕獲正法未至釀成事變餘如新化縣之蘇溪關益陽縣之桃花江等處每遇荒年多有無賴之民沿江阻守不許米船流通閒被搶奪此往事之可懲者也况辰沅所屬逼近苗疆民情浮動尤爲可慮卽臣所居之安化縣亦與辰州接壤嘉慶十二年五月間因值旱乾卽有放火搶物之事如小淹河曲龍塘洞底等處被燒之家甚衆報官不究致有



被燒至兩三次者居民相聚鳴鑼巡守此臣本籍  
見聞較切恐他縣類此者尙多或因山僻路遠民  
隱無由上達竊思我

皇上保赤誠求惟恐一夫不得其所卽如本年直隸之  
大興宛平春收不過二三分而地方官竟報八分

仰荷

訓飭查明在案此在

輦路所經尙有諱飾何況遠省若偏僻之處卽本省  
上司尙恐耳目難及非各州縣自發天良據實舉  
報先事綢繆則事變之來往往由小致大雖一隅

中之一隅安可不預爲防也應請

敕下該地方官速行出示凡有穀之家於零星糶買不得阻滯其據險遏糶如蘇溪關等處卽行拏辦俾穀米流通仍嚴禁盜賊有倡意劫搶者立卽懲治毋稍寬縱庶不致別生事端而旱歉之民復登衽席矣

臣

有察訪本籍之責旣有所聞理合據實具

奏伏祈

皇上聖明睿鑒謹

奏

嘉慶十九年九月十七日具奏本日奉

諭旨一道交湖南巡撫查辦

會同總督籌議皖省各屬被水事宜摺子

奏爲籌議安徽省各屬被水事宜恭摺覆

奏仰祈

聖鑒事竊照繁昌無爲等各州縣具報被水經臣陶澍

奏明親往查勘并兩次由驛覆

奏勘辦撫卹情形臣孫玉庭亦將皖省沿江州縣被

災各情形附片具

奏在案茲於七月初二日由驛奉到

上諭陶澍奏勘辦被水州縣情形一摺安徽銅陵無爲繁昌蕪湖當塗五州縣因本年雨水過多加以上游

江水漲發以致圩埠漫溢民田廬舍被淹經該撫親往履勘損傷人口無多業經飭令掩葬居民避居士埂亦經地方官搭蓋篷蓆散給饘餅窮黎食息有資惟戶鮮蓋藏殊堪憫惻著加恩將被水軍民一體給予撫卹一面飭令各州縣減價平糶俟水勢稍退卽設法疏消淨盡俾得補種秋禾倘一時不能疏消難資耕作卽據實奏請恩施其上游之懷寧桐城東流績溪均報被水著迅速遴員履勘望江潛山二縣並著加恩酌給撫卹至下游各處撫卹如有未敷卽由蕪湖關就近迅速放給再由司庫解還仍飭該管道

府認真查辦核實報銷其續報被水之宣城涇縣青陽貴池等處並著該撫親往挨查奏明辦理毋令一夫失所用副朕乘時布澤至意該部知道欽此又於七月初十日臣陶澍差弁齎回初次原摺一件欽奉

硃批悉心察看妥爲撫卹毋致一夫不獲通行勘明後再行據實奏聞欽此又夾片一件奉

硃批查勘明白一併覆奏欽此又於發銀四千兩星速分解旬旁奉

硃批甚好欽此仰見

聖主痾瘵在抱軫卹民依之至意跪讀之下欽感難名  
伏查本年五月內雨水較多近山各處蛟洪驟發  
濱江州縣圩隄冲破如安慶徽州寧國池州太平  
廬州所屬州縣多被水淹其間太湖宿松歙縣休  
寧黟縣婺源祁門績溪石埭建德旌德寧國太平  
舒城巢縣等處地勢較高間段被水隨即涸退補  
種齊全青陽雖有濱江之處爲地無多惟銅陵無  
爲繁昌蕪湖當塗宣城南陵望江懷寧東流桐城  
貴池等十二州縣被淹最重潛山涇縣水冲亦重  
均經辦理撫卹以濟極苦貧民臣等嚴飭印委各

員毋許稍有浮漏其續報被淹之和州廬江含山等處亦一律平糶倉糧各災民感沐

皇恩無不同聲歡頌惟沿山各處水久消退而濱江州縣因上游江廣諸水勢如建瓴迄今兩月消水不及三尺受淹田畝仍未涸出現交處暑無由補種

臣等察看情形委係災象已成秋收失望各災民家無蓋藏米糧漸貴平糶倉穀究有不敷且濱江各屬皆係徵解兵米之區短缺兵精所關匪細若由陸路各屬暫行借撥不特挽運爲難亦且費用甚鉅異日歸還殊多周折

臣等往返札商惟有採



買米石庶可以安待哺之民心平商販之市價而於兵精亦爲簡捷現據藩司徐承恩援照嘉慶十九年採買成案具詳前來擬卽於藩庫動項遴委幹員前赴四川湖廣江西等省探價購買米十萬石其價值如有不敷臣等一面咨明採買省分就近動借一俟運回到皖先約計災缺兵糧儘先提貯餘卽分運災區減價平糶其動用銀兩若干及將來如何歸還庫款統俟事竣後再行核實辦理一轉移間於民食兵糧均屬有濟實爲目前第一要務再各屬災分輕重須俟水退後方能定準而

蠲緩賑卹勢所必需且圩隄沖破民間多無力修  
築亟須借帑興修俾資保障凡此諸務自應將庫  
貯先爲籌畫茲現據藩司查明安徽藩庫貯存正  
項銀一百三十餘萬兩曾經咨部報撥臣等商酌  
以此項存款自應暫留備用擬卽咨明戶部免致  
撥協他省轉滋往返除俟各屬水退確查被災分  
數另行籲請

恩施外謹合詞將現籌被水事宜先行覆  
奏伏乞

皇上聖鑒訓示謹

奏

道光三年八月二十三日奉到

硃批另有旨欽此同日奉到道光三年八月初四日內

閣奉

上諭孫玉庭等奏籌議安徽省各屬被水事宜一摺本年安徽省濱江各州縣被水較重米價漸昂民食兵精攸關自應預爲籌備著照所請准其援照嘉慶十九年採買成案於安徽藩庫動項委員前赴四川湖廣江西等省採價購買米十萬石如價值不敷卽於採買省分就近動借一俟運回到皖先約計災缺兵

糧儘先提貯餘卽分運災區減價平糶其動用銀兩若干及將來如何歸還庫款統俟事竣後核實辦理至安徽藩庫貯存正項銀一百三十餘萬兩前曾咨部報撥該省將來辦理蠲緩賑卹及借帑興修圩隄諸務需項較多著戶部卽將此項存款暫留皖省備用無庸撥協他省該部知道欽此



撲捕蝗蝻淨盡附片

再皖北鳳潁一帶前因蝻孽間段萌生業將飭屬撲捕情形先後具

奏在案其懷遠鳳陽靈璧三縣交界之處早經捕盡續後靈璧縣接連江蘇睢寧縣之馬山湖內又有蝻生因湖水較深難於撲打經該署令黃光裕雇鴨四千餘隻連日唼食無遺惟宿州接壤徐州府屬之石相閔賢等處有飛蝗入境隨撲隨至臣在省城率屬徐承恩劉斯喟等於

敕建劉猛驅蝗神前虔誠叩禱一面飛飭該道帶同委員

徐湘王澄樊佩恩金鼇等馳赴督捕經廬鳳道戴  
聰率同宿州知州蘇元璐約集民夫三千餘人挨  
處撲打罄盡其時該州之灰古堆地方蝻子最多  
該州蘇元璐分帶民夫馳往但見青蛙無數食蝗  
全盡又有鳥雀數萬在懷遠西界啄蝗一日而盡  
叨荷

聖主福慈

神貺昭然彌深欽凜各鄉民夫咸加踴躍該州因蝗  
已淨盡遂帶同民夫撲入徐屬蕭縣界內不分畛  
域代爲撲捕現在該境官弁兩面合撲計日可淨

諒不致再有飛蝗闖入又蒙城縣之四堡村亳州  
之譚家集等處與阜陽鳳臺接界處所間有蝻子  
萌生均經地方各員隨時捐貲收買撲打無遺惟  
懷遠鳳陽靈璧三縣前此蝻孽初起時勢甚緊急  
經該道戴聰稟請就近於關務閒款內借銀二千  
兩分路收買并爲民夫掘坑撲捕之費事竣後已  
由該道暨府縣均勻賠補查各屬蝗蝻現俱淨盡  
並未損傷禾稼臣仍飭令該道巡歷各屬確切按  
查毋許稍留遺孽所有皖省蝗蝻撲捕淨盡緣由  
謹附片具



奏仰慰

宸廑謹

奏

道光四年八月十二日奉到

硃批知道了欽此同日奉到閏七月二十六日內閣奉  
上諭陶澍奏撲捕蝗蝻情形據稱在省城率屬虔禱於  
敕建劉猛驅蝗神廟並飛飭委員督捕時宿州等處蝻子  
最多該道督同州縣分帶民夫馳往一日全盡神貺  
昭然覽奏實深欽感朕親書扁額發交該撫敬謹摹  
泐製扁在省城

神廟懸掛以荅

靈佑欽此同日奉到

御書神參秉畀扁額

陽明先生全集卷之四十一

十一

備陳災區利害請速堵減壩摺子

奏爲備陳災區利害請

旨速堵減壩事竊本年淮揚被水成災減壩開後海州  
等處尤重其可慮有數端請言其大者百姓顆粒  
無收終年乏食可慮一也清水太洩明年恐難刷  
黃可慮二也減壩雖開祇能暫緩目前之急而高  
堰不堅終非了局可慮三也糧船雖回被災各屬  
米已蠲緩無漕可運旂丁水手謀食仍難可慮四  
也明年江浙漕船幫次在前自可挽渡但恐江廣  
船阻又須借黃則河身必又淤墊可慮五也海運

雖經試行可備後策而商船須隔年雇定若臨期  
猝辦則無船可雇可慮六也下河久淤水無去路  
亟須挑挖若視爲緩圖則歲歲偏災所傷實多可  
慮七也東南財賦之地元氣屢耗非三五年所能  
復原民旣困苦官亦賠累虧空由此而起

國用因之而絀可慮八也以上數端臣反復思維不

勝焦灼皆河務相因而至而數十萬無食之民尤  
關緊要淮揚一帶猶習見水患海州等處則水由  
決放能無怨咨兼其民情獷悍接近東豫梟匪出  
沒之所非大江南北可比昔宋臣蘇軾有言冒法

而爲盜則死畏法而不盜則飢飢斃之與棄市同  
是死亡而賒死之與忍飢禍有遲速此誠洞切利  
害之言伏維

皇上念切如傷凡有偏災無不

恩膏立沛蠲賑兼施動輒鉅萬

聖慈高厚淪浹人心惟

國家之

惠愛無已而經費有常以之養民自不若使民自養現  
在秋收已失冬麥難種若明年再誤春耕實屬力  
有難支應請

敕下督臣河臣副河臣趕於今冬挑河完竣卽速將王

營減壩尅期興堵務於明年正月內趁春水未生  
之前竣工使河流歸舊庶海州沭陽安東各境得  
於二月內涸出趕辦春耕俾資安輯至淮揚所屬  
各壩日內漸次堵築惟淹浸已深刻難涸復將來  
能否種麥俟查賑時察看情形設法安頓以奠災  
黎仰紓

宵旰再督臣河臣現辦河務盡心竭力無須臣越俎代

籌祇以地方緊要利害相因是以縷細具陳伏乞

皇上聖鑒

賜救施行謹

奏

道光六年十月二十五日奉到

硃批另有旨欽此並於可慮一也至可慮八也凡八句均奉

硃點冒死而爲盜則死六句均奉

硃圈以之養民不如使民自養句旁奉

硃批正論欽此同日承准

軍機大臣片寄貴撫具奏前事一摺已奉有寄信諭旨一道交琦善等速辦矣



附文卷之三身  
卷十

一

收養江北災民並籌議勸捐章程摺子

奏爲籌辦收養江北被水災民並勸捐情形仰祈

聖鑒事竊照江北淮揚各屬被水受淹疊奉

恩綸給予撫卹臣等仍率屬捐廉倡濟並將折價緩帶

餘漕分撥災區暫資減糶一俟水退即可確勘災

分籲請

聖恩給賑惟先期避水及驟被沖淹本籍不能存身者

甚多分赴沿江上下及就食南來經臣飭屬設法

資送附片奏

聞在案查自八月以後扶老攜幼散赴江寧蘇松常鎮

太倉等屬地方每處各有數百至數千不等此等  
民人流離顛沛餬口維艱若聽其沿門索食既恐  
擾累閭閻而積水未消卽資送亦無家可歸必須  
收留安頓俟水涸時遣令回籍臣與兩司暨道府  
首縣等籌議勸捐並酌定辦法通飭各屬一體收  
養謹將現辦章程敬爲

皇上陳之

一擇棲止以資安集也蘇屬人烟稠密空地無多  
若任災民四散游乞必致填塞衢巷有妨做業  
兼恐滋事查宋臣富弼在青州首以擘畫屋舍

安泊流民滕達道在鄆州城外爲蓆屋以次授地現已仿照其法飭令該地方官於城外多覓寬大廟宇搭篷設廠分別停住以免露宿亦俾散而不流安頓較易

一設籤冊以便稽查也災民旣衆莠良不齊弗容漫無稽查昔撫臣張伯行言流民養濟之法以十人內外立一排頭畫則分路求食夜則仍聚一處俾資約束立意最善現飭各廠責成首董按數查明各繫腰牌給竹籤一枝照驗出入仍照保甲之法每廠設立一冊登載戶名籍貫男

婦大小口數俟資送回籍時併冊移知原籍查辦賑務亦可藉相核對

一散給口糧以資養贍也或煮粥或散米或發錢地方情形互異各視所宜不能一例惟須各屬同時舉行以免羸集一處偏受人滿之患現飭各屬按照地方大小柴米價值災口人數酌量分派留養每日放錢放米或粥按牌給發將來回籍時卽按冊每名併給數日口糧以資路費有願早歸者隨時備文遞送

一分別男女以重廉恥也此次被淹旣重出外國

食多係良民婦女隨行拋頭露面情形可憫現  
飭查明凡有眷屬同行者聽在一處不得分置  
其有婦人攜帶孤幼無長男同行者卽另開居  
住不許混在男衆之內用昭區別

一施醫藥以拯疾病也民人被水遠來旣受潮溼  
沾濡又多不服水土易生疾病恐釀時疫現飭  
各廠選設醫生二名隨時給藥調治以重民命  
閒有病斃者卽日捐棺斂瘞毋許暴露

一施棉衣以禦寒冷也留養民人旣資餬口若禦  
寒無具仍難保全蘇屬好義紳士向多捐立善

堂施放棉衣現飭查明各該處如向有善堂者  
勸令預備施放由官酌量添補其未立善堂之  
處卽倡捐募給以免號寒日內各廠報有孕婦  
生育亦卽加給包纏衣物俾資乳養

一禁販賣以杜拐掠也向來偶遇飢荒轉徙民人  
每將攜帶子女價賣與人而奸販掠賣之弊卽  
出其中現飭各屬嚴禁販賣凡就食流民攜帶  
子女過多實難哺養者准其報明交入育嬰堂  
哺養毋許奸徒販賣致啟拐掠其自願與民人  
嫁娶並非販賣者應聽其便

設巡卡以防匪類也災民出死求生原無歹意  
有種棍徒倖災滋事倚恃人衆借端強索搶劫  
隨之法在必懲無可姑息查各處河路向有名  
爲倒撐船者裝載男婦往往晝乞夜偷卽豐歲  
亦所不免此時飢寒之下更恐鼠竊易生亟須  
防範現飭分段設立卡房支更防護務使匪徒  
斂迹就食災民更可相安無事

以上各條經臣核定飭屬實力奉行並將章程鈔  
發照辦間有情形不同之處亦聽其參酌而行不  
滋窒礙惟人數旣多時候又久所費不貲臣等捐



廉無幾全賴好義紳商共敦善舉查收養流民向  
無獎敘惟本年情形迥非昔比各屬紳士能於外  
境災民不存膜視較之本境捐輸救濟尤爲可嘉  
如有捐數較多者俟事竣查明彙請

旌獎一面出示曉諭以資激勸至現在各災區水勢漸

退俟上游各壩堵合田廬涸出該民人即可歸還

原籍自謀生業俾免流移所有<sub>臣</sub>籌辦收養災民

並勸捐緣由謹會同督<sub>臣</sub>琦善縷悉具陳仰慰

宸廑伏乞

皇上聖鑒謹

奏

道光六年十一月初二日奉到

硃批朕正深廛注覽奏精詳周妥朕心稍慰務要隨時  
妥行督辦勉副朕恫瘝在抱之意有應奏者據實奏  
請可也欽此



縷陳辦災積弊摺子

奏爲縷陳災務積弊及現在飭屬查辦情形仰祈  
聖鑒事竊照地方偶被偏災

恩施撫賑全在印委各官嚴絕弊竇俾

帑不虛糜人皆得濟本年淮揚徐海等府州被災較  
廣仰蒙

恩旨分別給賑目下正值分查戶口領銀散放之時尤  
須力除積弊就臣意計所及採訪所知大抵辦賑  
之弊凡有數端委員下鄉不知道路或不諳土語  
多藉隨行書役而書役每多與鄉保勾結互滋朦

混其弊一也委員夫轎及隨行書役所得飯食不敷或責之鄉保鄉保承應難支或更雇人幫辦則又添食用不免暗地取貲其弊二也各處村莊人稠勢衆委員一到往往捏增口數或縱令婦女喧噓要挾甚至攔舟圍轎故作攪混責懲難加理諭莫遣其弊三也或空屋無人村鄰代稱外出或攜挈婦孺子自稱遠道歸來紛紛求票卽恐係別保之人攙入難以猝辨其弊四也查賑之期不過半月兼旬其間有村莊遼隔或雨雪阻滯鄉保知其不能久稽故意引向遠處難處以促其期疲其力迨

時日迫促則未到之處仍祇憑鄉保所開給票其弊五也鄉保戶口偶錯地方刁棍因挾其短而訛索稍不遂意糾黨連控承辦者畏其拖累遂預留地步以浮冒爲彌縫之具其弊六也鄉保固多狡猾亦有愚民不諳例應賑否概求賑票鄉保駁斥輒被毆辱致有鄉保不敢跟查轉聽本境土棍開報者其弊七也或災本輕微鄉保土棍斂錢雇倩窮老劣衿連名求賑不准則奔控求勘印委各官懼以諱災取戾或蹈辦理不善之咎隨亦不能堅執其弊八也放賑時不於酌中之地設廠散給以

致道途遼遠老病婦女不能赴領或赴領而口數較少僅敷往返食用或不能赴領而託人兼領破其侵扣其弊九也地方爲富不仁之家乘災民窘迫先給賤值買其賑票一俟放賑卽持賑票雇人包領是暗削脂膏而災民不能言委員不及知其弊十也有此十弊是以辦賑甚難然所以除弊之法有四其一查賑之限宜寬寬則挨查之力舒而不至草率放賑之日宜分分則領賑之人少而不至擁擠其委員又宜假之以權一有阻撓滋擾解赴印官卽行懲處俾知嚴憚自不敢藐玩以滋事

其一委員攜帶書役及跟查之鄉保必須寬給工食使之有力當差如查竣一莊毫無弊混並應量加犒賞稍有弊竇立即重懲斥換俾賞罰分明自不致有勾結欺罔之事其一委員戶必親到口必親點點驗既確然後入冊給票每查竣一莊即將一莊內所有極次貧花名戶口及應領銀數開寫榜示粘貼莊前如有詭戶及舛錯之處許於數日內首告更正則其見共聞自無所施其捏冒之技其一多設賑廠各就四鄉災民之便老弱不難赴領雨雪不虞阻止自不致爲代領者侵扣亦不甘



以賤值而賣其賑票有是四端可除十弊然總以得人爲第一要義印委各員得人雖諸弊叢積不難掃除否則或先存染指或畏蕙無能本身已不可靠遑論其他前經臣與督臣率同藩臬道府及州廳以上各員捐廉共湊銀三萬餘兩分撥災區作爲辦賑委員及吏役人等食用不敷之費俾得安心查辦以清浮冒剋扣之源復將應需賑銀預解淮揚府庫俾各州縣於詳定數日時卽就近領銀無庸遠赴司庫以歸簡捷並疊札通飭各屬激發天良屏除積習拯救災黎現在體察情形尙知

奮勉間有一二未甚得力之員業經藩司張志緒親往周查立即撤換將來各員如果經理得宜自當遵

旨加以鼓勵倘或辦理玩忽仍卽隨時參辦地方刁劣希冀捏冒者現亦訪獲數人懲辦之後均知斂迹  
臣仍將應辦章程分行各屬務期

實惠均沾無濫無遺所有現在飭屬查辦賑務情形謹會同督臣琦善恭摺具

奏仰答

宸廑伏乞

皇上聖鑒謹

奏

道光六年十二月二十日奉到

硃批另有旨欽此同日奉到道光六年十二月初六日

內閣奉

上諭陶澍奏災務積弊及現在查辦情形一摺江蘇省  
淮揚徐海等府州被災較廣現值分查戶口領銀散  
放之時尤須力除積弊如該撫所奏書役與鄉保勾  
結朦混縱令婦女喧撓別保攙入求票刁棍訛索及  
買票雇人包領等十弊均係辦賑所必有該撫論除

弊之法四而要歸於得人自係正本清源之論現經該督撫等捐廉三萬餘兩分撥災區作爲辦賑委員吏役人等食用之需復將應需賑銀預解淮揚府庫俾各州縣就近支領辦理俱極周妥該員等如果經理得當自應加以鼓勵倘辦理不善或竟意存染指僅予撤回不足示儆卽著該撫摘尤參辦毋稍瞻徇其地方才生劣監希冀捏冒者亦著訪拏究懲欽此

附二ノ家ノ白身  
名ナ

三

縷陳江蘇辦災章程摺子

奏爲縷陳江蘇現辦災務情形以廣

皇仁仰祈

聖鑒事竊照本年夏秋間江淮湖河同時竝漲各屬多  
被水災疊奉

諭旨賞給撫卹碾穀平糶竝

恩允借動庫項採買米麥免稅通商接濟民食

軫念災區無微不至伏查臣等前次報災摺內欽奉

硃批有云悽慘景况不堪役想百姓何辜總由朕之不  
德所致欽此又於趕緊易換錢米隨查隨給句旁欽

奉

硃批所辦甚是務要趕緊拯救均沾實惠或可免委於  
溝壑也欽此臣等跪聆之下感凜交增比卽恭錄欽  
遵轉行知照宣播

皇仁聞者莫不感泣旬月以來人心貼定雖災不擾良  
者安命而莠者畏法斯皆

聖德之所彌布有以淪肌而浹髓也惟是本年災重且  
廣顆粒乏收哀鴻徧野博濟實難現在各處水勢  
雖已落至四五六尺不等尙未全行消退撫卹散  
畢之後須將災分勘定俟百姓田廬涸復始能查

明戶口散給大賑自秋徂冬爲日尙長自應設法  
接濟臣等體察情形於例賑之外酌擬章程十二  
條率屬籌辦仰答

宸廑謹陳於後

一倡率勸捐以調貧乏也查任卹之誼從古所重  
而勸分一節尤於荒政爲要本年水災旣重臣

等前已出示曉諭勸捐竝卽率同司道府州等  
查照道光六年成案各捐廉費爲倡現據江寧  
省城紳耆士商暨僑寓有力之家湊捐銀十餘  
萬兩鎮江府城聞亦捐至十萬以外其餘各屬



據報或捐銀或捐錢或捐施饘餅米穀或捐銀買米平糶至金盡爲止雖確數尙未彙齊大率皆能踴躍至鄉村僻遠之區勢難周徧卽以各村所捐之貲贍其本村其貧村不敷捐辦者以鄰近富村酌爲協濟每處公舉三兩人經理董管其捐項仍存於捐者之家官吏皆不經手卽鄉董亦第記其捐數與得錢人數爲之調撥使其自相授受施者見德受者感情庶安貧卽以保富而人心自貼矣

一資送流民以免羈留也查水勢初來汪洋一片

災民無可託足難免逃荒外出其中良莠不一如聚集太衆恐致滋生事端現飭隨處稽查予以資送先詢明本籍村莊令其回籍待賑如本籍無可棲止或別處有親故可依及年力壯強願往各處傭趁者現飭地方官酌給錢文派差押送下站收取回照下站亦照上站遞送總令隨到隨行分散其勢不使停留滋事俟田廬涸出仍資送回籍復業

一收養老病以免流徙也資送之法旣行強壯者自可分遣其中老弱殘疾出旣無力歸又無家

尤堪憐惻亦須分別留養卽以地方之大小酌量人數之多寡擇城外寬敞寺院與之棲止按日發給口糧不准進城滋擾其有男女同行者詢明實係一家准其同住餘悉別居不許混雜仍派員彈壓造冊稽查以憑水退時回籍領賑一勸收幼孩以免遺棄也貧民被災外出口食無資致將幼孩遺棄道旁歷經勸諭富民收養而有力之家多不敢收蓋恐日後仍被本生父母認還撫養徒勞兼虞詐擾夫襁褓待人爲活父母旣不能養而棄之其情已絕收而養之者卽

其父母也撫成之日或作子女或作養媳悉聽其便本生父母日後應不准認還其有好義之家收養棄兒仍情願送還本生父母者地方官倍予嘉獎務俾幼孩多得生路

一勸諭業戶以養佃農也查業戶出產給佃承租佃戶亦藉資食力比之平人較爲親切此時業戶雖亦遭災究屬有力居多現飭勸諭富厚業戶酌借窮佃錢米以度荒歉俟至豐歲償還但不得倚災強借如有陵犯仍按例嚴行懲治其力量無多難以分潤者亦不必強如有能收養

多人或所貸數多而不責償者由地方官酌予獎勵使業佃以恩義相結亦可感召祥和

一殮瘞屍棺以免暴露也查驟漲之下水勢衝急多有棺柩被水漂流且有淹斃屍骸隨流漂洶者現飭沿江各縣及救生等局雇夫撈殮厝其棺柩俟水退有人認實給還如係無主屍棺卽買地厝葬作爲義塚其有好善之人情願捐辦者按其殮瘞多寡分別獎勵

一多設糶廠以平市價也現值市糧昂貴之時除碾動常平倉穀照例減價平糶外前經

奏明籌項卽委員分赴鄰省陸續採買米麥已於河  
南省買得麥三萬石米一萬五千石現飭分撥  
災重各州縣設廠平糶查明實係貧戶酌定升  
斗給票准買以杜市僧影射漁利仍俟採買事  
竣核數歸款竝分勸積穀之家隨力平糶各濟  
本村出糶之戶旣多則市價可期日減矣

一變通煮賑以資熟食也查從來救荒每多煮粥  
然粥廠需費較重今擬兼用糊麪以濟不足一  
廠之中多設鍋竈天明舉火燒水令沸先將白  
麪調以涼水俟湯沸入麪於鍋隨入隨澆卽已

調熟隨煮隨給不稍停留此鍋甫罄而彼鍋又熟矣事省費輕亦以備隆冬煮賑之一法

一捐給絮襖以禦冬寒也災民衣褐不完冬月尤爲難度欲給棉衣自須有面有裏工料不能甚省恐人多而費不敷且窮民得之易於當賣查有一種棉花彈成絮襖兩面用線經網不費布疋亦可禦冬其價旣廉鬻之無利今擬隨捐項之多寡酌量製辦於散賑時見有老病極寒者加給一件亦可免於受凍至典鋪本有年冬讓利之條擬卽飭諭典商凡在今冬贖取棉襖布

衣者讓利一半似於損富有限而濟貧實多

一勸施子種以備種植也查樹藝皆足養人是以  
穀不熟曰饑菜不熟曰饑凡卉蔬可食之物種  
類何止千百惟生植必視土所宜如瓢菜產自  
江寧而蘇揚卽少油菜蔓於沙地而山區卽瘠  
小民謀生路熟隨宜布種一俟水勢稍落凡可  
種之地與可食之物皆不待勸而能但恐災民  
倉猝轉徙所存子種無多此時貲本旣竭購備  
維艱應卽通飭勸諭有能施給子種者或穀或  
菜其功同於錢米均可廣布以蕃種植而資速



濟

一禁止燒鍋以裕穀食也查耗穀之具莫如麴蘖  
祇以小民賣酒營趁亦是謀生一端而江省水  
陸交衝貿遷來往一經出示禁酒徒爲胥役訛  
詐之資勢難全禁惟此時災歉已甚粒食維艱  
豈容更滋暴殄除酒自外省載來仍許買賣流  
通及秫糯無多准釀外其本地燒鍋做坊傷損  
食穀最多實爲荒年之害所有稷稻一項應行  
禁止熬燒以裕饑餐

收牧牛隻以備春耕也貧民遇災口食尙且難

顧雖有耕牛無力喂養往往鬻於私宰之人得錢過度目前既嗟殄物日後又嘆輟耕深堪憫惜今擬於捐項中酌提經費設局收養凡貧民以耕牛赴質者量給當錢暫爲收養仍給以當票竝鋸下角尖俾其收執以俟贖時比對此係道光三年蘇省行之有效者現在亦擬照辦庶愛物卽所以仁民矣

以上十二條經<sub>臣</sub>等與藩司林則徐梁章鉅巡道葆謙等等商核定飭屬舉行竝將章程鈔發照辦間有情形不同之處亦聽其參酌而行冀無窒礙

刻下各屬均在勸捐果能多多益善則經費得以  
有資全活自必不少將來事竣容<sub>臣</sub>等敷明捐數  
分別

奏請獎勵仍隨時督率妥辦總期人皆得濟費不虛  
糜以仰副

聖主懷保惠鮮之至意所有<sub>臣</sub>等籌辦災務情形謹縷  
晰具

奏伏乞

皇上聖鑒謹

奏

道光十一年九月二十二日奉到

硃批所奏十二條大旨俱已詳備覽奏朕心稍慰務須  
實力實心詳慎擇人辦理被災百姓苟能免溝壑之  
患汝等可謂盡心盡職亦稍贖朕之闕失矣勉益加  
勉欽此

註明應給銀錢數目卽飭所委城鄉紳士分領張貼令民共知共見又州縣於藩庫領賑時每有因應解之項未解藩司卽在正項內先爲扣抵令該州縣將應解之項備銀施放該州縣無非尅扣賑銀刪減戶口以爲彌縫侵蝕地步縱有能備銀足款者亦不過那此虧彼請飭下各該撫等行知藩司於州縣領解之項另行催追至賑卹帑銀務須按數實發不得任意扣抵又里保書吏視辦賑爲利藪給票則有票錢造冊則有冊費災民無力出錢卽刪減戶口任意請張查辦理賑務一切文移冊籍及支棚搭廠馱運錢

米等費俱係官爲給發豈得任聽胥役向災民勒索此等弊端務須責成卽委各官嚴行禁束加意密察一有見聞立卽嚴拏懲辦仍令該管府道不時輕騎減從隨時查察如州縣有故縱一切等情卽據實嚴參等語本年江蘇等省均有水災該御史所奏賑務積弊實難保其必無著各該督撫各於所屬體察情形將所奏各條查明是否可行酌量辦理將此各諭令知之欽此遵查散放災賑原以戶口爲憑戶口紛繁必須遴委多員協同該管州縣認真確查方能妥速<sub>臣</sub>等現已參考成案採訪輿情督同司道等

註明應給銀錢數目卽飭所委城鄉紳士分領張貼令民共知共見又州縣於藩庫領賑時每有因應解之項未解藩司卽在正項內先爲扣抵令該州縣將應解之項備銀施放該州縣無非尅扣賑銀刪減戶口以爲彌縫侵蝕地步縱有能備銀足款者亦不過那此虧彼請飭下各該撫等行知藩司於州縣領解之項另行催追至賑卹帑銀務須按數實發不得任意扣抵又里保書吏視辦賑爲利藪給票則有票錢造冊則有冊費災民無力出錢卽刪減戶口任意譎張查辦理賑務一切文移冊籍及支棚搭廠馱運錢

米等費俱係官爲給發豈得任聽胥役向災民勒索此等弊端務須責成卽委各官嚴行禁束加意密察一有見聞立即嚴拏懲辦仍令該管府道不時輕騎減從隨時查察如州縣有故縱一切等情卽據實嚴參等語本年江蘇等省均有水災該御史所奏賑務積弊實難保其必無著各該督撫各於所屬體察情形將所奏各條查明是否可行酌量辦理將此各諭令知之欽此遵查散放災賑原以戶口爲憑戶口紛繁必須遴委多員協同該管州縣認真確查方能妥速臣等現已參考成案採訪輿情督同司道等



任其勞怨而不爲衆推之紳士或轉欲干預賑務以自遂其私則訐控且從此而起臣等悉心籌酌大賑與捐賑有別捐賑出自鄉鄰易於見惠故紳士樂於從事大賑則事體繁重責任較嚴似只可循照舊章量爲變通如果紳士中有品行素端而又肯急公任事者卽由各州縣邀令幫同委員詳細確查如不得其人卽無庸濫取充數以杜流弊而免格礙又該御史奏稱州縣於藩庫領賑時藩司務須按數實發不得扣抵該州縣應解之項一節遵查此次災務臣等早經諭令藩司將賑銀按

數實發復經該藩司稟稱辦災之州縣赴省領銀  
恐被司書索取使費擬將發給賑銀委員逕解州  
縣或發府州轉給該司發銀時必親身查看按庫  
平庫色兌足封貼印花如解到州縣驗有絲毫短  
少銀色低潮許承領之員稟請根究另行兌換給  
發司書如有索取釐頭者立即指稟以憑嚴究等  
因劄行各府州縣遵照在案是該藩司於賑卹銀  
兩辦理甚屬認真斷不至有扣抵別項之事至里  
保書吏視辦賑爲利藪往往互相勾結於委員一  
到時捏報詭戶多開饑口按籍有名覈實無人委

任其勞怨而不爲衆推之紳士或轉欲干預賑務以自遂其私則訐控且從此而起臣等悉心籌酌大賑與捐賑有別捐賑出自鄉鄰易於見惠故紳士樂於從事大賑則事體繁重責任較嚴似只可循照舊章量爲變通如果紳士中有品行素端而又肯急公任事者卽由各州縣邀令幫同委員詳細確查如不得其人卽無庸濫取充數以杜流弊而免格礙又該御史奏稱州縣於藩庫領賑時藩司務須按數實發不得扣抵該州縣應解之項一節遵查此次災務臣等早經諭令藩司將賑銀按

數實發復經該藩司稟稱辦災之州縣赴省領銀  
恐被司書索取使費擬將發給賑銀委員逕解州  
縣或發府州轉給該司發銀時必親身查看按庫  
平庫色兌足封貼印花如解到州縣驗有絲毫短  
少銀色低潮許承領之員稟請根究另行兌換給  
發司書如有索取釐頭者立即指稟以憑嚴究等  
因劄行各府州縣遵照在案是該藩司於賑卹銀  
兩辦理甚屬認真斷不至有扣抵別項之事至里  
保書吏視辦賑爲利藪往往互相勾結於委員一  
到時捏報說戶多開饑口按籍有名覈實無人委

員受其朦混則賑銀入其私橐倘被委員看出破綻必欲詳查則又勾出土豪地棍號召愚民暗使婦女成羣結隊攔舟圍轎使其不能細查而後已且委員夫轎船隻及隨行書役所有例銷盤費不敷或責令里保供應則里保之暗地取資有所藉口而委員亦竟無可如何更有劣衿刁民窺見吏胥侵蝕亦遂從中挾制或於木戶之下多開數戶或將外出之戶頂名冒領種種弊竇不止票費冊費已也欲除其弊必清其源臣等現在督飭藩司選擇結實可靠之員委令承辦其跟查之書役里

保一體厚給工食使之有力當差不得藉詞賠墊  
致開需索地步而又寬其查賑之限使山僻寫遠  
村莊皆得陸續挨查不至迫於時日致滋草率遺  
漏如吏胥中有增減戶口需索票冊各費及村民  
中有爭論極次阻撓滋擾者委員解赴印官衙門  
立即責懲枷示俾皆知所嚴憚不敢相率效尤致  
滋冒濫臣等仍一面另委妥員隨時密查一面通  
飭各屬徼發天良將一切積弊概行革除務期  
帑不虛糜民沾實惠以副我

皇上軫念災區之至意所有臣等體察地方情形及現

在辦理緣由理合恭摺具

奏伏乞

皇上聖鑒謹

奏

道光十一年十月二十九日奉到

硃批覽奏均悉實力妥辦欽此又於自好之紳士或不肯出而任其勞怨而不爲衆推之紳士或轉欲干預以自遂其私等句旁奉

硃批甚是又於紳士如不得其人卽無庸濫取充數以杜流弊而免格礙等句旁奉

殊批是欽此

同日及八日

奏疏

三



陸一ノ素ニ白身ノ名ナ

三ノ

陶文毅公全集卷十目錄

奏疏 沙洲

請將新漲沙洲歸公杜訟摺子

酌辦沙洲歸公章程摺子

覆奏江蘇尙無阻礙水道沙洲摺子

中  
一  
身  
之  
三  
生  
一  
身  
一

奏疏 沙洲

請將新漲沙洲歸公杜訟摺子

奏爲遵

旨確查新漲沙洲酌議入官充公以杜爭競恭摺覆

奏仰祈

聖鑒事竊 臣承准軍機大臣字寄欽奉

上諭御史蔣泰階奏通州崇明一帶沙地偶然漲出多  
爲土豪霸占近因爭地釀釁訟案紛起請飭各州縣  
勘明此等沙灘無庸紛紛查辦等語此項沙地坍塌漲  
靡常沙棍乘機霸占恃強逞兇屢釀巨案最爲該省

惠習著陶澍體察該處情形應如何息爭杜訟之處  
據實奏聞欽此當卽恭錄轉行查議並因沿江沿海  
各屬皆有沙洲自應通查明確一併

奏辦又經專札飭查去後茲據各屬陸續覆齊由江  
寧蘇州兩藩司具詳前來臣查江南沙洲地畝價

少課輕獲利甚厚是以一沙初漲羣起相爭每釀  
械鬪巨案前於嘉慶十七年間經前督臣百齡等

奏准將坍塌之地不願豁除者報案留糧遇有新漲  
子母相連准其按數撥補如係江心突漲概行由  
官召變分別繳價先後以定准駁本爲杜爭起見

乃法之所在弊卽叢生臣詳加體察現惟崇明一縣有沙無田歲徵沙課向有常額漲旣不陞坍亦不豁統歸三年大丈於原額課內攤增攤減由來已久祇須於屆丈之年從公攤撥尙不難於杜覈外其餘有洲各屬則皆積慣沙棍恃有留糧待補或因該洲將漲卽先捏報被坍預爲冒陞地步或向被坍之戶私買坍糧爲爭訟地步一遇新漲沙洲卽糾誘散戶以得地均分斂錢興訟非以甲地之相連捏爲乙地之接漲卽以此號之舊額指爲彼號之復生分投具呈各報各案其無可影射者

則又以突漲爭買沙未出水卽已望影報陞百計  
請張紛岐錯出甚至恃強爭鬪動輒傷斃多人積  
釁成讐愈難解釋而棍蠹慾壑無窮猶且多方唆  
弄或抗不具結或已結復翻或捏情京控案一日  
不能結彼仍獲一日斂錢之利而小民貲本已空  
欲罷不能未獲沙地之利轉受沙地之累此則沙  
棍爲害而自留糧待撥又因法致弊之實在情形  
也竊思截流必先清源源之不清雖力截其流而  
不止民之趨利如水就下而狡黠沙棍則更變幻  
多端卽再別設科條恐一法立而一弊又生仍屬

有名無實伏查丹徒縣之樂生洲自入官收租作  
爲歲挑徒陽運河之費迄今數十年官佃相安此  
外沿江沿海控爭沙地一經歸公訟端卽息推原  
其故地旣歸公豪強無可覬覦而窮民奉官承種  
無所用其機謀卽亦不爲洲棍所惑則欲求永息  
爭端莫如遇有新洲漲生一概歸公爲善若謂自  
然之利應以利民則今之沙洲不但窮苦編氓斷  
不能得卽稍有力之善良一被勾誘輒至傾家若  
復因奪而鬪身命且多不保是徒有利於棍蠹而  
實無益於良民則以之充公正所以息爭安良且



洲仍民佃並非與民爭利而受佃於官與受佃於  
豪強其租息之輕重亦殊於窮苦編氓更爲得濟  
況地方遇有例外應辦之事恒以費無所出每致  
束手大江南北地廣政繁應辦事宜更復不少舉  
其大者言之夫東南爲財賦所出全賴水利爲功  
現在各屬河道湮塞旱澇無備一遇災歉公私傷  
損上年雖將吳淞江

奏請疏濬而瀏河白茆孟瀆諸鉅流尙以經費難籌  
致稽挑辦卽徒陽運河亦多賠累如練湖等處卽  
未能修治若淮揚所屬河道固應河工鹽務修理

間亦有須地方籌辦者徐海兩屬並有東省豫省  
下注之水一遇雨澤稍多輒成澇歉實屬目前至  
急之務

國家經費有常既未便頻頻請

帑若責之州縣又力有難能任其湮廢則民困而賦  
稅亦無所出今幸有此自然漲出之沙地如以之  
撥充公用作爲水利津貼縱不能大舉一修亦可  
以擇要辦理逐漸成功既無損於

國計實有利於民生堪以一舉兩得臣悉心酌議應  
請將崇明一縣仍循其舊外其餘各屬嗣後凡有

坍沒沙洲均令地方官隨時勘明實在被坍頃畝  
卽將課賦詳咨豁除不准留糧待撥如有新漲洲  
地無論子母相生江心突漲一概歸公責成洲總  
隨時呈報由官勘明按則詳定課賦其洲地卽召  
佃承種歲收租息按數批解藩庫除扣完課賦外  
餘爲地方水利之用遇有應辦由藩司確勘地方  
緩急情形詳明酌放辦理至民間買洲例應繳價  
泥草等灘每畝價止一二錢卽高阜堪以圍田之  
洲價亦不過二兩爲數甚微今旣入官若令佃戶  
繳錢作價或又視同已業設有承種不妥礙難退

佃竊以地既歸公卽屬官產應請免繳例價而租  
既留充公用地仍完納

國課所益尤多如蒙

俞允現在許訟未結各案卽照此一例歸公無庸紛紛  
查辦所有從前報坍留糧待撥已經咨准部覆尙  
未撥補之案各業戶既經賠課有年仍飭各屬俟  
有新漲洲地果係原坍處所相連俟出水後照案  
詳請撥補以示格外體卹倘有狡執卽將洲地歸  
公所賠之課照數發還由洲地租內分年取息彌  
補俾免轆轤至此項新漲歸公洲地其頃畝陞坍



酌辦沙洲歸公章程摺子

奏爲新漲沙洲歸公酌議辦理章程仰祈

聖鑒事竊照江蘇省沿江沿海沙地坍塌漲靡常每因爭

占釀釁訟鬪紛起最爲惡習欽奉

諭旨查辦經臣體察情形據實覆

奏請將此項新漲沙洲召佃收租撥充公用作爲地

方水利津貼接准部覆嗣後遇有接漲突漲沙地

卽飭查勘入官隨時定課議租專案各部如有轉

則陞科之處亦令照例隨時勘辦查報統於大丈

案內彙題應納課銀歸入奏銷造報此項租息旣

陽明家ノムネニ集  
卷一

一

酌辦沙洲歸公章程摺子

奏爲新漲沙洲歸公酌議辦理章程仰祈

聖鑒事竊照江蘇省沿江沿海沙地坍塌漲靡常每因爭  
占釀費訟鬪紛起最爲惡習欽奉

諭旨查辦經臣體察情形據實覆

奏請將此項新漲沙洲召佃收租撥充公用作爲地  
方水利津貼接准部覆嗣後遇有接漲突漲沙地  
卽飭查勘入官隨時定課議租專案咨部如有轉  
則陞科之處亦令照例隨時勘辦查報統於大丈  
案內彙題應納課銀歸入奏銷造報此項租息旣



彙

題此次奏定歸公仍入五年大丈係專指蘆洲而言  
漕田在腹地居多本較蘆洲爲少應完糧賦亦倍  
於蘆洲課重利輕爭端卽少原與蘆洲迥異仍循  
舊例辦理不在歸公之列等情詳請具

奏前來 臣覆查無異竝將所議另佃收租陞科造冊  
各事宜逐細籌酌臚列條款敬呈

御覽

一已坍未報之案應令各州縣查明豁糧也查留  
糧待補之例業已停止其例前達部覆准留糧

之案新例原准撥補自無庸議惟各廳州縣辦理留糧間有自行註冊或雖詳報而輾轉駁查未經詳咨達部者此時既不使補請留糧自當勘明請豁卽業經咨部留糧各案如所留之糧節年拖欠不完是徒有留糧之名而無留糧之實應將賦額豁除免追積欠註銷待補之案以杜刁巧至各屬舊有公地除河營鹽場各照舊章辦理外其書院善堂學租及旂丁濟運武營調劑兵丁并緝捕經費等項舊有撥買蘆洲歷久藉爲恒產以充公用如坍塌之後一概不准

彙

題此次奏定歸公仍入五年大丈係專指蘆洲而言  
漕田在腹地居多本較蘆洲為少應完糧賦亦倍  
於蘆洲課重利輕爭端即少原與蘆洲迥異仍循  
舊例辦理不在歸公之列等情詳請具

奏前來 臣覆查無異竝將所議另冊收租陞科造冊  
各事宜逐細籌酌臚列條款敬呈

御覽

一已冊未報之案應令各州縣查明豁糧也查留  
糧待補之例業已停止其例前達部覆准留糧

之案新例原准撥補自無庸議惟各廳州縣辦理留糧間有自行註冊或雖詳報而輾轉駁查未經詳咨達部者此時既不使補請留糧自當勘明請豁卽業經咨部留糧各案如所留之糧節年拖欠不完是徒有留糧之名而無留糧之實應將賦額豁除免追積欠註銷待補之案以杜刁巧至各屬舊有公地除河營鹽場各照舊章辦理外其書院善堂學租及旂丁濟運武營調劑兵丁并緝捕經費等項舊有撥買蘆洲歷久藉爲恒產以充公用如坍塌之後一概不准

撥補則經費難免有缺應查明前項沙洲原業  
各有若干頃畝造具清冊咨部存案以此次查  
辦爲定額嗣後如有額內坍缺准其循照舊例  
俟原坍界內與現業地畝緊相連接之處漲有  
新灘按數撥補仍先將坍糧豁除俟撥補之後  
另行陞科以免賠累其寺院公產向係官爲經  
理者亦照此辦理其餘一切私業不得援以爲  
例

一租額應分別定數一律徵收折色也查歸公灘  
地墾種啟科之後卽應徵租若按其所得花息

派撥員役臨洲分收不特薪水多一開銷卽收貯亦多折耗且運送變價輾轉過手易於中飽自應概收折色惟地畝腴瘠不同各處情形互異所有應收租息若憑空酌斷無以示平允彼此紛岐又無以昭核實查蘆課全書所定課銀輕重卽視地之肥磽以爲等則今酌中定議應請照課銀之數加七起租如上田課銀每畝九分一釐者加銀六錢三分七釐共應徵租銀七錢二分八釐分作八成以一成銀九分一釐完課以六成銀五錢四分六釐解司尙餘一成銀

九分一釐作爲一切公費其餘各照科則重輕  
分別增減由各廳州縣設立三聯版串填明佃  
戶姓名徵租銀數於每年十一月初一日啟徵  
先期飭令洲保催輸令各佃自行交納現銀儘  
徵儘解統限於次年五月底全完如有未完照  
雜項錢糧例核計處分倘有侵蝕卽照虧缺  
帑項例嚴行參辦

一陞科地畝應俟生有蘆草再行起科也查蘆課  
全書有水影光灘泥灘等項名目均無租息可  
收嗣後歸公洲地應俟生有蘆草再行陞科起

租完課所有應完課銀卽由該地方官於租息  
內劃款批解至遇災蠲緩遇坍報豁仍與民洲  
一律辦理

一報部清冊應查照部議於年終造冊開列四柱  
總數報部無庸隨時逐案詳咨以歸簡易也查  
沙洲租息係

奏明爲擇要興修水利津貼以地方自然之利充地  
方必需之用實屬以公濟公遇有應辦水利由  
藩司確勘地方緩急情形詳明督撫酌核動放  
歲終仍由藩司將一年收支數目彙報督撫備



核層層稽察自無弊混至動用工費之際其價  
間有低昂未能畫一非年例興修可比卽不能  
悉依例價造報應請每年由兩藩司各帶管收  
除在四柱總數冊詳咨報部其工程細數無庸  
再行開造亦無庸逐案詳咨以免輾轉駁查登  
覆之繁而省案牘

以上各條經臣逐加酌核均屬切要此外尙有應  
行由外查辦事宜亦經飭令藩司議定章程通詳  
立案并飭各州縣實力遵辦以資經久所有新漲  
沙洲歸公酌辦章程謹會同大學士兩江總督臣

蔣攸銛恭摺會

奏伏乞

皇上聖鑒訓示遵行謹

奏

道光九年九月初七日奉到

硃批依議戶部知道欽此

1-2-2000

1-2-2000

111

覆奏江蘇尙無阻礙水道沙洲摺子

奏爲查勘江寧蘇州各屬沙洲尙無阻礙水道竝酌  
議查禁緣由恭摺覆

奏仰祈

聖鑒事竊前欽奉

上諭據給事中邵正笏奏江湖漲灘占墾日甚請飭查  
酌辦以弭水患而衛民生一摺本年江蘇安徽江西  
湖廣等省水漫成災如果平日講求水利江湖通暢  
何至釀成水患積久未消如該給事中所稱近年長  
江一帶沙洲日增多被居民占墾以致阻遏水道且

地方官所報陞科者不過十之二三而豪強之兼并  
奸蠹之侵蝕者不知凡幾自應將積弊悉除以收實  
效著陶澍等各飭所屬於瀕臨江湖地方詳細履勘  
如有沙洲地畝實在無礙水道者方准居民認墾毋  
得任令豪強勾通奸蠹霸占以多報少而無力貧民  
轉致向隅仍無裨益其有壅遏水道之處必當設法  
查禁使漲水得資宣洩則害除而利興該督撫等當  
認真妥辦固不可以空言塞責亦不可任令地方官  
假手吏胥乘機舞弊以致利不能興害不能除百姓  
轉受其騷擾殊失弭患衛民之意著將該給事中原

摺鈔寄該督撫等閱看酌議具奏欽此當經劄飭藩  
司欽遵遴委妥員履勘籌辦去後臣伏查兩江地  
方設省以江爲名江水自四川至湖北境內南會  
洞庭北會漢沔而來至江西又南納鄱湖之水至  
安徽又北納巢湖之水奔騰浩瀚經江揚鎮常通  
太各境以入海誠如該給事中所云天下之大利  
所在也而江蘇各境又南有吳淞婁溇之三江北  
有黃淮沂泗之四水皆與江水各別而各由江蘇  
境以入海故言水利於東南尤爲第一大端黃淮  
爲漕運所經沂泗以濟中運特歸河臣管理吳淞

於蘇松各郡農田最關緊要經臣於巡撫任內設  
法籌濬數年以來水旱藉資洩蓄餘如常州之孟  
瀆鎮江之練湖以及白泖婁江並經臣籌度多年  
或因籌款而未舉或已舉而尙未蒞事仍當次第  
辦理至於長江一帶沙渚縱橫淤成洲地沿海沿  
河俱皆有之總因江南地方近海衆水所趨故洲  
灘尤多也其間有年久陞科者有甫經陞科尙未  
成熟者並有洲未成而望影陞科有洲已坍而留  
糧待補者爭長競短控訟無休不特阻礙水道抑  
且把持械鬪屢釀重案實爲洲棍惡習臣於道光

八年九月內曾經另議章程詳悉

奏明除崇明一縣四面環海有沙無田課額仍循其舊此外各屬凡遇沙洲坍沒均令地方官隨時勘明詳咨豁賦不准留糧待補如有新漲洲地無論子母相生江心突漲一概歸官勘明定額招佃納租解司充課以餘息爲地方水利津貼經部議覆奉

旨依議欽此嗣是械鬪爭洲之風頓息而洲旣歸官亦不致私墾礙公至上年水災之重實因自夏徂秋苦雨連綿各省同時水發江省地處下游兼以湖



河並漲宣洩不及非由江洲壅遏且江洲之生亦實因上游川陝滇黔等省開墾太多無業游民到處伐山刊木種植雜糧一遇暴雨土石隨流而下以致停淤接漲此等謀食窮民旣難禁其生計而開墾旣多傾卸愈甚及至沙漲爲洲則除去更難尋常一渠一壩動輒需費萬計況於長江數千里何從施工出土更何從籌此鉅款以爲經費是該給事中摺內所稱挑挖漲沙刨除塘壩以爲逐漸施工地步者似可不必以免滋擾惟私種蘆葦一節及豪強霸占等情難保非事理所有自應逐細

確勘嚴禁以期水道無阻茲據江寧蘇州兩藩司  
委員會同州廳縣場各員勘明各屬濱江臨湖傍  
河沿海凡有沙洲地方其已經成熟者均係按則  
完課並無私占自道光八年以後新漲沙洲循照  
奏定章程分別歸公佃租多係種植菜麥棉花等物  
其產植蘆葦之洲甚少應隨時剷除禁種此時實  
無阻遏水道之處且沙洲既已歸公豪強蠹猾亦  
難侵隱是以勾串霸墾之弊亦除惟疏通水利攸  
關弭患衛民誠恐日久懈生或致奸民私行圍築  
不可不防其漸

臣與撫現復劄飭各地方官嗣

後每年於冬令水涸之時親詣濱臨江海河湖處  
所周歷查看一次如有新漲無礙水道者方准遵  
照新例歸公招佃陞科有礙水道者卽行督令刨  
除淨盡以順水性具結送司呈送備查倘有沙地  
阻礙水道及隱匿占種情弊一經查出卽將占種  
之人嚴行治罪並將地方官據實查參如此則牟  
利奸徒知所畏忌而地方有司亦知自顧考成以  
期水利民生兩有裨益除江西安徽兩省洲地情  
形已由各撫臣議覆外所有江寧蘇州各屬沙地  
無礙水道暨酌議查辦緣由謹會同江蘇巡撫臣

林則徐合詞恭摺覆

奏伏乞

皇上聖鑒訓示謹

奏

道光十二年十一月二十八日奉到

硃批另有旨欽此同日奉到道光十二年十一月十七

日內閣奉

上諭前據給事中邵正笏奏江湖漲灘占墾日甚請飭  
查辦當降旨令該督等酌議具奏茲據陶澍等勘明  
各屬沙洲情形酌議覆奏疏通水利攸關弭患衛民

江蘇各屬沙洲地方自道光八年經該省奏定章程  
後新漲沙洲均已分別歸公佃租及隨時剷除禁種  
既無阻遏水道之處亦無侵隱霸墾之弊惟日久懈  
生或致奸民私行圍築不可不防其漸該督撫等卽  
嚴飭各地方官嗣後每年於冬令水涸之時親詣濱  
臨江海河湖處所周歷查看如有新漲無礙水道者  
方准照例歸公召佃墾科其有礙水道者概行督令  
剷除淨盡並勒令具結送司轉呈備查倘查有沙地  
阻礙水道及隱匿占種情弊除將占種之人嚴行治  
罪外並將該地方官據實查參毋稍寬縱總期有司

實力奉行奸徒知所畏忌庶於水利民生兩有裨益

欽此

四ノ家ノ全

十一

陶文毅公全集卷十一目錄

奏疏 鹽法

覆奏安置投首巨梟黃玉林等情形並准鹺弊端  
不止私販一節摺子

敬陳兩淮鹽務積弊附片

嚴查回空糧船夾帶私鹽摺子

覆奏籌辦巨梟黃玉林等大概情形摺子

再陳淮鹺積弊摺子

請刪減鹽務浮費及攤派等款附片





奏疏 鹽法

覆奏安置投首巨梟黃玉林等情形並准離弊端  
不止私販一節摺子

奏爲遵

旨據實覆

奏仰祈

聖鑒事竊 臣 永准軍機大臣字寄道光十年七月十六

日奉

上諭前據蔣攸銛等奏儀徵巨梟黃玉林熟習販私路  
徑又與梟徒相識帶同夥犯船隻赴官投首自願隨

同官弁引拏私梟効力贖罪適當鹺務凋弊之時靖私尤爲緊要是以姑允所請原係權宜辦理惟自五月間降旨之後至今將及兩月未據該督等將如何責令緝私銷引有無起色及其夥黨等若何安置稽查詳悉具奏此等梟徒原非善類如果實能引緝私販使官引得以暢銷自可寬其既往若日久並無成效不過該犯等冀圖苟免卽當另行籌辦豈容稍涉顛預致失政體陶澍現以巡撫兼署總督有管理鹽務之責務將現在緝私銷引情形及將來於鹺務有無裨益並該犯等應如何妥爲安置不致別滋事端

之處據實由驛覆奏如此事辦理未能妥協既無成效可圖又使奸徒無所儆畏或致養癰貽患該署督自問咎將誰屬凜之慎之將此諭令知之欽此仰見我

皇上於破格施恩之中寓慮遠防微之意跪誦之下欽

服難名臣查黃玉林一犯原係儀徵販私流犯在

配逃回復販私鹽適見兩淮運使王鳳生所出告示有販私之人准其自首免罪之語該犯卽帶同夥犯伍步雲等并船鹽赴官自首情願隨同官弁引拏梟犯贖罪運使王鳳生因其精詞懇切兼查

道光五年拏辦巨梟賀三虎卽係該犯指引其悔  
罪之念已久現係逃流販私並無結黨拒捕之案  
照例僅止改發充軍旣已投首尙知畏法且多識  
梟徒於販私路徑較熟以梟捕梟足資引線當據  
詳請具

奏籲懇

恩施冀收緝私之益自該犯投首後陸續多有聞風投  
首之人在運司處聽候指使前於六月十一日據  
該犯等探知老河影地方有私船停泊卽稟知委  
員候補運判石產瑚等通知營縣趕往會拏該犯

黃玉林先已至彼潛蹤守候指明泊岸船埠內載私各船一齊擁上按拏各私梟猝出不意紛紛赴水逃逸當獲梟犯李玉良李喬周散正標王庭愾張二顧大徐正明王三張政遠薛得富廖習順黃興鼇等十二名獲大小船十一隻並在各船起出私鹽一百七十包按獲槍刀火藥槍子等項現由儀徵縣確審究辦在案是該犯於自首後指拏梟徒尙知圖奮兩月以來亦俱安靜守法並未別滋事端其陸續投首之人據運司詳報查明有業者一百七十名無業者二百四十三名擬擇其足資

緝私者酌留鹽務充巡其餘分別編入營伍保甲  
其各自謀生願回原籍者聽倘敢自外生成仍圖  
販私無難立即擒拏加倍懲治實以重典惟是兩  
淮鹺務做壞已極弊端不一實不止私販一節是  
以一時難期起色卽以私販而論亦不止黃玉林  
一起此等無籍匪徒趨利圖食聚散無常現在准  
其自首誠如

聖諭係屬權宜辦理不過收一起可省一起之緝捕藉  
以散其黨與而於鹽引之銷否尙不能專恃乎此  
至該犯等本非善類實亦庸劣無他技能該運司

欲暫資引緝仍當飭令嚴行管束俾資警惕臣仰  
蒙

聖主深恩委任以巡撫兼署總督責無旁貸惟有隨時  
隨事咨商鹽臣並督率運司寬嚴交濟設法維持  
一切條款俟運司妥議詳到由鹽臣會商另奏臣  
斷不敢輕率遷就致失政體亦斷不肯養癰貽患  
自蹈愆尤所有難務投首各犯現在情形謹據實  
遵

旨由驛覆

奏伏乞



皇上聖鑒謹

奏

道光十年八月十七日奉到

硃批另有旨留覽夾片一件欽此

敬陳兩淮鹽務積弊附片

再臣查鹽務積弊弊端不一如印本賀票貼息套

搭皆弊混之尤者不肖奸商巧立名目借端開銷以致庫本全空課項日絀竟有積重難返之勢卽如商人辦運所有引課場價運腳使費一切併計謂之成木內有商人缺底一項名爲根窩每引取票銀一兩每年按引卽須銀一百六十九萬有餘歸於底商先

國課而坐收其利其餘則浮費居多每由總商開銷取之散商名爲辦公而實不知其名目盈千累萬

任意攤派此類甚多成本安得不重成本既重則售價必昂而私梟由此起矣如漢鎮爲銷鹽第一口岸鹽價每斤需錢四五十文迨分運各處銷售近者六七十文遠者竟需八九十文不等其實鹽務成本首重正課其次則場價計每引配鹽三百七十四斤僅徵正課銀一兩至數錢零不等其硃單雜課亦僅徵一二錢不等計算場價每鹽一斤不及十文而轉銷各處竟至數十倍之價且有攙和污泥雜入阜莢蛤灰等弊鹽質更差以致江廣之民膏血盡竭於鹽貧家小戶往往有兼旬燭月

堅忍淡食不知鹽味者而鄰私乃乘機灌入此非  
私販之銷售能勝於官實由鹽價太昂有以致之  
也至於儀徵一帶爲捆鹽之場奸商與商廝難免  
私行夾帶江船水手從而效尤而私梟亦因以罔  
所顧忌其實私梟所販之鹽卽係場竈所產之鹽  
如果商人能收買餘鹽何致有私鹽可販祇因商  
不能收而竈戶窮困偶有透漏以資朝夕遂致輾  
轉負載積少成多而無貲本無身家之匪徒聚而  
成梟幸此輩多係烏合見利則趨聞拏則散現在  
知縣王用賓署遊擊金萬全皆練於緝捕之人梟

徒警畏自六月內黃玉林指拏各犯以後紛紛逃散地方尙屬靖謐惟鹽務拔本塞源必須革去奸商另招股實而殷實之商又必須明定章程刪去浮費使不受總商攤派之累然後肯來前與運司諄切言之當可次第整理合併附片具陳伏乞

聖鑒謹

奏

道光十年八月十七日奉到

硃批另有旨欽此同日承准

軍機大臣字寄道光十年八月初八日奉

上諭陶澍覆奏兩淮鹺務投首各犯現在情形一摺儀徵鹽梟黃玉林據陶澍查明自投首後兩月以來尙屬安靜守法亦未別滋事端並拏獲梟犯李玉良等十二名且有聞風投首多人陸續在運司處聽候指使擬擇其足資緝私者酌留鹽務充巡其餘分別編入營伍保甲等語兩淮鹺務敝壞已極原不止私販一節卽以私販而論亦不止黃玉林一起前此准令黃玉林効力自贖原係權宜辦理若因有自首免罪之條遂將販私之人紛紛招集成何政體且現在黃玉林等一起陶澍等已不能妥爲安置倘再有心招

致日積日多又將如何安插黃玉林一犯本有應發原配流罪其夥犯伍步雲等八名隨同販私不記次數斤數亦有應得之罪現已准令指引緝私卽能拏獲巨窩積梟官引得以暢銷亦祇可寬其既往不能冀倖格外恩施卽入伍食糧亦斷不准行如但圖苟免不能立功自贖仍當從重加等治罪陶澍等務當隨時體察籌計萬全斷不可遷就一時遇有投首者濫行收納使奸徒無所做畏倘辦理未能妥協於餒務旣無裨益轉致養癰貽患別滋事端陶澍等自問當得何咎凜之愼之至商人旣充總商卽當一體辦

運若並不辦運復藉辦公爲名攤派散商所獲之利轉加於辦運者數倍乘機壟斷不可不嚴行飭禁該處總商鄒同裕鮑有恒據陶澍奏均不辦運著卽行革退不准暗中影射身後辦事陶澍等卽督飭運司另招股實之商充補並明定章程刪除浮費以肅漕政將此諭知陶澍並傳諭福森知之欽此





嚴查回空糧船夾帶私鹽摺子

奏爲回空糧船夾帶私鹽遵

旨嚴密查緝恭摺覆

奏仰祈

聖鑒事竊臣承准軍機處字寄道光十年六月初五日

奉

上諭據御史朱玉林奏私鹽侵占淮綱最甚而爲害尤深者莫如糧私糧船收買蘆鹽以及高寶興化地棍屯積私鹽每船約計千餘石沿途售賣各岸均被占銷請飭實力籌辦等語自係實在情形全在文武官

弁不分畛域隨時嚴密稽查有犯必懲方足以挽積  
疲而收實效著督飭所屬於回空漕船過境時實力  
查辦不得仍前得規賣放并藉詞兌漕期迫有意縱  
容總須私鹽欵戢官引暢銷斷不可視為具文仍致  
有名無實欵此當卽恭錄咨行欵遵臣查糧船每年

回空之時夾帶私鹽沿途售賣實爲淮綱之害疊

經督臣蔣攸銛嚴飭河右揚州及經過各營并札

淮揚等府督飭各屬於本管境內嚴密接查不任

私鹽上船亦不任藏匿偷漏實已三令五申而此

風未能盡除臣思糧船夾帶非蘆私卽淮私而蘆

鹽價值較賤故所帶尤多一入江境卽係淮北淮南地方爲商人辦鹽之所丁舵人等盜買私載實繁有徒其中固多積慣窩固之匪類爲之包攬暗運而不肖之商店與商夥商廝乘機偷賣分肥貪小利而不顧大局者蓋亦不少且糧船旂丁本多計利之徒近來水手尤橫旂丁不能管束甚至將船上器物私行抵給水手任其管駕頭舵盡係若輩往往無旂丁在船一經查拏大則聚衆拒捕小則棄船走散一船停閣衆船窒不能前無論催償不力地方例有處分而漕糧冬兌冬開斷不能久

立而待糧私悉此情形是以挾持無恐動肆鴟張  
茲奉

諭旨查辦

臣

現在飛咨直隸天津一帶嚴禁盜賣以清

糧船夾私之源並咨明兩淮鹽政將商店商廝等  
盜賣販私之弊嚴行查禁庶幾正己正人俾匪徒  
無所藉口仍嚴查沿河兵役人等毋許得規包庇  
有犯必懲並隨時知會安徽江西湖廣等處聲息  
聯絡倘糧船中有大夥帶私者卽當一體兜拏其  
水手人等如敢仍蹈故轍停船走散竟當窮追拏  
辦隨案聲免催償遲延處分以期堵截嚴懲庶糧

私可期歛戢官引自益暢銷仰副

聖主整頓離務之至意所有遵

旨嚴查糧私並預陳辦理情形謹繕摺覆

奏伏乞

皇上聖鑒謹

奏

道光十年八月十八日奉到

硃批知道了欽此

陸下家之全書  
九十一

覆奏籌辦巨梟黃玉林等大概情形摺子

奏爲遵

旨籌議據實覆

奏仰祈

聖鑒事竊臣於道光十年九月二十六日承准軍機大

臣字寄九月十八日奉

上諭據蔣攸銛等奏審明投首効力梟犯黃玉林復圖  
販私已明降諭旨將該犯卽行正法并將蔣攸銛等  
交部分別嚴加議處矣鹽梟黃玉林前此因蔣攸銛  
等奏請准令投首原係權宜辦法屢經降旨詢問蔣



攸銛等令查明該犯投首後是否安靜茲果不出朕  
所料因無利可圖卽復萌故智該犯如此居心狡詐  
反覆無常若復量從末減無以伸國法而懲刁頑是  
以諭令將該犯卽行正法但兩淮鹽梟充斥黃玉林  
占據老虎頸馬頭歷有年所聲勢已重黨與必多從  
前曾有人密奏地方官恐查拏激變相率容隱不肯  
懲辦此時業將該犯明正典刑其伍步雲等八名於  
黃玉林復圖販私是否知情同謀現在曾否拏獲收  
禁應如何按律懲辦并此外陸續准令投首各犯是  
否安靜將來如何防範不令滋生事端之處著陶澍

從長計議妥爲辦理據實具奏該督於此事務當計  
出萬全使奸徒知所做畏礙務日有起色倘辦理不  
善或致激成事端惟該督是問將此諭令知之欽此  
仰見

聖主懲奸戢暴卽寓杜漸防微之意跪誦之下欽服莫  
名伏查黃玉林反覆無常自外

生成臣於接奉

諭旨後卽派委因公來浦之蕭南同知陸楷馳赴徐州  
會同該府潘楨於九月二十八日遵

旨將該犯卽行正法訖遠近匪徒莫不聞風做惕其隨

同投首之伍步雲等八名業經<sub>臣</sub>蔣攸鈞委員由揚州提至江寧省城全行收禁委藩司督府審辦該犯等於黃玉林復圖販私是否知情同謀現在劄催嚴訊仍俟<sub>臣</sub>回署親提督審明確按律定擬另行

奏辦至老虎頸地隸儀徵本名老河影俗訛今稱儀徵爲南監掣捆鹽之場兼係泊船馬頭役夫蝟集舟航櫛比常時不下十數萬衆肩摩踵接之下難免納污藏垢私鹽船隻雜出其中其代爲雇覓掩藏抽分微利者謂之外代黃玉林其一種也尙有

回俵各匪與之爭占馬頭其實皆無食之游民聚則爲梟散則爲良比之盜賊則有間矣黃玉林私踞馬頭與回俵爲敵商夥商廝多與往還故其名較著伍步雲等而外黨與無多自前六月內該犯引緝私梟李玉良等十二名大小船十一隻之後復將高寶等處私窩開單稟知運司拏獲多名鹽梟已與之爲仇八月內又經伍步雲等偵獲蔣本明等一起其勢益散其前此黃玉林開報之四百餘人經縣查明多係往來小貿及水手脚夫之類希圖得領緝私工食而來本不盡販私投首之人

既未收留多已散去其稍有生業者編入保甲較  
易稽查實俱安靜卽前辦理黃玉林一案經蔣攸  
銛將該犯解往徐州候

旨經過江北程站正係儀徵接壤不但無中途奪犯之  
事且并未見一人出而探望是其黨與無多可知  
然臣之所慮不在於梟徒之冒法販私而在於小  
民之情迫食私鹽價太貴則食私者衆而梟徒有  
不勝誅者矣且販私者不盡在梟徒尙廝商夥與  
運鹽之江船夾帶實甚商力疲乏彼方藉夾帶以  
補成本之不足是官商亦私私愈多而引鹽益滯

而不行矣數月以來儀徵運鹽亦少現交冬令若再不稱掣行運則此捆鹽之夫役數萬人何從得食此尤可慮之最大者寤寐思維一時尙無善策至於緝捕之事本係地方文武分所當然

功令森嚴不難整飭而經營布置亦閒須隨時損益現在黃玉林旣經懲辦卽回俦各匪亦俱四散奔逃而利之所在已散者難保其不來兼私梟多係以船爲家大江遼濶稽查難周老虎頸尤爲扼要之區必須設官帶兵彈壓查有高資營都司額設巡船有兵數百名本係內河水師並無分防水陸

汎地可以移駐其餘丹徒江都亦有扼要之處須  
兵彈緝統容臣逐細籌議另摺具奏所有現辦大  
概情形謹先恭摺覆

奏伏乞

皇上聖鑒謹

奏

道光十年十月二十四日承准

軍機大臣字寄道光十年十月十六日奉

上諭陶澍奏遵旨將鹽梟黃玉林正法并籌辦大概情  
形一摺黃玉林一犯業經正法其隨同投首之伍步

雲等八名於黃玉林復圖販私是否知情同謀必應嚴行根究該犯等現已提至江寧省城收禁委員審辦著該督於回署後親提各犯審訊明確按律定擬具奏至老虎頸地隸儀徵爲淮南監掣捆鹽之場兼係泊船馬頭據該督奏該處舟航櫛比時有私鹽船隻雜出其中其代爲雇覓掩藏抽分微利謂之外代黃玉林之外尙有回俵各匪在彼爭占等語此等匪徒現在雖因懲辦黃玉林後四散逃走而利之所在已散者難保其不來不可不實力查拏以淨根株該處情形據奏不在梟徒之冒法販私而在小民之情



迫食私且販私者不盡在梟徒而商廝商夥與運鹽之江船夾帶實甚現交冬令若再不稱掣行運則此捆鹽之夫役數萬人何從得食尤應籌度善策妥爲經理陶澍身任兩江總督兼轄鹽務責無旁貸於該處私梟應解散者卽當設法解散應緝拏者卽當飭屬緝拏總使私梟斂戢鹽務日有起色方爲不負委任至老虎頸及丹徒江都扼要之區應如何移駐官兵彈壓之處著該督酌量情形詳細籌議具奏將此諭令知之欽此又於道光十年十月三十日奉到

硃批另有旨欽此

再陳淮鹺積弊摺子

奏爲淮鹺疲壞已極縷陳積弊情形請

旨飭查辦理藉資補救仰祈

聖鑒事竊照兩淮鹽政關係

國帑臣頻年在蘇已聞其疲敝情形日甚一日但不

料山窮水盡竟至如是之極固由院司屢易漫無

責成因循諉卸各顧目前而庫貯旣空奸商無可

咀嚙遂成渙散臣細加察訪其來有自亦不起於

近日查淮商向有數百家近因消乏僅存數十家

且多借貲營運不皆自己貲本更有以商爲名網

取無本之利並不行銷者以致利衰引滯向係兩  
年三運今乃一運兩年愈遲愈積月利愈虧而商  
人習慣淫侈率多醉生夢死之徒不知自行經理  
惟任商夥商廝編擺作弄朦混侵吞以致日形竭  
蹙其岸引所以滯銷者一出成本積漸成多一出  
藉官行私過甚查成本之輸於官者爲科則有正  
項雜項外支帶款等名目用於商者有引窩鹽價  
捆霸運費辛工火足等名目此外應徵雜支各款  
尙多而外銷活支月摺岸費等款皆總商私立名  
目假公濟私詭混開銷種種浮費倍蓰正課統名

爲成本歸於鹽價以致本重價懸銷售無術轉運  
愈滯積引愈多不得已而統銷一年讓出本綱地  
步作爲分限攤補且每綱支解之款不能停緩復  
將上綱下綱徵收之銀通融借墊輾轉那用屢統  
屢積更於科則之中帶徵帶補逐漸愈增此成本  
所由積重也私鹽充斥固應首重緝私然岸銷之  
滯不盡關梟販其商運官引之重斤與裝鹽江船  
之夾帶實爲淮綱腹心之蠹在商人於正鹽之外  
本有耗滷無課之加斤卽無異官中之私而又有  
包內包外之私其包內者係運商捆鹽出場多帶

重斤商廝商夥亦復如之且又短發江船水脚以鹽斤私抵船價其短發所給之價復被廝夥埠頭等勒扣過半甚至船戶不領脚價轉以重賂向商廝埠頭等圖謀裝鹽下至商宅之婢役亦月有饋費彼江船何苦爲此無非藉公裝私而已聞江船裝鹽每捆解放私鹽謂之買硯每船裝官鹽十之五六餘艙盡以裝私謂之跑風船既裝鹽將全引一船之鹽分爲三四船遇有一船遭風失淺卽捏報全引淹銷將並未失事之二三船亦請補鹽旣得照例免課又得通綱津貼到岸之後并得提前

先賣謂之淹銷補運是以一引而換數引明目張  
膽之私也及抵漢岸商人擡價居奇停船挨賣謂  
之整輪以窄徑自窘而私販轉得暢行迨窮年守  
候銷售無期於是在後之船鑽營以提前其黠者  
將待輪之鹽偷賣俟輪到時買私補填謂之過籠  
蒸糕甚至鹽已賣盡仍報淹銷將船鑿沈以滅其  
偷賣之跡謂之放生各種弊竇皆起於整輪不但  
擡價實便售私此又藉官行私之爲害也引既不  
能年銷年額課焉能年清年款從前章程本爲虛  
立而且虛稱報効無非分綱壓派之爲虛報奏銷

更起懸墊那移之漸前綱懸墊後綱復難那補解  
餉無措於是遮掩彌縫有預納減納貼色貼息之  
名或折減若干作爲正數其貼色貼息亦於正數  
內少完若干作爲加色加息之數商既巧占便宜  
而庫貯因以短縮與州縣之虧那何異其少納之  
數唯云分綱帶完然積欠已至數千萬前次清查  
或分十五綱帶徵或分三十綱歸補輾轉相承從  
何徵納且以前商折減少納之課攤派後人彌補  
李代桃僵偏枯孰甚以致殷商裹足不前正課益  
懸而無著矣至於報効一款原係因公抒誠得沾

議敘自應各出已貲乃亦先由運庫墊解分年帶  
繳積欠纍纍是庫存正款徒爲商人騙取議敘之  
用而商捐之名適足爲消耗之目而已以上數端  
弊起於商而利不在商商旣自敝而課因以敝現  
在己丑之引行銷甫半庚寅年尙未開綱課緹商  
刁浮僞百出造謠興謗不服稽查興言及此可勝  
慨歎然綱弊旣深不得不亟求補救之法臣之愚  
見謂宜計船裝鹽不留空艙則受載有定數而夾  
帶易查矣實發水脚毋許剋扣則船戶不藉口而  
脚鹽易清矣遭風失淺之船准其補鹽不准免課



則淹銷無所利而捏報自少矣嚴查水程俾銷數有準而無引之私自剔矣更宜大減浮費節止流難以輕成本而恤運商以上各條應請

旨敕下鹽臣督同運司鹽道妥議籌辦實力奉行臣亦

隨時稽查以資應助至於收買餘鹽減價敵私皆正本清源之上策而現似力尙未能惟有口岸散輪則銷路暢而場竈自清食價平而民情大順私鹽不戢自靖無如商情固執但知目前搶跌微似有虧不知守候太久月利全無縱使每斤多賣數文得不償失況過籠蒸糕沉船放水百弊由此而

生於商大有未利不止於虧

國課而病閭閻也查從前兩江督

臣

孫玉庭與湖廣

督臣陳若霖籌辦散輪時於前兩月同到之船散

賣既畢再開後兩月之輪以散寓整最爲法良意美行之業有成效自道光八年冬底復改整輪未及二年而鹽務敗壞至此不可收拾然則整散之效不待智者而始知矣應請

敕下鹽

臣

會同湖廣總督遴委廉正勤明之員查明漢

岸現在滯銷引鹽共有若干仿照前次散輪之法辦理積滯庶可暢銷新綱始可發運以冀稍有轉

機漸還舊制臣為鹺弊太深暫資補救起見是否  
有當伏乞

皇上聖鑒訓示施行謹

奏

道光十年十一月十一日奉到

硃批另有旨欽此同日承准

軍機大臣片知貴督具奏鹽務摺片本日奉有

諭旨交

欽差

王鼎  
寶興

會同貴督查辦矣

請刪減鹽務浮費及攤派等款附片

再者鹽務浮費與攤補二事最爲弊端不但虧那  
帑項兼使鹺務日累日深愈無起色查兩淮行鹽六  
省公事繁多辦公各費原不能無惟揚州每綱額  
定七十萬兩已不爲少而總商以不敷爲名每年  
竟多支八九十萬至百餘萬不等漢口則謂之岸  
費每引帶徵六錢遞加二錢近聞每引加至一兩  
四錢計每年亦一百數十萬此二項共需銀二百  
餘萬與正課相等皆用於總商之手無帳目可查  
詭混開銷每由庫內墊支而攤之於衆商歸補無

期遂成虧欠其在揚州者多假借名目如新院到任修理衙署鋪墊什物一切所費不及數千竟開銷八九萬兩一手稟紅帖所費不過數十文竟開銷一千兩此二事經王鳳生查出始行減革他如月摺一項每年豢養之商子孫按月摺取銀亦用至十餘萬兩且續添未已此項間亦無甚實濟多入總商之手又如德音春臺二班頻年鹽務衙門並未演戲僅供商人宴亦每年開銷三萬兩此外濫費甚多並有捏名冒支者如總漕總河巡撫各衙門從未解有緝捕犒賞之款聞亦每處開銷

三四千兩其餘京外各官謊託可知若漢口岸費則多托名游客更屬無從稽考此等浮費每每託名辦公不敷濫支於本款之外列入成本攤徵是不敷二字乃爲總商巧混侵吞之護符也至於帶徵帶補之纏纏預納減納之套搭那前移後無非以己身之虧欠嫁害於他人如積欠之四千餘萬欲分年彌補以數十年後之人代數十年前之人完欠固屬懸虛若帶徵雜項按年卽須輸納內如帑利息本等款各處經費攸關核計子母爲度支所必需難以悉歸無著而本銀久化烏有今之納

息者並非昔時領本之原商盡爲他人賠償如關  
規等利本係專商另完之款近亦派於衆商納利  
且有將本全攤者任意牽連伊於胡底夫以從前  
鹽務極盛之時商多本裕尙有虧缺如清查積欠  
之數千萬卽從前盛時之所遞積而貽也今則商  
已乏矣力已疲矣本無可借卽庫亦無可那矣一  
綱之課兩年不能齊而欲其出有餘以補從前極  
盛時之虧款宜其不能是不但畫餅不可以充饑  
竊恐輾轉耽延愈累愈深而此事且曠而不復起  
也現在鹽

臣鍾靈奉

旨核辦清查合無仰懇

聖主俯飭鍾靈督率局員將此等補帶之彌文套搭之  
累款與一切浮費逐加酌核應追者追應賠者賠  
各有原商毋牽累於後人應緩者緩應停者停務  
協事機毋責效於肩睫其餘應刪者刪應減者減  
其無著之空款徒攤無益者並當據實籲請

恩施予以酌免庶幾科則稍輕成本不重殷商樂於招  
徠疲商亦資蘇息而鹽務可期起色臣愚昧之見  
合併附陳謹

奏



道光十年十一月十一日奉到

硃批另有旨欽此同日承准

軍機大臣片知貴督具奏鹽務摺片本日奉有

諭旨交

欽差王鼎 寶興會同貴督查辦矣

陶文毅公全集卷十一目錄

奏疏 鹽法

會同

欽差籌議兩淮鹽務大概情形摺子

會同

欽差擬定鹽務章程摺子

欽遵

諭旨保薦運司附片

覆奏儀徵紳士信稱拊鹽夫役因聞課歸場竈之

議糾衆赴縣哀求摺子

恭繳鹽政養廉並裁鹽政衙門浮費摺子

籌議加斤減價兼疏積引摺子

酌擬鹽務人員改補調署章程摺子

奏疏 鹽法

會同

欽差籌議兩淮鹽務大概情形摺子

奏爲會籌兩淮鹽務大概情形仰祈

聖鑒事竊 臣王鼎 臣寶興奉

命前赴江南會同 臣陶澍查辦淮鹺課歸場竈之法臨

行時仰蒙

聖誨諄諄

諭以堅持定見細心籌議跪聆之下曷勝欽感當卽帶

同司員由天津而南途次連奉

廷寄接到嵩孚鍾靈恒棨並

臣

陶澍縷陳鹽務各摺

又有人條陳淮鹽疲敝宜立章程及部奏並梁中

靖各摺於十一月十一日行抵江寧省城會同

臣

陶澍連日籌議兩淮漕務凋敝敗壞至今已成

決裂之勢蓋庫貯墊占全空欠解京外各餉爲數

甚鉅歷年虛報奏銷總商假公濟私遮飾彌縫商

人納課不前日甚一日現在每卯竟無課餉上庫

緊急應發之銀雖欲那墊亦無款可那且口岸滯

銷商運裹足間有領運無非藉官行私弊端百出

現屆庚寅年終尙未開綱卽已丑一綱行銷尙不

及十分之七約計兩年銷不足一綱之鹽竈戶以  
鹽爲生商不收鹽勢不能禁竈戶之透漏而私販  
由此益甚透私旣甚則運銷益滯官引多被私占  
而劣商與商夥商廝下至裝鹽之江船捆鹽之夫  
役莫不耽耽咀嚼節節把持卽有殷商率多畏避  
實亦無計招徠通綱情形全屬渙散已等於停運  
停銷當此山窮水盡不可收拾實非補偏救弊所  
能轉機臣陶澍有兼轄鹽務之責正在萬難措手

臣王鼎臣寶興銜

命來江訪悉情形倍深感悚仰見我

皇上聰明天竄此等情形早已

洞燭於數年之前並蒙

指示窮變通久之方毋許畏難苟安臣等敢不凜遵

聖諭虛心公酌核實會辦惟事關改轍更張章程未立

頭緒繁多各場竈地方遠在海州通州泰州必須

履勘情形方能得有把握臣王鼎臣寶興已委令

司員張澧中等同臣陶澍所委各員一同分往各

處周履查看熟商妥籌俾無格礙而期經久俟酌

定章程再行詳細會

奏至續奉

廷寄各件容<sub>臣</sub>等逐一分款確查另行辦理所有會  
辦淮鹺大概情形<sub>臣</sub>等謹繕摺具

奏伏乞

皇上聖鑒謹

奏

再鹽務議改章程發端之始必須得人而理卽如  
竈戶散在各場煎鹽草蕩公私交雜清釐不嚴卽  
起爭端且水旱難齊或以災歉藉詞抗課其淮南  
二十場均係煎鹽有竈可查淮北三場鹽以曬成  
隨地可掃稅重則私掃必多稅輕則侵灌淮南而



銷鹽路遠之區間虞缺乏非建倉不可向來捆鹽  
盤壩夫役繁衆世代相沿衣食於此一旦失業無  
賴必多一切查勘彈壓非循分供職之員所能勝  
任其餘條目尙多必須得人經理容俟臣陶澍逐  
細遴委惟現議捨舊從新正當前後交涉之際得  
人尤亟兼兩淮庫項弊端百出非得熟悉底裏之  
員無從釐剔查有降調道員王鳳生前蒙

特旨署理兩淮鹽運使旋因辦理私販失宜奉

旨降四級謝用例應赴部候選現在新運使楊振麟到  
任需時現署運司色卜星額甫經到任一切套搭

款目遠難透澈該員王鳳生在任八月於稽查款目較爲熟諳仰懇

天恩將該員暫留江蘇委辦場竈事件以便就近傳問  
核查<sub>臣</sub>等謹附片請

旨伏乞

訓示謹

奏

道光十年十二月初十日奉到

硃批另有旨欽此同日奉到道光十年十二月初二日  
奉

上諭王鼎等奏請暫留降調道員委辦事件等語著照所請王鳳生准其暫留江蘇委辦場籠事件就近傳問核查將此諭令知之欽此

會同

欽差擬定鹽務章程摺子

奏爲會籌兩淮鹽務疲敝情形擬仍循舊章大加釐剔嚴定條款以肅鹺務仰祈

聖鑒事竊

臣

王鼎

臣

寶興奉

命前來江南會同

臣

陶澍籌辦兩淮鹽務會將查出庫

貯墊占虛報奏銷商運稽遲竈私透漏各實情并分派司員會同地方委員分赴各場履勘緣由奏報在案

臣等一面將淮綱全局詳加綜核逐細鉤稽力求課歸場竈之法惟是兩淮歲徵正雜課銀

及帑利各款四百餘萬絲毫皆

國帑攸關既宜籌利所從生必須防弊所自伏因思  
責成場竈大要有三而皆有窒礙之處一由竈丁  
起科淮南以鐵煎鹽淮北以池曬鹽今按池鐵定  
課每鐵每池約徵銀百餘兩竈丁皆瀕海貧民若  
令先納課而後賣鹽則力有未逮抑令先賣鹽而  
後納課設遇歉產之日勢必課宕丁逃且場鹽每  
斤向賣制錢一二文三四文不等今加入課銀六  
釐是課重本輕私賣但及交課之半竈丁即獲大  
利販商卽省重貲仍難免透私之弊此竈丁起課

之難以遽行也一由垣商納課招徠殷商令其認課包納竈鹽悉歸該商經理出賣寓散於整較爲扼要惟兩淮池鋤半係竈產以已業而聽命商人情必不願況商人惟利是視秤收則勒以重斤借貸則要以重息竈戶狃于售私職此之故竈不樂以鹽歸垣商亦必無貲完課此商垣納課之亦難遽行也一由場官收稅就各場產鹽引額攤定課額商販先向場大使報明認買斤數照額納課赴各竈配買鹽斤如此官爲經理似覺核實無如計算產鹽最多之伍祐等場照引定課應徵銀六十

餘萬兩卽等而下之如梁塚等場亦應徵銀二十餘萬兩雖淮潁等關蘇松各縣錢糧不及此數鹽場微員豈能任此巨帑况試行之初額難懸定若聽其儘收儘解難保不匿報侵欺兼之場署多在海濱既無城郭之防又乏營汛之衛徵解亦恐致疎虞此場官收稅之亦屬難行也至於就井抽稅滇省雖有成效但兩淮情形與滇省不同滇省鹽井二十四區課額三十餘萬兩防邏易周課程亦易足兩淮場地延袤八百里水陸交通非滇省一井一官卽能查察可比且商運先課後鹽額亦十

倍真省未易仿照辦理茲據司員及委員等各以  
查勘場竈苦累情形陸續稟覆<sub>臣</sub>等以事關創始  
必須計出萬全連日公同籌酌竭誠殫思期於變  
通盡利而利之所在弊卽因之卽使先爲試辦而  
清竈僉商改官變法非一二年規模不能粗定小  
民難與圖始雖廣爲曉示亦恐觀望不前卽商販  
通行又必南侵閩浙綱鹽北侵蘆潞綱鹽若不統  
各省鹺務通盤籌畫實不免此羸彼絀之虞况此  
一二年中課額未可常懸場鹽未可停捆各岸食  
鹽更未可久缺假令試行盡善固可掃除積弊設



或稍有未協卽難再復舊章伏思我

朝淮鹽定制杜透漏則有垣竈之稽查防捆夾則有  
壩所之掣摯絕船私則腳價毋許折給通綱引則  
口岸無事輪編至於筭庫核自運司無占墊通那  
之弊緝私責在弁汛嚴游巡堵截之方逐層防範  
至周至密果能實力奉行自不致有流弊無如相  
率因循積重難返此非法之敝人人實廢法詩卽  
淮鹽弊之大者論之一曰浮費歲徵正雜各款以  
產鹽分數核算行銷盡屬有餘乃外解外支各項  
復有數百餘萬兩之多其中如鹽政之辦貢辦公

及漢口之岸費揚州之活支乏商之月摺等項甚  
至一切官私酬應均列入成本開銷似此積習相  
沿無怪成本日形喫重二日夾帶兩淮正引三百  
六十四斤現在各場摺鹽多者幾至加倍此商人  
引鹽之夾帶也其餘商夥商廝舵工水手無不各  
有重斤私摺攪雜多裝是以沿途則有買租跑風  
名日到岸則有過籠蒸糕情弊并有糧船影帶之  
食鹽商巡報獲之功鹽無非假公行私將無課之  
鹽先儘售賣綱食各引安得不滯三日私販淮南  
之老虎頸及深江孔家涵淮北之錢家集古寨及

新壩龍苴城等處向爲梟徒盤踞馬頭鹽務中雖有緝捕經費之名而汛兵巡役往往得規庇縱且淮鹽行銷六省地方遼濶如湖北之荆襄一帶則有潞鹽之私江西之南贛一帶則有粵鹽之私他若河南之蘆私安徽之浙私皆由各省越境透漏占礙淮綱其害又不獨在梟販此皆淮綱受病之處而推求致病根源實因視成法爲具文久之遂渙散而不可收拾誠非區區補偏救弊所能轉機惟有將舊章大加釐剔現計革除浮費銀二百六十萬兩成本旣輕鹽價自減儘可敵私民間亦何

樂蹈買私之罪將私販不緝而自除而且清庫款  
革總商以杜侵漁之漸定秤桶編船號以絕影射  
之萌挑河道散輪規以暢運銷之路酌帶銷緩積  
欠以清套墊之源使射利者無可借端欠課者無  
從藉口似較課歸地之之法確有舊轍可循謹分  
爲十五條另繕清單恭呈

御覽伏候

欽定 臣王鼎 臣寶興經此次釐定條款之後 臣陶澍原

有兼轄鹽務之責隨時隨事力加整頓倘仍有透  
私墮課各情弊立將玩誤之官弁商人盡法嚴懲

示做斷不致遇涉姑容如此行之數月定有起色  
查現在已斗綱未銷之鹽尙有三分庚寅全綱並  
未啟銷應自辛卯綱起卽照新定條款辦理第不  
劃清界限仍易啟套搭之弊應請前項未銷之鹽  
隨時帶銷如遇銷數通暢卽援照從前辦過提綱  
成案儘數補銷毋任積壓再准南北各場存積之  
鹽甚多數月以來商不收運以致場竈苦累課帑  
支絀此時已屆年終辛卯立應開綱應嚴飭商人  
趕緊買運交課如有藉端延宕輕則立予參革重  
則嚴行治罪總期弊去太甚法在必行以仰副

聖主飭綱裕課除弊便民之至意所有<sub>臣</sub>等會同籌議  
緣由理合繕摺具

奏伏乞

皇上聖鑒

訓示遵行謹

奏

謹將擬定兩淮鹽務章程十五條恭呈

御覽

一裁減浮費也兩淮雜費有外支辦貢辦公等款  
在科則內帶徵爲文武衙門公費并一切善舉

辛工役食雜費等用踵事遞增益多糜費除養廉兵餉水腳部飯等項共銀三十二萬餘兩向係作正開銷無可刪減此外如普濟育嬰書院義學等項亦應酌從其舊惟各堂董事濫廁多名與書樓務本堂孝廉堂等處歲需銀二十餘萬兩俱係情面仗助並非緊款此時無項可發應概行裁汰其餘各衙門公費及鹽政運司員下書役辛工紙飯并乏商月摺等項每年共需銀八十餘萬兩難免浮冒應分別大加刪除其實存應領之款亦酌減十分之四五不准商人

溢領私增致滋浮濫有累成本再漢口地方乃商船聚售分銷湖南北引鹽之所各岸商按引捐銀專爲當事各衙門公費等用近因該岸商夥恣意浮開并濫爲酬應每引捐至一兩三錢之多雖不徵於課則而本重價昂以致滯銷絀課實爲淮綱之患應大加刪減每引只准捐銀四錢仍由鹽道核數詳明各院立案永遠不准加增以上揚商漢岸各費共刪減銀一百一十餘萬兩科則成本庶得少輕矣

一刪減窩價也商運請引行鹽必先向有窩之家



出價買單然後赴司納課通計淮鹽有根窩者一百五十二萬五千九百餘引其無根窩而自用本名請引者亦十八萬二千五百餘引足知行鹽原不須用窩單乃有窩之家輾轉私售如操市券以一紙虛根先正課而坐享厚利以致運商成本加重昂價病民本應全行裁革惟念淮商受

國家豢養已久亦如糧船之有旂丁姑准留此根名每綱每引酌給銀一錢二分以示格外體卹如有把持希冀增價卽追單銷毀永遠裁革嗣後

請引只准按綱給單不准預請數綱以杜牽混  
其各處口岸有虛底占據租雇綱利者查出一  
體裁革另僉殷商承辦以歸核實而輕成本

一刪減繁文也領運舊例有請呈加三項名目又  
有平上去入四處截角名目其餘硃單皮票梳  
封等名目甚多不可殫述以致運司衙門書吏  
多至十九房商人辦運請引文書輾轉至十一  
次之繁經鹽務大小衙門十二處節節稽查而  
並無稽查之實徒爲需索陋規之具應交運司  
悉心查覆可刪者刪可併者併以速商運而免

羈延

一 慎重出納也商課入庫向來不分正雜籠統動支迨遇緊餉應解百計那湊因有預納減納貼色貼息及印本抵課等弊庫款之膠纏虧耗一空皆由於此嗣後永禁前項名目將正項庫貯專候部撥及應解正款其餘雜費另貯外庫不許將正款那墊更不許商人干預庫項以免弊混

一 裁選商總也淮南設有總商原以籌辦通綱公事起課滾總爲衆商表率近則公事飭議罔應

錢糧滾總不前惟辦公之項按月分管領辦任意冒開每年於定額外仍以不敷名目溢領數十萬不等且有運鹽無幾濫充總商藉以營私獲利實屬把持應請於現在各商內擇其公正醇謹行鹽最多者數人作為辦事之商遇有公事飭令核議經辦至辦公一項悉照減定額數指款請領不准冒濫加增亦不准再立總商名目永杜弊端

一酌核帶銷也庚寅綱引現已冬杪尙未開綱行運而已丑仍有未完積引三分明年辛卯卽應

開網斷不能以一年而行三綱之鹽若再推展  
敷衍徒留虛名課仍無著且庫項解支各款又  
復纏纏套搭必至仍前那掩奏銷難期核實應  
請於道光十一年正月卽開辛卯本綱所有庚  
寅未行綱引及己丑未完積引隨時帶銷另款  
存貯撥解俟將來辦有成效遇暢銷提綱之時  
仍將未完前引補銷以符原額

一積欠宜緩也查淮南北商欠累累前後不下四  
千餘萬業於連次清查銃引案內奏明分綱帶  
補尙有現在清查未經奏出者此項積欠爲數

甚鉅若卽按綱帶徵仍啟套搭之根無從劃清  
界限占礙新綱地步應分別停緩俟將來課款  
充裕時再行歸補以免牽掣內惟帑本利息一  
項因各處需用孔亟不能短少仍須在綱引內  
難徵利息以應急需

一宜恤竈丁也竈戶煎丁濱海窮民最爲艱苦宜  
加體恤查收鹽桶秤舊有定制近來場商每以  
大桶重秤任意浮收勒措致竈戶以交官鹽爲  
累而樂於透私應請嗣後由運司衙門驗烙桶  
秤頒發不准私製毋許場商再有前項情弊責

成場官隨時稽查仍嚴督竈丁按埧繳以編保  
甲復火伏以稽額煎俾清場私之源再提泰壩  
掣廳批驗所各秤一律較准烙發飭令認真秤  
驗并於運河要道之北橋處所運司親莅抽秤  
如有格外重斤卽將秤驗各官參撤示懲

一實給船價也運鹽原有定例水腳近爲埠頭串  
同商夥商廝從中勒扣該船戶亦意圖帶私甘  
心忍受且有出錢買裝者遂致腳私日恣應將  
水腳例價照實核發毋許商廝輩絲毫剋扣并  
明定章程將各船捩次編號連環保結不准仍

蹈買裝舊習亦不准盜賣商鹽查出嚴行懲辦  
並將該埠保一併治罪

一嚴究淹消也鹽船遠涉長江遭風失險亦事所  
間有向例原有津貼無非格外體恤并准批補  
沉失之鹽免其輸課近以守輪待售時日遷延  
在後各船多有盜賣將空船鑿沉其弊多由船  
戶而運商利有津貼批補且可分裝多船越輪  
先售以致轉相效尤竟以體恤爲作弊之端實  
堪痛恨嗣後淹消之案應停其津貼准其補運  
不准免課庶奸商無所覬覦如船戶盜賣捏報



淹消查出照例嚴懲治罪

一疏浚運道也通泰兩屬運河淤墊緯隄倒塌遇西水下注一片汪洋待風而行久晴輒形淺渴商鹽盤剝分裝每引花費至數錢且耽延拋散以致逗遛違限成法廢弛儀徵河道雖於道光三年大挑嗣因江潮浸灌潮落沙沉又復淤阻均應確切勘估實力挑浚深通卽以挑出之土培築大隄俾速轉運以輕商本

一添置岸店也沿江一帶安慶以下皆有專商領運自武昌下游之興國大冶等及黃州府屬各

州縣至江西之彭澤德化湖口等縣江面遠至  
八百餘里向自儀徵運鹽至漢口折回轉售於  
各岸往返徒勞腳費加重以致引地爲江船糧  
船各私所隱占應飭鹽道查明各該處口岸每  
年額銷引若干將水程預爲給發僉商運赴該  
處俾水販就近領賣水程照例彙繳以免越運  
漢口致多轉折引鹽自可廣銷

一亟散輪規也船至漢西兩岸本以速銷爲貴封  
輪捱賣其初本爲大商擡價迨守候太久遂至  
船戶盜賣攪沙灌漑過籠蒸糕甚至沉船放火

百弊叢生且成本占閤轉運更遲而大商亦病不止小商坐困矣查道光二年間辦理散輪行之有效自道光七年於三釐河費加價案內復請整輪不及三年敗壞至此今加價三釐已奉旨恩免自應散輪以符原奏現聞漢岸滯鹽不下二千萬礮大礙新綱亟須設法疏銷應派公正之員駐守漢岸會同鹽道辦理散輪事宜不許假手岸商以杜弊混嗣後不許再有整輪免致滯銷一整飭紀綱也鹽務之官志在飽煖從無甄別不遵體制或與商人聯姻換帖或與商人夥本行

鹽最爲劣習嗣後有似此者應卽呈請迴避如有朦混查出嚴行參辦其各場分司大使亦應照州縣之例察看人地隨時調換務令相宜至各省鹽道向因隔屬呼應不靈除河南引地鹽歸糧道兼理僅止一府三州仍從其舊外應請將湖北鹽道督銷功過歸兼轄鹽務之總督衙門考核會同該省督撫具奏以專責成而肅紀

綱

一 淮北宜另籌也查淮北情形與淮南迥異淮南患於積鹽不銷淮北患於無鹽到岸緣淮北三

場僻在海州每年一綱之鹽須於秋後漕船過  
竣開放雙金閘乘北運河下注之水趕運全完  
爲一年運岸之需科則每引僅一兩一錢無可  
再減惟商本甚重如五壩十損水陸節節盤駁  
最爲繁重鈎損人等視爲恒業一經更張卽至  
恃衆滋事兼以各岸浮費甚多及商夥濫銷近  
年商力疲乏已極能運秋單者僅止三數家其  
餘各商雖有認岸之名終年無鹽到岸小民無  
官鹽可食反仰給於私梟私鹽愈充則岸商益  
形裹足從前尙借助於淮南今商力已疲自顧

不暇無可接濟淮北之商竟成坐困本年由運  
庫發銀十四萬兩收買約有四萬引趕運出關  
而商運之鹽僅二萬餘引竈戶積鹽不售無計  
資生饑寒交迫之餘豈能坐而待斃計惟速籌  
補救之法除廬州府屬及滁州來安各口岸改  
由江運者尙可與淮南食岸一律整飭外至湖  
運各岸近來額引銷不及半現商惟一二苟延  
殷商畏累觀望數十年來迄無良法必得設法  
改道以清其源一面革退各岸之商另招殷商  
先籌官運以爲倡導之機一切章程另容次第

籌辦惟目下情形鹽積如山無商收買各竈紛  
紛籲求調劑勢不能任其枵腹待售應請先行  
籌款收買竈鹽以濟口食其鹽存貯各場俟來  
年秋單發運之時查照銷滯各岸遴委賢員領  
運售鹽繳價歸還原本不致虛懸

以上各條謹就臣等現查所見籌議章程其餘未  
盡事宜應隨時察核分別奏咨辦理

道光十年十二月二十九日奉到

硃批另有旨欽此同日奉到道光十年十二月二十一

日內閣奉

上諭據王鼎寶興奏請將兩淮鹽務改歸總督管理又  
會同該督籌議鹽務章程各一摺已明降諭旨將鹽  
務改歸該督管理并裁撤兩淮鹽政一缺所有會同  
酌定鹽務章程十五條均照所議行其餘未盡事宜  
仍著隨時察核分別奏咨辦理欽此





欽遵

諭旨保薦運司附片

再臣接奉

諭旨以新任運使楊振麟是否妥協勝任

敕令臣詳加察看如該員未能辦理裕如著將平素深

知者酌保一員奏請欽此查楊振麟由廣東道員升

調兩淮上年十月內經臣與前鹽臣

奏催赴任至今尙未來江無從察看此時鹽務章程

甫立一切未遑刻須籌辦新綱而商疲力乏彫敝

萬分整理維艱苟觀望而却步非得眞實任事不

畏難不避怨者弗克當斯劇任臣再四思維實難

其選惟查有江寧府知府俞德淵清淳練達猷守

兼優臣所深知雖於鹽務向非熟習觀其平日辦

事有體有用條理分明堪勝兩淮之任惟查運使

一缺例由俸深道府升補該員俞德淵在知府任

內歷俸未滿三年可否升補抑或暫行升署之處

伏候

聖裁又前署運使降調道員王鳳生昨經會議

奏留委辦場竈事宜該員勤明篤實素著清聲亦堪

重任惟係甫經降調之員應俟場竈一切事宜辦

竣再行奏明量請

恩施所有臣遵

旨酌保堪勝運使緣由謹附片具

奏伏乞

聖鑒訓示謹

奏

道光十一年二月初十日奉到

硃批另有旨欽此同日奉到道光十一年正月二十七

日內閣奉

上諭兩淮鹽運使員缺著俞德淵升署楊振麟著來京

陸  
三  
考  
シ  
ニ  
ニ  
ニ  
ニ  
ノ  
タ  
一  
一  
一

交吏部帶領引見欽此

三

覆奏儀徵紳士信稱捆鹽夫役因聞課歸場竈之  
議糾衆赴縣哀求摺子

奏爲接奉

諭旨據實覆

奏事承准軍機大臣字寄道光十年十一月二十日  
奉

上諭本日據史致儼吳椿並御史卞士雲奏接到儀徵  
縣紳士公信據稱向來淮南綱食引鹽俱歸儀徵掣  
捆數萬夫役得受傭資以敷口食因聞有鹽課改歸  
場竈之議夫役人等恐嗣後掣捆不歸儀徵頓失生

計約會千數百人赴縣奔訴該知縣已往省代稟等語兩淮鹽務敝壞已極朕特派王鼎等前往江南會同陶澍查辦其課歸場竈一節前據王鼎等具奏大概情形已委員查勘尙未據覆奏該夫役等一聞此信恐失生計遽行約會多人赴縣奔訴實是愚民無知此事關繫大局該尙書等務細心籌議如果改歸場竈實有裨益卽核實會辦妥立章程不可因該夫役等口食無資遂存畏難苟安之見但事屬改轍更張必期經久可行毫無格礙斷不可稍滋流弊以致激成事端總當體察情形酌量可行與否定議具奏

史致儼等所呈原信著發給閱看將此諭令知之欽  
此仰見

聖訓周詳莫名欽感伏查兩淮鹽務爲游民衣食之場  
平時依倚商門苟圖溫飽者蟻附蠅營不可勝數  
遇有整頓慮不便於若輩或編造歌謠或捏成蜚  
語頃刻傳播混圖挾制掣肘多端由來已久卽如  
黃玉林不過一緝私眼線之人同夥幾何乃稱其  
江海連絡呼吸千里却通憑空捏造搖惑衆聽如  
果屬實則黃玉林正法時豈得無一人過問臣王  
鼎寶興駐江兩月始悉底裏所見與所聞迥不相



符此次儀徵捆夫跪求該縣王用賓於十二月初  
四日進省經臣面詢不過愚民無知恐捆鹽失業  
焚香跪求則有之何至如紳士所云四五千人哀  
求乞命哭聲滿路市鋪關歇貨物不通且查閱書  
信內稱就場沽賣掣捆不在儀徵生計全無死亡  
立見現已搶奪公行民難安堵愴切不忍罄言又  
云星使同駐省城風聞事在必行當此迫不終日  
之勢又萬無可解之機重賴拯援化凶爲吉等語  
無論跪地哀求與搶奪公行情形不類且搶奪必  
有報案何不指列姓名徒託空言

國家大計如果課歸場竈有益豈能任無知愚民把持阻撓臣於王用賓來見時卽飭令訪拏倡求首犯數人照律究懲以儆刁風至兩淮藉鹽爲食之人不下十數萬衆不獨儀徵爲然臣等初次覆奏摺內卽聲明搗鹽般壩夫役繁衆一旦失業無賴必多早已籌慮及此祇因辦理嚴密外間無從探聽致該紳士虛抱杞憂揚州風氣浮僞卽此可見現在鹽務章程已定毋庸更議民情均極敦謐臣王鼎寶與臨行接奉

諭旨移交臣縷悉具陳謹據實覆

奏仰紆

宸注所有史致儼等鈔呈紳士書信一併附繳伏乞

皇上聖鑒謹

奏

道光十一年二月初十日奉到

硃批知道了欽此又於有益句傍奉

硃批所論是又於訪拏倡求首犯數人句傍奉

硃批所辦甚好欽此

恭繳鹽政養廉並裁鹽政衙門浮費摺子

奏爲恭繳鹽政養廉裁減衙門浮費仰祈

聖鑒事竊照兩淮鹽務欽奉

諭旨改歸總督管理所有鹽政每年額支養廉銀五千

兩向在雜款應解項下動支惟查臣本任總督養

廉已極優厚并有例支

恩賞辦公之泰壩永豐壩公費已足敷用是以臣於上

年到總督任後即將鹽務向送賞需銀二萬兩全

行裁革此時鹽務改歸其鹽政養廉銀五千兩應

行恭繳歸入節省項下解交戶部充用至鹽政衙

門浮費較多前經戶部臣王鼎臣寶興會同臣分

別裁減在案茲鹽務改歸總督管理更應大加刪  
減除緝私賞號不能全無前經裁減四成外其經  
書人等有辦理稿件之責衙門雖裁辦事如舊人  
數未能多裁現將工食裁去四成其餘酬酢巡捕  
匠作結綵涼篷聯額作坊坐船浴堂橋旗撲毬掉  
轎廚夫藥匠鐘表裝潢匠等項全行裁汰此外執  
事人役應需辛工紙張飯食有應全裁者有應歸  
併者有應酌留者均經細加釐定統計鹽政衙門  
前後裁減每歲費用銀十六萬兩有零至外支浮

費及運司衙門濫支各項應飭查明一併刪減  
仰荷

天恩委任惟有身先節省隨事留心以期省一分之浮  
費卽減一分之鹽價庶官引得以暢銷民商均歸  
便益仰副我

皇上整飭紀綱之至意所有恭繳鹽政養廉及裁減衙  
門浮費緣由謹繕摺具

奏伏乞

皇上聖鑒謹

奏

道光十一年二月二十四日奉到

硃批所奏甚是另有旨欽此同日奉到道光十一年二月十一日內閣奉

上諭陶澍奏恭繳鹽政養廉裁減浮費一摺所奏甚是兩淮鹽政每年額支養廉銀五千兩向在雜款應解項下動支現在鹽務改歸總督管理其應支總督養廉優厚足敷辦公所有鹽政應支養廉銀兩著歸入節省項下解交戶部充用至鹽政衙門浮費較多除緝私賞號及經書人等工食均裁減四成巡捕匠作等項全行裁汰此外執事人役應需辛工紙張飯食

分別裁併酌留統計前後裁減每年費用銀十六萬  
兩有零其外支浮費及運司衙門濫支各項俱著查  
明一併刪減該督務當隨時整頓以節浮費而暢引  
銷欽此





籌議加斤減價兼疏積引摺子

奏爲籌議加斤減價以速新綱兼疏積引裕課便民  
仰祈

聖鑒事案查兩淮鹽引積滯由於成本過重賣價增昂

以致私販盛行截流必先清源經臣會同臣王鼎

臣寶興

奏請釐剔舊章首重裁革浮費減定根窩以輕運本

卽以輕賣價如科則項下已丑綱向定每引五兩

二錢零現於外支辦公等項約裁減銀六十萬餘

兩每引減爲四兩一錢零又於商人成本各款內

革除規費銀約二百萬兩向併科則每引該銀十二兩三錢零現減爲每引十兩二錢零均係核實釐定實已無可再減惟是按引計斤核算每斤賣價所減祇及一分較之私鹽賤價尙屬懸殊不足以敵私兼場商近多消乏不能收鹽久貯鹽質甚嫩滷耗尤多迨沿途盤運解捆掣驗拋灑消耗更鉅是以從前商人赴場捆運每引於定額三百六十四斤之外仍帶加三配割及

恩免課鹽二十斤尙有包內所帶之私不下百數十斤通計每引幾至五百斤有零暑月加耗不在其內

比之原額數甚浮多公私混淆漫無稽察歷來辦  
鹽非不知其有弊祇因拋灑等耗不能不藉資彌  
補其每包多帶鹽斤所省課銀無幾所省運腳甚  
多然且辦運竭蹶今當立法之初事期核實若全  
行裁革祇准照三百六十四斤額引捆運每引遽  
少鹽百數十斤而每包運腳仍不能少則商人無  
利可圖難免虧折不特不能減輕賣價更恐暗又  
增高於疏銷轉有窒礙若復因循舊貫陽奉陰違  
更非整理積疲之道伏查鹽法志載雍正二年前  
兵部尙書盧詢

奏准加斤減價每引加鹽五十斤又兩淮鹽引自嘉

慶十年加十斤不入成本以補虧折道光七年

奏准連新舊加鹽二十斤扣足三年停止上年九月

限滿前鹽政

臣

福森奏請展緩三年經戶部議駁

各在案是加斤減價敵私及不入成本以補虧折

歷經

奏辦有案當此商情疲敝已極若責令照額抽鹽自行賠補拋耗既勢有未能非裹足不前卽百計遮掩仍圖夾帶隱占新綱無補課額因思場竈之所乏者非鹽苦於鹽多無售以致偷漏販私民間亦

非樂於食私苦於鹽價太昂遂至貪圖買賤自  
國家定額以來生齒日繁而引不加增鹽反滯銷者  
固由梟販充斥亦商人之暗中夾帶實甚彼既瞞  
官不滿私費愈多而利益薄因之銷鹽不銷引課  
既絀而商亦窮積敝至此與其暗中夾帶不如明  
予加斤蓋暗帶則挾制者衆而虛耗轉以虧官明  
加則稽核易行而貼補可期減價疏新導滯無逾  
於斯臣與署運司悉心察訪再四籌商惟有據實  
奏明每引摺鹽酌爲加數以五百斤出場除額鹽三  
百六十四斤外仍照案仰乞

天恩賞加鹽二十斤并例給暑月滷耗十六斤作為常年拋灑照例准其免課不得再加暑耗名目其餘所加一百斤查庚寅未行綱引及己丑未完積引三分前經

奏明隨時帶銷應請卽以此項帶銷之鹽作為新引加斤照依新綱科則每斤完納正課錢糧其餘外支雜費卽無庸加派約計本綱可帶完前綱正課銀五十餘萬兩不及五綱卽可將己丑庚寅未完正課帶補全完再行接補應帶雜徵銀兩如此則積引既可漸清加斤亦歸有著商力并得稍紓兼

裕數十萬之課項借以彌補舊欠緊款所有賣鹽  
價值卽可照現數核辦計每斤又可遞減五六釐  
統計前後減數足以敵私民間自不致再圖食賤  
而餘鹽有收卽窮苦竈戶亦藉資蘇息商運轉輸  
不致喫力當可踴躍急公無虞窒滯其鹽斤經過  
泰壩儀徵等處原有稽查稱掣舊章經臣等  
奏明掣定秤桿認真盤驗使其無從夾帶茲復明定  
加斤商人無可藉口自不難從實核辦如再有顆  
粒私增定卽嚴提重懲以絕隱私而裕

國課兼便閭閻

臣

因鹽引新舊積滯亟思補救疏通

奏疏

三



之法謹援案據實請

旨恭摺具

奏伏乞

皇上聖鑒訓示施行再准北摺運情形容俟悉心籌察

另行核辦合併陳明謹

奏

道光十一年二月二十四日奉到

硃批戶部核議具奏欽此

2812.3586 601

酌擬鹽務人員改補調署章程摺子

奏爲酌擬鹽務人員改補調署章程仰祈

聖鑒事竊臣前於遵

旨覆奏鹽務官員另議通變一摺欽奉

上諭陶澍奏籌議稽察商人及鹽務各官員各情一摺

兩淮鹽政現經裁撤所有巡捕等及各項人役俱着

全行裁撤以省繁費至鹽務各官除場大使外僅有

南北監掣二員通泰海運判三員司經歷知事庫大

使各一員巡檢二員額缺甚少不必裁省其候補之

員人數太多著該督另議變通或改歸地方或回籍

候調至現任人員卽照州縣之例隨時量爲調換務期人地相宜倘或無可調換著於地方官遴員以資振作該部知道欽此伏查兩淮額設監掣同知二缺運判三缺鹽場大使二十三缺批驗大使二缺經歷庫大使知事各一缺巡檢二缺遇有出缺各就本班候補人員捱次補用巡檢二缺向以知事借補至委署章程則以大使經歷知事合爲一班相間輪委又有巡緝差使如泰壩子鹽溱潼海安等處均係屆期更換約計每班各留五六十員已足敷差委今兩淮候補各班積至一百五十餘員之

多不獨補缺無期仕途壅塞卽差遣亦難徧及優劣無從周知况當此刪減繁費之時豈容虛糜薪水自不得不另議變通之法所有厯屆分發人員內除名次在前及現已委署到班或先經記功超委之員自應酌留其熟悉鹽務情形諳習勾稽出納者亦俱留資驅策此外雖於鹽務未經諳練而於地方公事尙能明晰可期造就者擬請分別改撥以期漸次疏通查定例運判到省在五年以上尙未得缺如該員補足知縣捐項銀兩請以知縣改補者亦准該督撫遇有中簡知縣調補所遺員

三三  
缺仍按從前到省日期與各例試用人員一體比較到省先後題請署理如才堪勝任並無貽誤俟試署年滿出具切實考語送部引

見可否准其補授之處恭候

欽定至鹽運司經歷補足鹽大使銀數後以改捐上庫之日與輪班應補之捐納試用鹽大使比較到省先後補用何例到班卽與何例比較以上運判經歷二項補捐銀兩各按各例分別辦理得缺後俱照現缺陞轉又各省鹽運使知事到省試用在五年以上尙未得缺遇有巡檢典史應歸月選之缺

以從前到省日期與捐納試用人員統較日期先後酌量試署實授後卽照現補之缺計俸陞轉遇鹽運司知事缺出不得再以該員請補各等語今兩淮改補係因缺少人多兼資節省起見所有運判知事二項應請無論已未試用五年均准呈請改補運判仍照例繳足捐項統俟扣滿五年期限再與輪班應補之員比較到省先後補用至大使經歷等官雖向未辦有改補地方成案似可援照運判知事之例推廣通行擬以大使經歷改補州判及布政司庫大使按察司知事府經歷縣丞五

項內有應繳捐項者均令其照例繳足仍按班次先後補用現在江蘇省候補知縣首領佐雜不過一百數十員並未多於鹽務而額缺較多數倍且已經奏明停止分發可無擁擠之虞如此一爲變通官常既可肅清人材亦不致廢棄地方鹽務均有裨益俟奉到

諭旨後飭令就近在藩運兩司衙門具呈由臣衙門據詳分別題咨辦理倘各員中有情願回籍候調者聽其自便至丁憂告假及差務未竣各員另由鹽運司隨時核辦再現任各鹽場大使有稽查竈煎

催徵折價之責最關緊要實與地方州縣無異現  
在各員有人地未宜者亟應遴員更調俾資整理  
惟實缺中一時竟無員可調未便因循貽誤應請  
於地方現任府經縣丞中擇其廉能勤幹者隨時  
調署或酌量人地彼此對調或於候補知縣中揀  
員借補仿照河工大挑知縣借補佐雜之例以原  
銜陞轉其撤回各員卽以府經縣丞改補總期稱  
職相宜共圖振作以仰副

聖主塵懷鹽務勉勵周詳之至意所有酌擬改補調署  
章程謹具摺奏陳伏乞



皇上訓示遵行謹

奏

道光十一年四月十八日奉到

硃批該部議奏欽此

陶文毅公全集卷十三目錄

奏疏 鹽法

籌議稽查糧船夾帶私鹽摺子

淮北商力積疲請借項官督商運附片

酌定楚西鹽船到岸限期並委員巡緝以杜夾帶

次盜賣各弊摺子

陳奏岸鹽廣銷並嚴拏侷匪懲辦附片

覆奏課歸場竈之說未敢遽行摺子

淮北滯岸請試行票鹽附片

淮南奏銷展限摺子

查禁艚船帶私摺子

回空軍船夾帶私鹽請照上年章程嚴行查禁并

飭堵川私濫私摺子

奏疏 鹽法

籌議稽查糧船夾帶私鹽摺子

奏爲籌議糧船夾帶私鹽請治其源扼要稽查以收  
實效仰祈

聖鑒事竊照江西湖南湖北安徽等省回空軍船夾帶  
私鹽定例綦嚴連年條陳利病者多而弊仍未除  
併且日有甚焉固由掩耳盜鈴奉行未力實亦稽  
查鮮要弊源未清之故何謂弊源未清天津商人  
利於鬻私甚至在於公埠明目張膽而爲之其弊  
一公埠雖有印票限以斤數而帶私者並不請票

鬻私者並不填票徒法難行其弊二青縣靜海滄  
州交河南皮各州縣臨河商店存鹽過多並不按  
應領應銷實數率付糧艘以鄰爲壑其弊三私鹽  
窩囤存積河干專候糧船經過千夫運送萬人共  
見兵役巡查翻無知覺其弊四糧船裝私均用小  
船載送天津河下私船如織圍繞糧艘白晝上載  
地方文武熟視無睹其弊五江廣糧道趕辦新漕  
不能親押回空查私之責惟資幫弁其懦者畏難  
苟安不肖者知情故縱遇有緣事革職往往糧船  
代爲捐復按股攤貲卽在夾帶之內其弊六丁舵

水手費本無多緣有奸民名爲風客出本買鹽哄  
誘分利在南則裝載木植紙張瓷器雜貨抵津易  
鹽在北則天津土棍預買囤鹽候船裝載盈千累  
萬幾及淮引全綱之數縱有犯案舵水甘心認罪  
從不將風客供出固結不解其弊七以上各弊皆  
爲糧私橫恣之根必應整飭伏讀近奉

上諭軍船私帶之弊以江廣爲最亦不獨江廣爲然其  
透漏鹽斤之弊以天津爲最亦不獨天津爲然與其  
按獲於旣帶之後不若嚴禁於未帶之先等因欽此  
仰見

聖明洞燭無微不至所有天津一帶于家堡楊柳青獨  
流等處及滄州之磚河地方現經直隸省委員巡  
查自可堵截固販嚴拏私艇有犯必懲以杜弊源  
一入江南地界臣卽委徐州鎮道大員嚴密迎查  
兼防河北漏私并於楊莊勾水起卸渡黃之後應  
於揚州之控鹽廳停泊待查惟該處河道窄隘易  
致阻礙行船其時臣駐清江浦督催回空自可就  
近酌派文武帶同兵役量擇上游一帶河道稍寬  
之處照例梭檢隨查隨放如有例外多帶無論包  
鹽散鹽塊鹽及鋪船墊底醃雜蘿蔔各物之鹽皆

應起除跟追風客加等嚴治幫弁旂丁一併參懲  
至駛出大江之後如老虎涇青山頭等處濱江洲  
汊多有梟匪私鹽暗遞糧船且因向例有船至大  
江不可攔阻誤運之文舵水人等卽藉此沿途逗  
遛賣私遲至冬杪尙未歸次轉多貽誤伏查漕運  
則例載乾隆三十年奏准糧船夾私在南則盤糧  
廳揚州儀徵瓜洲等處俱專委文武官按查等因  
足見出江以後仍應嚴查祇因廢弛已久僅在揚  
州一帶按於北而遺於南遂至江路多私應將瓜  
儀按查委員派至九江蕪湖等處會同關督按船



嚴查既不致另有耽延而梭查益昭核實其餘濱  
江沿途各口仍照定例糧船在何處卸鹽卽應何  
處查拏不但江私可靖卽催趲亦得迅速矣至水  
手人等向遇梭查嚴緊輒棄船四散混圖挾制委  
員恐誤歸次往往敷衍了事以致肆無忌憚自應  
申明定例一船之內丁舵爲主水手有犯責在旂  
丁如有逃匿一面嚴拏究懲一面督飭弁丁另雇  
水手駕船回次卽使稍延旬日儘可照湖南軍船  
送米岳州之例趕幫受兌不致有誤而舵水無辭  
挾制庶幾知盤查旣緊夾帶自稀仰副

聖主整飭離綱之至意所有現在籌辦稽查糧私各緣  
由謹縷悉陳明恭摺具

奏伏乞

皇上聖鑒謹

奏

道光十一年五月十九日奉到

硃批另有旨欽此同日奉到道光十一年五月初八日

內閣奉

上諭陶澍奏籌議糧船夾帶私鹽請扼要稽查一摺江  
西湖南湖北安徽等省軍船往往回空時夾帶私鹽

必應嚴行查禁據陶澍奏天津一帶于家堡楊柳青  
獨流等處及滄州之磚河地方現經直隸委員巡查  
著琦善嚴飭該員等查拏私艇堵截回販有犯必懲  
以杜透漏迨入江南地界著該督派委徐州鎮道大  
員嚴密迎查兼防河北漏私楊莊勾水起卸渡黃後  
應於揚州之按鹽廳停泊待查惟該處河道窄隘易  
致阻礙行船著該督酌派文武員弁量擇上游一帶  
河道稍寬之處照例按查隨查隨放如有例外夾帶  
鹽斤悉行起除根究出本質鹽之風密加等嚴治幫  
弁旂丁一併參懲至駛出大江以後著將瓜州儀徵

按查委員派至九江蕪湖等處會同各該關監督按  
船嚴查所有水手人等向遇按查嚴緊輒棄船四散  
以圖挾制委員恐誤歸次往往敷衍了事遂致肆無  
忌憚自應申明條例一船之內丁舵爲主水手有犯  
責在旗丁如有逃匿一面嚴拏究懲一面督率弁丁  
另雇水手駕船趕幫受兌不致有誤該督務當督飭  
所屬認真稽查俾糧私淨盡以清弊源而收實效餘  
著照所議辦理欽此

平家物語卷之三十一

三

淮北商力積疲請借項官督商運附片

再淮北商力積疲已久上年發運秋單時能趕發場鹽存壩運銷者僅止數人其餘各商雖有認岸之名終年無鹽到岸小民刻虞淡食轉仰給於鄰私而各場竈產鹽積如山無商收買窮竈乏資餬口前經

欽差大臣王鼎等會

奏查辦淮鹺事宜十五條內議請湖運各岸應行革退乏商另招股商先籌官運以爲倡導之機一面籌款收買竈鹽以濟口食仰蒙

俞允在案茲臣督同運司詳加查察淮北引鹽額行河南安徽江南四十九州縣除江運之無爲州等八處運腳較省向稱暢岸有商承運外其餘綱食口岸四十一處商人十七家有一商而認數岸者有一岸數商公認者其力可支持僅有二三家餘皆無力辦運本應另招股商接辦因疲累久著人皆視爲畏途僉辦招徠一時難得其人且久無到岸之引各處需鹽孔迫不得不先籌運濟惟委官運辦窒礙甚多而借銀給商又難歸款止有暫籌借項官督商運之一法較之專委於官專借與商尙

有把握查永豐壩現有存貯歷次運庫發銀收買  
官鹽九萬一百七十二引應擇誠實商人借給水  
腳領運分赴各岸併遴員督運俟其到岸售有課  
銀收回應完錢糧及鹽價借項繳庫歸款其各滯  
岸銷鹽本屬無多卽由附近暢岸隨時撥往接濟  
免致盡爲私占第自壩渡黃過湖至岸運費浩繁  
若以存鹽而計共需運腳銀四十餘萬兩方能全  
數運竣現在庫貯支絀無項可動而事關北岸全  
局又不得不量爲籌辦仰懇

天恩俯准於已丑殘引加斤案內帶徵課銀催商趕緊



交完先酌動銀二十萬兩以十二萬兩爲前項運  
腳之需輓轆轉運其餘八萬兩因海州分司所屬  
板浦中正臨興三場運商久不捆鹽竈戶枵腹待  
售困苦已極應查照上年原

奏辦理趕緊收買以濟竈艱卽將收買之鹽存貯各  
場俟本年秋單發運至壩飭商領運繳價還庫仍  
將收買發運事宜責成淮北監掣同知陳在文一  
手經理以專責成仍趕緊招商接辦庶積困或可  
稍甦感沐

鴻慈益無旣極據陞署兩淮運司俞德淵議詳前來理

合附片陳明伏乞

聖鑒謹

奏

道光十一年五月十九日奉到

硃批另有旨欽此同日奉到道光十一年五月初八日

內閣奉

上諭陶澍奏淮北商力積疲請暫籌借項官督商運等語  
淮北商力疲累已久此時招商另辦難得其人且  
各處需鹽孔迫不得不先籌運濟據該督查明永豐  
壩現有存貯歷次運庫發銀收買官鹽九萬一百七

十二引應擇誠實商人借給水腳領運分赴各岸并  
遴員督運俟其到岸售有課銀收回應完錢糧及鹽  
價借項繳庫歸款其各滯岸銷鹽無多卽由附近暢  
岸隨時撥往接濟所需運腳銀兩著照所請准其在  
於已丑殘引加斤案內帶徵課銀催商趕緊交完先  
行酌動銀二十萬兩以十二萬兩爲前項運腳之需  
其餘八萬兩因海州分司所屬板浦中正臨興三場  
運商久不抽鹽竈戶困苦著查照上年原奏辦理趕  
緊收買卽將收買之鹽存貯各場俟本年秋單發運  
至壩飭商領運繳價還庫所有收買發運事宜卽責

成淮北監掣同知陳在文妥爲經理仍趕緊招商接  
辦以肅鹺政欽此



酌定楚西鹽船到岸限期竝委員巡緝以杜夾帶  
盜賣各弊摺子

奏爲酌定楚西等省鹽船到岸限期竝委員巡緝以  
杜夾帶盜賣各弊仰祈

聖鑒事竊查兩淮鹽額每年應行引一百六十九萬五  
千道零自道光六年丙戌綱統引五分未行七年  
丁亥綱全統未行八年戊子綱亦銷未完數九年  
己丑綱雖報行鹽七分仍多未行至十年庚寅竝  
未開綱此五年內通計牽算每年僅銷引七十餘  
萬道且戊子己丑二綱仍有已請未運引十三萬

七千八百三十餘道統計每年所銷之鹽不及額引十分之四皆由私鹽占礙銷數而船戶串同商夥商廝私帶鹽斤沿途逗遛盜賣或捏報淹消或私自折回購買私鹽復行運往輾轉耽延動輒經歷半年數月之久方始到岸實爲官引滯銷之根必須整頓查楚省商運江船行走限期定例自儀徵開行裝四五六七引之小船限一個月到岸裝八九百引至一千二百引之中船限四十日到岸裝一千三百引以上至二千四百引之大船限兩個月以內抵岸倘遇風大難行該商將實在

不能依限緣由報明該地方官轉報行銷省分督撫鹽道稽查如沿途無故逾限分別責懲等因是舊例本爲周密惟運鹽至江西省向未定有限期應卽仿照一律酌定查儀徵至楚省漢口地方計程一千六百餘里儀徵至江西星子縣青山地方一千四百餘里以楚省限期比較其小船應定限二十日中船定限三十日大船定限五十日責成淮南監掣同知於商人雇船運鹽前赴楚西必視引數之多寡定雇船隻之大小總以裝滿九分爲率不許留有空艙致多夾帶至安徽河南各口岸



鹽船既分江湖兩運兼有換船起剝之處與楚西之專行大江者不同其船亦竝無大小應以淮安城北烏沙河開運之日起定限每日行三十里將盈補絀按程途之遠近扣日期之多寡責成淮北監掣查驗開行均不得留艙夾帶仍將開行及到岸限期竝勾量喫水尺寸另給催趲限單抵岸投驗由各該鹽道認真查對倘有中途風水阻滯亦照楚省舊例准其據實呈報如逾限不到卽行查辦根究庶商人船戶知有定限自不敢任意遲延至夾帶賣私之弊楚西一路爲甚往往鹽已賣盡

卽捏報淹消溯查從前曾委武職參游守備分在江面巡緝嗣於嘉慶年間因日久懈生議以裁撤應請仍復舊規每屆半年酌委參遊守備或文職二員自儀徵大江溯流巡緝至湖口分路一往江西一往漢口仍由原路查回儀徵換員前往接巡旣責以訪查夾帶賣私捏報淹消等弊又可沿途催趲行運則諸弊可冀漸除所委之員仍隨時查察勤惰分別勸懲用昭核實所有酌定鹽船到岸限期及委員巡緝緣由理合恭摺具

奏伏乞

皇上聖鑒謹

奏

道光十一年六月初四日奉到

硃批另有旨欽此同日奉到道光十一年五月二十日

內閣奉

上諭陶澍奏酌定楚西等省鹽船到岸限期竝委員巡緝以杜夾帶盜賣一摺楚省商運江船行走限期舊例已爲周密惟運鹽至江西省向未定有限制據該督查明程途比較楚省限期酌定著照所議小船定限二十日中船定限三十日大船定限五十日責成

淮南監掣同知於商人雇船運鹽前赴楚西視引數之多寡定雇船之大小以裝滿九分爲率不許留有空艙致多夾帶至安徽河南各口岸鹽船旣分江湖兩運兼有換船起剝之處其船竝無大小著以淮安城北烏沙河開運之日起定限每日行三十里將盈補緦按程途之遠近扣日期之多寡責成淮北監掣查驗開行均不得留艙夾帶仍將開行及到岸限期並喫水尺寸另給催趲限單抵岸報驗由各該鹽道認真查對倘有中途風水阻滯照楚省舊例准其據實呈報如逾限不到卽行查辦至夾帶賣私之弊楚

西一路爲尤甚往往鹽已賣盡卽捏報淹消從前會  
委武職員弁巡緝嗣經裁撤著仍復舊規每年酌委  
參遊守備或文職二員自儀徵大江溯流巡緝至湖  
口分路一往江西一往漢口仍由原路查回儀徵換  
員前往接巡責令訪查夾帶賣私捏報淹消等弊並  
令沿途催趲行運毋任稍有逗遛其所委之員該督  
仍隨時查察勤惰分別勸懲總須認真辦理杜絕諸  
弊俾鹽引暢銷礙務日有起色不可虛行故事日久  
仍視爲具文以致有名無實該部知道欽此

陳奏岸鹽廣銷並嚴拏僞匪懲辦附片

再兩淮鹽務自新章旣立刪除積弊鹽價稍減銷路漸通祇因五六月內各口岸雨水爲災售數有滯自入秋初菜市正旺現查七月內漢岸銷數惟十三日風雨未經售鹽其餘每日銷子鹽四五萬包至七八萬包並有銷至十一二萬包者統計自正月十一日起截至七月二十九日共銷鹽一千六百五十六萬七千餘包計引三十五萬五十九百有奇銷數之廣爲頻年所未有惟所銷皆係往年已經納課遲滯之積鹽此時尙剩二十五萬餘

引計冬間方能銷訖從此截清界限銷行辛卯綱  
新鹽堅守章程不令擾混再將糧私一靖鹽務可  
望起色現在湖北查辦腳私極爲認真儀徵爲捆  
鹽之所尤須嚴查夾帶經臣疊飭實發水腳毋使  
船戶藉口帶私其沿河訛詐黑費之匪徒前後訪  
獲不下百餘均經懲儆業已肅然惟有窮民艚船  
一項裝載私鹽積少成多數百成羣查有匪棍藉  
災爲名雇覓老幼男婦裝點偷越當此災年正應  
舍禁去幾之時旣不便索及災民而梟棍匪徒斷  
不容其溷合自應設法分別辦理復經臣派委員

弁帶領兵役在於揚關駐查如係老弱災黎帶鹽  
無幾准予給價收買以資矜卹其鹽卽交垣捆運  
免致混入腳私如係匪徒雇覓裝載立刻拏現  
亦均知斂跡至回侷多係鳳壽等處獷悍之徒帶  
刀逞兇爲害地方不止於販私必應驅除臣前於  
七月內路過三汊河等處聞有回侷與船船搶奪  
及拒捕之事卽經札飭各營縣無分畛域四面兜  
拏旋據會稟拏獲匪犯丁雲霞等十六名又據奇  
兵營稟獲侷匪耿金連等十五名瓜洲營先後拏  
獲匪犯朱雲青蔡六等六名王義魁等九名揚州



營先後拏獲匪犯耿金剛李信春等十一名張正祥等十五名又續獲唐盛林等十二名李如魁等六名又據京口營先後獲匪王裕堂等及倭匪劉金亮等六名又督同高資營追獲徐貴等十名又獲魯士連等三名梁太等四名又據三江營守備稟截獲許正鳳張湧等四名並獲于金堂周占元等十八名以上各犯均係各營縣協獲並起有槍劍撲刀等物及鹽斤船隻經臣飭發運司督同府縣研訊分別懲辦至地方無賴棍徒藉災滋事尤爲可惡前經泰州拏獲倚衆訛索之王玉林等又

桐城縣拏獲過糶傷官之程瀛等均經臣豐飭從  
嚴究懲總使有犯必懲刁風自息於災區可期救  
輯謹附片縷陳仰慰

宸廑謹

奏

道光十一年九月二十二日奉到

硃批覽奏深慰朕懷看此光景今歲江南雖罹水患來  
年以後自必漸復舊規裕國而安民通商而除害汝  
爲幹國良臣而朕亦獲知人善任之美名實有厚望  
焉一力勉行勿怠欽此



覆奏課歸場寵之說未敢遽行摺子

奏爲遵

旨核議鹽務條陳各件通盤籌畫恭摺覆

奏仰祈

聖鑒事竊臣節次承准軍機大臣字寄欽奉

諭旨將侍講學士顧莼奏請課歸場寵光祿寺卿梁中

靖請就場收稅各一摺

飭交臣悉心籌畫核議具奏又前後遞到太僕寺少卿

卓秉恬請仿照王守仁贛關立廠抽稅一摺江西

巡撫吳光悅請撤商歸寵徵其課稅一摺均奉

旨交

臣

與湖廣江蘇江西湖北安徽河南各督撫悉心

妥議具奏各等因

臣

查諸

臣

所請變通鹽法其說

不一皆主於化梟爲良無官無私立意誠爲甚善

惟

臣

再四籌畫通盤合計仍有未敢遽議更張者

兩淮鹽課甚重三倍於江蘇全省之錢糧非通泰

海一隅之場地所能歸入若徵之於竈則沿海窮

民家無長物卽謂鹽歸丁賣不患其貧而一池一

鍬獲利幾何豈能以數百萬之鉅款散而責以完

納若欲就場收稅則又弊竇易滋蓋鹽之爲物與

布帛菽粟同功而不同用布帛菽粟隨處所有成

本重而課稅輕然且不免於透漏若鹽在場竈每斤僅值制錢一二文一經收稅則價隨課長爭其利者必多海濱廣斥民竈雜處池以掃鹽凡有箕帚者皆可掃鏹以煎鹽凡有鍋竈者亦可煎將比戶皆私課稅且因之而更細至於設廠抽稅或可試於一隅若行之於各省則與就場設官徵稅之法地不同而流弊同緣各省道路四通八達凡鹽所從入之地安必處處皆有隘可守繞越漸私轉恐比場竈爲更甚總之無官無私必須無課無稅而後可業經有稅有課卽屬有官有私如謂一

歸場竈一設鹽厥卽可上裕

國帑而化梟爲良竊恐有所未能且此數說者皆本於唐臣劉晏聽其所之之一語故諸臣皆以爲化梟之良策其實劉晏權鹽卽今商運之法所謂亭戶糶商人是也晏建常平鹽倉數千商運不至則減價以糶置巡院十三以捕私鹽姦盜爲之衰息是晏恐遠省缺鹽及商竈漏私已於聽其所之之先大有布置並非僅聽其所之而遂能化梟爲良也且晏當日係總天下之鹽而權之故能聽其所之今則某省食某處之鹽各有口岸若淮鹽任其

所之必至南侵浙閩北侵蘆潞兩淮未收其利而  
他省已受其害矣倘因此遂改天下之鹽法盡歸  
於場竈則紛更愈甚關係愈大利權不操於上必  
移於下恐豪強兼併之徒得據爲利其患有甚於  
私梟者是以上年冬間臣與尙書王鼎等通盤籌  
酌業將課歸場竈及就場收稅種種窒礙之處詳  
細聲明會同具

奏在案至分地銷鹽課歸商辦原係

國家成法第因日久弊生浮費愈增而愈多錢糧亦  
愈加而愈重卽如每年應解之帑利七十餘萬其



借本早罄於前人彼時鹺務猶堪敷衍又有此一  
千餘萬之借本供其揮霍是以中枵而仍能粉飾  
於外今則各項竭蹶無本可借而轉須爲前人歲  
償其利息此外節省之款又有四十餘萬兩亦係  
沿襲於昔年而加徵於此日以致負重難勝沈痼  
從此而甚臣於萬難措手之時力求補救自接印  
以來疏通積引懲辦私梟現據湖廣督臣函稱漢  
岸舊鹽銷完新鹽業已開秤卽糧船水手素稱強  
悍而本年回空亦未敢仍前夾帶倘再能多辦新  
引似可望漸有轉機無如自三月開綱以來始而

章程初定商情不無觀望繼而被水成災場竈又多漫淹加以商本乏竭力能辦運者不過十數家設法支持勉圖接濟此等情形總緣從前之受病太深故此日之復原非易也臣自維愚昧實不敢謂計出萬全惟有殫精竭慮認真督辦并札催運司諭飭各商乘此旺銷之時設法趕運俟本綱限滿之後倘能得有起色則

本朝二百年來之成法卽無庸另議更張萬一無可挽回再行據實奏明另行籌辦總期於鹺務實有裨益斷不敢稍存成見亦不敢推諉卸責致負

聖主委任之至意所有臣通盤籌畫隨務悉心計議緣

由理合恭摺具

奏伏乞

皇上聖鑒謹

奏

道光十二年正月初五日奉到

硃批另有旨欽此

淮北滯岸請試行票鹽附片

再淮南商力雖疲然自開綱以來尙捆運至五十餘萬引淮北則止捆二萬餘引較定額不及十分之一實屬疲憊已久臣前與尙書王鼎等會議時卽經聲請另行籌辦本年奏准借動帶運殘鹽課銀二十萬兩將官收竈鹽督商辦運均係擇其暢銷之岸先行運往以冀早將庫項收回而滯岸仍無鹽濟售民間旣無官鹽不得不買向民販竈丁積有餘鹽亦不能不賣與民販臣體察情形擬將暢岸仍歸商運其餘滯岸卽仿照山東浙江票引

兼行之法於海州所屬之中正板浦臨興三場分  
設行店聽小民投行購買運往售賣擇各場要隘  
之地設立稅局給以照票註明斤數及運往何處  
售賣字樣凡無票及越境者仍以私論如此通融  
辦理俾竈丁民販皆獲有生計而所收稅銀又可  
補正課之不足臣拜摺後卽札行運司妥議條款  
酌量試行如果行之有裨再當漸次推廣設使行  
之不便亦不難於停止理合附片聲明伏乞

聖鑒謹

奏

道光十二年正月初五日奉到

硃批另有旨欽此同日奉到道光十一年十二月二十二日內閣奉

上諭陶澍奏開綱以來淮北祇捆二萬餘引較定額不及十分之一本年將官收竈鹽督商辦運均擇暢銷之岸先行運往以冀早收庫項而滯岸仍無鹽濟售民間既無官鹽不得不買向民販竈丁積有餘鹽亦不得不賣與民販等語著照所請淮北暢岸仍歸商運其餘滯岸卽仿照山東浙江票引兼行之法於海州所屬之中正板浦臨興三場分設行店聽民投行

購買運往售賣擇各場要隘之地設立稅局給以照  
票註明斤數及運往何處字樣凡無票及越境者仍  
以私論著陶澍卽飭運司妥議條款酌量試行該部  
知道欽此

淮南奏銷展限摺子

奏爲鹽務奏銷屆期遵

旨奏明稍寬時日辦理並察看淮北未盡事宜分別核  
辦以清界限仰祈

聖鑒事竊

臣奉

命管理兩淮鹽務於道光十一年三月開行辛卯新綱  
先於二月初六日承准軍機大臣字寄正月二十  
七日奉

上諭陶澍奏接受兩淮鹽篆並陳現辦情形一摺據稱  
兩淮鹽務積弊之後章程甫立節目尙多現在商人



力能辦運者不過二三十家新商僉募尙需時日兼之漢口積引不下數千萬祖非兩三月所能罄盡江西情形亦然前綱旣滯則辛卯新鹽卽截清界限於春月開綱而行抵楚西各岸已在夏秋之際明歲奏銷不能如期完竣等語自係實在情形所有明歲奏銷著准其稍寬時日屆期奏明辦理此後仍當年清年款不得復蹈故轍其餘未盡各事宜並著該督隨時察看分別奏咨核辦欽此欽遵卽督飭運司飭商領運並委員分赴江西湖北等省催辦疏銷其時楚西各岸均有節年滯銷舊引甚多皖省沿江食

岸亦然俱屬占閣成本有礙銷數內惟楚省查辦  
腳鹽最爲認真截至十一月間已銷引五十餘萬  
道爲歷年所未有第係己丑以前已納錢糧因公  
墊占之引與新綱無涉而商力久乏非俟舊鹽售  
出不能抽本接辦新鹽不得不讓出地位令其趕  
緊先銷以便轆轤轉運迨至新鹽運抵口岸舊鹽  
甫將銷訖又恐後鹽難繼經運司詳照緩納舊案  
趕辦新鹽四十萬引旋又核數照辦而爲時已近  
歲暮現入本年二月距辛卯開綱已屆一年期滿  
例應奏銷查核綱引實祇請運及半安慶池州太

平及各食岸僅及十之二三總由舊積太多壓累  
新綱商力已疲難於接濟兼之去夏新鹽發運時  
陡值長江盛漲各省被水凡產鹽之場竈運鹽之  
道路掣捆之洲地以及行銷之口岸莫不同時淹  
漫轉運維艱致滋遲滯應請展至本年八月底俾  
得稍寬時日趕運辛卯綱鹽一俟將次就竣卽釐  
辦壬辰新綱嗣後仍當逐漸提早以冀挨復舊規  
不任遲逾至淮北鹽引疲弊已久無商領運前經  
臣會同王鼎寶與會議另籌辦理復經臣於去臘  
奏請試行票引納稅之法現經委員前往海州各場

查勘一切未盡事宜尙須三兩月間方能籌立章程分別奏咨辦理未便仍與淮南綱引奏銷牽扯並辦應請將額引劃出另辦俟年底核算再行具奏以清界限而昭核實合併聲明據運司俞德淵議詳前來

臣謹繕摺具

奏伏乞

皇上聖鑒謹

奏

道光十二年三月初四日奉到

硃批另有旨欽此同日奉到二月二十一日內閣奉

上諭陶澍奏鹽務奏銷屆期請稍寬時日並察看淮北未盡事宜分別核辦一摺著戶部議奏欽此又奉

上諭前據陶澍奏鹽務奏銷屆期請稍寬時日並察看淮北未盡事宜分別核辦當交戶部議奏茲據奏稱兩淮鹽務疲乏已久現在銷鹽雖多均係已丑以前已經納課之引與新綱無涉其新鹽發運陡值各省被水轉運遲滯亦係實在情形自應量予展緩惟奏銷寬限一日卽占礙下綱一日之引該督遽請展限半年恐新綱難以接辦著予限四箇月展至本年六月內造報奏銷至楚西各岸均屬暢銷該督卽迅飭

各商及時捆運其次年如何提前以復原限之處並著確定限期據實具奏至兩淮例入奏銷課項共銀二百十餘萬兩此外加斤正課並應解帑利及外支外銷各款當大加釐剔之後俱應按款造報現在辛卯本綱將屆一年期滿並著該督速卽分晰造冊報部以備查核其淮北未盡事宜亦著迅速妥議章程分別辦理餘依議欽此



查禁艚船帶私摺子

奏爲遵

旨查明窮苦艚船因災帶私實無設立馬頭及屯戶過載等名目并前後設法查禁各緣由仰祈

聖鑒事 臣等承准軍機大臣字寄欽奉

上諭據御史卞士雲奏江蘇淮安揚州所屬下游州縣向有小舟名曰艚船常以捕魚爲業本年因水勢稍大借饑民名色或數十船一起或數百船一起私梟乘勢勾結令其載運私鹽由戚家汊孔家涵等處徑出運河并沿江一帶地方售賣公然設立章程有屯



戶過載架護名目派人各司其事船大者裝至千斤小者數百斤其聚集之處聞拏則婦人撒潑不拏則強壯滋事秋間曾有壽州等處回民許姓曹姓多人在三汊河地方因與艚船爭賣私鹽有燃放排槍之事匪徒結黨互爭難保不別生他故該處上司非不委員查緝每日報獲私鹽無如艚船來去如故誠恐兵役人等先於按查時豫爲說明每船抽留若干以爲搪塞報獲之計該地方官粉飾消彌竟不嚴行禁絕并聞該梟匪等於江南之觀音門安徽之樅陽鎮立有馬頭銷售艚船所載私鹽等語近來江船夾帶

與大幫私販俱漸斂跡乃梟徒另設此法逞其販私  
之計往來擾累徒黨橫行殊屬目無法紀著陶澍程  
祖洛鄧廷楨嚴行查辦先拏勾結之人使艍船無所  
倚賴再押令各船自歸本籍違者重辦其三汊河爭  
賣私鹽一案并觀音門樅湯鎮私設馬頭亦著嚴行  
懲辦以靖私梟至其中實係貧苦之艍船應否編入  
冊籍歸於賑務辦理亦著體察情形斟酌妥辦將此  
各諭令知之欽此伏查上年被水成災淮揚各屬窮  
民紛紛四出乘坐艍船乞食逃荒內中卽有趁便  
捎帶鹽斤偷賣餬口者梟匪乘機誘雇內載私鹽

外坐老幼婦女裝點災民偷越撒潑皆所不免誠如

聖諭江船夾帶大幫私販俱漸斂跡乃梟徒另設此計  
販私必應從嚴辦理惟實在災民所帶無幾與梟  
販匪徒究有分別必須分散其勢使不相溷合

臣

陶澍當經派委參將繼倫帶兵駐劄揚州挨船接  
查如係實在災民卽給與鹽價收買放行以示體  
卹倘係梟販無難立刻擒拏

臣

程祖洛併卽檄行

鎮江府縣遇有此等船隻但放災民入口官爲雇  
船資送不准艍船進口均經先後附片

奏明在案仍一面嚴飭地方文武及委員等實力巡  
拏計自去秋至本年正月望間前後報獲私鹽五  
十餘起共獲犯四百三十餘名私鹽六十九萬餘  
斤人船俱獲併訪獲包攬船私之袁鶴林崇文廣  
郭鵬倪鶴高劉志高及包攬仗頭韓廷貴姜照興  
徐福年沈小寶陳渭南等私鹽失所倚賴咸知儆  
惕統計各案所獲人鹽如三江營守備陳秉元等  
稟獲劉成龍黃金山王喜林張德鳳等各起計犯  
六十名共鹽四萬二千餘斤船二十四隻署揚州  
營參將陳述祖守備崔衍等稟獲卞有玉王五夏

厚徵樊兆山張世勳等各起計犯二十二名鹽九萬九千餘斤船十三隻署泰州營遊擊劉振常等稟獲朱有發等一起計犯二十一名鹽十一萬三千餘斤船四十一隻泰州營遊擊金萬全等稟獲許開勳等一起計犯八名鹽四萬餘斤船十一隻副將田松林等稟獲耿金芮高順王知遠高繼保沈遇邦魏有德徐有才王大春孫景榮鮑林喜吳志元丁兆松等各起計犯七十餘名鹽四萬餘斤船三十二隻候補運判韓在洛史揚善等稟獲孔來鸞等一起計犯四十三名鹽十五萬八千餘斤

船一百三隻此外人鹽併獲者尙多因係地方文武應辦之事不敢瑣月上瀆

即聽其分外出力者均經記名拔補酌賞銀兩頂戴其拏獲大夥巨梟例應

奏獎者仍俟定案時辦理察看各員弁咸知激奮趨公勉圖上進緝捕並未鬆勁且每起獲犯較多船鹽並獲似不致有粉飾消彌每船抽留若干以爲塘塞報獲之事查上年七月臣陶澍自清江回省

路過揚州聞有回侂梟匪在三汊河搶奪船船私鹽經揚州瓜洲汛弁擊逃竄臣比卽劄謂附近

各營縣四面兜擒花時江路迷漫汪洋一片各兵  
役追至高資境內拏獲曹華等十一犯徐貴卽許  
貴等十六犯又獲另案梟匪共一百四十餘人發  
交運司俞德淵督同揚州府王青蓮運判童濂等  
晝夜研訊究出窩黨及槍刀器械等件將各犯按  
律問擬軍流徒杖分別咨部完結併於鹽務暢銷  
情形摺片縷陳附及欽奉

殊批裕國而安民通商而除害汝爲幹國良臣而朕亦  
獲知人善任之美名實有厚望焉一力勉行勿怠欽  
此查此案早經嚴行懲辦私梟斂迹似不致轉生

他故至觀音門近在省城豈容梟匪設立馬頭誠恐在城文武得規包庇茲復逐細確查加以密訪實屬毫無影響亦並無公然設有屯戶過載等名目惟是兩淮漕務正當整頓之時前此洪流泛溢港汊紛歧舟船處處可通不止孔家涵戚家汊爲然上江食岸已多受朋私之累現在雖無勾結販私仍當督屬嚴查有犯卽懲不任疎懈至各船船皆係下河窮民應否歸於賑務辦理臣等於接奉諭旨後卽飭藩司督同各府從長籌議茲據詳稱船船一項前於查賑途次察看裏河各州縣所在多有



其有停泊一定處所者現在聞賑歸來多已入冊給賑其往來無定者例不給賑即使押令回籍按口給賑而原籍無業可依亦必又顧之他卽難免不重複冒領冊籍難稽且亦難保不於領賑後仍復出外販私似可照舊無庸查辦至此項船船一名倒撈船時而捕魚時而覓食行蹤無定來往自如祇因漫無稽察是以易被匪誘勾結載私應請仿照沿江漁船之例將船戶姓名籍貫年貌及男婦大小口數查明填給印牌懸掛船口以便稽察等情臣等查核應如所議辦理已一面出示曉諭

各船毋許販載私鹽其貧苦有籍可歸者仍許其  
造入賑冊補給其行蹤無定四出覓食者遇有捐  
施粥米之處亦許其隨同災民領食以廣

皇仁而資緩輯除樅陽鎮有無販私馬頭另由安徽撫

臣鄧廷楨查明辦理外所有江蘇省船船查明並

無私設馬頭等名目及設法查禁販私各情形臣

等謹合詞恭摺覆

奏伏乞

皇上聖鑒謹

奏

道光十二年三月十四日奉到

硃批另有旨欽此同日奉到道光十二年三月初四日  
內閣奉

上諭前據御史卞士雲奏江蘇淮揚所屬下游州縣向  
有私梟勾結艍船載運私鹽設立馬頭銷售并有屯  
戶過載架護名目當交陶澍等嚴行查辦茲據奏准  
揚各屬上年被水成災窮民乘坐艍船四出乞食間  
有捎帶鹽斤偷賣餬口梟匪乘機誘雇內載私鹽外  
坐婦女裝點災民計圖偷越經該督等飭屬巡拏前  
後獲犯四百三十餘名私鹽六十九萬餘斤并訪獲

包攬船船各犯嚴加懲辦私鹽失所倚賴咸知儆惕  
至觀音門近在省城並無梟匪設立馬頭暨屯戶過  
載等名目等語此項船船窮民乘坐捕魚覓食行蹤  
無定梟匪勾結載私實於離務大有關繫嗣後著仿  
照沿江漁船之例將船戶姓名籍貫年貌及男婦大  
小口數查明與給印牌懸掛艙口以便稽核該督等  
仍當督飭各屬認真查察有犯卽懲以杜梟私而肅  
離政欽此

附三考卷之三

卷之三

三

回空軍船夾帶私鹽請照上年章程嚴行查禁并  
飭堵川私潞私摺子

奏爲回空軍船夾帶私鹽請照上年巡緝章程嚴行  
查禁並飭堵川私潞私以冀疏銷恭摺具奏仰祈  
聖鑒事竊照各省軍船回空向自天津至江南一帶沿  
途裝載私鹽侵銷引地最爲淮綱之害而安徽江  
西湖北湖南等幫爲尤甚上年節次欽奉

諭旨飭令直隸山東各省督撫及漕督鹽政諸臣於軍

加經過地方節節盤查嚴防透漏行抵江南界內  
卽由臣遴派文武員弁分投堵緝時當整頓之初

在事大小人員仰遵

聖訓俱能實力查禁私鹽顆粒不能上船幫丁水手亦皆畏懼守法糧私得就肅清實從來所未有本年軍船現已開行北上轉瞬回空誠恐各幫丁舵人等意存牟利妄冀堵緝稍寬復萌故智該管員弁又或日久懈生致夾帶之風息而復起於兩淮綱食各岸大有關繫現值疏銷喫緊之際不可不預爲之防除俟屆期仍由臣遵照上年奏案分段派委幹員認真巡緝外惟是接拏於已經夾帶之後不若飭禁於未經裝載之先應請

敕下直隸總督山東巡撫長蘆鹽政各飭所屬於軍船  
經過之處仍照上屆章程嚴密稽查不准私鹽售  
賣上船如有土梟風客囤積鹽斤跟幫上載一併  
訪拏究治至回空軍船例有總運丞倅又有各幫  
押空衛弁耳目切近稽察易周果能各禁各幫尤  
易爲力應由漕臣嚴諭押空員弁自行防範如有  
於例帶食鹽之外私帶鹽斤立即起除淨盡并治  
以應得之罪倘該員弁等不能實力查禁抑或有  
心徇庇一經接獲照例嚴加參處務使積年宿弊  
永遠肅清於鹺務大有裨益抑臣更有請者兩淮



引地莫大於湖廣而湖廣私鹽莫多於川路上年  
回空糧私淨盡官鹽自應暢銷乃入春以來楚岸  
銷數轉不及去冬之暢固緣上年被水成災當青  
黃不接之時民力拮据以致銷數較絀亦實由川  
私潞私乘機侵越日甚致占淮綱查潞私由河南  
南陽等府充斥襄樊下游安陸荊門胥被侵灌川  
私則由夔關而下直達宜昌荊州接舸連檣尤爲  
楚岸大害近年湖北銷數往往不及湖南是其明  
證若不嚴行堵截即使糧私淨絕仍難望淮引疏  
銷亦應請

2512-3588 D11

旨敕下四川總督河南巡撫嚴飭夔州南陽各府於各  
境內認真查禁勿任偷越行私並由湖廣督撫選  
派明幹文武員弁於川豫接壤要隘分投實力堵  
截查拏以靖私源而利官運至江船夾帶及買租  
放斤等弊臣隨時查禁不敢稍懈並經湖廣督撫  
嚴稽水程委員弔租防閑甚爲周密似內私之弊  
實可漸就廓清所有籌議查辦糧私及嚴堵川私  
潞私各緣由理合恭摺具

奏伏乞

皇上聖鑒訓示謹

奏

道光十二年五月初十日奉到

硃批另有旨欽此同日奉到道光十二年四月三十日

內閣奉

上諭陶澍奏查禁回空軍船夾帶私鹽並嚴堵川私潞  
私一摺各省軍船回空沿途裝載私鹽侵銷引地最  
爲淮綱之害上年節次降旨飭令經過各省督撫漕  
督鹽政諸臣督飭所屬節節盤查嚴防透漏糧私得  
就肅清本年軍船北上轉瞬回空誠恐夾帶之風息  
而復起於兩淮綱食各岸大有關係著直隸總督山

東巡撫長蘆鹽政嚴飭各屬於軍船經過之處仍照  
上屆章程嚴密稽查不准私鹽售賣上船如有土梟  
風客囤積鹽斤跟幫上載務卽訪拏究治並著漕運  
總督嚴諭押空員弁隨時防範遇有私帶鹽斤立卽  
起除淨盡並治以應得之罪倘該員弁等不能實力  
查禁抑或有心徇庇卽行嚴加參處至潞私由河南  
南陽等府充斥襄樊下游安陸荆門胥被侵灌川私  
由夔關而下直達宜昌荊州尤爲楚岸大害自應認  
眞堵截俾淮引得以疏銷著四川總督河南巡撫嚴  
飭夔州南陽各府於各境內實力認真查禁勿任偷

越並著湖廣督撫選派明幹文武員弁分投於川豫  
接壤要隘堵截查拏以靖私源而利官運欽此

陶文毅公全集卷十四目錄

奏疏 鹽法

酌議淮北滯岸試行票鹽章程摺子

淮北票運商運之外仍酌運官鹽附片

覆奏辦理兩淮鹽務一時尙未得有把握摺子

請復設鹽政附片

請復設鹽政奉

旨訓飭覆奏附片

會同

欽差覆奏體察淮北票鹽情形摺子

平陽縣志卷之二十一  
五十九  
五十九

淮北票鹽試行有效請將湖運各暢岸推廣辦理

酌定章程摺子

議覆地方官籌款運鹽及按戶派銷之法斷不可

行摺子

請停止淮南加帶已庚殘引摺子

奏疏 鹽法

酌議淮北滯岸試行票鹽章程摺子

奏爲淮北湖運綱鹽滯岸及食鹽各岸試行票鹽酌

議設局章程仰祈

聖鑒事竊

臣

前因顧純梁中靖卓秉恬等條奏有鹽歸

場竈設局徵稅之議經

臣

核議以兩淮鹽課甚重

若改歸場竈恐致價隨稅長場鹽偷漏必多課稅

更細未敢輕議更張惟淮北滯岸久已無鹽接濟

商疲課細必須另籌辦理請仿照浙江山東票引

兼行之法於海州所屬之板浦中正臨興各場設



局抽稅並委降調淮揚道鄒錫淳前往查辦一切  
章程仍與署運司俞德淵會議妥辦奏蒙

恩准在案茲據鄒錫淳帶同委員分路查勘情形會同  
署運司俞德淵籌議設局收稅章程具詳請

奏前來 臣復逐加查核所有淮北綱鹽共行安徽河

南兩省四十一州縣內除安徽江運八州縣暨安  
徽河南湖運暢岸十一州縣近雖商疲引積尙非  
極敝之區有商認運者仍令商辦其商力支絀不  
能兼顧者官督商運一切照舊辦理外惟安徽之  
鳳陽懷遠鳳臺靈璧阜陽潁上亳州太和蒙城英

山泗州盱眙天長五河河南之汝陽正陽上蔡新  
蔡西平遂平息縣確山二十二州縣例由湖運稱  
爲極滯久已商逋課欠配運不前歷年以來屢施  
調劑之方迄無成效又江蘇之山陽清河桃源邳  
州睢寧宿遷贛榆流陽八州縣係淮北食鹽口岸  
向因私充官滯錢糧由綱商攤帶食商行無課之  
鹽近則費重銷細食商配運亦復寥寥計滯岸二  
十二州縣內除天長一縣運道例由山陽寶應入  
高郵湖與淮南引地錯雜應仍歸商運以固藩籬  
外其餘二十一州縣應與食岸八州縣一律變通

改行票鹽以資補救又安東海州兩州縣鹽法志  
載逼近鹽場例不銷引查安東距最近之板橋場  
已一百餘里較流贛距場爲遠海州逼近場地原  
可參用籌鹽之法惟淮北私梟並不赴場總係掃  
丁挑赴數十里外各村鎮賣與秤手頭家轉售梟  
販若籌鹽一行此風仍難盡絕且緝私各卡因有  
籌鹽名目其不肖者必致任意賄縱一經拏獲私  
販必藉口買自籌擔而透私之場丁與得賄之兵  
役皆得置身事外亦應與安東改行票鹽以歸畫  
一或以票鹽有課居民食貴爲慮不知海州東南

109 754.3.182

北三面皆場得鹽甚易日食所資無須籌擔其零  
斤購用原無票稅可言況以現定科則計之居民  
卽日食票鹽二錢亦終歲不過用銀二分零不足  
病民而籌擔一靖實可杜私未便瞻顧致誤全局  
至鹽法首重緝私而滯岸尤私鹽薈萃之所緝私  
從嚴一分則票鹽多銷一分現在勘定要隘卽於  
鄰近場地之海州東海錢家集三營挑選千把外  
委十一員兵二百七十名分卡巡防如果實力查  
緝銷數漸旺由臣隨時獎拔倘視爲具文虛糜巡  
費卽將弁兵斥革懲辦務使信賞必罰以收實效

至局商必須得人方不至勾結奸販致啟影射夾帶之弊現據選保股商王允泰等承充臣仍飭該運司委員等隨時查察倘有弊端立即斥革懲辦所有籌議設局收稅章程謹另繕清單恭呈

御覽

臣

一面移咨皖豫兩省出示招徠民販赴場領票

買鹽至票鹽事關創始必有以少課及奸販滋弊爲虞且慮旁侵暢岸漸及淮南者然淮北自十數年來引滯岸懸幾於無課可收且虛糜調劑銀兩不下百萬此時淮南商困未甦何能再籌款項調劑淮北且如辛卯一綱淮北配運不及十分之二

各岸久爲私販占據今民販之赴場旣由州縣給  
照票鹽之出場又有卡員驗放與其任無課之私  
鹽肆行侵占又不若行少課之票鹽尙可稽查其  
湖運暢岸與淮南各岸果能畫界自守則非商運  
之鹽不能侵越若巡緝疎懈私鹽且將充斥又何  
責乎票鹽現值商力疲極課項久懸而各岸又需  
鹽甚急接濟爲難舍此亦別無籌策臣惟有督飭  
運司及鄒錫淳等妥帖經理如果行之有效課稅  
漸充再行推廣辦理倘有流弊亦無難卽行停止  
所有籌議淮北試行票鹽設局收稅章程各緣由

理合恭摺具

奏伏乞

皇上聖鑒訓示謹

奏

謹將淮北湖運綱鹽滯岸及食鹽各岸試行票鹽  
籌議設局收稅章程繕具清單恭呈

御覽

- 一 由運司刷印三聯空白票式一爲運署票根一
- 留分司存查一給民販行運以板浦中正臨興
- 二三場各取上一字編立號數蓋用運司印信頒

發二場大使收貯民販納稅請票時該大使於票內填註民販姓名籍貫運鹽引數往銷州縣按道里遠近立限到岸聽其銷賣運鹽出場由卡驗放不准越卡亦不准票鹽相離及侵越別岸違者並以私論其照票給販赴所銷州縣衙門呈繳由該州縣按月申繳運司查核其裁存票根卽由本場大使按旬造冊彙繳運司以備核對存查之票亦按旬申送分司

一每鹽四百斤爲一引場鹽價照現在錢價合銀六錢四分抽稅照商運利則酌減三分之一計



銀七錢二分又傾鎔解費設局設卡經費各衙  
門書役紙飯委員薪水緝私經費等項五錢二  
分通計一引四百斤共庫平紋銀一兩八錢八  
分此外不得分毫需索其捆工包索聽民販白  
行經辦出示曉諭一面行知各州縣徧示招徠  
給照來場買運

一滯岸各州縣招徠民販由該州縣給與護照載  
明姓名年貌籍貫給本人赴場買鹽其海州附  
近居民及各省客民在海州貿易者卽就近在  
海州請領護照俱赴場大使衙門呈照請票該

大使於護照內用一驗訖戳記仍另立號簿登  
記備查卽將護照同所請照票發還本人其護  
照准行三年更換如實在本場居住衆所共知  
者免其請照祇用手本呈明姓名年貌居址赴  
本場衙門投遞局商加具保結准其一體請票  
販運至每票買鹽應自十引至百引以上爲一  
票不得過於零碎惟食岸八州縣及向無額引  
之海州安東二州縣距場均在五百里以內應  
酌量變通海贛以百斤起票餘准一引起票以  
便民食至所領照票鹽數無多程途旣近往還

必速卽令於買運後鹽時定限在本場大使衙門呈繳該大使仍按旬彙繳運司備查

一三場各曠遠近多寡不一應於各場相度適中之地建立局廠以便竈戶交鹽民販納稅如板浦之東臨西臨等曠地界毘連擬於西臨曠設一局其大義于公等曠海濱寫遠擬於水路聚會之太平堰設一局中正等四曠地勢連屬祇於花塚垣設一局臨興場之正場等六曠相距六十餘里擬於臨浦設一局富安曠設一局統計三場暫設五局均由運司遴委妥員每局一

人常川駐劄遇有民販買鹽局商帶赴本場大  
使衙門隨時納稅請票再由本局委員於三六  
九日各照票載引數眼同民販逐包秤驗於照  
票後用局員銜名驗訖字樣戳記聽其出場倘  
中途查出包內多帶惟局員是問

一民販買鹽出場後必須由卡經過候卡員查驗  
有無中途添買夾帶然後分赴指銷口岸其卡  
蓋設在近場百里內外水陸必經之處查海州  
之房山係陸路要隘又大伊山吳家集俱係水  
陸交通要隘擬設三卡均由運司委員督查一

附錄  
年期滿另委接辦遇民販到卡驗票抽稱果係包數斤重相符卽於票內鈐蓋某卡委員銜名驗訖字樣戳記放行不得稽留需索倘查有夾帶卽移交地方官究辦其鹽包應以淨鹽一百斤爲一包每引四包三場一律照辦民販既經卡驗其餘經過各關祇須驗票放行毋庸再事檢查至經過州縣各有鹽捕衙門亦毋庸查驗以免擾累稽延運到認銷口岸赴當地州縣衙門繳票票內如無卡員戳記卽係越漏應照不應律懲治

一 臨興所屬之唐口興莊柘汪三疇僻在海隅距該場不下百里三疇相去又各有二三十里陸路既艱水道隔絕每年官商收鹽須沿海舟運至臨浦方入鹽河與各疇情形不同向設青口食鹽店歲銷贛榆縣食鹽三百引有名無實三疇產鹽本旺多賣魚船醃切今既改行票鹽應將食鹽店裁撤一律辦理惟地方遼闊局商多則經費難籌局商少又照料不及擬遴委委員二人駐札青口經理漁船醃切及本邑食鹽照現定章程給票收稅以杜透漏

一運道必須肅清方可招徠查向來水陸私路如  
安東清河山陽盱眙泗州懷遠流陽桃源宿遷  
睢寧邳州等處地界均有地棍土豪私立鹽關  
索費包送今改行票鹽民販一經納稅卽係官  
鹽誠恐各處惡棍習爲故常復向訛索倘不遂  
意難保無搶鹽之事擾害商販應先行出示曉  
諭並嚴飭地方文武認真查拏務使道路肅清  
匪徒斂跡倘有訛索搶鹽等事立拏匪棍從重  
懲辦如不獲犯照例開參

一緝私以防河爲扼要各場私梟透往皖豫引地

凡須渡過黃河查黃河渡口本有定所各河廳所轄多者五六處少者二三處其渡黃船隻係河員管理只將黃河兩岸各渡口認真稽查不許渡船載私則梟徒何能飛越查廳營及文武汛官各有修防重任原難責以緝私然渡口多在有工處所而渡船又向歸河員管轄但令稽查渡船不准渡私則私鹽不緝而自靖應責成黃河北岸之邳北宿北桃北外北山安海安南岸之睢南宿南桃南外南海防海阜等十一廳營督率文武汛官稽查渡口一切官設私設渡



船皆歸文武汛官專管倘渡船偷渡私鹽卽將渡船水手拏交地方官無論人鹽曾否並獲但審有證據卽將渡船水手加重照窩囤私鹽例治罪官船另募管駕私船變價充賞

一暢岸運商如因引地毘連慮及票鹽侵越暢岸情願獨認旁近滯岸票鹽自固藩籬者卽呈明本場大使轉報運司知照認岸毋庸另給民販護照惟運商之認滯原爲保暢起見所認滯岸旣改票鹽其暢岸自應仍按原引完課無論銷數多少責令照額全納以免虛占票地轉致暢

岸缺銷至食鹽各岸並無暢岸可顧無須獨認  
以廣招徠

一向來商認口岸文武衙門往往私設陋規書役  
更多需索本屬違例現行票鹽多係民人販賣  
貲本無多所有皖豫兩省滯岸及江蘇食鹽口  
岸各衙門自不容向民販索取陋規惟胥役兵  
丁仍恐藉端勒索一經民販訐告或別經發覺  
卽嚴行究辦以除積弊而肅鹺政

以上十條均就現在情形定議惟事係創始尚有  
未盡事宜或尙須變通盡利之處由該運司等隨

時察看會詳分別辦理合行聲明

道光十二年五月二十六日奉到

硃批依議妥辦戶部知道欽此

淮北票運商運之外仍酌運官鹽附片

再臣查海屬鹽務向無善策文獻通考言天下之鹽皆可禁榷惟河北鹽是鹵地其地甚廣不待煎煮最易犯禁唐志亦言河北之鹽羈縻而已宋代亦嘗許通行量收稅錢每斤不過一文任賣一文是其利甚微自昔有然矣現查淮北每綱應徵課銀二十七萬二千餘兩不特歷來從未徵起而且虛耗調劑銀兩商疲力竭久已無人領運在皖豫之口岸則以無鹽可食催促甚迫在場池之掃丁又以有鹽無售困苦難堪勢不得不另籌辦法臣

於四月二十六日親赴海州登雲臺經板浦四望  
鹽曠積素如山無款收買現在招徠民販運濟滯  
岸第販力更微轉般不易卽暢岸之商亦多係虛  
懸誠恐各案仍有缺乏必須籌備伏查上年

奏准借動庫款二十萬兩官督商運分濟各岸其時  
運鹽甫抵正陽關而需鹽之區卽有齎銀到關接  
買自行運回者是官運之法尙稱妥便惟庫項久  
已支絀別無閒款可籌其從前發商生息之帑本  
亦久化烏有空賠利息而無本可借祇能儘此二  
十萬兩之借款輓轡轉運以資接濟應於票運商

運之外仍酌運官鹽或暢岸商鹽有缺或滯岸票  
鹽不到卽委員運鹽濟售如有缺岸齎銀至正陽  
關者亦准其買鹽自運赴岸隨時相機辦理期於  
多運一分之鹽卽少懸一引之課設使票引不能  
流通有此官運之鹽亦可停止至設局收稅章程  
現於拜摺後卽一面咨明河南安徽巡撫檄飭應  
銷各州縣招販試行惟事係創始須俟察看半年  
後方能約計盈絀以定銷數所有淮北額引奏銷  
前經

奏明劃出另辦應俟年底核算情形再行具

奏合併陳明伏乞

聖鑒謹

奏

道光十二年五月二十六日奉到

硃批戶部知道欽此

覆奏辦理兩淮鹽務一時尚未得有把握摺子  
奏爲淮巖疲敝已深竭力整頓一時尚未得有把握  
瀝陳實在情形恭摺覆

奏仰祈

聖鑒事頃臣承准軍機大臣字寄欽奉

上諭御史鮑文淳奏稱兩淮鹽務自去年辛卯開綱後  
截至今年四月僅徵收課銀二百餘萬兩尙有三分  
之二未完不知前此陶澍有何把握而以展限八月  
爲請若輟轉占礙稽延帑項出入憑何筭算現聞揚  
州私梟稍已斂戢岸銷亦旺無如實運商人僅存十



餘家較前更少商人惟利是圖果協其情勢必趨之  
若鶩今幸有可轉之機而新商來者寥寥舊商且至  
日少或辦理仍有未能盡善之處等語准揚巖務自  
經整頓漸有起色商人等自應樂於承充何以仍復  
見少該督於現在全局情形是否確有把握如招商  
未見樂趨亟應就近體察督同運司設法招徠辦運  
者多催徵自易總期國課不致久懸奏銷無誤限期  
是爲至要等因欽此臣跪誦之下惶悚曷勝伏思淮  
巖疲敝久在

聖明洞鑒之中臣以至愚極鈍於萬難措手之時急思

復還舊規而力單任重辦理維艱以前證後實難得有把握請就其顯而易見者言之淮鹽課額甲於天下他省或數萬十數萬多者百餘萬而淮鹽以一隅抵數省之課正雜各項數至七八百萬兩款多額重成本增而力愈難支其難得把握一也淮鹽運行六省其實本省惟江寧一處安徽河南江西湖南湖北除例食蘆鹽潞鹽浙鹽閩鹽川鹽粵鹽各府州外其餘或因場近而食賤或因隣灌而透私所真食淮鹽者不過中間十數府而已而猶或有腳私船私雜出於其間地隔則志渙難齊

途遠則鞭長莫及其難得把握一也各省錢糧地  
丁爲重卽江蘇財賦之區亦止二百餘萬董以兩  
藩司莅以道府州縣忙分上下尙難年清年款而  
鹽務以數倍於各省之錢糧僅一運司承以不理  
刑名之場使遇事則借重他人催課則責無旁貸  
其難得把握三也地方水旱例有蠲緩而准課則  
待用甚緊不但不能蠲併且不能緩按期責課饑  
歲猶然其難得把握四也疏銷巡緝責在文武往  
往藉規費爲周旋否卽視同膜外甚者賄縱庇私  
反與商人爲梗吏胥兵役層層剝削又其甚者商

亦夾私官既利其犯法以索賄商亦樂於行賄而  
邀利久之視同應得規費彌添本管爲法令所及  
裁革不難隔省則越俎僧嫌奉行莫必其難得把  
握五也凡此數端皆准鹽積重之由不自今日始  
乃從前亦有敝壞旋跌旋起至今日而幾於一壞  
莫支者蓋今昔情形實亦有不同溯查

國初准綱正課原祇九十餘萬兩加以織造銅斤等  
款亦祇一百八十餘萬兩迨後鹽規匣費節省等  
項多由陋規改爲額款加增一百餘萬再加外支  
兵餉養廉巡緝辛工書院義舉辦公等費與發交

內外各衙門及地方公務各息本按月生息而科則數倍於原額乾隆年間已及四百餘萬至嘉慶二十年後而淮綱每年正雜內外支款竟需八百餘萬之多嗣是課額多懸轉輸無力或數年始行一綱之引或銃引而全綱不行墊欠虧那百端支絀十數年來遂無有能振起者譬之負擔者然日肩百斤可行一站加以五六十斤僅行半站加至逾倍其蹶也必矣淮鹽之敝何以異是昔者唐臣劉晏權鹽初年六十萬串季年至六百萬串古今以爲美談然考劉晏以宰相出領度支合天下之

1-9 74 52 2.10-

鹽而權之自寶應元年壬寅受事至大厯十四年  
己未經營十有八年始有六百萬之課今則淮引  
所行不及劉晏所領之半而一歲所需逾於季年  
六百萬之數卽使善權如晏恐亦難以躡幾夫淮  
鹽之敝數十餘年矣商疲課細百弊叢生奏銷不  
前則謬爲報効以緩正課支用無出則擅動庫款  
以應雜需而且批解緊急則貼色貼息不憚剗肉  
以補瘡津貼彌縫則公補公攤無異桃僵而李代  
庫款旣竭而典賀遂及於根窩私質無憑而虛僞  
遂流爲印本其尤貽患後來者借本認息本罄息

存以數十年後之膏血拔而用之於數十年之前  
而四千餘萬之舊項已空一千餘萬之欠款仍懸  
無怪乎昔枵而猶能揮霍今歛而彌形枯窘也

臣

仰承

聖訓於極疲之後急圖整頓裁減浮費嚴拏私梟杜糧  
船之夾裝懲熬鍋之侵占而且定加斤核水腳以  
固商本輕科則緩呈加以紓商力長途則護送之  
以防船戶之盜銷損壩則清釐之以免匪徒之訛  
索凡所以爲商計者實已不遺餘力無如舊商早  
已消乏百不存一新商氣力未充尙多觀望當辛

卯開網時卽值水災自場竈以至各省口岸無不被淹轉運艱難加以截數之前在淮多已請未運之引在岸多存積未銷之鹽數至百萬業經占礙一綱勢不能如期奏銷臣於接篆之始卽已預爲

奏明仰奉

恩旨准其稍寬時日並非臨期始有展至八月之請也茲奏銷雖已於六月底辦竣而綱引尚有存留計九月初間壬辰甫得開徵以一年未竣之綱應兩年必需之款其爲竭蹶可知臣辦理未善焦灼難名何敢謂遠有把握自蹈欺飾惟臣職司較繁而



又遠隔一江非如廣東浙江督撫同城就近兼管  
鹽政之比現又遠赴安徽江西閱伍更恐有誤事  
機惟有敦飭運司就近體察如有可以鼓舞商情  
之處務須設法籌辦至商人辦鹽雖寓揚州實非  
揚產如西商徽商皆向來業鹽他省亦不乏人可  
否仰懇

天恩敕下湖廣江西安徽等省各督撫凡行銷淮鹽之  
處一體招徠民商由地方官給照來揚承充領運  
俾來者既衆轉運愈多於

國課民食均有裨益而同心協力鹽務可期起色矣

109 7. 58. 3-182  
281-3. 35. 607

所有<sup>臣</sup>接奉

諭旨查詢淮鹽商運情形謹據實瀝陳現在竭力辦理

各緣由恭摺覆

奏伏乞

皇上聖鑒訓示謹

奏

道光十二年九月二十五日奉到

硃批另有旨欽此

附二ノ家ノ名ニ在リ

一

109 458.18

請復設鹽政附片

再鹽務向稱弊藪商情亂雜本難責以義理其從  
前貲木早竭掛名總商者率多坐食鹽規之輩名  
爲鹽商而並不行鹽徒爲鹽務之蠹經臣前後革  
退數人奸商漸少併又革除陋規刪減浮費不下  
數十萬兩物情多怨難免浮言或假他端而劍擊  
或張細故以旁敲因而造作言辭百般吹楚多有  
謂總督管理鹽務商情隔絕遇有作弊之事必遭  
懲治局外之人或致懷疑趨趨誠如該御史鮑文  
淳所言商情好利苟協其情自必趨之若鶩臣非

不知多爲假借或可俯順商情冀其速至無如  
臣  
所管三省吏治軍政以及河漕各件皆

國家重大之事

功令森嚴絲毫不容假借卽兢兢釐剔尙恐照料難  
周刻深凜慄若獨於鹽商委曲周旋任其所爲卽  
恐各處觀望窺見其情將威令有所難行未免因  
一而廢百於公務實多妨礙伏思淮鹺頭緒孔多  
迥非他省可比臣於持籌握算之事本非所習兼  
以職司實繁勢難并管乘此私臬歛戢規費裁定  
鹽務漸有可轉之機仰懇

天恩仍放鹽政一員來淮專司課項及轉運招徠各務  
其一切用款現俱立定章程無虞多費至巡緝之  
事仍交臣與例食淮鹽各省督撫認真督緝不稍  
鬆勁并與漕督於糧船夾帶刻加嚴緊鹽務更可  
期得力其淮北試行票引法令伊始臣自當督同  
委員竭力辦理俟一年之後章程大定再交鹽政  
一併專管臣渥荷

特恩捐糜難報無論專管兼管總無卸肩之理惟體察  
物情實因總督管理於伊等多有未便是以觀望  
弗至若因循時日坐失機宜在臣雖勉竭愚忱而

於公無益實屬魂夢難安不得不據實瀝陳伏乞  
聖鑒施行謹

奏

道光十二年九月二十五日奉到

硃批專管兼管其勢甚相懸殊非爲諉卸而何如此居  
心如此辦事豈公忠體國者之所爲且奉命任事之  
時未思及此耶迄乎辦無成效又思更改推卸試問  
爲政之道可如是乎朕綜理庶政惟知賞功罰罪視  
乎其人之所自取卽或辦理不善有負委任必先治  
以應得之罪再議改圖若如此朝更暮改朕不能爲

而朕亦不能對天下矣朕拭目以待無可復言另有旨諭欽此同日奉到道光十二年九月初九日內閣奉

上諭前以兩淮鹽務自去年辛卯開綱後截至今年四月徵收課銀尙未完三分之二降旨詢問陶澍是否確有把握無誤限期茲據奏稱本年奏銷雖已辦竣綱引尙有存留計九月初間壬辰甫得開徵以一年未竣之綱應兩年必需之款辦理實形竭蹶併瀝陳兩淮鹺務疲敝情形竭力整頓有難以把握者五事又以職任較繁請另簡鹽政專司課務實屬有心取



巧國家設官分職豈容私意更張朕以陶澍前任江蘇巡撫擢任兩江總督於兩淮漕務自所熟悉是以於前此請裁鹽政改歸總督管理之時降旨允准如果淮漕疲敝實難整頓何以於奉命任事之時未思及此並無一言陳奏迄乎兼轄兩年辦無成效又思更改不過以專管兼管其勢甚相懸殊爲此避重就輕之計非爲諉卸而何如此居心辦事豈公忠體國者之所爲朕綜理庶政惟知賞功罰過視乎其人之自取從前曾燠張青選福珠隆阿福森尙無推諉情事祇因辦理不善且立予罷斥况以總督兼轄鹽政

辦理較易責無旁貸何得任意推卸且據稱請飭下  
湖廣江西安徽等省各督撫凡行銷淮引之處招商  
領運該督既有此奏卽照所奏著湖廣等省各督撫  
一體招徠民商由地方官給照到揚承充領運俾轉  
運人衆可期起色試思行銷淮引之地除湖廣外皆  
其所轄於緝私辦運招商等務本無掣肘呼應較靈  
尙且不能辦理豈改設鹽政轉能辦理裕如耶若如  
此朝更暮改不成政體朕不能爲而朕亦不能對天  
下矣陶澍著傳旨嚴行申飭該督如有天良卽振刷  
精神勉圖自效倘辦理不善有負委任朕惟有執法

從事治以應得之罪不能稍爲寬貸曾燠等卽係前  
車之鑒凜之慎之毋自貽誤致于重咎欽此

請復設鹽政奉

旨訓飭覆奏附片

再臣前次覆奏鹽務歷年疲敝情形并請復設鹽政一片茲於揚州途次接奉

硃批仰承

嚴旨訓飭切責跪誦之下不勝惶悚汗流浹背伏思人

臣之義分切捐糜矧臣受

恩深重尤異尋常當王鼎寶興

奏裁鹽政欽奉

諭旨交臣管理臣彼時但見鹽務頽壞

奏疏

國家大事急宜竭力支持初不暇計利害誠如

聖諭受事之始未經思及至於艱難情形屢經因事縷

陳備蒙

聖鑒而不料浮議之繁興不已與商情之悅服綦難卽

如御史鮑文淳係臣所革總商鮑有恒近族本籍

比屋而居鮑文淳未中進士時常在揚州與鹽商

來往周旋茲鹽商被革乾棒全裁從前之每年坐

食數千金數百金者俱多怨恨吹楚多端兼聞揚

人相鬪紙牌繪一桃樹另繪一人爲伐樹狀以寓

詛咒其切齒於臣若此實恐因臣爲怨府致誤全

局一時冒昧具陳請易專管爲兼管以順物情區  
區之愚猶冀巽以行權庶於公事或有裨益駑馬  
微忱未敢稍異而措詞失體干冒

宸嚴乃蒙

鴻慈垂宥

訓誨諄諄臣惟有謹遵

聖諭振刷精神斷不敢自暴自棄致負

恩施臣之此行雖爲巡閱實亦因江西鹽引多被鄰私

侵灌皖省沿江多有搶奪淹消之案欲親往察看

情形與撫臣等籌商辦法茲雖未及徧歷業已得

其大概惟漢岸浮費太甚亦經提揚審辦至淮北  
票鹽業已暢行從前滯岸額引原祇九萬有餘幾  
於片引不行茲於七八九月內已請票引十萬有  
零運銷過於原額似此情形淮北票鹽已有趨色  
若得時和年豐淮南綱鹽常亦可由漸而暢足以

仰副

宸廑合併附片縷陳伏乞

聖鑒謹

奏

道光十二年閏九月二十日承准

軍機大臣字寄道光十二年閏九月十三日奉

上諭本日據陶澍奏蠹商被革乾俸全裁從前之每年坐食數千金數百金者俱多怨恨吹楚多端兼聞揚人相鬪紙牌繪一桃樹另繪一人爲伐樹狀以寓詛咒其切齒若此恐誤全局請易專管爲兼管以順物情等語此輩固堪髮指然爲國爲公之大臣祇可屏除不顧盡心報國爲是應究者處之以法可也漢岸浮費太甚自應提揚審辦務須秉公核實勿使虛糜至淮北票鹽業已暢行從前滯岸額引原祇九萬有餘幾於片引不行茲於七八九月內已請票引十萬



有零運銷過於原額似此情形淮北票鹽已有起色  
若得時和年豐淮南綱鹽當可由漸而暢覽奏稍慰  
該督惟當振刷精神於萬難措手之時勉之又勉俾  
鹽務漸有起色方爲盡心報國之大臣切勿惑於浮  
議也將此諭令知之欽此又於道光十二年十月初

二日奉到

硃批另有旨欽此又於兼聞揚人相關紙牌等句傍奉  
硃批此輩固堪髮指然爲國爲公之大臣祇可屏除不  
顧盡心報國爲是應究者處之以法可也勉之欽此

會同

欽差覆奏體察淮北票鹽情形摺子

奏爲遵

旨會同體察票鹽情形據實覆

奏仰祈

聖鑒事竊臣陶澍先經接准軍機大臣字寄道光十二

年十月初五日奉

上諭據御史周彥奏票鹽之法與場竈起徵名異而實  
同場竈起徵利於私而不利於商給票行鹽利於梟  
而不利於國其可慮有三等語著穆彰阿陶澍悉心

體察將現在淮北鹽務情形及該御史摺內所列各條詳加審度該御史既言有三可慮又云利多害少卽移其法於淮南豈非自相矛盾現在試行尙未定局須通盤籌畫總期有利無弊不可以目前而忘久遠因鹽務而累及地方也該御史摺著鈔給閱看將此各諭令知之欽此並鈔原摺前來臣陶澍正在會同穆彰阿籌議間臣敬徵臣陶澍復准軍機大臣字寄十月二十六日奉

上諭前據御史周彥條陳淮鹽票引一摺已有旨交穆彰阿陶澍核議穆彰阿現已起程前往湖北著敬徵

會同陶澍體察情形詳核議奏等因欽此臣等伏查  
淮北鹽務實因道遠運艱商力疲滯向藉淮南接  
濟嗣淮南亦疲敝萬狀欲籌調劑則南商自顧不  
遑既苦重貲無措欲僉新商則舊商疲敝可鑒誰  
肯舊轍相尋以致多年來淮北引日塵封

國課懸宕竈鹽壅積口岸缺銷臣陶澍前於無可措

手之中籌議票引兼行之法以滯岸招販行票在  
局納課買鹽領票直運赴岸較商運簡捷不論貲  
本多寡皆可量力運行去來自便使人樂於爭趨  
以暢岸仍留商運設或票鹽行之無效仍可立時

停止故

奏明試行亦會百計籌畫初未敢冒昧定議也

臣敬

徵隨查

臣

陶澍原奏試行票鹽章程十條於一切

巡防私販剔除弊端初皆慮及復面詢委員鄒錫  
淳試行以來利弊情形據稱遵照奏定章程督飭  
局員卡員掣驗稽查尙無影射夾帶等弊商販均  
安分守法亦無爭鬪滋事之案票載越境卽以私  
論商販各顧費本似不肯違例越境受人挾制等  
語臣等詳閱御史周彥原摺以爲票鹽與場竈起  
微名異而實同尤利於臬而不利於國列陳可慮

者三層臣等悉心體察通盤籌畫竊查票鹽係官  
爲設局民販在局納課買鹽領票迥異於場竈起  
徵之散漫無稽而和課買鹽然後領票於

國並無不利縱使其人本係梟販而領運有課之鹽  
卽屬齊民已非曩時與販無課之私可比似別無  
利梟之處原奏以借官票運私鹽引少鹽多雖設  
卡抽驗人衆不服稽查勢盛兵難約束或受賄包  
庇且援饒州官店賣私爲證以爲一可慮查饒州  
與浙鹽引地接壤其官鹽子店影射所賣係侵灌  
之浙私與票鹽情形不同今淮北民販請票運鹽

俱挨號次序而行到卡抽驗加戳人雖衆而各顧  
貲本故無不服稽查不遵約束之事沿路官弁兵  
役巡查彈壓匪徒歛跡并不敢有滋擾如慮其引  
少鹽多及兵役賄庇要知查察不嚴商運且有夾  
帶緝私卡巡亦不免賄縱近經逐一查訪嚴參漸  
知儆惕票鹽一隅之地尤非商運數省可比有犯  
必懲不稍鬆懈似尙可無慮也原奏又以試行滯  
岸兩三月內能銷及一年之鹽而鹽非可多食若  
非侵及暢岸暨淮南引地必不能如此之多場稅  
收課倘增引地被占轉廣票鹽增銀有限引鹽負

課更多爲二可慮查北鹽出場須俟六七月間雙  
金開啟放趁水趕運冬春例應閉開故本年七月  
以後商販請運逾額實趁水趕運并非數月內口  
岸已銷一綱之鹽且引額久定生齒日繁淮北多  
年來商疲運絀以致私充岸滯今票鹽成本輕減  
得價卽售故銷數較多而民販納稅請票時均經  
三場大使於票內填註姓名籍貫運鹽引地往銷  
州縣其未改票鹽口岸不准請運是暢岸旣未侵  
及距淮南之引地更遠至稅課雖屬無多總較勝  
於頻年引課全懸似亦尙可無慮也原奏又以匪



徒占立馬頭一旦藩籬既撤甲所售地無許乙侵  
乙所行銷不容丙入械鬪紛爭滯銷之地商仍裹  
足不前無從禁止爲三可慮查行票各岸俱聽民  
販請運并不能甲乙分占各銷各鹽無所鬪爭數  
月以來皖豫各岸并未聞有爭占馬頭鬪毆滋事  
之案雖請運之民販間有昔日販私之輩然已一  
一凜遵法度且細加察訪衣冠商賈之流十居七  
八自愛者旣多不肖者亦步趨收歛所有極遠滯  
岸始則不免觀望均經委員領票運往爲之倡導  
民販望風附從似皆尙無可慮也凡此三者該

御史深謀遠慮原屬周詳若以目前辦理情形而論均已先經籌及不至有此等弊端至原奏所稱之黃玉林一節查現在票販之中並無此等著名梟匪招徠之販祇令納課運鹽原不禁其呼朋引類請票來而運鹽去並不聚集一方實於地方無害也該御史又以如果利多害少請移其法於淮南誠如

聖諭自相矛盾蓋未悉淮綱情形淮南淮北大小懸殊淮北每綱錢糧三十餘萬雖比諸川陝等數省之鹽課爲多而淮南正雜各款歲須七八百萬全賴

湖廣江西兩口岸而地遠額重較淮北多至數十  
倍難以輕爲嘗試且票鹽試行於淮北滯岸其運  
道須待雙金開放開又須渡黃河而涉淇澤湖抵  
正陽關之後分赴各岸尙須盤駁故可以不虞泛  
濫淮南之鹽則江海四達無可範圍且淮北引地  
僅在皖豫一角淮南之楚西等省居各省之腹中  
在在鄰界接壤如亦改行票鹽勢必四侵鄰境於  
各省之鹽法亦多窒礙總之票鹽之行原出於萬  
不得已之計總在場局各員及地方文武遵奉章  
程實力巡查庶可期於有利無弊今自試辦以來

實不至無益於公亦不至利歸於臬設將來察有弊端及現行章程有應變通者臣陶澍自當隨時據實

奏明另籌辦理務使課項日充商民俱便斷不敢以目前而忘久遠因鹽務而累及地方所有現行票鹽情形遵

旨會同體察據實恭摺具

奏伏乞

皇上聖鑒謹

奏

道光十二年十二月初九日奉

硃批知道了仍照原議盡心妥辦該部知道欽此

淮北票鹽試行有效請將湖運各場岸推廣辦理  
酌定章程摺子

奏爲淮北票鹽試行有效請將湖運留商十一州縣  
推廣辦理復還舊則徵收並酌定章程以裕課便  
民仰祈

聖鑒事竊照淮北商運疲敝多年課食兩懸幾成虛設  
備極調劑之方總無挽回之益前經臣

奏請改行票鹽於安徽河南之滯岸二十一州縣并  
江蘇之食岸八州縣及例不銷引之海州安東二  
州縣先行招販試運給予印票運行照舊額科則

酌減三分之一徵銀七錢二分又鹽價銀六錢四分辦公各項經費銀五錢二分議定設局設卡章程並聲明如果有效再行推廣辦理欽奉

諭旨允行在案其暢銷之江運八州縣湖運十一州縣仍留商運原以改滯留暢俾累去利存即可漸培商力茲查票鹽自上年七月開局起至冬底截數已請運過二十萬三千一百餘引較原額溢運過半而所留商運暢岸開綱兩年之久商人僅請運過十萬五千餘引加以官運六萬六千餘引亦尙未足商岸應運之額現在截數奏銷卽係以票販

溢運之數撥補造報而商運引內仍有借欠底馬  
錢糧未完是商人之積疲莫振雖專留暢岸尙不  
能勉力轉輸斷難望其轉機查票鹽自試行以來  
海屬積滯之鹽販運一空窮苦場民藉資甦活卽  
游手閒民亦得以轉移執事是以上年海州災務  
極重而地方尙稱安帖實得票鹽之濟其皖豫各  
省尙多缺鹽之患官文上下絡繹督催商運初然  
不前甚至閉門逃避百姓淡食不得已而買食私  
鹽地方官亦不得已而佯爲不知督銷有同具文  
且鹽價騰貴每斤需錢六七十文自票鹽到境鹽



價頓減取攜甚便民情安之從前私梟充斥每因  
地方乏鹽得以乘虛而入而曬掃各場民亦因商  
不收買鹽無出路不得已而偷漏於梟其實場民  
一與梟接卽受其脅制得不償失私梟雖多亡命  
之徒內中亦有身家挺而走險原非所性茲旣轉  
運流通彼此無須偷漏卽可化梟爲良迥異從前  
之私充課緹現在票鹽之課溢於原額淮北通綱  
之引俱已請運全竣是票鹽之利實足以下便民  
生上裕

國課業已試行有效自應欽遵前奉

109 281-3 35 607

諭旨卽行推廣辦理飭據陞署鹽運使俞德淵會同總辦委員鄒錫淳核議具詳前來除例由江運之安徽省桐城舒城無爲合肥廬江巢縣滁州來安八州縣及例由高郵湖運之天長一縣俱與淮南引地錯雜未便招販行票致啟侵灌其原額八萬一千六百二十引照舊由商認辦並隨時察看情形濟以官運保固淮南藩籬外所有湖運暢岸安徽省之壽州定遠六安霍山霍邱河南省之信陽羅山光州光山固始商城十一州縣額運九萬六千三百九十三引并食鹽融綱一萬三千三百五十

五引請一律推廣照淮北滯岸章程招商販運改行票鹽查上年所議課則較原額酌減係因試行伊始輕本以利招徠旋因經費有餘撥還原額今既試行有準更可復還舊制應照淮北原定科則每引徵正銀一兩五分一釐其另徵經費五錢二分爲傾鎔解費設局設卡巡緝委員薪水書役紙飯及公費等項之用上年既有節省撥補正課應將經費酌減一錢二分每引徵銀四錢前定鹽價六錢四分亦酌減四分統計每引鹽四百斤爲一票共徵銀二兩五分一釐此外不許絲毫增加俾

票販易於運行課項無虞短絀如有多運卽以融  
代江運之不足及未請殘綱各積引以彌全局惟  
思票販章程原議指定請運州縣填註票內越境  
卽以私論係屬保固商岸之意茲商運旣不敷額  
而票販所行各岸有請至數萬引者亦有僅請百  
十引者鹽多旣慮其滯銷鹽少又慮其乏食難免  
窒礙自應量爲變通如票鹽業已出卡經委員卹  
印驗截運行之後因所指州縣鹽壅銷滯准其就  
所在地方呈明轉運他岸通融售賣但不得越出  
票鹽四十二州縣之界外倘或南侵淮南與江運

各岸北越潞東長蘆各引地仍照梟私例治罪至  
場鹽自海州內河溯流入黃總須俟漕竣雙金關  
放水方能運行若雙金關未開鹽河卽無水可通  
查海屬之鶯游門灌河口均係濱海民船往來之  
所鹽本海產一經納課請票已有稽查但須於黃  
河之入灘等處擇要設卡盤驗加戳遇鹽河無水  
時卽由此路海灘轉尖入黃行走俾內外河均有  
水可運各岸可無缺鹽之患矣其餘未盡事宜容  
臣督同運司暨委員隨時查辦并分飭地方文武  
嚴查地棍匪徒毋許阻撓禁止丁書兵役毋許騷

擾使票販益就切招徠淮北可期大有起色所有推  
廣票鹽試行湖運各暢岸并復還課額酌定章程  
各緣由謹繕摺具

奏伏乞

皇上聖鑒訓示謹

奏

道光十三年三月初九日奉到

硃批另有旨欽此同日奉到道光十三年二月二十五  
日內閣奉

上諭陶澍奏淮北票鹽試行有效請推廣辦理並復還

舊則酌定章程一摺着戶部速議具奏欽此

議覆地方官籌款運鹽及按戶派銷之法斷不可  
行摺子

奏爲遵

旨體察州縣督銷鹽引情形據實覆

奏仰祈

聖鑒事案查道光十二年二月初一日承准軍機處字  
寄奉

上諭據御史徐廣縉奏請嚴飭州縣督銷鹽引一摺鹽  
務銷引之法莫要於緝私私鹽日戢則官鹽自暢若  
如該御史所奏商人認銷口岸多不自經理止付之



商廝店夥而商廝店夥又止知營私罔卹商人成本  
故商日疲而課日絀且兩淮運鹽船戶不獨無水腳  
可領必須向船行花費始能領運引鹽借有官引肆  
行夾帶其夾帶之私卽沿途售賣私不銷盡鹽不到  
岸縱口岸缺鹽地方官屢次稟催而商廝店夥止以  
在途阻風稟復及運鹽到岸多被船戶攙和沙土成  
色不堪岸夥照引收船船內賣剩夾帶私鹽卽爲店  
夥賤售名曰掃船其數無從查察是商人行鹽在途  
則有船戶之夾帶在案則有店夥之浮收行一鹽之  
引非三四倍之私不能商店銷售必先將私鹽銷盡

始銷官引官引所以日滯又現在鳳潁一帶有請稟行鹽者亦有官爲籌運者如州縣能實力奉行卽滯岸不難銷售至責令州縣實力督銷之法莫要於商運不前者地方官爲之籌款運售岸鹽不銷者地方官爲之派數比銷倘商運已足地方官不能實力督催卽分別予以降罰參革如商運不足地方官能籌款運售或更能於額外溢銷者卽分別予以記功如級州縣自實力奉行至運鹽到岸之日倘有積滯請照潁州府比銷之法飭令鄉城地保開具食鹽戶名除零星小戶不計外所有鄉城各戶按戶口派銷如

醬坊醃菜坊照市面派銷均由地方官體察辦理其  
督銷造報之法設立冊票一爲地保認銷票一爲商  
店發鹽票地保赴店買鹽時彼此對票商店則憑地  
保認銷之票報銷地方官則憑商店發鹽之票報銷  
其零星小戶赴店自行買食者一併彙入總報報銷  
得實商店乃不得以銷剩私鹽混作未銷官引則州  
縣督銷得力各等語是否可行著陶澍體察情形妥  
議具奏務期於國課民食兩有裨益該御史原摺著  
鈔給閱看將此諭令知之等因欽此臣伏查兩淮鹽  
引課額甲於天下其產二十三場運銷六省水陸

數千里其間弊竇叢生卽淮南淮北亦各有受蔽  
之由並非一轍如該御史徐廣縉所言各弊尙不  
及十分之一且多係從前未經整頓時事大都得  
自局外傳聞卽如所論私鹽一節專指船戶不領  
水腳爲言是卽臣會同

欽差臣王鼎寶興籌議章程十五條內實給水腳毋許  
商廝輩尅扣以免船戶帶私盜賣之一條也其實  
私鹽何止船戶緣山驀澗大夥之梟徒無論卽商  
廝商夥莫不帶私而商人亦有包內之私自臣奏  
定每包以五百斤出場有整數而無奇零旣便稽

查兼資配割而夾帶之弊始除其餘隨時隨地多  
所剔釐卽以淮南而論竈戶煎鹽爲業盤鏹臣外  
無餘產多貸場商以資工本及至煎滿成鹽交垣  
則慮其盤剝以抵欠售私則得有現錢而價多是  
以偷漏時虞煎丁受雇於竈戶栖止海灘風雨不  
蔽烟薰日炙無間暑寒其苦百倍於窮黎頭長有  
稽查之責受商賄則助商而勒竈以重斤受竈賄  
則助竈而坐視梟犯之透私海濱路雜追捕爲難  
此在場之弊也自臣嚴飭場官稽查火伏堵緝出  
場卡隘如泰州營拏獲朱有發等案生擒梟匪每

起至數十名之多私鹽以十數萬計其餘積猶如  
沈小寶顧鳳禮等窮追至海隅就獲而場竈透私  
之弊始清運鹽出場屯船裝載其承攬多係用費  
爭謀預買竈私兼收零販以爲沿途雜費及日食  
柴米之需船戶水手窺見其情恣行偷竊以及擡  
夫扛般諸多拋撒迨過秦壩經歷江甘各境地棍  
土匪詐擾分肥名爲黑費甚至勾通銅鉛木簾船  
隻橫泊江心阻礙訛錢名爲買路及抵儀徵又有  
大腳小腳掃二水等名目偷爬肆竊得鹽售梟盤  
踞水次此其出場至所之弊也自臣飭司較準官

秤邊委壩員認真掣驗并委員嚴查沿途匪窩追  
出私占地岸約據將匪徒分別重懲枷號河干斷  
其私費而沿途竊阻之弊始清由壩抵儀改包捆  
掣埠頭攬頭內帶外帶各項人等層層剝削而場  
船交卸更換棕船營謀攬載一如屯船私相盜賣  
江船則專圖夾帶勾通捆工放斤加重謂之買碇  
且借錢購私謂之跑風以致引少私多鹽務爲之  
大壞自臣明定章程革除內外帶頭各埠行用歸  
商自給船戶水腳由監掣衙門當官圖契會同委  
員逐包驗放無從尅扣向來過壩鹽斤踰額而儀

捆仍屬不敷近則過壩鹽斤如額而儀捆不致短  
缺此質包內無浮之明證至於包外跑風之鹽往  
往買自私梟近因場竈不能透私又儀徵老虎頸  
等處梟巢盡破如蔣四長子等屢逸屢獲嚴行懲  
辦販徒多已解散其餘長江停泊賣私之處亦屢  
經拏辦如銅陵桐城彭澤等案均經臣特參嚴懲  
而帶私盜賣之弊始清從前鹽船到岸輪售待價  
一船未盡後船不敢開艙因而暗地盜賣輪未及  
而鹽已空那後掩前互相遞換謂之過籠蒸糕其  
那掩不及者則鑿船沈之捏報淹銷謂之放生此



皆銷鹽不銷引惟私是務之積弊也自臣力主散  
 輪之議隨到隨售無須盜賣年來江行遭風者有  
 之艤舟報淹者絕無而盜賣鑿船之弊始清此外  
 如裁減浮費稽查糧私各務均經稟承

聖誨切實遵行不令稍弛至淮北之弊更甚於淮南場  
 不收鹽而暗售匪棍以延殘喘商不運鹽而轉借  
 蘆私以支門面馴致梟橫成攘奪之風民困多淡  
 食之日如船戶攙和泥土店夥賤售掃艙猶其弊  
 之小者自臣議改票鹽奉

旨准行而場困獲甦民間食賤秤足而色淨從前諸弊

一掃而空可不至額銷有滯無煩追比惟淮南行銷各岸連值水災且地在江廣鞭長莫及非各省地方官同心一氣嚴緝私鹽不能如額銷足至於該御史所奏請照潁州府比銷之法按戶口派鹽地保與商店各立冊票查對并地方官籌款運鹽等語臣愚以爲斷不可行無論州縣公務較繁不能按戶算鹽且亦無此鉅款籌以辦運勢必那動錢糧虧缺且由此而起况一州縣之倉庫錢糧未足供一州縣運鹽之用而代商辦運錙銖計利亦於政體非宜至派銷比銷之說尤屬難行一州縣

戶口動輒十數萬計保甲按牌稽核猶不能窮力  
按查錢糧按畝徵收尙不能如期完納今乃按戶  
授鹽責以銷售是丁糧奉裁之後又以丁鹽滋擾  
且舉報全憑地保其人豈盡善良或以丁少而報  
丁多或以小戶而報大戶紙張飯食冊費有增價  
值低昂浮捏必甚彼窮民細口一飯不飽安能計  
口食鹽若垂爲令甲地方官必因缺銷而比地保  
且因地保掛欠而比花戶夫州縣徵收錢糧不得  
已而敲扑平民若於催科之外加以催銷竊恐課  
未必充而民已重困且民間有土著有流寓住無

定址醬坊醃菜坊有興廢有起跌店無定數或銷  
售不足或侵食逃亡必至鹽歸無著而州縣於倉  
庫正項之外又添虧空如果潁州府此法能行何  
至久成滯岸哉蓋派數比銷之法以視前代貨錢  
於民春借秋還其敝尤甚實力奉行則必增擾累  
虛文搪塞又無補臣受

恩深重刻刻以興利除弊爲念然上裕

國課必須俯察輿情實未敢冒昧議行致滋擾累謹  
將遵

旨體察情形據實覆

奏伏乞

皇上聖鑒訓示謹

奏

道光十三年九月二十七日奉到

硃批依議欽此

請停止淮南加帶已庚殘引摺子

奏爲淮南加帶已庚殘引因各省連年水患未能帶銷占礙正綱據實

奏請停止仰祈

聖鑒事竊照淮甃於道光十年經

欽差查辦將已丑綱未運三分及庚寅全綱引鹽

奏明停運俟暢銷後分帶嗣經臣於籌議加斤案內

定以連抽耗每四百斤爲一引仍照舊每包五百斤捆運出場解捆正鹽之外以所餘一百斤作爲加帶已庚停運之引帶完正課錢糧免徵雜課約

計五綱可以帶運完竣奏蒙

交部議覆准行在案其時原爲籌補停引希冀帶運帶

銷可於一綱而行五季之鹽且加帶之引祇完正

課藉可扯輕科則以減價而敵私而包捆仍舊於

出場運腳亦有所省旣得彌補舊虧兼寓調劑商

情此臣督同運司再三籌畫冀於疏引招徠兩有

裨益之苦情也乃自辛卯加帶以來江廣各省連

年被水成災民間待餉嗷嗷安能顧及鹽味以致

岸銷未能遂旺核計道光十一年分湖廣省銷鹽

七十一萬三千餘引江西省銷鹽十二萬四千餘

引道光十二年分湖廣省銷鹽七十二萬餘引江  
西省銷鹽十八萬餘引是楚西二省銷鹽之數雖  
比之往年稍有起色而於辛卯壬辰兩綱正額仍  
未能銷足其餘安慶池州太平及各食岸尤多銷  
不足額則此項隨正加帶已庚之引各省口岸未  
能帶銷轉不免占礙正綱地步現計壬辰未運楚  
西綱鹽尙有七十萬餘引之多而目前江廣各省  
又值大水勢難遠望暢銷自未便仍帶已庚致令  
僅完正課之帶引占礙正綱之正雜錢糧使京外  
應解各雜款無以支解實爲頻年水災所累不得



不亟爲籌策相應據實

奏明白癸巳綱起卽將已庚殘引停止加帶俟壬辰  
綱引運竣後截明已帶引數飭司造冊咨部其停  
止未帶之引仍照

欽差原奏俟察看口岸暢銷後再行附議帶運所有商  
鹽每包五百斤出場解捆正鹽四百斤之外其餘  
一百斤循照割引成例配割本綱正引按照科則  
正雜錢糧全數完納至淮北已改行票鹽按年儘  
實運之數扣足正綱外其溢運之引仍作已庚帶  
引銷算合併聲明爲此恭摺具

奏伏乞

皇上聖鑒訓示遵行謹

奏

道光十三年九月二十七日奉刊

硃批戶部議奏欽此

陸文毅公全集

卷十匹

四

109 2454-5-18-

陶文毅公全集卷十五目錄

奏疏 鹽法

陳奏回空糧船未便任帶蘆鹽摺子

再陳回空糧船未便任帶蘆鹽摺子

再陳糧私最爲淮綱之害現在緝私緊要附片

再陳回空糧船未便任帶蘆鹽附片

會同浙閩督撫暨蘇撫等議堵截淮私章程以衛

浙鹽摺子

仍請停止加帶已庚殘引摺子

查覆楚西現賣鹽價摺子

覆奏淮鹽奏銷難復原限摺子

浙江借買淮北票鹽一萬引附片

停借淮北商人底馬摺子

趕辦壬癸未運引數緩開甲午新引附片

陳明淮北鹽少販多情形附片

181-3 35 在 661

奏疏 鹽法

陳奏回空糧船未便任帶蘆鹽摺子

奏爲沿途查緝漕船夾私正以速趨回空未便任帶

蘆鹽致使鹽漕兩誤據實縷陳仰祈

聖鑒事竊 臣於九月初十日接漕 臣貴慶來咨以沿途

派委漕弁揆查回空私鹽有礙遊行

奏請將委弁撤回並以江廣道遠運丁苦累於長蘆

官店例買食鹽四十斤之外擬加增買帶過揚州

時納課給照准其帶回售賣俟抵天津面商長蘆

鹽政籌議先附片奏明等因鈔摺咨會前來 臣詳

核原奏不但大誤鹽務亦且誤漕轉甚現在鹽務  
既爲臣所專筭而漕運亦臣所兼理關係重大不  
敢不切實敬陳疏

聖主之前查漕船回空帶私爲歷來之痼弊蘆私居十  
之八九淮私居十之一二年甚一年竟有銀主隨  
幫而行謂之風客除本分利前數年已坐占淮南  
數十萬引之綱額人所共知是旣大害於鹽務且  
勾引梟匪紛紛聚集販運上船明目張膽肆行無  
忌亦有礙於地方而漕船停泊買私尤有誤於漕

運自臣疊經奏奉

特旨派委文武大員於黃河南北及淮揚等處嚴密迎

查並由前任漕臣吳邦慶蘇成額

奏派廉幹漕員劉燦任錫五等會同押空幫弁於直隸山東沿路上私隘口認真堵緝是截之於未經上載之先更勝逐船捺起於已帶之後而漕船無可停留卽寓催趲於查緝之中兩年來

功令森嚴在淮旣無顆粒透漏且值前任長蘆鹽政

臣鍾靈曾任兩淮深知弊累故堵禁蘆私甚嚴使

之絕無夾帶回空歸次亦較前迅速卽如道光九年十年間天津沿路並不查鹽回空軍船於十一



一  
二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十  
二十一  
二十二  
二十三  
二十四  
二十五  
二十六  
二十七  
二十八  
二十九  
三十  
三十一  
三十二  
三十三  
三十四  
三十五  
三十六  
三十七  
三十八  
三十九  
四十  
四十一  
四十二  
四十三  
四十四  
四十五  
四十六  
四十七  
四十八  
四十九  
五十  
五十一  
五十二  
五十三  
五十四  
五十五  
五十六  
五十七  
五十八  
五十九  
六十  
六十一  
六十二  
六十三  
六十四  
六十五  
六十六  
六十七  
六十八  
六十九  
七十  
七十一  
七十二  
七十三  
七十四  
七十五  
七十六  
七十七  
七十八  
七十九  
八十  
八十一  
八十二  
八十三  
八十四  
八十五  
八十六  
八十七  
八十八  
八十九  
九十  
九十一  
九十二  
九十三  
九十四  
九十五  
九十六  
九十七  
九十八  
九十九  
一百

月底至十二月始全數出瓜洲江口十一年沿  
路查鹽嚴緊乃於十一月內均已全數出江完竣  
並無絲毫阻滯蓋丁舵水手每因帶私勾通風客  
與天津之公口岸及沿途兵役暗相約結裝載支  
延或船已行而人未去仍於黑夜載送處處稽遲  
今因查私甚緊無可希冀卽無可逗遛是以行程  
不催自速而糧私既絕官引自銷是以江廣等省  
雖連值水災銷數尙稍增於前此實鹽漕兩益之  
明證現屆回空之際臣已遴派文武照前認真控  
查堵緝屢接沿路委弁來稟頗知實力奉公如果

夾帶毫無再得江廣各省年歲豐登即可冀暢銷如額漸振衰疲至於本年漕船實由地方災歉之後兌運艱難且閘河水大溜高上閘耽延以致重運稍緩時日溯查從前漕運亦往往有此儘可嚴行催趲以速補遲無誤回空初不關按查私鹽之故今空船漸次南下自應恭照前年欽奉諭旨沿途加緊查緝趲行方能迅速若遽請將

奏委之漕弁撤退則幫丁舵水等俱知禁令已弛必至放膽買鹽其停泊上載必不止如委員按查之片刻工夫耽誤轉甚地方文武雖均有緝私之責

孰敢攖漕船之鋒祇冀其安靜過境完事若各關  
查緝則鹽鹺本不納稅尤難望其認真見有私鹽  
夾帶不過爲胥役得規賣放之地徒屬具文無補  
於事而楚西等省之冬春銷市必盡爲糧私所占  
以兩年來奉

特旨整頓之事隙於一旦從此更難爲力矣明縱透漏  
既有害於鹺綱欲速反遲尤有誤於漕運此沿途  
隘口查緝漕弁萬不可撤者也至漕臣附片所陳  
於例買食鹽四十斤外擬在長蘆加買過揚納課  
給照准其帶回售賣一事似未將漕運鹽務之全

局及長蘆淮南之科則綱地通盤籌畫也其中格礙甚多攸關重大查漕船往返刻不容緩嚴禁其帶私尚不免停留偷販今准其買鹽納課則是丁而兼商例得停泊上載停泊納課停泊銷售則歸次更無期矣不但有誤回空並且有誤重運况漕船水手素稱桀驁加以順帶官鹽必有梟匪出資附和以

天庾正供之船爲聚集匪黨之藪其害更不可勝言故昔年論事者曾有漕船回空至儀徵裝載商鹽順赴楚西二岸之議終以利不勝害未能舉行夫運

淮南之引鹽赴淮南之岸地尙且有礙若以蘆鹽而納淮課其輕重懸殊以蘆鹽而售淮地必藩籬全破蓋東南財賦淮鹺爲最大天下鹽務淮課爲最重卽如各省地丁錢糧或數十萬或百餘萬極重如江蘇亦祇三百萬而淮鹽內外正雜支款歲需七八百萬已足抵數省之錢糧卽南漕動稱六省亦祇額米四百餘萬所值僅與淮課相準而丁糧行月贈伍津貼各項必須耗費至數十萬百萬始能上達倉儲是鹽漕兩事均爲

國家重計而鹽務似尤不可偏廢也今若買自長蘆

賣於淮地無論收課不足當淮鹽十分之一且長蘆之課爲兩淮所收兩淮之地爲長蘆所占以官事而論長蘆課細有藉詞兩淮鹽壅無去路以實情而論所銷盡長蘆之私鹽所缺盡兩淮之

國課總計湖廣江西漕船滿載鹽斤可及二三十萬引江廣幫旣准帶鹽安徽幫亦不能禁止不啻占淮南半綱之額雖定以到揚納課而彼滿裝千引報百十引之課將聽其趨行而去則鹽課盡虧將扣留稱掣無論其恃漕爲護不服盤查而一船需數日工夫焉得有如許人手如許時日終歸於鹽

漕兩誤兼之淮南通泰兩屬二十場所產之鹽無  
從銷售數十萬竈丁生計有妨勢必私鹽四溢梟  
徒橫起於

國計民生大損漕臣以爲援照淮北票鹽而行不知  
票販專於販鹽別無關礙官事且淮北錢糧較輕  
仍以淮北之鹽行銷淮北綱地并不准其越境乃  
欲援照而以蘆鹽行淮地已屬比擬不倫至於丁  
情苦累淮帶土宜津貼原有

曠蕩之恩何能再以至重之釐綱輕爲丁艱沾潤之計  
臣不敢爲一己之責遠嫌緘默謹據實

奏懇

天恩敕下直隸總督山東巡撫長蘆鹽政天津鎮總兵  
仍照案嚴督沿河營汛州縣查拏梟匪窩圍堵截  
私鹽透上漕船並請

諭飭漕臣查照前兩年

奏定成案仍派幹練漕弁於各要隘會同幫弁堵截  
揆查庶免帶私停留既得迅速南下而楚西綱岸  
亦不致於歉歲滯銷之後再受糧私侵占於漕運  
鹽務地方均大有裨益爲此恭摺具

奏伏乞



皇上聖鑒訓示謹

奏

道光十三年十月十四日奉到

硃批所議甚是另有旨諭欽此同日奉到道光十三年

九月三十日內閣奉

上諭陶澍奏查緝漕船夾私正以速趨回空未便任帶  
蘆鹽致使鹽漕兩誤一摺所議甚是前據貴慶奏等  
議江廣回空軍船酌增食鹽給票交課章程五條朕  
卽覺其不可行惟以鹽漕並重不厭精詳當交部議  
旋據戶部奏增買蘆鹽有妨淮引降旨令陶澍悉心

妥議茲據該督於未奉諭旨之先接該漕督咨文卽力陳誤鹽亦且誤漕甚爲明晰漕船回空帶私爲歷來之痼弊並有隨幫風客除本分利坐占淮南數十萬引綱額勾引梟匪肆行無忌漕船停泊買私尤有誤於趨運前經陶澍派委文武大員於黃河南北及淮揚等處嚴密迎查并令漕員會同押空幫弁於直隸山東隘口認真堵緝卽寓催趨於查緝之中回空歸次亦較前迅速糧私旣絕官引自銷江廣等省雖連值水災銷數尙增本年漕船實由兌運艱難以致稽緩儘可嚴行催趨以速補遲若將漕弁撤退則幫

丁舵水等俱知禁令已弛必致放膽買鹽明縱透漏  
既害鹽綱欲速反遲尤誤漕運至該漕督請於例買  
食鹽四十斤外請在長蘆加買過揚納課不但有誤  
回空并且有誤重運况漕船水手素稱桀驁加以順  
帶官鹽必有梟匪出貲附和以天庾正供之船爲聚  
集匪黨之藪且所銷盡長蘆之私所缺盡兩淮之課  
實爲自壞藩籬至丁情苦累准帶土宜津貼以饜綱  
爲丁舵沾潤之計國家亦無此政體著直隸總督山  
東巡撫長蘆鹽政天津鎮總兵仍嚴督沿河營汛州  
縣查拏梟匪窩囤堵截私鹽透上漕船並著署漕運

總督恩銘仍派幹練漕弁於各要隘會同幫弁堵截  
按查其有已經議撤者仍行添設不准帶私停留務  
期迅速南下俾楚西綱岸不致於歉歲滯銷之後再  
受糧私侵占並著責成陶澍實力整頓以期鹽務日  
有起色不致滯銷庶鹽漕均有裨益欽此

月二家之三十三日

ノ

再陳回空糧船未便任帶蘆鹽摺子

奏爲遵

旨悉心妥議恭摺覆

奏仰祈

聖鑒事竊臣接准軍機大臣字寄道光十三年九月十

七日奉

上諭前據貴慶奏糧船例帶食鹽買自長蘆官店前因越境有妨淮課是以嚴禁近歲江廣軍船不敢夾帶鹽斤已歷三年旂丁苦累日漸難堪請於江廣回空軍船行抵天津准於例帶食鹽之外酌予增買每百

斤一包購帶四十包船到揚州計包交課給予印票收執放行以長蘆輕課之鹽納淮南之課於正額既有盈無絀揚州收此銀兩卽作爲淮南額課准其抵算亦昭平允並籌議章程五條開單呈覽當經降旨交戶部議奏茲據戶部奏長蘆兩淮各分引地例不准越界銷售鄰省之鹽多占一分本地之鹽卽少銷一分非固守藩籬不足以防侵灌該漕督所奏固爲體卹運丁起見惟以長蘆之鹽交兩淮之課究屬越界行銷長蘆引不加增恐啟囤販售私之弊兩淮課由外納恐有場鹽壅滯串通舞弊之虞所稱每船帶

鹽不過一船不及淮南額引百分之一抵次即可獲利回空必更迅速核與陶澍前奏回空運船帶鹽幾及淮引全綱之數沿途逗遛售賣冬杪尙未歸次之語不符近年兩淮奏銷銀數較之庚寅以前多至一百數十萬兩倘因增買蘆鹽有妨淮引將來墮課之員轉得有所藉口惟該漕督所稱旂丁苦累難堪及今不爲調劑則侵蝕正糧拆賣船器皆所不免亦不能不豫爲區畫等語國家鹽漕並重淮綱積年疲敝甫有轉機固不可因調劑旂丁轉致顧此失彼旂丁日形苦累亦應量予變通總之更易章程必須將兩



處情形通盤籌畫方可無虞窒礙兩江總督管理兩淮鹽務江廣漕船過境亦有督飭稽查之責著陶澍屏除意見悉心妥議務期鹽漕兩利方爲妥善貴慶所奏章程五條著鈔給閱看將此諭令知之欽此並將原奏章程五條鈔寄前來伏查回空漕船帶鹽一事前據漕臣貴慶鈔摺咨會臣已將鹽漕關繫重大不但貽誤淮綱抑且誤漕轉甚於

國計民生大損緣由縷悉具

奏在案茲復詳閱所陳章程五條一議天津買鹽揚州納課查定例鹽有產額有引地疆界攸分若越

界行鹽誠如部臣所言長蘆引不加增徒啟國販  
售私之弊兩淮課由外納必有場鹽壅滯串通舞  
弊之虞况乎藩籬一撤必至鹽法盡墮恐渙散不  
止兩淮也一議現課現交並無占礙准綱查淮南  
引鹽有正課有雜課又有岸費爲數甚鉅迥非長  
蘆可比今若以百不及一之鹽課壞八九百萬之  
全綱數既不值而偷漏且多欲逐包稱掣則時日  
太促欲就地徵課則鹽未變錢糧船水手恃衆帶  
私往往不服按查逞凶釀事况明目張膽以鹽爲  
名乎謂無占礙竊所未喻一議回空必速一議無

妨新運查漕船往返不准片刻逗留因其買私猶  
有延捱若明准帶鹽則上載納課銷售處處皆須  
停待官亦不能催迫卽恐歸次愈遲新運安保不  
誤至稱一船十八艙不過一艙裝鹽果有如此誠  
謹之丁舵則歷來不致犯禁而載私矣一議蘆鹽  
價賤買帶方裨丁計是則可知歷來回空之專帶  
蘆私更可知淮綱成本課額之重矣復何能以極  
賤之鹽越銷重地使兩淮益受其敝乎計此章程  
五條無非准帶蘆鹽一語不知糧船從前非不帶  
蘆鹽也而不聞幫丁之受益獲有餘潤以資辦公

者蓋載鹽並非糧船之利乃私梟風客之利也旂  
丁回空貲囊已竭舵工水手身價更微卽購私能  
有幾何其所以敢於犯禁滿載私鹽者皆梟徒預  
爲布置而風客出本買裝勾串水手啖以餘利仗  
爲護符馴致闖關逃稅莫敢誰何其勢足以壞鹽  
綱而於漕務實無所濟溯查旂丁辦運本有衛地  
屯田又有行糧月糧且造船有費歲修有費有水  
次耗米有隨船耗米抵通交卸復給餘米以及贈  
貼等項每船銀米各以數百計其所索各州縣兌  
費陋規與

恩准免稅之隨帶土宜尙不在此內得項可謂多矣而無歲不以疲累爲詞卽如庚寅以前數年間正糧船盛載蘆私之時淮綱阻遏不行鹽務因之大壞而旂丁並不多沾鹽利仍然刻須調劑曾經前漕臣訥爾經額奏奉

諭旨每船加帶土宜三十石合之原額及嘉慶五年所加共已免稅至二百二十石之多迺不旋踵又思調劑竊恐谿壑難填臣固不敢以至重之淮綱輕爲假借且明知加增於丁舵無益亦不敢另籌調劑之方兼查道光十一年安徽撫臣因禁糧船帶

私請再加土宜三十石經前任漕臣吳邦慶以轉  
多流弊

奏寢其議所言舵水身工雜費及挾制需索情形極  
爲明切今若因江廣幫船積慣帶私卽議予以調  
劑則江浙等幫同一挽運豈能不藉口希冀又將  
何以處之夫人心無止足之時積弊有難返之勢  
國家綱紀法度具有常經倘以費用不敷事事爲之  
請益時時爲之議加不但

帑藏無此經費卽小民亦無如許脂膏在旂丁之得  
項已不爲不厚而不免仍形苦累者一則得之較

易不無任意花消一則受兌開行之後直至通倉交卸無處不受人魚肉以故調劑有加而補救無效應請

旨敕下漕

臣

督同糧道通計每年經費量入爲出自淮

迄通確查積弊嚴禁弁委胥役之勒索並懇

諭敕倉場嚴查經紀人等措勒苛求俾漕務少消耗之數則旂丁之力自舒不但淮鹽藉免充塞卽弁丁挑斥米色橫索幫規之風亦可稍戢倘有刁玩之徒敢於侵蝕正糧拆賣船器卽應執法嚴懲不能慮有此弊而預爲之詞轉使明知而故犯現在漕

船經過蘆東見漕委盡撤諒必買帶盈船欲接起  
於既帶之後恐不比禁止於未帶之先臣惟有遊  
委道將帶同廉幹員弁於入境嚴查沿途堵緝並  
於揚州以至蕪湖九江等處實力查拏懲辦以期  
弊去則利興仰副

聖主塵念鹽漕之至意所有臣等議糧船無庸藉鹽調  
劑緣由謹據實覆

奏伏乞

皇上聖鑒訓示謹

奏



道光十三年十月二十八日奉到

硃批另有旨欽此同日奉到道光十三年十月十七日

內閣奉

上諭前據貴慶奏籌議江廣回空軍船酌增食鹽給票  
交課章程五條調劑旂丁當降旨交陶澍體察情形  
悉心妥議該督於接到該漕督咨文卽力陳誤鹽且  
致誤漕議駁明晰特降旨令直隸總督等仍嚴飭沿  
河營汎州縣查拏梟匪窩囤堵截私鹽透上漕船其  
已撤撥查漕弁仍行添設不准帶私停留茲復據陶  
澍覆奏旂丁得項不爲不厚揆其苦累之由多緣旂

丁任意銷糜且受兌開行以至通倉交卸均不免受人勒索如果禁絕諸弊漕務少消耗之數則丁力自舒不但淮鹽藉免充塞卽弁丁挑斥米色橫索幫規亦可斂戢倘旂丁中有刁玩之徒敢於侵蝕正糧拆賣船器必當執法嚴懲豈可慮有此弊而豫爲調劑事事請益時時議加不但國家無此政體必致不肖旂丁恃有調劑不知止足是除弊而轉益滋弊現在回空軍船陸續抵入江境該督卽遴委道將帶同廉幹員弁沿途堵緝糧私並於揚州以至蕪湖九江等處實力查拏有犯必懲著漕運總督督同各糧道通

計每年經費量入爲出自淮迄通確查積弊嚴禁弁  
委胥役之勒索並著倉場侍郎通飭各倉監督嚴查  
經紀人等措勒苛求務於弊端淨絕不使旂丁有所  
藉口以肅漕政而杜糧私欽此

再陳糧私最爲淮綱之害現在緝私緊要附片

再查糧船夾帶蘆鹽最爲淮綱之害緣江廣軍船歸次往往歲暮程遙恐誤新漕是以沿途催趲甚急而夾帶私鹽之舵工水手卽藉此以爲挾制之端遇有梭查嚴緊大則聚衆拒捕小則棄船逃走水手星散無人駕挽使查鹽委員怵於誤漕不敢羈延因而不敢梭索比及出江船仍沿路賣鹽任意逗遛此歷來之通弊所以欲杜蘆私莫若先嚴於長蘆未載之爲愈也伏查道光十年冬欽奉

諭旨軍船帶私之弊以江廣爲最其透漏鹽斤之弊以

長蘆爲最與其按查於旣帶之後不若嚴禁於未帶  
之先等因欽此又於道光十一年夏經臣縷陳長蘆  
查鹽七弊奉

旨天津一帶著琦善嚴飭查拏堵截囤販有犯必懲以  
杜透漏迨入江南地界著該督派委徐州鎮道嚴密  
迎查渡黃後酌派文武員弁照例按查如有夾帶鹽  
斤悉行起除根究風客加等嚴治幫弁旂丁一併參  
懲所有水手人等向遇按查嚴緊輒棄船四散以圖  
挾制委員恐誤歸次往往敷衍了事遂致肆無忌憚  
自應申明條例一船之內丁舵爲主水手有犯責在

旂丁如有逃匿一面嚴拏究懲一面督飭旂丁駕船  
趕幫受兌不致有誤餘著照所議辦理等因欽此欽  
遵通飭在案現在天津漕委既撤各船紛紛載鹽  
無人過問而揚州商人一聞此信頓形觀望竟有  
挾課請引臨期將銀掣回者似此情形殊於淮綱  
起跌攸關緝私更應緊要倘或水手輩因捺查而  
故態復萌敢於星散臣自當遵

旨一面嚴拏一面飭丁另雇水手駕船歸次趕幫受兌  
倘旂丁不遵卽行嚴懲並將押船之幫弁從嚴參  
懲以振頽風而肅鹺政合先附片陳明伏乞

聖鑒謹

奏

道光十三年十月二十八日奉到

硃批所奏是實力行之欽此

再陳回空糧船未便任帶蘆鹽附片

再臣於十月二十七日承准軍機處字寄欽奉

上諭據御史許球奏回空軍船請帶蘆鹽久已躍躍欲  
試現奉堵截照舊揆查伊等購買之費均歸烏有利  
未獲而轉觸科條全虧貲本兩江總督原以緝私爲  
重若一味濟之以猛是貴慶籌議卹丁非徒無益而  
又害之殊不足折服幫丁之心江廣軍船人數衆多  
萬一鋌而走險另起釁端必致貽誤歸次等語前據  
貴慶奏江廣軍船每船帶蘆鹽四十包并未降旨准  
行何以通幫遽行知曉公然私自攜帶著陶澍恩銘



秉公確切查明覆奏應如何妥行設法相機辦理固不可任蘆鹽占礙淮綱尤不可令幫丁滋事致誤新漕兌運欽此伏查歷來軍船帶私無不以撥查延誤新漕爲辭以致爲害綱鹽莫敢誰何疊奉

諭旨嚴查復經臣奏明如敢藉詞挾制或棄船星散卽飭丁另雇水手駕船歸次一面嚴拏究辦并將幫弁參懲現奉

硃批所奏是實力行之欽此該弁丁等咸知凜遵並經新署漕臣恩銘到任號令嚴明各幫所帶私鹽未經入境多自行賣去不敢滿載道將委員等亦均

109 正統 3-182

能嚴密按查持以鎮靜現在渡黃未灌賠僅止三百餘船刻日全竣正不必反覆示懦轉致延捱滋事若如該御史所奏旂丁水手與風客販私有別慮其按查時貲本均歸烏有且慮臣執法過猛不足以折服幫丁之心是未知私鹽本無可折服而亦不盡出於幫丁臣查風客出本營私豈肯露面幫丁舵水爲之護符今按起私鹽所謂借貸之貲者卽借貸風客之貲也所謂全虧貲本者卽全虧風客之本也欲拏風客嚴辦而又慮虧其本乎鹽爲官物非他貨可比在平民且不能縱任販私而

况糧船水手律有專條比平民更嚴何得謂旂丁  
水手販私與風販究有區別乎至其滿載私鹽照  
例已應軍流今祇撻起其鹽趲行而過是正因漕  
務而濟之以寬似不得謂爲一味以猛竊以水弱  
民玩該御史所謂非徒無益而又害之者正在於  
此卽如漕船帶私未始非前途玩縱之所致今若  
因查鹽而慮其鉅險另啟釁端則盜賊豈無饑寒  
之可憫梟徒亦有拒捕之堪虞又將何以折服之  
伏思我

國家整綱飭紀法立知恩敢有玩法之人自有懲玩

古今考索卷之八

之法前此嘉興幫船水手滋事經蘇省拏獲一百數十人解浙嚴辦前鑑具在并不因查鹽而始有滋事之徒不必因滋事而預作縱奸之想萬一有犯亦惟隨事懲創足資儆戒至江廣船雖衆實多守法卽如江蘇幫船勒索幫規動輒盈千累萬而江廣船尙無此風其情形較苦兩年來揆查私鹽并無顆粒夾帶前漕臣吳邦慶曾將首先教戒水手不令帶私之湖北頭幫旂丁馬姓獎以花紅臣於龍江關覆查時并經每船酌加獎賞本年覆查如無夾帶擬仍照前給獎現在署漕臣恩銘押尾

已抵楊莊俟面晤時再行妥商籌議辦理合先附  
片覆陳仰慰

宸廑謹

奏

道光十三年十一月二十八日奉到

硃批知道了欽此

會同浙閩督撫暨蘇撫等議堵截淮私章程以衛

浙鹽摺子

奏爲籌議章程嚴堵淮私以衛浙鹽遵

旨覆

奏仰祈

聖鑒事竊照道光十二年五月十三日欽奉

上諭給事中邵正笏奏兩淮船板等船私鹽侵害浙鹺  
請飭妥議章程協力堵緝一摺據稱江省常州鎮江  
等府毘連大江爲浙西引鹽門戶順治年間於京口  
地方設立官廳盤驗鹽船嚴拏夾帶私鹽立法至善

乃日久視爲具文兵役得規故縱以致浙西引地緹銷兼之上年江省奏開沿江孟瀆德勝澡港三河便於舟楫往來卽有江北梟徒駕駛朋板黑魚腮等船裝載私鹽絡繹進口更有地方棍徒勾引招接私設秤手行家到處販賣一遇官役查拏冒稱災民肆行強橫反向官鹽商鋪索詐搶奪因此商無轉輸店多閉歇始於常鎮兩府蔓延蘇州松江太倉各屬浙西引地自上年七月以來缺銷十餘萬引緹課數十餘萬兩且三河對峙淮鹽呂四等場梟販片帆飛渡尤爲便捷請飭江浙文武大員會同核議等語著陶澍

程祖洛林則徐富呢揚阿悉心妥議或照京口盤驗之例在於沿江隘口移駐一二員弁專司盤驗或於三河之中酌擇一河通行舟楫其餘二河以及支港概釘木柵不准通舟或修閘座派委委員司其啟閉以資捍禦此外如鎮屬丹徒各口濱臨大江淮私直達亦著籌畫堵截章程具奏又據稱常鎮二府鹽行浙省地屬江南與松所事同一律必須地方官協力巡查並著陶澍等督率員弁一體認真緝私如有稍分畛域膜視浙離淮浙江巡撫據實參奏將該上司一併議處至淮揚漏私營弁有故縱情弊尤須嚴加



考核其浙省亦毋許藉詞諉卸停運懈巡總期於鹽務大有裨益欽此卽經臣等劄飭江蘇臬司暨淮浙運司常鎮道等欽遵會核嚴查協力堵緝並督同常鎮二府查明孟瀆等三河對峙呂四等場扼要地方及丹徒臨江各處隘口偷漏情形應如何專委移駐及修理關座委司啟閉或分別釘椿設卡俾資捍禦議立考核章程詳覆並由浙省飭委台州通判王世履候補運判蔣恩銘前詣常鎮二府會同各縣周歷查勘去後茲據該司道督同府縣等查議詳請具

奏前來臣等查常州府屬之孟瀆德勝澡港三河俱坐落郡城西北南通運河北達大江沿江口門澡港河爲圩塘港德勝河爲魏村港孟瀆河有二口一爲小河口一爲新開之超瓢港該三河江北對峙係泰興縣管轄由泰興東下爲靖江縣再下爲如臯通州通州以下始爲呂四等場地面相距在三百餘里之外三河口門雖不與呂四等場對峙而北岸之防範稍疎淮私卽不難渡江侵越自應籌議堵緝以絕私源惟三河開挑民間借

帑至二十萬之多均須攤徵歸款原爲通潮灌田世

蒙其利若各江口概議釘堵則潮來阻滯淤不旋踵工力歸於虛擲民情斷難甘服况各河均於運道大有關繫德勝河則輔翊孟河以濟運而小河口在於孟河中腰必藉此口進潮孟河之水勢始能暢旺灌入運河直達荆溪宜興無錫金匱等處庶空重經行漕船可免淺阻之虞今再四籌議澡港河小且有龍興沙橫巨口門形勢紆曲潮來甚細該河之挑鄉民專爲灌溉田畝而設擬於圩塘港口門用橫石三條釘堵每石中間三尺俾潮沙可通以資灌溉而船不能行則江北之倒撐等船

無從載私以入其餘各口旣難堵塞計惟建閘設卡之法派委員役啟閉稽查俾江湖藉閘爲宣蓄旱澇不致爲患而私鹽以閘卡爲藩籬堵緝亦可期得力於水利鹽政兩有裨益查開挑三河案內奏准建閘一座現經定議在小河口內馬橋地方建立其魏村舊有石閘可以修整完固應照舊歸於河工案內辦理新開之超瓢港口該處民人亦環請建閘惟籌款需時難以并舉應請在於超瓢港口內選擇要隘處所設立卡房派撥兵役巡緝該處相距孟河營數里并令該都司不時就近查察

是該三河雖有四口而一口堵閉不准通舟兩口  
建閘設卡以資捍禦其無閘之口內有孟河城阻  
截守以都司今更於該口要隘之處議添卡房防  
緝之法實已周備其運河內地該商等向設東西  
河巡隨時偵緝應飭商多設巡船互相巡緝無庸  
另議章程又查無錫金匱二縣錫界東南旣濱太  
湖又與長洲吳縣相接私鹽由蘇湖兩府來者官  
河小港隨處可通金界東北緊接江陰常熟西北  
近連武進陽湖與武陽交界處所尙在腹裏惟江  
陰常熟近鄰江海私販最多船板各船潑販侵銷

狂來無定兩邑與江常兩縣毘連之村鎮如陳市  
王莊羊尖嚴家橋張麻舍蠡國等處水陸交通實  
無扼要之所且防之於腹裏不若防之於進口之  
處更爲得力應飭福山營於各海口實力防堵又  
查江陰縣境北濱臨大江計長一百四十里與江  
北之泰興如臯通州海門崇明等場對峙中有壽  
興龍登磨盤等沙均爲販私囤積之地壽興沙周  
圍六十餘里有三沙汛把總一員外委一員駐劄  
龍登磨盤兩沙向無營汛濱江一帶由西至東自  
武進界連之桃花港起至常熟之界涇河止凡二

十港均通外江向釘椿木內有離城五里之黃田  
港河身寬濶通達商賈舟楫向不釘椿離城三里  
地方有上海稅房木卡一座稅房外里許有黃田  
港汛千總一員外委一員駐劄惟該港雖有稅房  
專查漏稅未能干預查鹽議請在汛地附近添設  
卡棚一座照京口盤鹽之例責令該千總外委核  
實查驗磨盤龍登兩沙議請移撥水師官弁一員  
哨船兩號與壽興官弁互相巡哨又查宜興荆溪  
一二縣東至太湖境接蘇州湖州二府南屬山鄉毘  
連浙界西達金壇溧陽二縣內多汊港支河四通

八達北與陽湖交界正北與武進毘連直達三河  
孟瀆等港凡有淮私艚板等船皆由武進之三河  
鎮江之越河等口潛入東北之鍾溪下邳烏溪三  
處及百瀆大墟等港逼近太湖亦難保無私梟透  
漏應於烏溪大墟總口添設卡木移營派弁堵巡  
并飭商人添設巡船在於文瀆徐舍楊巷東西沈  
及官村豐義等處與營巡互相梭緝盤拏又查靖  
江縣僻處江北界連如臯泰興中隔界河內有夏  
家石錠廟橋蔡家五港通達小船各港口均有城  
守營汛弁駐劄巡查并於港口設有木柵保埠稽



查啟閉其餘支河小港歷經釘堵完固至江心劉  
聞沙各港口係京口水師左營汛防向設外委一  
員由商人召募巡快給發工食隨同弁兵巡緝防  
範無虞私鹽侵越此籌議常州府屬孟瀆德勝淖  
港三河及走私各隘口分別釘石建閘設卡堵截  
淮私之情形也又查鎮江府屬之丹徒縣濱臨大  
江西自高資港起東至丹陽交界之太平港止計  
長一百四十餘里沙洲林立與淮揚對峙乃私鹽  
出入咽喉之要地必於各隘口詳籌堵截庶幾淮  
私不致侵越第由江入運其口有五一日京口卽

運河離京口二里有小閘又東有甘露閘又東二  
十里爲丹徒口又東十里有諫壁口而京口設有  
按鹽廳久經奏定鎮防廳會同鎮江營參將督率  
兵役認真按查口內半里有西閘亦歸該廳營派  
撥兵役督同閘夫啟閉稽查足資堵禦其小閘與  
甘露閘兩處祇係蓄水濟運向釘木柵不通行舟  
且俱派有兵役巡防已屬嚴密惟丹徒口內設有  
橫閘諫壁口內設有越閘此二口非惟便民舟楫  
凡遇乾旱京口淤塞回空糧艘亦由此入運實屬  
通行要道而江北匪徒越境販私從此而入者亦

復不少若於口內擇要設卡稽查誠恐日久弊生  
轉致有礙行旅詳加查核除京口暨小閘甘露閘  
三處無庸添設外其橫越二閘內通運河外達大  
江不特爲徒陽要隘更爲丹徒之丁門帑地及壇  
溧宜荆等縣并杭嘉二所之門戶必須嚴立巡防  
堵其侵越該二閘設有閘官一員僅司啟閉向無  
緝私之責查船隻抵閘須候啟放始行不能飛渡  
尙易稽查惟閘官額設夫役有限稽察難周且設  
遇玩法巨梟成羣闖閘又慮寡不敵衆應飭商人  
在於兩閘口各添設巡役八名卽責成該閘官督

率稽查有鹽獲解無鹽放行不許留難其江面金山以西之世業等洲貼近儀徵所轄之老虎頸地方該處係兩淮江廣鹽船停泊之所以及侷梟聚圍私販出沒其間由土橋口直達沙洲一葦可渡又金山南岸緊對瓜洲大口私船片帆而下又焦山迤西之甘露港與江北金絲八港對峙迤東之丹徒諫壁二口口內雖有員弁稽查而口外接連御隆連城益課等十餘洲界連江都巡防尤宜嚴密以上四處應各設巡船一隻以資堵截又大港之外沙洲交錯對面卽係江北之三江口梟匪出

入靡常該處駐有安港司巡檢向設緝匪巡船卽  
責成該巡檢督同兵役兼緝又樂生洲至太平洲  
沙洲叢雜毘連丹陽泰興江都各洲梟徒夥販皆  
從江北而來須添設巡船又埤圩帑地自圖山韓  
橋起至朱張圩太平港止雖銷丹陽之引而在丹  
徒地界住賣應歸丹徒緝私其地緊靠大江樂生  
等洲是該處尤關緊要應於樂生永安等洲各添  
設巡船一隻以上除安港司本有巡船外其應添  
設巡船六隻由水師副將各就本汛每船派撥外  
委一員兵役八名各按段落無分畛域梭織巡防

彼此會哨庶聲勢得以聯絡設遇大夥私梟卽會  
合兜擒方爲得力但江北各口不下數十處路路  
皆可走漏若無場竈之售私梟棍何由而興販應  
飭淮通泰揚各場員嚴禁竈漏并飭守口各員弁  
實力查截禁止出口以杜私梟此丹徒及埤圩走  
私各口應行駐弁稽查添設巡船之原委也又查  
丹陽縣地當孔道水陸交衝空重糧艘差民船隻  
夾帶繁多兼之支河汊港路路可通應請飭商添  
設巡船互相堵緝其沿江隘口最要二處一係埤  
圩帑地以南之包港河南通運河外達六沙等洲

爲淮私侵灌之地一與武陽連界之超瓢港爲崇  
明岱山海私侵越之區均宜嚴立巡防以衛浙引  
應於包港河口設立木卡一座該處有包港司巡  
檢卽責成該員專司盤驗并飭由營添派外委一  
員撥兵八名會同該巡檢督率認真稽查其超瓢  
港係屬兩縣交界之區防範最易疎忽又太平港  
錢家港口外之六沙張家洲及三墩子四墩子團  
沙洲太平洲蔣家沙等處均係淮私由江北出口  
至該處囤積興販實爲埤圩引地之害應於該處  
添設巡船三隻每船由營派弁一員撥兵八名無

分畛域嚴密堵截此丹陽及埤圩各隘口必須設  
卡并添船巡緝之情形也又查金匱溧陽二縣地  
居偏僻支河汊港接連淮界通達太湖向有淮梟  
私販侵擾更有淮場船邊竈泥船裝運販賣假以  
易換窑竹等物爲名本地鄉民私煎售賣暗借官  
銷兼有上年船私倭匪冒災販私四處橫擾原設  
巡役寡不敵衆以致引鹽壅滯應飭商人多設巡  
船添雇巡役會同地方文武兵役在於金壇縣之  
荆城港清培河等處并溧陽縣之陽巷甓橋等處  
走私各隘口互相巡緝方可期私販無從偷渡此



壇溧二縣應飭商人添船協巡堵緝之情形也總之私梟之靖全在巡緝之嚴現在飭勘釘堵建閘添設營巡極爲周密究恐日久懈弛必須事關切已之商巡與營巡互相稽察聲勢方臻聯絡庶梟匪可期斂戢惟弁兵之勤惰自應明定賞罰方足以收實效容<sub>臣</sub>等飭令該司道等妥議功過章程詳請咨部查照又查京口右營守備移駐韓橋地方帶兵巡防向於運庫給發鹽菜銀四百四十兩今沙洲疊漲私鹽盤踞現在四路設巡此處亦應改設巡船一隻飭派弁兵在於該處梭織巡緝以

資周密應將前發鹽菜銀兩掣銷改作添船設卡  
薪水之用其不敷之數仍於浙省運庫籌款給發  
如此一轉移間庶兵歸實用費不虛糜再查積慣  
巨梟悉皆兇悍之徒一遇兵役撻拏動輒持械拒  
捕若非攜帶鳥槍實不足以資堵禦而壯聲勢所  
有常鎮二屬巡江兵役應仿照江西省道光四年  
奏准成案酌帶鳥槍倘遇大夥私梟數在十人以上  
持械逞兇拒捕力難擒獲准其施放鳥槍抵禦登  
時格殺者照罪人持仗拒捕登時格殺律勿論如  
係零星小販並無拒捕情形仍不准擅用違者照

例治罪蓋火槍利器原不容輕率妄用而大江禦  
暴又不得不藉以抵格然必先期徧貼告示曉諭  
使兵民咸知儆畏其兵役所用烏槍應照例編列  
字號官爲給發以便稽查而昭慎重至於窩頓秤  
手應飭各縣申明康熙五十五年鹺志載明責成  
保甲里民互相稽察有能拏獲照律給賞容隱徇  
縱者照例治罪如此釘堵設卡設巡嚴拏暗訪俾  
淮私堵絕而浙引自可暢銷以仰副

聖主整飭鹺務之至意所有<sub>臣</sub>等籌議章程緣由理合  
會同恭摺覆

奏伏乞

皇上聖鑒訓示謹

奏

道光十三年十二月初四日奉到

硃批依議認真辦理欽此

Table with 10 columns and 10 rows. The table is currently empty.

|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |
|  |  |  |  |  |  |  |  |  |  |

1346

仍請停止加帶已庚殘引摺子

奏爲加帶已庚殘鹽實占各綱正額以致引課俱形積壓再行據實

奏請停止仰祈

聖鑒事竊

臣

前因已庚殘鹽自辛卯加帶以來江廣各

省連年被水各綱正額均未銷足核計壬辰未運楚西綱鹽尙有七十餘萬引之多未便仍令加帶僅完殘引之正課占礙正綱之錢糧兼致京外額解各雜款無以應解

奏請自癸巳綱起卽將已庚殘引停止加帶所有商

鹽每包五百斤出場除摺正鹽四百斤之外其餘  
一百斤循照成例配割本綱正引全完正雜錢糧  
奏奉

硃批戶部議奏欽此茲奉部議以兩淮從前鹽引滯銷  
由於本重價昂自道光十年酌減科則成本已輕  
十一年議定每引加鹽一百斤僅完正課三錢在  
商人可以扯輕科則且以加斤之課彌補舊虧於  
課項亦不無裨益今停止加帶已庚引課另行配  
割正引按正雜錢糧全完計每四百斤須交課四  
兩有零商人科則加重必致轉運不前且以五百

斤出場而欲以四百斤配引勢必暗中夾帶名爲  
另行割運實則照例捆包而已庚之加帶旣停課  
款卽歸無著應令詳加體察如果停止加帶另配  
正引實能較現完引課有盈無絀且能力杜奸商  
夾帶不致自弛防維方爲確有把握不得因江廣  
偶值偏災遂以鹽多壅滯爲詞遽將甫經奏定章  
程又思更變致滋弊混等因具

奏奉

旨依議欽此咨行前來遵查

臣

前於道光十一年

奏請加帶已庚殘鹽原爲籌疏積引彌補舊虧每引



祇完正課亦以扯輕商本若果各岸均能將正帶引鹽按額銷足於

國課商運本皆有益乃自辛卯加帶以來江廣暨上下江各省連值水災於辛壬兩綱正額並未能銷足積壓壬辰綱鹽至七十萬餘引之多有補舊之名而增積新之累在舊之所補祇正課之無多而新之所積實全款之甚重權衡全局實有萬難加帶之勢不敢以請帶在先自存迴護致誤機宜是以據實

奏明卽自癸巳綱起飭行停帶今部議恐科則驟增

109 7-54-182

且慮割引夾帶註查加帶殘鹽祇完正項免納雜款原爲扯輕課本調劑商力起見但口岸未能行銷足額自不能偏顧商情增此輕課之帶引愈占正綱之地步且查辛卯壬辰兩綱雖各帶完已庚正課三十七八萬兩其本綱僅完八分亦各短缺三十餘萬之正課是加帶之與缺運其數僅足相抵而雜款無出積欠轉多各處待用紛紛咨催幾無虛日自不得不權其緩急暫停加帶現在癸巳業已開綱係照停止加帶計算科則正雜共四兩有零較從前仍屬輕減不致增累商運至從前加

三配割於出場斤重未能核實釐定運鹽到儀多由商人配報故有夾帶重斤之弊自

臣

奏明每引以五百斤出場捆四割一有整數而無畸零既省運腳尤便稽查由場所按包稱掣即按斤割配絲毫不能影混即係嚴防夾帶之把握此時以帶殘加斤改爲本綱之割配仍係按照舊章辦理不過以帶殘之引目換用本綱之引目於稽查核算一切并無更改商人無從弊混自不致又有夾帶之弊至弛防維據鹽運司俞德淵議詳前來

臣再三籌酌不得不如此辦理以冀先儘正引徐

109 卷之三 187

圖補救惟有據實覆陳仰懇

天恩俯念淮鹽課額甚重疊值災年行銷竭蹶未能兼  
補舊虧仍請自癸巳綱起將淮南已庚殘引停止  
加帶循照

欽差奏定原案俟察看將來口岸暢銷後再行酌議加  
帶辦理所有現運癸巳綱鹽除解捆正額四百斤  
外餘鹽一百斤照案配割本綱正引完納正雜錢  
糧至淮北票鹽行銷較暢其溢運之數仍作加帶  
已庚銷算以補舊缺無庸停止合併聲明謹據實  
恭摺具

奏伏乞

皇上聖鑒訓示謹

奏

道光十三年十二月十九日奉到

硃批戶部議奏欽此

查覆楚西現賣鹽價摺子

奏爲遵

旨查明楚西現賣鹽價恭摺覆

奏仰祈

聖鑒事竊臣承准軍機大臣字寄道光十三年十一月

初九日奉

上諭有人陳奏江西湖廣各州縣官鹽價昂每斤制錢六十文至七十餘文而私鹽每斤不過三十餘文民間扞法食私地方文武員弁任聽該商昂價漁利絕不禁止其爲得規庇縱無疑等語商人私擡鹽價本

干嚴禁近年一切陋規浮費概行裁革商本旣輕鹽價卽可平減若如所奏官鹽價昂幾至私鹽一倍有餘私梟乘間而入勢必官引滯銷課款不能足額著陶澍等嚴飭各該地方文武員弁於新定章程實力奉行不得仍前收受商人陋規任聽昂價倘查有得規庇縱情弊卽行嚴參懲辦並著照現在銀價核定每鹽一包應值制錢若干通行曉諭不准踰越俾鹽價平減官引暢銷以期蠲務漸復舊規將此諭令知之欽此仰見

皇上整頓鹺綱因利除弊之至意臣伏思鹽利與米穀

並重均爲民生日用所必需其所以利於食私者皆因官鹽價貴之故是以欲振鹽綱莫如減價敵私一策而於江廣尤宜何以言之天下之鹽課或數萬十數萬多者數十萬止耳而淮鹽伯什倍之其數抵數省之地丁而有餘而行銷六省實則爲地無幾如江南之蘇松常鎮太倉徽廣例食浙鹽徐宿例食東鹽淮揚逼近場竈食鹽甚少往往融銷楚岸皖北各屬與豫省毘連之處皆食淮北海州之鹽其課亦微其食淮南鹽者蘇省惟江寧一府皖省則沿江之安池寧太和椒而已是以積重



之勢全在湖廣江西而江西之廣信則食浙鹽贛  
州南安寧都與湖南之郴州桂陽皆食粵鹽湖北  
之施南食川鹽其餘多爲鄰私所侵灌如衡永寶  
靖之於粵荆宜之於川襄鄖之於潞皆全爲私占  
不過虛存淮鹽名目所真食淮鹽者江西惟南昌  
南康瑞臨饒九湖北惟武昌漢陽黃州沔陽湖南  
惟長沙與岳常澧三屬通計不過十數郡而八九  
百萬正雜之課出焉皆由江廣之民無分大小貧  
富殫終年之力輸之於商以登諸運庫世徒知江  
浙之民力困於漕能見之能言之而不知江廣之

民力罄於鹽人不之見而亦無有言之者也昔唐  
臣劉晏權天下之鹽始終其事十有八年始得六  
百萬串今江廣十數郡之歲課實更過之非由鹽  
價昂貴奚以致是然課不能減卽鹽價無由而賤  
欲平鹽價亦惟有除陋規節冗費稍省商運之成  
本而後可前經

欽差

臣

王鼎寶興會同

臣

刪革一切成本稍輕卽經

臣

查照從前部定價值酌減二成計湖廣鹽每包八  
斤四兩江西每包七斤四兩均各定以每包抵岸  
售價二錢六分五釐梁鹽加售一分安鹽減售一

分嗣經運可以腳價一切無不增昂詳請

奏明酌增一二分由鹽道隨時議報統計每斤價值  
三分有零按照時價不過四十餘文仍較部價有  
減無增至於各處鹽價有昂至六七十文者較私  
鹽不啻加倍此則水販與店鋪所爲非商人所得  
而預也凡商人運鹽赴楚至漢口而止赴江西至  
南昌而止卽照所定之價發於水販分運各府州  
縣由城鄉各店鋪輾轉售賣其價卽與商人無涉  
溯查乾隆五十三年經前大學士公阿桂等定議  
試行鹽價至嘉慶六年始定以湖廣每包價三錢

九釐零江西每包價二錢八分二釐零梁鹽每斤  
加售二釐迨嘉慶十三年因河工報効加增一分  
五釐二十三年

奏請停止道光六年又因軍需河工加價三釐九年  
十二月奉

諭旨停止至於水販轉運向例每包准加銀五釐鋪戶  
零售准加銀九釐其水陸遠近按程計里加增火  
工運腳由地方官隨時酌核載在鹽法志大約湖  
廣應加運腳每包自一釐八毫至六分四毫不等  
江西自二釐至一分四釐不等亦經各督撫咨報

有案自道光十一年臣等查照部價酌減二成之後其時輸規既散隨到隨銷無能把持間值天時人事之不齊偶有增長爲數甚微過時仍卽復原現查湖廣鹽價眞梁每包二錢九分每斤合制錢四十七八文頂梁白梁以次遞減江西銷市更滯賣價更減尙非騰貴至於地方文武包庇增價最爲惡習臣查阿桂等前議試價摺內卽言淮鹽費多利薄辦運不前皆因江西湖廣曾有奏定之價時或不能相符人人得以持其長短遂不免私出陋規陋規旣興有增無減卽有時成本稍輕原可

照價出售亦以費重不能復舊會奉

特旨禁革自可無需索之事然弊根不去商情尙多顧慮未肯踴躍等語可見人情不甚相遠不但縱商擡價足以得規卽無端勒商減價亦無非爲規費地位臣愚以爲但能堅持散輸之議無從居奇卽無能擡價小有起跌在一二分內者已較部價爲輕自可聽其自然無庸另議以免紛擾致滋觀望惟本年場埔被水淹漫秋冬之交更加雨雪連綿竈戶不能煎熬向來每引場價不過三兩今已長至五兩內外蕩草蒲包亦因歉收長價連本增重商

情竭蹶屢次撥案請復從前部價均經臣與運司  
剴切駁斥然場竈如此艱難轉運益形拮据察看  
商情實不免支持喫力惟有咨明湖廣江西各督  
撫嚴飭地方文武認真緝私以期銷路通暢藉資  
利運稍回元氣至於水販鋪戶其售賣價值有無  
增添例由湖廣江西督撫按照地方道里情形酌  
核辦理亦卽移咨轉飭各州縣照例核辦毋許私  
任加增倘有文武庇商擡價抑或勒指需索一經  
查出立卽嚴參懲辦一面飭令運司催商趕運不  
得以歉產本重希冀增價并飭各鹽道設法疏銷

外所有查議准鹽售價緣由理合恭摺覆

奏伏乞

皇上聖鑒謹

奏

道光十四年正月十三日奉到

硃批知道了欽此



卷之三

三

覆奏准鹽奏銷難復原限摺子

奏爲接准部咨確查准鹽奏銷甫望轉機尙難驟復原限各情形據實陳明仰祈

聖鑒事頃准戶部咨大學士長齡等會議御史那斯洪阿條奏

國用事宜一摺內開兩淮例於次年二月奏銷現在展至六月應令該督確切查明應如何復歸原限挽正綱分之處自行

奏明請

旨辦理等因奉

鈞文設公全奏

卷十一 奏疏

旨依議欽此遵卽飭行運司確查議詳去後茲據兩淮  
鹽運使俞德淵詳稱遵查兩淮鹽課例於次年二  
月奏銷除淮北改行票鹽

奏明按年截數另案造報外所有淮南運務自道光  
十一年三月開辦辛卯綱時各岸尙存歷綱殘鹽  
四十餘萬引而在淮已請未運殘鹽又有三十餘  
萬之多是辛卯一年額引已爲殘鹽先占運銷地  
步是以十二年二月例應奏銷時不得不詳請

奏展半年乃奉部議祇准四箇月以致課雖完納八  
分引鹽實多積壓且辛卯旣被占於殘鹽故壬辰

卽被占於辛卯層遞而下後積無非前壅兼以加帶已庚殘引七十餘萬亦係正綱外增之數如果各省年穀順成岸銷暢旺則流通由漸尙可導滯疏新詎自十一年來江廣疊遭水患民食維艱鹽尤所緩雖比之從前銷數尙爲稍增然總未能足額此各岸滯銷之實在情形也乃場竈更有缺產查場竈均在下河濱海之區水潦所歸上年西水下注時正值海潮頂託垣鹽被浸多有消耗秋冬雨雪更甚場竈全淹竈丁無計攤淋滷味發淡熬不成鹽加以蕩草蘆柴人工飲食無一不貴以致

場價頓昂運本愈重計自上年壬辰奏銷後雖已  
開辦癸巳新綱而商人投請納課守候未運之壬  
辰綱鹽截至今春尙有七十餘萬引貲本占閣卽  
無力以納癸巳課銀况場竈因雨雪停煎已久甫  
經攤熬現亦無鹽可運此蓋限於天時實非督催  
稍敢鬆勁以目前情形而論恐須再有加緩難以  
遽復原限詳請具

奏前來臣伏查兩淮疲敝久在

聖明洞鑒之中前此辛巳壬午癸未三綱係減半折行  
丙戌銃半丁亥全銃已丑則停運三分庚寅復又

全停通計五綱約該徵正課銀一千萬兩而此一千萬數內尚有淮北借馬未完及預納歲支占墊銀兩並未按數完解臣於萬難措手之際受任兼管仰稟

宸謨兢兢釐剔督率運司循照

欽差會議章程裁浮費以舒商力慎出納以重庫儲散輪規以廣售銷定額斤以杜夾帶加以堵截糧私嚴拏梟匪清理鄰界禁捏淹消諸凡遵

旨實力奉行倍加整頓罔敢疎懈是以辛卯壬辰癸巳三年以來業已奏銷兩綱錢糧癸巳現亦開綱趕

辦較前十綱中祇辦五綱有餘之引課爲數似屬不侔且已奏銷兩綱引內不惟正款全行撥解並另有多徵之已庚正課八十餘萬更有淮北久無徵課之引亦於改票引內徵完銀七十餘萬兩計此多徵之銀足抵淮綱正課之八似已畧有成效可望轉機惟因辛卯開綱時在岸及已請未運各鹽幾及一綱占礙辛卯銷數催徵催運早棘手於接辦之初是以辛卯奏銷不得不

奏明展限而部限四箇月實不足以疏前積層累而下勢有相因商人止此一副費本力難課納兩綱

况值江廣水患頻仍場竈連年被澇多有淹消更兼缺產日前幾至無鹽可運與浙江情形相似實屬人力難施現在江西口岸需鹽尤緊刻須籌濟所幸春令暄和趕緊疏銷積水修復埤池如能天氣夙晴趕煎趕運再得岸銷加暢回課源源則至六月展限奏銷時自當按照徵完分數據實造報斷不敢稍事遲延萬一仍有不齊產歉銷滯亦惟臨期據實籲請

恩施臣萬不敢以目前實在情形率議歸復原限自蹈欺飾之咎惟有得尺得寸隨事隨時殫竭血誠不



敢稍有鬆勁以期將來全復舊規仰副

聖主整頓淮綱之至意所有接准部咨查明淮鹺奏銷  
情形謹據實縷陳具

奏伏乞

皇上聖鑒謹

奏

道光十四年三月初九日奉到

硃批戶部知道欽此

浙江借買淮北票鹽一萬引附片

再臣接准浙江撫臣富呢揚阿咨該省亦因上年

雨水缺鹽已向長蘆借買緩不濟急現復

奏請借買淮北票鹽一萬引運赴嘉所之長洲元和

吳縣充用並鈔摺咨會前來臣查淮北自改行票

鹽以來口岸暢銷所產鹽斤亦只可自備本岸行

銷之用惟嘉所長洲等縣地廣人稠缺鹽甚急臣

又何敢稍存岐視致民間有淡食之虞且浙引攸

關

國課亦萬不敢不代籌接濟當卽飭行兩淮運司及

海州運判查明票販在途尙未過湖之鹽實有若干按照浙引斤重酌撥一萬引之數俾資濟急第淮鹽亦正在缺產茲於無可籌備中通融接濟亦祇可借買萬引倘多有加增卽恐顧彼失此難以爲繼計現在天氣晴和浙省熬鹽諒可逐漸暢旺合併附片陳明伏乞

聖鑒謹

奏

道光十四年三月二十九日奉到

硃批知道了欽此

停借淮北商人底馬摺子

奏爲停止淮北鹽商借馬以重課款仰祈

聖鑒事竊照兩淮掣鹽以二十引爲一馬各商按馬納

課然後掣鹽發運謂之底馬錢糧乾隆年間北商

因運艱課重懇先完一半錢糧給發底馬掣運限

六箇月繳清課項謂之借馬迨嘉慶年間因積欠

底馬銀兩較多經前鹽政臣延豐

奏請停止道光七年前任兩江總督臣琦善前任兩

淮鹽政臣張青選於

奏覆查明淮鹺積重情形案內欽奉

上諭淮北商人積疲已久復因連年運道梗阻虧折誤  
運著准照從前借馬成案一律借給底馬自請程之  
日起限六箇月完繳轆轤借給等因欽此欽遵在案  
詎自借馬以來各商無不紛紛請照辦理前馬未  
還後借又多課款幾同虛設並且借藩籬爲名動  
需淮南調劑日累日甚課緹商逃近年改行票鹽  
章程易商爲販課項有增無缺計河北及湖運四  
十二州縣現已全改票販祇有江運八岸及天長  
一縣留歸商辦各商疲乏已久運鹽無幾若仍借  
給底馬必致延欠難歸應將淮北借馬之案停止

仍按舊例先納課後運鹽以歸核實至淮南鹺務  
重大運岸太遙偶值轉運不靈萬不得已之時酌  
量緩納提課歸款係屬暫時設法疏通以速商運  
並非常有之事且旋卽委員赴岸守提於課款無  
虧不在此例合併聲明據鹽運使俞德淵詳請具  
奏前來除批飭照辦外所有停止淮北借馬緣由謹  
繕摺陳明伏乞

皇上聖鑒謹

奏

道光十四年三月二十九日奉到

戸部知道欽此

馬

硃批

趕辦壬癸未運引數緩開甲午新引附片

再臣前接戶部咨大學士長齡等會議御史那斯洪阿條奏

國用事宜一摺內開兩淮例於次年二月奏銷現在展至六月應令該督確切查明應如何復歸原限挽正綱分之處自行奏明請

旨辦理等因奉

旨依議欽此當經臣查明辛卯銷數被占於殘鹽壬辰之鹽卽被占於辛卯商人祇此一副貲本力難課納兩綱加以江廣水患頻仍場竈連年被澇淌消



缺產幾至無鹽可運現在疏銷積水修復埕池如  
能天氣久晴趕煎趕運再得岸銷加暢回課源源  
則至六月展限

奏銷時自當按照徵完分數據實造報萬一仍有不  
齊亦惟臨期籲請

恩施奏奉

硃批戶部知道欽此遵卽飭行鹽運司嚴催各商趕緊  
完課請運去後無如各商因產絀銷滯壬辰綱已  
納課未請運之鹽爲數甚鉅占閣貲本力難再辦  
癸巳課鹽當經運司將癸巳綱引按照壬辰各商

實運引數逐一分派勒限比催茲截至本年六月  
底止已將入

奏正雜課銀完納八分三釐催據遵限分別造報前  
來除照例核

題外查向來前綱引課造報後卽應開辦下綱今癸  
巳綱

奏銷錢糧雖經催商勉力輸完而核計壬辰綱食引  
鹽已投請納課守候未運者截至夏季止尙有四  
十餘萬引又癸巳綱已納課有未運鹽九十餘萬  
引加以未納課之一分七釐計鹽二十餘萬引統

計積壓未運一綱有餘若將甲午綱引接續開辦不但商力未能且查淮南各場自去冬雨雪風潮連綿浸漬以來竈鹽缺產異常爲從來未見未聞之事現雖煎熬稍旺亦斷不能以一年之所出供兩綱之額運卽各口岸頻年災歉民食維艱江廣近復被水其勢更難以加倍行銷臣與運司再三籌議目下民與商俱元氣未復若口岸積壓必致商本占閣後運難繼殊於大局攸關計惟有先行疏通前積再辦後鹽應將現在納課未運壬癸兩綱鹽一百四十餘萬引勒限各商於本年內先行

109 754 4-182

找完雜項儘力趕重趕運俟來年正月再行開辦  
甲午新綱俾各商得於半年之中專力捆運壬癸  
積鹽赴岸售出價銀收回納課領運以利轉輸則  
來年請辦甲午新引自可踴躍且舊鹽既已運清  
卽或新綱

奏限迫屆而設法催完亦易爲力如此新舊分限辦  
理商力藉以稍紓

國課仍無貽誤於運務實有裨益據鹽運使俞德淵  
詳請附

奏前來除批飭趕緊辦理外理合附片陳明伏乞

聖鑒訓示謹

奏

道光十四年八月十八日奉到

硃批戶部議奏欽此

陳明淮北鹽少販多情形附片

再臣路過揚州查閱運司庫儲現尙存銀二百數十萬稍可支持正款急需之用惟商課已納而鹽多未運卽不免占閣後綱地位皆因鹽場絀產之故催煎不得不緊幸連日得有甘雨瀟氣上升當可漸臻充裕至淮北票鹽現在納課者已有四十餘萬而產鹽僅止二十餘萬計溢額已十數萬必須截歸下綱始得有鹽發給此則非曬掃之不力實由票販之過於踴躍爭先也限於一隅之地票鹽有數而票販無數無可爲力不能滿票販之願

即難免票販之怨亦無可為力然海州有鹽即售  
 窮黎獲濟皖豫之民鹽價減而無淡食之憂且  
 國課較增視從前片引不行其暢滯迥殊似票鹽之  
 法尙可藉資補劑臣惟有整頓章程俾巡緝不稍  
 鬆勁俟年底統核全局即可籌議定則也謹附片  
 縷陳伏乞

聖鑒謹

奏

道光十四年十月初九日奉到

硃批知道了留心妥辦欽此

陶文毅公全集卷十六目錄

奏疏 鹽法

縷陳歷年辦理兩淮鹺務實在情形摺子

變通巡江章程以杜江船盜賣夾私諸弊摺子

再請停止加帶已庚殘引摺子

前奏辦理鹺務情形尙有未盡謹再縷陳摺子

覆奏票鹽搶案現在查辦不致貽累地方摺子

淮北場鹽價值除例定六錢之外酌增籤蓆人工

等項三錢附片





奏疏 鹽法

縷陳歷年辦理兩淮鹽務實在情形摺子

奏爲兩淮鹽務議論多而成功少恐滋觀望謹瀝陳  
辦理實在情形仰祈

聖鑒事頃 臣 閱邸鈔見掌京畿道御史許球密奏兩淮

鹽務辦理支飾等情道光十四年十二月奉

旨著戶部查核具奏欽此 臣 自應俟戶部核議咨照遵

行惟現在甲午一綱甫經開辦忽聞該御史又有

異論商情惶惑誠恐益滋觀望納課難前將使數  
年來竭力支持之局又被浮言攪散是 臣 雖以庸

劣獲咎足快言者之口而因此貽誤課項如

國計何

臣

不得不亟爲陳明以固商情而祛衆惑

查兩淮鹽務自道光十年冬尙書

臣

王鼎侍郎

臣

寶興銜

命來江會議時訪悉情形卽經陳明通綱渙散山窮水

盡不可收拾實非補偏救弊所能轉機相與感歎

我

皇上聰明天直此等情形早已

洞燭於數年之前並蒙

指示窮變通久之方毋許畏難苟安迨

臣

接管鹽政復

經備陳疲敝情形本由十數年來積漸而成此時  
整頓舊章實與重新起造無異亦必由漸而入始  
能復原並聲明積敝之餘章程甫立如裁浮費去  
根窩諸條皆商情所不樂謗口所易騰一時未必  
帖然數年來仰稟

宸謨兢兢釐剔雖未必能有合於窮變通久之

聖訓然臣忝任封疆兵農河漕而外惟鹽務攸關

國計臣敢不殫竭愚誠設法經理無如極敝之後疊  
值災年竭蹶支持倍形艱苦莫補毫芒宜爲責備  
之所必及斧鉞之所應加孤負

聖恩且慚且悚惟是此中底細不但言者所未悉抑旁觀所未曉且有言者所深悉而故作影響之詞以巧詆於幽暗者卽如該御史所指癸巳奏銷短絀一節謂比較辛卯綱少至二十三萬比較壬辰綱少至四十四萬且引前鹽臣所陳歷年報解之數以形臣之短絀謂自嘉慶十二年至道光六年計二十年共解過內外餉銀八千一百數十萬牽算每年四百餘萬道光七年更解過六百餘萬今卽全竣尙不及從前之數等語查辛卯壬辰兩綱均有加帶殘引又有帶徵己丑等綱未完引課兩綱

奏報雖多完數十萬兩而新引積壓卽由於此癸巳既免帶殘引止徵本綱之課故奏銷銀數較前綱畧少其理易明無須故作疑詞若止就本綱而論則癸巳奏報銀數已較前綱有盈無絀至從前解餉較多之說彼時鹽政具奏係將雜款商捐祭利濫價等銀併計在內固非盡入奏銷之款前此道光二年清查案內查出積欠銀三千六百八十七萬一千餘兩道光八年統引案內又查出積欠銀一千一百七十五萬餘兩道光九年復查出積欠銀四百九十九萬餘兩計此數十年中共虧欠

銀五千數百萬如以報解之數與積欠之數兩相抵計則每年所解仍不過百數十萬安得有四百餘萬之實銀蓋前此奏銷短絀或藉報効以爲那墊之計或賣印本以苟目前之需無非敷衍時且有帑本七百餘萬供其騰那當奏銷緊急卽以帑本抵湊而利息則空派通綱致貽日後之累是前此報解之課孰虛孰實至今商民猶能言之自臣到任以來督飭運司立除積弊凡出納之數俱歸核實自辛卯至今年終盤查存庫銀數逐漸遞增至上年歲底實存銀二百餘萬兩爲數十年所

未有至每綱銷引收課以今視昔或多或寡亦俱有實數可稽非可空言支飾溯查道光元年辛巳至庚寅共請引五綱七分至十一年後始帶運完竣而銃停則已四綱三分通計十年中共運鹽七百餘萬引幾以兩年行銷一綱之額今自辛卯以至甲午共請運辛壬兩綱三百三十餘萬引帶運己庚殘鹽八十餘萬引又補銷十年以前已請未運積鹽五十餘萬引是此四年之中請運四百餘萬引較之十年以前已有進境並查報部課銀自元年辛巳至十年庚寅共報完內外正雜課一千



四百六萬餘兩除停緩墊占等項實解正雜銀一  
千二百萬兩現計辛壬癸三綱共報完銀八百四  
萬餘兩除已解內外餉銀六百餘萬現尚有已撥  
未解銀二百餘萬兩較之十年以前亦屬有盈無  
絀其中帶運補銷之一百三十餘萬引皆係從前  
所積以身受累知者頗謂臣愚臣以鹽務係臣管  
理苟有裨於

國計自宜通盤籌畫不但帶銷前引並且代籌無引  
之課如道光八年統引案內議籌之甘餉八十萬  
兩三年中已徵起六十萬兩又有己庚未完印本

銀九十餘萬兩五綱積欠淺價銀九十六萬四千  
餘兩皆欠之於昔日而代償於今日此則不入奏  
銷之款聊舉相較其孰多孰少孰難孰易似亦無  
難立辨至帑本久空仍須代償無本之息攤帶須  
按綱分而報解則止以年論綱引未清利從何出  
是以各處需用時有奏催勢所難免若如該御史  
所言一百七十萬之帑利均須每年按款造報則  
無本之息孱力難支不能爲蹶者之趨矣至己庚  
加帶原因課緇商疲借以扯輕科則迨癸巳積引  
已多占礙正綱不得不仍請停止其實此項殘引

先已由

欽差王鼎寶興會奏欽奉

諭旨停運今亦不過仍歸舊積同在截清之數不因加帶而始少課銀亦不因仍請停止而數十萬之課始歸無著也今乃以割配爲飾詞以疏銷爲陳效掉弄筆鋒而其意仍不過預斷甲午展限之奏銷甚至議及開綱請運向不敘入附片臣數年來凡整頓新章無不縷悉入

奏並會奉有未盡事宜隨時奏咨辦理之

明諭臣因加帶殘引舊積已多幾致占礙一綱之引不

敢粉飾含混是以直陳於

聖主之前恭際

邳隆之世

明日達聰故臣得以各言其職無不可達之隱曷敢稍  
存欺飾况此項積壓鹽斤如果年豐時和自以速  
運速銷爲望原無須預爲支展儻臨期必應展限  
亦屬事勢無可如何又豈容自安緘默坐失機宜  
卽如道光二年八年所查各積欠有推展至道光  
二十三年起始分作二十七限帶徵者有推展至  
道光十三年起分作十綱攤帶者均經奏奉

俞旨並經戶部議准在案是從前鹽務積欠甚鉅推展至數年之後或二十餘年之後始行徵帶今則鹽務當積疲之餘重新起立其積壓亦因徵帶舊引所致即使稍舒時日較之從前以十年而銃停四綱之引似猶稍愈乃該御史自稱再四思維惟有特旨嚴飭來年奏銷斷不准逾六月之限且責以提歸二月奏銷原限務令年清年款不得片引積壓並將帑利等款按款造報而以先儘正款亦指爲那移墊報在所不許果如所言則鹽務已盡善盡美何煩再四思維是不過羅之縈之迫臣以無可措

手觀其謂該督辦理鹽務仍蹈曾燠等之覆轍已  
有明徵亟亟乎惟恐臣覆轍之不速情見乎詞不  
思此項鹽引之滯實亦因屢年災祲自濱海產鹽  
儀徵掬鹽以及湖廣江西安徽銷鹽之處莫不被  
水哀鴻徧野一飯不可得安能責以鹽味而該御  
史乃謂地方偶有偏災小民不能淡食無銷不足  
額之理似此六七省之水患接連三載流離載道  
聖天子宵旰焦勞

蠲緩賑卹不下數百萬而該御史乃謂爲偏災欲責饑  
黎以鹽課勢有所難該御史又以臣革除浮費奏

繳鹽政養廉五千兩而於本衙門緝私賞號僅裁  
四成此項卽係月費計算仍有銀五萬餘兩緝私  
款費通綱已徵三十萬兩此款無可支銷且屢次  
所奏均未聲明數目謂爲取巧含混此則攸關名  
節果如所言置臣何地臣力裁浮費而獨留本衙  
門之浮費以供指摘之口以共見共聞之賞號列  
諸章奏而又匿其數目臣雖至愚極淺尙不至是  
所以然者養廉與浮費不同與月費亦異而奏摺  
之與簿冊亦有體裁詳畧之分臣與

欽差臣

王鼎寶興籌議淮鹺章程時奏明各衙門公費

及鹽政運司員下書役辛工紙飯並乏商月摺等  
每年共需銀八十萬餘兩應分別大加刪減其應  
實存應領之款亦酌減十分之四五不准商人溢  
領私增此卽裁革浮費之原奏有總數而無細數  
挈領提綱蓋奏摺之體然也迨<sub>臣</sub>接任鹽篆恭繳  
養廉緣養廉例不兼支前此浙江鹽政改歸巡撫  
管理卽經撫<sub>臣</sub>帥承瀛恭繳養廉事同一例<sub>臣</sub>自  
應全數恭繳至鹽政額缺旣裁一切浮冗之處均  
應裁汰惟衙門雖裁辦事如舊仍有不能一例全  
刪者分別應裁應減應併應留恭摺具



奏此因款目太繁實未便逐款計數瑣屑瀆陳亦奏摺之體則然所以殊於簿冊也伏查道光十一年

二月奉

上諭陶澍奏恭繳養廉裁減浮費一摺所奏甚是兩淮鹽政養廉銀五千兩向在雜款應解項下動支現在鹽政改歸總督管理其應支養廉足敷辦公所有鹽政應支養廉著歸入節省項下解交戶部充用至鹽政衙門浮費甚多除緝私賞號及經書人等工食均裁減四成巡捕匠作等項全行裁汰此外執事人役應需辛工紙張飯食分別裁減酌留統計前後裁減

每年費用銀十六萬兩有零該督惟當隨時整頓以節浮費而暢引銷等因欽此恭誦之下具徵此等裁減酌留以及恭繳款目分別底細早經

聖明洞鑒所云裁減四成者不止於緝私賞號一款所未聲敘數目者亦不止於緝私賞號一款乃該御史於均經裁減四成之中獨摘此一款於各款分別裁減酌留之中亦獨摘此一款謂臣屢次所奏從未聲敘數目查臣原摺內所敘款目甚多卽吏役辛工飯食已不勝覲縷如巡捕匠作酬酢結綵涼篷聯額作坊坐船浴室橋旗撲戳掉轎裝潢等

項卽向所稱四十七項之類若必聲敘數目以爲  
原款若干裁減若干竊恐連篇累牘悉數難終而  
欲於

萬幾一日之下瑣煩

聖聽

臣

實有所不安

臣

果有自私自利之見辭少取多

則如所裁酬酢一款卽係鹽院衙門應酬之用每  
年六萬兩爲數豈不更多何以裁之而不留又如  
裁革總督賞號二萬兩爲數亦不少同在一摺有  
數可查該御史又何以匿之不言而但舉養廉之  
五千以相形且臣於養廉一摺縷陳裁減款目此

外並未另有緝私賞號裁減四成之摺而該御史以爲屢次所奏從未聲敘此語憑空結撰而反以臣爲含混取巧乎查從前鹽務辦貢辦公本有例用七十萬兩而又有辦公不敷一款攤徵數十萬不等甚至一到任費亦開銷至十萬有餘自新章既定裁去辦公不敷款日永不許徵卽例支之七十萬亦減去過半每年辦貢辦公一切止需銀三十餘萬兩而該御史乃謂緝私款費每綱列徵三十萬此款無可支銷是不知款費之與賞號本係兩項款費爲委巡員弁兵役薪水之用按日按勞

由運司支發每年亦止十餘萬兩並無三十萬之數而緝私賞號則臨時鼓勵之用存六裁四乃

欽差會議時所定臣摺內是以聲明前經裁減臣素昧

管算於禹筭之事本非所諳惟以總督兼管鹽政則緝私尤臣專責頻年以來仰仗

天威查緝私匪將卒用命鼓勇爭先大小破獲之案不下百數十起或咨或奏均有成案卽糧船夾帶蘆私從來不敢過問者臣亦按段選派將弁兵丁偕同地方官役嚴行揆查自黃林莊入境渡黃越淮節節俱有巡緝自揚關以逮龍江蕪湖處處皆有

按查罔不懾於兵威漸就安帖餘如下河海屬洪湖等處屢有拏獲梟匪巨案皆以此項用爲鼓勵並分撥災區及地方緊要公用如江寧揚州儀徵等處連年捐卹煮賑動以萬計經連司委員解送亦有劄司就近逕發具報者皆有衙門案卷可查計每年仍剩銀二三萬兩存於司庫並無用至五萬餘兩之時每有存餘卽留充下年之用用有積存卽暫停帶徵如癸巳一綱不徵緝私經費甲午一綱不徵緝私賞號皆因存有餘剩卽不列徵節年科則刊行萬目共睹豈容含混若漢岸浮費前

因岸商呈出帳簿牽涉衙門甚多紛紛提質來揚  
與商人面質無此政體且移少就多移遠就近乃  
辦案之常例是以臣請交湖廣督臣就近提案在  
湖廣督臣與臣同受

聖恩豈肯含混了事而該御史乃以爲授以彌縫之隙  
是又因臣而侵及湖廣督臣不亦過乎該御史又  
以銷數不足由於私梟及商私未淨或地方官督  
銷不力查督銷不力地方官處分本嚴商廝夾帶  
自包斤既定出場過壩稽查更易私梟懲辦既多  
稍知斂戢惟糧船夾帶雖少仍應每年嚴查未可

鬆勁卽如該御史許球前年所奏以漕臣貴慶請

帶蘆私一經按查無以折服旂丁水手之心且言

兩江總督按查過嚴糧船人衆恐其挺而走險別

起衅端臣以糧船帶私本干例禁新奉

諭旨嚴查正在設法按起一聞該御史以執法之冒危

辭爲之開脫必致轉生悍戾之心而衅端以起不

得不據實議駁今該御史復以梟私未靖爲言是

始則議臣以按緝太嚴今又責臣以緝私不力得

毋前後矛盾至淮北票鹽前經臣會同

欽差大臣敬徵籌議辦理兩年以來運銷俱暢且有溢



課而票販買鹽絡繹恐後在皖豫各境既樂於食  
賤而海州斥鹵之民衣食有資漸收化梟爲良之  
效該御史謂京控內有皖省搶案爲票鹽散而無  
紀所致謂地方搶劫實釀隱憂倘滋事端惟該督  
是問等語臣思地方不必因票鹽而始有搶奪亦  
不能因有搶奪遂謂票鹽不可行若猶以爲釀患  
則鹽務竟無所適從矣伏念臣自蒙

天恩委管鹽政始因裁革浮費旣爲衆怨所歸近則以

臣駮議太戇難免借端報復浮言所至有駭傳聞

商情觀望應辦事宜不免又有阻滯然臣前於道

光十二年間因揚人繪桃伐樹以寓咒詛仰荷

慈諭以此輩祇可屏除不顧惟當振刷精神於萬難措

手之時勉之又勉切勿惑於浮議臣凜遵

聖訓刻骨銘心今雖橫被挪揄臣亦惟自責自反益矢

冰兢不敢稍隳初志查甲午新引現已開綱督辦

距六月奏銷僅止半年臣誠不敢自信無誤然亦

曷敢畫地自限預為支展地步惟有督飭運司趕

緊設法派運一面咨商湖廣督臣及江西撫臣督

飭該管鹽道認真督銷俾課本源源轉輸新引請

運自速萬一分數過少不能依限奏報亦惟臨期

據實籲請

恩施此時斷不敢稍有成見亦不敢稍存退縮除聽候  
部議咨會遵照外所有臣歷年辦理實在情形相  
應據實縷陳伏乞

皇上聖鑒謹

奏

道光十五年二月初二日承准

軍機大臣字寄正月二十三日奉

上諭前據御史許球奏兩淮鹽務辦理支飾情形經戶  
部查核具奏當降旨交陶澍認真查辦實力疏銷毋

許稍存迴護茲據陶澍將歷年辦理鹺務實在情形  
據實具奏朕詳加披閱自係前降諭旨該督尙未奉  
到此次所奏尙無支飾強辯情詞惟兩淮鹺務當積  
疲之後必應竭力整頓以期日有起色漸次挽復舊  
章且以總督兼轄鹽政呼應較靈正宜清釐積欠剔  
除弊端年清年款提歸每年奏銷原限從前曾燠張  
青選福珠隆阿福森辦理不善立予罷斥卽係前車  
之鑒該督當振刷精神勉圖自效無稍貽誤致蹈覆  
轍甲午新引現已開綱該督卽督飭運司趕緊督運  
以符奏銷期限務歸年清年款方爲不負委任將此

諭令知之欽此又於道光十五年二月初五日奉刊  
硃批另有旨欽此

變通巡江章程以杜江船盜賣夾私諸弊摺子  
奏爲變通巡江章程以杜江船盜賣夾私諸弊保課  
運而肅綱紀仰祈

聖鑒事竊照商鹽船隻每多夾私盜賣捏報淹消前於

道光十一年經臣奏明每屆半年酌委參遊守備

或文職二員自儀徵大江溯流巡緝至湖口縣分

路一往江西一往漢口仍由原路查回儀徵換委

委員前往接巡責令訪查夾帶賣私捏報淹消等

弊仰蒙

諭旨遵行在案數年以來遇有夾私捏報之案隨時懲

辦船戶漸知斂戢惟自儀徵至楚省漢口地方計程一千六百餘里至江西星子縣青山地方計程一千四百餘里江面綿長風信無定往來上下不能兼顧其皖西兩省交界之區尤爲匪徒出沒之所或鹽船停泊轉販售私或閣淺洲灘乘危搶竊一經地方文武查拏而界連兩省此拏彼竄仍未免稽察難周飭據運司督同辦事商人反覆講求僉謂宜於扼要之地專設駐巡聲勢方期連絡往來可便梭巡查安慶府屬之華陽鎮彭澤縣屬之沙灣馬當二處均係楚西船隻失事被搶積慣盜

賣之地該三處各須調撥鹽務紅船兩隻雇用小船兩隻由臣遴委各標營都守千把一員帶兵十名並遴委鹽務候補運判經知大使一員雇募巡役十名各駕坐紅船一隻小船一隻分段護送催趲上下會巡交替如遇鹽船閣淺難行卽爲隨時起剝倘有匪徒搶劫暨船戶盜賣情事會同協力查拏交地方衙門嚴辦並責令訪查夾帶賣私捏報淹消等弊庶層層鈐束不致有顧此失彼之虞仍按年半一換以均勞逸其所需紅船舵水工食小船價銀及員弁兵役薪飯悉照巡江章程給發



每年於商捐緝私經費內動支毋庸另籌如果行之有效再將安慶以下及彭澤城外等處次第添設俾巡緝益昭嚴密江面自見肅清而原設九江江防員弁或停或改並可隨時酌核辦理據鹽運使俞德淵具詳請

奏前來理合恭摺陳明伏乞

皇上聖鑒謹

奏

道光十五年二月初六日奉到

硃批另有旨欽此同日奉到道光十五年正月二十四

日內閣奉

上諭陶澍奏請變通巡江章程一摺兩淮商鹽船隻每  
多夾私盜賣捏報淹消等弊前經降旨每屆半年酌  
委參遊守備或文職二員自儀徵大江溯流巡緝至  
湖口縣分路一往江西一往漢口仍由原路查回儀  
徵換委委員前往接巡遇有夾私捏報之案隨時懲  
辦茲據該督查明安慶府屬之華陽鎮彭澤縣屬之  
沙灣馬當二處均係楚西船隻失事被搶積慣盜賣  
之地該二處均著各調撥鹽務紅船兩隻雇用小船  
兩隻遴委都守千把一員帶兵十名並遴委鹽務候

補運判經歷知事大使一員雇募巡役四名各駕坐紅船一隻小船一隻分段護送催趲上下會巡交替如遇鹽船閤淺難行卽爲隨時起剝倘有匪徒搶劫暨船戶盜賣情事會同協力查拏交地方官嚴辦並責成訪查夾帶賣私捏報淹消等弊仍按半年一換以均勞逸其所需紅船舵水工食小船價銀及員弁兵役薪飯著照巡江章程給發每年於商捐緝私經費內動支餘著照所議辦理該部知道欽此

再請停止加帶已庚殘引摺子

奏爲加帶舊綱殘引占礙本綱正額請仍照案停止  
俟積滯疏通再行攤帶以正綱分而分緩急仰祈  
聖鑒事頃臣接准部咨以癸巳鹽課奏銷銀兩未完銀  
數與壬辰相等是停止已庚帶殘並無實效已可  
概見所有已庚未完課銀仍令遵照前奏照常帶  
徵等因具

題奉

旨依議欽此咨照前來伏查加帶已庚殘引本係道光  
九年十年行銷未完一綱三分之引並非現在本

綱照額應銷之鹽臣於道光十一年初兼鹽政時  
因商疲力乏領運不前請將此項積滯殘引祇完  
正課免納雜款加帶於本綱之內以扯輕科則兼  
得稍補舊虧其實此項已庚殘引先經

欽差

臣

王鼎寶興會議

奏請停止俟鹽引暢銷後再議帶徵奉

旨允行在案

臣

因商力難前不得已藉資調劑然因此

積欠仍未截清無由停舊徵新兼以漢岸舊鹽存  
積不下百千萬畝曾經

奏明在案發運之初並有從前已請未運之鹽五十

萬餘引亦需趕運以致本綱之鹽反因而積壓且值連年災歉江廣各岸銷數俱滯雖帶殘鹽六十餘萬引而本綱新引積壓不下百數十萬徒有帶殘之名轉致占礙正綱新引而京外各雜款無以應解故臣不敢回護前奏於癸巳開綱時

奏請停止帶殘即將每包所帶之數割配本綱正額之引所以然者商人運鹽出場一切擡夫水手各項腳費向祇計包而不論斤是以多有夾帶每包重至五六百斤臣欲查其夾帶而又不能不顧惜商本慮驟增其腳價是以奏明定以五百斤出場

爲一包迨至儀所改捆時就一包之中劃出四百斤算爲一引仍餘一百斤是卽向來商人夾帶之物臣令割出以配本綱正引計割四包尾數而配成四百斤之正額一引於本綱運數銷數絲毫無所增損而運腳不增稽查較易謂之割配實我

朝二百年來兩淮辦鹽之舊章載在鹽法志登於戶

冊非由臣更張而創此名目也惟是加帶改爲割

配原係本綱之引而銷數仍未能裕如此則偏災所值不但口岸滯銷并濱海產鹽之區亦因雨水太多滷澹緇煎無可如何然既停止加帶尙無實

效若復捨本綱而加帶舊綱又豈更有暢銷之望  
是現在新綱之仍應停止加帶不待智者而決矣  
溯查道光元二三年兩准年額均係減半行鹽六  
年丙戌銃銷半綱未行七年復銃銷一綱未行九  
年己丑停運三分十年庚寅復停運一綱統計十  
年之中共銃停四綱三分仍有已請未運之鹽五  
十萬餘引合而計之實俱以兩年而行一綱之引  
并無年銷年額之時今辛壬癸三綱雖亦積存不  
下一綱之引實由從前岸鹽積滯暨加帶舊綱殘  
引之故於本綱不無積壓尙非每年僅行半綱之



比正宜趁此漸疏舊滯以顧正引豈可又重其敝  
致令愈積愈深哉况此項已庚帶殘本係

奏明停止在前今仍請停止不過仍歸舊積同在截  
清之數於本綱銀數並無損絀據運司俞德淵詳  
請甲午開綱仍停加帶業經飭知遵行刊定科則  
辦理正在咨部查照間今准部咨仍令照常帶徵  
不得不籲懇

天恩俯念新舊並運實形喫重且致占礙正綱應請仍  
照

欽差王鼎等會奏奉

旨准停原案將已庚未完殘引暫予停運俟鹽引暢銷  
後再行酌帶以利疏銷而分緩急除卽咨部查照  
外理合據實縷陳伏乞

皇上聖鑒謹

奏

道光十五年二月十八日奉到

硃批另有旨欽此同日奉到道光十五年二月初六日

內閣奉

上諭陶澍奏加帶舊綱殘引請仍照案停止俟積滯疏  
通再行攤帶一摺兩淮加帶已庚殘引前經戶部具

題飭令遵照前奏照常帶徵茲據陶澍奏稱新舊并  
 運實形喫重且致占礙正綱請於甲午開綱時仍照  
 奏准原案停止加帶著准其將已庚未完殘引暫予  
 停運俟鹽引暢銷後再行酌帶以正綱分而利疏銷  
 惟停止加帶舊綱殘引原為疏通正綱地步甲午新  
 引現已開綱該督卽督飭趕緊督運以符奏銷期限  
 務歸年清年款且停止加帶於本綱正額既無占礙  
 該督更無所藉口正宜趁此疏銷斷不准再有積壓  
 倘舊引已停而新綱又滯是始終以虛詞搪塞恐該  
 督不能當此重咎也凜之該部知道欽此

前奏辦理鹽務情形尙有未盡謹再縷陳摺子  
奏爲接准部咨欽奉

諭旨訓飭謹陳感悚下忱並兩淮應辦事宜請遵

旨通盤籌畫各情形仰祈

聖鑒事竊臣於道光十五年正月二十九日接准戶部

咨道光十四年十二月二十二日內閣奉

上諭前據御史許球奏兩淮鹽務辦理支節情形當降  
旨交戶部查核具奏茲據奏兩淮歷年題報額徵課  
款核算癸巳綱徵完銀數較辛卯綱實少徵銀二十  
三萬餘兩較壬辰綱實少收銀四十四萬餘兩其自

癸巳綱起停止加帶配割正引未完正雜課銀仍有三十餘萬并未能多交銀一百七十八萬兩較辛壬兩綱又少完加斤銀四十餘萬兩核計自嘉慶十二年至道光六年牽算每年解過銀四百餘萬兩道光七年解過銀六百萬兩核與該御史所奏比較各款銀數均屬相符至帑利等銀向係分解京外各衙門之款總未據造冊報部現據在京各衙門均有奏催之案著陶澍仍遵前旨迅卽按款造報以備稽核又據查該御史所奏趕銷積引毋誤奏銷並籌及票鹽各情形均係淮鹺緊要關鍵核計壬癸未運各引實

已積至一綱有餘現在已屆年終儻有未清積引勢  
必年復一年愈積愈多又開牽混之門永無清釐之  
日更復成何事體兩淮鹽課奏銷例有定限前據該  
督將辛卯奏銷奏請展限經該部議覆予限四個月  
自應速清積引依限奏銷并逐漸提歸二月原限斷  
不可再有遲延又滋輻輳著該督即將未清積引掃  
數銷完其新綱奏銷仍確遵奏定限期不准稍有遲  
逾以正綱分而免積壓兩淮鹽政改歸總督兼轄疏  
銷緝捕呼應較靈且裁革浮費清釐積欠截前杜後  
永斷葛藤正應剔除弊端年清年款提歸每年二月

奏銷原限乃正雜各課及帑利等銀近年短絀舊欠未完新虧又積年復一年伊於胡底朕綜理庶政惟以賞功罰過視乎其人之自取從前曾燠張青選福珠隆阿福森辦理不善立予罷斥卽係前車之鑒該督如有天良卽當實力疏銷通盤籌畫振刷精神勉圖自效儻稍存回護混飾彌縫苟且延時毫無實效帑課攸關豈容因循貽誤朕惟有執法從事治以應得之罪斷不稍爲寬貸凜之慎之欽此欽遵咨照前來又於二月初二日承准軍機大臣字寄道光十五年正月二十三日奉

上諭前據御史許球奏兩淮鹽務辦理支飾情形經戶部查核具奏當降旨交陶澍認真查辦實力疏銷毋許稍存回護茲據陶澍將歷年辦理離務實在情形據實具奏朕詳加披閱自係前降諭旨該督尙未奉到此次所奏尙無支飾強辯情詞惟兩淮離務當極疲之後必應竭力整頓以期日有起色漸次挽復舊章且以總督兼轄鹽政呼應較靈正宜清釐積欠剔除弊端年清年款提歸每年奏銷原限從前曾燠張青選福珠隆阿福森辦理不善立予罷斥卽係前車之鑒該督當振刷精神勉圖自效無稍貽誤致蹈覆



轍甲午新引現已開綱該督卽督飭運司趕緊督運  
以符奏銷限期務歸年清年款方爲不負委任將此  
諭令知之欽此遵

旨寄信前來跪誦之下汗淚交流臣之駑劣不能爲  
國分勞轉致上煩

聖慮

諭旨嚴切無地自容惟臣數年以來仰稟

宸謨支撐疲敝適逢災歉拮据倍形臣之心血已竭臣

之思慮愈窮而該御史乘機巧摘仰賴

聖明洞鑒歷年辦理實在情形尙無支飾惟臣前摺尙

有未盡縷悉者誠恐商情搖惑公事終多掣肘謹  
據實覆陳於

聖主之前伏查該御史以癸巳綱奏銷比較各綱銀數  
短少一節卽係查照<sub>臣</sub>連年奏銷開報之數弗容  
歧異惟查兩淮奏銷厯按正雜課銀計算分數造  
報其帑利規費漫價雜項等銀向不核入奏銷數  
內癸巳一綱兩淮應徵正雜課銀二百十一萬九  
千餘兩內除淮北票鹽年底奏銷應徵正雜課銀  
二十九萬三千餘兩已全數徵完造報外計淮南  
正雜課銀一百八十二萬六千餘兩上年六月奏

銷報完銀一百五十一萬六千餘兩核計八分三釐較辛壬二綱似屬有盈無絀又帶徵丙丁銃引應解新疆經費銀八萬六千七百餘兩例應附入奏銷造報若以銀數統核卽不止八分三釐今謂較辛卯少徵銀二十三萬餘兩較壬辰少徵銀四十四萬餘兩此則比較辛壬二綱加帶已庚殘鹽及上綱未完引課而言查上綱引課癸巳業已帶徵全完至加帶已庚殘鹽先經戶部議准癸巳綱免其加帶旣無加帶之鹽自無帶殘之課計辛壬兩綱帶殘銀數本應於癸巳綱剔除若剔除帶殘

之數癸巳通綱連折價收銀二百七萬六千餘兩  
比較辛卯綱收銀一百九十三萬三千餘兩實多  
收銀十四萬三千餘兩比較壬辰綱收銀二百十  
二萬九千餘兩止少收銀五萬三千餘兩似無少  
徵銀二十三萬兩四十四萬兩之數如謂停止帶  
殘奏銷卽應全完查癸巳奏銷報完銀一百五十  
一萬六千餘兩僅少收銀三十一萬餘兩隨後陸  
續徵收歸於下綱造報兩淮舊例歷係如此辦理  
前年戶部議准停止帶殘

奏稱兩淮奏銷屆限歷年俱有未完卽從前暢銷時

亦間有未完一二分等語足見戶部舊案卽從前暢銷時亦有不足該御史乃欲於困敝之後轉責以額應全完兩兩相形殊難措手又如停止帶殘未能多交銀一百七八十萬兩一節查帶殘停止復還割引舊制每引應徵正雜銀四兩有奇合成一百七八十萬兩之數此項正銀卽統入癸巳奏銷數內其雜項銀兩乃內外帑利濫價規費等項應解之款向不歸入奏銷造報前因辛壬兩綱加帶殘鹽止徵前綱之正課而占本綱之額引轉致本綱雜款無以應解是以不敢回護前奏懇請仍

舊停止計癸巳一綱已解帑利銀兩及紙硃飯食  
各項並應解甘餉銀二十萬內尙有湊解之節省  
車騾並提行利銀七萬九千餘兩均在正雜四兩  
有零之內祇以向例報解銀兩或係隨時咨部或  
俟綱竣報銷是以不入癸巳奏銷數內而癸巳鹽  
未銷完故雜項亦尙未全解并非停止帶殘應完  
之一百七八十萬兩未能多交該御史於部議停  
止帶殘之款旣欲比較起徵又於向例不入奏銷  
之數指爲未能多交似於兩淮正雜款目尙自未  
甚分明况已庚殘引本係

欽差王鼎寶興會奏欽奉

諭旨停運之引不因加帶而始少課銀亦不因仍請停止而數十萬之課始歸無著該御史以爲割配正引仍係癸巳本綱之課非但不能多交并少完加斤之銀是不知本綱之課有多交而不入奏銷加斤之少因停帶而非關課額夫正引配割本係准鹽舊法在淮商同一捆運鹽斤加帶在本綱之外免徵雜課每引止完銀一兩四錢割配在本綱之內正雜俱徵每引須交銀四兩有零孰多孰少其理易明現辦甲午新綱臣所以仍請停止已庚加

帶而割配本綱正引者實以正雜課款同係

國計度支既不政避重以就輕自不能舍新而從舊  
又如道光六年以前每年牽算解過銀四百萬兩  
道光七年更解過六百萬兩之說該御史欲以證  
今不如昔臣於前摺業經陳明兩淮從前既有五  
千三百數十萬之積欠安得又有每年四百萬之  
實銀是固各項雜款所併湊并非盡入奏銷之數  
且試卽道光七年報解之數言之查道光七年應  
報完丙戌綱銀而丙戌止徵半綱又展至八年二  
月奏銷共報完淮南引課銀九十九萬三千餘兩



正課如此短絀雜款何從徵收是以該年加價商捐解部及甘肅等銀雖有六百萬兩大半那移應解旋於道光八年據前鹽政臣福珠隆阿奏稱核計丁亥一年解過新舊正帶內外各餉及加價商捐共銀六百萬兩商力極疲庫貯愈絀輾轉設法幾至無可掩墊而現計欠解內外正雜各款尙有六百九十餘萬雖解逾一年之額乃因那墊而占閣解款又因帶款而稽遲例課等語是道光七年雖解銀六百萬兩而占墊套搭元氣大傷統引至三百二十三萬七千餘道積欠至一千一百七十

五萬餘兩馴至九年十年不可收拾而鹽務遂成  
渙散臣惟斤斤自守不敢那移掩墊而戶部尤顧  
念大局不肯格外多撥致傷根本是以頻年庫有  
徵存足備緊急商無借領不得覬覦若如該御史  
所奏以逾額多解爲能不分正雜不問緩急惟取  
先後騰那支持應解誠如

聖諭又開牽混之門永無清釐之日矣臣之愚鈍何敢  
出此又如分解京外帑利等銀按款造報一節細  
查每綱應解帑利計銀七十一萬一千餘兩并不  
如該御史所奏每年應徵銀一百七八十萬兩內

辛壬兩綱帑利等款多已報解惟癸巳鹽未全銷  
帑利未經全完甲午甫經開辦帑利尙未徵解是  
以各處需用時有

奏催臣於道光十一年鹽務仍守成法摺內聲明每  
年應解之帑利七十餘萬兩其借本早罄於前人  
彼時虧務猶堪敷衍又有借本供其揮霍是以中  
枵而仍能粉飾於外今則各項竭蹶無本可借而  
轉須爲前人代償其利息以致負重難勝沈痼從  
此而甚等情奏蒙

聖鑒在案此等帑本久經用罄現在所解實係無本之

息攤帶通綱卽係無鹽之課綱引未完代償奚出  
各處紛紛奏催勢難爲無米之炊此外尙有鹽規  
匣費等款係由陋例而改爲雜費各處亦時有催  
促幾至視同正款將來必須變通成法或酌分緩  
急或畧加刪減俾科則不至過重以累運銷而京  
外各衙門待用之款亦不致盡同畫餅俟督飭運  
司通盤籌畫另行

奏報仍飭司先卽按綱造報咨送備核又趕銷積引  
按期奏銷一節除淮北奏銷連年均經足額外查  
淮南引日每綱一百三十九萬道臣於道光十一

年起辛壬兩綱共運銷二百八十萬引帶運己庚  
殘鹽七十餘萬引又補銷十年以前已請未運積  
鹽五十餘萬引合之癸巳一綱已不下四百餘萬  
引若按每綱引數核算已將如額祇緣己庚帶殘  
及十年以前滯引共一百二十餘萬積前壓後應  
行劃除計算是以未運各引多至一綱有餘此等  
積壓本係舊綱未竣并非本綱應運之引惟以積  
壓既多兼值頻年災歉場價加昂商人之成本既  
增各岸之疏銷未暢是以現在甲午甫得開綱而  
該御史以爲地方偶有偏災小民不能淡食無銷

不足額之理責以奏銷屆期斷不准逾六月之限  
在部臣邦賦攸司原應按期責效第查乾隆二十  
三三十五及四十四十七五十等年均有奏銷展  
限之事載在鹽法志檔册可稽當兩淮全盛之時  
偶值天災商困尙蒙逾格

恩施寬展限期可見酌盈濟虛之道實有隨時通變之方

臣非敢因有成案稍涉懈弛特以商疲引滯設遇  
臨時事勢無可如何又豈容坐昧機宜臣於前摺  
亦已陳明現惟督飭運司嚴飭各商設法趕緊派  
運不任稽延此外則裁減浮費爲臣結怨於人之

一端該御史以臣繳五千之養廉而受緝私賞號  
五萬餘兩爲辭少而取多且緝私款費通綱已徵  
三十萬此款無可支銷等語臣查緝私款費與賞  
號係屬兩項款費爲委巡員并兵役薪水之用通  
綱止十餘萬并無三十萬而賞號爲臨時鼓勵之  
用每年并未用至五萬餘兩且裁減四成係

欽差王鼎寶與會議時前經減定無可取巧

奏蒙

聖鑒在案茲接戶部咨鈔覆議前來以此項銀兩於課  
項毫無關涉未便過問等語惟該御史既以辭少

取多爲言臣思取予之際惟義是視義所當有萬  
鍾非多義所不可一介非少養廉例不兼支總督  
衙門無須借資於鹽政臣是以全數恭繳而併裁  
總督之賞號二萬兩至鹽政衙門雖裁辦事如舊  
勢亦不能以總督之養廉分爲鹽政衙門之用臣  
於道光十一年間並曾咨明戶部除當年拏獲梟  
匪及拆除淮北三老壩各案酌動賞費外此後卽  
裁歸運庫遇有緝獲要犯及查辦糧私等務飭司  
給發每年用有餘剩卽另款存貯留充地方緊要  
公用在案卽如道光十一年水災突起江寧揚州



府城各發銀八千兩儀徵加發銀二千隨經前撫  
臣程祖洛前藩司林則徐趙盛奎議改爲下河查  
辦賑務之用十三年上元江寧揚城儀徵等縣收  
卹災黎亦各發一二千兩不等十四年省城議設  
義倉亦發銀五千兩均經運司運發各府縣前後  
藩司均經督理而按查糧私緝獲梟私以及巡閱  
時犒賞緝私出力各弁兵銀牌衣料等用亦皆有  
批解支銷非臣所得而私此外如捐修祠廟挑濬  
茆河等務極多不過千兩爲止省而又省存於司  
庫統計道光十一年十二年各支用銀二萬餘兩

十三年十四年各支用銀二萬餘兩每年支用有  
餘另款存庫是以甲午科則暫不列徵其緝私款  
費則癸巳未經列徵現於甲午綱每引亦祇帶八  
分科則刊行豈容含混臣於前摺既經陳明惟以  
此項辦公外支之款向不造冊報部核銷而該御  
史摺內且謂革除浮費何以猶多壅滯卽恐有名  
無實等語不知此款并非浮費而壅滯由於舊積  
亦不容以浮費藉口臣前年曾經縷陳白食陋規  
之人多被裁革或張細故以旁求或假他端而側  
擊一時未必帖然臣惟力裁浮費斷不敢因此避

嫌卽不敢因此而避怨也至於淮甞緊要關鍵舍  
疏銷巡緝而外別罕良策巡緝之責臣實不敢不  
力每年大小破獲各案不下百數十起日前糧私  
梟私多已斂迹惟疏銷之法尙待精求查各岸疏  
銷湖廣爲最引數逾全綱之半自辛卯以來較前  
銷數有增實賴湖廣前後督撫臣疏銷之力非臣  
所能越境代謀惟是鞭長莫及之處在該省亦所  
在多有如衡州以上切近粵私襄陽以上切近潞  
私荆宜以上切近用私各私環伺而口岸較遠商  
情裹足在該省亦有爲難江西情形亦然似須仿

古中鹽及官運之法容臣札商各督撫臣熟思集

議一俟淮鹽旺產籌有運資或委員領鹽前往堵  
禦減價敵私庶幾引銷愈暢課餉可期分任又沿  
江一帶安慶以下皆有專商領運自武昌下游之  
興國大冶等處及黃州府屬各州縣至江西之彭  
澤湖口等縣江程八百餘里向由儀徵運鹽至漢  
口折回轉售於各岸往返徒勞腳費加重以致私  
充引滯道光十年會議時原欲增設岸店適遇接  
連災歉沿江戶口流移岸店虧本無人敢認是以  
未克舉行現在陽雨應期歲豐有望或可招商設

店之處并容臣與湖廣督臣江西撫臣會商

奏辦總之兩淮做壞數十年積漸而成欲圖挽復實

與重新起造無異亦必由漸而入方能復原臣於

接管之初即已備陳

聖鑒此時雖未能計出萬全多收成效而道光十三年

戶部議覆帶殘奏稱楚西兩岸雖未能運銷足額

而幸于兩綱奏銷實共報完銀四五百萬兩較之

庚寅以前究有起色等因是臣之艱苦情形部臣

亦所深悉臣惟當凜遵

天語振刷精神勉圖自效斷不敢稍存回護苟且一時

庶幾課款漸充免滋罪戾用答

鴻慈除票鹽辦理情形另摺覆陳外所有蒙

恩訓飭敬陳感悚下忱并欽遵

諭旨通盤籌畫緣由理合恭摺具

奏伏乞

皇上聖鑒訓示謹

奏

道光十五年三月初三日奉到

硃批嗣後若果有成效年勝一年朕豈有不爲卿作主  
之理無恤其他可也若歲歲空言搪塞部中不難稽

平...  
三三

核前車未遠朕不能上下其手也噬臍二字凜之識  
之欽此

覆奏票鹽搶案現在查辦不致貽累地方摺子

奏爲遵

旨查辦票鹽搶案情形據實覆

奏仰祈

聖鑒事竊臣接准部咨議覆御史許球密奏兩淮鹽務

一摺欽奉

上諭淮北票鹽該督前奏試行有效若如該御史所奏  
現在搶案紛紛疊出所關甚鉅著該督認真查辦將  
如何稽查防範不致滋生事端並現在有無搶案疊  
出之處據實具奏毋稍含混等因欽此伏思淮北產



鹽地方濱臨海岸從前商運之時引滯課虧竈民  
交困各處回僑梟徒乘機糾結黨與執持器械占  
踞馬頭肆行興販一遇官弁捕拏輒敢恃衆抗拒  
卷查從前淮北大夥梟徒搶奪之案無時無之嘉  
慶年間前督臣百齡曾於海州營錢家集地方

奏設都司等員就近彈壓在閭閻雖稍資保衛而課  
款尤費支持計自嘉慶年間至道光二年清查案  
內淮北欠完各綱課餉統計三百六十一萬餘兩  
遞展至道光三十年起限分二十綱帶徵又自道  
光元年至十年各綱奏銷欠課銀二百二十九萬

餘兩欠調劑運本等銀一百七八十萬餘兩馴至  
商逃丁散盜賊愈益縱橫臣於道光十一年接管  
之初幾至無可措手仰蒙

先幾指示改運票鹽旋因試行有效復加推廣經歷三  
次奏銷報完本綱正課及帶徵殘課等銀一百十  
五萬五千餘兩引課兩清毫無蒂欠似於

國帑非無小補而海濱窮苦池丁有鹽卽售頓形甦  
活卽遊手閒民亦得以轉移執事飽暖有資爲非  
漸少梟徒遂因而解散錢家集都司無須駐守專

營經臣

奏請移駐於洪澤湖之老子山等處改爲內河水師  
俾湖面肅清坦行攸賴當臣試行之初原屬出於  
萬不得已所有稽查防範不敢不豫會因御史周  
彥具奏票鹽一摺經

欽差大臣敬徵會同臣查明皖豫各岸尙無爭占馬頭  
鬪毆滋事之案卽經會摺覆陳不敢以目前而忘  
久遠因鹽務而累及地方

奏蒙

聖鑒在案今御史許球以上年十一月京控案內有穆  
三合販賣票鹽在霍邱縣被搶並牽敘連年有張

義和趙四合李成修沈玉恒等鹽船被搶之案謂  
他處不知凡幾實釀隱憂以致上煩

聖詢惟查皖省潁霍一帶接連豫省之汝光陳東省之  
兗沂曹以及本省之廬鳳泗蘇省之淮徐海各府  
州縱橫二三千里向多紅鬍捻匪拽刀擡槍此等  
彼竄其見財起意糾夥行搶實所不免并非因票  
鹽而始有搶案惟在地方文武認真查拏勿存諱  
飾自可靖匪類而安商旅臣督飭各營縣惟以有  
犯卽懲有功必賞頻年以來緝捕從未鬆勁卽如  
穆三合一案前據霍邱縣詳報獲犯訊供首夥九

人已獲首犯史同山卽石崑山夥犯陳桂璽陳桂  
香羅孟熊管兆瑞五名已獲病故鄭二禿子陳時  
太解荷南三名尙有陳三麻致一犯未獲正在嚴  
拏接准都察院咨穆三合在京呈告交臣訊辦核  
閱控情尙多未符臣已行提卷宗委員押解人犯  
來省澈底究辦其牽敘之張義合等四案已據報  
獲犯孫大眼潘二卽潘希受李三卽李心田張大  
發周十致胡奉池鄭文斗張路范加言劉太迷顧  
禿致張心田卽張小眼張金堂劉成隴李暢裴喜  
致趙大成卽趙義鐸余石頭梁噉牙彭金良彭連

山劉騾攷鄭木匠王懷畛吳奉池李應標趙金汪  
魁沅訊據犯供河南固始縣已獲犯許金章張老  
黑鄭二魯大朋畢二共三十三名案關糾搶業經  
臣批飭解省審辦並勒拏逸犯務獲盡法懲治此  
外尙有上年二月王昌順在潁上縣地方馬楚玉  
於上年八月在泗州地方被搶票鹽兩案均已獲  
犯正在究辦臣惟有督率州縣營汛不時稽查防  
範毋任滋生事端其票鹽現行章程如有應須變  
通之處自當隨時據實

奏明另籌辦理斷不敢稍有疎懈因鹽務而累及地

方仰副我

皇上除暴安良之至意所有票鹽搶案現在辦理不致  
貽累地方緣由合併據實覆

奏伏乞

皇上聖鑒謹

奏

道光十五年三月初三日奉到

硃批知道了欽此

淮北場鹽價值除例定六錢之外酌增籤席人工等項三錢附片

再淮北改行票鹽每引四百斤

奏定例價六錢當試辦之初陳鹽堆積本多足供票運迨上年雨多曬少各販利在得鹽難免向池丁暗地加價爭先搶買兼之各場遠近不齊般運各費遞有參差於票販亦多未便以致原定之數不敷照辦經該分司暨總辦委員詳經運司核議除例定六錢之外酌增籤席人工滷耗般剝歸局等項各費每引各場銀三錢青口一錢此項雖係池



丁應得與課款無干仍隨同例定鹽價一併交納  
由各場大使照數轉發各池丁以歸畫一而免私  
增計每百斤不過加銀數分於成本不致增重而  
池丁可免賠累票販亦免於赴場般運之煩仍俟  
場鹽旺產察看情形尙可隨時刪減并非例價一  
定可比所有此次官爲收買北鹽應卽照例價六  
錢之數無庸另加籤席人工各費合併聲明伏乞

聖鑒謹

奏

道光十五年閏六月二十二日奉到

硃批依議該部知道欽此又於各販利在得鹽難免向  
池丁暗地加價爭先搶買旬傍奉

硃批既知不敷照辦之故可否有查禁之法宜酌之欽  
此

一 二 三 四 五 六 七 八 九 十 十一 十二 十三 十四 十五 十六 十七 十八 十九 二十

一

281-3. 285-6. 287

陶文毅公全集卷十七目錄

奏疏 鹽法

淮南場鹽缺產擬買淮北餘鹽接濟摺子

覆奏淮鹽五百斤出場并無弊混摺子

淮南鹽多銷滯請將乙未緝分年帶運摺子

淮南乙未綱引課仍請分帶摺子

再請復設兩淮鹽政摺子

覆奏出場鹽包實已按引裁減摺子

欽遵

諭旨將丙申綱淮南引課提前奏銷摺子

109 2. 15 左 601

奏疏 鹽法

淮南場鹽缺產擬買淮北餘鹽接濟摺子

奏爲淮南場鹽缺產謹擬照案設法由商暫購北鹽接濟並籌款委員收買備運以利轉輸仰祈

聖鑒事竊照淮南通泰二屬場河因曠乾日久乏水濟運其煎鹽各場地亦因雨少滷氣不升以致缺產甚多鹽價增昂現在挑辦場河雨勢亦經疊需人情歡定第緇產已久場價一時未能平復查淮北三場向係曬掃收鹽本年晴多產旺計除票販運行之數尙有溢餘從前南鹽缺產採買北鹽歷有

成案可循此時趕辦奏銷刻不容緩臣已飭運司轉諭各商如南場垣鹽不敷捆運卽暫運北鹽接濟或赴海贛場局或在王營西壩照票販一律購買運至揚州按包稱掣仍照淮南科則加納錢糧換給引張運赴各岸銷售其江運八岸係食北鹽前因無商承辦暫行官運亦須儲鹽接濟並飭運司籌款採買備用仍將各池餘鹽收買以免溢漏兼爲將來商販之需茲據運司詳報查得官運池州無爲桐城巢縣等岸引鹽除納課及歸還成本外約有盈餘銀八萬兩係屬不入課額外款足供

採買北鹽之用已飭總辦委員及海州分司領銀  
赴場按照例價督同場員收買十餘萬引另行築  
廩封貯備運俟將來察看情形如南鹽始終翔貴  
卽令南商承買分濟各岸或場價就落卽歸下年  
票運銷售以期南北轉輸利商便民所有設法轉  
運各情形理合繕摺陳明伏乞

皇上聖鑒謹

奏

道光十五年閏六月二十二日奉到

硃批依議該部知道欽此



附  
一  
考  
ノ  
二  
三  
集

一  
一  
一

覆奏淮鹽五百斤出場并無弊混摺子

奏爲淮鹽四百斤一引每包加帶百斤以四包配成

五引係納課在先割配在後並無弊混請

旨仍照舊章辦理以省運費而便稽查仰祈

聖鑒事竊

臣接准戶部咨據奏淮南引鹽請

旨嚴飭該督仍照奏定原額以四百斤出場其餘一百

斤卽行裁撤以利疏銷等情奉

旨依議欽此欽遵咨會前來伏查淮南鹽額每引三百

六十四斤嘉慶十年經前任總督鐵保奏請每引

加鹽十斤道光七年復經前督

臣琦善等請再加

十斤并例給暑耗十六斤共計四百斤爲一引歷年配運在案道光十一年臣始兼管鹽政因查鹽引出江雖有定斤而鹽包出場向須扣割舊例割引之數以加二爲率嗣復改爲加三配割道光八年曾經

奏明並咨戶部在案當時原爲節省運費之故惟包斤輕重向未明定章程難免參差淆混當經臣奏明定以五百斤出場爲一包有整數而無奇零稽查較易計每包除正引四百斤外其餘一百斤帶銷已庚未運殘引欽奉

硃批交部核議覆准遵行嗣於十三年停止帶殘將餘鹽一百斤仍照向例配割正引完納本綱全款錢糧經戶部議令試辦一年旋於癸巳奏銷後戶部以已庚引課既停其餘一百斤行令裁撤復經臣查案聲明每包五百斤出場到儀解摺除正鹽四百斤之外其餘一百斤循照成例割配本綱正引完納正雜全數課銀是所割者包內之餘斤所配者仍係本綱之正引引無溢領卽鹽無多運應請無庸裁撤以節運費據實咨覆茲復接戶部奏以各省鹽引加斤祇係調劑商人而岸鹽壅滯卽由

於此若於定數四百斤每引驟加一百斤無課之  
鹽不特占礙原額官鹽其中影射夾帶之處更屬  
無憑查察實係從來未有之事卽以配割正引爲  
名而實則照舊捆包於引課大有關礙仍令將加  
帶餘鹽核實裁撤等因臣自應遵照飭行惟查淮  
鹽預請生引納課稱掣後通算多斤扣割另引載  
在鹽法志內歷久相沿無異並非驟加所以然者  
商人運鹽成本按引納課之外運腳最爲繁重所  
有裝運場鹽應需蒲包繩索捆工擡夫各費以及  
自場至泰州過壩自壩至儀徵解捆一切屯船水

腳向止按包給值而不論斤如五百斤成包之鹽其工價亦與四百斤無異商人每包多帶有加課而無加費藉此輕減運腳於成本所省實多至於捆運出場止係以五百斤爲一包并非以五百斤爲一引緣淮鹽行運總在儀徵改捆子包爲扼要關鍵是以出場之鹽無論包斤多寡及至運到儀徵總須解包抖散重新改捆小包如湖廣子包八斤四兩則以四十八包爲一引江西子包七斤四兩則以五十五包爲一引安徽太永子包八斤則以五十包爲一引和含上江各食岸子包五十斤

則以八包爲一引是兩淮權鹽雖係按引計課而  
捆運則從不以引爲一引出場之裝運大包者所  
以節轉般之腳費及至儀所改捆小包者所以便  
口岸之零銷百餘年來辦理舊章如此是出場包  
斤雖有時輕時重無非因地制宜隨時變通爲卹  
商便民之計而速課之道卽在其中卽如淮北從  
前商運綱鹽於乾隆六十年經前鹽<sub>臣</sub>蘇楞額請  
以四引灑帶一引謂之併引以節運費嘉慶十年  
前鹽<sub>臣</sub>佶山又請以三引併爲一包抵所掣出多  
斤另配生引俾捆工等項益資節省均奉

諭旨准行在案茲淮南引鹽以五百斤出場亦係相沿舊章與淮北之併引灑帶事同一律且係先納課銀然後赴場捆重如捆四包之鹽實已先納五引之課并非外加一百斤無課之鹽其由場到壩由壩到儀先經場員及泰壩委員按包稱掣復由監掣同知批驗大使子鹽委員等層層稽考改捆小包然後裝載江船運赴綱食各岸銷售均係按四百斤計引核算是五百斤一包止係出場斤數并非以五百斤原包開行赴岸亦無能稍任夾帶至淮鹽積滯已久自道光元年以來以十年而辦五綱



之鹽仍有積滯存岸之鹽六七十萬引經湖廣督  
臣具

奏並江西鹽道稟明在案今自十一年以後已辦奏  
銷四次而岸銷仍滯轉運維艱皆由從前積壓及  
加帶九年十年殘引之故於課項雖不爲無補而  
本綱因以占礙現開乙未新綱方在催商趕辦設  
法疏通若將五百斤之包再改爲四百斤按綱卽  
應捆鹽一百三十九萬餘包比較舊例商人須多  
出二十七萬餘包之捆費水腳計銀不下數十萬  
兩以歷來節省之運費一旦驟增旣無關於弊竇

徒有損於商貨而且成本加重轉運益難銷售回  
課必更遲滯再四籌思實多未便合無仰懇

大恩俯念商艱仍准照向辦章程以五百斤出場抵所  
解捆除正引四百斤外割去一百斤配算另引俾  
節省運費而便稽查據運司俞德淵具詳前來理  
合恭摺縷晰聲明伏乞

皇上聖鑒訓示謹

奏

道光十五年十一月初九日奉到

硃批戶部議奏欽此



淮南鹽多銷滯請將乙未綱分年帶運摺子

奏爲淮南引鹽趕運業已四綱因舊積過重請暫展乙未新綱援案分年帶運以利疏銷仰祈

聖鑒事竊照鹽務以轉運疏銷爲要轉運之事運司責無旁貸疏銷之責在於江廣各省口岸二者並重而疏銷尤爲緊要緣商人祇此一副貲本若口岸不銷則課銀無出而轉運亦爲之不靈必須淮南江廣通盤籌畫未可任其積滯也日昨蒙

皇上垂詢淮南現在籌運情形臣謹已縷陳梗概蒙

諭令補摺臣伏查淮南鹽務每綱額行一百三十九萬

附錄卷之三十一  
餘引前因疲敝課運俱滯經

欽派大臣查辦整頓章程

臣

於道光十一年任事開行

辛卯一綱十二年壬辰一綱十三年癸巳一綱十四年甲午一綱均於次年六月奏銷通計四年之中照額行運四綱溯查數十年來自嘉慶庚午至庚辰十年之間僅止六綱全運其餘或北銷而南銃或南銷而北分帶道光元年辛巳至十年庚寅僅運五綱七分其餘或銃或停并無接連五六綱全運之事現查道光十一年至今以四年而行運四綱兼有加帶九年己丑十年庚寅停運之鹽七

十餘萬引並有辛卯接銷已丑以前各綱已請未  
運之鹽五十餘萬引及各口岸存積未售之鹽七  
十餘萬引通計舊積引鹽已不下一綱之數加以  
四綱新運之鹽五百五十八萬餘引爲數更多疏  
銷不易兼值連年災歉銷路倍覺艱難現雖催開  
乙未新綱而前鹽未銷課項無出商情難免拮据  
裹足卽使迫令完納而陳鹽愈積成本占閣商力  
益疲將使甫經扶起之局一蹶難支是此時岸鹽  
滯銷雖在各省而於兩淮運務實爲成敗消長之  
機不得不設法疏通以顧大局溯查嘉慶庚午乙

亥丙子均因岸鹽滯銷有提引分作六年十年帶  
運之案又戊寅年淮綱引滯經前督臣孫玉庭等  
請將戊寅綱引自己卯綱起分作十年帶運并請  
將丁丑綱鹽課錢糧分別展緩奏銷欽奉

上諭兩淮綱食鹽引連年壅滯多有積壓一時不能倍運  
倍銷加恩著照所請將戊寅淮南綱食鹽引提出一綱  
自己卯綱起分作十年帶課帶運卽隨同各綱奏銷等  
因欽此再查雍正七年鹽政噶爾泰乾隆四年鹽  
政三保任內均因綱引積壓展緩一綱分作十年  
帶運又乾隆二十三年鹽政高恒以引日壅滯請

將戊寅綱課分作十年帶徵奉

上諭兩淮綱食引鹽現多積滯而今年戊寅綱又須請領引目按課輸銷商本不能轉運情形未免拮据是宜酌籌變通以疏積滯著加恩將戊寅一綱提出停其捆運以便疏銷積引所有應徵課額分作十年帶徵等因欽此是前此兩淮極盛之時偶值鹽引滯銷卽請提綱分帶况現在情形遠不逮昔而新舊運鹽之數倍於從前兼以本年夏旱紬產舟楫難通七月風潮湍消更甚甲午一綱課雖納而鹽未行以致乙未新綱雖開無課可納現在趕運前綱已請之鹽



計非數月所能完竣合無仰懇

天恩俯念現在鹽多滯銷本由災歉并非各岸督銷之不力且因前綱積滯及帶運甚鉅亦并非籌運本綱之不力請

旨准照舊案將乙未一綱除淮北另辦票鹽外其淮南綱食各鹽照前案提出分作十年帶運帶課隨同各綱奏銷卽於來年六月開辦丙申新綱丁酉年五月奏銷以後遞年提上一月漸次趕復二月原限既不比鈇引停綱虛懸課項不過稍展時日藉舒商力而課款仍歸有著且係歷辦舊章并無窒

礙仿照辦理庶可疏通壅滯并得趁此趕運已納  
課銀各鹽源源赴岸仰副

聖主慎重鹺綱之意所有淮鹽援案分運藉資疏銷緣  
由謹繕摺具

奏并繕歷年運鹽比較清單以備查核恭呈

御覽伏乞

皇上聖鑒訓示謹

奏

謹將兩淮鹽運綱額今昔比較清單恭呈

御覽

嘉慶十五年庚午綱

江廣各岸因鹽積滯全行統銷片引未行

淮南滯銷分辛未等六綱帶運二十三萬一千

九百二十七引

安池太及淮南食岸並淮北全運

嘉慶十六年辛未綱

南北綱食各岸照額全運

嘉慶十七年壬申綱

南北綱食各岸照額全運

嘉慶十八年癸酉綱

南北綱食各岸照額全運

嘉慶十九年甲戌綱

南北綱食各岸照額全運

嘉慶二十年乙亥綱

淮南綱食各岸照額全運

淮北滯銷酌提二十萬引分丁丑等十綱帶運

嘉慶二十一年丙子綱

淮南綱食各岸照額全運

淮北滯銷酌提二十萬引分丁丑等十綱帶運

嘉慶二十二年丁丑綱

南北綱食各岸照額全運

嘉慶二十三年戊寅綱

淮南綱食各岸分已卯等十綱帶運

淮北綱食照額全運

嘉慶二十四年已卯綱

南北綱食各岸照額全運

嘉慶二十五年庚辰綱

淮南照額全運

淮北因鹽積滯全行統銷

自嘉慶十五年起至二十五年淮南北綱食

各岸共全運六綱江廣統銷一綱分十年帶  
運一綱淮北統銷一綱分年帶運一綱

道光元年辛巳綱

淮南江廣安池太饒各食岸運行半綱統銷半  
綱

江甘高寶泰全運

淮北照額全運

道光二年壬午綱

淮南綱食各岸運行半綱統銷半綱

淮北全運

陽明家公集卷一  
道光三年癸未綱

淮南綱食各岸運行半綱銃銷半綱

淮北全運

道光四年甲申綱

南北綱食各岸照額全運

道光五年乙酉綱

淮南綱食各岸照額全運

淮北綱食共實行十三萬五千四百引銃銷十

六萬一千五十二引

道光六年丙戌綱

淮南綱食各岸運行半綱銃銷半綱

淮北因鹽積滯全行銃銷

道光七年丁亥綱

南北綱食因鹽積滯全行銃銷片引未行

道光八年戊子綱

淮南綱食各岸照額全運

淮北行運二十五萬七千六百七十七引又分

辛卯等十綱帶運三萬九千三百五引

道光九年己丑綱

南北綱食各岸請運七分未行停運三分



道光十年庚寅綱

南北綱食全行停運片引未行

自道光元年起至道光十年止惟甲申一綱  
全運其餘辛巳壬午癸未丙戌各統銷半綱  
丁亥全統一綱庚寅全停一綱己丑停運三  
分乙酉淮北統銷戊子淮北帶運通共十年  
之中併計淮南綱食各岸共運行五綱七分  
統銷三綱停運一綱三分淮北共運行五綱  
一分統銷三綱六分停運一綱三分

道光十一年辛卯綱

南北綱食各岸全運并加帶已庚殘引

道光十二年壬辰綱

南北綱食各岸全運并加帶已庚殘引

道光十三年癸巳綱

南北綱食各岸全運

道光十四年甲午綱

南北綱食各岸全運

自十一年辛卯起至十五年六月奏銷甲午

綱止四年之中四綱全運又有加帶九年已

丑十年庚寅停運之鹽七十餘萬引在內

謹查自道光十一年以前二十年中僅有嘉慶  
辛未至甲戌四綱全運一次并無加帶在內  
其餘或銃或停或分綱帶運今自十一年開  
行辛卯綱至十五年奏銷甲午綱四年全運  
兼有加帶在內是以納課未銷之鹽甚多不  
得不請照案分年帶運此今昔比較實在情  
形合併聲明

道光十五年十二月十一日奉

硃批另有旨欽此同日奉

上諭陶澍奏淮南引鹽舊積過重請暫展乙未新綱援

案八年帶運一摺著戶部議奏單併發欽此

附 三 家 之 三 子  
卷 一 一  
二 八

|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|--|--|--|--|--|--|--|--|--|--|

109 年 3 月 6 日

汪南乙未綱引課仍請分帶摺子

奏爲遵

旨查明覆

奏仰祈

聖鑒事竊臣接准戶部咨照道光十五年十二月十五

日奉

上諭前據陶澍撥案奏請將乙未綱引課分年帶運當  
降旨交戶部議奏茲據該部奏稱查明該督所奏一  
綱之課分帶十年並奏銷逐年提前一月是否確有  
把握不致有名無實其乙未綱支發雜款並道光十

年以後應解各部院帑利及內務府蕩斤皮張變價等項積欠屢經飭催並未按年徵解究竟作何籌畫俾國課不致虛懸雜款帑利均歸有著原奏內均未議及著陶澍逐款確核明白覆奏欽此仰見

聖主慎重齟綱之至意臣請援案提綱帶運實因舊鹽

在前積重難勝并非籌運本綱之不力今奉

諭旨查詢是否確有把握不致有名無實臣伏思分綱

帶運本係相沿舊法前此庚寅以前十年之中僅運五綱猶有積滯卽嘉慶年間號稱極盛亦不能年運年綱每有鏡引提綱之事况臣所運倍於從

等責帶甚多是以仰乞

天恩將乙未一綱分作十年帶運臣何敢尙謂確有把握惟思鹽運之遲速全在疏銷而疏銷在於江廣各口岸年來疊被災傷江廣尤甚是以銷路難通課運因而阻滯一值時和年豐自可源源暢達且以一綱分帶十運每運計十餘萬引爲數較輕溯查嘉慶以前每值積滯分綱帶運又得暢運數綱以前證後當可無虞壅滯至該綱支發各款仍應援照歷次分綱成案帶徵帶課隨時完解至道光十年以後應解各部院帑利及內務府躉斤皮張



變價等項臣查帑本一款自乾隆年間至道光六  
年歷次在京各衙門及外發息本共七百八十餘  
萬兩每年應完息銀七十八萬餘兩此項本銀早  
罄於前人而代償利息於此日係屬無本之息實  
無著落不得已攤於通綱帶完俾無著仍歸於有  
著然課額究已增重運銷之滯亦未必不因乎此  
至兩淮鹽法每綱開辦係先納正課其雜課各項  
向例分爲三次完納名曰請呈加在揚州請運時  
完納一次謂之請引錢糧迨赴場買鹽捆包後又  
納一次謂之呈綱錢糧及至運到儀徵解捆開江

又納一次謂之加斤錢糧請引既有多寡運鹽又有遲速并非正課完而雜課卽與同完兼以商力不齊或引已請而無貲買鹽則呈綱之課需時或鹽已買而無力開江則加斤之課尙緩三課既有參差雜款無由併解以致時有

奏催卽是因雜課未能全完之故此實淮南鹽法如此并非有意支延然亦不過稍緩歲月未有請引之錢糧已納而不買鹽卽未有呈綱之錢糧已納而不開江者是以一綱之引運竣卽一綱之雜課亦完也現查辛卯一綱應解內外各處銀兩早已

全清壬辰一綱亦經解竣癸巳綱現亦陸續報解  
惟辛卯以前欠解各款經前任鹽

臣

奏明展緩暨

欽差奏明停運之引此時無從徵解至於辛卯以後雖  
有緩納但得氣力稍舒漸次歸款不致無著謹遵  
旨逐款確核明白覆

奏伏乞

皇上聖鑒謹

奏

道光十五年十二月十六日奉

硃批戶部議奏欽此道光十五年十二月二十七日奉  
旨前據陶澍覆奏乙未綱引課分年帶運各情形當降  
旨著戶部議奏茲據戶部奏稱兩淮大局課項商情  
兩有關係必須通盤籌畫方不致顧此失彼奏銷限  
制尤屬全綱要務定例完納一綱於次年二月題報  
兩淮自奏請展限之後迄今尙未復歸原制現在鹽  
務日有起色著自丙申綱起務於次年二月造報奏  
銷以後著確遵定限不准再有推展以清綱分至所  
稱陳鹽愈積商力益疲請將乙未綱引分作十年帶  
運無虞壅滯著卽照所請辦理惟分綱帶運正雜銀

兩必須按限徵完課項方歸有著該督覆奏雖逆計  
及將來謂可無虧課款而屆限時作何辦法未縷悉  
敷陳著陶澍先事熟籌認真妥辦務將舊積岸鹽及  
時趕運新綱引目豫計疏銷至乙未綱支發各項著  
籌款解清其辛卯以後欠解帑利等銀著按綱完繳  
倘既經分帶復蹈從前故轍丙申奏銷仍未能提歸  
原限各綱欠解之款倘復拖延乙未綱應支之項不  
能設法撥解致誤要需或將庫款借墊那移又滋套  
搭卒致引宕課懸均歸無著該督自問能當此重咎  
耶嗣後務須通盤籌畫不准動以緩帶爲詞卽再有

懇恩展緩亦斷不能仰邀允准也凜之慎之欽此

平家物語

卷一

三

再請復設兩淮鹽政摺子

奏爲兩淮鹺務日有起色通盤籌畫仍請復還舊制  
設立鹽政以專責成而資久遠仰祈

聖鑒事竊照兩淮鹽務前因疲敝已極經

欽差大臣王鼎寶興查明情形以山窮水盡不可收拾  
百弊叢生難期令行禁止

奏准交兩江總督管理臣彼時日擊艱難亟宜振刷

非臣下所敢諉卸受事之時適當商疲課絀無可  
措手兼以頻年災歉拮据倍形仰蒙

皇上洞悉幽微優加體卹準平燭照俾臣得以稍展駑



駘竭力支持漸復舊制四年之中連運四綱正課  
先清兼有加帶淮北試行票鹽亦引課全清民商  
均便凡此運疏之小效莫非

聖訓之祇承惟

臣

思事當疲敝之時固莫難於整頓而

既有轉機又須因時因勢持以久遠以總督而管  
鹽政足使奸商猾吏積弊一清而運籌握算布置  
精詳則非一人耳目之所能周心思之所能逮也  
兩淮課額之重比於兩江之地丁兩江地丁錢糧  
數百萬領以三撫職以四司承以道府州縣大小  
數百員猶有催科不力未能年清年款而兩淮僅

一運司歲收數百萬無地無丁之課其勢已難而  
又無朝夕同城之上官爲之主政無所稟承卽無  
所統馭其未便一也兩淮課賦所出全資商運而  
商運尤在岸銷價值之低昂水勢之長落風色之  
順逆朝夕情形不同全在相時察勢如就場購鹽  
則有皮票運鹽開江則有梳封刻須用印而江南  
江北往返數日往往因一刻之遲誤而絆千里之  
行程商情卻顧課運因以阻滯其未便二也從來  
庫貯有專司必有稽查前此兩淮專任總商一出  
一入漫無稽核以致數千萬之積欠庫貯全空現

查十一年徵收正雜各款二百餘萬兩十二年接  
收四百餘萬兩十三年十四年各收五百餘萬兩計  
辛卯一綱徵解全清餘亦陸續報解緣淮南鹽法  
先納正課其完納雜課向係分爲三限必俟全綱  
運竣始能報解全完至於正課俱經隨時報解計  
已一千二三百萬尚有存庫應支各款皆運司俞  
德淵嚴除浮費謹司鎖鑰之力非臣所及經管也  
設使運司不得其人或信任家人或假手書吏或  
惑於浮言慫恿無難藉端耗費庫貯仍虧雖有總  
督遠在數百里外旣鞭長之莫及恐積毀以難追

其未便三也至若總督職分較尊與商人既難接洽口商面諭諸多未便且所管實繁河防漕運刻費經營吏刑稿案日不暇給而三省軍政大小標營以百計將弁以千計兵丁以數萬計操練巡防時須周歷勢難專顧鹽務卽如江西安徽奉

命校閱業已兩年而以度支之緊要竟致簡練之未周其未便四也以上各條臣當時非不慮及祇以事值繁難先務爲急迨至整新之後章程已定自須歸還舊制以資率由况兩江重任本非臣庸駑所能勝任仰蒙

皇上格外姑容委用至數年之久精力全衰深虞隕越  
若因專顧鹽政而使兩江應辦各務照料難周於  
心既有未安若因諸務紛乘而於鹽務稍有疎忽  
於事亦復無補再四思維惟有請復鹽政俾事有  
專責盡心經理臣仍殫力幫扶不稍鬆勁至裁減  
浮費爲兩淮第一要務年來辦公不敷名目永遠  
革除不許列徵其例准動用之七十萬兩亦經裁  
去過半每歲辦貢辦公一切事件僅准用銀三十  
萬兩均有核定款冊絲毫不能浮濫其每綱納課  
科則向來每引列徵至七八兩不等近年減至四

兩內外有減無增若鹽政既復一切無庸更改惟  
養廉應行給還減存賞號照數動支吏役各項均  
照減存之數無須復添其庫簿出入數目仍由運  
司挨卯報院并報總督查考不任絲毫舛混至總  
督職統文武緝私一節是其專責臣連年查辦糧  
私嚴拏梟販逐漸肅清如洪澤湖儀徵老虎涇向  
爲梟徒出沒之所經臣督飭員弁大小破獲數百  
起盡法懲治咸知斂迹倘稍有縱逝梟私充斥臣  
自應獨當其責而鹽政專心致志但理鹺務不必  
分顧他端如此則專理有人責無旁貸鹽務可期

振興年勝一年益臻充裕矣所有臣通盤籌畫請  
仍還舊制復設鹽政緣由相應據實縷陳伏乞

皇上聖鑒謹

奏

道光十五年十二月十六日奉

上諭陶澍奏鹺務已有起色請復設鹽政以專責成一  
摺前因兩淮鹽務疲敝已極經欽差大臣查明具奏  
降旨專交兩江總督管理數年以來民商均便據陶  
澍奏章程既定鹺務日有起色總督事務殷繁勢難  
專顧鹽務請歸還舊制復設鹽政以專責成等語兩

淮鹽務既有轉機自須因時因勢持以久遠俾國課日見充裕陶澍來京陛見朕連日召對見其精神才具結實周到正當乘此鹽務已有起色之時實力整頓悉心經理無負委任方不愧爲國宣力之大臣况兩淮鹽政裁撤未久若如所奏復還舊制忽撤忽設國家亦無此政體所有該督奏請復設鹽政之處著不准行欽此





覆奏出場鹽包實已按引裁減摺子

奏爲查核各場捆運鹽包實已按引裁減與部查數  
目無異并無浮逾恭摺覆

奏仰祈

聖鑒事竊查接管卷內道光十五年十二月十三日准

戶部咨議覆 臣具

奏淮南鹽斤請仍照舊五百斤出場辦理以省運費

一摺部議以淮南引鹽共計一百三十九萬餘引  
每引四百斤爲一包應捆鹽一百三十九萬餘包  
如以五百斤捆運按斤核計卽應減爲一百一十

一萬餘包應請

旨飭下該督卽將各場捆運包數是否按數裁減據實  
詳查分晰核定并此後應如何力杜弊端統令切  
實聲明妥立章程以期行之久遠等因奉

旨依議欽此欽遵咨照來江當經前署督臣林則徐飭  
行護運司詳查去後茲據護理兩淮鹽運使淮南  
監掣同知姚瑩查明包數具詳請

奏前來臣查淮南綱食各岸每綱額行一百三十九  
萬五千五百十引每引額重四百斤每捆以五百  
斤出場計辛卯壬辰兩綱加一帶運殘鹽按綱卽

應捆鹽一百三十九萬五千五百十包自癸巳以後停止帶殘每包所餘百斤割配正引按綱止發場鹽一百一十一萬六千四百八包及到儀所解捆仍按四百斤一引配成正鹽一百一十一萬六千四百八引另配割鹽二十七萬九千一百二引共合成綱額一百三十九萬五千五百十引之數與戶部所查無異是各場捆運包數與出江引數比對實已按數裁減鍼孔相符并無浮逾其自場至壩先由場壩各官層層稱掣到儀解捆按照楚西各岸子包斤重併計成引臣於前摺業已縷晰

陳明實屬無從弊混應請仍照舊章辦理無庸另  
立章程以昭核實所有查明各場捆運包數自停  
止帶殘之後早已按數裁減與部查無異并無多  
捆緣由謹據實覆

奏伏乞

皇上聖鑒訓示謹

奏

道光十六年三月十一日奉到

硃批戶部知道欽此

欽遵

諭旨將丙申綱淮南引課提前奏銷摺子

奏爲遵

旨籌辦丙申綱淮南引課提前奏銷限期并乙未應帶  
正雜各課按限徵完及在外支發各項籌款先應  
急需不致那移套搭恭摺縷晰覆

奏仰祈

聖鑒事頃臣於二月初九日接准戶部咨議奏乙未綱  
淮南引課分年帶運一摺道光十五年十二月二  
十七日奉

目前據陶澍覆奏乙未綱引課分年帶運各情形當降  
旨著戶部議奏茲據戶部奏稱兩淮大局課項商情  
兩有關係必須通盤籌畫方不致顧此失彼奏銷限  
制尤屬全綱要務定例完納一綱於次年二月題報  
兩淮自奏請展限之後迄今尙未復歸原制現在鹽  
務日有起色著自丙申綱起務於次年二月造報奏  
銷以後著確遵定限不准再有推展以清綱分至所  
稱陳鹽愈積商力益疲請將乙未綱引分作十年帶  
運無虞壅滯著卽照所請辦理惟分綱帶運正雜銀  
兩必須按限徵完課項方歸有著該督覆奏雖逆計

及將來謂可無虧課款而屆限時作何辦法未縷晰  
敷陳著陶澍先事熟籌認真妥辦務將舊積岸鹽及  
時趕運新綱引目預計疏銷至乙未綱支發各項著  
籌款解清其辛卯以後欠解帑利等銀著按綱完繳  
倘既經分帶復蹈從前故轍丙申奏銷仍未能提歸  
原限各綱欠解之款尙復拖延乙未綱應支之項不  
能設法撥解致誤要需或將庫款借墊那移又滋套  
搭卒致引宕課懸均歸無著該督自問能當此重咎  
耶嗣後務須通盤籌畫不准動以緩帶爲詞卽再有  
懇恩展緩亦斷不能仰邀允准也凜之慎之欽此伏



查兩淮鹽課每綱報解數百萬兩全賴口岸暢銷銀回迅速商運得以源源轉輸方不致引積課懸前因道光十一年以後帶銷舊積引鹽不下一綱之數加以辛壬癸甲四綱新運之鹽五百五十八萬餘引爲數過多疏銷不易兼值災歉銷路倍覺艱難不得已

奏懇

天恩請將乙未一綱淮南綱食引鹽照案分作十年帶運帶課隨同各綱奏銷俟至本年六月開辦丙申新綱丁酉年五月奏銷後遞年提上一月漸次趕

復原限原爲岸鹽滯銷成本占閣不得不設法疏  
通顧全大局庶商情無渙散之虞斯

國課無支絀之慮誠如部議兩有關繫必須通盤籌  
畫方不致顧此失彼茲接部議乙未引鹽雖分十  
綱帶運而令自丙申綱起卽於次年二月奏銷計  
自上年六月奏銷甲午以後至今不過八箇月之  
期所有歷綱已請未運引鹽百數十萬實未能趕  
運趕銷掃清前積遽行開辦丙申仍不免新陳并  
運跋前疋後掣肘實多惟旣准部議欽奉

諭旨嚴切

微臣

蝨負方艱實深惶悚斷不敢再懇展緩

現在新任運司劉萬程到揚接印已於二月十二日開辦丙申新綱臣惟有督同該司嚴飭各商凜道

諭旨將舊積岸鹽及時趕運新綱引目預計疏通俾來年二月造報丙申奏銷以復原制而清綱分至乙未綱引蒙

恩允准分作十年帶運其正雜課銀亦卽分年帶納誠如部議不過少需時日較之銃引僅賠正課者本屬不同自應查照從前分帶成案將應徵人奏正雜銀兩隨同各綱分限奏銷此外帑利鹽規匣費

節省等銀亦當欽遵

諭旨按限催徵實力趕運俟運竣一綱之鹽卽報解一綱所帶一分之課斷不敢以在前分運數年停止有案預存成見稍事鬆勁卽或別有阻滯亦當隨時察看情形設法辦理總期運銷通暢課歸有著亦不敢將屆期如何辦法先事懸擬致蹈欺飾之咎惟乙未支發各項如辦

貢辦公及各衙門養廉俸工巡費兵餉并官役紙飯解餉水腳書院義學育嬰普濟等堂經費歲需銀一百十數萬兩雖綱鹽未能按年徵完而此等歲

支款項勢難停緩從前運庫有存貯生息帑本每以墊支嗣因息本全空遂至那用已徵應解之款名爲懸墊道光二年有清查之懸墊八年有銑引之懸墊九年十年有停運之懸墊盈千累萬庫貯一空皆爲外支各款無出之所致臣於上年

奏請乙未分綱帶運時亦以歲支爲不可少因有辛卯壬辰帶完預籌經費六十萬兩并有辛卯外支雜費節省二十萬兩本爲前項歲需墊款之用乙未支發各項卽於此內開支雖未能盡敷給發足應緊款區區籌畫之忱不敢有誤要需亦免致那

動正款又滋套搭再查辛卯以後欠解帑利等銀  
本係空賠無本之息攤帶通綱除辛卯壬辰二綱  
多已全解外尙有癸巳甲午二綱未經解清實因  
綱鹽未經運竣以致未及掃數徵存一俟按綱運  
完亦卽陸續清解不任拖延據鹽運使劉萬程具  
詳前來謹遵

旨縷晰敷陳伏乞

皇上聖鑒謹

奏

道光十六年四月二十五日奉到

殊批戶部知道欽此

陶文毅公全集卷十八目錄

奏疏 鹽法

會同兩湖督撫籌議楚省鹺務摺子

彙報浙鹽引地緝私情形摺子

覆陳淮粵引界事宜摺子

淮北改行票鹽請免州縣考核摺子

劉運使急公出缺請派大臣查辦淮鹺摺子

恭奉

恩諭敬陳感勉下忱摺子

淮南丁酉綱無著懸引請提出二十二萬引融於



淮北行銷摺子

覆奏籌議稽察場竈章程摺子

請將淮北票鹽每引加徵雜課二錢同票鹽溢課

經費盈餘一併協貼淮南雜款摺子

奏明票鹽驗貨掛號章程附片

欽遵

諭旨保薦運使摺子

查核上海會館并無囤貯私鹽暨舟山地方產鹽

應歸浙江經理摺子

覆奏范隄閘壩例禁啟閉附片

淮南戊戌綱鹽請援案提出二十一萬引融運淮  
北摺子

淮北戊戌綱票鹽溢課經費盈餘及加增雜課合  
共銀三十六萬餘兩協貼淮南雜款附片

淮南戊戌懸引仍請融北摺子

縷陳八年來辦理兩淮鹽務并報完銀數比較在  
前情形附片



奏疏 鹽法

會同兩湖督撫籌議楚省釐務摺子

奏為會籌楚省釐務緝銷事宜恭摺

奏祈

聖鑒事竊 臣 陶澍欽奉

諭旨派赴江西安徽一帶校閱營伍

奏請順道回籍修墓并乘便會同 臣 訥爾經額 臣 周

之琦 臣 裕泰籌商淮鹽緝銷事宜仰荷

聖鑒所有湖南釐務 臣 陶澍前過長沙曾經晤商 臣 裕

泰茲由洞庭順帆東下於十一月初七日行抵鄂

垣與臣訥爾經額臣周之琦會晤復將鹺務彼此  
悉心籌議緣湖廣北南兩省爲行銷淮綱最重口  
岸每年額引七十七萬九千九百餘道而緡載之  
儀徵老河影距貯鹽之漢鎮相隔幾及二千里長  
江險阻風信靡常挽運本屬不易加以船戶水手  
之夾私盜賣中途節節逗遛稽察更屬難周且楚  
省係水陸通衢界連川粵豫皖等省四通八達鄰  
私最易侵灌防範設或稍疎卽致貽害腹地內如  
湖北宜昌府屬之官渡卡緊接川江從前銅鉛船  
自四川裝運北上一路收買川私入楚售賣經由

卡隘并不聽候查驗以致宜昌一郡盡食川私并  
灌及下游荊州各屬與荆門之遠安當陽湖南之  
澧州石門等處大爲淮綱之害卽經議定章程奏  
奉

諭旨飭令宜昌鎮總兵親督卡運各員查驗催趲并雲  
貴四川各督撫飭令沿途各州縣嚴禁售給該船  
戶鹽斤自奉行一載以來宜昌一帶水道川私嚴  
行堵截銷數日有進步又隨州應山切連豫省信  
陽州等處多被潞私侵灌黃安麻城切近光山固  
始及皖省英山等處多被蘆私侵占接近淮北粟

鹽之處亦有闌入皆因小民趨利若鶩貪賤食私  
緣山越嶺輾轉售賣前經臣陶澍於淮北英山等  
處設卡并派六安營參將趙承德等帶兵以時巡  
歷查拏復經臣訥爾經額臣周之琦派令湖北鹽  
道于克襄親往黃州各屬勘明要隘分設卡座堵  
緝近來銷數已有轉機又襄陽府各屬與豫省南  
陽各處犬牙相錯豫省行銷潞鹽較之淮鹽價值  
貴賤懸殊侵灌本易而豫省奸商又復逼近楚境  
廣開子店甚至包運到楚轉賣以致占礙淮綱大  
為官引之害現於奉

旨飭拏匪犯張開運案內究出梟販多名拘獲究辦以  
示懲創應俟會同河南撫臣籌議疏緝章程另行  
具

奏又湖南郴州所屬之永興縣係粵鹽引地粵商開  
設子店行銷生鹽與淮界熟鹽本有區別詎粵商  
藉海船艙底沙泥淮其煎熬名色多設熬鍋將生  
鹽煎熟侵灌淮界以致楚省引額短絀道光十一  
年經前任湖廣督臣盧坤奏奉

諭旨必應嚴定章程令各守地界酌定熬鍋額數永定  
限制毋許私增多設等因欽此盧坤當卽欽遵飭令



兩省委員核議嗣經盧坤核定每子店一家准其  
留鑪一口咨商粵省而粵省總以熬鍋不能定數  
爲詞及盧坤調任廣東臣訥爾經額頻年文移往  
返咨商而粵商又紛紛具呈終不肯酌定額數以  
致迄無成議影射多熬充賺准引在所不免伏思  
粵省來咨以粵鹽係通省融銷若將永興子店限  
定熬鍋口數該省引課卽有阻滯兼以楚省所議  
拏獲販私人犯例應訊明來厯如訊係永興子店  
所賣咨提究辦乃謂楚人自犯之罪與粵省子店  
無涉不應妄扳拖累等語伏思緝私扼要必當澄

本清源惟不稍存畛域始能各固藩籬粵省融銷  
分數未必全在永興一縣何以不能定額行銷且  
熬鍋係爲煎熬海船艙底泥沙而設爲數甚微何  
能藉此裕課其必欲廣設熬鍋無非藉端影射將  
生鹽煎熟混雜侵灌淮界是粵課固可寬裕而淮  
引卽被侵占剗肉補瘡於公何補且查湖南省頻  
年詳辦販賣粵私案件不一而足雖各犯罪由自  
取而多留熬鍋爲奸商開偷漏之門陷愚民蹈販  
私之網於理似屬未協事關有礙淮引若不定以  
限制誠恐愈增愈多無所底止查永興縣現存子

店六十五家相應請

旨飭下兩廣督臣將永興子店六十五家每家只准存

鍋一口永爲定額不准私自加增及添設子店鍋

口尺寸亦不准稍有寬大總期於粵引准綱兩無

妨礙至於拏獲私鹽須照例究明買鹽來歷行提

審辦粵商更不得規避狡卸失察私鹽出境地方

文武各官亦應照例議處庶可各知儆戒以固藩

籬此外疏銷事宜前次立法已詳如有應因利乘

便之處隨時斟酌辦理不令窒礙臣等惟有隨地

隨時同心協力認真經理以冀課裕引暢仰副

皇上整飭鹺綱之至意所有<sub>臣</sub>等會籌准鹺緝銷事宜  
謹合詞恭摺具

奏伏乞

皇上聖鑒訓示再<sub>臣</sub>陶澍拜摺後卽日起程由水路回

江辦事合併陳明謹

奏

道光十六年十一月十二日具

奏嗣准湖廣總督訥咨道光十六年十二月二十九

日奉到

硃批另有旨欽此同日承准

軍機大臣片知貴督等具奏前事本日奉有寄信諭旨飭兩廣總督鄧辦理矣

彙報浙鹽引地緝私情形摺子

奏爲彙報江省督緝淮私侵浙各案犯併功鹽數目  
仰祈

聖鑒事竊照各省行鹽引地均有疆界不能不畫地自  
守而又有不容過分畛域者蓋鹽務雖有彼此同  
一攸關

國課不能任私充斥倘或但知顧己以鄰爲壑於本  
境官課未必有益而彼境已大受其累既違恕道  
且長刁風殊非協力爲公之道臣所管兩淮鹽務  
名爲六省其實淮北鹽行皖豫課祇四十萬餘兩

江西省惟江寧揚通等屬有課爲數甚微其餘或例食他鹽或暗被私占如江西之吉臨撫康湖北之荆宜安德已官私各半其餘建饒各屬以及襄鄖衡永寶辰各官均屬虛存名目所真食淮鹽者南昌瑞州袁州與武昌漢陽黃州及湖南之長岳常澧十府而已而淮課正雜五六百萬加以鹽本運腳包索船錢一切商夥盤纏與夫商店食用及賀貸利息又須三四倍於課額是以每行一綱之鹽必得二千餘萬之銀取資於十數府之百姓最爲艱鉅民力難支往往避而食私而其地距淮近者

千里遠或三四千里鞭長莫及且在他省轄內借  
助於人實難得力因思巡緝之責惟近爲能江浙  
引地相連如蘇松常鎮太四府一州係江蘇一省  
菁華然皆例食浙鹽距淮南通太各場僅一江之  
隔片葦可航易被淮私充斥經<sub>臣</sub>督飭各營認真  
緝拏無分彼此如糧船過江每歲代浙一例梭查  
外其餘大小梟販有闖入浙省界內者隨時立拏  
懲辦其出力各員分別獎勸有由<sub>臣</sub>奏咨在案者  
有咨照浙省辦理者有續獲尙未辦出者統計此  
五六年中凡淮鹽偷漏侵入浙引界地者前後飭



據提鎮各標及吳淞鎮京口高資常州川沙福山  
金山南匯劉河等營并海防各員共報獲六十四  
起獲梟犯二百九十七名私鹽四十六萬一千五  
百二十七斤大小私船八十三隻槍礮火藥刀劍  
木棍多件均經札飭地方官分別審擬按律懲辦  
在案此係地方職分應爲并非藉此鳴勞惟思文  
武各員旣能無分疆界念切爲公臣亦不敢泯滅  
其績謹據實彙陳藉紓

聖主整飭鹽綱之意抑臣更有請者安徽之徽州府與  
江西之廣信府例食浙鹽均在兩省腹地私鹽由

漸灌入以致饒州與撫建南康九江及皖省之池  
州寧國太平等府均被侵占久假不歸而浙商方  
且執圖便民食爲詞多於徽州廣信等府鄰界之  
邊開設私店大爲淮鹽之害合無仰懇

聖恩飭諭浙省嚴查奸商假公濟私之弊悉予拆除在  
浙江撫臣烏爾恭阿素秉公正滌弊懲奸無分遠  
邇得荷

諭旨整頓更期得力倘蒙推廣  
德威通諭各省一體照辦俾行鹽則各依疆界緝私則  
無分彼此同心同力裕

課便民又不獨淮鹽一隅獲資利益矣除將緝獲淮  
私侵浙各案犯鹽數開單敬呈

御覽外謹繕摺具

奏伏乞

皇上聖鑒訓示謹

奏

道光十七年二月十二日奉到

硃批另有旨欽此同日奉到道光十七年正月三十日

內閣奉

上諭鹽引暢銷總期裕課便民各該督撫奉公盡職原

應不分畛域而所轄引地亦宜劃清界限以杜侵越  
方爲辦理妥協茲據陶澍奏稱安徽之徽州府與江  
西之廣信府例食浙鹽均在兩省腹地私鹽由浙灌  
入以致安徽江西各府均被侵占在浙商總以便民  
食爲詞每於徽州廣信等府鄰界之邊開設私店而  
淮鹽受害漸有侵占之虞著烏爾恭阿嚴查奸商禁  
止偷販除假公濟私之弊杜越境售私之習整頓自  
爲得力各省一體照辦俾行鹽則各依疆界緝私則  
無分彼此庶鹽務日有起色而轉銷各有責成矣欽  
此



覆陳淮粵引界事宜摺子

奏爲恭摺先行覆陳淮粵引界事宜仰

聖鑒事竊臣於道光十六年十二月二十九日准戶部

咨奉

上諭御史黃樂之奏請勘明淮粵行鹽引地并設卡巡察以杜私銷一摺著陶澍鄧廷楨會同詳查妥議具奏摺併發欽此伏查江西南昌吉安等府例食淮鹽其南安贛州二府寧都一州所轄十五縣廳均食粵鹽嶺路交迴處處可通其水則章江自西貢江自東同會於贛縣之城北又北經儲潭至攸鎮則

與吉安府之萬安縣接壤例食淮鹽者也贛勢居

高臨下最易衝斥淮界嘉慶二十三年道光九年

疊經前任兩江督臣查照雍正年間成案請酌定

店座撤留十二年臣因籌堵粵私章程復經

奏交部覆准行十三年前兩廣督臣盧坤復翻臣議

經戶部奏請

敕下臣等屏除意見會同妥議具奏在案數年以來屢

經臣往返函商并由部彙案行催而粵省堅執前

詞礙難遷就定案上年又經臣咨商兩廣督臣鄧

廷楨嶺外迢遙迄今尚未覆定茲因御史黃樂之

奏仰蒙

諭飭會議伏查淮粵引界該御史奏請定議者二事曰  
官店裁留曰汛卡移設臣與粵省岐互者尙有二  
事曰熬鍋核數曰贛關點包除贛縣泥灣一卡粵  
省以在引界腹心之內未便設巡飭據西省司道  
議詳改設於萬安縣之崑崙塘兩岸該處在攸鎮  
下游雖未能如泥灣之得力但係粵私入淮門戶  
退回設卡亦足資堵緝業已咨商兩廣會核辦理  
至官店裁留一節道光十一年議將攸鎮五店裁  
一二留二本係粵省委員勘定非由江省主議以致



裁少留多在江省猶仍舊患乃十三年粵省議奏  
復以江西驛站官塘實在攸鎮西岸東岸并無一  
店西岸五店離淮界三十里外卽應全留等情不  
知粵鹽設店於西岸而居民多在東岸西岸鹽店  
雖屬三十里外東岸民居僅距淮界二十二里零  
舍東就西已非便民之道且贛縣邊界至攸鎮而  
止攸鎮爲贛縣極北之境其東西南三面村鎮戶  
口尤多粵商開設埠店不開於墟市適中之地使  
四境居民得以就便買食而開於逼臨淮界之邊  
豈邊界則須便民而腹地可聽民往返乎今計里

則憑驛站設店則靠河沿謂非藉地行私以遂其  
充賺之計其誰信之若仍照數全留既與雍正年  
間准設一二店之案相背更較道光十一年裁二  
留三之議不符此攸鎮五店仍應照前酌裁之原  
委也再粵鹽由曬掃而成不需鍋竈與淮鹽出自  
煎熬色質迥殊粵商靠邊立店多設熬鍋使生鹽  
變熟與淮南無異以爲朦混侵銷之計今縱不能  
拔本塞源將熬鍋盡革又豈可任其愈出愈多漫  
無限制前經司道等議以攸鎮三店每店姑准酌  
留熬鍋二十二口共六十六口每鍋每日計可熬

鹽五十餘斤每日共可出鹽三千三百餘斤生熟兼銷每日可售鹽六千七百餘斤每年銷數約二百四十餘萬斤計贛縣每年額銷粵引一萬五千八百一十七道零除沙地墟一店大湖江之元亨利貞四店所設熬鍋不議外以下游之雲泉章水二鄉戶口而計每年不過分銷鹽數十萬斤今以攸鎮臨邊一隅之地視額銷之數已增至十倍之多每年縱有融引亦斷不至復虞缺乏現在湖南永興之粵鹽熬鍋計子店六十五家已奏請飭下粵省每家止准存鍋一口不許加增所有攸鎮事

109 卷一 18

同一例自應核實查減以符體制又贛關點驗儲  
潭照票均係粵省舊章是以嘉慶十七年兩廣運  
司來移有照例驗放之文二十四年粵省總督來  
咨又有贛關點驗之語乃粵商支離其詞以照例  
驗放指爲暫時外辦章程贛關稽查稱爲原文聲  
敘未晰惟欲一概免查以遂其夾帶多斤之弊更  
以刁難誤運等語巧爲掩飾殊不思贛關爲南北  
通商之所百貨往來從無留難守候豈以運行贛  
縣之鹽已抵贛縣之腹地咫尺報查轉慮稽遲誤  
運之理自應仍請查照前次奏奉

俞旨由贛南道西關點驗填給子埠照票於儲潭查驗  
放行并責成督銷之贛縣每月查明到埠分銷各  
數造冊加結報查以期核實而免侵銷此又熬鍋  
必須定數贛關必應點包之各實情也竊思淮粵  
引地同關

國課不容岐視如果衝淮而有益於粵尙爲有說之  
辭第贛關既不點驗則公私莫辨徒使私鹽假官  
爲名而於粵課仍然無益况粵鹽行銷贛埠課止  
數萬淮鹽行銷江西課至百餘萬兩權其輕重已  
不能任粵充斥而粵鹽自雄贛建瓴直下其勢莫

邊如境內稽察全無必致梟橫罔忌堵禦尤難卽  
設卡亦復何益兼之江西建撫等郡接近閩私充  
斥已甚廣信一府例食浙鹽以致饒州南康多被  
浙私所占侵及安徽若贛境藩籬盡撤則更匹匹  
受敵必致西岸淮鹽愈滯不得不據實剖陳非敢  
爭執理勢實然也臣與兩廣督臣鄧廷楨各領封  
圻彼此并無成見惟當欽遵

諭旨詳查妥議以期淮粵兩裨仰副

皇上整飭離綱之至意除飛咨粵省督臣會議具奏外

合先恭摺縶悉覆

陽明先生全集卷之十一

十四

奏伏乞

聖鑒謹

奏

道光十七年二月十二日奉到

硃批知道了欽此

淮北改行票鹽請免州縣考核摺子

奏爲淮北鹽引改行票鹽請免州縣考核以歸核實

仰祈

聖鑒事竊查淮北綱食各岸前因改行票鹽經臣將各

州縣銷鹽考核於道光十二年

奏請俟試行一二年後察看情形再行酌議具

奏欽奉

諭旨俞允在案茲查淮北改行票鹽以來按綱請運足額且有溢請之引均係票販自行運售并未由各州縣督銷覆查票鹽章程如所指州縣鹽壅滯銷



附二家公三卷  
卷一  
三  
准其轉運他岸販賣惟不准越出行粟州縣之外  
是各州縣缺溢之數全難作爲定準咎無可任亦  
功無可居所有淮北鹽引行銷綱食各岸考核州  
縣督銷之處應請免置議以歸核實據鹽運使劉  
萬程詳請具

奏前來理合恭摺具

奏伏乞

皇上聖鑒

訓示祇遵謹

奏

道光十七年三月十二日奉到

硃批該部議奏欽此

奏疏

陸文憲公全集

卷十八

十一

2017762-182

劉運使急公出缺請派大臣查辦淮鹺摺子

奏為遵

旨詳細查明據實覆

奏仰祈

聖鑒事三月二十四日承准軍機大臣字寄道光十七

年三月十七日奉

上諭本日陶澍奏兩淮鹽運使出缺據稱轉據兩淮鹽

運使劉萬程家人焦升稟稱該運使於二月二十九

日夜間自縊該運使係三品大員何以無故輕生是

否另有別情著陶澍詳細查明據實覆奏不准稍有

含混該故員靈柩及其家屬著俟續奉諭旨到日再行飭令回籍將此諭令知之欽此遵

旨寄信前來除飭令劉萬程靈柩家屬暫緩回籍恭候續奉

諭旨外伏查該運使劉萬程出缺緣由臣已據揚州府縣轉據該家屬切實供明并親查確訪委係因勞致疾痰發輕生此外并無他故業於本月十二日縷悉

奏明在案惟其中瑣屑下情尙有不敢瀆陳於

聖主之前者茲蒙

諭旨令臣詳細查明據實覆奏何敢稍有含混查該運司之輕生由於病發痰迷其所以病發之故則實由於慮竭急公之所致兩淮鹽務繁重甲於天下運司駐劄揚州止能於各商催徵催運不能於各岸督緝督銷是名爲轄六省之引地實不能遙操六省之事權前經奉

旨以運鹽責之兩淮以銷鹽責之江西湖廣仰見

聖明洞鑒實握齟法全樞而一切引課奏銷向惟鹽政運司獨當其責此中掣肘情形不敢不逐一陳之一則課額之遞增難減也兩淮額徵引課有正有

雜正款較之康熙雍正年間數已遞增雜款則如  
帑利之歲需七十餘萬不但利過於本而本已早  
罄於前人現帶皆無本之息若鹽規匣費之由陋  
規而改其名目亦遂相沿以爲緊款幾與辦公之  
課無異此外如河漕臣及各養廉薪水書役廩工  
紙飯巡費兵餉尤爲經費所關不容不按額解發  
至於書樓書院普濟育嬰等善堂每歲所需亦均  
歸入科則按引徵收在當時增之卽未必甚易而  
及今刪減則勢更有所難矣自道光十一年以來  
雖有刪減浮費二百六十萬之文其實惟辦公一

款減去四十萬外支雜費減去十萬有關科則若漢岸減費六十萬則出自已經完課之岸鹽根窩價值一百三十餘萬則把持缺底之人所得存之均足以病運商而減之亦於課項無與也現課仍需五六百萬非必一無可減而苦於不能減課既不減引豈可缺此岸銷不暢而年額難以年清之實情也一則費本太重難於旋轉也淮課幾及六百萬買鹽之價倍之出場過壩捆工船戶之費亦如之而到岸規費賀借利息與夫岸店廝夥食用一切之需且過之是以每運一綱成本需二千數



百萬之多前鹽未售則貲本占閣後綱無課可納  
近來商力疲乏能運四五萬引者無多十數萬引  
者更少其餘小商貲本更微去來無定每屆開綱  
不得不照滾總之法攤派行運間有未完復須加  
派任愈重而力愈微此岸銷不暢商本無可轉旋  
之實情也一則完課之期不能一例也淮南鹽法  
商人納課向分請呈加三期并非一次或單已請  
而無力買鹽卽不能呈綱或綱已呈而無貲捆運  
則加斤又滯必須前鹽回課而後運乃繼是三者  
皆有待於岸銷轉運方靈卽或三限無阻而無力

開江守候仍滯不得已而撥案緩納以免到岸之  
稽延奈岸銷不暢卽緩納仍無現課可回而運庫  
待用已急勢不能本綱之款必用本綱之銀此又  
岸銷不暢則錢糧不能各歸各款之由也一則各  
岸私侵不能盡絕也查淮南行銷引地爲鄰私占  
踞者如蘆私及淮北之私所侵尙不過邊境三五  
州縣若潞私之侵襄陽荊門安陸德安下逮漢川  
與川私之侵宜昌鄖陽荊州沔陽旁逮辰澧粵私  
之侵衡州永州寶慶吉安臨江旁逮萍鄉醴陵統  
計十四府八十餘州縣闕私之侵建昌撫州浙私

之侵寧國池州太平饒州上逮都昌湖口統計六  
府三十餘州縣皆縱橫蔓延無處非私至船戶夾  
帶如浙私之透在沿江各岸者亦皆順載赴楚更  
不比儀徵老虎涇等處設有巡緝與糧私之經過  
揚州懾於梭查而斂迹也夫惟鄰私之侵占太多  
是以各岸之疏銷愈滯查楚西各岸自道光十一  
年開辦辛卯綱引運鹽到岸已在是年秋冬及十  
二年春夏之間占閣已半年有餘且其時口岸存  
積殘鹽本已七十餘萬引并有已丑以前各綱已  
請未運之鹽五十餘萬引皆係辛卯後始行運銷

連辛壬癸甲丙五綱應銷鹽六百九十餘萬引又  
辛壬兩綱帶銷已庚殘鹽七十餘萬引通共應銷  
新殘引鹽約九百萬引今自道光十一年起至十  
六年止計湖廣江西併安慶池州太平及各食岸  
共止銷鹽五百三十餘萬引而湖廣共未銷鹽四  
十五萬九千二百四引江西共未銷鹽五十萬七  
千八百引安慶池州太平等府屬亦然六年之中  
綱食各岸共計滯銷鹽一百數十萬引卽各省設  
法疏銷未必能一年之內俱能掃清而淮南後運  
之鹽轉瞬已積各商如何行運課額何以清完各

省行銷之地分計考成其責猶輕一鹽臣一運司  
鉅任獨肩責無旁貸仰屋躊躇徬徨中夜此前運  
司俞德淵所以勞心焦慮而一病不起後運司劉  
萬程所以心力交悴而病發輕生也計臣自道光  
十一年辛卯受事以來率同前後運司同心竭力  
欽遵

諭旨整飭頹綱設法籌運至現辦丙申綱止業已五綱  
共完解過銀一千六百九十萬九千六百餘兩均  
係實銀實解冊揭全符內准北奏銷銀一百九十  
一萬八千二百餘兩溢課已逾定額又南北帶殘

新疆經費積欠濫價共銀二百六十八萬三千六百餘兩外有印本九十餘萬兩均係從前短缺此時代徵代補之款其淮南奏銷前後已報完銀九百六十九萬五千餘兩未完者甲午尙有九釐丙申尙有一分九釐又京外帑利鹽規厘費雖已解過銀三百十四萬二千二百餘兩後六釐銀二百一十二萬四千七百餘兩俟口岸回課亦可陸續完解以上各款雖比之道光二年至十年屢次所查虧欠銀五千七百數十萬兩爲數懸殊第各處需用甚亟屢煩

奏催迥非從前可比兼之運司短見輕生難免物議  
紛騰而現在商人甫經趕完丙申奏銷筋力已盡  
轉瞬丁酉開綱併令補完舊課如使岸銷仍滯實  
難竭蹶從事臣受

恩深重卽捐糜頂踵不足云報而力單任重深恐駑駘  
徒竭無補涓埃惟有仰懇

天恩特派大臣來江查議籌辦俾臻妥善并請

敕下湖廣江西安徽各督撫臣確查口岸現在積存鹽

數趕緊疏銷實力堵緝以便轉輸而收成效謹遵

旨將劉運司急公出缺及淮鹺實在情形詳細查明據

實覆

奏伏祈

皇上聖鑒訓示謹

奏

道光十七年四月十九日承奉

軍機大臣字寄道光十七年四月十三日奉

上諭本日據陶澍奏淮鹺實在情形一摺兩淮鹽務最爲繁重一切催徵催運各事宜該督責無旁貸已故運司劉萬程竭慮急公本屬職分所當爲現因病發輕生該督正當督飭新任運司陸蔭奎認真經理期



於課額無虧方爲不負委任何得因劉萬程一人輒  
謂諸事掣肘遽請欽派大臣前往查議籌辦此奏殊  
出意外太不成事總之引課奏銷原係該督專責如  
果辦理得宜自可日有起色卽謂兩淮責在督運其  
督銷之任分寄諸湖廣江西安徽各督撫獨不思江  
西安徽均係該督統轄省分其應如何實力堵緝趕  
緊疏銷無難與兩省巡撫妥爲籌辦至湖廣分銷各  
口岸與淮南本屬一氣相通前已有旨令林則徐盡  
心籌畫不分畛域如有應行會議之處儘可隨時咨  
商從長計議該督受恩深重惟當實心籌辦不得以

力單任重爲詞藉圖卸責倘畏難觀望以至礙務不見起色朕惟該督是問將此諭令知之欽此又於道光十七年四月二十三日奉到

硃批此奏殊出意外太不成事矣另有旨欽此又於遵旨將劉運司急公出缺句旁奉

硃直



恭奉

恩諭敬陳感勉下忱摺子

奏爲恭奉

恩諭敬陳感勉下忱俾祈

聖鑒事竊臣前因運司劉萬程出缺遵

旨詳細查明并將淮鹺實在情形據實縷陳接奉

諭旨兩淮鹽務最爲繁重一切催徵催運各事宜該督

責無旁貸正當督飭新任運司陸蔭奎認真經理期

於課額無虧方爲不負委任何得因劉萬程一人輒

謂諸事掣肘遽請欽派大臣前往查議籌辦此奏殊

出意外太不成事總之引課奏銷原係該督專責如果辦理得宜自可日有起色該督惟當實心籌辦不得以力單任重爲詞藉圖卸責等因欽此跪聆之下感悚難名伏念臣自道光十一年接管鹽務適當疲敝之後山窮水盡無可措手仰蒙

皇上指示多方格外

體卹俾臣

得以從容布置釐滌虛浮數年以來正課幸

尙無虧雜款亦多清解惟帑利鹽規仍有欠缺總因各岸未能暢銷商課無從轉納兼之淮南鹽法向有請呈加名目分爲三次完納牽前搭後每須

三兩年始能辦竣一綱而各處需用則以年爲計不能俟一綱之竣以致催索頻仍不敷肆應此係納課成例如此并不始自近今顧從前往往往以正墊雜故虧款雖鉅而催索無聞今則先儘正款而雜款稍後故欠項雖不及從前百分之一而催促反倍於前也屢煩

奏請實切難安計惟有多銷一綱之鹽方能預墊一綱之用乃各處私充引積不但不能多銷而且滯銷日甚商本占閣後運難繼區區之愚深恐一人之思方未周無以仰答

高深是以瀆懇

天恩特派大臣來江籌議俾臻妥善而焦急之餘不自知其措詞之失當茲蒙

聖主訓誨周詳

諄諄策勵江安兩省無難會商妥籌湖廣督撫更得從長計議臣才識疎庸利鈍非所逆覩然受

恩深重分切捐糜萬無諉卸之理况現在鹽務奏銷不誤庫款暫貯尙有銀二三百萬足供正撥之需商情黽勉亦知急公轉輸比之從前究屬已有起色豈可稍形退沮致誤機宜查新任運司陸蔭奎遠

在川西到揚尙早現卽督同護運司姚瑩核定科  
則將丁酉新綱及分帶乙未各課循照上年章程  
迅速開徵辦理毋許遷延併札儀徵捆所嚴掣子  
包另委候補同知伍家榕親駐巡查以杜江船夾  
帶其漢岸水程接據湖北鹽道來稟已經督臣林  
則徐酌定道里遠近限期由水販交付鹽行送局  
齎道核銷不准由州縣催繳以免需索留難致礙  
銷路至揚岸鄰近梟私責成地方文武扼要卡巡  
嚴行堵緝臣仍以時稽核功過申明賞罰俾員弁  
咸知激勸協力緝私此外催徵催運各事宜如有



可以變通盡利設法籌維之處容臣殫心竭慮隨

時酌擬請

旨遵行斷不敢畏難觀望有負

生成自干咎戾再臣前摺齎回敬謹拆閱見摺尾聲敘

劉運司急公出缺旬旁欽奉

硃直臣檢查底稿係臨繕時於運司出缺之上誤添劉

字臣未經看出實屬疎忽曷勝惶汗應請

旨將臣交部察議所有臣奉到

諭旨感

恩彌奮下忱謹繕摺恭覆伏乞

皇上聖鑒謹

奏

道光十七年五月二十二日奉到

硃批另有旨欽此同日奉到道光十七年五月十一日

內閣奉

上諭前因兩淮運司出缺當降旨飭令陶澍實心籌辦  
鹽務茲據奏稱查明現在奏銷不誤庫內暫貯銀兩  
足供正撥之需商情甯勉尙有起色等語辦理鹽務  
全在轉運暢銷杜絕漏私之弊至楚省與兩淮本屬  
一氣相通林則徐曾署兩江總督其於鹺務轉運交

關之處熟悉情形現經酌定道里遠近限期由水販  
交付鹽行送局齎道不准由州縣催繳可免需索留  
難辦理甚爲合宜其場岸鄰近梟私仍著不分畛域  
飭令文武員弁扼要巡查該督隨時稽核功過以示  
勸懲此外催徵催運各事宜陶澍惟當督同運司實  
力整頓以冀日有起色方爲不負委任至前次奏摺  
內有誤寫字樣其自請交部察議之處著加恩寬免

欽此

淮南丁酉綱無著懸引請提出二十二萬引融於

淮北行

奏爲淮南疲商懸引無著撥案酌撥淮北融運以期  
趕副奏銷仰祈

聖鑒事竊照淮鹽雖分南北經理同一運司從前淮北  
倒罷業已片引不行近因改行票鹽淮北引課連  
次奏銷有贏無絀而淮南則仍形竭蹶各商力能  
辦運者僅有數家內許宏遠尉躋美二家向係大  
商楚西安慶等岸派運引鹽不下二十餘萬去冬  
因疲乏倒歇臣於春間奏蒙

聖鑒在案嗣經開辦丁酉新綱節次劄飭護運司另招  
新商承辦該二商懸引以期趕完額課去後茲查  
各岸存剩殘引未銷并開江在途及各商已納課  
未運之鹽尙幾及兩綱之數雖經臣與江廣各督  
撫臣殫力籌維奈殘積過多一時實難暢銷商人  
貲本占閣完課甚屬拮据視辦運爲畏途以故尉  
許二商空懸之引半載以來竟莫肯承充認運若  
加派現運各商更屬力難兼顧計距來年奏銷之  
期不及五箇月察看情形必須將該二商空懸之  
引早爲籌畫方可望趕數額課查嘉慶四年淮北

行運綱鹽因銷滯商疲遞年積壓經前鹽臣書魯  
奏明於己未庚申兩綱內各提出十萬單引融銷淮  
南江廣等岸欽奉

諭旨依議欽遵又查嘉慶八年續將淮北壬戌未銷引鹽  
融撥淮南十萬單引又嘉慶十三年復因淮北額  
引未能暢銷自己巳綱起至戊寅綱止每綱融入  
淮南行銷鹽四萬單引又嘉慶十六年淮北未運  
庚午引內分撥淮南十萬單引又道光五年淮北  
甲申綱未運鹽二十六萬六千餘引融撥淮南帶  
運均經前鹽政臣

奏准遵行各在案是從前淮北疲敝屢經融運淮南  
代完北課幾以爲常現在淮南滯銷準情揣勢亦  
宜將南課暫融於北以期通利查淮北自改行票  
鹽以來上年造報乙未綱奏銷各票販溢請三十  
二萬六千二百餘引因其鹽尙未全運經

臣

奏明查照上屆章程歸入丙申綱造報本年淮北各  
場陸續曬掃摺清上年未運之鹽祇須再請票鹽  
數萬引卽敷丙申一綱之額若因年額已清竟停  
收售則民販挾貲來場旣未免空勞往返而各場  
產積日多轉恐透漏滋弊

臣

與護運司姚瑩返復

熟籌莫如將丁酉淮南綱食引內提出二十萬引連帶乙一分二萬引融運淮北行銷令民販完稅請票卽將所完之稅撥補淮南許尉二商空懸之課如此則淮南懸積之引有著各商卽可騰出貨本趕辦淮南應運之課以副來年二月底奏銷期限一轉移間南北兩淮均得其便查淮北票鹽成本較輕鄰私無從侵灌近年生齒日繁鹽斤本可多銷祇因各處私充官滯是以銷路愈窄今票鹽之法便民卽以裕課不但化梟爲良而且化私爲官是官鹽之課旣得又添一倍化私之課撥此二



三  
十餘萬引融於淮北并不至於窒滯兼今歲淮南  
各場因春間雨雪過多產鹽稍缺更當因時變通  
以收酌盈劑虛之用於歷年南北融運成案亦復  
相符毫無妨礙相應

奏明請

旨援照辦理以期南北兩利裕奏銷而免周章至南北  
每引正課大畧相同惟淮南外帶各項雜款爲數  
甚多此次融撥二十二萬引除將票稅經費等項  
儘數抵收淮南正雜課銀外其外帶各雜款尙有  
不敷仍於淮南綱食本岸所運引內分別加攤計

楚西科則連加攤融北外款每引共止完銀四兩  
一錢有零并不爲重而安池太及各食岸科則仍  
復有減無增據護運司姚瑩具詳請奏前來臣爲  
預籌奏銷報完

國課起見理合恭摺具

奏伏乞

皇上聖鑒

訓示施行再此項融引攤派湖廣六萬引江西四萬引  
安慶二萬五千引池州一萬引太平五千引寧國  
三萬引上江三萬引合併聲明謹

奏

道光十七年十一月十三日奉到

硃批戶部議奏欽此

覆奏籌議稽察場竈章程摺子

奏爲遵

旨籌議稽察場竈章程恭摺覆

奏仰祈

聖鑒事竊

臣

接准戶部咨道光十七年五月十九日奉

上諭御史袁文祥奏私鹽充斥請設法清釐一摺各省

鹽引滯銷由於私販日多或弁兵遇有鹽梟未能

勇捕拏或兵役得賄縱私不行阻止鄰私由是充斥

而官引因以難行又商人於正引外帶有私鹽先儘

私鹽賣竣而後及正引私販私帶之鹽皆出於場竈

緝私而不究私所自出則弊源未遏安望鹽務日有起色著管理鹽務各省督撫鹽政嚴飭所屬務於場窰所在設法認真稽查所出之鹽毋使以多報少通同隱漏庶餘鹽不致泛溢四出卽正引之鹽亦不致爲私帶所積壓其如何酌定章程實力奉行可收實效之處該督撫鹽政等著各就現在情形悉心妥議具奏將此通諭知之欽此欽遵鈔錄原奏咨行前來

臣  
跪讀之下仰見

聖訓周詳莫名欽服伏查兩淮引鹽額銷六省內淮北所轄之河南安徽江蘇等省前已改行票鹽遞年

逾額多銷各場竈地曬掃分設局卡查驗尙屬著有成效不致透漏場私其淮南所轄之江蘇安徽二省多被浙私侵灌江西一省閩浙粵三私侵灌湖南北則川私潞私粵私四面侵灌誠如

聖諭各省鹽引滯銷由於私販日多鄰私充斥之故節

經湖廣江西安徽督撫臣會商堵緝或梭查銅鉛

船隻或嚴禁子店熬鍋或裁撤鄰界私店或廣設要隘卡巡凡可以設法疏銷者均已不遺餘力雖兵役賄縱不能保其必無而派出弁兵如不實力

捕拏悉由督撫臣隨時撤參分別

奏咨有案至商鹽向在儀徵解捆每有重斤夾帶之

弊臣於道光十一年立定章程委員會同淮南監

掣同知認真稱驗嚴禁箕捆人等賣斤放砵商人

正引之外似不敢帶有私鹽但船戶水腳尅扣難

免藉帶腳私復經嚴飭商人照數實發水腳并於

沿江上下分段派委員弁各帶兵役船隻護巡催

趲以杜沿途盜賣捏報淹消行之數年誠恐稍有

玩弛上年復專委候補同知伍家榕赴儀駐守督

捆子包務飭按斤配包毋許短發水腳間有斤重

不符之引經臣與湖廣督臣往返咨會懲辦是私

帶之鹽亦已漸清弊竇惟私販私帶之鹽皆出於  
場竈緝私而不究私所自出則弊源終於未遏

聖明洞鑒實已握其要樞

臣

於淮南竈地嚴飭場官稽

查火伏并於海安溱潼及秦州北六場各要隘卡  
巡委員莫不隨時告誡禁遏場私雖隱漏未必全  
無而餘鹽當不致泛溢四出茲欽奉

諭旨遵卽飭行運司就現在情形再加確核如有未盡  
之處卽會同臬司妥議具詳以憑核

奏去後嗣據護理兩淮鹽運使姚瑩會同署江蘇按  
察使周祖植安徽按察使徐寶森詳稱場竈係產



鹽之所稽查少有不密透漏泛溢卽爲弊源茲查淮南各場年來點驗鹽鐵稽察私煎編發門牌挨查透漏且商人赴場重鹽均隨時嚴飭場壩橋所各官層層稽查掣驗不容稍有夾帶重斤立法實已周詳督辦尤未鬆懈各官如果認真查辦自不致尙有偷漏場私特是坐落通泰兩分司所屬場境內通州如臯泰州東臺興化鹽城阜寧七州縣向無行銷額引許貧難小民請給號籌每人每日赴場買鹽四十斤挑負該處村莊售賣如遇漁汛大船給鹽三千斤中船給鹽二千斤小船給鹽一

千斤因無定額每年除草堰場并無醃切食鹽及  
角斜場僅止數引外其餘十八場按照產額自三  
四釐至二三分不等共開銷至二十四五萬引幾  
及淮南額引十分之二其中難保無奸民藉醃切  
爲名或買籌鹽暗中濟梟此項鹽斤雖出自場竈  
但其中已輾轉更手梟徒隨地零收躉販其買自  
何地何人未必盡能記憶以致各州縣獲犯到案  
無從根究概行聲敘鹽非竈漏未始不由於此又  
各場年終盤查滴耗每引開除自一二釐至一二  
分不等通年其有十餘萬引亦難保無偷漏夾帶

任意浮開情弊今會同悉心體察以通州等七州縣滋生戶口約畧計之歲售鹽十餘萬引足敷民食及漁汎醃切之用各場歲可產鹽一百數十萬引應請

奏明嚴飭各場嗣後漁汎醃切食鹽除向來開報不及一分者仍照舊發賣不得加增外其餘各場每年止准照產收鹽數賣給十分之一每屆年終責成分司親詣各場認真盤查將折耗之數核實開報至多亦不得有逾當年產收鹽數十分之一如有多賣醃切食鹽及浮開滴耗由分司查明將該

管場員據實嚴參懲辦以絕場私等情臣查所議各條於近年核實辦理之外益復加以周密自應據詳

奏覆飭屬遵行惟事關奉

旨酌定章程必須不厭精詳方期經久無弊又經飭行運使陸蔭奎再行悉心妥議去後茲據該司詳稱體察情形弔齊各卷逐加覆核護運司姚瑩等所議實已允協無可另議請查照原詳具

奏前來臣覆核無異除飭通泰兩屬各場毋許多賣醃切食鹽浮開滷耗俾餘鹽不致泛溢卽正引得

以多銷仍查照歷次舊章嚴飭分司場員認真督率竈丁按埵繳以編保甲嚴火伏以稽額煎商鹽捆重出場隨時核實稱驗俾絕私源并飭各州縣凡有營汛報獲犯鹽務須確究私鹽來歷不得仍前巧爲開脫迴護如有各營將備不肯親督弁兵實力查緝以及得賄縱私情事一經查出定卽據實嚴參務期諸弊肅清可收實效以仰副

聖主整飭離綱之至意所有遵

旨查議稽察場竈章程緣由理合恭摺覆

奏伏乞

皇上聖鑒

訓示謹

奏

道光十八年二月十五日奉到

硃批務當認真辦理地方文武均係統轄有何難於措  
施勉力而行以副委任欽此

The image shows a table with 10 columns and a header row on the right side. The header row contains the following text from left to right: "S. No.", "Name of the Candidate", "Marks", "Grade", "Remarks", "Signature", "Date", "Total Marks", "Percentage", and "Result". The table is otherwise empty.

| S. No. | Name of the Candidate | Marks | Grade | Remarks | Signature | Date | Total Marks | Percentage | Result |
|--------|-----------------------|-------|-------|---------|-----------|------|-------------|------------|--------|
|        |                       |       |       |         |           |      |             |            |        |
|        |                       |       |       |         |           |      |             |            |        |
|        |                       |       |       |         |           |      |             |            |        |
|        |                       |       |       |         |           |      |             |            |        |
|        |                       |       |       |         |           |      |             |            |        |
|        |                       |       |       |         |           |      |             |            |        |
|        |                       |       |       |         |           |      |             |            |        |
|        |                       |       |       |         |           |      |             |            |        |
|        |                       |       |       |         |           |      |             |            |        |
|        |                       |       |       |         |           |      |             |            |        |

請將淮北票鹽每引加徵雜課一錢同票鹽溢課  
經費盈餘一併協貼淮南雜款摺子

奏爲籌解淮南雜款請將淮北溢課動支以資協貼  
而應急需仰祈

聖鑒事竊照淮南正雜各項每綱應需五百餘萬遞年  
正課二百餘萬兩尙可按分造報奏銷無誤惟雜  
款錢糧向來須俟運完一綱之鹽方交清一綱之  
課頻年岸銷積滯回課稽遲雖經湖廣江西安徽  
督撫臣凜遵

諭旨竭力籌疏而額引未能全銷商力仍形疲乏凡京



外各衙門帑利規費等項爲辦公所需必不可緩  
之款半因商課未完無憑全解以致頻有

奏催咨催而運庫積欠尙多各處緊款待用不得不

向他款動那年復一年難免增累臣身任鹺綱時

深焦灼本年丁酉一綱於二月杪造報奏銷經臣

督飭運司催商納課早晚籌完正餉尙能勉副限

期轉瞬戊戌新綱又須開辦縱使岸銷漸暢而在

前殘積過多此時贖行匪易一切帑利規費等款

仍恐應解爲難再四躊躇別無長策惟查淮北引

餉原額止二十九萬六千九百八十二引數年以

來各岸改行票鹽輕本暢銷收課充足每綱加帶  
殘鹽總造報三十七萬五千餘引除商運官運之  
外按年

奏准行票約在四十萬引內外節存經費溢課爲數  
尙多竊思正餉雜課均屬度支淮北之票稅多增  
固足資戶部撥用淮南之雜款少解致難免各處  
催追欲圖催解有應實莫如酌盈劑虛應請嗣後  
淮北奏銷每年仍按原額造報其加帶殘鹽尙有  
庚寅戊子未帶之七萬九千數百餘引擬酌留江  
運八岸每綱帶殘二萬引不過四年即可加帶全

清計淮北正殘各課俱已如額此外票鹽溢課及  
經費餘存并每引酌量加徵雜課二錢共可得銀  
三十餘萬兩以資協貼淮南雜款分別緩急先儘  
解交庶各處需用有資亦免動那他款且戊戌開  
綱淮南減完銀三十餘萬兩按照楚西科則每引  
少交雜課三錢各商亦必形踴躍如將來南鹽旺  
銷可以無資協貼抑或票鹽有時稍滯不能兼顧  
淮南仍隨時體察情形由臣奏請停止歸商照常  
徵解如此酌量變通辦理似於解款商情兩有裨  
益至淮北雖向無雜款而近年票販頗能獲利每

引加徵雜課二錢亦不爲重現在已屆票鹽開局  
之期若待

奏定飭遵誠恐有稽收稅臣已札行總辦分司趕緊  
開局照辦以免遲誤所有籌解淮南雜款請以淮  
北溢課動支應解緣由謹繕摺縷悉陳明伏乞

皇上聖鑒謹

奏

道光十八年三月十一日奉到

硃批既開局照辦自必胸有成竹妥爲之該部知道欽  
此



奏明票鹽驗費掛號章程附片

再本年票鹽開局販情踴躍風聞攜費到場者已  
有二百餘萬兩而票鹽額數

奏明以四十萬引內外爲率未便任聽多運或致侵  
灌淮南現據該總辦分司等稟請驗費掛號以引  
數扣合銀數分別按折派買并因有驗費無銀空  
投手本掛號希圖轉賣獲利者深恐成本增重漸  
爲票法之害復經該總辦分司等酌擬驗明實係  
有銀辦運卽令親自畫押收銀貯庫俟派號之後  
如果銀浮於引仍將餘銀發還臣思票引有定而

興販人多欲杜弊端舍此亦別無辦法已飭行該  
總辦分司等破除情面妥協辦理仍飭總辦委員  
海州直隸州知州王用賓及海州營參將德本常  
川在浦督帶兵役彈壓俾資鎮靜所有稟鹽開局  
現在辦理情形合肅附片陳明伏乞

聖鑒謹

奏

道光十八年三月十一日奉到

硃批知道了欽此

欽遵

諭旨保薦運使摺子

奏爲遵

旨保奏堪勝兩淮運使之道員請先行陞署察看再請  
實授以重公務仰祈

聖鑒事竊

臣

承准軍機大臣字寄道光十八年二月初

五日奉

上諭本日據陶澍奏兩淮鹽運使陸蔭奎現在丁憂已  
派委河庫道沈拱辰暫署兩淮運使一缺職司繁劇  
必須勤明練達之員方能勝任著陶澍於所轄屬員



內慎加遴選據實保奏候朕簡用將此諭令知之欽

此遵

旨寄信前來臣查兩淮運使總理淮綱當商力極疲之

時誠如

聖諭非勤明洞達練習事機之員難期勝任臣所轄道

府各員內廉明勤慎能於辦事者頗不乏人而於

鹺務均非所悉不但情形多有隔膜且往往視為

畏途罕肯留心前此惟江西南昌府知府張寅護

理鹽道時尙肯任事第江西僅綱岸一隅非全淮

發運之比此外更難其人如前任淮南監掣同知

姚瑩精明幹練經臣兩次

奏護運使辦理堪稱裕如上年已蒙

恩簡放福建臺灣道甫經赴任該處係海疆要缺關繫

緊要微臣未敢保留又現任海州運判童濂自淮

北改行票鹽一手經理不避嫌怨業經六次奏銷

引課全完且有溢課及帶運前綱之課洵屬能爲

其難第該員職分較小且票鹽正資熟手亦未便

保舉外惟查河庫道沈拱辰前因其勤幹廉明辦

事頗有條理且歷任戶部山東司熟悉鹺務是以

奏請委令署理該道抵任適值截數奏銷之時釐核

款日趕催錢糧俱屬妥速認真商情亦尙協服合  
無仰懇

天恩卽以該道陞署兩淮運使仍由臣隨時察看如果  
辦理妥協俟一年期滿再行

奏請實授其河庫道一缺卽請

旨另行簡放以專責成所有臣遵

旨保奏運使請先行試署緣由理合恭摺具

奏伏乞

皇上聖鑒謹

奏

道光十八年三月二十七日奉到

硃批另有旨欽此同日奉到道光十八年三月十五日

內閣奉

上諭兩淮鹽運使著沈拱辰陞署仍著陶澍隨時察看  
如果辦理妥協一年期滿再請實授欽此

附錄之白身 卷十二

五

|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|--|--|--|--|--|--|--|--|--|--|

159 附錄之白身

查核上海會館并無囤貯私鹽暨舟山地方產鹽  
應歸浙江經理摺子

奏爲核查上海縣地方會館并無囤貯私鹽情形暨  
舟山產鹽請仍歸浙江省經理恭摺覆

奏仰祈

聖鑒事竊臣承准軍機大臣字寄欽奉

上諭御史高枚奏稱浙江寧波府屬洋面中之舟山產  
鹽甚旺聞廣商船經過收買每制錢十二文一斗每  
斗約二十斤載至上海每斤可售制錢二十文是其  
利息不啻三十倍上海沿海一帶會館最多卽爲囤

貯之所兩淮鹽引滯銷大半由此惟舟山所出之鹽濱海窮黎藉資口食或就本地之價官買發商或令商買配引或以所出之地屬浙江歸浙江省經理或以所銷之地屬江南歸江蘇省經理等語兩淮鹽引滯銷總由私販充斥所致愚民惟利是圖難保不越境收買轉相售賣著該督卽行查明上海地方如果多設會館廣爲囤貯務卽嚴密查拏毋稍寬縱至舟山所出之鹽應作何辦理并歸何處經理之處著卽會同烏爾恭額體察情形悉心籌畫妥議章程具奏將此各諭令知之欽此遵卽恭錄劄飭蘇松太道周

祖植密委丞倅嚴訪拏辦一面咨商浙江撫臣將  
舟山之鹽應作何辦理并歸何處經理之處體察  
情形會議具奏併將上海一帶係浙鹽引地與淮  
界相距寫遠不致充斥緣由附片奏

聞在案嗣據蘇松太道周祖植稟覆飭委川沙同知何  
士祁馳赴吳淞口沿海地方查明該處俱係濱臨  
黃浦大江接連海口潮水漲落無定兩岸盡屬沙  
灘并無設立會館之處復至上海縣一帶地方查  
明城內城外有江蘇浙江福建廣東關東山東安  
徽太湖各處商民共建會館一十三處皆爲寓處



同鄉及暫厝旅櫬而設間有堆積貨物處所均有  
董事經理絕無囤積私鹽情弊訊之居民保甲均  
無異詞惟查浙江定海縣之舟山產鹽甚多上海  
濱臨海隅其間閩廣兩省之鳥船乍浦洋面之硬  
檔烏基等船浙省沿海之划船夾帶興販由川沙  
寶山沿海等處分售有小船分銷偷運進口轉賣  
實所不免自道光十六年以來各該廳縣計獲鹽  
犯二十六名私鹽十一萬斤有奇皆在三四百里  
以內近海港汊拏獲并不藉會館囤積以爲銷私  
之地復經該道親赴各會館確訪與該同知所稟

相同其吳淞口外停泊諸色船隻仍照常派委妥  
員實力巡查毋任夾私偷銷以杜來源而絕去路  
庶可期私淨引暢具稟前來臣思販私本干律禁  
會館設在市廛爲衆商公所共見共聞之地即使  
圖利透私亦斷不敢於人烟稠密耳目昭彰之下  
自取敗露是該道等所稱各會館并無囤積私鹽  
自屬可信惟川沙寶山沿海一帶有商船夾帶私  
鹽之弊不可不時加查緝臣已劄飭該道責令各  
該廳縣隨時稽查如有帶私情事卽行嚴拏從重  
究辦毋稍寬縱至舟山之鹽應歸何處經理一節

淮浙江撫臣咨稱舟山係定海縣所屬原爲包課  
之區聽民自煎自食嗣因餘鹽串梟興販乾隆三  
十六年

奏明動撥帑銀令定海縣營設廠收買撥交松江營  
四千三百引交商完帑領撥再有餘鹽聽嘉松商  
人領配完帑載在兩浙鹽志惟舟山孤懸海外應  
籌議堵緝已劄行運司妥議章程通詳核辦等語  
是舟山之鹽或由官買發商或令商買配引浙省  
本辦已成規其如何嚴禁商船收買售賣之處江  
省遠隔重洋未能深悉旣經浙江撫臣督同運司

體察情形悉心籌畫卽應由該省妥議章程具  
奏辦理除咨明浙江撫臣外所有核查上海各會館  
并無固私緣由理合縷悉恭摺覆

奏伏乞

皇上聖鑒謹

奏

道光十八年閏四月初二日奉到

硃批知道了欽此



覆奏范隄開壩例禁啟閉附片

竊前據御史成觀宣奏請申范隄開壩啟閉例禁  
欽奉

諭旨交臣等會同查議具奏臣陶澍以該處開壩係農

田鹽課所關不可偏重其形勢高下非查勘未能

明確當經劄行江寧藩司會同兩淮運司委員查

勘議詳茲據該司等先後委勘會詳前來臣等覆

查兩淮泰州分司所屬地方有范隄一道本唐李

承實所築捍海堰歲久漸圯宋發運使張綸用監

西溪鹽稅范仲淹之議奏築長隄置閘啟閉宣洩

以仲淹力贊成之遂有范隄之稱從前場竈均在隄內現在海灘日漲各場竈移埵就滷反在隄外相去五六十里之遙海潮已不能淹及惟地勢旣改場竈亦移民人不知原委遂以爲范隄之設專爲民田祇禦鹹水不洩淡水道光十五年六月因雨水竈河泛溢將隄壩衝潰場商吉世昌等以埵場盤廩被淹請將各壩改放並將已潰之壩暫緩堵閉旋有興化縣民人楊春等以場商朦禬范隄呈控批飭各地方官查明各壩實係被水衝潰場商第稟請緩堵并非私行開挖各在案溯查乾隆

年間各前督撫鹽政議定北六場隄身閘座每年  
於三月堵閉九月開放惟留草堰正閘以濟重運  
鹽船南五場沿隄土壩每年七八月大汛之時鹽  
務地方各官相機會同啟閉非當盛漲場員不得  
遽行開放若遇竈河泛溢地方官亦不得勒令堵  
閉以便洩入串場河由丁溪等壩歸海商民相安  
已久迨至嘉慶年間前巡撫臣岳起議將范隄閘  
壩禁止開放竈河海口設法疏通而卒未能興辦  
從此商民每各援案爭執查該御史原奏內稱隄  
身閘壩有永遠實堵不准啟放者有夏秋堵隄以



防潮汛冬春啟放以便出入者非定限制難免倉猝競爭茲<sub>臣</sub>等細核南北兩場范隄閘壩情形以爲欲杜爭端宜示公允所有乾隆年間議定章程實可永遠遵守而無偏重之弊如有啟放不時及擅行阻止者卽行分別懲治庶於商民兩無所損俟籌有款項再將竈河挑浚以期分道疏銷至道光十五年開壩之案查明實係該商等呈請緩堵并非私乞應請無庸置議所有<sub>臣</sub>等會同查議緣由謹附片覆

奏伏乞

聖鑒謹

奏

道光十八年六月二十二日奉到

硃批依議欽此

奏疏



淮南戊戌綱鹽請援案提出二十一萬引融運淮

北摺子

奏爲淮南懸引援案請融淮北并酌撥協貼淮南銀兩以足戊戌課額仰祈

聖鑒事竊照戊戌綱淮南引課自本年四月開綱經臣

督飭運司按照上綱商請引數派令完納請運并

將上年

奏明之許宏遠尉躋美二商倒歇懸引二十餘萬設法另招新商認辦無如綱食各岸遞年銷不足額以致殘引愈積愈多商力不能轉輸新綱益形喫

重人皆畏累莫肯承充至今僅僉新商鮑良輔鮑  
中輔二人所認懸引不過二萬空缺尙多現距來

年二月

奏銷之期不及四月統計存岸未售并開行在途及  
已未完納新殘各引不下兩綱有餘本非數月內  
所能運銷完竣臣與署運司沈拱辰按限催徵不  
遺餘力各該新舊商人尙知激發天良將原派認  
運引數隨時勉力輸將可期趕副造報惟許尉二  
商退懸引內扣除新商接認尙有二十萬引一時  
旣難足數現商又無力兼顧若不及早另籌深慮

難敷課額伏查上年行運丁酉綱鹽因許尉二商  
倒歇乏人接認經臣

奏准提出淮南綱食二十萬引連帶乙一分二萬引  
融運淮北令民販完稅請票將所完之稅撥補懸  
課其不敷外帶各雜款仍於淮南所運引內加攤  
本年二月始得趕副

奏限今查上年造報淮北丙申綱

奏銷各票販有溢請二十一萬七千三百四引零

奏明歸入丁酉綱造報又上年年底止續請一百五  
十三引共溢存鹽二十一萬七千四百五十七引

零又本年

奏准淮北按年行票約在四十萬引內外除照原額造報并將殘鹽酌留江運各岸加帶其餘票鹽溢課及經費餘存并每引加徵雜課二錢共可得銀三十數萬餘兩協賑淮南截至現在止已據海分司摺報共請運四十七萬七千餘引足敷本年造報奏餉及協貼淮南之數計仍餘上年溢請二十一萬七千四百五十七引零雖鹽斤尙未全運出場而淮北頻年旺銷止虞缺乏無虞壅滯值此淮南銷滯引積之時似宜仍行酌盈劑虛以期兩有

裨益合無仰懇

聖恩俯准按照上年融北之案於戊戌綱淮南綱食引內提出二十萬引連帶乙一分二萬引融運淮北行銷卽將民販所完稅銀撥補淮南許尉二商空懸之課如此量爲轉移則淮南懸引均成有著淮北各岸無虞缺銷而來年二月底

奏銷亦不致有遲誤至提出淮南二十萬引按照綱食料則輕重核算共該入

奏正雜課銀二十九萬八千餘兩外帶雜款三十餘萬兩以淮北每引所完票稅經費撥補淮南每引



應完入

奏正雜課銀有盈無絀其外帶各雜款上綱係加攤淮南引內徵完本年有

奏准淮北協貼淮南銀三十六萬四千餘兩以此抵補現融南引外帶雜款卽無庸再於淮南引內攤徵科則并未加增南運尤爲利益第上年票鹽溢請止二十一萬七千四百五十七引零今請受融南引連帶乙一分係二十二萬整數仍不敷二千五百四十三引零應於本年票鹽溢請引內撥足下餘溢請引課仍爲協貼淮南之用據署運使沈

拱辰具詳請

奏前來臣爲預籌奏銷趕副

國課起見理合恭摺具

奏伏乞

皇上聖鑒

訓示施行再此次融引攤派湖廣六萬引江西四萬引  
安慶二萬五千引池州一萬引太平五千引寧國  
三萬引上江二萬引和州含山江浦六合句容溧  
水高淳全椒八岸一萬引合併聲明謹

奏

道光十八年十二月十六日奉

硃批戶部議奏欽此

淮北戊戌綱票鹽溢課經費盈餘及加增雜課合  
共銀三十六萬餘兩協貼淮南雜款附片

再上年二月淮北丁酉開綱經臣奏請每年奏銷

仍按原額造報其加帶殘鹽酌留江運八岸分爲  
四年帶清此外票鹽溢課及經費餘存并每引加  
徵雜課二錢共可得銀三十餘萬兩以之協貼淮  
南雜款分別緩急解交劄行總辦分司趕緊開局  
照辦等因於道光十八年三月十一日奉到

硃批既開局照辦自必胸有成竹妥爲之該部知道欽  
此茲查上年淮北協貼淮南雜款銀數據陞署鹽

運使沈拱辰詳明一上年溢請票鹽正稅共收銀  
 二十一萬七千五十六兩八錢一分八釐一上年  
 票販所完經費除撥補商課及應支各款外盈餘  
 經費銀五萬四千五百一十一兩六錢二分八釐一  
 上年每引加徵雜課二錢共銀九萬五千四百一  
 兩八錢三共合銀三十六萬六千九百七十兩二  
 錢四分六釐均已全數解收運庫計符原  
 奏協貼淮南雜款銀三十餘萬兩之案合併附片陳  
 明伏乞

聖鑒金謹

奏

道光十九年二月初三日奉到

硃批戶部知道欽此



淮南戊戌懸引仍請融北摺子

奏爲南鹽融北歷有例案可循懇

恩仍准照辦以疏積引而裕懸課仰祈

聖鑒事頃

臣

接准戶部咨淮南懸引請融運淮北行銷

一摺經戶部議駁覆奏奉

旨依議欽此欽遵咨會前來伏查淮鹽雖分南北課餉

同屬度支每當商疲岸滯之時不得不通融挹注  
以期

國帑無虧是以兩淮鹽法例准融銷嘉慶年間淮北  
已未庚申壬戌并自己巳至戊寅以及道光四年



分甲申等綱引鹽均經

奏准融運淮南代完北課卽鹽法志書內載康熙八年部議淮北壅引曾有改於淮南行銷之例可見南北融銷自

國初以來已歷日數十年并非始自近日前年因南商許宏遠尉躋美二家倒歇懸引二十餘萬經臣

奏請將丁酉淮南綱引內提出正帶二十一萬引融運淮北由戶部議准荷蒙

俞旨在案上年許尉二商懸引僅招有鮑中輔鮑良輔二商及現僉場商宋隆吉各據認行一萬引此外

舊商不能代爲加認新商復無可勒僉不得已循  
照成案仍請提融二十二萬引歸於淮北代銷旣  
與上屆情形無異更與歷年奏案相符誠如部議  
暢滯例有融銷遵例而行似不得謂非正辦若如  
部議所稱淮南懸課旣可融銷何以淮北積欠不  
能加帶等語查懸課籌融係屬淮南緊款積欠加  
帶不關部撥要需况自淮北改票以來帶完已庚  
戊子殘課銀五十九萬八千餘兩歷綱附入奏銷  
并非不行加帶祇以臣離綱總理必須南北通籌  
此時融北入南正爲先其所急本年奏銷造報庶

可候部撥用似未便專顧淮北將十數年前積欠之銀胥於目前代完而轉置淮南緊款於不問至協貼淮南銀三十六萬餘兩原經

奏明爲籌解京外帑利各項要需計上年解過京外帑利等銀一百十萬餘兩卽有動支前項協貼銀兩在內而南鹽融北課款有正有雜正款以票稅溢請之銀二十九萬八千餘兩按引抵補足額其雜款卽係京外帑利各項要需現有協貼銀三十六萬餘兩足應解支無庸復似前年另於淮南引內加攤雜課銀兩以故摺內聲明南鹽科則無所

增加并非那爲融銷南引之用亦非將協貼淮南  
之項抵補缺銷正課款目分明可爲覆按竊思淮  
南自定新章迄今數載凡所以輕成本而利轉運  
者臣與厯任運使遇事講求次第舉行實已不遺  
餘力無如鹽引疏銷遠在湖廣江西等省各督撫

臣凜遵

聖訓未嘗不整飭有加而鄰私侵灌殘鹽壅滯以致新  
舊引目積壓不下兩綱淮南勦力辦運僅足自存  
其本小累深者卽時有倒歇之處此懸引鉅萬所  
以加認無商而招募新充益復聞風裹足也然臣

自辛卯至丁酉七綱之中已報過奏銷六次復帶完已庚半綱而丙申丁酉兩綱又將乙未分帶課銀隨正報完候撥較之道光元年至十年爲止辛壬癸各銃半綱丙戌丁亥銃銷綱半已丑停運三分庚寅全綱停運十綱之中奏銷不足六綱猶復解款屢請扣留以爲在外歲支各用前後參觀似覺稍分贏絀實緣淮綱頽廢未易挽回不得不酌盈劑虛隨時通變於萬難措手之中爲竭慮綢繆之計始得以勉力奏銷疊次支持今戊戌奏銷二月卽須

題報查向來鹽課錢糧照州縣地丁之例按分計算  
淮南入奏正餉每一分十八萬兩有奇以南融北  
不過該銀二十九萬八千餘兩按分扣算不足二  
分定例鹽課考成欠一分以至五分鹽政運司均  
應罰俸至降職處分臣與運使受

恩深重卽捐糜頂踵未足云報又豈敢因處分有例避  
重就輕預爲二月奏銷地步惟是兩淮大局爲東  
南財賦所關遞年困敝情形久荷

聖明洞鑒此次融北二十二萬引不蒙

允准轉瞬奏銷報部卽少完二十九萬餘兩積存引目

又多懸二十餘萬道非獨現綱支絀卽下綱亦無  
可另籌再欲招募新商竊恐緩不濟急若更責成  
舊商迫呼孔迫必致衆情渙散一蹙而不可復振  
臣身肩鉅任豈敢敷衍目前不顧大局是融運淮  
北正所以疏引裕課并非不計及久遠總之兩淮  
舊例歷有融銷上屆籌融已蒙

俞允合無仰懇

天恩俯念淮南大局關係緊要仍准將戊戌綱課照依  
歷辦舊章融運淮北二十二萬引以清引課而副  
奏銷感荷

鴻慈實同再造據署運使沈拱辰具詳請

奏前來所有淮南引課融運淮北仍請照辦緣由理  
合縷晰陳明恭摺覆

奏伏乞

皇上聖鑒訓示謹

奏

道光十九年二月初五日奉到

硃批戶部再行核議具奏欽此道光十九年二月十五  
日准戶部咨道光十九年二月初五日奉

上諭前據陶澍奏請仍將淮南懸引融運淮北行銷當



交戶部再行核議茲據奏稱引目各有定界融銷并非正辦惟淮南素稱疲敝奏銷現已屆期姑准量爲轉移等語著照所請卽將戊戌綱懸引提出二十二萬道融於淮北行銷所有懸引銀按數抵補足額經此次格外調劑該督務將本綱應徵帶徵等項迅速掃數全完務於二月奏銷依限造報并妥速招商認辦懸引不得藉有融銷之案習以爲常致滋鬆懈

欽此

縷陳八年來辦理兩淮鹽務并報完銀數比較在前情形附片

再查兩淮鹽務爲東南財賦之區

國帑民生攸關甚鉅自嘉慶末年口岸滯銷商情困敝大局難支馴至道光十年鹺綱廢壞已一蹶而不可復振仰奉

特旨裁除鹽政改歸總督管理臣受事之初原知整頓維艱實與從新起造無異祇以渥承

高厚不敢避事畏難用是任怨任勞力圖報稱數年以來仰荷

聖明洞燭隨時

指示機宜如裁浮費散輪規禁私梟輕課本均能培養  
商力保固庫儲故自道光元年辛巳綱起至十年  
庚寅綱止十綱之中淮南商辦課運止有五綱七  
分而欠

帑之數積至一千九百八十餘萬今自道光十九年  
辛卯綱起至十七年丁酉綱止七綱之中已報過  
六綱奏銷而帶完乙未一綱亦納有三分之課除  
十八年戊戌一綱仰沐

天恩准將南課融北現經督飭運司趕辦奏銷即日截

數移交後任造報外通計已報部撥正款共銀八百八十四萬三千一百六十七兩九錢七釐仍有專案起解之織造銅斤河餉銀一百七十八萬四千二百七十三兩二分歷綱報解京外帑利各省鹽規匣費并解京節省濫斤變價共銀六百四十四萬二千三百八兩七錢八分九釐而在前統引借帑扣留等事八年來從未上瀆

宸聰且於正額之外完過已庚殘課新疆經費積欠濫價歸還墊款共銀三百二十七萬七千三百五十

八兩六錢三分皆辛卯以前歷前任所欠而帶完於辛卯以後此淮南歷綱課運之實情也又淮北自道光元年辛巳綱起至十年庚寅綱止十綱之中僅運及三綱四分有零其統銷停運融南各項多至六綱五分以外而十綱應完課銀二百七十一萬餘兩僅完銀七十萬四千餘兩實未完銀二百萬六千餘兩今自道光十一年辛卯綱起至十七年丁酉綱止七綱之中除徵足奏銷銀二百八十九萬七千二百七十六兩四錢九釐仍有專案起解之織造銀十五萬四千兩又代辛卯以前徵

完過已庚戌子殘課銀六十一萬六千六百四十  
六兩二錢一分四釐仍有溢完課項撥抵淮南懸  
課銀九十八萬九千四百七十五兩六錢五分五  
釐計按額溢徵銀一百六十萬六千六百二十一  
兩八錢六分九釐而戊戌本綱開局驗費已經收  
稅未解運庫銀兩尙不在此數內此又淮北改行  
票鹽徵收票稅之實情也以上淮南北正雜課款  
統計報完銀二千四百萬四千五百六兩六錢二  
分四釐在淮北改行票法輕本便民課額充溢實  
已大收成效惟淮南引地遠行湖廣江西等省一

切疏引緝私究屬鞭長莫及以致鄰鹽侵灌口岸  
滯銷新舊引張多形積壓每綱

奏銷僅完課八分有零雖下綱補足究非於本綱內  
十分全完而

帑利鹽規匣費等雜款因口岸緩納銀兩回課較遲  
報解亦稍從緩此則舊規未復深慙上負

恩知然臣體察情形實亦准綱頽廢未易挽回不得不

酌盈劑虛以期勉籌課運未敢操切從事轉使商  
情渙散全局難以支持至淮北票鹽或有以侵灌  
淮南爲詞者臣查道光元年至十年爲止淮北統

運不足三綱而銃銷停運融南各引共一百七十  
四萬四千餘道計此十年之內淮南銃銷停運之  
鹽亦卽有五百九十餘萬引彼時并未行票何以  
北引既經積存南鹽又復積滯可見南綱之疲乏  
非關北票之侵充而自改行票法以來淮北協貼  
淮南除本年現已徵存之三十數萬餘兩未據運  
庫報收外實計兩年之內共又代完南課銀九十  
八萬九千餘兩似乎轉移通變尙堪挹注度支  
國計所關不無裨補再查兩淮外支如辦貢辦公等  
款從前額徵銀七十萬兩仍須加徵不敷銀數十



萬兩今自道光辛卯年起或按綱列徵或隨時減  
完每綱核計支銷不出三十萬兩內外較之往年  
實已大有節省茲臣因病懇

恩開缺調理所有八年來辦理鹺務比較在前情形理  
合附片縷晰陳明伏乞

皇上聖鑒謹

奏

道光十九年三月二十一日奉到

硃批覽奏均悉欽此

陶文毅公全集卷十九目錄

奏疏 祀典 旌表

請將前明高攀龍從祀

文廟摺子

請將元沈壽三入祀忠義祠題本

請將前明許文瑾等入祀忠義祠題本

請將前明朱儀等入祀忠義各祠題本

請將前明馬應魁等入祀忠義祠題本

武進陽湖紳士查出未經

旌表之貞孝節烈婦女三千一十八口請建總祠致祭

題本

奏疏 祀典 旌表

請將前明高攀龍從祀

文廟摺子

奏爲請增

文廟從祀儒臣以崇正學仰祈

聖鑒事竊惟致治必資懋學繼往卽以開來

孔聖之道師表萬世而歷代端粹之儒亦得從祀

廟庭俾廣心傳典至重也茲據蘇州藩司賀長齡會同

臬司覺羅慶善詳據常州府無錫金匱兩縣紳士

秦大治華端翼陶沅廉志勳等呈稱明故都察院

左都御史謚忠憲高攀龍承晦庵之主敬師伊川  
之存心以險阻艱難爲體認身心之地其境愈難  
其學彌粹凡德業進修之地友朋麗澤之功見於  
所著三時困學諸記語錄會講等書操履涵養粹  
然一出於正死生榮辱確乎不動於中實爲理學  
之宗宜列先儒之祀伏乞詳題從祀

文廟等情由該府縣學取造事實冊結詳司核轉請  
奏前來伏查

欽定明史儒林傳序言正嘉以後篤信程朱不遷異說高  
攀龍其卓卓者又

御批歷代通鑑輯覽注載攀龍學本濂洛操履篤實涵養  
邃密粹然爲一代大儒又

欽定四庫全書總目載高子遺書十二卷其學以格物爲  
先講學語類多切近篤實闡發周密立朝大節不  
愧古人等語又查劉宗周文集稱古有朱子今有  
忠憲黃宗羲謂海內以高劉並推大儒可無遺議  
陸隴其亦謂古今有成德之師有興起之師成德  
之師砥礪磨礪造人材於粹精之地程朱是也興  
起之師廉頑立懦拔人心於陷溺之中高劉是也  
是皆以攀龍與宗周並稱比諸程朱考其生平持

身則主敬存誠立朝則直言正色卒能取義成仁  
不負所志其立說著書授徒講學皆宗經衛道足  
以模楷儒林恭逢我

國家昌明正學崇勵真儒明臣如劉宗周已荷

特旨從祀呂坤黃道周亦皆次第表彰仰邀

俞列兩廡高攀龍忠節旣樹人倫之鵠道德尤爲後學  
之宗似宜增入從祀以勵真修而端儒術除將送  
到事實冊結咨送部科外謹會同兩江總督

臣琦

善江蘇學政

臣

辛從益合詞恭摺具

奏伏乞

皇上聖鑒

敕部議覆施行謹

奏

道光六年五月二十七日奉到

硃批禮部議奏欽此



1. NEW YORK CITY

111

請將元沈壽三入祀忠義祠題本

題爲遵例查詳以彰忠義事據安徽布政使司布政使徐承恩詳稱據廣德州知州景文詳稱據生員韋文煥等呈稱查得圩鋪保沈上青等之祖沈壽三生於元季壯歲從軍集慶路屢破寇盜有功經御史大夫福壽薦爲行軍千戶元至正十六年明兵克金陵壽三率長子宏次子度血戰俱亡於宮水旁妻王氏聞信亦卽奔赴屍所自盡圩鋪方闕兩保立廟以祀屢昭靈顯實係忠義增軀懇請詳題以彰名節等情並據前任甘肅平羅縣知縣沈上

青同生員沈肇莘監生沈思泰民人沈于周等開  
呈伊族祖沈壽三行實原文出具切實甘結呈送  
譜牒前來查所呈事實內開壽三原名良佐字太  
初從軍後易名壽三時南臺御史大夫龐壽守集  
慶路壽三投軍常率兵破羣盜有功後有巨寇犯  
關壽三又率兵拒之大捷御史卽薦爲行軍千戶  
至正十六年三月二十四日明兵破集慶路壽三  
率其長子宏次子度戰死於宮水旁妻王氏聞之  
亦至宮水旁自盡時有吳嗣昌知其屍收歸骸骨  
家人合葬於茂祖墳山夫婦父子同穴壽三生於

元武宗至大元年戊申九月初八日巳時卒於元  
順帝至正十六年丙申三月二十四日酉時配王  
氏生於元武宗至大元年戊申五月十四日未時  
卒於元順帝至正十六年丙申三月二十四日酉  
時長子宏生於元順帝元統元年癸酉六月十三  
日子時卒於元至正十六年丙申三月二十四日  
酉時次子度生於元順帝至元元年乙亥四月二  
十九日午時卒於元順帝至正十六年三月二十  
四日酉時等情查核沈姓宗譜所載相同并據廣  
德州學正陸泰增訓導潘達南申稱據生員韋文

煥等呈報元臣行軍千戶沈壽三父子捐軀盡難  
等情檢查事實確加諮訪無異核看得元故行軍  
千戶沈壽三生本雋英仕當衰季効命早期於壯  
歲從軍克振其戎容四口全歸共積石城之怨一  
門巷戰難招烈士之魂在至正之年固莫下旌忠  
之命卽前明之世亦未褒勝國之賢尙書推成秩  
無文禮經重以死勤事揆諸祀典宜廣

皇恩相應將呈到事實開造冊結詳請核轉等情據此  
該廣德州知州景文核看得元故行軍千戶沈壽  
三父子捐軀盡難一案沈壽三弱冠從軍秉性忠

烈官授行軍千戶勇敢有爲屢破寇盜有功洵爲  
干城之寄迨順帝至正十六年三月二十四日明  
兵克集慶路御史大夫福壽殉節千戶沈壽三與  
子宏度巷戰死於宮水旁其妻王氏聞之亦自盡  
竊照浩然正氣立千古之綱常憫矣孤忠乃一生  
之烈節父子捐軀未遂英賢夙志全家被難方爲  
忠節雙全帥府從戎不意適遭陽九鄉邦捍禦乃  
能疊著神靈碧血丹心同河山而并永忠肝義膽  
偕日月以齊光闡發幽芳藉鄉評而允協表揚忠  
蓋訪輿論以僉孚在昔完全大節取義成仁於今

得邀

曠典垂名青史既據該紳耆等公稟出具切結并該學具詳前來理合造具事實清冊加具印結詳送核轉等情到司該安徽布政使司布政使徐承恩核看得廣德州元故行軍千戶沈壽三同妻王氏及長子宏次子度遇難死事捐軀盡節一案維沈壽三氣壯從軍志堅禦侮常有元之末造守集慶之偏隅器本干城僅作千夫之長勇雖拔幟忽當大敵之臨縱短戰之相交奈守陴之力竭軍容如墨捐軀莫濟當關汗血成渠畢命於茲報國於是于

從父死妻殉夫亡勵君臣父子之大經全孝弟忠  
貞之峻節惟時當兵燹史乘致闕夫表揚念世著  
精誠粉榆尙資其護佑今荷

恩綸採訪

聖澤汪洋稽以死勤事之文

褒嘉應及符有功于民之典饗祀宜隆查禮部則例內  
載一凡忠義孝弟之士題請

旌表直省府州縣衛各建設忠義孝弟祠一祠內立石  
碑題名其上身後設位祠中春秋祭祀又載遇難  
死事之臣曾入昭忠祠者仍准於本邑忠義孝弟



祠內設位致祭無庸建坊又例載遭寇殉難紳士庶民令該督撫轉飭該地方官於本邑忠義孝弟祠內設位致祭并題名於石碑俾得留傳永久又例載凡婦女遭寇守節致死雖事歷年久該地方官查核確實准補行題請

旌表有親屬者令地方官給銀三十兩聽其自行建坊節孝祠內設位致祭各等因遵奉在案今廣德州已故元行軍千戶沈壽三同長子宏次子度捐軀殉難忠烈可嘉核與崇祀本邑忠義孝弟祠之例相符其沈壽三之妻王氏聞信亦卽奔赴屍所捐

軀殉烈宜沐

旌揚既據該州并學查明宗譜行實輿論愈符取造事實冊結詳送前來相應加看轉詳鑒核具

題以闡幽光等情轉詳到臣該臣看得廣德州元故

行軍千戶沈壽三同妻王氏及長子宏次子度殉

難捐軀一案沈壽三偏裨受職卻毅雖僅佐中軍

慷慨從戎孝德實能摧強寇蒼鶩已兆真人來濠

上之師流水鳴哀主將殉南臺之節大厦之一木

難支猶撐勁骨狹巷之短兵相接豈戀餘生狼曠

正獲其死所之時解揚克遂其致命之願且名駒

盡喪均以孝於親者忠於君寡鵠堪悲亦以殉其  
夫者報其國靈存雙廟蹟比張巡烈萃一門事同  
余闕雖紅羊換劫前代未題竹帛之名而碧血成  
燐至今猶護粉榆之社宜荷

旌揚之鉅典俾邀俎豆之榮光查例載忠義孝弟之士

題請

旌表直省府州縣衛各建設忠義孝弟祠一祠內立石  
碑題名其上身後設位祠中春秋祭祀又載遇難  
死事之臣曾入昭忠祠者仍准於本邑忠義孝弟  
祠內設位致祭毋庸建坊又載遭寇殉難紳士庶

民令該督撫轉飭該地方官於本邑忠義孝弟祠內設位致祭并題名於石碑俾得留傳永久又例載凡婦女遭寇守節致死雖事歷年久該地方官查核確實准補行題請

旌表有親屬者令地方官給銀三十兩聽其自行建坊節孝祠內設位致祭各等因茲查元故行軍千戶沈壽三并其長子沈宏次子沈度捐軀殉難忠烈可嘉核與

題請入祀忠義祠之例相符其沈壽三之妻王氏聞信亦卽奔赴屍所自盡洵屬節烈堪嘉應請

旌表給銀建坊於節孝祠內設位致祭除冊結送部查

核外臣謹會同協辦大學士兩江總督臣孫玉庭

安徽學政臣徐頌合詞具

題伏乞

皇上聖鑒敕部議覆施行爲此具本謹題請

旨

道光三年十二月十八日奉

旨依議欽此

附三孝公三傳卷一十

請將前明許文瑾等入祀忠義祠題本

題爲遵例詳請以彰忠義事查接管卷內

臣

於藩司

任內具詳據徽州府程懷璟詳據祁門縣知縣張  
進南詳稱准儒學教諭錢師康訓導吳賀繪牒稱  
據進士鄭繩祖等呈爲遵諭呈明叩恩詳請以彰  
忠義以勵風教事竊惟人道以綱常爲重祀典以  
忠孝爲先是以烈士捐生獲邀榮於異代

聖朝釐典必褒卹乎前朝况乎顏氏弟兄標節義於千  
載下家父子萃忠孝於一門斯固古今所罕觀而  
爲

聖代所必嘉者也伏見本邑前明太學生許文瑾郡庠  
生許文玠簪纓世胄詩禮名宗孝友著於家庭忠  
義根乎天性戎韜素習百萬羅胸弓馬夙嫻千人  
辟易乃者明祚將終寇氛橫熾烽煙蔽日爭逐鹿  
於中原篝火飛沙肆鳴狐於徧野維茲下邑最爾  
孤城民無環胄之威地乏守關之險時有流寇數  
百人假勤王之號如虺如蛇逞掠野之兇爲梟爲  
獍二公心存保障寄任干城築百雉以登障募千  
人而制梃破黃巾於伏莽殲厥渠魁縱赤壁之火  
攻焚其巢窟此其義聲馳於六合勇譽冠乎三軍

已足俎豆枌榆馨香奕禩者矣及乎軒弓遽逝殷  
鼎忽遷羣公有靈武之謀少帝無瑯琊之畧君臣  
荒佚藩鎮騁騷維時我

朝應

天起運靖逆安民元牡陳壇赤烏流屋天戈南指八州盡  
入乎版圖露布呈馳五等同歸乎璽綬然而姬宗  
受命西山有孤竹之薇漢室開基東海有田橫之  
島雖跖犬昧尊堯之義實哀鵠同望帝之心時則  
我郡有金正希名聲者糾鄉旅以團兵抗

王師而逆命揭竿斬木計出倉皇哀雁嗥猿悲成慷慨爰



以二許公功高銅馬會迅掃乎鯨鯢望重長城請  
運籌於幃幄二公手持尺劍身入孤營旌旗見牙  
纛之威號令肅銀刀之隊三郊三遂張南北之兩  
軍一弟一兄分左右之二拒我

朝於是麾白旄而陳野呼蒼兕以渡河指揮而林壑震  
驚叱咤則川源駭盪藐爾彈丸之地頓失雄關猝  
然新合之兵豈當勁旅於是文瑾明知回天無力  
遂乃止水爲心誓效死以當鋒爰分軍爲犄角棠  
君別弟灑淚分幫周處絕援褰瘡入陣未幾果與  
金聲先後被執並解金陵南入臨刑張巡呼爲男

九二九 十十七七-187

子甄生受刃元稹嘆爲布衣於時文玠軍挫池陽  
身奔閩越文信國之扁舟航海無處求生蔡子英  
之單騎出關忽焉流涕崎嶇險阻收一旅之遺兵  
感憤暗鳴作三軍之勇氣而零星殘卒莫禦龍驤  
四壁楚歌空悲騅逝浩亭一戰先亡諸葛之兒石  
頭千年尙識袁公之子蓋其長子生佳戰死於陣  
而文玠亦散軍受縛矣嗟乎崖山莫返已非宋室  
之山河廣武相持徒苦江東之子弟文玠以爲  
天命有歸尙弊蒼生於百戰曷若臣心已竭獨留碧血於  
千秋此則植節盡倫既不渝乎金石成仁取義更

無愧於聖賢者也今者

帝網恢張

天閭眈蕩屬勝朝之孤孽有善必褒凡薄海之幽潛無  
微不聞是以我郡之金太史曾邀

賜諡之榮而本邑之馬孝廉復被

旌忠之典繩祖等夙欽大節素重鄉評爲此確查開陳  
事實粘結呈請申詳崇祀忠義庶使節義一門增  
蘿石山川之色丞嘗百代勵古今臣子之心闔邑  
幸甚等情據此該儒學教諭錢師康訓導吳賀繪  
覆查無異會看得前明太學生許文瑾郡庠生許

文玠忠謀社稷義炳日星值國政之不綱慮兵氛  
之告警應募則千夫聽命任寄干城守陴而百堵  
防奸功資保障於時

天戈震電海鏡澄波率士臣民寰區已臻乎大定偏隅孤  
孽小草自效其愚忠邀結外援拒

王師而逆命奔馳堅壁率義旅以圖功卒之螳臂空張雉  
垣莫守兄則金陵就戮甘殉難以捐軀弟又閩越  
奔亡竟散軍而受縛綜其節概並爲一代之完人  
樹厥綱常不愧千秋之大義允宜邀

旌忠之鉅典荷

蜀文段公全集

卷十九

奏疏

三

賜祀之殊榮爲此遵例取造冊結加看請轉等因到縣  
准此該祁門縣知縣張進南核看得前明太學生  
許文瑾郡庠生許文玠性秉孤忠心如鐵石當兵  
氛之告警任捍衛於一身授衆登陴遠近於焉待  
命折衝禦侮鄉里賴以甯安跡其抗拒

王師要亦無改貞操兄旣金陵就戮弟亦閩越捐軀雖紆  
難守真志乘未詳其事實而舍生取義心跡實協  
夫輿情似宜仰沐

皇恩崇祀忠義茲准儒學牒報前來卑職覆核無異理  
合加結具文詳請核轉等情到府據此該徽州府

知府程懷璟核看得祁門縣前明太學生許文瑾  
郡庠生許文玠身列文垣胸羅武庫值國維之政  
墮願效蟻忱迨

天旅之威臨猶當螳臂兄旣金陵就戮弟亦閩嶠捐軀竭  
草莽之孤忠無虧臣節凜綱常之大義克樹人倫  
宜沐

皇恩聿昭祀典茲據該縣准學牒送冊結前來覆核無  
異理合加看詳送核轉等情到司據此臣於藩司  
任內核看得祁門縣前明太學生許文瑾郡庠生  
許文玠韜畧羅胸忠忱貫日生民政失綱之日處

賊氛不靖之區，擐甲一呼，伏莽免乘墉之厄，麾軍再戰，居民成安堵之形，迄乎

天命有歸

王師無敵，螳奮當車之臂，慷慨與戎魚成，入釜之哀，後先殞命，而文玠長子許生，佳者戰死，行間克從父志，凜綱常於千古，萃忠孝於一門，跡其抗拒我行，雖昧吠堯之見，律以各忠所事實，同望帝之枕，洵係孤忠允符

祀典，伏查禮部例載：遇難死事之臣，曾入昭忠祠者，仍准於本邑忠義孝弟祠內設位，致祭，毋庸建坊。

又查例載凡殉難紳士庶民令該督撫轉飭地方官於本邑忠義孝弟祠內設位致祭並題名于石碑俾得留傳永久又查乾隆四十年十一月初十日欽奉

上諭賜諡明末殉節諸臣原案恭讀

諭旨內載或死守城池或身殞行陣與夫俘擒駢轡視死如歸者爾時王旅徂征自不得不申法令以明順逆而事後平情而論若而人者皆無愧於疾風勁草卽自盡以全名節其心亦并可矜憐又載而諸人茹苦相從舍生取義各能忠於所事亦豈可令其湮沒不彰自宜稽



考史書一體旌謚其或諸生韋布及不知姓名之流並能慷慨輕生者議謚固難於概見亦當令俎豆其鄉以昭軫慰等因欽遵在案今肅門縣前明殉難之太學生許文瑾郡庠生許文玠與明季左僉都御史休寧金聲同時抵拒

王師於順治年間先後俱在金陵就戮盡忠檢查庫貯歷代通鑑輯覽金聲已於乾隆四十年邀

恩賜謚而許文瑾等乃諸生韋布當時不無漏報以致湮沒未彰現據該府縣學詳請崇祀到司因事隔多年旋卽弔查切實證據並志書核辦行據肅門縣

詳覆業經進士鄭繩祖等呈明縣志修自康熙年間凡禦敵流賊者自可載及若抗我顏行彼時方指爲擒俘逆犯孰敢大書特書志其不朽是以府縣志書未經載入迨至

高宗純皇帝擴天地爲公之量凡明季臣僚俘擒不屈而能殉節者念其各忠所事曲加崇獎自此許氏紀述始行刊傳各等語尙屬實在情形並據該地方官查有先年名士陳二典所撰贈言紀畧可徵又有許文玠家屬變產入官之印收爲據檢齊呈驗前來是其盡忠事蹟已屬確鑿無疑旣經該府縣

學查明取造冊結由縣加粘印結鈔錄明臣

**賜諡原案詳請崇祀本邑忠義祠核其事例相符至郡庠**

生許文玠事實冊造該生長子許生佳年十八歲  
戰死於陣亦有紀述可證現據該縣學聲稱許生  
佳身殞行陣亦與入祠之例相符並請附祀以彰  
忠義等情似可共沐

皇恩俾昭軫慰相應將送到冊結加看轉詳鑒核具

題以闡幽光等情轉詳到前撫臣孫爾準因調任福  
建巡撫卸事未及核

題移交到臣該臣看得祁門縣前明太學生許文瑾

郡庠生許文玠幼讀儒書兼通武畧遭逢國難手  
無執戟之權捍衛鄉關力掃乘墉之寇募千人爲  
隊伍作下邑之干城迄乎殷社已墟

天戈底定遂乃軍分犄角敢抗顏行迄乎繫絕苞桑猶鳴  
孤掌涪亭飲血幸諸葛之有兒鍾阜就擒哀棠君  
之別弟爲君爲父忠孝一門難弟難兄綱常萬古  
雖蹈犬豚尊堯之見無道則愚而精衛有填海之  
心舍生取義久協

旌忠之例宜邀

賜祀之榮查例載忠義孝弟之士題請

旌表直省府州縣衛各建設忠義孝弟祠祠內立石碑  
題名其上身後設位祠中春秋祭祀又載遇難死  
事之臣曾入昭忠祠者仍准於本邑忠義孝弟祠  
內設位致祭毋庸建坊又例載凡殉難紳士庶民  
令該督撫轉飭該地方官於本邑忠義孝弟祠內  
設位致祭並題名於石碑俾得留傳永久各等因  
所有祁門縣前明太學生許文瑾郡庠生許文玠  
及文玠之長子許生佳等捐軀殉難節烈可嘉核  
與

題請入祀忠義祠之例相符經臣於藩司任內查明

取造事實冊結具詳前撫臣孫爾準因調任福建  
巡撫卸事未及核

題移交到臣確加覆核無異除冊結送部查核外臣

謹會同協辦大學士兩江總督臣孫玉庭安徽學

政臣徐頴合詞具

題伏乞

皇上聖鑒敕部議覆施行爲此具本謹題請

旨

道光三年七月二十七日奉

旨依議欽此



請將前明朱儀等入祀忠義各祠題本

題爲一門忠烈詳請入祠事據安徽布政使司布政使徐承恩詳稱據寧國府知府郭承恩詳據涇縣知縣陶登瀛詳稱准儒學教諭史炳訓導汪道平牒稱據翰林院編修吳敬恒刑部主事翟發宗等呈稱查得明故四川嘉定州知州朱儀崇禎庚辰特用榜進士出守嘉定州課最行取將次入都會流賊張獻忠寇蜀儀登陴固守旣而賊兵分陷郡縣嘉定被圍勢窮力竭儀謂其子命錫曰人生大節無過君親今時勢孔棘豈可屈於不義命錫唯



唯承教儀妻胡氏奮然曰丈夫死忠妾獨不能死  
節乎遂以金簪刺喉昏仆復甦又自以指抉創須  
臾命絕儀朝服北向再拜命外舉火與子命錫及  
胡氏之尸同時俱毀事詳嘉定府及寧國府涇縣  
諸志竊思朱儀當寇兵猝警不因報最以棄其民  
及城郭云危尙援大義以訓厥子滿腔熱血竟殞  
命於秆菅一寸丹心幾同埋於灰燼此允合

盛世褒嘉之典應請入忠義祠者也至於儀妻胡氏德  
秉坤貞心同日儼遇寇而先夫殉難允推巾幗所  
難能臨危而爲國捐軀實屬艱貞之奇節儀子命

錫年方及冠志已獨堅承父命而移孝作忠旣不愧箕裘肖子遇國難而舍生取義更無忝忠蓋完人此又均合

熙朝旌恤之條應分祀節孝忠義各祠者也爲此鈔粘嘉定府志并寧國府涇縣二志所載朱儀夫婦及子命錫各事實加具族隣各結伏乞詳請分入各祠俾得仰荷

皇恩而下安毅魄感切上呈等情到學據此該儒學教諭史炳訓導汪道平會查得前明四川嘉定州知州朱儀制科特選邊徼分符值蛾賊之環攻奈蚍

附 卷之三十一  
援之外絕孤城効死盡室捐生齒齧成灰毅魄遠  
追夫魯郡血藏化碧英靈近接於資中千古蓋臣  
於茲爲烈儀妻胡氏身先夫死禍同慘於磨笄志  
憤國仇節比堅於化石視清風嶺爲尤峻信彤史  
氏所當書儀子命錫以終軍棄繻之歲有胡威問  
絹之風倉猝趨庭從容赴火能執戈以衛社稷童  
汪疇且欲勿殤甘并命以報君親卞忠貞可云有  
子應照例請

旌入祀忠義之祠其妻胡氏及子命錫亦宜一體邀  
恩分入節孝忠義各祠以廣

皇恩而飭倫紀茲據該族隣等開具事實切結公籲前來覆查無異合行加看造具冊結送轉等情到縣准此該涇縣知縣陶登瀛核看得前明四川嘉定州知州朱儀丹山馳譽赤縣分符值蟻衆之憑凌慨螳封之欲陷書生未能平賊心只懷丹將軍性解斷頭血都化碧登陴誓衆難回東郭之烽闔戶捐軀同赴昆陽之火况乎磨笄矢列陸夫人地下相從荷戟偕亡卞公子關中殉難忠孝傳爲繼述節義著於唱隨載稽志乘之褒揚宜受

盛朝之

旌祀茲准儒學移送事實冊結前來覆查無異理合加  
看加結詳送核轉等情到府據此該寧國府知府  
郭承恩核看得涇縣前明四川嘉定州知州朱儀  
少登黃甲壯綰邊符教養有方士民愛戴已政行  
之報最值流寇之頻臨爲國捐軀忠誠貫日正衣  
冠而赴火慷慨捐生囑妻子以相從從容就義儀  
妻胡氏磨笄矢烈先夫隕身儀于命錫堅志借亡  
同父殉難忠孝節烈萃於一門允垂志乘之光宜  
沐

旌揚之典理合加看同送到各冊結具詳核轉等情到

司據此該安徽布政使司布政使徐承恩核看得  
涇縣前明四川嘉定州知州朱儀義重綱常志存  
保障仕明祚衰微之日處寇氛橫熾之區蕞爾孤  
城竭盡當關之力彈丸邊境悲無擐冑之威蹈烈  
火而焚身孤忠獨矢勵義方以勗子毅節相承其  
子朱命錫同捐軀於煨燼視死如歸凜庭訓於倉  
皇克從父志斯旣父忠子孝抑且夫唱婦隨儀妻  
胡氏一聞死難之言先刺喉而殞命夙凜從夫之  
義甘矢節以殉身千古芳徽炳垂志傳一門忠孝  
光耀寰區宜荷

恩綸聿昭祀典伏查禮部則例內載遇難死事之臣曾  
人昭忠祠者仍准於本邑忠義孝弟祠內設位致  
祭毋庸建坊又例載遭寇殉難紳士庶民令該督  
撫轉飭該地方官於本邑忠義孝弟祠內設位致  
祭並題名於石碑俾得留傳永久等因又例載婦  
女遭寇守節致死雖事歷年久該地方官查核確  
實准補行題請

旌表有親屬者令地方官給銀三十兩聽其自行建坊  
如無親屬卽令地方官於該氏墓前建坊節孝祠  
內設位致祭各等因遵奉在案茲涇縣前明四川

嘉定州知州朱儀遭張獻忠寇川城陷固守不屈  
同子朱命錫自焚而死均屬忠節可嘉現據該府  
縣學查明郡邑志書所載事蹟詳請崇祀本邑忠  
義孝弟祠核與例案相符至朱儀之妻烈婦胡氏  
從夫殉節亦與婦女遭寇致死准其

旌表之例相符并請

旌揚照例給銀建坊入祀節孝祠以彰潛德相應將送  
到事實各冊結轉詳鑒核具

題等情轉詳到臣該臣看得涇縣前明四川嘉定州

知州朱儀志篤忠誠家傳孝義值蟻賊鴟張之會



正蠶叢瓦解之時登陴力竭難揮落日之戈報國  
心堅甘燼然岡之玉其妻胡氏先時絕吭貞心更  
礪於磨笄其子命錫相繼焚身肖子克成於蹈火  
當日成仁取義早具魯公奮爪之心今茲發隱闡  
微彌昭卞氏全家之烈允符成例宜荷

旌揚查例載忠義孝弟之士題請

旌表直省府州縣衛各建設忠義孝弟祠一祠內立石  
碑題名其上身後設位祠中春秋祭祀又載遇難  
死事之臣曾入昭忠祠者仍准於本邑忠義孝弟  
祠內設位致祭毋庸建坊又載遭寇殉難紳士庶

民令該督撫轉飭該地方官於本邑忠義孝弟祠內設位致祭並題名於石碑俾得留傳永久又例載凡婦女遭寇守節致死雖事歷年久該地方官查核確實准補行題請

旌表有親屬者令地方官給銀三十兩聽其自行建坊如無親屬卽令地方官於該氏墓前建坊節孝祠內設位致祭各等因茲查涇縣前明四川嘉定州知州朱儀遭張獻忠寇川城陷固守不屈同子朱命錫自焚而死均屬忠節可嘉核與

題請入祀忠義祠之例相符至朱儀之妻烈婦胡氏

從夫殉節亦與婦女遭寇致死准其

旌表之例相符應請

旌表給銀建坊於節孝祠內設位致祭除冊結送部查

核外臣謹會同協辦大學士兩江總督臣孫玉庭

合詞具

題伏乞

皇上聖鑒敕部議覆施行再照安徽學政臣徐頌因病

開缺所有印務係臣兼署毋庸會銜合併陳明為

此具本謹題請

旨

平定縣志卷之十一

道光四年四月十四日奉

旨依議欽此



109 卷之六

請將前明馬應魁等入祀忠義祠題本

題為詳請崇祀入祠以彰忠義事據安徽布政使司

布政使徐承恩詳稱案於道光二年十二月三十

日奉准禮部咨儀制司案呈據安徽銅陵縣人戶

部七品京官何繼遵等為呈請

旌表以慰忠魂而維風化事職等謹按明末貴池縣殉

節最著者五人除推官吳應箕已蒙

賜諡崇祀外有馬應魁汪思誠兩副將從前明閣部史可

法殉節揚州事詳明史并載

御批通鑑輯覽參將程宗熹亦殉節揚州事載池州郡志

又有桂王將曹大鎬殉節廣信亦載明史與

御批通鑑輯覽伏思此四人祀典久曠令名未加職等語

其枌榆之社思揚蘅杜之芬爲此呈叩恩准請易  
名之典定崇祀之文或兼配享閣部之祠或同祔  
主鄉賢之座庶使神靈妥侑黍餘明德之馨且看  
頑懦奮興草慕疾風之勁等情具呈前來查例載  
凡遭寇殉難紳士庶民令該督撫轉飭各該地方  
官於本邑忠義孝弟祠內設位致祭并題名於石  
碑俾得留傳永久等語今據戶部七品京官何繼  
遵等爲馬應魁等殉難呈請

201-3 364 . 07

旌表到部相應鈔錄原開節畧行文該撫查明該副將  
馬應魁汪思誠參將程宗熹桂王將曹大鎬殉難  
事蹟是否與該員等呈報相符如果屬實卽行取  
具事實冊結送部仍由該撫照例具題到日再行  
核辦可也等因咨院行司轉飭該府縣查明該員  
等殉難事蹟詳題去後茲據署池州府知府劉湜  
詳據貴池縣知縣漆日榛詳准儒學教諭馮秉桓  
署訓導鄭昭牒稱儒童曹序賓等呈稱奉查身祖  
曹大鎬殉節事實會載明史及

御批通鑑輯覽池州郡志茲復謹將家乘所載事蹟逐一



呈明粘叩詳覆又據廩生汪龍翔等呈稱奉查前  
明殉節汪思誠事蹟生等查得汪思誠無嫡派子  
孫亦無祠譜家乘可考今於貴池縣志查取事蹟  
粘懇鑒核轉詳又據民人程聖貴呈稱身八世伯  
祖宗熹爲明閣部史可法麾下參將每戰有功尋  
從可法殉節揚州事詳郡志應請鑒核又據儒童  
馬逢恩等呈稱奉查身伯高祖馬應魁殉節事蹟  
今謹鈔粘呈請鑒核申詳各等情到學并出具結  
狀前來該儒學教諭馮秉桓署訓導鄭珧查看得  
前明副將馬應魁志勵捐軀心存報國彫弧膽落

收回士卒之心鐵甲芒寒灑徧將軍之血汪思誠  
權謀自負義烈爲懷構奇計於蕭帷未甘市隱結  
深恩於幕府肯獨生全參將程宗熹墨榜書名牙  
璋作鎮新息侯從征有志已拚馬革還屍杞梁殖  
載甲無功遂使城隅飲泣桂王將曹大鎬家風顏  
閔志節夷齊血濺章江擬信國浩歌之日魂招秋  
浦是鮑信歸葬之時凡茲忠烈遺模悉合

旌揚大典理合造具諸殉節事實清冊加具印結一併  
移送到縣該貴池縣知縣漆日榛查看得前明副  
將馬應魁汪思誠參將程宗熹桂王將曹大鎬類

皆胸藏韜畧氣奮風雲勇冠三軍忠義大書白甲  
奇宗八陣智術早勵丹心梅嶺招魂死後還隨烈  
婦章江得句生前久許完人雖在野在官託始各  
殊事業而立功立德捐軀均屬忠貞迄今里巷稱  
揚宜荷

朝廷旌獎茲准儒學牒送冊結前來理合加結詳送核  
轉等情到府該署池州府知府劉湜查看得前明  
副將馬應魁志篤忠貞氣誠果勇巡村射敵威倅  
三箭天山戰巷捐軀香并一坏梅嶺副將汪思誠  
書窺七畧胸有千秋帷幄參謀類束張巡之藁

場効命遂餐光弼之刀參將程宗熹會遭國難克  
勵臣忱伏劍死綏不愧將軍之號投繯縊樹并傳  
烈婦之名桂王將曹大鎬傳家孝友與國存亡急  
難悲歌猶重鶴鴿之誼從容就義豈懷薇蕨之高  
俱敦忠烈之風宜荷

旌揚之典茲據該縣遞看加結前來合將送到冊結詳  
送核轉等情到司該安徽布政使徐承恩查看得  
貴池縣前明副將馬應魁汪思誠參將程宗熹桂  
王將曹大鎬心存忠義時際艱危或白甲從軍身  
殲巷戰或丹誠決計血染輿尸或埋骨梅岡死節

有同心之婦或抗懷章水悲吟偕殉難之兄類皆  
殺身成仁捐軀就義事蹟悉昭於志乘遺徽宜沐  
夫

旌揚查例載殉難紳士庶民令該督撫轉飭該地方官  
於本邑忠義孝弟祠內設位致祭並題名於石碑  
俾得留傳永久各等語相應將送到冊結詳送核  
題等情到臣該臣看得貴池縣前明副將馬應魁汪  
思誠志切綱常曾懷義烈識將軍於部曲素具韜  
鈴聽節制於元戎特鳴慷慨大旗日落獨堅授首  
之心敝甲光寒猶耀精忠之字明參將程宗熹值

邢水之無援血灑梅岡洵無慙於科目桂王將曹  
大鎬赴章門而就義詩懷棗萼更不愧於同心此  
皆丹忱夙稟各遂臨危授命之心况俱青史堪徵  
宜邀

聖代褒忠之典查例載殉難紳士庶民令該督撫轉飭  
該地方官於本邑忠義孝弟祠內設位致祭并題  
名於石碑俾得留傳永久各等語茲查前明副將  
馬應魁汪思誠參將程宗熹桂王將曹大鎬俱捐  
軀殉難節烈可嘉茲准禮部咨查當經飭查事蹟  
去後今據該府縣學取造冊結前來核與

題請入祀忠義祠之例相符除冊結送部查核外

臣

謹會同協辦大學士兩江總督

臣

孫玉庭安徽學

政

臣

張麟合詞具

題伏乞

皇上聖鑒敕部議覆施行爲此具本謹題請

旨

道光四年閏七月十六日奉

旨依議欽此

武進陽湖紳士查出未經

旌表之貞孝節烈婦女三千一十八口請建總祠致祭

題本

題爲節孝久淹補請

旌表事據蘇州布政使賀長齡詳稱據常州府武進陽

湖兩縣紳士趙懷玉等赴撫院衙門呈稱嘉慶二

十五年欽奉

恩詔內載滿漢孝子順孫義夫節婦該管官細加訪確  
造具事實奏聞禮部核定以憑旌表等因伏查武進

陽湖兩邑凡貞孝節烈婦女勵志冰霜既有年例



可憑又屬鄉閭共見其志最苦其守尤奇急宜先  
加採訪爰於道光元年正月起廣爲搜採共計得  
三千十八口其中或係子孫務農服賈不知

旌揚之典或係該婦女清操苦志不求褒獎之榮或後  
嗣式微或鄉閭僻處以致數百十年來苦節久淹

查請

旌條例必取具里鄰親族人等切結及該節婦事實清  
冊送部今該節婦等均係奇苦節行阨窮堪憫或  
經諮訪族鄰異口同聲或已修入兩邑志書及潛  
德錄內祇因爲數過多未敢按名請給坊銀可否

建立總坊將各節婦姓氏盡數鐫刻以垂永久伏  
候裁示等情奉批蘇州布政司查明妥議通詳察  
奪等因并據該紳士等赴督學院衙門具呈均奉  
批司確查例案詳辦當經前司廉敬行府飭縣移  
學訪查該節婦等均係飲冰茹蘗苦志彰聞洵大  
節之無虧亦輿情之悉協卽據該紳士等呈請自  
建總坊以垂不朽似屬可行造具各節婦姓氏清  
冊由縣府覆核加看具詳到司經前司誠端核議  
轉詳奉前任撫院張師誠以該節婦等均歷數百  
十年該紳士等以苦節久淹欲求闡揚意屬可嘉

但建立總坊登載數千姓氏字跡細小易於漫滅  
不如購屋數椽作為節孝貞烈之祠設立扁額橫  
牌刊刻姓氏得以益垂久遠亦足以慰幽魂而勵  
風教如能捐貲購屋即為入

告飭再悉心妥議詳覆等因到司轉飭妥議詳辦去  
後嗣據署武進縣知縣胡先達會同陽湖縣知縣  
張世桐詳稱飭據該紳士等公同集議於郡中節  
孝祠對面買地一區趕緊建造業已建屋三進繪  
具祠圖呈請詣勘到縣當經會同履勘其屋俱高  
深寬潤規模宏敞堪垂久遠等情具詳到司當經

覆核轉詳奉批再行妥議詳辦遵經轉飭核議去  
後茲據武進縣知縣周錡會同署陽湖縣知縣溫  
綸湛詳稱會看得武陽兩邑貞孝節烈婦女三千  
一十八口均係冰雪爲心松筠成性養生送死各  
盡其誠守志撫孤備嘗其苦或捐軀以取義或殉  
命以成仁雖事遠年湮尙有可憑之月旦而芳型  
懿範宜無不發之幽光現經該紳士左輔等捐貲  
建祠春秋致祭誠屬急公好義堪爲世道楷模相  
應據情轉詳等情由府核議詳司據此伏查該節  
婦等俱係青年矢志白首完貞允爲巾幗之型尙

乏馨香之薦今該紳士等憫其苦節表厥幽光捐  
貲建祠春秋致祭實屬善舉相應據情詳請具

題等情到臣據此該臣查得武進陽湖兩縣紳士具

呈貞孝節烈婦女二千一十八口捐貲建祠一案  
緣該節婦等性堅金石節凜冰霜或守義於終身  
或全貞於白首或未婚而殉烈或少寡而捐軀洵  
大節之無虧亦輿情之悉協既據該紳士等詳查  
志載確訪鄉評其未經請

旌之貞孝節烈各婦女共有二千一十八口皆係苦節  
奇行阨窮堪憫似應推廣

皇仁補請

旌表以勵風俗而慰貞魂第人數衆多未便分別建坊  
請照總坊之例酌給銀三十兩令該紳士等於捐  
建節孝祠外總建一坊以垂不朽出自

皇上天恩臣謹會同兩江總督臣琦善江蘇學政臣辛

從益合詞具

題伏乞

皇上聖鑒敕部核覆施行謹題請

旨

道光七年七月十八日奉

奏疏

附錄卷之三十一

三

旨依議欽此

陶文毅公全集卷二十目錄

奏疏 科場

請復考試教習舊例摺子

會同江督陳奏耆紳重遇鹿鳴摺子

會同江督陳奏耆紳會榜重逢請與

恩榮筵宴摺子

耆紳會榜重逢請與

恩榮筵宴摺子

耆紳重遇鷹揚懇請與宴附片



1836/05

奏疏 科場

請復考試教習舊例摺子

奏爲請復考試教習舊例以杜牽混而專訓課事竊  
惟八旗各學教習向由禮部奏請

欽派閱卷大臣會同監試御史糊名扁試秉公甄錄投  
考則有印結以防冒倩已取則加覆試以對筆蹟  
所以重訓課而嚴弊混法至善也自嘉慶十七年  
禮部議改於鄉會試落卷內挑取將考試教習之  
例停止遂至辦理參差多有格礙伏查各學教習  
之設原以教養八旗子弟非祇爲應試人員增一

出身之路也其間自不容有曠學之時從前考試多係留京諸生有志赴考是以一經取錄卽在部候缺至鄉會試挑取則揭曉未經中式紛紛回籍者多且有視爲小就而不願留或身病親老而不能留遇有缺出每至傳補無人一傳不到至於再傳再傳不到至於三傳三傳不到始傳其次應補之人而其人又或屢傳不到輾轉遷延經時歷月則八旗子弟之曠學者多矣而且挑取各卷多有已取教習謄錄及在各衙門行走之員禮部拆閱彌封時例應扣除如癸酉鄉試所挑教習五十名

經禮部扣除三十三名榜中填列者僅十七名期  
閱三年人數難敷於是有越次傳補及別項借補  
之事書吏得以從中作弊而物議亦自此滋矣竊  
思禮部改考取教習之例於落卷挑取名曰防弊  
實爲省事起見不知考試各有用處教習之與舉  
人進士事不相侔豈宜省爲一場致滋牽混至若  
防弊之法則凡考皆不能無弊不獨教習爲然司  
事者宜因考而防弊不宜因弊而廢考况乎貢監  
試卷向例祇戳印皿字號今因挑取教習不能以  
援例之貢監充選又於卷面別印正字則冊籍旣

繁辨識尤易似於防弊之法反覺有疎也現距丙子鄉試之期尙遠人數無多將來又不免有越次傳補及別項借補之事恐滋弊混應請

旨飭復舊例仍行考取之法俾八旗官學不致懸缺待人各學生得以勤習功課於

國家教育八旗之典方爲有名有實臣管見所及伏

乞

皇上訓示施行謹

奏

嘉慶二十一年正月二十九日具奏本日奉

硃批大學士軍機大臣英和劉鏞之會同該部議奏欽  
此

陸奥の事  
卷之二

三

會同江督陳奏耆紳重遇鹿鳴摺子

奏爲耆紳重遇鹿鳴懇

恩與宴以昭

盛典仰祈

聖鑒事竊據江蘇布政使梁章鉅詳稱原任兩廣總督  
緣事革職嗣補兵部武選司主事吳熊光江蘇昭  
文縣人現年七十九歲於乾隆三十三年由附貢  
生中式戊子科順天鄉試舉人壬辰科會試挑取  
中正榜引

見以內閣中書用在軍機章京上行走游陞通政司參議



嘉慶二年

恩加三品卿銜在軍機大臣上行走補放直隸布政使擢授河南巡撫湖廣總督八年三省教匪平定

賞太子少保銜調任直隸總督旋調兩廣總督十三年因  
暎咭喇兵船進口辦理不甚妥協革職發往伊犁  
効力十五年蒙

恩釋回奉

特旨以六部主事用補授兵部武選司主事請假回里修  
塋嗣因患病在籍調理今屆道光八年戊子科鄉  
試距該員中式舉人之年正值花甲一周與重宴

鹿鳴之例相符懇請就近在本省與宴等情詳請  
具

奏前來臣等查吳熊光自弱冠登科之後久依

禁近歷任封圻嗣以獲咎因公復又邀

恩錄用此時耆齡在籍適當蕊榜重逢自應就近與宴鹿

鳴以耀科名而彰人瑞除咨明禮部外臣等謹會

同江蘇學政臣朱方增合詞恭摺具

奏伏乞

皇上聖鑒謹

奏

道光八年七月十三日奉到

硃批另有旨欽此同日奉到道光八年六月二十八日

內閣奉

上諭蔣攸銛等奏耆紳重遇鹿鳴懇與筵宴一摺原任兵部主事吳熊光曾任督撫大員雖於兩廣總督任內獲咎事尙因公此時養病在籍年近八旬適當慈榜重逢洵屬藝林嘉瑞吳熊光著加恩賞給四品卿銜准其重赴鹿鳴筵宴以昭盛典欽此

會同江督陳奏耆紳會榜重逢請與

恩榮筵宴摺子

奏爲耆紳會榜重逢請與

恩榮筵宴以光盛典仰祈

聖鑒事據江蘇布政使梁章鉅詳稱吳縣耆紳潘奕雋  
現年八十九歲於乾隆三十四年己丑科會試中  
式進士由內閣中書協辦侍讀典試貴州陞任戶  
部貴州司主事嘉慶元年恭遇

覃恩以子世璜官

封翰林院編修二十五年以子世璜戶部主事加三級請

四品

封典道光二年壬午科重赴鹿鳴宴經前撫臣魏元煜

奏奉

上諭江蘇原任戶部主事潘奕雋年逾八秩再遇鄉科著加恩賞給員外郎銜以示朕嘉惠耆儒至意欽此

在案茲屆來年己丑科會榜重逢請與

恩榮筵宴由縣府查明具詳請

奏前來臣等查潘奕雋志奮丁年名題甲榜班分浴

鳳曾持繡嶺之女衡秩晉祝鳩復荷木天之

寵誥疏廣清以養素宗親則令範交師伏生老尙談經

子姪則魏科繼起越廿八榜而簪花遠溯世共羨靈  
光植體之堅躋九十歲而瀛島重登益昭

壽考作人之盛前者萃筌載詠已邀紫紱之

恩施今茲杏棗重輝請與紅綾之寵宴除咨明禮部外

謹合詞恭摺具

奏伏乞

皇上聖鑒謹

奏

道光九年二月初一日奉到

硃批另有旨欽此同日奉到道光九年正月十三日內

閣奉

上諭蔣攸銛等奏耆紳重與恩榮宴一摺江蘇原任戶部主事潘奕雋年躋九秩前於壬午科重遇鹿鳴賞給員外郎銜茲值己丑科會試蕊榜重逢洵屬藝林盛事著加恩賞加四品卿銜准其重赴恩榮筵宴以示朕嘉惠耆儒至意欽此

耆紳會榜重逢請與

恩榮筵宴摺子

奏爲耆紳會榜重逢懇

恩與宴以光

盛典仰祈

聖鑒事據江寧藩司趙盛奎詳稱寄籍江寧府上元縣  
原任四川重慶府銅梁縣知縣貴逢甲現年八十  
八歲係湖南常德府武陵縣民籍由監生中式乾  
隆三十五年庚寅

恩科順天鄉試舉人壬辰



恩科會試進士選授河南項城縣知縣引

見改授四川銅梁縣知縣歷署合州知州充丁酉科四川

鄉試同考官告病回籍就醫江南嘉慶二十三年

遵例入籍上元上年辛卯

恩科咨准重赴鹿鳴恭逢道光十二年壬辰

恩科會試計距中式進士之期已逾花甲重周例得重  
赴

恩榮筵宴循照已丑會試蘇州府在籍戶部主事潘奕  
雋重與筵宴之案詳請具

奏前來<sub>臣</sub>等查該原任四川重慶府銅梁縣知縣貴

逢甲午逾八袞身歷

三朝雁塔名題早食紅綾之餅雷封化洽昔分青綬之符  
濯來錦水芙蓉曾佐衡文於秋試開到公門桃李  
又逢取士於春官詩賡鹿野之三昨歲已邀

曠典花轉鶯庭而百重來宜沐

殊恩所有耆紳重遇

恩榮懇請與宴緣由除咨明禮部外謹合詞恭摺具

奏伏乞

皇上聖鑒謹

奏

道光十二年二月初九日奉到

硃批另有旨欽此同日奉到道光十二年正月二十四

日內閣奉

上諭陶澍等奏耆紳重遇恩榮懇請與宴一摺江蘇原  
任四川銅梁縣知縣貴逢甲年逾八袞會榜再逢洵  
屬藝林盛事著加恩賞加知州銜准其重赴恩榮宴  
以示朕嘉惠耆儒至意欽此

耆紳重遇鷹揚懇請與宴附片

再據江寧布政使詳稱原任浙江溫州鎮總兵李  
景曾江南通州人現年八十五歲由乾隆辛卯科  
武舉擢用南匯營都司游歷山東登州遊擊浙江  
玉環參將瑞安副將陞授溫州鎮總兵署理浙江  
提督曾經前後在洋勦捕海匪受傷著勞經兵部  
奏准給與功劄緣染溼疾懇准解任回籍調理上年

恭遇辛卯

恩科鄉試花甲一周例得邀准

奏請與宴據該員原籍地方官取造履歷冊結加結

轉詳請

奏前來臣查各省鄉試遇有武舉出身三品以上武職無論現任在籍其中式科分適遇花甲已周應重赴鷹揚宴者例准先期具

奏請

旨上年江南省辛卯

恩科武闈鄉試

奏准展至本年三月舉行今原任浙江溫州鎮總兵李景會中式武舉科分已逾周甲之期欣逢

萬壽作人重開虎榜合與羣英共宴同赴鷹揚以獎耆

年而昭

曠典理合循例附片陳明請

旨伏乞

聖鑒謹

奏

道光十二年二月初九日奉到

硃批另有旨欽此同日奉到道光十二年正月二十四

日內閣奉

上諭陶澍等奏總兵重遇鷹揚請與筵宴等語原任浙

江溫州鎮總兵李景會年逾八旬再逢鄉舉洵屬武

科盛事著加恩賞加頭品銜准其重赴鷹揚筵宴以  
獎耆年而昭茂典欽此

陶文毅公全集卷二十一目錄

奏疏 修志 書院

創修安徽省志摺子

高淳縣捐建書院摺子

嘉定縣捐建書院摺子



2014 JAN 11 11:11 AM

奏疏 修志 書院

創修安徽省志摺子

奏爲創修省志仰祈

聖鑒事竊查江南通志自雍正七年欽奉

訓旨修輯其時安徽藩司駐劄江寧尙未分移安慶一切

文獻每多簡畧前因纂輯

大清一統志經國史館催取志書各州縣無所承藉

造送稽遲迄今數年之久仍未能詳備臣思致治

固宜於因地設教尤重於觀民古者小史掌邦國

之志外史掌四方之志而士訓誦訓皆得以地圖

地事地俗入告以施其政誠以一方之掌故卽一方之人心風俗所係經緯布置藉資考鏡固非徒以備冊府之守已也我

國家承平數百載

列聖累治重熙休養生息安徽夙稱文物之區涵濡

德化不特名臣循吏儒林文苑志行多有其人卽巖鄉僻

壤孝子順孫貞女節婦例邀

旌典者亦復比比皆是顧聽其歲久湮沒非所以廣

聖化而昭來許也臣與藩臬兩司公餘籌議以爲安徽

自分省以來未有志書卽上下江合修之志於乾

隆元年告成迄今已閱九十載愈久則事愈積而  
揆訪愈難若田賦水利學校兵制等項尤關重大  
未可聽其散佚爰卽酌定章程督飭道府州縣博  
加採訪妥籌經費於省城設局纂修勒限一年歲  
事務俾吏治民風士習咸歸薈萃用備

國家典章之採除俟書成恭

進外所有設局創修省志緣由謹繕摺具

奏伏乞

皇上聖鑒訓示謹

奏

附之彙之二卷之三  
卷三十一  
道光五年五月十三日奉到

硃批另有旨欽此同日奉到道光五年四月二十八日

內閣奉

上諭陶澍奏創修省志一摺江南通志成於乾隆元年  
安徽自分省以來未輯通志於掌故難免闕漏茲據  
該撫奏明在省城設局纂修著即酌定章程督飭所  
屬博加採訪毋濫毋遺並著予限一年纂輯成書以  
重文獻而資考鏡欽此

高淳縣捐建書院摺子

奏爲高淳縣紳士捐建書院懇請

聖恩分別議敘以示獎勵事據江寧布政使賀長齡詳稱據高淳縣知縣許心源先後詳稟高淳舊有書院建自前明迄今二百餘年久已頽廢該縣到任後查有尊經閣一處坐落縣學之後基址寬大房屋整齊修葺擴充可以作爲書院惟掌教束修諸生膏火及修理房舍置備器具等項所費頗多當經邀集儒學及巡檢典史各員公同籌議倡首捐廉設法勸諭各紳士等俱極歡欣鼓舞踴躍捐輸

就所捐田畝及錢文合計共捐錢二萬三千餘串  
現將應辦事宜次第辦竣高淳地係彈丸富戶本  
少外縣商鋪寄居營趁者又不便向其勸捐今於  
兩月有餘本邑官民捐錢至二萬三千餘串書院  
計日告成固屬紳士樂善捐輸亦由董事經理妥  
協詳請分別獎勵等情由該藩司核明除儒學教  
官巡檢典史各員由外記功二百兩以下各捐戶  
另行造冊在外請獎外請將二百兩以上各捐戶  
及勸捐經理最爲出力各董事

奏請獎敘并聲明該縣知縣許心源首先倡捐制錢

一千串勸諭捐錢至二萬餘串得以速成善舉請  
一併議敘以示鼓勵等情前來臣查書院爲教育  
人才之地全在地方官隨時整頓高淳縣書院久  
已頽廢生童肄業無所於培植人才殊有關繫茲  
經該縣許心源捐廉首倡各紳士踴躍捐輸兩月  
有餘捐錢二萬三千餘串速成善舉洵屬可嘉查  
定例凡士民人等捐修公所實於地方有裨益者  
由督撫具

題捐銀至千兩以上請

旨建坊不及千兩者交地方官給扁如有應行



旌表而情願議敘者由吏部核議等因今據高淳縣知縣許心源將捐輸各紳士造冊請獎由江寧藩司核明轉詳請

奏前來所有高淳縣捐銀二千兩以上之議敘縣丞職銜邢士昕一千兩以上之捐納布政司理問職銜邢邦達文章唐向榮又三百兩至五百兩以上之捐職布政司經歷谷鳳鳴捐納布政司理問職銜邢春華吳欽捐封職員吳位升貢生俞鋒增生陳郁文附生陳殿勳監生陶仁邢鐸李有羣文章唐壽泰陳功俊王錦礪孔廣趨民人韓懷興及勸

捐出力之董事歲貢生孔廣業監生李培基田馨  
仰懇

聖恩俯准交部分別議敘再高淳縣知縣許心源淳明  
篤實於地方公事極力整飭頗得民心今因書院  
久廢首先倡捐千金勸諭紳士於三月之內捐錢  
至二萬餘串得以刻期修復卽行開課辦理甚爲  
妥速并懇

聖恩交部議敘以示鼓勵除將各紳士履歷清冊咨部  
外謹會同大學士兩江總督臣蔣攸銛江蘇學政  
臣申啟賢合詞恭摺具

奏伏乞

皇上聖鑒

訓示施行謹

奏

道光八年十二月初六日奉到

硃批吏部議奏另有旨欽此同日奉到道光八年十一

月十六日內閣奉

上諭陶澍奏高淳縣紳士捐建書院請分別議敘一摺  
江蘇高淳縣書院久已頽廢經該縣知縣首先倡捐  
并勸諭紳士於三月之內捐輸修復據該撫查明懇

予恩施著照所請高淳縣知縣許心源著加恩交部  
議敘其捐銀二千兩以上之議敘縣丞職銜邢士昕  
一千兩以上之捐納布政司理問職銜邢邦達文童  
唐向榮三百兩至五百兩以上之捐職布政司經歷  
谷鳳鳴捐納布政司理問職銜邢春華吳欽捐封職  
員吳位升貢生俞鋒增生陳郁文附生陳殿勳監生  
陶仁邢鐸李有羣文童唐壽泰陳功俊王錦礪孔廣  
趙民人韓懷興及勸捐出力之董事歲貢生孔廣業  
監生李培基田馨著吏部分別議敘欽此

1786

1786

1786

嘉定縣捐建書院摺子

奏爲紳士捐建書院仰懇

聖恩分別議敘以示獎勵事竊照嘉定縣安亭江上有  
明儒歸有光講學讀書之所在菩提寺東偏縣屬  
紳士議建震川書院因該處與崑山新陽青浦地  
界毘連各縣生童均可就近會文咸樂觀成道光  
六年夏規模粗就臣以挑浚吳淞之便親臨考校  
率屬捐廉置措膏火面諭該前縣淡春臺督率試  
用訓導黃穆之張珣監生張鑑朱勲等妥帖辦理  
於書院之東爲歸有光立祠并擴充院舍自興工

以至歲事計捐錢一萬六千八百餘串嗣因膏火等費不敷又續勸捐錢五千二百八十餘串統共捐錢二萬二千餘串茲據該縣知縣保先烈查明勸捐有成詳請獎勵由藩司核議請

奏前來臣查明儒歸有光人品淳正學問文章爲有明之冠乾隆年間曾蒙

高宗純皇帝褒嘉以其文與黃淳耀并稱茲嘉定及崑山新陽青浦四邑紳士企慕遺風請於該處建立書院爲生童會文之所寓居客紳亦願助捐自道光六年經前知縣淡春臺捐廉勸修復經臣親臨諄

飭現已踴躍落成擴充院舍并置買田產爲膏火  
及修理之費業經咨部立案并聲明勸捐紳士董  
事人等應行獎勵之處俟飭查另辦在案查書院  
爲培植人文之地該處自創建興工以至籌備膏  
火等項通共捐錢至二萬二千餘串之多善舉速  
成洵堪嘉尙定例凡士民人等捐修公所實於地  
方有裨益者由督撫具

題捐銀至千兩以上請

旨建坊不及千兩者交地方官給扁如有應行

旌表而情願議敘者由吏部核議等因所有興建震川



書院捐銀四千兩以上之嘉定縣監生張鑑二千兩以上之崑山縣捐職州同胡塘五百兩以上之崑山縣候選翰林院待詔胡鏡寓居該處之工部郎中江西臨川人李秉綬仰懇

聖恩俯准交部分別議敘再監生張鑑出貲既多又係董辦出力應請交部從優議獎以示鼓勵又前任嘉定縣知縣捐陞道員淡春臺首先倡捐銀四千餘兩督令紳士創修及現任嘉定縣知縣保先烈妥籌竣事并請

聖恩交部議敘除飭取履歷清冊咨部外其餘五百兩

以下捐貲各人應照例分別咨部請敘及由外記  
獎合併聲明謹會同江蘇學政臣申啟賢合詞恭  
摺具

奏伏乞

皇上聖鑒訓示施行謹

奏

道光十年十月十一日奉到

硃批另有旨欽此同日奉到道光十年十月初一日內  
閣奉

上諭陶澍奏紳士捐建書院懇請獎勵一摺江蘇嘉定

縣安亭江上有明儒歸有光讀書之所經該縣并毗連之崑山新陽青浦四邑紳士暨寓居客紳捐建震川書院善舉速成洵堪嘉尙所有捐銀四千兩以上之嘉定縣監生張鑑三千兩以上之崑山縣捐職州同胡塲五百兩以上之崑山縣候選翰林院待詔胡鏡寓居該處之工部郎中李秉綬均著加恩交部分別議敘監生張鑑出貲既多且董辦出力著交部從優議敘前任嘉定縣知縣捐陞道員淡春臺首先倡捐銀四千餘兩督令紳士創修又現任嘉定縣知縣保先烈安籌竣事俱著加恩交部議敘其餘五百兩

以下捐貲各人照例咨部請敘以示獎勵該部知道  
欽此

卷二十一

丁

陶文毅公全集卷二十二目錄

奏疏 營制

潁亳宿三營添設官兵移駐文武摺子

擬裁各標營兵數目摺子

洪澤湖移設都司摺子

新設洪湖營地方遼闊酌請添設弁兵以重巡防

摺子

安徽潁州艾亭集地方酌改守備移撥兵丁以資

巡緝摺子

河右營王家集等處添移弁兵駐巡摺子



奏疏 營制

穎亳宿三營添設官兵移駐文武摺子

奏爲穎亳及宿州地方緊要必須酌添官兵移駐文武員弁以重巡防仰祈

聖鑒事竊照安省穎州府地處省北邊境附府之阜陽縣幅幘遼濶袤延五六百里原設兵力單薄經調任撫臣孫爾準

奏請移改參遊添設弁兵一案奉

上諭據孫爾準奏穎州府與豫省接壤爲紅鬍捻匪出沒之區防緝宜周兵力尙單現與督臣咨商移改參



遊添設弁兵員缺名數並調撥各營分名糧未及會  
奏移交新任巡撫查辦等語著陶澍會同孫玉庭籌  
度現在情形是否必須添設再行詳查妥議明白具  
奏不可徒事更張有名無實也將此諭令知之欽此

臣陶澍遵卽

奏明俟查春賑之便順道赴彼熟察情形再與臣孫  
玉庭妥議具

奏在案今臣陶澍由壽鳳宿州前赴潁州親歷各要  
隘相度形勢該府所屬阜陽亳州必須酌添弁兵  
並移駐文員以資彈壓其鳳陽府所屬之宿州幅

幘廣袤亦有應增汛防之處至參將與遊擊職分不甚相懸且參將所駐之六安州與楚省接壤亦關緊要似不必更張移易咨商臣孫玉庭會核情形通盤籌計緣潁郡在省城西北邊境距省幾及千里阜陽乃附府首邑與河南之項城沈邱新蔡息縣固始等縣接壤時有豫省紅鬍匪徒竄入滋擾其北界則亳州太和東界則宿州蒙城等州縣距城一二百里不等緝捕巡防護解餉鞘人犯在在均需兵力查潁州營額設遊擊一員守備千總各一員把總四員外委二員額外五員馬步兵丁

五百六十五名內除分防蒙城守備把總外委額  
外各一員兵丁一百六十九名外郡城駐劄遊擊  
一員千總一員額外二員存城兵二百四十三名  
其餘一百五十三名分駐阜陽之老鶴巷驛口橋  
王市集六十里鋪方家集鮑陽城劉家集董家集  
七里鋪等九汛多則三四十名少則十餘名察看  
形勢實覺單薄應請添設存城兵丁五十名以資  
操防差委至於老鶴巷等九汛所設弁兵原屬多  
寡適宜然兩省接壤之區扼要尤在邊界如西北  
鄉之沈邱集距城一百二十里又西鮑陽城距城

二百一十里西南鄉之艾亭集距城一百七十里  
稍南方家集距城一百二十里均屬鞭長莫及查  
沈邱集本設有巡檢一員方家集設有縣丞一員  
惟自鮑陽經艾亭以達方家集一帶袤延二百餘  
里與豫省之沈邱項城新蔡息縣固始等處犬牙  
交錯離城既遠地偏俗悍匪徒出沒其間尤難防  
範從前並未議設弁兵本欠周密且艾亭集地方  
衝要爲西南邊界適中之地必須大員駐劄方資  
控馭查該府本有捕盜同知一員駐劄驛口橋距  
城一百里尙易照料應將該同知移駐艾亭集地

方作爲撫民總捕同知凡逃盜逃兇私販私宰賭博打降以及附近民人錢債田土細故所犯在柳杖以下者責成該同知就近分別緝拏審理其罪犯徒流以上一切命盜姦拐等案仍歸有司經理毋庸攙越該處應添設把總一員兵丁四十名以重巡防再鯛陽城本無額駐弁兵係於方家集防兵內分駐五名而方家集只存兵五名均不足以資巡防應每處添兵二十五名共成三十名各添外委一員管帶又亳州接壤豫省其西北鄉之減種店僅設防兵九名東南鄉之張村鋪僅設防兵

四名地方曠野離城遙遠不足以資彈壓應請各  
添兵十五名增添外委二員管帶巡防又查宿州  
地方村鎮通境二百一集周圍六百餘里宿州州  
同駐劄濉溪集分管西北四十四集捕務內有東  
北鄉二集州判駐劄臨渙集分管西南三十七集  
捕務並各設有外委一員於分管各集巡緝彈壓  
尙能周顧惟正西通達豫省及正東東南東北等  
處一百二十集捕務俱屬吏目分管近城鎮集尙  
知畏法餘則獷悍成風吏目有管獄之責不能常  
川赴鄉查緝所管集分較州同州判多至倍蓰而

分汛武職又僅止正西之百善驛設有把總一員  
東南之湖溝集正東之大店集各設有外委一員  
其東北數十集並無營弁專駐吏目既有鞭長不  
及之虞而營弁聲勢亦未聯絡曾據署宿州知州  
劉用錫稟請於東北之時村集添設巡檢弁兵以  
資彈壓經臣陶澍周歷宿州查看洵係實在情形  
各屬巡檢既無可裁之員又難額外增設惟查前  
設南平撫民同知案內曾將鳳陽府司獄一缺改  
作南平照磨嗣因南平又改爲捕盜同知無須照  
磨而府司獄裁改之後亦未復設此缺尙在空懸

司獄與巡檢品級廉俸均屬相等應請將前裁之  
司獄改作巡檢駐劄東北之時村集地方分管六  
十集並添設外委一員卽於該營存城兵丁內抽  
撥兵十名派給外委駐劄時村集以資巡緝再於  
北鄉之夾溝驛添設外委一員並添兵十名駐劄  
巡防統計潁州營添設把總一員外委二員兵丁  
一百四十名亳州營添設外委二員兵丁三十名  
宿州營添設外委二員兵丁十名並於該營移撥  
兵十名如此星羅碁布聲勢聯絡兵威旣壯緝匪  
安民均資得力案查嘉慶十八年海州揚州二營



添兵案內經前督臣百齡奏請於江安各營內分別裁撥其增添員弁等官俸薪銀兩仰蒙

諭旨准其作正開銷等因欽遵在案今穎郡並亳宿兩州三營酌請增設官兵其一切俸餉若概請加增則經費有常難以額外開銷茲亦做照前辦成案所有添兵八十名卽在於江安各標營內分別抽裁移撥毋須另外增餉軍裝器械隨糧移解至請增把總一員每年應支俸薪養廉馬乾等銀共計一百五十一兩二錢又請添外委六員係在馬兵數內仍食馬餉惟每員歲需養廉銀十八兩爲數無

多均應請照海揚二營添設官弁應支俸薪之案  
作正開銷兵房衙署由司籌議捐建以歸節省如  
蒙

俞允所有一切未盡事宜另飭藩司會議詳請分別題  
咨辦理臣等因要地須重巡防起見悉心籌議往  
返咨商意見相同謹合詞恭摺具

奏伏乞

皇上聖鑒訓示謹

奏

道光三年七月初四日奉到

陸方象之台身

卷二十二

二

硃批軍機大臣會同該部議奏欽此

381-4 294 116 10/10/10

擬裁各標營兵數目摺子

奏爲遵

旨查明各標營兵額擬裁數目節省經費仰祈

聖鑒事竊

臣

承准軍機大臣字寄欽奉

上諭前據長齡等奏籌辦回疆善後事宜請將各省綠營兵額各按馬步守兵分別均勻於百名內暫裁二名將裁缺所截經費解交甘肅藩庫自道光十二年爲始歸入回疆經費項下搭運前往以資支發當交該部查明具奏茲據奏各直省地方險易異宜兵數多寡不一且額兵有在城分汛之別在城者以備差

操爲數稍多分汛者以專戍守人數較少自應由各  
省查明核辦著各該省督撫各按全省兵數以每百  
名暫裁二名核計共裁馬步守兵若干名於所屬標  
營內詳察繁簡多寡情形遇有拔補開革事故所出  
之缺應陸續分別扣除及所裁餉銀糧折馬乾並紅  
白卹賞銀兩應酌定裁減數目一併迅速查明各行  
據實覆奏將此各諭令知之欽此遵

旨寄信到

臣

當卽移會漕河撫提諸

臣

並通飭各藩司

移行鎮協標營一體欽遵詳查去後茲先後接准  
咨覆並據各藩司查議前來

臣

查江蘇省各標營

額兵三萬八千八百八十三名按百名裁二名計  
應裁兵七百七十七名內有各營額兵尾數畸零  
不及應裁之數計短裁兵四名實計裁扣馬步戰  
守兵丁七百七十三名核計所裁兵數連閏節省  
餉乾米折共銀一萬二千七百三十五兩一錢三  
分七釐五毫本色米二千二百九十五石一斗五  
升又紅白賞卹減裁銀四百二十八兩安徽省各  
標營額兵九千六百九十五名共裁馬步戰守兵  
一百九十三名每年計節省餉乾米折共銀三千  
一百四十五兩八錢三分本色米五百二十石二

斗江西省額兵一萬二千八百一十八名應裁兵  
二百五十六名每年節省餉乾銀三千九百九十  
三兩六錢米九百二十一石六斗紅白賞卹銀減  
裁四百八十兩查江蘇安徽江西三省所裁兵米  
共三千七百三十六石九斗五升請照道光元年

裁兵之案經前督臣孫玉庭

奏明每石照例價合銀一兩計銀三千七百三十六  
兩九錢五分統計裁兵一千二百一十二名內馬  
兵一百五十五名步兵二百三十九名守兵八百七十  
八名節省餉乾糧折賞卹及米石變價共銀二萬

四千五百一十九兩五錢一分七釐五毫至各營應裁兵丁節省餉乾等銀均從道光十二年爲始其未經裁定以前各兵應支銀米請於各藩司建曠並截存款內動支如存曠不敷卽於坐落各州縣先行墊給另於新賦米內歸還其支過銀米兩款統俟裁竣之日歸入奏銷案內銷算分別專案題咨其安徽省應減紅白卹賞銀兩未經酌定臣現已飭催該藩司查議酌定另行咨部查照並飭各藩司將裁存馬匹軍械等項照例辦理除將送到各營裁減馬步守兵名數及節省銀米賞卹數目



清冊送部查核外臣謹會同漕臣蘇成額河臣張

井江蘇撫臣林則徐安徽撫臣鄧廷楨江西撫臣

周之琦江蘇提督臣王應鳳合詞恭摺具

奏伏乞

皇上聖鑒訓示謹

奏

道光十二年七月十一日奉到

硃批兵部知道欽此

洪澤湖移設都司摺子

奏爲洪澤湖地方緊要酌籌移設都司專營以資巡防仰祈

聖鑒事竊照地方設有專營操巡並重其有今昔情形不同不得不量爲更改者仍准隨時調劑歷經遵辦有案今查洪澤湖地方爲江南安徽兩省交界江南係河標中右兩營及漕標淮安城守營汛地安徽係泗州營管轄該湖收納汝潁淮泚渦淝雜泗睢澮大小數十水周迴五六百里水面寬闊四通八達廬鳳潁泗徐淮各處棍徒以及山東之沂

郊滕嶧曹單等處回匪往來其間爲逋逃藪其形勢與江浙兩省界連之太湖相同而納污藏垢爲更甚太湖設有內河水師專營巡防嚴密以故奸宄未易潛滋洪澤湖爲江安兩省商賈民船往來要道並未設有內河水師專營匪徒出沒湖中往往有乘機糾搶之案且兩省營汛寫遠聲氣未能聯絡此拏彼竄稽察難周現當票鹽盛行湖行尤須安穩疊經臣分派文武員弁四路梭拏獲犯嚴辦冀可稍知斂跡但必須如太湖設有專營俾昭控制而嚴巡防庶湖面永期肅清而商販不致裹

足<sup>臣</sup>查海州營錢家集地方向係梟犯總滙之區

經前督<sup>臣</sup>百齡

奏請設立都司一員隨帶千總一員把總一員外委  
二員額外二員兵丁二百名移駐歸漕標就近調  
遣嗣以差遣不敷復經<sup>臣</sup>添設額外二員在案蓋  
因海州爲出鹽之地其時引地滯銷場鹽堆積鹽  
無出路梟徒日多劫搶拒捕凶殺之案無時不有  
是以設立專營藉資彈壓今淮北引地改爲票鹽  
客販挾貲而來買鹽而去毫無阻滯來者雲集場  
池所產鹽斤僅供民商收買無須與梟匪私相授

受而梟匪亦因勾引無人無所獲利自行解散以故海州一帶安集綏救已迥非向日情形錢家集地方似可無須都司駐劄弁兵亦可裁減應請卽以錢家集都司改爲洪澤湖都司仍爲在外題補之缺隨帶把總一員外委一員額外二員馬步戰守兵丁一百四十名駐劄洪澤湖之老子山等處作爲內河水師營改隸河標中營兼轄仍酌留千總一員外委一員額外二員馬步戰守兵丁除上年裁減四名外實餘存兵丁五十六名悉數巡防錢家集汛地仍歸海州營參將管轄如此一轉移

間錢家集地方仍有千總等弁兵分駐不致疎漏而於洪澤湖緊要地方有都司等員弁居中駕馭復有河標中右兩營淮安營泗州營四面策應庶奸匪無從躲匿湖面肅清不特民塵安枕而商旅票販亦得坦行攸賴惟陸路改爲內河水師於營制稍有未協第當地方緊要不得不因時制宜合無仰懇

聖恩俯准以錢家集都司改爲洪澤湖內河水師都司隨帶把總外委額外移駐老子山等處實於地方鹽務兩有裨益如蒙

俞允所有現任都司等員弁兵丁皆屬陸路一時無可  
改補應卽於臣所屬內河水師內酌挑弁兵數名  
來洪澤湖指引先行雇募民船駕駛緝捕以靖湖  
匪而安商旅仍察看移駐各員弁兵丁能否務任  
再行改補調撥一面先募水手兵數十名以資駕  
船行駛移駐之官弁兵丁俸餉馬乾等項均照錢  
家集原額支領此外攜帶軍械添設巡哨船隻並  
移建衙署兵房改鑄印信分管界址一切未盡事  
宜由臣督同江安藩臬運司詳查籌議分別  
題咨辦理臣爲地方鹽務起見謹會同署南河督臣

張井漕運督臣貴慶合詞恭摺具

奏伏乞

皇上聖鑒訓示謹

奏

道光十三年七月十六日奉到

硃批兵部議奏欽此



十一  
二  
三  
四  
五  
六  
七  
八  
九  
十

十一  
十二  
十三  
十四  
十五  
十六  
十七  
十八  
十九  
二十

三

新設洪湖營地方遼闊酌請添設弁兵以重巡防  
摺子

奏爲新設洪湖營地方遼闊酌請添設弁兵以重巡  
防仰祈

聖鑒事竊照地方營汛必須因地制宜期於巡防得力  
前因洪澤湖地方緊要經臣

奏請將海州營錢家集都司弁兵劃分移駐接准部  
咨錢家集都司一員把總一員外委一員額外外  
委二員馬步戰守兵一百四十名准其移駐洪澤  
湖之老子山等處作爲內河水師營分其錢家集

僅留千總一員外委一員額外外委二員馬步戰  
守兵五十六名是否足資彈壓令臣察看情形隨  
時辦理奉

旨依議欽此臣查錢家集前設專營原因海州為產鹽  
之地梟徒偷漏橫行藉資彈壓今自改行票鹽以  
來民販叢集梟徒已難託足是以該處日臻救謐  
察看情形尙留千總外委各一員額外二員兵丁  
五十六名儘足彈壓惟查洪湖營都司駐劄老子  
山所轄全湖水面周圍五六百里之遙且成子河  
許家日高家灣應山集曹家嘴堯河東清壩太平

河息浪巷蔣翟壩仁義禮三河沈家嘴馬欄岡鴨  
蛋溝等處界連江安兩省與東豫接界亦近民情  
強悍奸宄易藏此拏彼竄現行淮北票鹽均需渡  
湖赴岸難保不因湖面寬闊見鹽船盛行覬覦搶  
劫查自設營後湖面漸形安靜而分防置汛尤須  
按段派兵始專責成而資周密前請將海州營錢  
家集都司把總外委各一員額外二員兵丁一百  
四十名移駐仍屬不敷分撥擬請添設千總一員  
外委一員額外二員兵丁八十名連前兵共湊二  
百二十名分駐彈壓庶沿湖要隘聲勢可期聯絡

而差委亦不致無人第添設千總一員外委一員  
現查江省各營無可裁抵所有歲需各俸廉應請  
照從前掘港佃湖二營添設千總裁馬改守之案  
辦理卽在洪湖營原移及裁撥馬兵內裁去馬兵  
九名改爲守兵九名每年節省餉乾銀兩抵作千  
總外委俸廉有盈無絀所添額外二員係在馬兵  
數內挑拔仍食本身馬餉毋庸另請動項至添設  
兵丁已准提臣段琨查有事務較簡原設遊擊改  
爲都司之劉河營酌裁兵丁五十名狼山鎮標中  
左右三營共裁兵丁三十名均按馬一戰二守七

之數裁撥應裁馬兵八名戰兵十六名守兵五十  
六名共裁馬戰守兵八十名遇有缺出截扣陸續  
移撥洪湖營募補如此量爲變通既不增添兵額  
亦毋庸另籌經費而於要地巡防益臻嚴密於水  
師營伍地方洵有裨益除飭司將未盡事宜查明  
議詳分別

題咨辦理外謹會同署南河總督臣麟慶江蘇提督  
臣段琨合詞恭摺具

奏伏乞

皇上聖鑒

陽明書卷之三十一

三

敕部核覆施行謹

奏

道光十四年十二月二十二日奉到

硃批兵部議奏欽此

安徽潁州艾亭集地方酌改守備移撥兵丁以資

巡緝摺子

奏爲潁州營艾亭集地方緊要擬請酌改守備移撥  
兵丁以資巡緝仰祈

聖鑒事竊照地方營汛操巡緊要其有今昔情形不同  
者必須量爲更改以資控制今查潁郡地方民風  
强悍幅幘尤爲遼闊其附郭之阜陽縣縱橫各有  
二百五十餘里之遙該縣屬之西南鄉艾亭集距  
城一百七十餘里與豫省之新蔡汝陽息縣犬牙  
相錯爲匪徒出沒之所道光三年潁亳添兵案內



經前督臣孫玉庭以艾亭集地方衝要爲潁郡西南邊界

奏請以潁州府同知移駐作爲撫民捕盜同知添設把總一員兵丁四十名所需廉俸馬乾等銀作正開銷在案續於十一年籌辦回疆經費案內裁兵一名現存三十九名查潁州營額設六汛而阜陽縣居其五內艾亭集把總一員駐艾亭集地方協防外委一員駐方家集地方所轄一十九堡其瓦店集迎仙店雙廟集益鎮集張家寨地里城姜寨集等處均與河南接壤距該汛五六十里至八九

十里不等俱係邊境搶竊繁多且時有捻匪棍徒  
此拏彼竄自移駐同知添設汛防以來因武弁職  
分太微兵力又單尙不足以資控馭由潁州府及  
營縣稟請將把總裁汰改設守備移兵六十一名  
連前存兵丁三十九名共湊一百名庶幾武職較  
大兵丁較多巡防差操可無缺誤而於緊要地方  
大有裨益等情批飭兩司議詳請

奏前來

臣

查艾亭集界接河南五方雜處改設守備

添設汛兵實爲因地制宜起見自應准其改設俾  
資彈壓惟查安省額設守備皆係繁要無可裁移

應請將該處把總一員改爲守備所需廉俸馬乾等銀核計每年應需銀三百四十一兩一錢八釐除裁去原設把總每年應支廉俸馬乾銀一百五十一兩二錢抵捕外計不敷銀一百八十九兩九錢八釐合無仰懇

聖恩俯念地方緊要改設守備無可裁抵准照從前該處添設把總應支俸薪之案作正開銷以期緝捕防範均資得力至增益兵丁卽於壽春鎮標所轄中右六安廬州亳州五營內每百名酌撥二名裁撥中營馬兵二名戰兵四名守兵十三名右營馬

兵二名戰兵四名守兵十名六安營馬兵一名戰  
兵二名守兵八名廬州營戰兵一名守兵五名毫  
州營馬兵一名戰兵二名守兵五名以上共酌撥  
兵丁六十一名合艾亭集現設兵丁三十九名其  
一百名潁州營係壽春鎮標所轄營分就本標所  
轄之兵移撥本轄營分既與額數調遣無缺而於  
艾亭集地方藉可得資巡緝亦無須另籌經費其  
潁州營本設專汛守備駐劄蒙城作爲左軍守備  
以阜陽汛蒙城汛王市集汛歸左軍管轄新改守  
備駐劄艾亭集作爲右軍守備以艾亭集汛驛口

橋汛老觀港汛歸右軍管轄以符營制該營額設  
遊擊守備均係陸路外題之缺今艾亭集改設守  
備一員應請一律作爲外題要缺至該處現設把  
總楊化鵬原缺旣裁應暫隸壽春鎮標候補俟有  
本省各營把總缺出卽行補還移撥兵丁軍裝器  
械隨糧移解如蒙

俞允所有移撥兵數一遇缺出卽陸續截扣由艾亭集  
守備另行募補其餘應增兵房改建衙署及頒鑄  
印信一切未盡事宜另飭藩臬兩司會議詳請分  
別

題咨辦理臣因地方巡防緊要起見謹會同安徽巡

撫兼提督銜臣色卜星額合詞恭摺具

奏伏乞

皇上聖鑒訓示謹

奏

道光十六年三月十一日奉到

硃批該部議奏欽此

阿彌陀佛

卷之二

三

河右營王家集等處添移弁兵駐巡摺子

奏爲河標右營汛轄緊要擬請添移弁兵扼要駐巡  
以裨地方仰祈

聖鑒事竊照地方營汛必須因地制宜期於巡防得力  
如有今昔情形不同例應隨時酌改以收實效茲  
據江寧布政使楊簧詳稱河標右營管轄邳宿桃  
三州縣地方界在黃運兩河之間幅幘一千餘里  
水陸墩堡六十餘處爲重空漕船往來之所私梟  
匪徒最易出沒催趲緝捕事務殷繁額設弁兵不  
敷派撥而桃源縣境之王家里仁穿城等集濱臨



河湖水陸交衝奸宄易藏尤爲扼要王家里仁兩  
集各原設額外一員兵十名按日在穿城集會哨  
實屬汎廣兵單巡防難周該管將備疊次呈請於  
適中之王家集添設千總一員穿城集添設外委  
一員抽撥兵丁五十名分別駐防巡緝並經該管  
道協復加確查委係扼要之區急需添移弁兵以  
資控制擬請援照道光八年河標中營所轄之宋  
家集地方道光十年佃湖營所轄之海安六套地  
方兩處酌添弁兵之案辦理其請添千總一員外  
委一員所需廉俸在於河標廟灣營抽裁馬兵五

001-4 296 11/11/11

名改爲守兵河標中右二營各裁馬兵二名改爲  
守兵計共裁馬改守九名節省餉乾銀兩抵作千  
總外委俸廉有盈無絀至添撥兵丁五十名按戰  
三守七抽撥查有高資營額設頭號商船

奏改海哨船隻案內堪以酌裁戰兵七名守兵十八  
名再酌減溧陽營戰兵一名守兵二名揚州營戰  
兵二名守兵五名泰州營戰兵一名守兵二名泰  
興營守兵二名漕標中左右三營各裁戰兵一名  
守兵二名以上共裁戰兵十五名守兵三十五名  
合符五十名之數添撥河標扼要駐巡洵屬繁簡

各得其宜不致顧此失彼既於兵額無增亦毋庸

另籌經費而於要地汛防實有裨益等情議詳請

奏前來 臣 查核所議係屬因地制宜且與河標中營

佃湖營添移弁兵成案相符合無仰懇

聖恩俯准添設裁減以重地方如蒙

俞允所有應建衙署兵房估需工料籌款給發毋庸動

支錢糧一切裁撥拔募事宜容 臣 分別咨行辦理

謹會同江南河道總督 臣 麟慶江蘇巡撫 臣 陳鏜

江蘇提督 臣 段琨合詞恭摺具

奏伏乞

皇上聖鑒訓示謹

奏

道光十八年三月十一日奉到

硃批該部議奏欽此

平家集

卷二十二

三

陶文毅公全集卷二十二目錄

奏疏 海防

截留暹羅國通事購買內地幼稚子女摺子

會同蘇撫覆奏押送喚咭喇夷船出境摺子

喚咭喇夷船復來嚴飭堵截情形摺子

會同蘇撫覆奏驅逐夷船開行並嚴飭防範摺子

籌議巡洋會哨章程摺子

籌議嚴禁鴉片章程摺子

陽明家範卷之三

卷二十三

一

奏疏 海防

截留暹羅國通事購買內地幼稚子女摺子

奏爲

奏

聞事竊照暹羅國使前月二十五日由徐州境入安徽

界經 臣 節飭沿途文武員弁妥爲照料一路行走

安靜惟據廬州府宋潢及鳳陽府程懷璟並委員

張連山桐城縣廖大聞等先後稟稱該使臣通事

等入境時攜有幼稚子女詢係前途所買奴婢稟

請查辦等語 臣 思



國家懷柔遠服備極

恩施重譯之人莫非臣僕若內地人民轉聽其遠攜役使殊於體制攸關應卽截留當派安慶府知府汪恩同臣標守備李鳳輝迎赴前途查辦旋據汪恩等稟稱初八日迎赴潛山縣境查出隨行子女八名均非使臣所買閱對契紙其幼孩黃添幅一名係通事翁日陞用錢一千七百文所買幼女劉丫頭又名秀姐係通事跟役劉六用錢十一千所買又伴送夷使之雷州府王文苑家人帶有幼孩宋東吉朱棟兒高連喜朱秋兒四名遊擊文泰家人

帶有幼孩鄭阿連一名署高廉道百順家人帶有  
幼孩徐來喜一名除朱棟兒鄭阿連未立身契其  
餘均係價買尙無別故內劉了頭寄居銅山高連  
喜係掖縣人餘俱滕縣人據供實因覓食其父兄  
將伊出賣質之通事家丁供亦相同當飭護員妥  
速照料前進所有黃添幅等八名現已帶回聽候  
核辦至委員王文苑由舒城回伊原籍太平縣省  
親未入桐城地界等語臣查該幼孩等偶因覓食  
隨其父母轉徙地方官原難一一執途人而問至  
護送委員職有官司豈得毫無聞見一任通事家

人等購買役使萬一夷使效尤成何事體自應截  
留給屬不令攜往至王文苑因何潛回本籍除飭  
太平縣查覆移咨廣東核辦並咨湖北江西一體  
迎查外至截留之子女八名現飭汪守暫送留養  
局擇誠實穩婆妥爲存養一面移查原籍親屬領  
給完聚以免流離再該使臣等已於三月十二日  
出安徽境入湖北境接護合併陳明謹會同督  
孫玉庭恭摺具

奏伏乞

皇上聖鑒謹

奏

道光二年四月十四日奉到

硃批可見諸事留心查辦甚屬得體而此等妄行之委員不可不示以懲誡另有諭旨欽此又於廬州府宋潢等稟稱句旁奉

硃批此等公正地方官甚屬可嘉足見前後撫臣督飭有方屬員不敢蒙蔽朕心甚悅欽此又汪守守字奉硃改恩字



會同蘇撫覆奏押送暎咭喇夷船出境摺子

奏爲查明暎咭喇國夷船業已押送出境並知會前途挨次押令南回以符定例恭摺覆

奏仰祈

聖鑒事承准軍機大臣字寄道光十二年六月初九日奉

上諭富呢揚阿奏暎咭喇國夷船由閩至浙欲赴寧波海關銷貨當飭驅逐開行等語暎咭喇國夷船向不准其赴閩浙貿易今值南風司令竟敢乘便聽入內洋希圖獲利自不可稍任更張致違定例雖經該省

驅逐出境難保其不此遂彼竄著琦善陶澍訥爾經  
額林則徐嚴飭所屬巡防將弁認真稽查倘該夷船  
闌入內洋立即驅逐出境斷不可任其就地銷貨並  
嚴禁內地奸民及不肖將弁等圖利交接務使弊絕  
風清以肅洋政等因欽此查前項夷船臣陶澍於清  
江回省途次接據蘇松鎮總兵關天培松太道吳  
其泰等稟稱該夷有大船一隻約有七八十人小  
船一隻約二十餘人因被閩浙兩省驅逐於五月  
二十二日乘風駛入江南羊山洋面停泊經前護

撫臣梁章鉅

奏明在案

臣

思夷性狡詐貪圖貿易顯違定例兼恐

內地奸民乘機勾串別滋事端不可不嚴爲防範

現當南風司令若竟任其放洋不卽設法截阻一

經驅逐勢必乘風而北由山東逕抵天津又添往

返

臣

陶澍比卽飭委常鎮道王瑞徵馳往吳淞海

口會同該管鎮道密派巡洋舟師三面迎住使之

不得近岸兼斷其駛北之路一面整頓兵威嚴禁

沿海小船毋許接近夷船以防暗地銷售夷貨並

令海營多備巡船押護至浙省交替俾令挨次由

閩折回粵省

臣

林則徐赴任過鎮會晤商及驅逐



所見相同初八日抵任江蘇復加劄飛飭速辦卽據該鎮道等報稱曉諭該夷人等以

天朝禁令祇准在廣東貿易其餘各省皆不准買賣令其作速回帆該夷自閩浙而至江南未能抵岸未免心存希冀比見蘇松鎮船隻排列海上地方兵役嚴查小船不准攏近該夷性本多疑時刻扒上桅杆瞭望見沿海一帶塘岸布列官兵頗露惶懼該船有胡夏米甲利畧通漢語卽向巡船聲稱伊等並非匪人因想求交易而來今蒙曉諭伊等已經悔悟不敢再求買賣現值風狂雨大實在不能

開船只求俟風色稍轉卽速開船回去等語迨六月十一日晚間風色稍轉西南卽促令開行該夷船不敢逗留卽起旋開帆向東南折戩而去蘇松鎮總兵關天培親自督押另飭遊擊林明瑞押赴浙江交界以便交替護送該鎮現報於十二日申刻押護出境入浙江洋面該夷船前在江洋因風暫泊甚屬安靜並未進口滋事內地民人亦無與夷船私相交易之事臣等現已飛咨前途一體派列巡船押護南行俾令由浙至閩回返粵東以免此逐彼竄上副

聖主肅清洋政至意再該夷船乘風寄泊羊山洋面該  
營弁失於防範旋卽并力堵截不准進口此時押  
送出境辦理實爲妥速應請免其開參除咨會浙  
江福建接替押送外臣等謹會同江南提督臣王  
應鳳恭摺具

奏伏乞

皇上聖鑒謹

奏

道光十二年七月十五日承准

軍機大臣字寄道光十二年七月初七日奉

上諭陶澍等奏嘆咭喇國夷船業已押送出境一摺據稱該夷有大船一隻約有七八十人小船一隻約二十餘人因被閩浙兩省驅逐於五月二十二日乘風駛入江南羊山洋面停泊經該督等飭委巡洋舟師三面迎住使之不得近岸兼斷其北駛之路並令巡船押護至浙省交替俾挨次由閩浙回粵省該夷船有胡夏米甲利畧通漢語求俟風色稍轉卽開船回去迨六月十一日晚間風轉西南卽促令開行旋起旋開帆向東南折戩而去並派蘇松鎮總兵關天培等押赴浙江交界該鎮現報於十二日申刻押護出

境入浙江洋面仍飛咨前途一體派列巡船押護南  
行是該夷船自必由浙至閩至粵乃本月初二日據  
訥爾經額奏登州鎮總兵周志林咨稱六月十八日  
劉公島洋面有夷船一隻乘風駛至詢係前在江蘇  
等省被逐之船等語陶澍等既奏稱將該夷船押護  
南行不任北駛何以復竄入山東境界著陶澍等詳  
查據實具奏將此各諭令知之欽此又於道光十二  
年七月二十一日奉到  
硃批另有旨欽此

暎咭喇夷船復來嚴飭堵截情形附片

再<sub>臣</sub>等先後接據蘇松鎮關天培蘇松太道吳其泰等轉據外洋總巡署遊擊劉桂林稟稱十月二十八日瞭見佘山直東洋面有夷船一隻行駛前往查逐等情該鎮卽帶同署吳淞營參將林明瑞趕往至高家嘴洋面見該夷船豎立三桅船面載有礮械桅上有旂一面寫天竺國商船字樣隨向查詢該夷船有能說華語之人據稱天竺國係暎咭喇屬國船戶名劉羅在船舵水八十名船內裝載呢羽等物並稱在直東大洋見有江南遭風船

隻經該夷救起水手十二名現要送交等語林明  
瑞見答話之人認係前次胡夏米船內之夷夥甲  
利卽問其因何復來又稱前船已經回南現又跟  
隨劉羅同來求通貿易等語並據該夷將難民徐  
勝何耿揚姚顯章張天貴施正方倪太和宋振貴  
姚大安倪和上滕大興徐五福徐效全共十二名  
用腳船送出訊明均係崇明縣人在周長發船上  
充當水手一共十三人因船隻遭風沈溺遇該夷  
搭救十二人尙有劉連一人見寧波船上救去各  
難民供有住址現飭確查崇明縣有無周長發商

船出口交保分領查該夷甲利本在胡夏米船上  
作夥之人且船係自北而來似卽係胡夏米由奉  
天折回之船據云前船已回此另係劉羅船隻殊  
不可信其所掛天竺國商船字樣亦未必非藉此  
爲更換面目之計惟該夷因有搭救難民之事仍  
懇求銷貨進口其情詞尙屬恭順臣等仰體

聖主柔遠之至意當飭蘇松鎮道等量加獎賞仍剴切  
諭以

天朝定例止准在於廣東貿易俾令恪遵  
功令迅速回帆第夷情狡詐野性難馴難保其不藉



端逗遛業已分飭沿海文武員弁於明白曉諭之中一面整頓聲威妥爲防範不許沿海居民私相交接使該夷無所希冀現據該道吳其泰稟連日雨雪交加風色欠利一遇順風卽行押送出境臣陶澍因遠在清江浦往返需時卽由臣林則徐會同提臣等就近督飭妥辦除俟押送交替再行具奏外合先附片以

聞伏乞

聖鑒謹

奏

道光十二年十一月二十八日奉

上諭陶澍等奏稱十月二十八日余山直東洋面有夷船一隻豎立三桅船面載有礮械桅上有旂一面寫天竺國商船字樣該船有說華語之人據稱天竺國係曠咭喇屬國船內裝載呢羽等物並稱在直東大洋見有江南遭風船隻經該夷救起水手十二名現要送交等語並稱答話之人係前次胡夏米船內之夷夥甲利據云前船已回此另係劉羅船隻殊不可信該夷狡詐性成難保其不藉此爲更換面目之計且船係自北而來甫由奉天折回又駛至江蘇洋而

誠恐其又闖入他省著奕顯琦善陶澍程祖洛鍾祥  
林則徐富呢揚阿魏元烺等分飭沿海文武員弁於  
夷船到境時立即驅逐不許令其停泊登岸將貨物  
與民人交易至該船所需水米尤不許沿海居民私  
行賣給接濟祇須嚴密防堵斷不准用礮轟擊及上  
船按查貨物以致滋生事端是爲切要該夷船一抵  
廣東著盧坤朱桂楨中祥等諭以天朝制度只應在  
廣東交易務須遵守定例不准私越各省卽飭該國  
大班管束飭令迅速回國至該夷船用腳船送出難  
民徐勝等十二名訊均係崇明縣人在周長發船上

充當水手尙有劉連一人見寧波船上救去著陶澍  
林則徐確查崇明縣有無周長發商船出口之事據  
實具奏將此各諭令知之欽此又於道光十二年十

二月十三日奉到

硃批另有旨欽此

陽明書ノ巻ノ三ノ三

九二二三

會同蘇撫覆奏驅逐夷船開行並嚴飭防範摺子  
奏爲夷船驅逐開行現飭舟師押赴浙洋並分別飭  
查防範緣由恭摺奏祈

聖鑒事竊臣等前因暎咭喇國夷船復至江省洋面當

將督飭曉諭緣由附片具

奏在案臣林則徐先於接准提鎮咨會時卽委候補

知府善慶太湖協副將鮑起豹馳赴海口隨同鎮  
道並會同上海寶山兩縣酌賞該夷人猪羊酒食  
以獎其救護難民仍剴切曉諭不准違例銷貨並  
將難民徐勝等十二名收回訊取確供交保分領

回籍正在催令開行間欽奉

上諭據國祥等奏十月初二日在隍城島遙見西南海面有暎咭喇國夷船一隻行駛甚速著嚴飭沿海州縣及水師營弁管帶兵丁駕駛船隻於該夷船過境立即驅逐不許令其停泊登岸將貨物與民人交易致令滋生事端至米糧尤不許沿海居民私行賣給接濟等因欽此

臣等恭錄欽遵復飭文武各員妥速驅逐並嚴禁沿海居民不許以米糧私賣接濟旋據稟覆海口行商鋪戶因奉嚴諭公立議單同詣天后廟前焚香設誓悉皆凜遵法度概不與夷人交

易該夷人見貨物不能銷售且官兵稽察森嚴卽  
糧食亦無從私買心生畏憚旋向營船聲稱前在  
洋中搭救商船致將梢篷折損求賞木板鐵釘趕  
緊修脩一俟雨雪稍止卽當開行等語當經蘇松  
鎮關天培蘇松太道吳其泰酌賞木板鐵釘催令  
趕修茲據稟報該夷船於十一月十五日起旋掛  
帆乘風開行臣等責成該鎮關天培督率將弁兵  
船押逐南行凜遵前奉

諭旨務令與浙省舟師明白交替不敢稍任含混並飛  
咨浙江撫臣提臣一體押逐回粵第夷情狡獪或



於押赴東南深水外洋之後料知師船不能寄碇  
仍復繞越過北亦須預防一面咨會山東撫臣分  
飭沿海縣營嚴行堵截以防竄越至此次夷船內  
能懂華語之夷人甲利一名卽係前次胡夏米船  
內夷夥臣等以胡夏米前船竄往高麗之後尙未  
得實在下落今旣認有前次夷夥且係自北而來  
則該船自卽係胡夏米之船當經移行提鎮並飭  
府縣確切查覆旋據僉稱此次夷船比胡夏米之  
船小至二丈有餘檣桅亦少一道細加察認並非  
原船因卽詰詢甲利從何又來其胡夏米原船究

往何處據甲利聲稱此次劉羅之船於七月十八日自天竺國開行原欲逕赴廣東因南風甚大吹到越南口岸適胡夏米之船到彼相遇胡夏米乘坐原船回去伊卽般過劉羅船上從直東深水大洋乘風向北十月初間到關東蓋州洋面天寒水凍不能停留隨又乘風南行復至江南等語查該夷人一而之詞原難憑信卽使所言屬實其爲包攬指引已屬顯然此次因有救護難民希圖藉通貿易今貨物仍不准銷諒可杜其妄念據稱十月初間在關東蓋州洋面似卽係隍城島所見之船

被逐折回但既非胡夏米原船則胡夏米究竟會  
否回國尙未可知臣等現飭水師將弁押送至浙  
省明白交替之後仍須在洋時加瞭探倘復有夷  
船竄至立即堵截回南並飭沿海營縣隨時防範  
不得以此次夷船業已開行卽爲了事一面咨會  
廣東省查明胡夏米前船並此次劉羅之船果否  
回粵統飭該國大班管束外所有夷船業已押逐  
開行並飭查防範緣由謹合詞恭摺具

奏伏乞

皇上聖鑒謹

奏

道光十二年十二月初五日奉到

上諭陶澍等奏夷船驅逐開行現飭舟師押赴浙洋並分別飭查防範一摺此次暎咭喇夷船向營船聲稱前在洋中搭救商船致將梢篷折損求賞木板鐵釘已於十一月十五日起旋掛帆開行仍著該督等責成該鎮督率將弁兵船押逐南行務令與浙省舟師明白交替毋許含混並著飛咨浙江省一體押逐回粵第夷情狡獪或於押赴東南深水外洋後仍復繞越過北並著飛咨山東分飭沿海縣營嚴行堵截以

防竄入再此次夷船比胡夏米船小至二丈有餘檣  
桅亦少一道據甲利稱胡夏米乘坐原船回去伊卽  
般劉羅船上其爲包攬指引已屬顯然惟旣非胡夏  
米原船則胡夏米曾否回國尙未可定該督等仍飭  
水師將弁押送浙省明白交替後在洋瞭探倘復有  
夷船竄至立即堵截回南並著沿海縣營隨時防範  
仍遵前旨不許令其停泊登岸將貨物與民人交易  
至米糧尤不許沿海居民私行賣給並著咨會廣東  
查明胡夏米及劉羅船果否回粵統飭該國大班管  
束將此諭令知之欽此又於道光十二年十二月二

十日奉到

硃批另有旨欽此

1876

1876

1876

1876

籌議巡洋會哨章程摺子

奏爲遵

旨嚴飭巡洋員弁實力巡哨定議勸懲章程以肅洋政

恭摺奏祈

聖鑒事竊<sub>臣</sub>接准兵部咨欽奉

上諭御史周彥奏慎重海防一摺嗣後務當嚴飭所屬  
各按定期巡洋會哨並責成該管巡道臨時查察取  
結至各營弁兵尤應勤加練習技藝嫻熟悉成勁旅  
不致視洋面爲畏途出洋戰船是否應需修造沿海  
礮臺額數查明築自何年安設何汛舊貯礮位幾尊



防守兵丁是否足額詳細造冊報部備查倘仍畏蕙  
偷安操防疎懈定將該督撫提鎮等從嚴懲處等因  
欽此欽遵咨行查照臣查外海水師責在巡洋如果

統巡總巡分巡各員認真會哨履險如夷盜船焉  
能游奕夷船亦何能乘風駛入內境洋面誠恐各  
該巡員實不免有畏蕙偷安情事當經照飭蘇狼  
兩鎮嚴督水師弁兵勤加練習使其熟諳水性並  
按期親赴洋面當面取結會哨確查戰船礮臺安  
設礮位及防守兵丁是否足額開造清冊呈送並  
飭藩臬兩司會同巡道悉心核議勸懲章程詳覆

核辦去後茲據該司道等會議詳覆前來臣查江  
南洋面南方以大羊山馬蹟山爲界與浙省毘連  
再南爲閩粵洋境又與暎咭喇各國海船相通東  
方以與浙省相接之盡山爲界此外爲深水大洋  
可通

盛京山東與朝鮮諸國其西爲吳淞口岸北爲大安  
戲臺等沙再北卽爲內地海洋之中有奈山又東  
北由鹽城縣起橫亘千里直抵北洋其沙尖與鶯  
遊山相對沙尖以南屬江南沙尖以北屬山東卽  
以鶯遊山爲界此洋境四至之大概情形也江南

省水師設有蘇松狼山兩鎮蘇標管轄中左右奇  
四營均屬外海營分狼標管轄中左右掘港泰州  
泰興三江七營又兼轄漕河標鹽城廟灣東海三  
營內除中左二營係內河泰州泰興三江三營係  
陸路其餘均爲外海營分其官各設一總兵其屬  
自副參以下其分轄洋面由馬蹟山北至佘山爲  
外洋崇明北面之戲臺沙爲內洋係蘇鎮所轄佘  
山以北至大安戲臺等沙爲外洋又由大安戲臺  
等沙以北爲內洋係狼鎮所轄陸路則有吳淞崇  
明等處礮臺兵房水師則有大船小哨闊頭舢板

等戰船以資駐防駕駛此該兩鎮管轄之營分洋面礮臺墩防戰船之大概情形也該兩鎮赴洋巡哨均遵照定例以三月爲一班每班分春夏秋冬四季以兩鎮總兵爲統巡副參遊擊等官爲總巡都守以下爲分巡委巡各按界址督率員弁兵丁駕馭戰船攜帶器械於內外洋面輪流巡查蘇松鎮於每年五月十五日親往大羊山洋面與浙江定海鎮會哨一次松太道豫赴會哨處所俟兩鎮到齊取結詳報又蘇鎮委員每月於柰山洋面與狼鎮員弁會哨一次狼鎮委員每月於大安戲臺

等沙洋面與蘇鎮營員會哨四次又於柰山洋面  
與蘇鎮委員會哨一次蘇鎮與狼鎮因分界之柰  
山及戲臺沙等洋面僅隔百餘里既有各員弁按  
月會哨且該鎮等駐劄衙門均離海較近故兩鎮  
向未親自會哨又狼鎮兼轄自鹽城縣起之洋面  
亦以狼鎮爲統巡遴派鹽城等三營員弁按季在  
洋輪巡鹽城營與掘港營會哨廟灣營與鹽城營  
會哨又與東海營會哨東海營與山東登州營會  
哨此該兩鎮赴洋巡哨之大概情形也伏思本省  
防海定例已極詳明辦理向無錯誤乃上年尙有

喚咭喇夷船潛入江省洋面驅行後復由山東折入之事雖江境洋面遼闊海路又四通八達防禦較難而該夷人意圖交易去後復來若不申明舊例酌定章程何以鼓勵弁兵綏靖海洋現奉

聖訓指示周詳欽遵劄飭司道會議除戰船均係按例修造並無虧朽礮臺營房因上年雨水較多間有坍塌現由藩司分飭管轄州縣會營趕緊勘估興修此後遇有損壞亦卽隨時修理務使一律完好以資防汎弁兵棲宿再戰船數目暨礮臺年分地址礮位兵丁數目現據蘇狼二鎮造具清冊咨部

備核其統巡總巡分巡分班出洋巡哨浙江定海鎮於五月十五日與江南崇明鎮卽蘇松鎮會哨於大羊山責成該管之松太巡道豫赴會哨處所當面取結向係遵照定例辦理毋庸再議惟會哨定期時倘風大難行例准該提鎮選定日期豫行關會但關會無一定期限而到洋恐不免參差應請嗣後定海鎮與蘇松鎮五月十五日例請會哨之期將是否風大難行有無改期情由約計除去行文程限及赴洋日期於五日前先行移知松太道前往取結按例辦理一面將公出緣由申報查

核如此酌定章程庶巡防益昭詳密而巡道亦無  
羈候之虞至出巡弁兵全在熟悉水性不畏風濤  
尤應教其熟識沙線方能經歷重洋若不明定章  
程不足以資勸懲應請嗣後隨帶會哨營弁千把  
等官除於會哨期內如有拏獲盜匪奸船例應議  
敘及遇有失事託故不行例應降罰均遵照定例  
辦理外仍令該管遊擊守備於統領出巡時留心  
察看如果熟諳水性不畏風濤准於每哨一次記  
功二次於每季換班時詳報上司存核得有記功  
八次如係千總卽照外海水師千總俸滿例由督



臣提臣嚴加考核發交統巡大員帶領出海試驗屬實准其保送如係把總酌照千總俸滿例由副參巡道嚴加考核詳明總督提鎮飭交隔營副將等將帶領出海試驗屬實准其拔補千總如有不諳水性畏懼風濤每次予以記過二次亦於換班時詳報積至記過八次亦由該管上司詳明總督提鎮飭令交給本營副參等將考驗如技藝亦無可觀者卽行斥革如弓馬尙屬可觀准其改撥陸路其守備以上各官均由該管統巡隨時察看詳記檔冊於保薦案內聲明聽候核辦至於所帶兵

丁令該管官於統領出巡時留心察看如有熟諳水性不畏風濤者每一次亦准其記功二次於換班時報明存案積有記功八次遇有外委缺出秉公考驗無論技藝多寡儘先拔補如係不諳水性畏懼風濤每一次亦記過二次於換班時具報積至記過八次如技藝亦無可觀者卽行革伍若技藝尙可造就亦准改撥陸路其舵工如給有舟師外委委牌者卽照把總例辦理如未給有委牌者卽照兵丁例辦理如此立定章程庶弁兵均知奮勉而水營益昭嚴肅總之陸師以操演弓馬爲先

水師以巡歷洋面爲重江省蘇狼兩鎮水師旣由  
統巡總兵督率官弁兵丁按例赴洋會哨所帶弁  
兵又由各上司各該管官詳報功過其蘇松鎮與  
浙省定海鎮會哨之時松太道親往取結戰船礮  
臺營房均係隨時修造整頓極其周密自不敢視  
爲具文虛應故事惟欲令弁兵之巡洋得力尤在  
提鎮大員欽遵

諭旨查照定例轉飭副參都守各員督率弁兵隨時訓  
練使其技藝嫻習不畏波濤且豫識風沙水線一  
日隨同巡哨自能駕船下海若履平地近可以緝

捕盜賊遠可以威攝外夷糧餉不患虛糜舟師悉  
歸有用倘或統巡總巡分巡及取結各官並不親  
身督率前往礮臺等項並不隨時修理一有覺察  
臣惟有核實嚴參以仰副

聖主整頓海洋之至意除將蘇狼兩鎮送到清冊咨部

查核外所有籌議緣由謹會同江蘇巡撫臣林則

徐江蘇提督臣段琨合詞恭摺具

奏伏乞

皇上聖鑒敕部核覆施行謹

奏

道光十四年正月初八日奉到

硃批兵部議奏欽此

籌議嚴禁鴉片章程摺子

奏爲遵

旨籌議嚴禁鴉片章程以塞漏卮恭摺覆

奏仰祈

聖鑒事竊臣於本年五月初二日准刑部咨開道光十

八年閏四月初十日奉

上諭黃爵滋奏請嚴塞漏卮以培國本一摺著盛京吉林黑龍江將軍直省各督撫各抒所見妥議章程迅速具奏摺並發欽此當卽遵照部咨轉行江蘇巡撫漕運總督南河總督一體欽遵在案臣伏思鴉片

烟之害起自粵洋流毒內地中其引者殃身廢務如醉如迷久且竭中國之貲財貽害及於

國計苟有人心孰不切齒痛恨溯查鴉片本名阿片又名阿芙蓉見於明人所著本草綱目及醫鑑等書初未言其爲害也

國朝康熙二十四年開禁南洋鴉片列入藥草項下每斤徵稅銀三分其後吸食漸衆嘉慶十五年奉有

嚴禁其時已知引毒之爲害而耗財猶未甚也嗣復屢議科條加重辦理然惟開館者議絞販賣充軍吸食

之人杖徒而已不至於死也而吸食成引者頃刻  
無烟卽有性命之憂是以甘心觸犯而購求愈切  
奸販乘其所急得以擡價居奇胥役之包庇關津  
之賣放皆從此起迨至暗市移於荒島快蠟出於  
深宵衝風破浪冒九死以犯不韙而鴉片愈益矜  
貴價值愈益擡高矣價愈擡而紋銀之出洋遂愈  
多矣是非不禁也禁之而不嚴適以毆之轉不若  
不禁之猶可聽其起落而銀出不若是之甚也惟  
鴉片之禁久已垂爲

功令旣未便更張而弛其禁如該鴻臚所陳謂內地



所熬烟土食之不能過引是雖開種罌粟之禁亦未必能易其所嗜而欲力挽頽波俾免紋銀透漏則該鴻臚重治吸食罪以死論之奏實亦出於萬不能已之苦心而爲救時之急務也在

朝廷好生德洽欽卹惟明豈不知吸烟止於自害未遽同於殺人者死而舉世波靡非重典無由震懾卽如酒以成禮而周書言羣飲者執拘盡殺何況吸食鴉片之人酖毒晏安久成廢物予以自新猶不知改誠如該鴻臚所云是不奉法之亂民置之重刑毫不足惜我

皇上仁育義正如蒙

特敕重辦誠有合於生道殺民刑期無刑之義惟是拏  
辦吸烟不難而難於獄市不擾若辦理無次而騷  
動及於閭閻窒礙先於行旅必致處處可生陷穽  
而良懦皆驚不但耗天下之財且傷天下之元氣  
轉非所以培

國本也至吸食鴉片既加重至死則凡情重於吸食  
者自應一律加重以絕來源臣籌思再四苦無良  
策謹據所見條議於後伏候

聖裁

一勸戒烟引宜刊方施藥並舉也查該鴻臚寺卿  
原摺請給一年限期戒烟斷引自今年某月日  
起至來年某月日止若一年後仍然吸食卽置  
重典等語查鴉片烟本卽內地罌粟花所作闢  
漢咭喇夷人更取陳死人士和之並有蟲如螞  
蝗者燒灰雜入其中一落腸胃見水卽生化而  
爲引得烟始帖轉更爽健黠者遂神其說謂可  
以提攝精神效在人淺之上其實蟲生於烟飢  
吞飽吐無非本人之元氣引重則未有不死者  
歷來斷除之方如忌酸丸南瓜藤露四物湯十

全大補湯和烟灰服之皆有效驗惟沈溺於烟者雖有方而不肯服其貧無力者又或有方而艱於配藥臣已飭首府刊刻各方轉行徧貼曉諭各處聞風知儆紛紛購藥斷烟並有好善之士選方配藥廣爲布施於窮民無力購藥者尤爲得濟現復通飭各府州縣一體照辦總期於本年內各處均知俾資改悔

一烟具烟土宜分別毀繳也向來查辦鴉片各案總以烟具烟土爲憑二者之中微有分別如售賣烟槍有用金玉鑲配者奇巧精緻其爲有心

犯法無疑亦有用泥土竹木製造雜入貨攤售  
賣者多係小本營生罔知律禁一經查拏此輩  
必先受其擾應飭令自行銷毀改業仍限一月  
爲期逾限卽辦至若烟土一項若亦聽其銷毀  
勢必仍行藏匿久之吸食自便是本未拔而害  
無由弭也勒限兩月內自行稟繳到官燒毀毋  
許稍有存留違者加重懲辦俾懲創之中仍分  
別輕重酌予自新之限以斷後患

一查辦鴉片宜分任各教官選同公正紳耆廣爲  
勸導也查原摺所請禁戒鴉片既定一年爲限

各省地大人衆有司官難以家喻戶曉卽徧貼告示亦恐視爲具文其耽於吸食者或謂一年限期尙早未肯遽斷卽自稱禁絕者亦無憑考察若令到官自首又恐徒益紛繁趨趨弗前是革面已難何論革心耶因思古人月旦之法以鄉評別人之善惡而等差之月有升降足示勸懲現例每逢朔望宣講

聖諭亦無非因勢利導化民成俗之意今鴉片傳染已深各學教官咸有教化之責應由州縣會同各該學選派紳耆中明白公正素行信服者各限各

境查出食烟之人諭令改悔仍於宣講之次傳  
集鄉眾曉以大義廣爲勸導昔陸九淵於白鹿  
洞講義利之辨聞者至爲流涕朱子謂其切中  
晚近人心陷溺之病如果剴切詳明敷宣木鐸  
必能開豁愚頑較之出示曉諭自更有益

一查辦鴉片宜責成保長不必隣佑互結也該鴻  
臚請於一年後取具五家隣佑互結仍有犯者  
准令舉發給與優獎倘有容隱一經查出互結  
之人照例治罪等語查五家之中良莠不齊如  
係同吸鴉片之人自必容隱出結甚至勾通串

鹿卽永無舉發之期若稍知自愛者不但不肯  
出結而亦難於舉發何者吸烟之人父師之教  
所不能入何況隣佑一經舉發不但深仇遠憾  
將種怨於子孫而且傳審質對已牽連於官府  
彼隣佑者豈不慮此勢必隱忍扶同而又不免  
於出結之誅彼隣佑何辜而受此吸烟之累非  
所以安良善也至保長爲城鄉牌甲之首果有  
吸食之人無不周知且稽察奸宄是其專責無  
可顧忌自不難於舉發倘有容隱或舉發而不  
實不盡亦不難於斥革懲辦所有隣佑出結連



坐之例似可毋庸置議以免波累

一審辦烟案宜確審速辦以免反覆也該鴻臚奏稱吸食鴉片是否有引到官熬審立刻可辨等語查鴉片有引熬審立見自不難於辨別惟

國家慎重人命例須由府轉司招解過院始成信讞方其質訊取供收監轉解有需時日而此囹圄道途之中猝然引發年老氣衰者或致倒斃其壯年氣血旺盛引尙未深者熬至數日或已全愈人情刁詐或以爲陵辱至死或以爲栽誣陷害曉詞翻案勢所不免自應確切取供迅速招

轉俾不至遷延更變藉口圖翻其引發而死者  
供證確鑿應毋庸議其引淺全愈者但能切實  
改悔似可量寬一線仍照枷杖本例滿日取具  
改悔切結責釋完案俾其自新倘再犯到官加  
倍治罪

一查辦烟案必須本官親自督拏如有假冒巡查  
卽應從嚴究治也各州縣查辦案件不能不假  
手吏役而吏役率多無賴不但包庇賄縱甚至  
般弄訛索無所不爲是以吏役詐贓定例綦嚴  
各州縣不能箝束必致轉爲所用狐假虎威動

滋紛擾此非章程所能懸定惟在各州縣身先督率其弊自除否卽嚴參示儆至各處匪棍竟有藉按查鴉片爲名假充吏役突行劫搶陸則夤夜打門水則聚衆登舟翻箱倒篋按取貲財如該鴻臚所稱借查烟爲名於往來客商肆意留難勒索者又不僅在吏役而假充吏役之害爲尤烈也應請嗣後如有假充吏役官弁借查烟搶物者無論得贓輕重均照強盜入室按贓例問擬斬決以安行旅

一與販鴉片宜加重罪名也定例與販鴉片烟照

收買違禁貨物例枷號一個月發近邊充軍爲從杖徒等語今買食之人議死若與販仍止軍徒似非平允此等棍徒本大力大到處勾通網利肆行播毒罪尤禍首情理難寬應請比照用藥迷人已經得財之例將爲首與販者問擬斬決其餘爲從俱改發回城爲奴以杜傳播

一紋銀出洋應分別加重嚴辦也定例黃金白銀違例出洋白銀數在一百兩以上者發近邊充軍百兩以下杖一百徒三年爲從及知情不首之船戶各減一等失察賄縱之汛口文武各官

俱照失察賄縱米穀例懲辦等語竊以爲海船  
出入豈得毫無日用百兩以下似可不究若百  
兩以上與數萬數十萬百萬同一科斷殊覺未  
安此等鬼蜮出沒風濤蠹國蠹民專心向外律  
以私通外夷罪有浮焉如該鴻臚所奏每歲紋  
銀出洋數至二三千萬之多若果屬實殊堪髮  
指該鴻臚請於吸烟擬死亦因紋銀出洋之故  
豈於盜運出洋之本犯轉行寬典不加分別應  
請嗣後紋銀出洋數及萬兩者一經查獲立即  
請

令正法梟示海口以快人心而絕烟源

以上各條均按照該鴻臚寺卿原奏參以微臣所見分晰籌議至於吸食雖擬死罪仍須分別等差協中定制應由刑部妥議具

奏頒行又原摺請將拏獲鴉片照拏獲強盜例送部引

見係爲鼓勵奮興起見亦應由吏兵二部議奏辦理如果奉

旨飭行號令一新遠近同心文武合力先清內署之劣幕歪奴各做衙門之奸胥猾吏有犯必懲不騷良

善行見疵厲全消有司不犯不獨鴉片斷絕而民  
氣蒸蒸咸欣

聖化彌鞏

國本於無疆矣所有臣遵

旨籌議各抒愚見緣由理合恭摺覆陳伏乞

皇上聖鑒

訓示施行謹

奏

道光十八年七月十五日承准

軍機大臣片知此摺存

内備查

月二八ノハ三集  
卷二二三 奏疏

三三





陶文毅公全集卷二十四目錄

奏疏 緝捕

請嚴湖南礦禁摺子

條陳緝捕皖豫等省紅鬍匪徒摺子

嚴緝潁亳一帶匪徒懲辦附片

訪獲潁鳳一帶匪徒懲辦附片

續獲潁鳳匪徒懲辦附片

續獲潁鳳泗等處匪徒懲辦附片

續獲亳泗匪徒懲辦附片

續獲結盟匪犯多名移交新撫審辦附片

籌款飭繳兇器摺子

飭屬嚴拏匪犯懲辦附片

請將徐淮海匪徒鎖繫鐵桿摺子

拏獲徐海一帶匪徒審辦附片

訪獲積年包訟棍徒並究出在京攬訟各犯請飭

拏解歸案審辦摺子

拏獲鄰省著名巨匪審辦附片

拏獲兇盜習教等犯審辦附片

拏獲假照案內要犯摺子

奏疏 緝捕

請嚴湖南礦禁摺子

奏爲奸民盜開礦廠請

旨嚴行封禁事竊 臣聞湖南辰州屬之沅陵縣有地名

大油山在清浪灘之上山險水惡數十里人烟絕  
少最利藏奸前年此山偶出金礦輒有奸民乘機  
盜挖數月之間聚衆數千地方官往捕當經嚇散  
而根株未靖仍有偷挖之事本年辰沅饑饉百姓  
乏食咸以此山有金可採冒死爭赴並有他處聞  
風而往者日聚日多其勢復將犯禁查大油山叢

爾一區爲山甚小無論礦竭之日難於遣散而此時辰沅荒歉穀米騰貴本地之民尙且乏食安能供此日益月增之衆况礦徒兇橫者多往往不顧身家性命沅陵偏近苗疆山深地阻聚此千百無籍之徒於險惡之區爲聚而難散之勢其爲害誠非淺鮮現雖有官駐守誠恐員微力弱難資彈壓應請

敕下湖南巡撫速飭該府親往設法遣散毋使奸民嘯聚致釀事端仍將此山永行封禁以絕希冀之心而杜將來之患再者湖南所屬如安化攸縣新化

邵陽武岡新寧東安辰谿瀘溪石門慈利永定桂陽桂東臨武各州縣向產鐵礦有題明開採者亦有私行開挖者因係內地尚無妨礙然礦洞幽深曲折易於窩藏盜竊且穿崖越嶺長至二三里及四五里不等往往洞口開於此山而偷挖彼山之礦甚者斷山截脈壞及墳塋住址殘毀可傷爭端易起聚眾械鬪涉訟釀命者不一而足竊思此等曠山雖未能盡行封禁亦宜妥爲防範毋使滋生事端應並請

賜諭該地方官切實出示毋許偷挖如有鑿毀人家墳

地及窩藏盜竊者從嚴辦理有犯卽懲於以澤枯  
骨而靖奸藪地方幸甚臣爲預防曠徒爲害起見  
是否有當伏祈

皇上睿鑒謹

奏

嘉慶十九年九月十七日奏本日奉

諭旨一道寄交湖南巡撫查禁

條陳緝捕皖豫等省紅鬍匪徒摺子

奏爲紅鬍匪徒日熾敬陳三急五宜以殄渠魁而弭

後患事竊臣聞安徽之廬鳳潁亳河南之南汝光

陳等處向有匪徒名曰紅鬍子其兇橫不法之狀  
自己久達

天聽臣近日細加訪察不但緝捕難於得力且有兇炤  
日張大非昔比不可不速爲殄除者謹將急切情  
形並緝捕事宜一一爲

皇上陳之

一匪徒前此猶散而今則日聚也查紅鬍原係白



蓮教匪漏網之人間出偷竊身帶小刀爲防身之具人以其兇猛故取戲劇中好勇鬪狠面掛紅鬚者名之然匪徒聞知猶以爲怒也近則居之不疑成羣結隊白晝橫行每一股謂之一捻子小捻子數人數十人大捻子一二百人不等恃其羽翼或劫人貲財或搶人妻女或當街臨市而喝人脫去衣裳且剗人眼睛謂之滅燈刀扼人頸謂之禁聲據險扼隘突起搶奪謂之打悶棍皆以夥羣日衆故爾肆行無忌此殄除之當急者一也

一匪徒前此有黨而今則有目也查匪徒零星藏匿彼此聲息不通猶易緝捕近則公然具有頭目羣相護從聽其指揮每要約百姓人家具備酒食蜂擁而至飲啗狼籍食畢放礮三聲而去此風河南之息縣光山正陽羅山汝陽項城爲尤甚其在逃未獲之王妮子實卽頭目而地方官捏稱爲從者也其在安徽者則李東山馬大振二人最爲出名劇匪現在藏匿阜陽縣境內每人手下約有千人此殄除之當急者二也

一匪徒前此猶畏官而近則官反退縮也查此等

匪徒皆因十年前之地方官因循貽誤養成後患此時徒類既衆益復膽大妄爲其器械則有擡槍兩人共舉一發可傷十數人不止掖刀已也地方官每有緝捕要犯不敢明拏非用數百金購線不能獲一人若僅帶差勇搗其巢穴則匪黨出入皆用擡槍不唯恐傷良民卽官役受傷已成激變各上司帶兵入境一兩月不能獲犯而地方官已筋疲力盡惟有隱忍不言顛預了事以圖目前之苟安而已匪徒悉此情形是以愈無忌憚此殄除之當急者三也

一靖匪徒宜官民一心也查匪黨雖多總不及其民十分之一徒以地方官吏養患已久告之於官官未必理而匪徒因此懷恨其受害更深卽使官爲辦理而吏役之使費衙門之陋規已攫其貲產之半矣是以甘心求免於匪徒而不肯更受官吏之害此實現在各省患盜之通弊欲求除莠安良非官爲百姓大作主張不可

一靖匪徒宜上下一心也州縣官號稱民牧祛除害馬是其專責然必上司賞罰嚴明始能令下如流若費力不討好其能實心任事者有幾

臣

聞豫省紅鬚其初本未猖獗自王侁子一案公然抗拒官兵未加懲創以致匪徒罔知顧忌此時勢熖漸成地方官未免畏首畏尾非上司爲州縣大作主張不可

一靖匪徒宜鄰境一心也查匪徒往來無定此拏彼竄其聚處多在鄰省交界及各州縣接壤之所此等處所名爲三不管每有失事案件地方官輒互相推諉以圖免處分而盜賊卽利此以爲窩穴查例載凡交界地方失事無論隔縣隔府隔省一面差役往拏一面移文關會協緝倘

有疎縱牽掣交部分別議處是此等藏賊之所  
例有專條豈容推卸至若大捻匪徒尤非一州  
一縣所能捕淨雖非所屬地方亦應三面會合  
文武協力同時掩捕俾巨惡就擒而後餘匪可  
挨次而理矣

一靖匪徒宜另置重典也紅鬍匪黨帶刀出入本  
易辨別徒以所犯劫搶百姓畏其結怨多不報  
官立案偶爾緝獲既無死法及至傷人殺人則  
又慮及處分將就了事並不提出紅鬍二字致  
與平民鬪毆之案無異無所懲創伏查現行條

例所載如川省囑匪浙西棚民臺灣不法棍徒以及回民搶奪苗蠻仇殺江南沙民械鬪之類皆因地制宜別設專條今紅鬍之害倍甚於此應請嗣後安徽河南等處匪徒犯事審係帶刀者申明從重辦理毋得僅以順拔小刀拒毆適斃爲辭庶隨案懲辦而匪黨之勢亦可漸殺矣

一靖匪徒宜平鹽價也查安省之潁毫豫省之汝光一帶例食淮鹽現在每斤值錢四五十文不等長蘆私鹽每斤不及半價是以居民利食私鹽其間私販鹽梟實繁有徒而紅鬍則爲之護

送每車私鹽索錢二百文每日私鹽不啻百兩  
賭博酒肉之貲皆出於此鹽車不足乃出而劫  
搶竊思淮蘆各鹽銷售原有定地若稍爲調劑  
或將淮鹽引地酌撥蘆綱而以淮綱之稅酌攤  
蘆引之內一轉移間私鹽不緝自淨但此事非  
一刻所能妥議且必紅鬚先淨而後可以辦理  
否則若輩失此口食之貲其搶掠更急惟善後  
之策似宜籌畫及此爲久安長治之計耳  
以上情形雖非起自近日而近日更甚誠宜及早  
綢繆庶不致釀成後患爲此謹



奏伏祈

皇上睿鑒謹

奏

嘉慶十九年十一月二十一日奏本日奉

上諭軍機大臣等御史陶澍奏紅鬍匪徒日熾敬陳緝捕事宜一摺河南南汝光一帶以及安徽潁亳等處向多紅鬍匪徒屢經降旨飭緝總未斂戢今據該御史奏稱近來日聚日多橫行益甚每一股謂之一捻子小捻子數人數十大捻子一二百人不等成羣結隊公肆搶劫或奪人貲財或搶人妻女甚至乞人

目睛且有頭目指揮河南之息縣光山正陽羅山汝陽項城爲尤甚其在逃未獲之王妮子卽屬頭目而地方捏稱爲從其在安徽省有李東山馬大振二人最爲出名現在藏匿阜陽縣境內每人手下約有千人州縣顛預不辦等語除莠安良爲地方官專責若畏難不辦日久養癰益滋隱患該御史摺內指陳人名地名鑿鑿有據其言必非無因且該匪徒夥黨約有千人則在逃未獲之逆犯祝現劉成章等難保不投入其中冀延殘喘著方受疇胡克家各遴派委員在河南息縣等處安省阜陽境內將王妮子李東山

馬大振三犯按名捕獲審明嚴辦並密訪各犯有無  
溷跡在內者設法查拏毋稍疏縱再本年安省潁亳  
一帶收成歉薄飢民甚多胡克家尤當密諭委員持  
以鎮靜務須不動聲色將指拏匪徒逸犯嚴密蹣緝  
首犯就獲則其餘夥黨自必畏懼解散不可張皇海  
捕致令夥衆驚擾激成事端此爲至要欽此

嚴緝潁亳一帶匪徒懲辦附片

再臣現因巡閱經過潁亳蒙宿等處察看閭閻均屬安靜民情亦俱質實惟西北一帶緊鄰豫省迤東接近徐淮交界處所多有匪徒出沒此拏彼竄刻須防範前據阜陽縣拏獲河南省逸犯王四卽王相如查係回民劉三軒挾嫌刺殺縣丞王慶瀾案內從犯已解歸河南審辦現又據蒙城縣報獲王懷正卽王四老虎強搶民婦拒殺事主一案又謝幅慘殺引差緝匪之保正李時一案又霍邱縣叢四陳全等挾葉連作線捉拏之嫌殺死伊家七

命並殺捕役王爽一案此數案皆因緝捕緊嚴逞  
見報復情節尤爲可惡經臣嚴飭勒緝已據該縣  
等緝獲兇犯俟臣回省卽行從嚴辦理臣現又沿  
途訪得阜陽縣匪徒李天罡趙四大王張保兒劉  
八兒鞏三秦照夏五國公張細狗亳州匪徒王甫  
懷遠縣匪徒褚會明壽州匪徒程茂王添曉蒙城  
縣匪徒王現王愷王騷崔四蔡五宿州匪徒楊大  
沅李克盛陳大勝武炳文武中信卽武蟒精郟三  
張七李冤王周二姐洪澤湖匪徒張建仁張建  
禮卽張三了頭均係兇惡匪徒有現據地方官拏

獲者有尙未緝獲者臣沿路密派員弁不動聲色  
分路偵查得有蹤跡卽知會文武無分畛域立時  
掩捕並告以如果出力定當據實獎勵總期有犯  
必獲以靖地方合將沿途密訪嚴緝情形附片具

陳謹

奏

道光三年四月十七日奉到

硃批所辦甚好知道了欽此



訪獲穎鳳一帶匪徒懲辦附片

再<sub>臣</sub>前於巡閱穎鳳一帶訪有積惡匪徒二十八名附片具

奏在案<sub>臣</sub>比卽密派員弁改裝易服不動聲色分路

偵緝旋據委員候補從九品金應祁把總李義等

會同地方文武將王添曉武炳元卽武炳文卽三

楊大沅陳茂卽程茂王愷卽王瑄拏獲內王添曉

武炳文王愷三名接據督<sub>臣</sub>孫玉庭來信現在奉

旨卽拏當卽派員押送江寧歸案審辦又張建禮一名

亦經署靈璧縣黃光裕會同督<sub>臣</sub>委員拏獲解往



江寧續又據各屬暨委員主簿何瑋從九張鈞金  
應祁等拏獲褚會明王甫王騷李冤王其李克盛  
劉八兒夏五國公卽夏寬張細狗卽趙細狗亦經  
宿州知州蘇元璠前署宿州劉用錫阜陽縣知縣  
孫靈府先後拏獲又據蒙城縣楊忻派丁赴河南  
永城縣拏獲蔡五一名惟武麟精經宿州拏獲後  
病死張建仁一名亦先經病死計臣途次所奏各  
犯已獲十七名已死二名尙有李天罡張保兒周  
小二姐等出入徐豫各境一俟偵有回籍消息卽  
可立時掩獲此外又據宿州獲有趙克義周作浩

盱眙獲有馬克簡卽馬四長腿梁廷棟石文彩蔣  
學韜壽州獲有王添曉打手卞二麻均係積惡匪  
徒經臣節飭查拏陸續就獲各員弁頗知奮勉至  
拏獲各犯獷悍素著百姓畏其挾嫌報復往往受  
害不敢報官現在嚴查究訊或乞人眼睛或庇藏  
梟匪或拒捕脫逃實屬兇惡匪徒應照例重辦卽  
或無案可查亦當嚴行懲押以靖地方其從前因  
緝捕被害如葉連一案業已兇犯全獲按律懲辦  
尙有蒙城縣范羅村地保李時因捕拏賊匪謝幅  
被其慘札多傷斃命除謝幅業已就獲另行照例

辦理外臣仍酌賞銀兩給李時家屬俾因公受害者有所獎卹庶良懦之氣獲伸而匪徒無從託足矣所有現獲匪犯懲辦情形合併附片以

聞謹

奏

道光三年六月二十三日奉到

硃批所辦甚好知道了欽此

續獲潁鳳匪徒懲辦附片

再臣前於巡閱潁鳳時訪有積惡匪徒當卽密派員弁會同地方文武分路偵緝獲犯王添曉李克盛等十餘名先後附

奏在案尙有趙四等未獲復督飭嚴拏茲據潁州營遊擊彭鎮川稟據候補外委王梅馬占鰲等督同府縣各役訪至河南鹿邑縣拏獲張保兒一名解交阜陽縣訊據該犯前因楊印窺破伊父竊情隨同病故之竊匪王義將楊印綑縛撩棄河內溺斃被獲擬絞道光元年六月恭逢

恩赦釋放仍以搶竊爲事糾夥王寅馬鎖等屢次竊奪  
半隻勒贖各事主畏其兇惡均未報案又據阜陽  
縣知縣孫靈府稟同候補千總呂秉悅等踴探得  
趙四鞏三在河南邊界藏匿隨飭兵役拏獲鞏三  
一名復又追至距阜境三百餘里之項城縣南頓  
地方設法將趙四誘出同該境兵役圍拏擒獲搜  
出身帶標刀二把並獲積兇捻夥楊氣一名解經  
孫靈府究出該犯趙四綽號趙四大王又號趙四  
老虎會同楊氣及夏五國公卽夏寬等二十餘人  
結捻持刀往來豫省邊界糾竊勒贖多次並點放

擡槍逞兇糾毆事主多未報案並聽從尹刻柴毆  
死王東山隨同丁大漢行劫李來泰貨店等情又  
據阜陽縣役會同新蔡縣役拏獲秦照一名有匪  
黨黃狗邀人追奪當卽繞道至新蔡縣將秦照暫  
交收管稟請咨題前來臣查趙四係著名搶首楊  
氣相爲狼狽鄉民被害不敢聲張此拏彼竄從未  
獲案此番追蹤至豫一併就獲必須窮究黨夥無  
分畛域密拏嚴懲以靖地方除飛咨河南撫臣飭  
將秦照解穎歸案辦理外所有續獲匪犯審辦緣  
由合併附片以

聞謹

奏

道光三年六月二十三日奉到

硃批所辦甚好設法偵緝務淨根株欽此

續獲潁鳳泗等處匪徒懲辦附片

再臣前於北閱時訪有潁鳳泗等處積惡匪徒當派員弁設法偵緝業已陸續獲犯趙四老虎王添曉等二十餘名節次附

奏在案尙有李天罡等在逃臣以該犯係著名捻匪必須嚴緝務獲復催飭勒緝並飭此外如有匪徒竄入一併嚴拏究辦以靖根株茲據署潁州府牛映奎阜陽縣孫靈府具稟於七月二十九日訪得李天罡潛回家內當卽會同千總甯樹琪飛往緝捕詎該犯兇惡異常聲稱扎死數人死亦甘心卽



口銜攬刀手執庫刀撲出拒捕被縣役格傷項頸  
兵役四面圍拏該犯料難脫身用刀自扎肚臍當  
被擒獲並起獲擡槍二杆刀四把長槍十八根訊  
據該犯供認結捻逞兇情急自戕屬實詰以捻夥  
何人該犯恃傷聲哼現在撥醫敷治一面查案研  
鞫等情又據盱眙縣知縣周士鈺稟稱會營拏獲  
朱圭孜一名係江蘇沐陽縣拒傷事主逸犯有沐  
陽縣役協拏又獲張二卽顧發才一名據供曾在  
山東博興縣拒殺捕役又據署靈璧縣黃光裕同  
千總侯正陞拏獲江蘇睢寧縣劫犯拒捕案內逸

匪胡元忠及荀添鳳二名又獲江蘇銅山縣拒捕傷人案內逸盜常二王和尚趙套王黑四名俱有各該縣原役協拏押歸犯事地方審辦臣查皖省近北一帶接連徐豫匪徒出沒最爲閭閻之害現據各該屬所稟匪徒竄入俱卽就獲緝捕尙無鬆懈至大江兩岸被水之處甚多誠恐有竊盜潛滋爲害商旅臣已嚴飭巡江文武梭織稽查並又添派幹員併力嚴巡地方均各救謐所有飭屬緝捕情形合併附片以

聞謹

奏

道光三年九月二十七日奉到

硃批所辦甚好隨時認真嚴密督緝除暴安良地方靖謐方爲不負委任也勉之欽此又於被縣役格傷句

旁奉

硃批應獎賞欽此

續獲亳泗匪徒懲辦附片

再臣前次訪有潁鳳等處積惡匪徒當派員弁拏獲趙四老虎等二十餘名節次附

奏在案尚有張七等在逃臣復嚴飭勒緝茲據宿州

知州蘇元璠稟稱將張七拏獲訊認爲匪屬實又訂期會同亳州在於交界處所巡哨另獲匪犯張六王破趙年趙萬劉狗范生王五曹經曹明志曹景沆張尿等十一名現在嚴審究辦並據亳州知州任壽世稟獲趙西城一名訊係行劫碭山縣事主董發祥案內逸盜又獲王二一名訊係行劫太

和縣事主王同聚案內盜犯均有各該縣緝役協  
拏已解歸犯事地方審辦又據泗州州判宋盛麟  
稟同州役營兵盤獲匪犯沈魁曹二劉潮金顧大  
顧三王起盈王老漢等七名並搜獲鐵銃長槍鐵  
尺鐵鑿等具訊係向在淮湖等處乘船滋擾現俱  
嚴審究辦至皖省江面延袤六百餘里時屆嚴冬  
宵小易生經臣嚴飭沿江州縣設卡巡緝並添派  
幹員分段巡查現據委員劉際昌標弁王應魁等  
稟稱沿江上下晝夜梭巡並無失事惟巡至和州  
鮎魚嘴地方時近昏黑有盜潛上客船持刀扯砍

客商該員弁等當同該州兵役趕往圍拏盜匪持  
刀逃走追陷泥中當被擒獲查詢該犯名胡和尚  
又名胡高腳其同夥奚義全朱升等攜帶妻室詭  
易姓名逃至鳳陽縣界亦經和州丁役協同該縣  
盤獲解審其餘各屬均屬安靜臣仍嚴飭各員弁  
始終勿懈以除根莠而靖地方合併附片以

聞謹

奏

道光四年正月十一日奉到

硃批查拏甚屬認真知道了欽此

陸門子家系名集

卷二十四

其

拏獲結盟匪犯多名移交新撫審辦附片

再鳳穎一帶與徐豫毘連向爲匪徒出沒之所經

臣節次飭拏獲有兇盜匪棍百數十名嚴行懲辦

地方稍資安戢誠恐各牧令始勤終怠復飭隨時

訪查勿稍鬆勁茲據宿州知州蘇元璐具稟訪得

巨匪管希文等有異姓結盟聚匪滋害之事當卽

會營先獲韓起分王合僧原青三名究出管希文

起意結拜弟兄首從共三十餘人飭差嚴拘又獲

高得芳高得茂二名被管希文帶領多人在途劫

去等情臣查管希文前曾共毆梁得金身死並糾



同賈孟西等二十二人結拜弟兄犯案從重擬流  
恭逢

恩詔免罪今復結盟奪犯實屬怙惡兇橫其聽糾黨夥  
亦均係匪徒必須嚴拏懲治以絕根株當飭各屬  
文武會同堵緝卽據亳州知州任壽世密偵得首  
犯管希文在雒河集藏匿星夜馳往率同巡檢余  
桂森候補府經歷陸燿如外委郝凌雲等各帶兵  
役四面圍拏該犯管希文膽敢率夥執持刀械拒  
捕被兵役打倒捆住並獲夥犯姚進禮黃金梅陳  
幅謝宜鄭炳雪等五名復協同河南永城縣四面

掩捕又獲夥犯李合正劉希珠江有富高得強高  
福齊高得芳申尙有王應沅朱炳照朱彩彰孫宏  
進朱鳳淋賀立本劉思樹李二呼山宋傳經陳懷  
璧高得茂英九思胡心朋等二十名就近交永城  
縣研訊並據該州蘇元璐拏獲董思渠江有序張  
悅秦棕堯陳連董廷桂相景度謝光得張禿匠董  
玉琢等十名又據潁上縣知縣劉耀椿拏獲丁四  
歪孜楊二泮等二名隔別研究俱供結盟奪犯係  
管希文造意爲首惟同夥人數間有參差並究出  
僧原青尙有搶占婦女情事先後錄供稟報前來

臣查管希文等甫經聚眾結盟卽經該州等訪聞  
拘獲首從四十餘名緝捕尙屬認真此等匪徒愍  
不畏法必須提省嚴究盡法處治以除地方之害  
當卽飛提並咨會河南撫臣飭緝各犯來皖歸案  
審辦現據陸續解犯到省尙未齊全正在提審間

臣奉

諭旨調任江蘇巡撫卽行起程除移交新任安徽撫臣  
張師誠催提未到各犯一併嚴審究辦外合將拏  
獲結盟匪犯情形附片奏

關伏乞

聖鑒謹

奏

道光五年七月初五日奉到

硃批查拏甚好知道了欽此

阿彌陀佛  
卷二

三

籌款飭繳兇器摺子

奏爲籌款飭繳兇器以重民命而靖地方仰祈

聖鑒事竊照皖省鳳潁泗州等屬界連徐豫民情好鬪動輒傷人其傷人之具烏槍而外多屬金刃緣該境愚民久沿惡習往往藏置例禁刀槍以爲保衛身家之用迨藏之既久口與器習偶然爭角順手取攜瀾無不傷傷無不死爲禍之烈與烏槍等此而不設法以籌之非所以重民命而靖地方也臣以爲嚴查飭禁或致滋擾不若因勢利導使民易從恭查前奉

諭旨民間私藏鳥槍積習相沿一旦按拏治罪未免有

滋擾累著通諭各省出示曉諭准其呈繳給價等因

欽遵在案敬繹

訓示實為良法美意臣推廣

聖訓屢諭鳳潯泗三屬民人將刀槍等項違禁器物同

鳥槍一併繳官給價然非籌款發給價銀恐小民

顧惜薄值難期踴躍查蕪關有解交撫署公用銀

兩經前撫臣李鴻賓奏明每歲酌撥銀四千兩解

存藩庫以為緝捕公費除連年因公動用外截至

本年五月底尚存銀六千四十五兩零前項銀兩

本由巡撫衙門劃出爲緝捕之用自可以公濟公  
臣業於前款內飭司撥銀二千兩解交廬鳳道戴  
聰酌量分給各屬爲呈繳各器械價值並飭各牧  
令廣爲勸諭務令小民咸知將鳥槍刀槍等項兇  
器悉數繳官一俟繳到卽隨時發價俾知踴躍仍  
飭不得假手書役致滋擾累并將收繳件數按月  
一報期於盡淨而後已如此辦理庶收繳不託空  
言帶刀或能衰息於整飭民風似有裨益合將籌  
辦緣由恭摺奏

聞伏乞



皇上聖鑒謹

奏

道光五年七月初十日奉到

硃批知道了欽此

飭屬嚴拏匪犯懲辦附片

再江蘇省徐邳淮海一帶與皖豫山東等處犬牙相錯爲梟匪出沒之所逃兇逃盜間亦潛匿隱伏此拏彼竄每難就獲臣抵任後與督臣琦善面商嚴飭地方文武無分畛域設法堵拏旋據各營縣緝獲梟徒賀三虎等二百餘名因人數較多逐程解蘇有需往返當經督臣飭委運司就近審辦此外又據海州獲犯尹廣修等泰州獲犯夏太等興化縣獲犯王繼茂等南匯縣獲犯李大觀等青浦縣獲犯張和等宿遷縣獲犯何德等睢寧縣獲犯

王學魁等贛榆縣獲犯彭貴等共計一百餘名或係結夥販私或係開巢護送均經會營拏獲起有刀槍火器車船私鹽等物並據江寧縣拏獲安徽當塗縣越獄重犯唐二湯二二名泰興縣拏獲上元縣逃兇程喜一名常熟縣拏獲崇明縣逃盜陳二顧大二名先後協同稟報經臣批飭臬司嚴審究辦此次各員弁破除畛域之見獲犯多名緝捕尙屬認真現值嚴冬宵小尤易竊發仍飭各屬督同兵役梭織巡查毋稍鬆勁以靖地方合將緝獲各匪分起辦理緣由附片以

聞謹

奏

道光六年正月初四日奉到

硃批禁暴安良地方大吏之先務汝能留意朕甚嘉焉  
嗣後倍當奮勉揆除窩主尤爲扼要勉之毋忽欽此

四ノ家ノ公ニ集

卷二十四

三十五

請將徐海匪徒鎖繫鐵桿摺子

奏爲查辦刀械匪徒請嚴懲其始以資整飭仰祈

聖鑒事竊照江蘇省徐邳淮海一帶與皖豫山東等處

犬牙相錯匪徒惡棍出沒其間兼之民俗强悍以

佩刀執械爲能事傷人釀命之案倍於他屬屢經

臣督飭訪拏拘獲匪犯多名並起獲兇器等件疊

次附片

奏明懲辦在案惟查此等匪棍其始亦不過尋常游

手任性而行漫無拘束漸至三五聯絡藉端嚇詐

稍有睚眦卽拔刀相向庸懦畏勢不敢與較以致

益鳴得意愈肆橫行久之遂成掖刀渠惡騷擾棍徒兇搶仇殺爲害遂烈雖屢加創艾總未能杜絕根株良由習與性成其來已非一日查定例掖刀匪徒在於場市結夥搶奪原有斬絞之條棍徒生事行兇亦有遣戍之例一經犯案不難按例加重辦理而此等佩執兇器偶然挾詐逞兇平日又無犯法實跡按照本例僅止枷杖既不敢稍存周內強相比附而責釋之後故智頓萌轉以輕於嘗試長其犯法之心實屬大爲民害臣思刑戮施於小人與其治之於已成而窮搜遠捕誅不勝誅自不

若防之於未然而小懲大誡辟以止辟伏查嘉慶十六七年間四川廣東兩省因緝匪及無籍棍徒攜帶刀械行竊嚇詐奏請鎖繫鐵桿欽奉

諭旨允行厥後匪徒稍斂戢今江蘇省徐淮海三屬匪徒與四川廣東情形相類應請仿照該省成案除常用小刀不在例禁外如有佩帶兇器刀械之挾詐棍徒一經拏獲每名鎖繫鐵桿一枝以四十斤爲度定限一年果能改悔自新卽予釋放若不悛改再繫一年倘仍始終怙惡卽按其情節照棍徒屢次擾害行兇之例分別從嚴究辦庶幾消其桀



驚力挽頽風於懲創中卽寓振興之意再江蘇省  
接近如山東之兗沂曹三府河南之汝陳光等府  
州安徽之潁鳳泗三屬民情勁悍地界相連可否  
一體仿照辦理於壤錯相連之處緝捕更爲有益  
臣爲戢暴安良起見謹會同兩江總督臣琦善恭  
摺具

奏伏乞

皇上聖鑒訓示遵行謹

奏

道光六年四月初三日奉到

硃批另有旨欽此同日奉到道光六年三月十七日內閣奉

上諭陶澍奏請嚴懲刀械匪徒一摺江蘇省徐邳淮海一帶與皖豫山東境壤毘連匪徒出沒每以佩刀持械爲能始則三五成羣藉端嚇詐繼則肆意橫行兇搶仇殺最爲地方之害茲據該撫以此等佩執兇器匪徒偶然挾詐逞兇平日又無犯法實跡按照本例僅止柳杖旣未便照掖刀匪徒結夥搶奪及棍徒生事行兇之例強相比附而責釋之後故智頓萌轉以輕於嘗試長其犯法之心援照四川廣東懲辦緝匪

棍徒之例鎖繫鐵桿以期小懲大誡著照所請嗣後  
江蘇徐淮海三屬匪徒如有佩帶兇器刀械挾詐逞  
兇者一經拏獲每名鎖繫鐵桿一枝重四十斤爲度  
定限一年果能改悔自新卽予釋放若不悛改再繫  
一年倘仍始終怙惡卽按其情節照棍徒屢次擾害  
行兇例分別從嚴究辦其接近江蘇之山東兗沂曹  
三府河南汝陳光等府州安徽潁鳳泗三屬民情強  
悍地界相連並著一體仿照辦理以挽頽風而安良  
善該部知道欽此

拏獲徐海一帶匪徒審辦附片

再徐海等屬向爲匪棍出沒之所經臣飭屬嚴拏  
先後據獲梟徒兇盜共三百餘名分起審辦奏蒙  
聖鑒在案誠恐宵小潛入復嚴飭巡緝茲據徐州府張  
作楠轉據邳州李正鼎稟報獲有匪犯蕭玉明等  
十餘名查起兇器十餘件又據海州營參將王慶  
元稟報會同該州劉鈴等獲有匪犯祁三等十餘  
名查起長槍一桿壯刀三把訊稱或係販私行竊  
或在山東鄒城縣開場聚賭剽劫私鹽逃逸並據  
署海州營參將吉祥保稟報會同該州劉鈴巡獲

賊匪費小虎等十餘名按獲壯刀一口均認爲匪  
不諱又據該參將吉祥保稟報拏獲鹽犯王三盛  
干春等十餘名海州營錢家集都司周祐先後稟  
報拏獲鹽犯鄒蘭王懷禮等十餘名均起有車輛  
鹽斤又據護京口水師副將事署鎮江營參將秦  
攀萼稟報督飭瓜洲營守備李長貴等拏獲梟匪  
曹華拒傷線目並獲匪犯萬景興等起有刀秤等  
物又據該參將秦攀萼稟報署高資營都司吳加  
寶督率弁兵拏獲倂梟周得勝等共計拏獲匪徒  
鹽犯七十餘名共獲私鹽數萬餘斤各等情臣查

刀槍兇器有干例禁現在人械並獲亟須究治且  
恐各犯另有不法別案尤應嚴切根究俾無遁情  
當經批行分別確審據實懲辦臣仍飭各屬實力  
查拏期於有犯必獲以靖地方合將續獲各匪辦  
理緣由附片以

聞謹

奏

道光六年四月初三日奉到

硃批所辦甚好欽此

附三身公全集

卷二十一

三

訪獲積年包訟棍徒並究出在京攬訟各犯請飭  
拏解歸案審辦摺子

奏爲訪獲勾結攬訟各棍徒並究出在京包攬遞呈  
各犯請

旨飭拏歸案審辦事竊查近來京控省控各案往往情  
節甚微而橫生枝節牽累多人一經質訊明確多  
屬無辜問之原告又似非其本意臣細加察訪竟  
係藉訟拖累冀圖訛索其中搭擡構釁包攬主唆  
皆所不免亟應嚴拏以清訟源當諭臬司慶善遴  
委幹員密訪旋據蘇州府陳鑾稟稱訪有南匯縣



監生葉墉在省開張客寓招集訟師包攬串訟隨會督委員通判徵良縣丞常恩等將葉墉及葉朝奎張金照周裕聲張秀王二趙徵王雪堂等先後拏獲到案並搜出詞底稿簿及搆訟書信各件訊據葉朝奎供葉墉係其堂弟在省以開店爲名專攬詞訟延請浙江石門縣監生張金照上海縣文生趙徵及王雪堂等商做詞狀張金照住近葉墉臥房從竈邊出入不輕出外凡有南滙人告狀皆葉墉等經手伊在店寫賬知有鍾振聲張壽昌孫綱珍杜觀成於二月間同時進京告狀曾經葉墉

信囑在京包攬遞呈之金老四照應金老四帶領  
鍾振聲等至李玉山家居住商量分起遞呈又有  
京控之洪敘山並上控學院衙門之朱攀桂等及  
上海人梅信昌訟事亦係葉墉包辦每案得受洋  
錢多少不等張壽昌鍾振聲洪敘山呈詞係王雪  
堂所做孫懶珍杜觀成梅信昌呈詞係張金照所  
做葉墉詐得銀錢與趙徵等分用等語質之幫工  
張秀王二俱供葉墉包訟屬實並據周裕聲供稱  
伊因與女婿互控投託葉墉許爲包辦因其索取  
洋錢過多伊給錢太少被葉墉詈罵攆逐未及般

寓被獲提訊王雪堂供認改做詞稿屬實前有吳  
柳溪到寓言及京控案件多在葉墉處等語惟葉  
墉張金照趙徵現尙恃符狡展不肯吐實請一併  
革審等情臣查葉墉係前次審結京控案內之人  
此次鍾振聲孫懶珍張壽昌及杜觀成等陸續京  
控均籍隸南滙以同路進京之四人分作四起控  
告其實俱係葉墉包攬指使無怪前後呈控情詞  
如出一手現在其兄葉朝奎供詞確鑿同案諸人  
亦供葉墉攬訟屬實查閱撥出簿內鈔載道光六  
年七月十九日御史李逢辰條奏京控蠹吏重徵

苛斂欽奉

上諭一道又載戶部則例災蠲一條其餘多係呈底又書信數件內有云與楊姓不合亦欲相幫詞意顯與該縣作對扛幫評告而張金照行篋所藏信稿皆影響暗昧之語就其文理可識者多係構串訟事有云以前涉手仇怨沸騰莫如暗中別事報他高樓看戰馬不傷脾胃使渠自願不暇其結放鬆此古今評訟第一上著也又云商通辦理一則檢得繳錢三則借刀殺人三不傷情面又云暗使請一場官司與他喫不妨起起花頭伊必令張三老尋

你你格外殷勤可延宕日期與他辦明如在神威  
矣又云趙大叔來云邇來精力不濟恍惚異常今  
歲僅動筆你處兩紙餘不涉手意欲退避坐館閱  
初八日批論起來該落訴呈再上控敲足恐押抱  
人不敢涉手又云一辦必訪一訪必審又云險連  
我帶在其內幸用硬工撇掉又云日後遠颺別處  
有何親情面目等語觀此數信其陰謀播弄暗地  
唆訟及上控作詞之法均已直言不諱又慮訪押  
審訊預謀遠颺鬼蜮情形歷歷如繪明係一夥訟  
棍內外勾通串唆圖詐以致控案絡繹拖累無辜

大爲地方之害若不嚴拏重辦無以息刁風而安  
良善除將葉塘等分別咨革究審外查常州府通  
判徵良崑山縣縣丞常恩精明幹練遇事出力此  
案係該二員設法訪獲現仍責令隨同該府緝拏  
逸犯確訊究辦所有緝拏未獲之金老四李玉山  
二犯究出現住京城及通州地方相應請  
旨飭下步軍統領五城及順天府訪拏務獲解蘇歸案  
審辦以期水落石出理合繕摺具

奏伏乞

皇上聖鑒謹

奏

道光七年六月二十三日奉到

硃批所辦甚屬可嘉另有諭旨欽此同日奉到道光七年六月初五日內閣奉

上諭陶澍奏訪獲勾結攬訟棍徒並究出在京包攬遞呈各犯請飭拏審辦一摺近年京控各案往往情節甚微橫生枝節牽累多人竟係訟棍藉案播弄經該撫密訪將積年包攬之葉墉等拏獲革審搜出詞底稿簿及構訟書信各件所辦甚屬可嘉並供出現在京城及通州地方居住之金老四李玉山二犯內外

勾通串唆圖詐此而不嚴行懲辦何以息訟源而靖  
刁風著步軍統領衙門五城及順天府按照該撫單  
開各犯住址一體密速掩捕務獲解往江蘇歸案嚴  
辦毋任遠颺漏網欽此



下三象之三集

卷二十四

三

拏獲鄰省著名巨匪審辦附片

再淮徐等屬與河南安徽山東等處毘連向爲匪徒出沒之所經臣飭屬嚴查前後拏獲梟徒兇盜三百餘名分起審辦節次附

奏在案上年水災較廣宵小尤易潛蹤復經嚴飭各屬加倍巡防毋稍鬆勁疊據豐縣稟獲黃貝卜豆等訊係夥劫山東魚臺縣錢店及河南夏邑縣事主趙學義家案內逸盜贛榆甘泉儀徵等縣稟獲相洲秦兆彩陳老漢王鬻子等訊認行劫山東諸城縣事主逢九齡安徽天長縣事主刁延御等家

得賊不諱。陽山桃源等縣稟獲王鳳標、周禿子等。審係銅山甘泉等縣事主劉玉魁等被劫案內之犯。又婁縣稟獲王言大、張秀沅、陳四、張阿得、張泳、青水、煙阿三等六名。訊據王言大供認夥劫吳江縣事主袁岐昌家，並與張秀沅等疊竊多案。質之張秀沅等，供亦相符。其水煙阿三係廣西省逃軍。曾竊事主沈瑞芝家賊逾滿貫，並據署上元縣縣丞章春奎稟獲葉加成、張二、張大小、吳張、小王二、陳二、陳老等八犯，並起有刀棍槍頭等械。訊認夥劫安徽蕪湖縣事主徐永謙錢鋪得賊，逃逸移解。

上元縣審究犯供狡展解歸蕪湖查辦又據松江府知府李景嶧稟稱訪得積盜顧六夥黨甚盛出沒江浙兩省恣行盜竊查有署婁縣典史舒春元老幹勇健善於緝捕當令改裝易服會同武弁緝至浙江嘉興地方將該犯顧六及首夥蔡阿寶周阿寶擒獲發交婁縣審究等情臣查黃貝等均在鄰省鄰縣犯案一經入境卽據該縣等弋獲其顧六一犯係著名巨匪漏網多年該府等不分畛域遴委幹員踴躍偵緝卒使就擒兼獲夥犯緝捕尙屬認真當經批飭解歸犯事各縣分別審辦仍飭

實力查拏以期戢暴安良合將續獲各匪辦理緣  
由附片以

聞伏乞

聖鑒謹

奏

道光七年八月二十日奉到

硃批所辦甚屬可嘉欽此

拏獲兇盜習教等犯審辦附片

再准徐松江揚州各屬毗連豫東濱臨江海向爲  
兇徒出沒之所節經臣飭屬嚴拏梟匪兇盜不下  
三百餘名分起審辦均經附片

奏明在案冬春之交糧艘往來絡繹匪徒尤易竄入  
復經嚴飭各屬加意巡緝疊據清河銅山等縣稟  
獲安徽梟匪穆虎及首兇郝元景訊認在靈璧縣  
地方毆傷差役宣同身死宿遷沛縣並贛榆縣稟  
獲逃兇顧三喜孫二逸盜朱三虎孫名先訊係在  
直隸青縣砍死王三遼河南祥符縣殺死王四山

東蘭山縣搶奪宋建壽等拒殺事主案內之犯又  
據宿遷儀徵山陽武進等縣稟獲盜犯胡殿成張  
廷嵇士順嵇少白子張雙喜安應祥兇犯李文進  
等訊據供認竊劫清河高郵等州縣事主張張氏  
等家得贓挾嫌砍傷王全敬身死不諱並據南匯  
縣稟報先後訪獲盜匪莊秀等十五名訊認曾在  
龍頭山海洋行劫浙江事主應文英瀾船衣物並  
將船隻拆毀又據蕭縣銅山縣稟稱接准河南永  
城縣關緝在豫傳教之聶士貞耿泳升二犯當  
會同碭山縣將耿泳升等拏獲按查該犯等家內

並無違礙經卷圖像據聶士貞供指會拜耿泳升  
爲師習教傳徒訊之耿泳升狡不吐實俱解豫質  
審等情臣查穆虎等均在外省鄰縣犯案該縣等  
留心察訪於各犯入境時卽行拏獲其在豫傳教  
之聶士貞等接准該省咨緝單內尙有李連仲等  
七名籍隸河南恐聞拏緊急遁入江境自應一體  
堵緝免致免脫當經批飭將各犯解歸犯事各州  
縣審辦一面實力查拏毋稍鬆勁以絕根株而靖  
地方合將續獲各匪辦理緣由附片以

聞伏乞



聖鑒謹

奏

道光八年四月十一日奉到

硃批嚴密查辦務淨根株斷不可稍有疏縱欽此

拏獲假照案內要犯摺子

奏爲拏獲假照案內要犯任松宇劉東昇二名遵

旨解京審辦由驛具

奏仰祈

聖鑒事竊臣於前月下旬連奉

諭旨飭拏蔡繩祖龐煥假照案內各要犯業將訪得劉

東昇等蹤蹟並設法查拏各情形附片覆

奏在案其時臣已遴派幹員分路踴緝並札臬司通

飭查拏因劉東昇等先已潛逃北上一面飛飭前

途截捕並咨會鄰省各關一體密速偵緝旋據清

河縣知縣加知州銜張心淵稟報於五月二十三  
日接札卽日在該境臧家馬頭拏獲劉東昇及同  
行之天津縣人李廷瑞比時長元吳三縣及沿河  
各州縣兵役俱已趕至一併協獲又據臬司稟報  
於五月二十七日據委員試用府經歷顧毓奇及  
未入流金寶山等帶同府縣兵役將任松宇訪獲  
先後批解前來臣卽督同蘇州府訊據任松宇供  
稱年三十七歲曾在捐納房充當貼寫道光六年  
上退出替蔡繩祖們書寫假照分給銀兩均係貢  
監未入流等項其執照板片係劉東昇偷出填寫

後藏在蔡繩祖家前後書寫張數及得過銀錢多  
少記憶不清本年四月內出京行抵蘇州卽被盤  
獲等語又據劉東昇供稱年四十歲充當捐納房  
貼寫本年正月因眼目昏花難以寫字退出要想  
回南祭掃祖墓沒有伴侶託同部雲南司經承王  
承乾與天津人李廷瑞結伴那李廷瑞每年往南  
邊置買玉器往來熟悉就搭他的便出京到蘇城  
程四房客寓住了幾天就往西湖祭墓又到堂母  
舅金寶山松江寓所住了數日告借資斧見他光  
景窘迫隨即回蘇仍與李廷瑞一同往北行至清

江卽被拏獲至上年八月內周載控告蔡繩祖龐  
煥任松宇私給假照一案並無小的在內聞說這  
案假照內有林得先等名字行查安徽省小的就  
出來了並不知情等供查任松宇劉東昇均係假  
照案內要犯亟應解部質究除飭委候補同知高  
煥臣標署守備浦鈞管解任松宇劉東昇押赴刑  
部收審外其與劉東昇同行之李廷瑞現在因病  
取保咨查刑部如案內無名卽行釋放以免拖累  
此外蔡應聯賞濬姚鳳山各犯臣仍督屬嚴拏務  
獲解質毋稍鬆勁所有拏獲要犯各緣由謹會同

大學士兩江總督臣蔣攸銛恭摺由驛覆

奏伏乞

皇上聖鑒謹

奏

道光十年六月二十日奉到

硃批拏獲甚屬可嘉另有旨欽此同日奉到道光十年

六月十一日內閣奉

上諭陶澍奏拏獲假照案內要犯解京審辦一摺任松  
宇劉東昇均與蔡繩祖等同惡相濟係假照案內最  
要人犯該撫接奉諭旨飭拏卽遴派幹員分路踴緝

迅卽就獲甚屬可嘉陶澍著加恩賞加太子少保銜  
以示獎勵清河縣知縣加知州銜張心淵試用府經  
歷顧毓奇未入流金寶山俱著送部引見其任松宇  
劉東昇二犯現經該撫委員解京沿途所過地方著  
各該督撫酌派員弁按程護解迅速來京勿稍疎虞  
欽此

陶文毅公全集卷二十五目錄

奏疏 緝捕

捕獲盜匪侑梟分別委審懲辦附片

拏獲老虎涇梟匪多名飭審附片

訪獲習教匪徒究出匪黨散處地方分別提省及

委員查拏摺子

緝獲護私抽費逃犯飭審附片

訪獲鹽梟飭辦情形附片

拏獲強搶盜犯督率審辦附片

拏獲強搶鹽船匪徒嚴辦附片



縷陳地方文武先後會獲匪徒梟犯附片

各路查拏梟盜各匪分別懲辦附片

拏獲私梟匪犯懲辦附片

飭屬先後拏獲盜匪梟犯審辦附片

飭屬緝拏匪犯審辦附片

縷陳巡閱江西各境山水形勢及私梟會匪各情

形附片

江安兩省文武員弁拏獲犯贖數目摺子

奏疏 緝捕

捕獲盜匪侷梟分別委審懲辦附片

再除莠所以安良緝私所以疏引攸關緊要

臣疊

飭地方文武隨時密行訪拏以靖地方據各屬陸續破獲梟匪多起當交該府縣切實根究並將出力員弁分別記功獎拔其尤爲出力者存俟

奏明鼓勵茲據護理遊兵營遊擊趙瑾稟報督率弁兵在江巡見匪船二隻各匪持械拒捕隨奮勇追擒立將盜匪葉朝盛等十六名全行拏獲當於船內搜獲被匪拐擄之婦女幼孩二十名口並人耳

半個刀械贓物等件又據六合儀徵等營縣捕獲  
匪犯冷大冷二劉志榮等十五名亦係沿江劫搶  
訛詐擾害之積匪以上各犯均須澈究嚴懲臣已  
行提來省委員確審辦理又據揚州瓜洲等營並  
江都縣拏獲倭匪王正標等十八名並槍械贓物  
等件此內有當場拒傷兵役供認販鹽爲生者顯  
有積慣巨梟隱匿不吐未便任聽狡展致滋疎縱  
查兩淮運司駐劄揚州緝捕梟販尤其緊務臣已  
劄委該運司俞德淵就近督飭府縣研訊確情按  
律嚴辦以示懲儆所有捕獲盜匪倭梟分別委審

懲辦緣由謹附片以

聞謹

奏

道光十一年四月初一日奉到

硃批可見廢弛已久汝係朕特加信用之人能如此存  
心爲國宣力不但永承恩澤朕亦得知人善任之名  
當勉之又勉有加無已以副朕望欽此



拏獲老虎涇臬匪多名飭審附片

再儀徵老虎涇地方爲商賈往來舟航叢泊之所最易藏奸私梟侷匪雜出其間往往推其黠者爲大哥邀約黨羽爭占馬頭無惡不作臣時加察訪

自黃玉林蔣本明獲辦之後有梟目蔣來山綽號蔣四長子在彼勾結潛藏護私抽利該匪時船時陸居址無定均有夥黨護衛稱爲總老大行蹤極其詭秘該處人稠地密旣恐查拏時擾及大眾兼以人多易混動輒驚竄必須不動聲色始能捻厥渠魁適京口右營遊擊孫廷揚因公來浦經臣面

授機宜密委往拏旋據該遊擊孫廷揚覓帶眼線  
踴定梟目連日藏住老虎涇附近之世業洲尾隨  
卽會同副將李恩元帶領弁兵改裝易服水陸潛  
進於四月二十八日四更時分乘梟匪睡熟出其  
不意四面圍住千總鄭長清首先跳上匪船打破  
艙門該匪蔣四長子突見官兵來拏卽從被內跳  
出一躍入水奔逃額額外委劉長清亦躍入水揪  
拏鄭長清與候補千總李鎮元並卽赴水揪住把  
總馬世榮仇定遠額額外委陶得壽李清泰等及  
營縣兵役俱集一齊上前將蔣四長子擒獲並獲

夥犯六名詢名張立湯大義撒正蔣小六劉金元  
鄧三才在船搜獲刀槍火藥砂子等物此外又據  
把總馬世榮等稟獲許正玉劉元高等五名又副  
將李恩元督飭兵役追匪至霍家橋匪徒在岸放  
槍打傷在船額外劉長清水手張明山該弁等仍  
卽追拏另獲倭匪王得榮楊大青耿成等十名並  
船鹽刀械藥線等物又據候補千總李鎮元等拏  
獲梟犯李四趙文光及刀劍各一口又鄭長清劉  
長清拏獲王泰來卽王老談金秀二名各犯赴水  
奔逃追獲手執撲刀梟匪一名楊松查點艙內均



有鐵槍火槍撲刀火藥砂子等物又據署揚營參將三等子陳述祖稟獲顧鳳禮李錦秀程儀楨等三名又獲侷匪曹貫周等五名並刀械砂子等件又據督同守備李長貴等趕捕侷匪朱連科等十一名內有戴貴身帶大撲刀一口陶文得身帶順刀等物又據加都司銜三江營守備陳秉元稟獲鹽犯劉長青等四名及屯置硝磺侷匪秦彬等五名窩家劉萬一名並火硝蠟桿長槍九節鐵鞭撲刀悶香等物以上各犯均係各營縣協獲經臣飭發署運司俞德淵督同府縣嚴訊詳辦俾資整飭

理合附片具陳伏乞

聖鑒謹

奏

道光十一年六月初四日奉到

硃批緝拏甚屬認真出力著核實鼓勵欽此

甲子年三月十三日

五

訪獲習教匪徒究出匪黨散處地方分別提省及  
委員查拏摺子

奏爲訪獲聽從習教匪徒究出匪黨散處地方分別  
委員查拏及提省究辦恭摺具

奏仰祈

聖鑒事竊查習教傳徒久干例禁而安徽鳳潁等屬地  
方界近豫東尤恐有外來匪徒勾引煽惑臣與撫

臣屢飭該處員弁隨時訪緝茲據陞任宿州知州  
周天爵遊擊楊廷璧稟報二月二十五日據龍山  
汛把總張修澍訪得龍山集民張義法等出錢

習教情事該州營卽會同署鳳穎同知韓景魏督  
率備弁兵丁馳往該處於二十七日拏獲張義法  
劉光貴二名在張義法家搜出歌詞一紙係剽竊  
經書而成並無違背語句當究出張義法同其子  
張興銳及劉光貴均拜從河南永城縣人魏中沅  
卽胡惠書傳習尙有州民盧廣必卽盧連城徐幫  
俊並永城縣民戚老卓卽戚卓章李喜一同習教  
該州營等復往會拏於二十九日將盧廣必徐幫  
俊拏獲並馳赴永城縣督同該縣兵役拏獲李喜  
押帶回州訊據張義法等供出張興銳於道光十

一年八月遇永城縣人魏中沅卽胡惠書言其能  
傳大乘教卽帶同回家向張義法告知魏中沅聲  
言伊係直隸鉅鹿縣孟家莊人孟老藏傳授熟讀  
歌詞坐功運氣將逢午年卽有水旱瘟病大劫在  
教之人均可得免張義法等信以爲實卽拜魏中  
沅爲師魏中沅寫給現獲之歌詞一紙口授彈花  
織布兩歌並令盤腿靜坐名爲坐蓮花兩手捧腹  
名爲捧太極圖一日三次默誦名爲用吾日三省  
之功死後不致下降畜類並云孟老藏與北京蘇  
大人卽大王爷同教卻未知名字蘇大人之婢

女名女媧氏非在慈雲庵卽在白雲庵修煉孟老  
藏將其近處尼姑金玲帶赴庵中與女媧氏一同  
傳教凡欲習教須先給銀錢送交孟老藏轉送蘇  
大人處掛號少者來生得福多者得官等語張義  
法父子卽被所惑送錢九千文張興銳旋邀伊岳  
劉光貴拜魏中沅爲師給錢五千張興銳復帶魏  
中沅至盧廣必家魏中沅因盧廣必讀書多年伊  
未便爲師令盧廣必往鉅鹿縣王虎寨地方尋伊  
師兄孫老聚帶赴孟老藏家傳習盧廣必聽從於  
八月間卽赴鉅鹿縣尋獲孫老聚留住一日盧廣

必給銀一錠孫老聚帶領盧廣必往孟老藏家拜  
孟老藏爲師鈔給歌詞盧廣必於九月間回歸與  
張義法等往來講究李喜係魏中沆表弟徐幫俊  
素與魏中沆相識俱教從魏中沆習教等情臣查  
在逃之魏中沆由河南永城縣來至宿州傳徒習  
教其所授歌詞雖尙無違悖字句而斂錢惑衆已  
大爲風俗之害且據現獲之張義法盧廣必等供  
出魏中沆之師係直隸鉅鹿縣人孟老藏與京中  
蘇大人同教蘇大人之婢女名女媧氏與尼姑金  
玲均有傳習邪教情事不可不嚴拏澈究臣一面



委員馳赴宿州會同該州營再行嚴密訪緝一面  
由安徽撫臣鄧廷楨將現獲之張義法劉光貴盧  
廣必徐幫俊李喜五犯提赴省城確審重辦並移  
咨直隸督臣琦善河南撫臣楊國楨將傳徒之孟  
老藏魏中沅及習教之孫老聚等一體查拏審辦  
至所稱京中蘇大人卽大王爺雖未能指出名字  
而所稱蘇大人之婢女名女媧氏在慈雲庵及白  
雲庵與尼姑金玲一同傳教之語則已有住址名  
號可查相應請

旨敕下步軍統領五城順天府將白雲庵及慈雲庵二

處託名女媧氏之婢女並尼姑金玲飛速確訪嚴  
拏究明蘇大人卽大王爺實在下落務獲懲辦爲  
此恭摺具

奏並繕錄揆獲歌詞恭呈

御覽伏乞

皇上聖鑒謹

奏

道光十二年四月初三日承准

軍機大臣字寄道光十二年三月二十五日奉

上諭陶澍奏訪獲習教匪徒究出匪黨散處地方分別

查拏提省究辦一摺所辦甚好習教傳徒久干例禁  
近來匪徒故態復萌實堪痛恨必應密速查拏認真  
辦理以期淨絕根株所有現獲之張義法劉光貴盧  
廣必徐幫佼李喜五犯著卽提赴省城嚴審確情從  
重究辦其在逃之魏中沉及習教之孫老聚卽飛咨  
直隸河南督撫嚴密查拏歸案究辦至籍隸直隸鉅  
鹿縣孟家莊人孟老藏前因王老頭子傳徒案內供  
出已查拏該犯到案交軍機大臣會同富俊及刑部  
嚴審其張義法等所供白雲庵及慈雲庵二處託名  
女媧氏婢女並尼姑金玲蘇大人卽大王爺實在下

落已飭步軍統領確訪嚴拏務獲歸孟老藏案內審  
辦矣將此各諭令知之欽此又於道光十二年四月

初八日奉到

硃批另有旨欽此

傳家寶卷之五

十一

緝獲護私抽費逃犯飭審附片

再本年江廣回空軍船經漕臣遴選幹弁沿途查

禁私鹽不許顆粒夾帶臣陶澍復於揚關一帶委

員逐船梭查並因蘇松常鎮等屬例食浙鹽亦恐

有回空夾帶未便稍分畛域一例挨船嚴梭均屬

淨盡並無偷載似漕船帶私之弊已可肅清惟儀

徵老虎涇地方舟航叢雜最易藏奸緝捕稍鬆則

梟匪乘機興販爲害離綱前有蔣四長子卽蔣來

山潛匿在彼護私抽費經臣密派員弁拏獲審辦

奏明發遣在案嗣臣訪聞該犯復又逃回藏匿該處

仍圖糾匪販私臣於道赴清江浦時面諭京口水  
師副將田松林不動聲色密查嚴緝去後茲據該  
副將稟稱帶同右營遊擊糜延慶署守備劉長清  
及弁委兵丁等跟蹤圍拏署守備劉長清等認明  
該犯座船首先跳上船頭該犯蔣四長子驚起赤  
身持刀從艙內跳出被官兵將刀打落即時擒獲  
高資奇兵等營縣兵役各駕船來協獲等情除委  
兩淮鹽運司督同府縣提訊嚴辦另行具

奏外又據甘泉縣知縣鍾承露稟報帶同宿遷縣丁  
役等拏獲行劫浙江差弁高泰滄案內正犯史盤

五查此案前經拏獲顧大苓史安五顏全池等三  
名茲正犯就獲卽由臣林則徐飭司提省審結合  
併附片具陳伏乞

聖鑒謹

奏

道光十二年十一月二十八日奉到

硃批好欽此





訪獲鹽梟飭辦情形附片

再兩淮鹽務本年自入秋以後漸有起色良以糧  
私查緝淨盡梟販亦陸續擒拏所致但當事有轉  
機緝捕尤宜嚴密使梟徒無從竊發庶淮鹺可復  
舊規疊經臣分飭沿江營汛併力緝私不任一刻  
鬆勁茲據京口協副將田松林稟稱十一月二十  
二日訪有要犯王有道潛回沙頭地方勾聚回俦  
興販私鹽搶賣婦女情事當卽督率右營遊擊糜  
延慶署守備劉長清帶同弁委兵丁會遇瓜洲三  
江營兩處備弁兵丁並候補運判趙祖玉家丁江

都縣快役分坐船隻於是日黃昏時分齊抵沙頭  
密督地保將王有道草房圍住守備劉長清卽首  
先打門進內拏獲王有道王有王大年三犯復據  
地保回稱離此半里有許寡婦亦窩侷匪隨又督  
率往拏見許寡婦家房屋已空僅有一人向前奔  
跑登時追獲訊名張天林因知王有道被拏趕往  
許寡婦家通信之人其時天色已明見有六人手  
執器械在前行走復又跟蹤追捕該犯等膽敢轉  
身拒捕經外委趙寶和奮勇上前拏獲散雲彪散  
金彪散文彪楊大仁散春揚散萬全六犯仍復一

路窮追至四接跳地方額外李清泰及劉雙李大  
鎗追獲王寬張明馬全福王路散永長李天方趙  
得楊宗林均訊係王有道之夥不諱又於江邊見  
有划船喫水沈重上船查看藏有幼婦五口當獲  
倭犯一名散占魁船戶黃文本黃文松二名訊據  
婦女等俱供被倭匪搶來等語呈請發司審辦前  
來臣查倭匪王有道積慣販私係訪聞飭拏之逃  
犯膽敢故智復萌潛回興販搶奪婦女必應從嚴  
懲辦以靖梟風而安閭閻除劄飭運司會同臬司  
督飭審辦外所有獲犯緣由理合附片陳明伏乞

聖鑒謹

奏

道光十二年十二月二十九日奉到

硃批覽奏鹽務漸有起色朕心稍慰然尤當倍加黽勉  
慎勿半途而廢糧私梟販緝拏甚屬認真亦應不遺  
餘力方可奏功也勉之欽此

拏獲強搶盜犯督率審辦附片

再上下江接壤及界連東豫之徐淮鳳泗等屬水

陸交錯最利藏奸此拏彼竄爲害地方而災歉之

後尤宜刻加防範經臣節飭營縣嚴密查拏期於

有犯必獲自上年冬季以來據徐州城守營把總

杜士玉前後報獲搶劫命盜等犯一百餘名分解

犯事地方訊辦又據署沛縣朱榮桂稟報聞得山

東查拏教匪靳希卜帶同子姪逃竄並准山東移

會卽經該縣首先拏獲教首靳希卜解東歸案審

辦續又將案內人犯燕書典吳景淑等四名拏獲

現在訊明分別解質又據豐縣知縣王元本稟獲太監鄭進祿係放出爲民呈有執照現在咨查內務府辦理又據宿州知州張應雲懷遠縣張清元稟報拏獲捻首張紅頭等二十餘名解省審辦各路緝捕緊急而洪澤湖港汊紛歧杳漫一片尤爲叢垢之藪疊經臣分委員弁絡繹接查復派素能緝捕之高資營把總劉長清候補從九品孫豐及泗州州判葛重光把總黃永清等分往嚴拏並通飭沿湖州縣營汛設法兜拏接據劉長清等及各營縣稟報已獲強搶良家婦女脫逃多年之僑匪

郭三銀及強搶米鹽船隻之馬八沙四沙可興海  
力兒蔣殿平鎖周兒等共人犯數十名解審前來  
臣卽就近飭委淮揚道督率清河縣及委員等嚴  
切訊究一俟審明卽由臣在浦覆勘辦理俾昭儆  
惕而靖地方合先附片奏

聞伏乞

聖鑒謹

奏

道光十三年七月十六日奉到

批必當嚴行懲辦欽此



隋文帝集卷之二十三

三

081-11 365104 1.000A

拏獲強搶鹽船匪徒嚴辦附片

再江西彭澤縣江面向多糾搶鹽包之案該境東北接皖省之東流望江宿松西接湖北黃梅及本省之鄱陽湖口等縣三省交衝盜船出沒如該縣之馬當沙灣閣簞洲魏家洲余家洲金剛料等處最爲匪徒叢集之藪偶值鹽船遭風失淺卽乘危搶奪或並未遭風小有停泊亦卽藉救風爲名小艇千百蟻附登舟刀砍桅篷斧劈艙板掠劫一空毀船沈溺滿載而去操槳如飛頃刻無蹤船夥商廝形勢孤單莫敢誰何及至報官則又有積蠹衙

棍及土保劣生通同一氣包庇分肥雖有緝拏百無一獲甚至折磨事主逼令捏報淹消其白晝糾搶之兇犯轉得以搭救爲詞任意開脫縱放以致行船經過視爲畏途此歷來攔江兇搶積惡成風之情形也前經臣札飭該地方文武嚴行查拏毋許仍前疎縱道光十二年徐義發鹽船被搶案內將首犯陽乃文等分別問擬斬決徒流懲創從嚴此風稍戢詎上年十二月十四日復有船戶李祥發裝運商人莊德大西鹽行至該縣沙灣地方被匪搶劫已據該縣秦紉武會同營員暨巡江委員

等先後拏獲首從搶犯張南枝張廷耀商杜有高  
大毛高起懷吳炳煌葉棉遠魏金華江鳴和高秀  
峯葉寶山徐春茂高連正魏德廣王其大張泳行  
詹桂華十七名寄贓之張東籬張六二名又安徽  
望江縣稟報拏獲張南枝之子張爲中一名查張  
南枝張東籬均係監生該匪既能捐監並非毫無  
身家之人乃膽敢糾衆強搶窩寄贓鹽獲犯已二  
十名起獲鹽已一萬三千餘斤尙有逸犯贓鹽未  
獲此等兇惡棍徒聚衆橫行白晝攔江劫搶計贓  
逾貫甚至砍桅沈舟實與江洋大盜無異况淮商

辦運楚西引鹽上關

國課下繫民食本屬官物尤應加等從嚴乃彭澤江  
面甫經嚴辦之後又有匪徒踵行搶劫實屬藐法  
已極臣已密派員弁隨時訪查嗣後如有似此之  
案臣惟有親提審訊按律從嚴辦理其情節兇惡  
者竟當立即正法江干俾資整頓並將玩縱之地  
方文武隨時撤參所有前案現經該縣拏獲多名  
應卽札飭江西臬司會同藩司將張南枝張東籬  
監生斥革同鹽道嚴提親審從嚴究辦一面勒緝  
逸匪悉數全獲不許一名漏網並咨會江西撫臣

一體飭審嚴懲外合併附片陳明伏乞

聖鑒謹

奏

道光十四年三月二十九日奉到

硃批必當如此認真查拏可嘉之至欽此



縷陳地方文武先後會獲匪徒梟犯附片

再安良必先緝匪暢引全在緝私頻年災歉以來  
梟匪更易潛滋緝捕更應嚴緊臣上年暫駐清河

屢飭查拏獲犯卽懲匪類稍知斂蹟仍不敢一日  
稍疎隨時隨地偶有訪聞或指名飭緝或通劄飭  
拏節據河中營稟報會同文武員弁先後拏獲匪  
犯王玉琢王乾堂侯萬沈昌張庭徐錦山李緒堂  
張必榮李銀惠張謙于春于環盧二趙方得皮小  
得子張四馬效興馬麗華唐前言唐前鼇孫耀堂  
王椿任士全倪萬和潘遇元魏大奎張學士張如



玉王立求王立言張朋高張小朝張全羽徐良張  
如棕張會棕莊家庭侯萬豐侯萬卯侯萬浦王永  
泰卽胡椒大旺劉大寶等共四十二名又據泗州  
並盱眙縣會營拏獲段二能趙位山朱大倫蔣懷  
仁蔣懷德王滔卽王大虎等六名又據揚州瓜洲  
二營會獲張懷楊有桂楊大山劉金川殷天桂王  
三父子等七名又據福山營會獲張有才戴有才  
朱長松戴庭彩繆式均繆求溫等六名又據狼山  
鎮營稟獲朱添蘇江林鳳陸關保朱愷舟周連松  
葛天元葛元勳葛元春葛元吉葛來成張世發趙

廣蘭等十二名又據京口協稟獲樊玉唐松書張  
在鵬三名及王二劉二又獲陶有鬻子並會同福  
山營拏獲熊廣輝吳必達吳盛元等九名又奇兵  
營稟會獲蔣本盛周世保周義周順福周友元周  
七子邢有知姚國珍汪大桂趙二夏儀真子顧三  
孫六莫長林李二邢三宋金貴繆嘉瑞朱五陸四  
陸八春保子趙坤蕭牛子張小羊何本義劉興高  
熊士玉周得榮黃到餘申三等三十一名川沙營  
稟獲葛芳林陸得等二名又據揚州營稟會獲金  
明義左在林劉文學王耀忠葛正楊在山李四僧

廣慧陳慶餘李大汗陳王氏李葵女子鄭耀先王  
得義黃三癩子倪萬春倪萬林王兆連張華文董  
萬喜等二十名又據泰州營稟獲朱林遠盧元庚  
等二名又據三江營稟獲蕭繼英潘啟安李鶴羣  
蔣文興劉於生金萬瑞黃應賓許善發李松山徐  
于上蔡王加徐煥章等十二名又據高資營稟獲  
蔡明廣一名又據潛山營稟獲劉其非一名又據  
委員守備崔衍在於合肥稟獲殷朝綱孫恒昌楊  
綱及汪懷章汪正隆王玉林王翠等七名以上共  
獲人犯一百餘名其中販私搶奪爲匪情節不一

當卽飭發各該管地方州縣飭令確切研審按擬  
嚴辦俾地方鹽務俱知整飭又海州現行票鹽化  
梟爲良地方較前收謚間有牟利之徒如贛榆監  
生王兆宦等因票鹽盛行意在把持經臣押發海  
州嚴行懲辦亦已均知儆惕所有各路查拏梟匪  
分別飭辦緣由謹附片縷陳伏乞

聖鑒謹

奏

道光十四年四月二十七日奉到

硃批常川如此嚴辦方好不可鬆勁欽此



各路查拏梟盜各匪分別懲辦附片

再<sup>臣</sup>前將督飭文武員弁先後拏獲匪犯王玉琢等一百餘名飭屬確切審辦

奏奉

硃批常川如此嚴辦方好不可鬆勁欽此<sup>臣</sup>查綏靖地方全在有犯卽懲毋許遷延避就更不容始勤終怠復經飭據河中營及署京口右營守備劉長清等稟報拏獲盜犯王金朱萬周六吳耀光駱繼昌駱繼魁倪志魁吳小驢子吳小扣成子王峻臍倪鳳堂倪鳳雲莊步青劉玉王清皮懷方王步樓馮

翠華孫愛棠周必茂等共二十名又據劉長清稟  
獲馬三保馬二馬殿揚馬三福馬西銘馬應傑馬  
五七名又據桃源縣晏曙東會同署清河縣唐汝  
明孥獲杜兆奇倪鳳奎倪鳳元王佃奎王毛柱趙  
連吉唐兆年涂元明凌二歪王二虎謝文元謝文  
連莊兆弼莊元堦倪萬珠倪蘭芝倪蘭亭倪蘭勤  
倪小扣子倪四團子倪學樓唐小柱子石小達子  
楊大戈子胡茂董洪奎董洪元董洪五姚義朱春  
壽朱永壽等三十一名又據清河縣稟獲岳七石  
元浦劉小燒火李文章陳大汗趙小立皮鶴升張

大寅子倪學亮等九名又據京口協稟獲阮大阮  
三王五邊小三四名又據署江寧縣伍家榕等稟  
獲假官訛詐匪犯郭春坡王裕興李元何奎周長  
泰馬巨亮潘玉洪周長林等八名又據廬鳳道稟  
督獲匪犯楊獻廷陳萬一吳方和萬三賴大李宗  
白汪罰摩添旺王明袁克勤劉三鄭挺孜周劍鏃  
孜周守昭陳四麻孜雷金斗羅包孜王朝揚王朝  
輔等共十九名又據六安州霍邱縣等稟獲匪犯  
周大劄孜周小劄孜李三潘二陳光烈周十孜周  
孝思李得聚金廷獻朱大山張大發胡鳳池鄭文



斗又獲搶鹽匪犯顧禿孜張心田張金堂劉成隴  
 李暢又獲匪犯裴喜孜趙大成余石頭王懷珍胡  
 魁趙友孜斌六禿孜胡九頭烏梁嚙牙彭金良彭  
 連山趙求楊尙玉劉騾孜余三多鄭木匠等共三  
 十四名又據京口協稟獲鹽犯徐九猷子夏三保  
 徐勝章孫隴海顧國富馬宗元魯三張和郎劉懷  
 郎劉雙朱七袁安豐袁隆興等十三名又據三江  
 營稟獲李玉芳李大姚明義三名又據揚州營稟  
 獲王克順張大劉占元趙廣林李五魁趙家貴韓  
 以樑李其文仇二祁精華謝如周王玉聶朝榮汪

順黃桂中又揚州奇兵兩營會獲曹三孟大榮倪  
四髻子王豁嘴子馮大六子長山子共二十一名  
又據掘港營會同委員稟獲俞八陳鳳聚申官曹  
海元丁長五名又據掘港營稟獲陳志富張學順  
共七名又據揚州左軍守備稟獲郭大王大二名  
又據泰州文武稟獲賈牛小孫燦刀孫四髻子孫  
士長張大孫廷章六名又據金山巡檢舒春元稟  
獲徐大可孫恒昌楊綱殷朝綱汪懷章汪正隆孫  
滿松王玉林高奎光三禿子吳意達王翠等十一  
名以上共獲犯一百數十餘名其中販私搶劫攜

有刀械及假官訛索捏製令牌種種兇橫詭詐情  
節不一均應澈究嚴懲現飭司道分飭各該管地  
方府縣確切研審按擬嚴辦俾地方均知整飭所  
有各路查拏梟盜各匪分別懲辦緣由合併附片  
縷陳伏乞

聖鑒謹

奏

道光十四年六月初三日奉到

硃批查拏甚屬可嘉欽此

拏獲私梟匪犯懲辦附片

再頻年災歉之餘深恐無業窮民流而爲匪是以  
整頓地方緝捕最爲急務臣嚴督查拏實不敢一  
刻稍懈前據拏獲王玉琢等一百餘犯

奏奉

硃批常川如此嚴辦方好不可鬆勁欽此續又拏獲王  
金等一百餘犯

奏奉

硃批查拏甚屬可嘉欽此仰見

聖明洞燭情形當以緝匪安良爲事且行鹽地方尤須

加意巡邏以靖梟徒而暢票引臣仍嚴飭各屬文武隨地隨時實力偵巡或訪聞劄拏或指名飭緝不任一日稍有鬆勁隨據署海州事沐陽縣知縣王夢齡海州營參將德本會同督帶備弁兵役及委員丁役等於朱家堰地方訪有拜盟攔船索詐匪徒卽密赴查拏獲朱泳盛孫學成朱泳光陳有曹清楊秀堂石號武萬益汪月林王玉堂邱克平邱克喜嚴秉樂十三名又訪穆家墩地方有鹽船數隻趕緊分頭截拏見有一船上岸逃走千總秦廣生追入莊內於周姓家內獲犯周宗鎬嚴士奇

二名正在追訊間聞有槍聲遙見多人乘坐划船鼓譟而來有迎敵之勢該署州王夢齡暨參將德本督率守備葉養福等放槍抵禦千總秦廣生首先跳上匪船拏獲王宗夏劉業宗萬文齡凌殿業四名葉養福等奮前追趕捕獲鄭吉蔡和劉義賈漢增馬步青王開元六名並獲有被細刃傷一人詢係緝私眼線夏佩洪因吳家集卡委員鹽大使劉曙訪拏私鹽一船匪等挾恨將眼線細縛該犯等目無法紀必須盡法懲辦又據溱潼委員吳鏞稟獲周居小一名鹽城營報獲邵國讓夏八子袁

大陳長松葛大五名又據京口協稟獲張順進鞠  
平元胡學仁楊國文四名又據委巡淮北私鹽蕭  
營都司崔衍稟獲馬玉平陳三太周學淵倪良弼  
劉在中劉明章汪士元汪漢珍八名又據川沙營  
報獲張步行一名又據奇兵營稟獲李長懷李添  
富楊善元陳體興徐如善張連科唐愷胡得向有  
福黃慶雲朱四十一名又據廟灣營報獲王貴淋  
唐如吳許氏吳自祥四名又據狼左營稟獲張二  
一名又據三江營稟獲夏有周徐大王玉山郭二  
保四名又據泰州營稟獲劉有林王學智周善如

三名又據東海營報獲王全義一名以上共獲人犯六十八名私船二十一隻私鹽十三萬五千四百二十八斤並起獲槍械多件其中拜盟攔索抗官拒捕並攜帶器械各犯尤屬桀驁不馴之徒現已分飭各司道及各該管地方府縣確審嚴辦以儆梟匪而靖地方所有各路查拏懲辦緣由謹附片縷陳伏乞

聖鑒謹

奏

道光十四年九月二十一日奉到



卷之三十三

三

殊批查拏甚屬奮勉欽此

飭屬先後拏獲盜匪梟犯審辦附片

再安良必先緝匪疏引尤貴靖私有犯卽拏不可  
一日鬆勁前於拏獲盜梟匪犯朱泳盛等六十餘  
犯

奏奉

硃批查拏甚屬奮勉欽此復經臣嚴飭各屬文武實力

偵緝去後隨據句容縣錢兆麟督同典史沈炳及  
當塗蕪湖無爲等州縣營拏獲搶劫盜匪王貴元  
等二十七名又儀徵縣稟獲匪犯王海扒一名又  
署高郵州劉大烈會營拏獲圖販私鹽捉人勒贖

及拒捕傷人匪犯陳文學等九名又據豐縣王元  
本稟獲山東省咨緝金鄉縣竊劫拒捕案內盜犯  
袁月等六名又據署京口水師副將張成龍督獲  
前經販私獲辦復又潛逃糾夥攜帶槍械販私匪  
犯丁林大等十二名又獲私犯徐宏謨等二名顧  
世興一名薛田章等十五名潘大寶等六名又高  
資營都司稟會獲誘拐搶奪回倚匪犯沙文愷等  
六名又據揚州營參將周祐稟會獲訪犯孫克懷  
等二名又同鹽務委員拏獲私販姜桂林等四名  
又獲私犯劉鳳祥等八名郭二等二名杭景龍等

三名楊萬順一名又據狼左營都司李湘稟會獲  
私犯范如松等二名李三一名又據狼右營遊擊  
關奎龍稟督獲私犯毛儉保等三名又據蘇松鎮  
督獲私犯虞瑞春等七名又據委巡通州私鹽揚  
州營千總黃永清等稟會獲私犯施保和等四名  
又會獲開私鹽行訪犯陳玉嘉等五名又獲私犯  
何扣一名又委赴蕪湖銅陵等縣會獲私犯張松  
等四名又據委巡淮北私鹽金山司巡檢舒春元  
稟獲私犯孫全標等二名又據三江營守備戴廷  
先等稟獲私犯唐盛周等三名石興玉等五名孫

富有等二名詹庭等三名徐富林等十六名又據  
泰州營遊擊安鵬稟督獲私犯嚴賢祖一名周五  
等二名又據淮北局委員寶山縣縣丞劉琅稟會  
獲私犯霍起寶等二名又據署瓜州營守備艾萬  
年稟會獲私犯劉得美等九名華大猷等十一名  
又據掘港場大使錢同謨稟會獲私犯莊天元一  
名又據署掘港場大使單懋圖稟會獲私犯王二  
保等四名又據署掘港營都司施元鳳稟會獲私  
犯馬二一名又據徐州鎮中營遊擊李德清稟會  
獲梟犯劉小五等七名又據吳淞營參將孫廷揚

稟督獲私犯周令相一名劉出等五名又據鹽城營遊擊姜希佩詳會獲私犯吳大等二名又據署川沙營參將林明瑞具報會獲私犯費金榮一名又據南匯營都司顧清漣稟獲梟犯趙大增等四名又據提標前營遊擊王鳳翔報獲私犯唐玉琯等二名又據福山營遊擊羅國仕稟督獲私犯侯大等五名又據劉河營都司葉長清稟會獲私犯王正芳等六名以上共獲人犯二百二十八名私鹽二十萬餘斤並起出刀械等件現已飭司分飭該管府縣研審詳辦以期地方安靜鹽引亦得暢

銷所有督飭各屬查拏匪犯究辦緣由謹附片陳  
明伏乞

聖鑒謹

奏

道光十五年三月初三日奉到

硃批覽奏俱悉欽此

飭屬緝拏匪犯審辦附片

再臣前

奏拏獲盜梟匪犯王貴元等二百二十八名奉到

硃批覽奏俱悉欽此臣以兩江地方幅幘遼闊匪徒易

於出沒緝捕不可稍弛仍嚴飭各屬文武實力偵

緝去後隨據海州營參將德本會獲強搶婦女放

槍拒捕販私訛搶之匪犯唐洪等三十二名又據

廬鳳道胡調元稟報督飭所屬各州縣先後拏獲

兇盜及各項匪犯趙老三張文舟錢三魏五張成

方小義孜等共計三百三十五名又盱眙縣知縣



余君壽會獲搶劫盜犯大盧四等三名又洪湖營都司劉長清拏獲搶犯竇五禿孜等三名又獲劉尙美等二名又獲搶劫匪犯侍長明一名又甘泉縣知縣盧元良訪獲創立佛會斂錢之匪犯閻大德等十名又署鳳陽縣知縣蔣鎔訪獲訛索鹽船持械逞兇之匪犯常有等五名又據豐縣知縣王元本拏獲拒傷外委之匪犯阮大知等十三名又獲鄰省鄰縣逃兇閻茂德等三名又據丹陽縣拏獲鄰境盜犯張貴等三名又提標中軍參將曹德周督屬拏獲張德海等四名又署佃湖營都司張

瑞堂拏獲私販王懷章等四名又獲私販尤鶴榮  
等二名又署京口水師副將張成龍拏獲鹽犯沈  
二一名又拏獲逃兇王五一一名又提標前營守備  
陳振疆報獲私販趙大等七名嚴發壽等八名茅  
里金等十三名范加光等十二名又吳淞營參將  
孫廷揚報獲私犯江士林等三名又據劉河營都  
司葉長清報獲私販張七干等四名又揚州營參  
將周祐督獲鹽犯李萬和等二名又揚州營左軍  
守備黃永清督獲鹽犯韋和尚等四名又署泰州  
營遊擊安鵬報獲何二等五名又報獲鹽犯王高

等五名又三江營守備殷兆熊稟獲私犯卞永茂等二名又稟獲王義和等二名又據金山營遊擊許聯鏞報獲私犯於嘉珍等五名又委巡廬州私鹽兩淮候補運判許惇詩會獲私販鮑發先等二十一名劉安等五名趙天明等四名又廬州營都司德雲報獲鹽犯王天和等九名又廬州營千總朱淮源稟獲鹽犯劉三一名又掘港場大使單懋圖稟獲鹽犯王允福等二名又據桃源縣稟獲不法水手趙敬思一名以上共獲人犯五百三十七名私鹽二十五萬四千餘斤並起獲刀槍鑼叉火

281-4 391A6 40P4A

藥砂子等件以上各犯多係逃兇逃盜現飭各府  
縣從嚴審辦盡法懲治以靖地方再據蘇松鎮總  
兵田松林稟奈山外洋有商船徐德興孫恒茂周  
咸盛被盜劫去布貨等物當經臣與撫臣提臣嚴  
札飭拏並飭取職名開參去後旋據該鎮稟派委  
南滙營守備周名揚等前赴浙洋緝獲各案盜犯  
林奪田阿仲陳犁柯阿康柯阿猛吳阿楚六名並  
起獲真贓一併移解浙江平陽縣轉解崇明縣收  
審等情除飭巡洋弁兵加緊窮追務將逸犯悉數  
擒拏毋稍鬆懈致干嚴參外謹附片具陳伏乞

聖鑒謹  
奏

聖鑒謹

奏

道光十五年十一月二十三日奉到

硃批知道了欽此

281-4. 395A版60P版

縷陳巡閱江西各境山水形勢及私梟會匪各情

形附片

再臣查江西一省界連兩湖及皖浙閩粵各境羣山環繞衆水西流九江南康爲之門戶其民勤儉務穡牽車服賈不遠千里君子重節義而能文章理學事功代不乏人敦於宗族家有譜系祠墓久遠不忘根本此其風俗之美也及其敝也則勤儉或流爲齷刻析利毫芒而親睦之意衰甚者棄詩書而事刀筆故訟風尤熾族姓衆者丁口萬計動輒恃衆抗官逞強陵弱轉以宗祠爲聚衆逋逃之

護符人命盜案一入強梁之村落往往不服拘拏  
 一訊可了之案或至經年累月不能完結此風近  
 山各屬類然饒吉袁臨皆所不免而贛南寧都一  
 帶為尤甚該處向多匪徒此拏彼竄迄無定所臣  
 此次親莅各境縱觀形勢其山脈自九嶷至湖南  
 之郴桂分為兩幹一由桂東而北起武功蘆簫至  
 瀏陽萬載交界之鐵圍山分支趨通城九宮以逮  
 武昌正支由義寧起銅鼓逕武寧德安而盡於匡  
 廬西水皆歸洞庭入江東水則歸彭蠡也一由郴  
 州宜章至崇義起聶都山為章水之源逕大庾嶺

281-4 395版 60P版

轉定南逕大帽三伯桶岡泐頭而至長寧會昌之  
軍門嶺盤古山南則滇水入廣泐水入惠大帽水  
入潮皆歸南海北則羣水盡歸貢江源出瑞金接  
汀州界之安樂山西流會章而爲贛也由盤古山  
北折至寧都州一支西去起石城廣昌各山逕建  
昌撫州而迄於省城則盱江撫河出焉一支又北  
逕寧化崇安界起牙梳嶂上各嶺過武夷至銅塘  
封禁山而迄於常玉山則廣信河出焉由玉山西  
北起率山大鄣至浮梁而婺水饒水出焉又西逕  
建德鄱陽而盡於湖口與廬山東西對峙彭蠡湖



水出於其間山川蟠互外欽而內縮雖面面皆險而無險可禦卽如私販一項有浙私有閩私有粵私四處蔓延在官商方以挽運爲艱而梟徒轉藉崎嶇爲得計總由私鹽外入有居高臨下之勢如廣信例食浙鹽南贛寧都例食粵鹽業從山脊引入腹地而欲於下游散漫之區驅之使退其勢已難以致饒州南康被占於浙私吉安臨江被占於粵私如長汀寧化光澤崇安等縣皆隸閩省而居屬山梁是以建撫各屬並不例食閩鹽而閩私徧地皆因乘虛易入之故又會匪一項自閩界粵界

以逮郴界綿延數省無非窮僻山區易藏易竄爲  
害甚鉅其宰雞滴血鑽橋飲酒傳授口訣散受花  
帖傳徒者皆真會匪也情罪最重間有富民畏捨  
庸懦被欺脅從圖保身家與夫贖錢酬賽如城隍  
財神等會則雖會而不必真匪也更有一種游手  
兇徒俗名爛仔又謂之流打浪遇事生風執持刀  
械每因微隙糾黨仇殺擄掠畜產拆毀房屋捉人  
勒贖或攔路打搶或臨河行劫冒充水手擔夫伺  
客重貨暗行賊害或遇客船遭風閣淺假救護爲  
名搶奪貨物贛河下游一帶往往有之此則匪而

不會其情罪無殊於會匪必應嚴懲查贛南等處  
會匪連年懲創如前任贛守汪云任知縣周玉衡  
任內查拏最多匪徒知畏署守南昌同知霍樹清  
亦經拏獲會昌雩都匪犯三百餘人仇殺搶犯百  
餘人審結搶劫大案五十餘起接任陞守易中孚  
豐林等亦皆認真緝捕有犯卽懲其風業已衰息  
惟此等匪徒散難聚易未可鬆勁全在守令得人  
現在霍樹清署理南安其贛州府缺緊要容臣會  
同撫臣遴員調補至江西鹽務緝私最要並容臣  
逐細籌商陸續會辦所有臣巡閱所莅各情形謹

附片縷陳伏乞

聖鑒謹

奏

道光十六年十月二十日在安化舟次附

奏十二月初三日奉到

硃批認真妥辦務收實效勿再因循也欽此

1. 2. 3. 4. 5. 6. 7. 8. 9. 10. 11. 12. 13. 14. 15. 16. 17. 18. 19. 20. 21. 22. 23. 24. 25. 26. 27. 28. 29. 30. 31. 32. 33. 34. 35. 36. 37. 38. 39. 40. 41. 42. 43. 44. 45. 46. 47. 48. 49. 50. 51. 52. 53. 54. 55. 56. 57. 58. 59. 60. 61. 62. 63. 64. 65. 66. 67. 68. 69. 70. 71. 72. 73. 74. 75. 76. 77. 78. 79. 80. 81. 82. 83. 84. 85. 86. 87. 88. 89. 90. 91. 92. 93. 94. 95. 96. 97. 98. 99. 100.

101

江安兩省文武員弁拏獲犯鹽數目摺子

奏爲敬陳江省緝私情形仰祈

聖鑒事竊兩淮引鹽額銷六省比年安徽河南各州縣  
向隸淮北引地者半已改行票鹽引課充足惟湖  
北湖南江西等省及安徽之安池太各府均行淮  
南綱鹽率因鄰私侵灌私販日多以致官引滯銷  
商課短絀是緝私一節實不容一刻鬆勁但湖南  
北係屬隔省未便代籌江西雖臣統轄多被閩浙  
各私充斥粵私更多且獮近因該省力爭卡界圖  
便粵私以致梟匪由贛南山境闖入吉安太和等

處戕官殺兵釀成拒捕重案經撫臣裕泰會同臣奏辦在案該處距臣道路迢遙雖復時加懲創每慮鞭長莫及祇江蘇安徽二省相距較近營汛毗連足資策應臣與皖撫臣色卜星額咨函往復分設卡巡幾於星羅碁布自上年二月以後經臣特委兩淮候補運判許淳詩泗州營都司王夢熊等督同文武員弁帶領兵役往來偵緝並六安潛山寧國池州廬州廣德各營疊次拏獲梟犯馬嶺等一百八十一名私鹽十一萬一千一百七十五斤並刀槍器械驢馬車輛等件飭交地方官確切研訊

分別擬遣軍流徒枷杖責釋將實在出力各員弁  
由撫臣色卜星額就近核明會同臣奏懇

恩施獎勵其餘員弁由外記功獎拔各在案又江蘇之  
淮南地界據京口揚州泰州瓜洲三江奇兵青山  
狼中福山川沙溧陽鹽城吳淞掘港提右提前各  
營並狼山鎮標蘇松鎮標先後拏獲梟犯周逢順  
等三百八十三名私鹽四十四萬四千二百五十  
七斤船一百二十七隻並刀械等件江蘇之淮北  
地界據海州廟灣東海各營並徐中營河標中軍  
阜寧臨興等縣場淮北總巡委員吳家集卡薔薇



河卡拏獲梟犯許元松等一百七十四名私鹽二十九萬一千二百三十四斤刀槍車驢等件以上各處緝私所獲如京口瓜洲三江等營半爲浙鹺防堵如福山川沙溧陽吳淞蘇松鎮標以及提前提右各營則全係爲浙鹺巡緝緣江蘇之蘇松常鎮太倉等屬例食浙鹽相隔一江最易侵越臣以同係

國課攸關不容稍分畛域若但知利己以鄰爲壑縱放出境以致私梟恃以無恐乘機釀事是又爲粵省之續也臣實於心未安所獲各犯均經飭交地

方官按例究擬私鹽交垣變價照例充公給賞其  
緝私出力各員弁或咨部請獎或由外記功亦在  
案統計江安兩省一年期內共獲梟犯七百九十  
三名私鹽八十四萬六千六百六十六斤先時滯  
銷之桐城舒城合肥各岸官引已見行銷而淮南  
所緝之私免於接濟江船淮北所緝之私不致侵  
充他岸縱道路紛岐未必全無透漏而持以堅定  
歷久弗懈當可漸就肅清仰副

聖主整釐鹺務之至意謹將一年以來江安兩省報獲  
私鹽各起另繕清單恭呈

御覽伏乞

皇上聖鑒謹

奏

道光十八年閏四月初二日奉到

硃批一力認真萬勿日久稍懈欽此

陶文毅公全集卷二十六目錄

奏疏 保甲

查辦皖省棚民編設保甲附片

編查皖省棚民保甲摺子

會同皖撫查禁棚民開墾摺子

覆奏沿海港汊村莊設法編查摺子

2-1-1944

11

1

奏疏 保甲

查辦皖省棚民編設保甲附片

再 臣於五月二十日接奉

廷寄道光四年五月十六日奉

上諭本日御史邵葆辰奏請飭查棚民保長以重地方  
據稱會典內載乾隆四年戶部議准江南福建浙江  
各府州縣內棚民照保甲例編排戶口近聞浙江江  
蘇安徽等省州縣凡深山窮谷之區棚民曼衍殆徧  
租典山地墾種山諸大半皆溫台一帶沿海之人其  
聲氣相通倘有奸宄藏匿不可不豫爲防範等語向

來各省地方有棚居士著山民往往以種植麻靛煽  
鐵造紙等項藉資生計其外來無業游民前赴該處  
工作者亦一體編入保甲選立保長甲長專司巡察  
責成州縣官據冊稽查誠以該棚民等良莠不齊往  
來靡定若任其占踞山場不加約束勢必愈聚愈多  
無從究詰是以照例編排立法極爲周密惟行之日  
久懈弛相沿自應亟爲整頓著各該督撫等嚴飭該  
府州縣將棚民逐細查察按十戶設立甲長每年遞  
換門牌隨時抽驗禁止匪類潛匿勾串滋事如查有  
不安本分鬪狠健訟之徒立即嚴拏示懲務當實力

奉行不可視爲具文並不准書役藉端擾累以靖地方將此各諭令知之欽此遵

旨寄信前來臣伏思編查保甲爲弭盜詰姦要法皖省

向係遵照章程飭令各州縣於秋後確切編查年底循例具

奏至徽州寧國池州廣德四府州屬境內深山峻嶺甚多往往有外來民人租山墾種搭棚棲止緣本境多將山地出租此等無業窮民因之攜老挈幼刀耕火種就地謀生

國家休養生息生齒日繁勢不能分畛域而阻其生



路惟聚處衆多良莠不齊卽難保不滋生事端是以向係一體編入保甲辦理在案通計徽州寧國池州廣德四屬此項棚民有由江廣遷往者亦有由本省桐城潛山宿松太湖舒城霍山等處遷往者非盡溫台沿海之人現在均屬安靜間有鬪狠健訟之徒亦俱隨時隨事嚴行懲辦不令縱恣今

諭旨飭細查察自應欽遵飭辦其棚民較多之處應卽按十戶另設牌甲稽查倘係零星二兩戶雜在土著之內卽歸入附近保甲內照舊辦理務俾奸民

絕迹亦毋任書役藉端滋擾仰副我

皇上除莠安良之至意除飭行藩臬兩司並該府州實力查辦外謹附片覆

奏伏乞

聖鑒謹

奏

道光四年七月十四日奉到

硃批認真稽查辦理不可有名無實欽此



編查皖省棚民保甲摺子

奏爲皖省各屬居民及附住棚民分別編查保甲仰

祈

聖鑒事竊嘉慶二十年正月欽奉

上諭那彥成奏酌定覆查保甲章程一摺所奏每年秋收無事後外出耕作及各項傭工人衆歸里之時再行稽核一次免致匪徒溺跡所奏甚爲核實著各直省通行照辦督撫於歲底彙奏一次等因欽此又於道光四年五月欽奉

上諭著各該督撫等嚴飭該府州縣將棚民逐細查察

按十戶設立甲長每年遞換門牌隨時抽驗禁止匪類潛匿勾串滋事如查有不安本分鬪狠健訟之徒立即嚴拏示懲務當實力奉行不可視爲具文等因欽此遵查安徽一省濱帶江湖縈連淮泗省北各屬接壤徐豫地偏人悍匪徒出沒其間夙稱難治省南一帶居民較爲團聚守望易於聯絡而深崖幽谷亦頗藏奸稽查均應嚴密至棚民一項則徽州寧國池州廣德四府州往往有之緣該境山嶺較多外來民人搭棚棲止租種山地雖係貧民謀食之常與川陝等省山佃情形無異但人數旣多卽

良莠不齊難保不滋生事端是以向同土著民人一  
一體編入保甲俾資查考本年欽奉

諭旨飭查當經督臣及臣先後將查辦緣由恭摺具

奏並飭藩臬兩司於秋後委員會同各該州縣逐一  
編查去後茲據藩司徐承恩臬司劉斯崑詳據各  
州縣於秋收後遵照章程將各屬編造門牌冊籍  
情形稟報並經道府直隸州覆稱就近挨查無異  
其棚民一項飭委候補知府劉湜前往查辦據稱  
會同各州縣親履山場按戶編排查明一處卽就  
中選擇誠實棚民作爲棚頭通計徽州府屬之數

縣共有棚民一百五十六戶選充棚頭十七名休  
寧縣共有棚民二百三十一戶選充棚頭十三名  
祁門縣共有棚民四百三十二戶選充棚頭二十  
四名黟縣僅有棚民十戶選充棚頭一名績溪縣  
共有棚民十二戶俱散住各保不便編設棚頭仍  
令各地保兼管寧國府屬之寧國縣共有棚民四  
百九十一戶選充棚頭二十三名池州府屬之銅  
陵縣共有棚民十八戶選充棚頭二名建德縣共  
有棚民一百二十二戶選充棚頭十二名廣德州  
共有棚民一千二百七十九戶選充棚頭四十四

名其保內僅有棚民數戶者仍令鄉保兼管均已繕造門牌底冊分別懸掛存案飭令所選棚頭時加查察現在各處棚民均屬安靜等情由該司等逐加查核詳請具

奏前來臣查編查保甲爲除莠安良要法必須辦理

認真庶使匪類胥除閭閻安輯其棚民一項經此次編查之後卽以現造戶口冊籍立案毋許任意增添各業主亦不得再行私租以致日益加多莫可究詰遇有遷移隨時更換申嚴約束實力奉行並不准書役藉端擾累以仰副



聖主除暴安良之至意所有道光四年各屬居民及附  
住棚民分別編查保甲緣由謹會同大學士兩江  
總督臣孫玉庭合詞具

奏伏乞

皇上聖鑒謹

奏

道光五年正月二十五日奉到

硃批知道了欽此

會同皖撫查禁棚民開墾摺子

奏爲遵

旨查禁棚民開墾仰祈

聖鑒事竊臣等前准軍機大臣字寄奉

上諭據御史陶士霖奏棚民開山種植病農藏奸請飭  
查禁一摺江南素稱沃壤若棚民開山種植日漸加  
增土鬆石碎大雨衝刷盡納於下游河港之中年復  
一年必致淤塞河道且俱係外籍蹤跡難測匿奸窩  
盜難保不滋生事端著陶澍等嚴飭所屬各州縣嚴  
密管束或寬予期限令其漸回本鄉其未經開墾之

山著卽嚴行查禁毋令日久滋弊原摺著鈔給閱看  
等因欽此當卽札飭藩臬兩司會議詳辦並經臣陶  
澍臣色卜星額附片先行覆

奏在案茲據安徽布政使程楸采會同署按察使胡  
調元會議具詳前來臣等伏查嘉慶十二年因徽

州府休寧縣耆民程元通京控案內經前安徽撫

臣初彭齡

奏准部議棚民契約載有年限者概俟限滿退山回  
籍其年限已滿並未載明年限而承種已逾十年  
者再種二年退回如年限未滿業主情願還租及

許訟到官飭退租價按年分攤如置有田產與土  
著民人締姻編入保甲者與土著無異應令入籍  
至棚民退山後不得仍種苞蘆改種茶杉培蓄柴  
薪以免坍瀉如仍有將山場混召異籍之人搭棚  
開墾至五十畝者無論公業私業發邊遠充軍不  
及五十畝者減一等租價入官承租之人不論山  
數多寡照強占官民山場律滿流爲從減一等欽  
奉

諭旨依議欽此又道光四年奉

上諭將棚民逐細查察按十戶設立甲長每年遞換門

牌隨時抽驗禁止匪類潛匿勾串滋事等因復經臣  
陶澍於安徽巡撫任內

奏明欽遵飭辦其棚民較多之處卽按十戶另設牌  
甲稽查倘係零星三兩戶雜在土著之內卽歸入  
附近保甲內照舊辦理欽奉

硃批認真稽查辦理不可有名無實欽此又上年八月  
欽奉

上諭棚民開種山地最易藏奸亦應驅除嚴行封禁等  
因欽此復經臣色卜星額以來安縣既有棚民七百  
餘戶請查照徽州府屬棚民之例辦理仍按十戶

設立牌長十牌設立棚長合一山設立棚頭責令  
稽查匪類令該縣按季親赴各山編查一次秋後  
責成該管知州抽查彙入編查保甲案內出具並  
無續墾新戶及窩留奸匪印結各在案是寬限回  
籍稽查匪類並嚴禁開墾均已立有章程因頻年  
來疊遭荒歉外來窮民藉山種植以謀口食未便  
遽行驅除致滋失業然恐因此稍有鬆弛貽累地  
方如土鬆入河易致淤塞尤爲切實情形不可不  
嚴行防禁此該御史陶士霖所以

奏請飭禁也查自上年來收成獲稔米糧平減流民

漸次回籍其搭棚居住各戶均照屢次章程辦理  
不致滋生事端似可毋須另立科條惟思棚民來  
自遠方貲本無多苟非本境之人招引租留亦安  
能以有主之山混任開墾是欲清其源尤須申嚴  
山主之禁嗣後無論公山私產概不准其違例召  
租開墾如有違犯卽查照定章問擬重辦俾藩籬  
旣固外來自少棚民不致增添自不至有墾土藏  
奸之事其向無棚民之州縣應令該地方官嚴行  
禁止年終出具並無棚民印結通送查考以昭核  
實謹合詞恭摺覆

奏伏乞

皇上聖鑒訓示謹

奏

道光十七年四月十七日奉到

硃批另有旨欽此同日奉到道光十七年四月初七日

內閣奏

上諭前據御史陶士霖奏棚民開山種植病農藏奸請  
飭查禁一摺當降旨著陶澍等嚴飭所屬各州縣嚴  
密管束或寬予期限令其漸回本鄉其未經開墾之  
山卽嚴行查禁毋令日久滋弊茲據該督等查明棚



民開山其行寬限回籍稽查匪類並嚴禁開墾均已立有章程自上年秋收豐稔以來流民漸次回籍其搭棚居住各戶均照屢次章程辦理不致滋生事端惟棚民來自遠方貲本無多若無本境之人招引租留豈能自行開墾嗣後無論公山私產概不准其違例召租開墾如有違犯卽查照舊定章程問擬重辦其向無棚民地方著責成該地方官嚴行禁止年終出具並無棚民印結通送查考以昭核實仍著該督等嚴飭所屬認真稽查隨時妥辦如日久弊生以致有名無實惟該督等是問欽此

覆奏沿海港汊村莊設法編查摺子

奏爲遵

旨籌議章程恭摺覆

奏仰祈

聖鑒事案查前准兵部咨欽奉

上諭御史王藻奏請將沿海港汊村莊設法編查履勘以絕窩綫而清盜源一摺各省沿海地方文武員弁平日認真稽查盜匪與奸民不能暗相勾通根株盡絕洋面自可肅清如該御史所奏沿海地方港汊村莊距海遠近不等盜船敢於入港總由奸民爲之窩

錢代銷贓物添雇舵船水手或稔知村內殷實之家  
勾通入劫盜去而人不敢過問沿海一帶雖設有水  
師總巡分巡各名目往來會哨多屬虛應故事潛匿  
港口僅令微末弁兵代巡捏報無怪海洋劫案時聞  
不可不嚴加防範惟各省近海處所情形不同應如  
何稽查周密自當因地制宜著直隸山東江蘇浙江  
福建廣東沿海各督撫妥議章程據實具奏摺並發  
欽此當經臣照行各司道鎮悉心籌議應如何稽查  
周密會議章程並以江南沿海南接浙江北通山  
東境地綿長村莊旣遠近不等港汊又紛歧不一

必須切實履勘逐細編查妥議詳覆復疊次分別  
行催去後茲據署江蘇按察使裕謙等詳稱據沿  
海各州廳縣暨該管府州先後勘查議覆並准蘇  
狼兩鎮移稱水師巡洋遵照御史周彥條奏嚴定  
會哨功過已有章程可循巡緝並無曠誤茲復按  
海口港汊村莊各情形會議章程詳請覆

奏前來

臣

查江南洋面極爲遼闊如蘇州府屬之常

熟昭文二縣松江府屬之川沙廳及華亭奉賢金  
山上海南匯五縣淮安府屬之阜寧鹽城二縣揚  
州府屬之東臺縣太倉州及所屬之鎮洋寶山崇

明三縣通州及所屬之如臯縣海州及所屬之贛榆縣並直隸海門廳非近處海濱卽孤懸海甸其間島嶼林立支港紛繁必須海口肅清庶洋匪無可潛匿亦必須洋面嚴密庶奸民亦無可勾通是海口內外巡緝編查原不可稍存疏畧也查江省沿海口岸均設有委員駐守稽查內外洋面亦按季派定總巡統巡分巡各員往來會哨卽外洋洋山島嶼皆有員弁駐巡防範稽查外洋實已周密今蒙

聖訓諄諄復將口內村莊港汊逐一履勘編查使內無

濟匪之人外無銷賊之路實足以清盜源而肅海  
洋臣惟有嚴飭該管文武及守口巡洋各員弁實  
力嚴查巡緝務使海洋內外一律靜謐如稍事疎  
懈卽行嚴參以仰副

聖主弭盜安良之至意謹會同江蘇巡撫臣陳鑾江蘇  
提督臣陳階平合詞恭摺具

奏並將司道詳議章程繕呈

御覽伏乞

皇上聖鑒訓示謹

奏

謹將沿海州縣港汊村莊設法稽查巡緝章程恭

呈

御覽

一沿海村莊逐一編查保甲以清盜源也保甲爲  
緝匪良法江蘇省無論腹地沿海均已遵照奉  
行立法本屬周備惟沿海村莊大小不等遠近  
不一且有零星散處者一有遺漏奸宄卽易於  
潛藏現將沿海村莊逐一編查十家爲甲設立  
甲長一人每編十甲設立總甲一人不及十甲  
者卽按三五甲爲一總不及十家及零星散處

者卽於一處各設一長責成地方正印官親往  
抽查諭令甲長總甲互相稽訪如有濟匪消賊  
窩藏勾引代雇水手之家密速報官拏究從優  
獎賞知情容隱一體治罪倘地方官視爲故事  
奉行不力卽嚴行參處以儆怠玩

一沿海港汊口岸添卡添巡盤詰船隻俾無縱漏  
也查江蘇省沿海口岸要隘原各設有營汛派  
撥員弁兵役巡查惟地勢寬廣巡緝恐未能周  
到現查各口相距遼闊之處均令各捐卡房一  
座由該管文武添派兵役輪替駐巡其偏僻沙



灘亦飭該營縣酌派兵役梭織巡查並責成守口員弁及該管文武凡遇船隻出入驗無牌照形跡可疑及偏僻不常泊船處所有以小舟渡人上岸及起卸貨物者均卽嚴行盤詰稟解該地方官究明實係盜匪卽將原獲之兵役視獲犯之多寡罪名之輕重量予獎賞倘敢疎縱別經獲犯發覺卽將該管員弁兵役分別參懲仍曉諭各總甲人等互相稽查兵役人等倘敢得賄包庇卽行據實稟首以憑懲辦

一商漁等項出海船隻仿照保甲稽查不准出租

以杜影射也查江蘇省民間商漁各船遇有買賣頂補等項事故向由地方官訊取地隣人等供結方准給照行駛不准私租頂冒誠恐日久弊生將船私租匪人及在洋劫占商船駕駛行劫以致奸良莫辨現已責令各州縣仿照保甲之法十船編爲一甲取具連環保結方准出洋並令依限換照不准逗遛洋面如一船爲匪九船連坐倘敢將船私租頂冒致令匪徒出洋爲盜無論是否知情均將船主人等從重治罪船隻入官充賞如遇漁汛之時沿灘採捕漁船並

照保甲之例十船編爲一甲僉派漁甲一名責  
成按號稽查辰出酉歸如有遠駛不歸本塢停  
泊及爲匪通盜立即稟究漁甲徇隱一體連坐  
一水師員弁按照定例巡洋會哨分別勸懲不任  
疎懈以肅洋政也查海洋巡緝責重水師江蘇  
省外海洋面設有總巡統巡分巡委巡按照定  
例出洋分班巡緝內洋洋面亦各按所轄洋面  
汛境派撥兵船往來梭織偵巡有犯必獲均足  
以資捍衛又於御史周彥條奏嚴定海洋會哨

案內

奏奉部議嗣後隨帶會哨營弁千把等官除於會哨  
期內如有拏獲盜匪奸船例應議敘及遇有失  
事託故不行例應降罰均遵照定例辦理外如  
果熟諳水性不畏風濤於巡洋期內並無失事  
案件每哨一次准記功二次分別考核保獎若  
有不諳水性畏懼風濤者初次記過仍令下次  
再行出洋試看倘仍不得力卽行改撥陸路習  
練以觀後效如此勸懲兼行立法已極周密遵  
照實力奉行海洋自可肅清

一沿海各屬米穀不准私載出洋以杜偷漏接濟

也查米石例禁出洋是以商漁船隻隨帶食米均應填給印票由守口員弁查驗放行其朝出暮歸沿灘採捕之小船例不准其配米向有定制第恐不肖船戶冀圖厚利私自多買米石偷運出洋接濟盜匪不可不防現今守口員弁逐細查驗如有暗藏多帶即將人船送交地方官究辦倘偷漏出洋致被別處拏獲發覺即將未能查出之員弁嚴行參處如係兵役賣放亦卽從重懲辦

一私藏槍礮軍火器械宜嚴行查禁收繳也查軍

火器械例禁私藏應責成沿海地方文武並巡  
洋舟師在於沿海各處實力搜查收繳稟報分  
別配用銷毀不任藉口防盜適以濟盜如有藏  
匿製造等弊一經破獲立拏私藏私鑄奸民及  
容隱之保甲分別究辦失察地方文武從重參  
處其硝磺火藥並責成守口員弁嚴行稽查毋  
許偷漏出洋如有疎縱事發究明亦卽從嚴參  
辦

道光十八年十二月十六日奉到

硃批該部議奏單併發欽此。

Handwritten text in a vertical column on the right side of the page, possibly a title or list of items.

11

陶文毅公全集卷二十七目錄

奏疏 河工

查議挑辦徒陽運河章程摺子

籌議修築練湖隄閘以利漕渠附片

會同江督奏請借款修建練湖黃金等閘水利要  
工摺子

驗收徒陽運河黃金張官閘座完工摺子

會同江督覆奏暫緩起除徒陽運河兩岸積土並  
挑河修埂摺子

請加 河神 風神封號摺子



欽差總河議覆毋庸改河摺子

會同

欽差總河勘辦河湖運道情形摺子

會同

欽差總河議覆毋庸改河摺子

覆奏革除河工積弊附片

奏疏 河工

查議挑辦徒陽運河章程摺子

奏爲查議徒陽運河挑辦章程恭摺覆

奏仰祈

聖鑒事竊臣承准軍機大臣字寄道光七年八月二十

二日欽奉

上諭御史蔣泰堦奏酌籌徒陽運河挑工一摺據稱徒陽運河小挑派丹徒等四縣承辦大挑則調派通省中缺分最優之十餘州縣協挑大半距工迢遠又值開徵收兌不能兼顧悉委幕友丁書此輩素未諳習

工程夫頭等乘機挾制昂價居奇稍不遂意紛紛鬩散又有道府委員等刁難需索除由司庫領銀外約計各州縣賠款多則萬餘金少亦七八千金實皆募友丁書朦混開銷委員及夫頭等訛詐吞蝕實用到工不及十之三四仍易停淤萬一軍船由內河出江臨時閣滯關係非輕等語徒陽運河爲江浙軍船經由要路全在挑挖寬深俾重運過行無阻著陶澍督同藩司梁章鉅將應如何委員辦工之處熟籌妥議並責成該管道道府盡心督辦務令工員領銀核實支銷免其賠墊責以疏濬俾河流通暢糧艘得以過行

該御史摺著鈔寄閱看等因欽此當經恭錄轉行欽  
遵查議據蘇州布政使梁章鉅常鎮通海道劉名  
載會詳請

奏前來查徒陽運河自丹徒縣境江口起至丹陽縣  
之呂城地方止綿長一百四十餘里水無來源全  
藉江潮灌注潮汐挾沙而行潮落沙停易致淤墊  
年年挑浚非不寬深而春水未生江潮未旺之時  
河流終於微弱內如丹徒縣之豬婆灘按鹽廳便  
益橋流水洞王家灣刀山對奶野狗墩等處皆係  
活沙膠泥隨浚隨漲尤爲著名累工向係六年大

挑一次由兩藩司在於蘇松常太揚通六府州屬酌派十一縣與鎮涇府屬丹徒丹陽金壇溧陽四縣分段承辦其餘各年冬令擇淺小挑歸徒陽壇溧四縣承辦或有積淤較重該四縣力難勝任隨時確核情形酌添外府屬縣二三員幫辦所用經費並不請動正項錢糧但支丹徒縣樂生洲官租銀五千八百餘兩及司庫匣費等銀大挑之年二萬餘兩小挑之年一萬餘兩事竣造冊報銷一切土方夫工向有成例不能加增而工費日形昂貴嘉慶四年十四年屢經議定江南有漕各州縣每

年公捐協貼誠以浚河運漕凡有漕州縣皆分所  
應辦大挑六年一次係於通省內擇其力量稍寬  
者派委十餘員因缺分之有餘補工用之不足以  
公濟公尙不致過於竭蹶卽徒陽壇溧四縣年例  
挑辦其賠累雖較多於他邑然於例價之外得有  
協貼而工長費鉅之年又得添員幫辦若使經理  
得宜不爲家人書役朦混開銷其力亦尙可支持  
惟時值漕倉收兌殷忙各工員勢不能常川駐工  
親身查察或遣丁胥或交親友卽無染指圖利之  
心而夫役終於輕視不受約束更有不肖之徒先

於雇夫時暗講折頭白喫乾分甚至剋扣工價侵  
肥入橐遂爲夫頭把持挾制百弊叢生此賠累所  
以日添而挑工易致草率也臣與藩司梁章鉅悉  
心酌議以此案挑浚工程計長一百餘里爲期不  
過月餘承辦之地方官不能親身督工卽不免於  
諸多弊竇計惟有慎於用人方可以杜絕諸弊而  
用人之中則莫如令承辦州縣自舉其平素相信  
廉幹之員無論實缺候補佐貳均准其詳明派調  
赴工代辦蓋其人旣係素信自必結實可靠足以  
稽察夫役丁胥朦混開銷之弊於承辦者所領經

費既不致稍涉浮糜卽不致更形賠累且代辦之員如果經理得宜認真挑辦卽予記功嘉獎倘有草率偷減立卽撤參亦責有攸歸各思奮勉以視悉委諸親友丁胥其情形迥不相同上年大挑之年卽係照此委辦頗爲得力嗣後應循照辦理至向來查工委員本無實濟近年早已裁撤自不慮再有滋擾又所用挑夫向由夫頭赴淮揚等處包雇每有浮冒夫數扣價入己之弊亦應令代辦之員於開工時親自點驗倘夫數不足卽拏該夫頭交縣究追衆夫臨工怠玩偷安卽係夫頭督率不



力立予枷示在局丁書人役如敢婪索規費許該夫頭具稟查究仍令代辦委員隨時嚴察庶爲切實至於挑挖之淺深全憑誌椿灰印封墩惟易於移動擡高卽可從中滋弊現據該司道核議請於誌椿左右凡有木石牆堦堪以存識之處一體標明寬深丈尺使無混淆亦爲杜弊起見總之任事在於得人有治人卽有治法向來此案工程經理不得其人誠不免有累於官而無益於工今循照上年成例專責代辦工員切實經理仍責成常鎮道鎮江府盡心實力認真督察自可以祛除諸弊

工竣後由臣再行親往驗收總期工歸實用則挑浚自必寬深費不虛糜在工各員自不致於賠累矣所有查議緣由是否有當理合恭摺覆

奏伏乞

皇上聖鑒謹

奏

道光七年十二月初六日奉到

硃批另有旨欽此同日奉到道光七年十一月二十一日內閣奉

上諭陶澍奏查議徒陽運河挑辦章程一摺前據御史

蔣泰堦奏徒陽運河挑工向由於幕友丁書之朦混  
開銷及夫頭等之訛詐吞蝕致挑濬不能如式易於  
停淤當飭該撫督同藩司熟籌妥議茲據查明積弊  
在所不免皆由於承辦州縣正值漕倉收兌之時不  
能常川駐工查察所致上年大挑運河卽將此弊革  
除令該州縣自舉所知詳明調派赴工代辦頗爲得  
力著照所請嗣後卽照此辦理責令承辦州縣於實  
缺及候補佐貳內各舉素悉廉幹之員詳明派赴工  
次令其代辦如查出夫頭有浮冒夫數任令衆夫怠  
玩偷安及在局丁書人役婪索夫頭規費等弊隨時

送交該縣懲辦務令將挑挖寬深丈尺一體標明使  
無淆混仍責成該道府認真督察工竣後該撫親往  
驗收總期積弊盡除運行通暢無得有名無實該部  
知道欽此

甲子年之...

卷二十一

六

|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|--|--|--|--|--|--|--|--|--|--|

281-4. 394. 40P. 45

籌議修築練湖隄閘以利漕渠附片

再臣查徒陽運河水無來源專藉江湖挾沙而來

歲須挑挖大批年分工段綿長一百數十里例銷亦止三萬餘兩不及河工一草壩之費本屬無從偷減不慮不歸實用惟兩岸由鑿山而成高崖壁立出土維艱如豬婆灘野狗墩刀山對奶等處尤形陡峻紅水溼泥出於山麓挑挖愈深則崖腳愈虛傾卸入河阻遏彌甚與別處河道情形迥異近來大江多有沙漲京口潮來勢緩一值西風刮耗潮入更稀兼之重空二運經過時正當冬盡春初

雨水未生江流尙涸雖挑濬已深而亦無潮可入  
實爲漕運之一累臣思糧船經行南北運河自清  
江浦至高寶一帶則有洪澤湖自黃林莊至韓莊  
一帶則有微山湖自夏津至東昌一帶則有南旺  
安山等湖皆蓄爲水櫃俾資緩急未有但恃挑工  
無水接濟如徒陽運河者也溯查從前原有練湖  
一所收納長驪諸山八十四汊之水北接丹徒境  
謂之上練湖南接丹陽城謂之下練湖周圍共一  
百六十里淵注渟著古名曲阿後湖又曰練塘始  
自晉時迄於唐宋皆加修治盜決侵耕之禁甚嚴

每於春夏蓄水秋冬濟運遇淺涸時但放湖水一  
寸卽爲運河一尺宋元史志皆載其事明史亦言  
丹徒以上運道視江潮爲盈涸京口閘底與虎邱  
塔頂平可知挑河無益蓄湖爲要等語惟查此湖  
舊隄自康熙年間上練湖已改民田升科僅存下  
練湖四十里但能灌田不復能濟運所有涵洞滾  
壩幾同虛設其運河舊設之奔牛呂城陵口黃泥  
新豐大犢等閘亦多就頽廢每當軍船停淺無策  
可施臣此次勘視運河周歷上下練湖親至湖心  
亭彌望荒煙水深不及尺許因思上練湖固難議



復卽下練湖亦未易言挑浚第就現存之湖加築隄埂遇山水漲發亦可蓄至七八尺果能申嚴決洩之禁收蓄渟涵俟冬春淺涸時開溝引水從湖東北角之張官渡啟涵放入運河將下游之呂城等閘堅閉勿泄使水勢迴激向北而西縱京口潮來不旺亦足資濟急其上練湖初受山水處名曰莊前河水分兩道一係正流流田南去卽下練湖之源也一係分支循溝東去則黃泥壩入運之水也其分支之處向設黃金閘一座以擊束支水使並歸下練湖無如上練湖旣改民田下練湖之水

仍須自上練湖迤邐而來中間雖有橫埂而南北地勢相平下練湖之水蓄至七八尺則上練湖之田亦淹至二三尺矣是以居民不利閘之存而反利閘之廢遇春夏水發時輒將黃金閘決開使水向黃泥壩直洩無餘而下練湖已無水可蓄不俟秋冬旱形淺涸矣現在黃金閘廢壞無存實由於此雖愚民無知然田旣升科亦難聽其淹浸惟有就水所經行處兩岸先築隄埂以次修復黃金閘使水歸下練湖足資多蓄而不致迴漾增高以淹上練湖之田則濟運之源裕矣仍將運河各閘擇

要興修查照舊章依時啟閉俾湖水放出尺寸皆  
歸有用於運道情形可期有益惟是工鉅費繁非  
旦夕所能奏效而一勞永逸之策亦無踰於此容  
俟籌有款項再細勘辦以利漕渠於農田灌溉亦  
不無小補謹附片具陳伏乞

聖鑒謹

奏

道光七年十二月初六日奉到

硃批妥籌經久之策務收實效欽此

會同江督奏請借款修建練湖黃金等閘水利要

工摺子

奏爲籌議練湖水利請借動銀款擇要興修仰祈

聖鑒事竊照鎮江府之徒陽運河爲江浙兩省漕船要

道該處原係鑿山而成惟藉一綫江潮引納通舟

而潮來挾沙易致淤淺近年大江多有漲沙梗塞

潮勢每遇西風刮耗潮入更微兼漕船往返時值

冬盡春初雨水未生江湖尙澀無歲不有阻滯皆

因水無來源所致殊形掣肘查丹陽縣有練湖古

名曲阿後湖在運河西岸收納長驪諸山八十四

漢之水周圍一百六十里康熙年間始將上練湖  
一百二十里改爲民田升科下練湖亦逐漸就湮  
百十年來湖存無幾閘堰亦俱壞闕收水無多查  
此湖自唐宋以來盜決侵耕之禁甚嚴向稱三分  
灌田七分濟運自練湖廢而徒陽運河歲藉挑挖  
實爲繁費緩急靡恃臣陶澍前於嘉慶二十一年  
巡視南漕任內曾

奏請修治道光七年冬因挑河之便復親行履勘始  
知練湖居高臨下正得瀉水濟運之宜本可無須  
挑浚但當加築隄埝方能多蓄其湖身正北之黃

金閘地近莊前河上承馬陵橋來水下達范家溝  
入運尤爲全湖咽喉必須修復以資鈐束並將濱  
湖各涵閘擇要興修當經附片具陳欽奉

硃批妥籌經久之策務收實效欽此上年十二月回空

漕船阻淺經臣蔣攸銛路過鎮江府飭該州縣設

法籌辦旋因漕船改由橫閘進口而下游之宋家  
村姚灣至丹陽界之定山灣一帶多有阻滯經該  
府趙光祿馳往上下練湖相視湖水經由之路插  
立誌椿復赴運河下游趕做活壩攔蓄將村民於  
黃金閘廢址所築之土壩啟通掣動湖水由范家

溝流放運河次日勘驗運河之黃泥閘一帶增水  
二尺其餘各處亦增一尺餘寸不等查驗練湖誌  
椿通湖牽計祇消水二寸六分是前人所稱湖水  
放一寸河水增一尺之語實爲信而有徵本年交  
春雨澤稀少運河水淺復經該府縣將漕船提過  
丹陽南薰閘下板卽日啟開練湖東南角涵洞放  
水濟運各船亦得銜尾前行查練湖廢弛已久茲  
旣試驗有效自應設法修理惟經久之策必須全  
湖加隄築埂修復運河諸閘及濱湖涵洞層層攔  
蓄方能迴漾接濟至丹徒鎮以上統計工用不下

二三十萬經費較繁惟有先其所急擇要興辦現  
勘得黃金閘舊址適當衝隘既爲蓄水要樞尤爲  
放水關鍵急應修復以備蓄洩其瀉水入運之范  
家溝在丹陽縣上游二十五里該處切近黃泥壩  
地方嘉慶二十二年建有黃泥閘一座彼時亦爲  
攔蓄上游江潮而計現查所建之閘在范家溝北  
數百步若黃金閘放水入運反在黃泥壩之南不  
能蓄水迴漾上游地位例列殊乖措置可見彼時  
但知有江潮灌入運河全不知有練湖可以放水  
入運無怪自修造以來迄未見效今亦漸就傾圮



應將黃泥閘移建稍南五里之張官渡其地在范家溝下游係練湖東北角舊有涵洞遇緊急時將閘板堅閉或從黃金閘放水或從濱湖涵洞放水均可迴激北上源源接濟此二閘關繫最要即將來經費稍裕大修練湖亦係必應先辦之工現既籌議興修應卽擇要趕辦惟採置新石有需時日現據該鎮江府趙光祿查得下練湖東隄舊有四閘地勢稍高未能放水入運久成虛設酌留其一以存舊跡其餘三閘石料卽可全行拆運爲修建黃金閘及張官渡新閘之用於要工可期迅速逐

加確估修復黃金閘木石各工及築壩戽水添換  
繩板各項需銀一萬四千兩移改黃泥閘至張官  
渡需銀一萬兩共需銀二萬四千兩稟經蘇州布  
政使梁章鉅勘驗實係切要應辦之工所估銀數  
均屬核實估計加倍撙節請免其報銷並請於司  
庫封貯銀內先行借給卽委該府趙光祿承辦俟  
新漲沙洲歸公召佃後徵存租息陸續歸款等情  
復經臣陶澍親詣相度帶同該府指示機宜札商  
臣蔣攸銛意見相同應卽趁春水未深照數發銀  
趕辦興工如有尙須酌辦之件另容籌措所借封

貯銀兩查各屬有新漲沙地前經臣陶澍遵

旨議將租息歸公爲通省水利之用接准部覆奉

旨允行現在飭屬妥議條款俟覆

奏後收到租息卽將此項借款先行歸還封貯責成

該府趙光祿一手經理督同丹徒丹陽二縣遴員

趕辦以期工歸實用事竣稟驗不任稍有草率偷

減並請免其報銷以歸簡捷所有籌議練湖水利

請借封貯銀款擇要辦理緣由謹合詞恭摺具

奏伏乞

皇上聖鑒訓示謹

奏

道光九年三月二十三日奉到

硃批另有旨欽此同日奉到道光九年三月十一日內

閣奉

上諭蔣攸銛等奏籌議練湖水利請借動銀款擇要興  
修一摺江蘇丹陽縣練湖廢壞已久據該督等督飭  
該府縣詳加勘驗黃金閘適當衝隘亟應修復以備  
蓄洩其舊建黃泥閘應移建稍南五里之張官渡實  
係必應先辦之工並查明下練湖東隄舊閘酌存其  
一其餘三閘石料即可全行拆運爲修建黃金閘及

張官渡新開之用所有估修黃金閘木石各工及築壩戽水添換繩板各項並移改黃泥閘共需銀二萬四千兩著照所請於司庫封貯銀內先行如數借給責成該管知府一手經理督同丹徒丹陽二縣遴員趕辦所借銀兩俟新漲沙洲歸公召佃後徵存租息陸續歸款免其報銷該督等務當嚴飭該府縣認真辦理以期工歸實用事竣親往核實驗收毋任稍有草率偷減該部知道欽此

驗收徒陽運河黃金張官閘座完工摺子

奏爲修建黃金張官兩處閘座驗收完竣仰祈

聖鑒事竊照鎮江府屬之徒陽運河爲江浙兩省漕行

要道前經臣等議將練湖上首之黃金閘修復以

收蓄湖水並將運河范家溝北之黃泥閘移建於

迤南五里之張官渡以迴濟上游估需工料銀二

萬四千兩

奏奉

諭旨准於司庫封貯銀內先行如數借給責成該管知  
府一手經理督同丹徒丹陽二縣遴員趕辦所借銀

兩俟新漲沙洲歸公召佃後徵存租息陸續歸款免其報銷等因欽此飭據鎮江府趙光祿將黃金閘工程交丹徒縣吳浚承辦於三月十五日開工移建張官閘工程交丹陽縣朱清耀承辦因俟重運糧船過竣始能築壩於四月十五日興工該府仍督同大小各委員親駐工次不避風雨日夜籌辦並經藩司梁章鉅親往督催<sub>臣</sub>等復疊札諄飭認真趕辦旋據該府稟報黃金閘於五月二十一日工竣張官閘於六月十七日工竣<sub>臣</sub>等因各有審辦要案不克分身卽委藩司梁章鉅於催工之便覆

實驗收茲據該司稟稱查驗黃金閘共長二十七丈高二丈連海漫石二十一層黃泥閘共長五十一丈二尺高一丈八尺六寸連海漫石二十層核對原估高寬丈尺相符如式砌造毫無草率偷減當飭將閘牆幫護堅實趕緊清釐河底啟除土壩一面先將跌壩塘刨空格外寬深俾資容納於六月二十日開壩通水等情前來臣等伏查練湖閘座失修水無蓄洩以致數百里運河僅藉江湖一線爲之灌注每遇冬春之際重空兩運經臨潮落水枯動形掣肘茲蒙



恩准借項興修免其報銷俾得搏節綢繆將黃金張官  
二閘擇要先修完竣實屬工堅費省設遇京口淺  
阻改由橫閘行走足收濟運通漕之益惟查練湖  
廢壞已久據該府勘報湖之西面及東北一帶間  
有淤灘稍占蓄水地步上湖溝港逼窄山水不能  
暢達若能浚湖之淤藉以培隄實屬一舉兩得現  
值農事正忙且湖水較長容俟秋冬間再行酌辦  
至於籌蓄放之機宜復巡查之舊典侵耕盜決禁  
令宜嚴涵洞誌椿稽察必慎以及下游各閘之攔  
蓄夫役住房之建置均應釐定章程俾垂經久除

俟妥籌另辦外所有開工完竣驗收啟備錄由謹  
合詞恭摺具

奏伏乞

皇上聖鑒謹

奏

道光九年七月二十八日奉到

硃批立法不難務要實力行之妥爲籌辦欽此

四  
三  
二  
一  
集  
卷  
二  
一  
十

十

會同江督覆奏暫緩起除徒陽運河兩岸積土並  
挑河修埂摺子

奏爲遵

旨查議徒陽運河岸旁積土因工鉅費繁籌款維艱應  
請從緩挑辦恭摺覆

奏仰祈

聖鑒事竊臣等承准軍機大臣字寄道光九年四月初  
一日奉

上諭御史朱壬林奏籌濬徒陽運河一摺江蘇徒陽運  
河每歲興挑仍形淺阻殊於漕運經行大有關係據

陸才家之卷三十一  
該御史奏稱欲通運道先濬河身欲濬河身先除岸  
旁積土所奏不爲無見著蔣攸銛陶澍會同悉心籌  
議如何將岸旁積土設法起除並挑出泥淤不得再  
於岸旁堆積之處體察情形據實奏明督同承辦各  
員妥爲經理至該督等前經奏請修復下練湖閘壩  
以期蓄水恐停蓄稍深於上練湖民田易至浸澇著  
該督等一體查勘具奏該御史原摺著鈔寄閱看將  
此諭令知之欽此遵

旨寄信前來當卽恭錄轉行欽遵籌議勘辦去後茲據  
鎮江府知府趙光祿督同丹徒縣吳浚悉心查勘

運河兩岸積土歲久堅實無虞傾卸請俟經費充裕再行挑除等情稟經蘇州藩司梁章鉅常鎮道劉名載覆核轉詳請

奏前來臣等伏查鎮江府屬之徒陽運河本係鑿山而成水無來源全藉江潮灌注而自丹徒以下至常州蘇州勢若建瓴難於存蓄每日渾潮兩至水去沙停終年淤積更加豬婆灘野狗墩等處活沙溼泥隨浚隨漲當空重經由之際正潮枯水落之時年年擇段小挑隔六年大挑一次從前挑出淤泥於兩岸隨便堆積百數十年層層加增遂若崇

山峻嶺每遇風雨仍復傾卸入河嘉慶十五十七等年會議借款挑除因工鉅費繁未能興辦後於

嘉慶二十一年間

臣

陶澍於巡視南漕任內

奏請起除兩岸積土經前督

臣

孫玉庭逐段查勘因

地就勢抽開土巷收買山背民田山地爲挑河堆土之所奏奉

諭旨給項興辦在案現查各土巷與原估寬深丈尺淺窄間有不符蓋因挑夫貪圖近便每乘工員照察未周卽在土巷內隨地拋置亦勢所不免

臣

陶澍

前於道光六年冬驗收挑工會將寄土岸旁之工

員鈕信友奏明勒令賠挑近年以來均知儆戒由  
土巷傾棄山背但新土雖不致增積而舊土究未  
能啟除論經久之計惟有將鎮江兩岸之土移補  
高郵寶應一帶緯道最爲一舉兩得第查運河自  
京口至丹徒鎮計二十里河長三千五百餘丈就  
兩岸併計已有七千餘丈其間積土或與城堦相  
平或高出民房五六尺及一二丈不等又自丹徒  
鎮至丹陽縣境大挑年分煞壩之處爲止計程百  
餘里積土更加數倍若起除淨盡非百餘萬金不  
可



國家經費有常驟難籌此鉅款且現據該府縣勘明兩隄老岸歲久堅實卽遇大雨時行亦不致有衝刷之虞應請暫行從緩俟籌有款項再行興辦以後每年冬底挑撈運河仍責成該管道府嚴督工員認真稽察務令出土至山後官置地內堆積不准再在土巷傾棄挑工完竣仍令承辦各工員酌留人夫將拋撒寄土收拾乾淨馬路土巷剗削平整驗明方准撤散以免新積所有每年承辦挑河各縣自舉工員代辦一節行之數年頗有實效如另派委員經理殊多掣肘亦應仍循其舊毋庸另

議更張至下練湖水蓄深恐淹上練湖民田臣等亦早經慮及道光七年冬間臣陶澍並會附奏陳明在案惟查該處湖形南北雖屬相平而上練湖係南源經行之處地勢較高其近水蘆灘本屬無多但須畧築隄堰卽資防衛與下練湖隄外民田四萬餘畝之全藉湖水灌溉者情形迥殊斷不能顧少失多任令湖涸且此時修建黃金閘止係復舊並非增新閘板尺寸卽按地勢高低依時啟放無慮上湖淹浸仍當勸諭各業戶於農隙時浚淺修隄俾資久遠所有臣等遵

旨籌議暫緩起除積土及挑河修埽各緣由謹合詞恭

摺覆

奏伏乞

皇上聖鑒謹

奏

道光九年七月二十八日奉到

硃批知道了欽此

281-4 394 Bb 1.0 DAK

請加 河神 風神封號摺子

奏爲奏

聞請

旨事竊照湖河一帶崇祀

神祇屢著靈異疊經

奏蒙

加封並

頒賜扁額江南河口爲清黃交匯之區堰盱大隄爲生民保障之具尤賴

靈昭睨佑利漕衛民本年洪湖非時異漲爲從來所

未有較之道光四年堰圩失事時尙大至三尺三寸不但重運經行逆流涉險深恐難達

天庾而淮揚兩郡形居釜底閭閻時切恐惶兼之黃水若不遞落則清黃高下無多卽灌塘亦難得手

張井焦思之餘倍深畏懼每至

黃大王祠及

風神廟中虔誠默告敬述我

皇上軫念河湖勤恤民隱之至意以冀仰荷

神庇臣陶澍到浦後亦時時詣廟拈香敬申禱祝今

洪湖盛漲歷一月之久自二月二十六七日後屢

經西北風暴掣卸石工潰及子堰每當危險萬分  
之際卽風平浪息或忽轉東南堰吁一萬七千餘  
丈之長隄竟得保全兩郡民生俱各安帖而河水  
亦復遞落清水得以暢流重運順軌渡黃毫無阻  
滯凡屬官弁軍民無不同聲感頌以爲皆賴我

皇上誠敬昭虔

神祇靈佑之所致恭查河口崇祀

神祇內

天后原蒙疊次

加封護國庇民妙靈昭應宏仁普濟福佑羣生誠感咸孚

顯神贊順共二十四字復於嘉慶五年

加封垂慈篤祐四字

金龍四大王原蒙兩次

加封顯佑通濟昭靈効順八字復於嘉慶二十五年

加封惠孚二字惟

黃大王於乾隆三年

敕封靈佑襄濟大王嘉慶二十五年復蒙

加封顯惠二字

風神於雍正六年

敕封清和宣惠風伯之神尙未另請

加封<sub>臣</sub>等謹不揣冒昧恭摺

奏懇

天恩於

黃大王

風神各求

敕加封號以答靈庥而遂輿情是否有當恭候

聖裁謹此奏

聞請

旨伏乞

皇上聖鑒謹



奏

道光十一年五月二十五日奉到

硃批朕誠欣誠感另有旨諭欽此同日奉到道光十一年五月十七日內閣奉

上諭陶澍等奏請加

河神

風神封號以答靈庥一摺本年洪澤湖盛漲兼值西北風暴掣卸隄堰勢甚危險該督等虔籲

神祠風勢順轉長隄得以保固重運渡黃毫無阻滯神庥不著河漕順行朕心誠欣誠感著該衙門於原

定

靈佑襄濟顯惠大王

清和宣惠風伯之神號敬謹各擬加封候朕酌定俾  
湖河永慶安恬益昭靈貺欽此道光十一年七月初  
四日准禮部咨稱

河神封號字樣奉

硃筆圈出昭感

風神封號字樣奉

硃筆圈出康濟欽此

|  |  |  |  |  |  |  |  |  |  |  |  |  |  |
|--|--|--|--|--|--|--|--|--|--|--|--|--|--|
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |
|  |  |  |  |  |  |  |  |  |  |  |  |  |  |

1912

STATE OF NEW YORK

1912

會同

欽差總河勘辦河湖運道情形摺子

奏爲遵

旨會勘河湖運道情形並妥籌辦理事宜恭摺覆

奏仰祈

聖鑒事九月十七二十四二十七等日疊准軍機大臣

字寄內閣奉

上諭據御史鮑文淳奏黃河入湖恐妨運道請豫籌疏  
浚以利轉運一摺宗人府府丞潘錫恩奏全黃入湖  
貽害甚鉅請急籌補救以挽全局以利漕運一摺

臣

張井前奏湖水漲滿竭力防護並籌辦堵築一摺著  
穆彰阿陶澍張井會勘籌辦欽此伏查江南河丁運  
道關鍵全在洪澤一湖今桃南十三堡地方黃水  
入湖如果湖內受淤過甚勢必淤及運河所關誠  
非淺鮮臣張井於失事之後屢赴該處查勘探量  
並將大概情形具

奏在案臣穆彰阿臣陶澍先後馳抵清江浦復公同  
敬繹

聖諭並細閱宗人府丞潘錫恩原摺查該府丞與御史  
鮑文淳所奏雖詳畧不同總以淤湖淤運爲可慮

非日覩情形不能得其要領卽遵

旨會同查看於初三四日親往龍窩汛決口地方履勘情形該處黃水入湖卽由吳城七堡仍入黃河其間靠隄之縱橫二三十里多已受淤但該等處係在桃源縣南岸二十圖之內道光五年以前均係莊田廬墓並非湖身至黃水入湖東至吳城七堡而止旣不能入束清壩卽不能灌入運口又何能淤及淮安寶應高郵以下至吳城七堡順清河禦黃壩等處清水暢出刷滌黃淤現據河員稟稱七堡以下至海口逐段測量已刷深四五尺不等現

在湖水尙存一丈九尺餘寸較盛漲已消二尺有餘自後再見消落卽當遵奉

諭旨次第堵閉山盱各壩河俾湖水不至分洩專力刷黃以收蕩滌之效兼可堵閉昭關壩及高郵四壩以期下河田畝早爲涸復至潘錫恩所稱全黃入湖爲從來未有之事將來堵合復故勢必全湖俱成平陸此一節最爲緊要因查嘉慶二十五年河南儀封漫口以前如李家樓邵家壩等處皆係全黃入湖且乾隆五十一年桃源司家莊漫口卽在現今口門之上二里與此時情形無異似不至淤

成平陸至蕭南廳啟隄掣溜一節當桃南失事時  
有請開攔湖壩者有請開王營減壩者亦有請開  
蕭南之毛城鋪者臣張井皆未敢冒昧舉行今臣  
等復公同商酌桃南缺口既已需費不貲豈可又  
於上游另挖口門淹及地方益糜經費况蕭南奪  
溜則以下數百里正河反致淤成平陸所稱八九  
十萬兩尙不敷挑挖引河之用六年減壩厲民之  
事未可援照惟查南河中滿之患總在桃南桃北  
外南外北由安海防六廳之間計程三百餘里從  
前啟放減壩大興挑浚徒勞無益緣其挑浚之處



附錄卷之八  
名二十一  
三  
在禦黃壩以下而禦黃壩以上轉更高仰清水無從暢出現在桃南決口黃水入湖從吳城七堡仍流入黃自吳城七堡至禦黃壩以下直至海口凡外南北下汛及山海兩廳百餘里之內已刷滌漸深而吳城七堡以上高仰如故卽在桃南北下汛外南北上汛之間計程二十餘里目下黃流入湖正河乾涸凡此高仰之處正可施工若趁此機會就臣張井擬估抽溝之處全行大加挑浚除去中滿之患俾禦黃壩以上漸就底平實係一舉兩得約計所費不過四十萬兩左右於全河深有裨益

如蒙

俞允容

臣

張井會同

臣

陶澍另行確估隨時具

奏辦理至於來年重運事宜惟當恪遵

諭旨察看情形如堵合之後清水暢出糧船自易行走

倘仍難暢出卽將束清禦黃二壩及臨清堰等處

趕緊收束修復仍行灌塘之法不致貽誤所有潘

錫恩與鮑文淳所奏應均毋庸置議謹將臣等會

勘籌議緣由合詞繕摺覆

奏並繪圖貼說恭呈

御覽伏乞

皇上聖鑒訓示謹

奏

道光十二年閏九月二十日奉到

硃批另有旨欽此同日奉到道光十二年閏九月十四

日內閣奉

上諭前因龍窩汛決口特派穆彰阿前往南河查辦昨據穆彰阿等會勘河湖運道情形該處黃水入湖即由吳城七堡仍入黃河其靠隄縱橫二三十里多已受淤係在桃源縣南岸二十圖之內並非湖身至黃水入湖東至吳城七堡而止既不能入束清壩卽不

能灌入運口至吳城七堡順清河禦黃壩等處清水  
暢出刷滌黃淤自七堡以下至海口已刷深四五尺  
不等俟湖水再消卽可堵閉山盱各壩河俾湖水專  
力刷黃兼可堵閉昭關壩及高郵四壩俾下河田畝  
早爲涸復並查明乾隆五十一年桃源司家莊漫口  
卽在現今口門之上二里與現在情形無異其不至  
淤成平陸尙屬可信其吳城七堡至禦黃壩以下直  
至海口百餘里內刷滌漸深惟吳城七堡以上高仰  
如舊卽在桃南北下汛外南北上汛之間計程二十  
餘里現當正河乾涸正好趁此機會估辦抽溝大加

挑浚約計所費不過四十萬兩著陶澍張井相機妥  
爲籌辦至回空軍船截至閏九月初五日止已渡黃  
者計一千三百餘隻本年歸次不誤惟來年重運仍  
著陶澍等察看情形如堵合之後清水竟能暢出卽  
復舊規倘仍難暢出卽將束清禦黃二壩及臨清堰  
等處趕緊收束修復仍行灌塘之法不許貽誤欽此

會同

欽差總河議覆毋庸改河摺子

奏爲遵

旨會勘江境改河情形悉心籌議恭摺覆

奏仰祈

聖鑒事竊

臣陶澍

臣張井先經接准軍機大臣字寄道

光十二年閏九月二十八日奉

上諭朱士彥另片奏本年二月入都途遇嚴烺言及現在惟有將黃河改於北岸自桃源以下以北隄爲南隄另築北隄其現在清口以下令讓淮水洗刷於安

東地方會黃由舊河身入海另於北岸開運河數十里約需費二百萬可免倒塘灌放等語改河數十里非旦夕可辦且新築北隄事體重大經費亦復不貲是否可以籌辦之處著穆彰阿等履勘形勢詳查利弊悉心妥議具奏欽此<sub>臣</sub>敬徵於本年十月二十九日在于家灣工次接准軍機大臣字寄十月二十三日奉

上諭改河一事前旨交穆彰阿會同陶澍張井查辦現在穆彰阿啟程後著敬徵會同陶澍張井履勘形勢詳察利弊悉心妥議具奏將此諭令知之欽此當卽

恭錄分咨一體欽遵隨經穆彰阿將朱士彥原奏摺片三件移咨前來臣張井復將本年春間前河臣嚴烺路過清江面交臣擬改黃河運河圖式一件與臣敬徵臣陶澍閱看臣等查才士彥片奏內稱改清口之議擬改至下游安東縣城以上蕭工地方較現今清黃交匯之處約下去五十餘里則黃水建瓴之勢約低五六尺洪湖之水少蓄五六尺可以暢出刷黃毋庸倒塘矣應於黃河北岸之桃源清河交界處相度地勢築新北隄一道下至安東縣而止計工一萬八千丈築隄高三丈寬三



平定回疆方略卷一百二十一  
三  
丈共計新隄一百萬兩安東縣上新北隄之北創挑新北運河一道運河之北再築新運河隄上至現在運河之豆辦集止約估需銀六十萬兩以現在黃河北隄作爲黃河南隄以舊黃河高家灣以下至安東以上止作爲清水尾間重空軍船仍出三閘三壩靠隄下放在安東以上渡黃由新運河上行至豆辦集歸運河約現行之路軍船計多七八十里添作柴壩以及創隄放河等費約需三十萬兩舊北隄至新北隄約寬二十里並無城郭鎮市不過數十村莊給價遷移約需銀二十萬兩等

語前河臣嚴煨圖內係自桃北適中之顧工起改  
河斜穿遙隄跨過中河鹽河下達山安廳蕭工之  
北復穿入遙隄挽歸蕭工正河臣等於十一月三  
十日會同前赴桃源北岸按圖履勘核對原議並  
帶同司員熟諳工程之將備享悉心籌議逐處相  
度丈量由中河以至山安廳界統計顧工至蕭工  
就遙隄北岸續量共長二萬四千餘丈原議只估  
創築黃河新北隄並未估計挑河查遙隄以北至  
擬築新北隄寬處須六七百丈窄處須四五百丈  
若不挑有引渠導河東注則百餘里平陸之地溜

行散漫必致普律受淤兼恐南衝北折兩面新舊隄工均難保守自應酌爲估挑以期順軌茲量願工以地勢過長若以孫工作爲河頭計少十八里尙可節省應挑新河計長一萬九千九百餘丈深八尺口寬二十五丈底寬二十一丈八尺自挑北包家民房起至蕭工止須築新北隄一道長二萬三千丈高三丈頂寬三丈底寬十八丈再於新北隄之北自中河廳十里堡起至山安廳蕭工止須挑新中河一道長二萬二千五百九十丈口寬二十丈底寬十六丈深一丈新中河之南北應築

緯隄各一道北長二萬四千五百九十丈南長二萬三千三百九十丈頂寬一丈五尺底寬十四丈高二丈五尺以上挑河築隄方價不一按例核算與原議二百萬兩之數幾至倍增又遙隄之內本有鹽河一道爲淮北引鹽及葦蕩左營柴船經行要道今旣爲新河跨壓雙金閘亦廢必得於新運河北隄以北仍挑新鹽河一道自洪家蕩對過起至陶家馬頭接入舊鹽河止長四千五百丈口寬十二丈底寬八丈深一丈又須築鹽河北隄一道長五千一百丈頂寬一丈底寬六丈高一丈再於

新中河北隄另建雙孔石閘以通鹽河此三項又  
需銀四十萬兩左右其遷移百姓村舍墳墓賞卹  
尙不在前數之內是改河之議卽事屬可行誠如  
聖諭經費亦復不貲非旦夕可辦且查南河中滿之處  
上自桃南北起下至海安阜上汛止計三百餘里  
蕭工地界其中現在湖水暢出蕭工以上及安阜  
下汛積淤之處雖漸刷深而山安海防至安阜上  
汛未能一律深通卽使新改黃河可於蕭工歸入  
正河而由蕭工以至安阜一百五六十里仍不免  
中滿之患况擬改河頭之孫工水面較遙隄以北

內地計高一丈二尺除中流水深一丈河底計高  
內地一尺新河挑深八尺則舊河底實高新河底  
九尺其勢尙屬建瓴至河尾蕭工挽歸正河之處  
現在水面高內地一丈二尺五寸除中流水深一  
丈計河底高內地二尺五寸新河挑深八尺則舊  
河底反高新河底一丈五寸水性就下驟遇高仰  
則勢難強越必致兩岸皆成倒灌河身依舊淤高  
引清至此仍難暢出刷滌又中河廳遙隄北首查  
有積水一段東西長八里南北寬十五里深二三  
四尺不等無可宣放勢難施工舊減壩之北張家

河頭東西因減壩屢次啟放地勢淤墊約二十餘里較現擬改之河頭河尾高至八九尺挑河至此又多梗阻滋費此又嚴煇未經目覩者誠恐舉之未幾廢卽隨之於漕運大有關礙所有改河原議臣等再四籌商實無把握應請毋庸置議謹將會同勘議實在情形據實恭摺具

奏伏乞

皇上聖鑒謹

奏

道光十二年正月初一日奉到

硃批知道了欽此



1. 1997 2. 1998 3. 1999

1997

281-4.39EAK 60P2K

覆奏革除河工積弊附片

再臣接准南河督臣咨會承准軍機大臣字寄欽

奉

上諭有人奏河工積習廳員出息但問辦料州縣遊幕之徒藉署內熟識之人出入招搖其在河工者名爲外工類皆盤踞有年購料必經其手交收查驗如何朦蔽又復熟諳故能久爲河工之害等語向來河患往往生於無事之時在事大員不可不早爲慮及若廳員購辦料堆交收查驗任聽外工巧相朦蔽亟應從嚴查究著陶澍麟慶卽將河工向有積弊體訪禁

革廳員所購料堆如何驗收抽查務歸核實之處酌  
議章程據實具奏至遊幕人等一經訪有實蹟卽行  
嚴加懲辦等因欽此仰見

皇上慎重工需杜絕弊端之至意跪讀之下欽佩難名

臣伏思河工不外修防而修防需用料物汛地皆  
須防守而防守必資衆力蓋一廳之段落甚多一  
官之耳目有限河患生於無事所以處處派人者  
不過借以守汛以免顧此失彼之虞斷不容任其  
盤踞致滋朦混察訪從前弊竇原有外工家丁河  
兵料戶堆夫人等勾串虛堆之事臣自道光十年

到任後催漕防汛往來清河時時悉心查訪所有前項弊端業已革除每向河員切實諄飭工程務期穩固錢糧力求撙節苟非萬不得已實在緊要之工不許另案請

帑卽如道光十二年堵築桃源于工啟閉江口蘆家山加高洪湖隄堰各工最爲有事之年所用銀六百七十二萬餘兩較之從前道光六年另案專案用銀至八百六十九萬餘兩已減少數日不貲十三年卽減用至三百十四萬餘兩十四年更減至二百二十六萬餘兩較十二年另案各工銀又減

去一百二十餘萬十五年用銀二百九十四萬餘  
兩較十二年另案各工銀亦減去五十四萬餘兩  
卽上年用銀二百七十五萬餘兩數目比前年又  
減省十八萬餘兩在河臣督司工務節省已不遺  
餘力防弊實刻未鬆勁惟料物關繫錢糧工友究  
難深靠臣自應隨時隨地嚴行訪察一有堆料不  
實浮冒開銷等事卽當會同河臣嚴行懲辦以期  
工歸實用

帑不虛糜除飭各河道將查料章程如何驗收如何  
抽查詳細妥議具詳另行核實會

奏外謹先附片陳明伏乞

聖鑒謹

奏

道光十七年二月十二日奉到

硃批知道了欽此

附錄卷之三

卷二十一

三

281-4 391 54 60 P. 28

陶文毅公全集卷二十八目錄

奏疏 水利

籌款疏淪沿淮各湖摺子

興修皖省水利隄防附片

陳奏勸修水利附片

請拆除吳淞江口石閘附片

會同江督奏勘估吳淞江工程摺子

會同江督驗收吳淞江工程摺子

會同江督奏吳淞江岸請建前任勤事知府專祠

列入春秋祀典摺子



會同江督借款挑濬瀏河摺子

籌款興挑孟瀆等河摺子

孟瀆等河工竣驗收摺子

挑濬孟瀆河工竣摺子

請將糶米價銀留爲湊挑瀏河之用附片

請摺節估挑瀏河白茆河以工代賑摺子

查勘瀏河白茆挑工履視海塘及丹陽練湖形勢

附片

陳奏開濬瀏河並建設石壩涵洞全竣摺子

奏疏 水利

籌款疏論沿淮各湖摺子

奏爲履勘淮河並設法籌辦情形仰祈

聖鑒事竊臣前月入覲

天顏仰蒙

垂詢淮河淺阻情形並

諭回皖時順道查勘等因臣於

陛辭後馳抵鳳陽府境遇廬鳳道戴聰詢悉前此洪湖

直瀉淮流逐段淺阻窒礙漕行業於正月內率同

鳳陽府程懷璟及各州縣設法疏濬並經大學士

臣孫玉庭札飭疏濬沿淮各湖茲臣帶同該道親往勘得淮河正身現已流通船行無滯惟洪澤一湖必藉淮源旺盛方資收蓄敵黃自應多方導引以助其勢徧歷濱淮各處有鳳陽縣境之花源湖壽州境之城西湖鳳臺縣境之蕉岡湖均可抽溝引導入淮此三湖皆周圍數十里本係民田久淹成浸其城西湖蕉岡湖兩處抽溝約需經費數千兩現經該州縣勸民辦理毋庸另籌經費惟鳳陽縣境之花源湖該境民多窮乏勢難捐辦查得道庫有舊存水利平餘銀兩係不報撥之閒款堪以

動用擬提用銀二千兩交鳳陽縣剋期興辦又懷遠縣荆山口之南因嘉慶年間黃河南潰新漲沙洲名曰葫蘆繫東西橫長十餘里阻遏茨河淮水自西南而北繞越此洲倍形迂曲以致水勢倒漾爲上游各州縣之患前經抽溝一道必須再開引河數道將葫蘆繫鑿斷俾茨河口門通暢而淮水亦得建瓴直下所需工費查司庫有積存宿靈抽溝利息銀兩擬提用銀一千二百兩交懷遠縣趕緊疏挑以上花源湖葫蘆繫兩處動用工費無多均非正項錢糧應俟事竣由道驗收無庸造冊報

銷以歸簡捷所有查勘淮河情形並酌籌辦理緣  
由理合恭摺覆

奏伏乞

皇上聖鑒訓示施行謹

奏

道光五年四月初二日奉到

硃批所辦甚好務要認真查驗另有旨諭欽此同日奉  
到

上諭陶澍奏籌辦淮河情形一摺洪澤湖藉淮敵黃自  
應多方導引以資收蓄經該撫勘明各處情形除壽

州境城西湖鳳臺縣境蕉岡湖兩處抽溝係該民人  
自辦無庸另籌經費外惟鳳陽縣境花源湖民多窮  
乏勢難捐辦著准其將道庫舊存水利平餘閒款內  
提銀二千兩交鳳陽縣剋期興辦又懷遠縣荆山口  
南新漲沙洲葫蘆繫須再開引河數道著准其在司  
庫積存宿靈抽溝利息內提銀一千二百兩交懷遠  
縣趕緊疏挑該兩處動用工費均非正項錢糧工竣  
由道驗收無庸造冊報銷該撫務須認真查驗如有  
草率偷減卽行參辦毋稍徇隱該部知道欽此

卷之三十一

興修皖省水利隄防附片

再臣查淮水爲洪澤湖之源出自豫省桐柏縣流

經固始入安徽阜陽境至霍邱縣之溜子口而南  
納淠水至潁上縣之八里埭而北納潁水地勢建  
瓴尙無阻滯迨壽州之正陽關以逮懷遠至鳳陽  
之蚌埠一帶河流曲折時東時北以次納東淝西  
淝裔溝黑濠洛礮及汭河茨河天河渦河北淝河  
大小數十水兼之西有鳳臺之峽石山東有懷遠  
之荆塗山重重鈐柙淮流其間水勢本屬紆回自  
嘉慶年間黃河南潰夾帶泥沙淮流淤墊成高以



致左右收納各水不能暢入節節壅滯迴漾成湖  
不一而足臣此次履勘親登塗山絕頂復登壽州  
城北之八公山數百里長河支汊瞭然在目此時  
春水方生勢已瀾漫一交伏汛每汪洋一片橫溢  
民田歲歲偏災耗費

帑項自應設法補救以奠災區惟查洪澤一湖近年  
因啟放黃流其西岸已多淤灘若將淮水疏刷不  
特水深泥滑之處難以興工兼恐沙泥直下更益  
洪湖之患祇有築隄束水俾清流暢入湖心既可  
蓄以敵黃而於兩岸民田即可藉隄保衛但經費

沿大無從籌措必須地方官實心實力爲民信服者隨時督勸百姓設法辦理日計不足月計有餘自可漸著成效查現在各州縣中已有數處勸民修利隄防開通溝洫俟辦竣核實奏請

恩獎以資鼓勵此外如壽州之芍陂懷遠之郭陂塘等處皆水利最鉅之區日久蕪廢容<sub>臣</sub>督率各屬次第整理以興民利合併附陳伏乞

訓示謹

奏

道光五年四月初二日奉到

殊批興水利除水患莫大之善政也總要督率認真勸  
導有方固不可徒費周章亦不可始勤終怠詳慎勉  
之欽此

陳奏勸修水利附片

再臣前奏勘辦淮河情形一摺接奉

硃批興水利除水患莫大之善政也總要督率認真勸導有方固不可徒費周章亦不可始勤終怠詳慎勉之欽此捧誦之下仰見我

皇上勤求民莫

訓示周詳之至意曷勝感悚欽佩伏查皖省南介大江  
北近黃河西引長淮東瀦洪澤低窪之區最易受  
淹臣前因查辦水災節飭各州縣設法修利隄防  
藉資捍衛其時沿江各圩垸不下數百所咸卽勸

民興築宣城南陵繁昌等縣被沖尤多如金寶圩  
周圍至一百七十餘里如養賢圩葉村灣管嘴灘  
等處缺口各長五六百丈高至二三丈不等經  
督飭該府郭承恩高澤履該縣朱錦琮劉邦鼎張  
星煥等勸諭捐修均已次第竣工其銅陵縣之邊  
江老壩綿長六十餘里共需土方一萬七千有餘  
亦經督飭該縣孫榮勸令紳士等計畝攤修現在  
又據望江縣尹作翰稟報該縣之妙光圖等圩周  
圍三十餘里內有田二萬七千餘畝一經夏漲卽  
虞淹沒該縣接到通飭卽勸令紳民計畝出夫通

力合作以種田之多寡定築隄之丈尺間有田多而人力未逮卽於田少人多之戶捐賞銀錢令其幫同挑築俾田多者不致偷安取巧田少者亦無舍已芸人之病興工兩月一例報竣統計隄長三千三百餘丈高廣各二丈五尺驗收之後經臣飭司記功並飭將紳士等給扁獎勵其鳳陽花源湖現已興挑復查得花源湖之北有牟家湖一處亦可引水入淮自黃水停淤每逢盛漲水無宣洩田多漫淹飭據署鳳陽縣候補通判洪大鏞稟勘湖長二十餘里西有舊溝一道直抵淮河長五百八

十餘丈應行挑濬有該境耆民陳姓刁姓牟姓等  
僉請照業食佃力之法捐貲集夫挑辦如捐款不  
敷該通判自願捐廉資助臣已批飭如稟辦理其  
餘各處容臣逐漸督率興修斷不敢徒爲周章亦  
不敢稍有意弛以副

宸廑所有現在勸修水利各情形合併附片以

聞謹

奏

道光五年五月十三日奉到

硃批知道了欽此

請拆除吳淞江口石閘附片

竊<sub>臣</sub>查江浙水利莫大於太湖其分洩入海之路有三一曰吳淞江卽太湖正流也一曰黃浦卽東江也一曰瀏河卽婁江也吳淞最大自分流南入黃浦而吳淞日微瀏河亦逐漸增淤矣每遇霖潦水無所歸滂而成災議者但咎水利不修由於上流不疾下流遂淤之所致欲舉全省之湖塘浦汊而挑之濬之揆之無論工費浩大亦無如許人力就使挑挖全通建瓴直下而水無瀦蓄一瀉無餘豈民田之利哉夫太湖號稱三百餘里其實祇係



數澤寬而不深所收江浙及宣歙諸水發源不遠  
不過三五百里而止東及海濱亦止二三百里源  
短而流亦短非如洞庭彭蠡有千數百里之來源  
也而所灌蘇松常太杭嘉湖數府州之田畝以億  
萬計漕糧居天下之大半皆恃太湖爲之潤漑此  
不徒憂澇而並宜防旱也其間縱浦橫塘十灣九  
曲皆天然之溝洫所以資蓄洩而猶不免於偏災  
偶見者其來有漸殆非一朝夕之故究其弊端多  
由民田侵占爭及尺寸而江流日隘兼自明代以  
來言水利者往往不顧全局遇有壅滯不治其本

而別開津汊以苟一時之利以致支流愈分正流日塞然此二者之爲害猶顯而易見惟吳淞江口建閘一事則不但不究其害而羣且議以爲利謂潮來下版可以遏沙潮退啟版清水仍可暢出其說似是而實非夫吳淞爲禹貢三江之一與岷江浙江並列乃天地所以吞吐陰陽之氣非如無源之港汊可以扼其吭而爲之節也海潮旣能挾沙而來卽能挾沙而去如岷江浙江其委未嘗置閘而沙固未嘗淤也況江身亦自有淤泥尙欲藉潮退之勢推卸以入海一經置閘內外隔絕潮水之

挾沙而上者無江水爲之回送而沙停於閘外矣  
江水之挾泥而下者無潮水爲之掣卸而泥停於  
閘內矣臣此次遵

旨覆勘工程由青浦華亭至上海親見黃浦無閘而海  
潮鼓盪江面闊深吳淞江有老閘又有金家灣新  
閘而沙泥停積數十里水小如溝船隻往來反俟  
潮水爲之浮送詢問土人僉稱老閘建自康熙年  
間甫成卽圯新閘成於乾隆二年亦止虛設難於  
下版緣閘距吳淞黃浦合流之處僅六七里全潮  
灌入非閘所能禦該處沙土鬆浮一經下版閘身

震動是以徒有歲給閘夫銀兩毫無實濟轉足以  
阻礙船行停滯沙泥幸上年估工未修並未糜費  
臣思吳淞江爲江浙水利第一樞紐其上源不宜  
直瀉所以蓄水勢而口門則斷不可梗塞以致停  
淤也石閘有害無利應行拆除其閘前閘後所積  
沙泥並沿江灣曲淺灘均應設法疏挑俾資通順  
以利全省似未可以經費未充遂爲停歇容<sub>臣</sub>與  
督<sub>臣</sub>再細商榷飭司妥議一俟籌有成局另行確  
估興工至三吳農田絕少隄圩每虞潦澇惟有照  
業食佃力之法於隆冬閒暇時按畝出夫一二名

挑淺浚深卽因出土以爲圩圍每歲通力合作以三日爲率約計出土可高一二尺越三四歲而圩圍可成矣但須良有司久任而民信從者始能爲之此則微臣目前所未逮而有志焉者也所有勘視水道並擬續辦吳淞水利緣由謹附片具陳伏乞

聖鑒訓示謹

奏

道光五年八月二十九日奉到

硃批另有旨欽此同日奉到道光五年八月十三日奉

上諭陶澍奏吳淞江口所建石閘有善無利老閘甫成  
卽圯新閘亦止虛設難於下版徒有歲給閘夫銀兩  
毫無實濟應行拆除等語吳淞江爲江浙水利關鍵  
原建閘座本爲禦潮而設若果如該撫所勘情形不  
但不能禦潮轉足以阻礙船行停滯沙泥自應拆除  
以利水道惟當時屢次建閘自非無因且現有議以  
爲利者亦未可遽行拆去著該撫與琦善再行詳勘  
情形細心商榷如果必應拆除另行飭司妥議確估  
辦理此閘經歷有年且現在南河興舉要工卽從緩  
辦亦無不可也將此諭知陶澍並諭琦善知之欽此



會同江督奏勘估吳淞江工程摺子

奏爲勘估吳淞江挑工銀數及現在督飭興辦情形  
仰祈

聖鑒事竊照吳淞江關係蘇省水利前經臣陶澍於道

光五年覆勘挑工摺內聲請飭司妥議俟籌有定  
局另行確估興工臣蔣攸銛到任後復經會議籌  
挑本年七月十五日具

奏旋於八月初五日承准軍機大臣字寄奉

上諭御史李鵬奏請疏浚東南水利一摺據稱瀏河口  
淤成平陸吳淞下游僅如溝洫等語江蘇省三江水



利前會議准興修嗣因需費較多僅將黃浦一路挑浚吳淞各工暫行停辦自應及時疏挑著卽派委妥幹大員逐加查勘應如何將正河籌款修治其支渠汊港有關水利之處可否照業食佃力之例勸諭紳耆董辦詳細體察情形通盤籌畫定議具奏等因又於八月二十日前摺回蘇接奉

諭旨蔣攸銛等奏籌備挑濬吳淞江銀款及時興辦一摺昨據御史李鵬奏請及早疏濬當經降旨令該督等籌議勘辦茲蔣攸銛等於未經接奉諭旨之先已議籌款挑濬著照所請准其將明年辦理海運案內

節省贈五等米糶變價銀留爲挑濬經費先於本年  
平糶緩漕米價銀內借動銀二十餘萬兩及早給發  
領辦卽遴派道府大員詳勘確估如法疏治等因欽  
此均卽轉行司道勘辦去後茲據蘇州布政使梁  
章鉅署江蘇按察使潘恭常署蘇松太道陳鑾會  
詳遴委蘇州府總捕同知范博文等會同蘇州松  
江太倉三府州督同上海青浦嘉定三縣將吳淞  
水道逐細勘估查得道光四年原勘係照南河挑  
工土方閒月則例酌估計需土方夫工築壩等項  
共銀三十萬五千一百餘兩迄今數年河道更形

淤塞現估自井亭渡起至曹家渡止計四十二段  
工長一萬八百八十九丈八尺挑土一百一十四  
萬三千七百八十三方一分七釐分別深淤淺淤  
兩則估銀二十九萬三千零二兩八分一釐四毫  
又築工頭工尾柴土壩座共銀六千一百八十五  
兩三錢四分通共挑河築壩估銀二十九萬九千  
一百八十七兩四錢二分一釐四毫內有上海縣  
境逢灣取直之處是以現估銀數較四年原估更  
爲減省經藩司梁章鉅親詣覆勘實係樽節確估  
並無浮濫惟工段綿長若僅由坐落之上海青浦

嘉定二縣領辦誠恐照料難周致有草率議請分作十二分添派得沾水利之元和吳江震澤崑山新陽太倉鎮洋寶山等八州縣各承挑一分上海縣境工段較長承挑二分青浦嘉定二縣各承挑一分並於南河稟請選派熟諳工程之幹練備弁河兵幫同照料於九月二十二日上下次第築壩至十月十一日曹家渡攔潮大壩合龍旋即屏水與挑所有工費除動用平糶米價銀款工竣核實造報外尙有不敷仍照原

奏由外籌款湊足應用其外等之款卽請無庸報銷

以歸簡易至瀏河海口久經淤塞自應欽遵

諭旨及時疏濬惟因籌款不易勢難與吳淞大工同時  
並舉查道光四年議修水利如白茆河四江口及  
此外由湖出江由江出海各處會請分年辦理現  
俱淤墊日甚容再隨時確勘與瀏河海口次第籌  
辦其各處支渠汊港應由各州縣設法勸修以利  
農田詳請具

奏前來

臣

陶澍現在由省親詣履勘覆核無異面飭

督催工員循照章程堅築壩工先開樣河各立認  
杆預抽子溝並於舉工之始先定椿繩起土之時

遠堆隄堰一切督察稽查賞罰犒勞務俾實力奉行如果承辦各員勤奮出力俟工竣量請

恩施獎敘倘稍有草率玩延定卽參處以期工歸實用

仰副

聖主爲民興利之意仍俟工竣後遵

旨親詣驗收另行

奏報至動用工費除平糶緩漕米價尙有不敷其由外籌湊之款邀免報銷又展挑灘漲之處空廢蕩田在所不免此等蕩田多係侵占官河而成歷年已久如有業已陞科者應予豁糧不准再給地價

道光四年曾經

奏明應卽照辦合併陳明所有籌議吳淞水利及興辦工程緣由臣等謹合詞恭摺具

奏伏乞

皇上聖鑒謹

奏

道光七年十一月二十四日奉到

硃批另有旨欽此同日奉到道光七年十一月初八日

內閣奉

上諭蔣攸銛等奏勘估吳淞江挑工銀數並督飭興辦

一摺吳淞江自井亭渡起至曹家渡止工段較長經該督等委員勘估分別深淤淺淤估銀二十九萬三千二百零又築工頭工尾柴土壩座銀六千一百八十五兩零通共挑河築壩估銀二十九萬九千一百八十七兩零若由上海等三縣領辦恐其照料難周不免草率著照所請除上海縣工長承挑二分青浦嘉定二縣各承挑一分外其餘著添派得占水利之元和吳江震澤崑山新陽太倉鎮洋寶山等八州縣各承挑一分所有承辦各員如果勤奮出力著於工竣時量予獎勵倘草率玩延卽著嚴參總期工歸實



用帑不虛糜工竣著該撫親往核實驗收其動用上  
費除平糶米價銀款造報外其外籌之款卽著無庸  
報銷至乞廢蕩田本係侵占官河其業已陞科者准  
其豁糧不准再給地價該部知道欽此

會同江督驗收吳淞江工程摺子

奏爲挑濬吳淞江工程驗明如式完竣禱祈

聖鑒事竊照吳淞江年久淤塞關繫蘇省水利前經臣

等會議與挑奏奉

諭旨遵行當卽飭委司道督同各府州勘估實需銀數  
及督飭興辦情形復經恭摺具

奏欽奉

諭旨吳淞江自井亭渡起至曹家渡止工段較長經該  
督等委員勘估通共挑河築壩估銀二十九萬九千  
一百八十七兩零若由上海等三縣領辦恐其照料

難周不免草率著照所請除上海工長承挑二分青浦嘉定二縣承挑一分外其餘著添派得沾水利之元和吳江震澤崑山新陽太倉鎮洋寶山等八州縣各承挑一分所有承辦各員如果勤奮出力者於工竣時量予獎勵倘草率玩延卽著嚴參總期工歸實用帑不虛糜著該撫親往核實驗收其動用工費除平糶米價銀款造報外其外籌之款卽著無庸報銷等因欽此當復轉行各司道欽遵嚴催各工員趕緊如式挑竣去後茲據江蘇布政使梁章鉅署江蘇按察使潘恭常護理蘇松太道陳鑾會詳承辦

各州縣於上年十月十一日攔潮大壩合龍之後  
雇集人夫岸水與挑祇因開工以後時值嚴冬連  
遭雨雪挑挖河道積水較多雖經隨時車岸而涸  
復之後又逢雨雪且時屆沍寒上下河隄冰凌凍  
結夫役不能立足人力難施其震澤崑山新陽太  
倉鎮洋五州縣承挑工段坐落野鷄墩一帶古淺  
處所積淤深厚幾成平陸應挑土方倍於他處是  
以歲內未能一律完竣迨至今年正月天時晴霽  
飭催印委各員添雇人夫設法趕挑所有起出之  
土俱令遠堆原定界外築成隄堰以防傾卸復隨

時督催各工員認真挑挖務使一律深通以收實效現據署蘇州府知府李景嶧署松江府知府王有慶蘇州總捕同知范博文蘇州督糧同知王青蓮轉據各工員陸續具報工竣並據新陽縣稟稱所挑工段內起出遠年沈溺糧船一隻板片朽爛艙內尙有磁碗煤炭等物又據上海縣稟稱所挑工段內起出遠年沈溺海船一隻板片朽爛查有洋木秤桿鐵錘等物俱係海船應用之物深入沈淤現經起出候驗等因前來並據藩司梁章鉅詣驗如式臣蔣攸銛現赴清江勘工不克會詣吳淞

臣陶澍卽遵

旨親往驗收於二月初七日在蘇啟行由白茆等處一路查勘順抵吳淞江親赴各工按照估冊逐段勘量自青浦縣頭壩起至上海縣攔潮大壩止通工計長一萬八百八十九丈有零細加覆勘悉與原估寬深丈尺有贏無絀內有太倉新陽上海嘉定吳江鎮洋青浦寶山等州縣均於原估丈尺之外加工挑挖其寬深多至二三尺及六七尺不等均係捐貲辦理並無偷減草率情弊臣復以攔潮大壩爲新開河道尾閘若壩基未能啟除淨盡卽於

全河大有阻礙遂親至工所督飭該道府及各員  
弁竭五晝夜之力趕緊將攔潮大壩柴草堅埽及  
下餞積土逐層啟除淨盡定限於十七日丑刻先  
將青浦上游頭壩開放使清水流注充滿午刻將  
上海下游大壩開放日擊水勢暢出洶湧如雷壩  
外淤泥立時衝散未刻海潮大至水勢擡高內外  
刮刷臣卽乘潮回省沿途按段測量水深均有一  
丈九尺至二丈不等實爲一律深通毫無淺滯之  
處訪詢沿途耆庶咸稱百餘年來未有如此開空  
深通之工臣逐段驗收歡聲載道卽如各縣所挑

工段內起出沈溺糧船海船等多年陳物湮埋江底爲從前開浚所未及者茲皆挑挖起出其爲深通勝於往時已有明證從此舟楫暢行旱潦無慮民生永資利賴

國賦愈樂輸將堪以仰副

皇上軫念農田水利覆育蒼生之至意所有通工挑河築壩共銀二十九萬九千一百八十七兩零原議籌動海運案內節省贈五等米價銀

奏准於平糶緩漕米價先行借動當將緩漕米價二十六萬五千七百三十二兩零給發支用在案今



海運停止贈五等米無從節省歸款仰懇

皇上天恩俯准將原借平糶緩漕米價銀二十六萬五千七百三十二兩零卽作爲挑浚吳淞經費就款開銷感沐

聖恩益無旣極仍飭令照數造報此外不敷銀三萬三千餘兩以及興工後因遇雨雪車戽一切費用增多並各州縣於原估之外加挑寬深所需工費皆在外自行捐措仍欽遵

諭旨免其報銷至此次工程經藩司梁章鉅屢次親詣督率籌辦署臬司蘇松太道潘恭常協同商酌均

極精詳妥協但係司道大員不敢仰邀議敘其承辦各員臣等查明實在勤奮出力者開列清單遵旨保

奏仰懇

皇上恩施量加獎勵其餘出力各員弁人數衆多分別咨部議敘由外記功核實辦理再查委員內武進縣縣丞陸鈞於辦工喫緊時藉病遷延候補府經歷陳溶雇夫遲玩現在工程雖無貽誤仍應請

旨交部議處以儆將來所有挑濬吳淞江全工完竣驗收緣由謹合詞恭摺具

奏伏乞

皇上聖鑒訓示謹

奏

道光八年四月初七日奉到

硃批另有旨欽此同日奉到道光八年三月二十一日

內閣奉

上諭蔣攸銛等奏挑濬吳淞江工程完竣一摺江蘇吳淞江年久淤墊前經飭令興挑茲該督等查明通工挑河築壩一律完竣並無偷減草率情弊著照所請准將原借平糶緩漕米價銀二十六萬五千七百三

十二兩零卽作爲挑浚吳淞江經費就款開銷仍飭令照數造報其不敷銀三萬三千餘兩及興工後一切增多費用並各州縣自行捐措之款著仍遵前旨免其報銷藩司梁章鉅署臬司蘇松太道潘恭常籌辦商酌均極精詳俱著加恩交部議敘護理蘇松太道加道銜蘇州府知府陳鑾署蘇州府松江府知府李景嶧蘇州府督糧同知王青蓮署太倉州邳州知州李正鼎俱著以應陞之缺陞用上海縣知縣捐陞知府李廷錫著俟赴部投供時以本班儘先選用前任金匱縣知縣捐陞知府齊彥槐蘇州府總捕同知

范博文嘉定縣知縣捐陞知府淡春臺吳江縣知縣  
時功旃新陽縣知縣德宣青浦縣知縣蔡維新寶山  
縣知縣陳玉成署崑山縣知縣盧本淳署鎮洋縣知  
縣景壽春松江府經歷張慶瑗江陰縣縣丞畢以紱  
嘉定縣縣丞姚大成長洲縣主簿李述三俱著交部  
從優議敘南匯縣縣丞鄭祖經前於海運案內以應  
陞之缺陞用著遇有相當缺出不論繁簡卽行陞用  
蘇州府照磨謝元淮運河營守備盧永盛俱著以應  
陞之缺儘先陞用揚州府檢校胡澤光青浦縣新涇  
司巡檢陞署元和縣主簿方景雯海州惠澤司巡檢

魏邦魯昭文縣白茆司巡檢林觀光俱著以應陞之  
缺陞用試用府經歷錢家驥試用主簿李琮曹錫璜  
試用未入流程勦著各照本班儘先補用其餘在工  
出力各員弁著查明分別咨部議敘由外記功核實  
辦理武進縣縣丞陸鈞於辦工時藉病遷延候補府  
經歷陳溶雇夫遲玩俱著交部議處該部知道單併  
發欽此

陽明家系圖

三

|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|--|--|--|--|--|--|--|--|--|--|

會同江督奏吳淞江岸請建前任勤事知府專祠  
列入春秋祀典摺子

奏爲吳淞江岸請建前任勤事知府周中鉉專祠仰  
祈

聖鑒事據蘇州藩司梁章鉅護理蘇松太道陳夔會詳  
稱道光七年議濬吳淞江欽奉

諭旨允行於九月下旬興工先在上海縣曹家渡地方  
建築攔潮大壩爲通工鈐束該處逼近海口潮汐  
奔騰兩岸皆沙土鬆浮適值連日東風大作潮勢  
洶湧異常遂致旋築旋蟄該司道親往督辦日擊



風猛雨淋挾潮而進壩底刷深至三丈餘尺勢甚  
危急人力難施詢之士人僉稱江岸有周太僕祠  
夙著靈應該司道親詣虔禱並於壩頭設祭沈以  
牲醴頃刻之間驟轉西風大潮頓落卽夕堵築合  
龍本年二月通工挑竣臣陶澍親往啟壩赴祠禱  
祝西風復作海潮消退清水建瓴而下內外刮刷  
全河一律深通自始至終險工獲佑查周太僕名  
中鎡浙江山陰縣人雍正年間任松江府事時方  
挑濬吳淞

特命副都御史陳世倌會同總督范時繹巡撫陳時夏督

辦中鉉承築大壩因潮水洶悍屢築屢潰不能合  
龍中鉉親率河標把總陸章乘船衝流督夫下埽  
風急水溜陸章請移舟登岸中鉉不可遂與陸章  
俱沒於水而隄亦旋合時雍正六年三月二十九  
日也事

聞奉

上諭周中鉉平日居官甚優今被溺殞命更可惋惜又於  
巡撫陳時夏摺內欽奉

硃批周中鉉等可謂因公盡命深可惋惜覽至此朕幾乎  
淚落等因旋奉

旨議卹贈太僕寺卿

予祭葬乾隆二十六年經巡撫陳宏謀題祀名宦事載

世宗憲皇帝硃批諭旨及雍正六年

上諭並松江府志等書該處士民追思舊澤私建小祠於

吳淞江畔歲時報享祈禱皆應今挑濬吳淞復著

靈異僉請建立專祠春秋致祭臣等伏思東南財

賦莫重於蘇松而年穀順成必資乎水利吳淞江

爲衆流入海之要津實東南水利之關鍵茲蒙

皇上軫念民生

特允動款興挑從此水澤常通永資利賴惟瀕海施工

極爲艱險乃當堵築大壩於勢甚危急之際化險  
爲平工竣啟壩復俾潮迴清注暢刷深通是周中  
鉉爲

國且勞精誠不泯生前旣因築壩死事沒後復以捍  
潮効靈功在吳淞洵爲昭著記載以死勤事則祀  
之能捍大患則祀之周中鉉雖經從祀名宦未有  
專祠合無仰懇

聖恩在於吳淞江岸建立專祠列入春秋祀典俾輿情  
獲遂水利長沾再查吳淞江岸舊有小祠現經護  
理蘇松太道陳鑾就近估修卽於舊址擴充修葺

無庸另行擇建所需工費由藩司及該護道等捐  
辦其春秋祭銀循照成案於學租款內支給歸地  
官辦理合併陳明伏乞

皇上聖鑒

敕部議覆施行謹

奏

道光八年四月初七日奉到

硃批另有旨欽此又同日奉到道光八年三月二十一

日內閣奉

上諭蔣攸銛等奏吳淞江岸請建前任知府專祠一摺

江蘇吳淞江岸舊有前任松江府知府周中鉉祠宇  
該處士民歲時祈禱皆應茲該督等奏挑濬吳淞江  
時復以捍潮効靈功在該處洵爲昭著周中鉉著  
其於吳淞江岸建立專祠列入春秋祀典該部知道  
欽此

一、二、三、四、五、六、七、八、九、十、十一、十二、十三、十四、十五、十六、十七、十八、十九、二十、二十一、二十二、二十三、二十四、二十五、二十六、二十七、二十八、二十九、三十、三十一、三十二、三十三、三十四、三十五、三十六、三十七、三十八、三十九、四十、四十一、四十二、四十三、四十四、四十五、四十六、四十七、四十八、四十九、五十、五十一、五十二、五十三、五十四、五十五、五十六、五十七、五十八、五十九、六十、六十一、六十二、六十三、六十四、六十五、六十六、六十七、六十八、六十九、七十、七十一、七十二、七十三、七十四、七十五、七十六、七十七、七十八、七十九、八十、八十一、八十二、八十三、八十四、八十五、八十六、八十七、八十八、八十九、九十、九十一、九十二、九十三、九十四、九十五、九十六、九十七、九十八、九十九、一百

三

會同江督借款挑濬瀏河摺子

奏爲籌議估濬瀏河借糶緩漕米石攤徵還款仰祈  
聖鑒事竊照瀏河卽古之婁江其上游自太湖東北迤  
邐而來至新陽縣界之新造橋與吳淞分流而東  
遶太倉州城南歷鎮洋嘉定等界東入於海綿長  
七八十里自嘉慶十七年挑浚之後屢經水患沙  
泥淤墊旱澇無從灌洩不但太倉州屬農田失收  
兼爲上游蘇松一帶水道之梗近來淤墊更甚以  
致歲收屢歉臣陶澍前因公經過該處目擊情形  
幾同平陸其出海之處有攔門沙一道阻遏海口



當諭護理海關道陳鑾署太倉州李正鼎逐細履  
勘或另籌入海之道並於驗收吳淞工程案內會  
同臣蔣攸銛附片

奏明瀏河等處工程應分年辦理在案查本年吳淞  
江欽奉

諭旨疏挑夏秋間雨水雖多宣通迅速業已著有成效  
若瀏河不加疏浚設遇旱澇爲災附近民田或淹  
或涸誠恐復議賑蠲於

國計民生均無裨益且浙省湖州所屬各縣濱湖諸  
澳港業經該省奏辦興挑該處卽吳淞瀏河之上

游將來挑通之後來源既旺必須尾閘通暢方能  
一氣貫輸茲據太倉州轉據地方紳士呈請借

帑興辦當卽飭委蘇藩司梁章鉅上海道潘恭常先  
後往勘均稱該處淤塞已甚爲目前亟應興辦之  
工查瀏河關繫各屬農田水利未便聽其湮塞惟  
口門既有攔沙必致旋挑旋淤自應相度地形另  
改歸海去路俾水勢暢行一勞永逸此次工程旣  
鉅經費孔多應須動用銀款必得先爲籌備伏思  
地方要工原應民捐民辦惟蘇省自道光三年重  
災以後元氣未復民力拮据且工段綿長通盤籌

計總須數十萬兩此時卽責成閩閩斷難先事鳩  
集而藩庫又無現款可籌據蘇藩司梁章鉅詳稱  
查得蘇松等屬道光八年有應行帶徵歷年緩漕  
正耗及七年冬間徵剩未完米款約計二十餘萬  
石應於歲內隨正漕帶徵派幫搭運今思本省水  
利要工難以再緩合無仰懇

皇上恩施准將此項米石留蘇糶變卽借作挑浚瀏河  
之費仍俟工竣後按年分限攤徵還款一轉移間  
於

國帑並無所虧而水利民生皆有實濟如蒙

俞允臣等再飭該司道等先將應辦工段方價確加勘  
估臣陶澍並當親行履勘核實飭開工程銀數清  
單縷晰入

奏一面飭蘇糧道確查徵完米數由蘇藩司查明各  
屬時價酌中核定詳明飭糶提貯司庫以備工需  
如有餘存仍行報撥倘或不敷另行籌款湊辦所  
有瀏河亟應挑浚及籌議借糶緩漕攤徵歸款緣  
由謹合詞恭摺具

奏伏乞

皇上聖鑒訓示謹

奏

道光九年正月十三日奉到

硃批另有旨欽此同日奉到道光八年十二月二十七

日內閣奉

上諭蔣攸銛等奏籌議估濬瀏河借糶緩漕米石攤徵

一摺著戶部核議具奏欽此

籌款興挑孟瀆等河摺子

奏爲勘估武進縣境水利工程借動籌備銀款乘時  
興挑以資利賴仰祈

聖鑒事竊照蘇省瀏河孟瀆等河日久淤墊亟應興挑

經<sub>臣</sub>陶澍於道光八年吳淞江收工摺內附片陳

明本年正月因緩漕米石除搭運外剩米十數萬

石運河枯淺難以全行帶運請留蘇糶變數暫借爲

挑浚瀏河孟瀆河之用攤徵歸款

奏蒙

俞旨嗣於覆奏緩漕分別搭運糶變數目摺內聲明孟

續河及相近之得勝河澡港河多有淤塞應須一併辦理或與瀏河同時並舉或先後與挑熟籌核議另行奏辦於本年閏四月間

奏蒙

聖鑒在案查常州府屬武進縣境運河之北有孟瀆得勝澡港三河皆南通運河北達大江旱則引江潮以濟運灌田並可直達無錫金匱宜興荆溪各縣以資接濟如遇水潦卽宜導入江不致壅溢爲患實爲各屬水利要道惟孟瀆河自嘉慶二十年興挑得勝河自嘉慶十一年興挑後均已湮塞不通

澡港河自乾隆三十年挑辦至今已越六十餘年  
亦久經淤墊經臣陶澍暨臣梁章鉅先後親往勘  
明數十里之遙並無江湖灌輸水泉滋潤現在農  
田受困民望孔殷實爲刻不可緩之工較之瀏河  
尤應先行興辦茲據署蘇州布政使衍慶常鎮道  
劉名載會詳據調署常州府知府趙光祿武進縣  
知縣程士偉陽湖縣知縣廖鴻苞會勘得孟瀆一  
河估需土方夫工例價津貼連壩座工料共銀一  
十三萬四千五百七十兩零又因孟河舊口漲有  
老沙難於開挖改開超瓢港出口通江應行完廢



沙田拆移草房遷讓墳地共需銀二千九百六十  
三兩零並於孟河中間添建閘座需銀一萬八千  
八百六十二兩零又得勝河估需例價及津貼等  
銀三萬六千九百三十九兩零溧港河估需例價  
及津貼等銀一萬三千三百八十三兩零以上三  
河共需工費銀二十萬六千七百餘兩選舉董事  
余保純等分段領銀挑辦官爲稽察所需工費銀  
兩議請分作十成照康熙十九年鄰縣協濟成案  
歸於武進陽湖無錫金匱宜興荆溪六縣攤徵內  
武進陽湖二縣共攤五成無錫金匱宜興荆溪四

縣分攤五成各分限十年按照條銀徵還歸款並據各該縣以輿情允洽出具印結詳送司道覆加查勘委無浮冒查糶變緩漕米價已據各屬全數解存司庫銀二十六萬餘兩所有挑浚孟瀆得勝澡港三河工費銀二十萬六千七百餘兩卽請於米價銀內按數借給分作十年攤徵還款買米搭運仍俟工竣將用過銀兩造冊報銷至此次挑河工程較大在工委員人等以及挑夫搭篷等項一切雜費請循照歷辦成案在於工價內扣平五分爲經費之用詳請具

奏前來臣等查現准戶部咨稱各項工程概行停止  
不得奏請興修惟武進縣孟瀆得勝深港三河淤  
塞已久先經奏明係不可緩之工且所借米價將  
來須攤徵歸款並非動項開銷業已籌備銀款欽  
奉

允准與部行停工之後奏請者有間仰懇

皇上天恩俯准仍行舉辦乘此冬令興工所有估需工  
費等項銀二十萬六千七百餘兩經臣等細加覆  
核實無浮冒應請卽於

奏准緩漕米價銀內動支借給飭令該地方官督率

董事實力興辦 臣等督飭司道等隨時查察俟工竣後親臨驗收務使工不虛糜銀歸實用以仰副聖主惠徧農田永資利賴之至意所借銀兩應如府縣所議循照舊案歸於武進陽湖無錫金匱宜興荆溪六縣分別攤徵歸款容另取估計攤徵各冊結分別

題咨至此外尚餘米價銀五萬餘兩應照

奏定之案存俟籌辦瀏河湊借工用所有先行估挑武進縣孟瀆等河及借動銀款緣由謹合詞恭摺具

奏伏乞

皇上聖鑒訓示謹

奏

道光十年十二月二十日奉到

硃批另有旨欽此同日奉到道光十年十一月初六日

內閣奉

上諭陶澍等奏勘估武進縣境水利工程借動籌備銀  
款一摺江蘇武進縣境孟瀆得勝溧港三河日久淤  
墊亟應興挑前經該督等奏明係刻不可緩之工業  
已籌備銀款與部行停工之後奏請者有間著照所

請所有估需工費等項銀二十萬六千七百餘兩准  
其在於奏准緩漕米價銀內動支借給該督等卽飭  
令該地方官督率董事實力興辦並飭司道等隨時  
查察務使工不虛糜銀歸實用工竣該督等親往驗  
收所借銀兩著循照舊案歸於武進等六縣分別攤  
徵歸款此外尙餘米價銀五萬餘兩存俟籌辦瀏河  
工用該部知道欽此

月二八ノ三金

ノ二八

三三

孟瀆等河工竣驗收摺子

奏爲武進縣境內孟瀆得勝澡港三河挑工完竣驗收如式並請將節省銀兩發典生息以備歲挑經費仰祈

聖鑒事竊照常州府屬武進縣有孟瀆得勝澡港三河北達大江南通運河係引納潮汐接濟漕運兼以灌溉民田之要道如遇水潦亦由該三河宣洩入江以免壅溢爲患前因年久湮塞以致稻田乾涸運道淺滯經臣陶澍暨前護撫臣梁章鉅先後親往勘明必應及時挑浚估需土方工價並添建閘



座空廢沙田拆移草房遷讓墳地共銀二十萬六千七百餘兩借動糶變緩漕米價分年攤徵還款於道光十年十月內奏奉

上諭著照所請所有估需工費等項銀二十萬六千七百餘兩准其在於奏准緩漕米價銀兩動支借給該督等卽飭令該地方官督率董事實力興辦並飭司道等隨時查察務使工不虛糜銀歸實用工竣該督等親往驗收所借銀兩著循照舊案歸於武進等六縣分別攤徵歸款此外尙餘米價銀五萬餘兩存俟籌辦瀏河湊借工用該部知道欽此當卽轉飭該府

縣督率董事分段領銀實力挑辦緣值雨雪連綿  
至十一年二月先將得勝澡港兩河興挑其子孟瀆  
河工長淤甚未能同時並舉經臣陶澍會同陞任  
撫臣程祖洛

奏准緩俟是年秋後接續興辦迨得勝澡港兩河挑  
至七分工次又值江潮異漲直至冬令積水未消  
不能施工而該三河被水沖刷之後情形微有不  
同應將各河口底寬深丈尺覆勘減估以歸撙節  
又經

奏准俟十二年秋後再行興辦臣林則徐自上年到

蘇後疊催司道府縣督同委員董事等將各河未挑工段應行增減之處覆勘定議與臣陶澍會核備辦於上年十月接續開工復值雨雪連綿工程倍爲費力直至今年四月間始報通工挑竣其應建閘座亦據購料興建一律完工臣陶澍現駐清江未及會驗臣林則徐當與藩司陳鑾先後親往驗收查核該三河工段內孟瀆河南段自奔牛鎮萬緣橋運河口起至小河口及北段石橋灣河口起至塔山壩隄並孟永洲至丹陽縣六沙大圩起至瓢港江口止共河長一萬三千六百十六丈三尺

估挑口寬六丈至十二丈底寬二丈至四丈五尺挑深六尺至一丈二尺五寸不等又得勝河自運河連江橋進口起至江口止河長七千四百四十四丈五尺五寸估挑口寬四丈至十丈底寬一丈六尺至四丈挑深三尺四寸至七尺五寸不等又澡港河自燕子河工首起至江口止河長五千四百四十八丈四尺估挑口寬三丈五尺至十丈底寬一丈四尺至六丈挑深一尺至六尺不等按照估冊逐段量明丈尺均已如式並據稟報孟河段內挑出江船一隻船身量長三丈有餘驗明係人

湮河底歷屆挑河未經挖出之陳物該處土人交相歎異其闢工自頂至底逐一驗量亦俱堅固並無草率偷減惟附近岸灘間有堆貯河泥業經飭令剷撈淨盡翻貯遠處以免坍塌入河隨令開壩放水測探三河水勢自五六尺至八九尺均係一律深通溯查該三河距前屆興挑之時遠者垂七十年近者亦二十載均因淤沙漸積湮塞不通運道農田交受其累仰蒙

聖恩准其借款疏濬民辦官稽毫不假手吏胥一清挑河積弊統計孟瀆得勝澡港三河開挑工段共長

二萬六千四百餘丈灌溉武進縣田二十九萬四千六百餘畝其陽湖無錫金匱宜興荆溪各縣亦各分沾其利從此運道無虞淺阻而農田亦免旱澇之傷藉以仰副

皇上惠溥羣黎永資利賴之至意惟該河岸土鬆浮每易坍卸加之往來潮汐不免沙積淤停仍須間年擇段疏挑俾河身永臻通暢此項工費民力不能屢捐亟應預爲籌備查三河原估銀二十萬六千七百餘兩現在通工用過土方夫工料物等項共銀一十八萬九千六百六十七兩八錢七分六釐

又添車戽雨水實用水方夫工銀六千九百三十  
四兩五錢六分四釐較原估計節省銀一萬一百  
二十二兩二錢一分二釐應請仍照原估銀數攤  
徵歸款卽以此項節省之銀歸於武進陽湖二縣  
發典按月一分生息將息銀解存司庫作爲該河  
歲修經費俾得間年擇段疏濬永不停淤似於

國計民生兩有裨益至孟瀆河超瓢港新口及護城  
河各處空廢民田雖已給發價值但已成廢地自  
應飭令查明字號畝數將額完課銀詳請咨部豁  
除庶民間免受虛糧之累除催取估計攤徵各冊

結及應豁空廢田畝錢糧數目分別

題咨外所有驗收挑工緣由謹合詞恭摺具

奏伏乞

皇上聖鑒謹

奏

道光十三年七月十六日奉到

硃批另有旨欽此同日奉到道光十三年六月二十六

日內閣奉

上諭陶澍等奏驗收武進縣境內三河挑工並籌備歲

挑經費一摺江蘇常州府屬武進縣子孟瀆德勝澡港



三河據該督等奏稱通工挑竣驗收如式惟該河身  
尙須間年擇段疏挑俾資通暢此項工費民力不能  
屢捐自應豫爲籌備所有原估銀二十萬六千七百  
餘兩除現在通工用過工費等項銀兩外計節省銀  
一萬一百二十二兩零著照所請准其仍照原估銀  
數攤徵歸款卽以此項節省之銀歸於武進陽湖二  
縣發典生息將息銀解存司庫作爲該河歲修經費  
俾運道農田永資利賴其孟瀆河超瓢港新口及護  
城河各處空廢民田著查明字號畝數將額完課銀  
咨部豁除以省虛糧之累該部知道欽此

挑濬孟瀆等河工竣摺子

奏爲查明挑濬孟瀆等河工程繁鉅謹將尤爲出力之官紳董事分別奏懇

天恩量加獎勵仰祈

聖鑒事竊照武進縣境內孟瀆得勝澡港三河挑工並

建設閘座一律完竣經臣林則徐與藩司陳鑾先

後親往驗收並無草率偷減除另摺

奏報外伏查該三河挑工先經臣陶澍會同前護撫

臣梁章鉅

奏明選舉董事余保純等分段領銀挑辦官爲稽察

通計三河工段共有二萬六千餘丈之多挑深六七尺至丈餘不等港汊叢雜道路綿長自道光十一年二月開工以來疊爲雨水所阻上年十月續行興辦偏值冬春兩季雨雪連綿復歷半載有餘始得一律全完驗明如式其間官員紳董辛苦賠累之處實有數倍於他工者緣該處土性多係澇淤與徒陽運河之豬婆灘等工情形相似河心甫浚泛沙復涌而上浮邊土削齊坍岸旋傾而下積鑿冰則晝開夕合滲水則暮戽朝盈是以一段之工有復挑三四五次始能勻淨者且當雨雪連綿

之際惟冀待霽施工通工人夫不敢任其散去逐日計口授食爲時愈久則所費愈多在董事不能無賠貼之夫工而官員尤不能無捐貲之犒賞然各急公踴躍効命忘勞俾利溥於百年而功成於衆志查自道光十年至今在事各員內除前任藩司梁章鉅桂良署任藩司額騰伊現任藩司陳鑾皆經籌議周詳督催盡力但係藩司大員均不敢仰邀議敘外其府縣以下及承辦之紳衿董事於節次勞累之中俱能實力實心工成效著似應酌加獎勵以勸勞績而順輿情茲據蘇州藩司陳鑾

查明出力官紳董事開摺詳請具

奏前來<sub>臣</sub>等查道光八年挑辦吳淞江案內仰蒙

恩准陞用者十一員儘先選補者五員從優議敘者十  
三員此次孟瀆得勝溲港三河工次人數衆多惟  
當力加刪減未敢多登薦贖謹擇其最爲出力者  
開具清單恭呈

御覽可否仰懇

天恩量加鼓勵之處出自

聖主鴻施此外出力稍次人員由<sub>臣</sub>等在外分別記功

給獎理合恭摺具

奏伏乞

皇上聖鑒訓示謹

奏

道光十三年七月十六日奉到

硃批另有旨欽此同日奉到道光十三年六月二十六

日內閣奉

上諭陶澍等奏挑浚孟瀆等河工竣請將出力之官紳  
董事分別獎勵一摺江蘇武進縣境內孟瀆德勝澡  
港三河挑工並建設閘座一律完竣所有出力之官  
紳董事等應量予恩施常州府知府汪河署武進縣

事金壇縣知縣姚瑩俱著加恩交部從優議敘署常州府總捕通判試用同知高煥著將降一級處分開復歸本班儘先補用常州府照磨羅在爵宜興縣丞汪仁金匱縣望亭巡檢張訓遙宜興縣下邳巡檢管兆蕃俱著以應陞之缺儘先陞用試用主簿吳城沈之彥俱著以本班儘先補用前任廣東南雄直隸州知州余保純著賞加知府銜舉人言啟方著以教職用候選州吏目趙焜未入流朱鑑泉俱著捐足分發簽掣省分試用期滿儘先補用議敘從九品職銜巢遇良著加給六品職銜以示鼓勵該部知道欽此

請將糴米價銀留爲湊挑瀏河之用附片

再江南省蘇州藩司所屬之四府一州均係水鄉且爲財賦最重之區年額應徵地丁漕項正耗共銀二百餘萬兩漕白起運米一百五六十萬石賦出於田田資於水故水利最關緊要查蘇松水利以吳淞黃浦瀏河爲大謂之三江道光四年間臣林則徐在江蘇臬司任內欽奉

諭旨總辦三江水利因值丁憂回籍未及辦理其時將黃浦一路工程先行擇要委員挑辦嗣吳淞江淤塞僅存一綫涓流道光八年間臣陶澍在巡撫任



內

奏准興挑竣事迨十一年間大水爲災蘇松二屬幸  
有挑深之黃浦吳淞爲之宣洩其瀏河白茆孟瀆  
等河臣陶澍於吳淞收工摺內附片聲明分年籌  
辦嗣請借糶七年徵剩及八年帶徵緩漕爲挑浚  
瀏河之用經部駁令籌借別款因工鉅費繁別無  
閒款可籌覆議暫緩道光十年又經奏請將各屬  
緩漕搭運剩米十數萬石糶變暫借動以爲瀏河  
孟瀆挑工經費攤徵歸款仰蒙

俞允旋復籌議先挑孟瀆得勝澡港二河所需工費卽

於緩漕米價銀內動支借給並聲明尙餘米價銀  
五萬餘兩應照奏定之案存俟籌辦瀏河湊借工  
用欽奉

諭旨准行在案

臣

等伏查瀏河爲三江之一縣長七八

十里上自太湖東北迤邐而來至新陽縣界與吳  
淞江分流而東遶太倉州城南歷鎮洋嘉定等界  
東入於海爲農田灌溉宣洩要道自道光三年水  
災之後沙泥停積蓄洩難資近來淤墊更高幾成  
平陸以致太倉闔屬棉花稻穀頻歲歉收徵辦錢  
漕極形棘手且下游壅塞卽爲上游蘇松一帶水

道之梗若不亟加疏浚一遇旱澇之年非淹卽涸  
不特民生受困抑且蠲緩賑卹入少出多於

國計尤有關係是瀏河必應挑辦實爲目前萬不可  
緩之工所有糶變米價餘剩銀五萬餘兩自應欽  
遵原奉

諭旨留爲湊挑瀏河之用惟工長費鉅或應就款擇要  
先挑或應另籌款項湊辦尙須確勘妥議臣等現  
飭藩司委員悉心查勘通盤熟籌商辦俟覆到再  
行奏

聞理合附片陳明謹

奏

道光十三年七月十六日奉到

硃批覽欽此



請樽節估挑瀏河白茆河以工代賑摺子

奏爲瀏河白茆河年久愈形淤塞議請樽節估挑以  
工代賑分別借

帑捐辦恭摺奏祈

聖鑒事竊照蘇松太倉等屬爲錢漕最多之區水利農  
田攸關重大該境有吳淞黃浦瀏河卽古所謂三  
江其北又有白茆河自爲一大支與三江相爲表  
裏前此道光四年間奉

旨飭辦三江水利因高堰方興大工集夫不易僅將黃  
浦一路先爲挑濬道光六年復奉

諭旨飭挑吳淞江其餘瀏河白茆各工並經

奏明分年辦理惟因工費較鉅查道光四年奉

旨飭辦案內會估需銀四十餘萬兩頻年籌措維艱祇  
有糶變米價餘賸銀五萬餘兩奏奉

恩准留作瀏河工用仍須另籌款項方可湊辦年來河  
道愈形淤塞農田連遭積歉更宜亟修地利以期  
補助天時而地方紳民先後懇請與挑呈詞盈帙  
察看輿情甚爲急切節經臣等飭司委員核實勘  
估撙節籌辦去後茲據蘇州藩司陳鑾署臬司李  
彥章蘇松太道吳其泰會詳稱瀏河爲古婁江源

出太湖東北至新陽縣界與吳淞江分流而東繞  
太倉城歷鎮洋嘉定二縣境綿長七八十里白茆  
河坐落常熟昭文二縣境內上承長洲元和無錫  
金匱江陰諸水綿長五六十里均因淤塞多年幾  
成平陸旱澇俱無從灌洩田疇卽漸就荒蕪錢漕  
亦愈難徵比該兩河急需開濬實爲目前必不可  
緩之工但尾閘皆有壩身外高於內若必開通海  
口恐潮汐倒漾轉易停淤且口門皆有攔沙挑濬  
倍爲費力卽開通之後漲沙恐復相連今爲農田  
起見期於利灌溉而便疏通則莫若挑作清水長



河不必求通海船既節目前之工費且免日後之受淤其爲利益農田似有把握先經該藩司檄委署蘇州府知府陳經太倉州知州李正鼎青浦縣知縣蔡維新公同履勘估計續又添委蘇州府知府沈兆澐元和縣知縣平翰前上元縣知縣黃冕會同署太倉州知州周岱齡鎮洋縣知縣曾承騏署常熟縣知縣藍蔚雯昭文縣知縣張綬組逐段丈量分別造冊呈送並以上年秋禾被歉現值青黃不接之時小民力食維艱正宜以工代賑稟請卽時興辦復經該藩司親往覆勘瀏河自吳家墳

港口起至白家廠又鹽鐵老壩基起至吳家墳港  
又老虎灣至紅橋灣及陶家嘴錢家嘴等處通其  
約計工長一萬五百一十六丈估挑面寬十丈餘  
尺至八丈餘尺不等底寬三丈平水面濬深九尺  
又南北兩岸切灘並挑土山土埂以及修築通工  
壩閘完廢民田給價等項共約估銀一十六萬五  
千三百二十餘兩白茆河自支塘東勝橋起至海  
口止工長七千八百四十丈估挑面寬六丈底寬  
四丈深一丈所需挑濬土方並建新閘及滾水壩  
一座共約估銀一十一萬兩零惟兩處工程並計

需款較多自應分別籌辦請將瀏河借項與挑分  
年攤徵歸款白茆河歸於官民捐辦等情詳請具  
奏前來臣等伏查瀏河白茆河兩處均係早經勘估  
奏明必應辦理之工惟從前估計係欲挑通入海而  
議者謂其海口高於內地潮來旋即淤塞又謂口  
門現有攔沙卽極力挖通不久恐仍堵合且鑿沙  
通海需費太繁款項難籌是以未能興辦近因旱  
澇無備田畝頻至歉收若再因循此後愈難爲力  
且民間望沾水利與目前望賑同一急切之情尤  
須乘此興工乃爲一舉兩得竊思挑通海口工費

既大而能否經久轉不可知不若挑作清水河工  
省利長於農田實有裨益緣三江之中黃浦吳淞  
兩處海口水勢皆已暢出惟因瀏河白茆兩處淤  
塞東北一帶之水溢於平疇今將此兩處河道開  
通共長一百數十里可資容納正不必自闢海口  
而與吳淞黃浦交匯通流適足以助其建瓴之勢  
查瀏河老鎮本有閘座可以隨時啟閉今擬於閘  
外白家廠之地再建滾水石壩一道以堵渾潮白  
茆河亦於海口縮入數段建閘築壩使潮汐泥沙  
平時不能壅入如遇內河水大仍可由壩上瀉出

歸海則湖水有清無渾卽永遠有利無害其瀏河  
估需土方壩工等銀十六萬五千三百餘兩係屬  
節省無浮除遵照

奏准之案動撥緩漕米價五萬二千餘兩外其餘銀  
兩查有司庫現存水利經費專款銀五萬兩本係  
從前議濬三江案內

奏明爲蘇省水利之用應請儘數動撥尙不敷銀六  
萬二千三百二十餘兩請於封貯款內借支所借  
之銀在於同沾水利之蘇松太三屬長洲元和吳  
縣吳江震澤崑山新陽華亭婁縣上海青浦太倉

鎮洋嘉定寶山崇明十六州縣按照銀數均派分  
作八年按畝攤徵將來解還司庫除先歸米價外  
餘皆收作水利經費專款以備蘇省將來續修各  
處水利之需仍照舊案俟收有捐監銀兩首先歸  
補封貯原額其應挑工段亦請循舊歸於太倉鎮  
洋嘉定寶山崑山新陽六州縣計畝雇夫分段承  
挑至白茆河估銀一十一萬兩零亦屬節省辦理  
惟經費有常未敢概請借

帑臣等現在率同司道府縣倡捐廉銀並諄勸常昭  
兩縣紳商富戶以此河既係萬不可緩之工而民

情又處迫不可支之景各宜勉力捐貲以工代賑  
該紳民等聞而感奮均各踴躍急公現已議定章  
程自可捐收如數臣等仍督同司道遴委廉明勤  
幹之員協同地方官選董集夫隨捐隨辦並責令  
該管道府州於兩河工程各須認真查察一俟工  
竣由臣林則徐親往驗收不許稍有草率偷減並  
不令假手胥役地保稍滋弊竇以期工歸實在利  
濟農田仰副

聖主爲民興利之至意除將瀏河挑工取造估計報銷  
各冊繪圖另行

題咨外其白茆河係捐辦之工應請無庸報銷謹合  
詞恭摺具

奏伏乞

皇上聖鑒訓示謹

奏

道光十四年三月十七日奉到

硃批另有旨欽此同日奉到道光十四年二月初七日

內閣奉

上諭陶澍等奏請估挑瀏河白茆河以工代賑分別借  
帑捐辦一摺蘇松太倉等屬之瀏河白茆河兩處均



係早經勘估奏明必應辦理之工近年愈形淤塞據該督等查明實在情形奏請勘估與挑搏節辦理並以工代賑分別借帑捐辦著照所請所有瀏河估需土方壩工等銀十六萬五千三百餘兩除動撥緩漕米價五萬三千餘兩外其餘銀兩著准其於司庫現存水利經費專款銀五萬兩儘數動撥尚不敷銀六萬二千三百二十餘兩卽著於封貯款內借支所借之銀在於蘇松太三屬之長洲元和吳縣吳江震澤崑山新陽華亭婁縣上海青浦太倉鎮洋嘉定寶山崇明十六州縣按照銀數均派分作八年按畝攤徵

解還司庫除先歸米價外餘皆收作水利經費專款  
以備將來續修各處水利之需仍照案俟收有捐監  
銀兩首先歸補封貯原額其應挑工段卽著歸於太  
倉鎮洋嘉定寶山崑山新陽六州縣計畝雇夫分股  
承挑其白茆河估銀一十一萬兩零係屬官民捐辦  
該督等卽督率司道遴委廉明勤幹之員協同地方  
官選董集夫隨捐隨辦並責令該管道府州於兩河  
工程均須認真查察工竣後該撫親往驗收不准稍  
有草率偷減並不得假手胥役地保稍滋弊竇以期  
利濟農田工歸實用其白茆河工程係屬捐辦之工

著免其造冊報銷該部知道欽此

查勘瀏河白茆挑工履視海塘及丹陽練湖形勢

附片

再三吳水利前自籌濬吳淞接挑孟瀆澡港得勝  
三河及太湖之鵬鶚河丹陽之湖河閘座均經次第  
辦理其餘支河小港隨時籌辦尙多惟瀏河白  
茆淤塞多年籌款未竣此次瀏河蒙

恩借帑興修並設法捐挑白茆開工之後適值天氣晴

和以工代賑人情樂事趨公臣與撫臣分路查勘

各工均極通利尙有壩座涵洞及支浦挑切不日  
即可全葺閘閘懼怵香花載道咸以數年來各省

水患較多惟蘇松一帶幸免沈災皆由吳淞江開  
空深通之故感戴

皇恩淪肌浹髓臣與撫臣面商吳淞一江全吳樞鑰必

須來源旺盛不分其流方能沖刷沙泥積久不塞

擬於上游吳淞各澗再加疏濬以資遠利臣沿海

履視海塘至寶山縣境各士民呈請一例加修石

工以資捍衛復遣上海道吳其泰往視華亭濱海

塘工亦均有應須修補之處又丹陽士民因練湖

淤淺蓄水無多呈請驗修臣復順道履勘其受病

之處總在上游山水衝湧易決易洩須得添建滾

壩加築圩堰俾水勢歸湖而免沖潰侵淹之患現  
批鎮江府汪忠增督勸民捐民辦如果能成不但  
裨益農田卽徒陽運河亦緩急有需矣臣巡歷各  
境蘇松常太等屬勸捐賑濟發給貧民錢米俱已  
三五次不等辦理安詳人情救謐鎮江捐賑尤多  
其江寧省城粥廠自上冬捐設以來統計四廠共  
賑過大小男婦三百七十萬二千餘口撤廠後仍  
收養老幼殘疾四千餘人俟麥收時資遣現俱一  
例放散極其安靜臣查閱蘇常各營畢卽尾催漕  
艘渡江北上截至本日僅剩浙船十四幫數日內

即可渡江全竣沿途割麥插禾時雨滋潤民氣熙恬堪以仰慰

宸廑理合附片縷陳謹

奏

道光十四年六月初三日奉到

硃批知道了欽此

陳奏開濬瀏河並建設石壩涵洞全竣摺子

奏爲開濬瀏河並建設石壩涵洞各工全行告竣驗收如式請將格外節省餘銀疏挑上游各源流淤淺處所以資久遠並擇在工尤爲出力之官紳董事分別懇

恩獎勵恭摺奏祈

聖鑒事竊照太倉鎮洋境內之瀏河爲古三江之一前因淤塞多年幾成平陸旱澇無備田畝頻至歉收爲目前必不可緩之工當經臣等會摺

奏蒙



恩旨俯准借項興挑分年攤徵還款凡在蘇松太三屬  
得沾水利之處無不頂戴

皇仁踴躍趨事臣等轉飭司道府縣督率委員董事分  
段承挑期限完竣並以工段綿長如其中有可格  
外節省之處亦宜隨時斟酌據實稟辦嗣據署太  
倉州知州周岱齡署鎮洋縣知縣曾承顯委員前  
上元縣知縣現署元和縣知縣黃冕等會稟原估  
各工土方丈尺均係核實無浮惟河勢彎環之處  
若相機取直尙可加意撙節查老虎灣至紅橋灣  
舊河向南圍繞今由吳家墳港取直挑至小瀏河

口匯歸原河計可省工一千八百餘丈又陶家嘴  
錢家嘴舊有河形亦俱向南繞越若再取直開挑  
可省工五百餘丈又原議於閘外白家廠建滾水  
石壩一道以禦渾潮茲查石壩固足禦潮但恐內  
河水大宣洩欠靈因於該壩添設涵洞五所俾潮  
大時將洞閉塞不使渾水漫入設遇內河水大卽  
可全行開放宣洩入海操縱較有把握等情復經  
批飭妥辦卽據藩司先後報放銀兩於本年三月  
初八等日陸續開工幸天氣暄晴人夫雲集印委  
各員及董事人等皆能督率嚴催所有應挑土方

於四月底卽經挑竣臣陶澍出赴蘇松閱伍之便  
會同臣林則徐暨藩司陳鑾到工驗收沿途香花  
載道欽感

皇恩歡忭異常驗量所挑丈尺有贏無絀惟河身旣已  
濬深則隄岸愈高轉有崩卸之處復令逐段挑切  
以歸一律又海口砌築石壩添設涵洞凡石料椿  
木錠銅灰漿購運鳩工有需時日復飭趕緊辦理  
旋據太鎮二州縣暨委員具報通工全行告竣又  
經臣林則徐臨工覆驗河身倍見深通隄岸一律  
平整閘壩俱臻堅固涵洞最便蓄宣均無草率偷

減情弊查瀏河自吳家墳港口起至白家廠又鹽  
鐵老壩基起至吳家墳港又老虎灣至紅橋灣及  
陶家嘴錢家嘴等處原估工長一萬五百十六丈  
面寬十丈餘尺至八丈餘尺不等底寬三丈平水  
面濬深九尺又南北兩岸切灘並挑土山土埂以  
及估築通工壩閘乞廢民田給價等項共估銀一  
十六萬五千三百二十餘兩今將吳家墳陶家嘴  
錢家嘴等處取直開挑又省工二千四百餘丈少  
挑土十五萬六千餘方計通工土方連修築閘壩  
乞廢民田給價等項共銀十三萬四百二十二兩

零較之原估格外節省銀三萬四千九百兩零據  
蘇州藩司陳鑾請將前項節省餘銀留辦上游淤  
淺處所並查明在事尤爲出力官員紳董酌議分  
別獎勵詳請具

奏前來臣等伏查瀏河工程係屢經

奏明必應辦理之工祇因工鉅費繁有需籌措茲以  
濬清堵濁之法樽節估挑仰蒙

聖恩借帑興辦而相機取直則於節省之中又有節省  
此次工竣之後適七月二十三四五等日蘇松一  
帶大雨傾盆太湖附近諸山陡發蛟水處處盛漲

拍岸盈隄當卽飛飭太倉鎮洋二州縣將該壩涵洞全行啟放據稟滔滔東注兩日之內消水二尺有餘而秋汛大潮仍無倒灌是瀏河之容納與涵洞之宣洩實已著有成效惟思三江之水無不承太湖而來而自太湖遞至三江其中泖澱等處均係經由要道淤塞多年前因三江尙未全疏無暇兼顧臣陶澍於順看瀏河工程片內卽經聲明尙須再濬上游各澱茲瀏河工程得以格外節省卽上游水道亟須擇要接挑又太倉州有七浦河一道在州境東北直達海口形勢較瀏河爲小實則

與爲表裏亦因年久淤塞僉懇一律疏通此等水利工程在江蘇原不勝枚舉然其最爲扼要之處所繫於利害者匪輕若不乘時興修脈絡仍多阻滯竊思前項節省餘銀本係原估應行動用之款今因逢灣取直極力省出卽留作挑濬支河之用實屬以公濟公合無仰懇

聖恩俯准將節省餘銀於各處淤淺河道擇要興辦所有瀏河借款仍照原估十六萬五千三百二十餘兩之數歸於太鎮等十六州縣分年攤徵還款自足以資遠利而愜輿情至此次挑辦瀏河在工印

委各員及紳董人等均係白備資斧奮勉趨公不  
辭勞瘁似應量予獎勵惟人數衆多臣等未敢悉  
登薦牘謹擇其尤爲出力者開具清單恭呈

御覽如蒙

聖主鴻慈俯加鼓勵該官紳等倍加感激踴躍急公臣  
等亦得收指臂之效其出力稍次人員在外分別  
記功給獎除同時捐挑之白茆河道現亦將次全  
完容俟驗收另行具

奏並飭將瀏河工長高寬丈尺土方夫工銀兩各項  
價值細數另開清單一面將太湖以下泖澱支河



暨太倉州境內七浦河道委員確勘估計銀數分別詳請

奏報外所有臣等驗收瀏河工程緣由謹合詞恭摺具

奏伏乞

皇上聖鑒訓示謹

奏

道光十四年九月十五日奉至

硃批另有旨欽此同日奉到道光十四年九月初五日

內閣奉

上諭陶澍等奏開濬瀏河全工告竣將尤爲出力之官紳董事人等開單呈覽請分別獎勵一摺江蘇省太倉鎮洋境內之瀏河淤塞多年前前經奏明借項興挑分年攤徵還款茲據該督等奏稱遴委官紳董事人等分段承挑勒限完竣原估銀一十六萬五千三百二十餘兩現計通工土方修築閘壩完廢民田給價等項共用銀十三萬四百二十二兩零較原估格外節省銀三萬四千九百兩零在工印委各員及紳士董事人等均係自備資斧奮勉趨公不辭勞瘁自應量予恩施加恩著照所請署太倉州知州常州府通

判周岱齡著賞加同知銜署元和縣知縣黃冕著以  
同知直隸州知州卽補先換頂戴署鎮洋縣試用知  
縣曾承顯著不論繁簡遇缺卽補蘇州府丁憂知府  
沈兆溥著賞加道銜署松江府事太倉州知州李正  
鼎著賞加知府銜太倉州州同于翼如青浦縣知縣  
蔡維新試用布政司理問會玉衡俱著賞加知州銜  
鎮洋縣甘草司巡檢會浩委用縣丞王直瀾俱著以  
應陞之缺陞用王直瀾著俟補缺後卽陞署寶山縣  
事崑山縣知縣張連茹著俟服闋後歸部儘先選用  
試用知縣龔潤森從九品程德滋未入流吳耀會俱

著以本班儘先補用太倉州舉人揀選知縣錢寶瑛  
著賞加六品頂戴崑山縣候選兵馬司副指揮李增  
厚著以副指揮歸部儘先選用以示獎勵所有前項  
工程借撥款項著仍照原估十六萬五千三百二十  
餘兩之數歸於太倉鎮洋等十六州縣分年攤徵還  
款其節省餘銀該督等卽督飭所屬將上游各處淤  
淺河道擇要興挑太倉州七浦河一道亦著一律疏  
通以利蓄洩而備旱潦該部知道單併發欽此



陶文毅公全集卷二十九目錄

奏疏 工程

覆勘蘇州府城修理完竣摺子

動用捐賑餘剩銀兩籌修省城秩祀摺子

恭修江南省城

御碑亭附片

請修理上元縣境內明陵摺子

寶應縣捐修城垣等工請獎摺子

如皋縣捐修城垣等工請獎摺子

揚城捐修

文廟各工告蒞請獎摺子

徐郡捐修城垣請獎摺子

睢寧縣捐修城工請獎摺子

081-11 24.11.16 1.10.06

奏疏 工程

覆勘蘇州府城修理完竣摺子

奏爲覆勘蘇州府城先後兩次修理完竣恭摺具

奏仰祈

聖鑒事竊照蘇州府城垣於嘉慶二十五年間因間段

坍塌損據長洲元和吳縣三首縣詳據紳士呈請捐

修並請將吳淞江餘剩節省銀一萬八千餘兩給

發湊用經前撫臣陳桂生於奏報疏濬吳淞江完

工摺內

奏明嘉慶二十五年五月奉



硃批知道了欽此嗣據該府縣勘覆估需工料銀二萬七千三百餘兩除動用吳淞江節省銀一萬八千餘兩又紳士捐輸銀六千七百二十八兩零其餘不敷銀兩該三縣捐補足數修理完竣嗣經前撫

臣

張師誠於請修道光三年續坍城垣摺內

奏明前修工程是否一律堅固取造冊結由藩司驗收再行覆勘具

奏茲據蘇州藩司賀長齡詳稱此案城垣原派三縣承修內長洲縣原估銀七千四百二兩零元和縣原估銀一萬三千五百二十四兩零吳縣原估銀

六千四百一十八兩零據該三縣具報於道光四年十一月以前先後照估修理完竣經前任藩司誠端驗收在案茲已飭取冊結詳請覆勘具

奏又前次未修處所續有坍塌於道光三年夏間因

雨水過多河水漫浸城根復有坍塌經前撫臣札

飭勘估詳辦據蘇州府知府額騰伊督同長洲元

和吳縣詳加查勘估需工料銀三萬九千六百一

十四兩零由前任藩司誠端覆勘無浮查有陳青

選罰項銀二萬九百六十五兩零又嘉慶二十三

年挑竣吳淞江餘剩經費錢合銀九千二百四十

三兩零又道光三年官民捐賑餘剩銀九千四百七十兩零均屬閒款堪以湊撥興修詳經前撫

奏奉

諭旨張師誠奏籌款修理城垣一摺江蘇蘇州府城垣前次未經修理處所續又間段坍塌並因上年河水漫浸城根復多坍塌必須修復完整茲據該撫勘明共估需工料銀三萬九千六百一十四兩零查有吳縣現在罰繳充公銀兩及挑浚吳淞江餘剩經費發商生息本銀並上年官民捐賑案內餘剩銀共三萬九千六百七十餘兩均屬司庫閒款著准其湊撥趕

辦俟工竣該撫親往驗收如有偷減草率等弊卽行  
嚴參著賠所動銀兩旣係閒款著無庸造冊報銷該  
部知道欽此茲據藩司賀長齡詳稱長洲縣應修工  
段實用銀六千四十九兩零元和縣應修工段實  
用銀一萬三千九百九十兩零吳縣應修工段實  
用銀一萬九千五百七十五兩零據該三縣具報  
於道光五年九月以前先後修理完竣查係實用  
實銷並無浮冒請於原籌陳青選罰項等款銀內  
照數開銷飭取冊結由該司驗收加結詳請覆勘  
具

奏前來臣查嘉慶二十五年原辦城工估需工料銀

二萬七千三百四十五兩零除動用吳淞江餘剩  
節省銀一萬八千二百三十三兩零又紳士捐輸  
銀六千七百二十八兩零之外計不敷銀二千三  
百八十三兩零既據長洲等三縣自行捐補足數  
修理完整應請無庸再議至道光三年續修城工  
一案原估工料銀三萬九千六百一十四兩零

奏明於罰繳充公及吳淞江經費生息本銀並捐賑  
餘剩共銀三萬九千六百餘兩之內動用應請卽  
於此內開銷現經臣親詣覆勘先後修理工程均

屬完整尙無偷減草率情弊除將冊結分別咨部  
外所有蘇州府城垣前後兩次修理均已覆勘完  
工緣由謹會同兩江總督臣琦善恭摺具

奏伏乞

皇上聖鑒再前一次修理城工所用吳淞江餘剩銀兩  
本係業戶攤捐餘係官紳捐補與續修城工之動  
用閒款情事相同並非動用錢糧應請一併免其  
造冊報銷合併聲明謹

奏

道光六年六月十八日奉到

硃批所奏知道了著依議行欽此

動用捐賑餘剩銀兩籌修省城秩祀摺子

奏爲籌修省城秩祀基宇動用捐賑餘銀仰祈

聖鑒事竊查各省崇建

社稷壇春祈秋報爲民求福

典禮攸關至爲隆重江寧舊日壇基在城外西南隅  
附近沙洲圩該處地勢較低道光十一十二十三  
年間雨水連綿江湖驟漲一片汪洋水深五六尺  
淹浸至四五月之久致將

神壇房屋漂淌無存周圍牆垣全行倒塌頻年來每屆  
祭祀雨水時多或移於城北之雞籠山或在南郊



之雨花崗既無壇基又無一定地方實非所以妥  
神靈而昭誠敬當經臣諭令趕緊擇地修建去後茲據  
藩司楊簧轉據江寧府善慶詳據紳士等公呈稱  
勘得南郊外西邊天界寺旁有舒敞隙地形勢較  
高向無水淹之患擬於是處恭照

會典爲壇二成並照舊規建造房屋十六間及周圍  
牆垣共估需銀八百九十餘兩但現奉部議一切  
工程暫行停止未便請動

帑銀查上元縣庫存有十三年水災案內辦理粥廠  
官民捐剩銀一千八百兩零卽於此項內動用興

修並遴選誠實紳士督工修建毋許書役人等經  
手致滋浮冒具詳前來臣隨率同司道親臨履勘  
該處地勢軒爽且遠市廛規模肅靜就此恭建

社稷壇極爲妥協既係動用民捐辦災餘剩銀兩無庸  
咨部報銷應卽責成紳士承辦以歸核實當於歲  
內興工計趕春祭前可期一律完竣所有動用捐  
賑餘銀修建

社稷壇緣由事關典禮理合恭摺奏

聞伏乞

皇上聖鑒謹

奏

道光十五年二月十八日奉到

硃批另有旨欽此同日奉到道光十五年二月初六日

內閣奉

上諭陶澍奏籌修秩祀基宇一摺江寧省城舊有

社稷壇在城外西南隅近因連年江潮驟漲周圍牆垣倒塌自應趕緊擇地修建以昭誠敬所有估需銀八百九十餘兩著准其在於上元縣庫十三年水災案內辦理粥廠官民捐辦餘存銀內動用興修又另片奏省城有恭建

御碑亭三座及城北鼓樓碑座因雨水過多半皆損壞亦  
應及早修葺著卽於捐辦粥廠存餘銀九百兩零內  
支領承辦不敷銀兩准其捐廉辦竣該督務卽督飭  
司道責成紳士核實辦理毋許書役人等經手致滋  
浮冒此兩次工程俱係動用捐賑餘銀無庸咨部報  
銷欽此



恭修江南省城

御碑亭附片

再據署上元縣馮思澄署江寧縣李金芝會詳稱  
江寧地居省會前此

聖祖仁皇帝

高宗純皇帝

巡行

駐蹕

天章

宸翰均經恭勒碑石覆以樓亭又康熙二十年

聖祖仁皇帝諭民崇儉黜奢並豁免民房及街棚地租士

民感戴恭將

上諭鑄勒石碑以紀

恩澤分建於城北鼓樓及北極閣各處碑珉雖屬仍舊無

如連歲雨水過多樓亭樑柱牆垣半多損壞若不

及早修葺一經塌卸需費更多請將捐辦粥廠案

內餘銀除恭建

社稷壇動用外仍存銀九百兩零亦責成紳士具領承

辦將北極閣雨花臺

御碑亭三座及城北鼓樓碑座一律修建完固不敷銀兩

爲數無多另行捐廉辦竣

臣

查恭建

御碑重地理應隨時補葺若任風雨摧殘不足以昭誠敬  
自應卽如所詳辦理俾免坍塌益垂久遠合併附  
片具陳伏祈

聖鑒謹

奏

道光十五年二月十八日奉到

硃批另有旨欽此



附考五白身

卷二十九

ナ

請修理上元縣境內明陵摺子

奏爲修理工程估需銀款循例奏祈

聖鑒事竊照動支司庫存公銀兩修建工程例應隨時具奏茲據江寧布政使楊簧詳稱江寧省城明太祖陵寢於嘉慶二十四年動項興修迄今十餘年固限已逾未經修葺工程一切多有朽損據上元縣詳報本年六月初五日風雨大作明陵大殿朝房碑殿宰牲房戟門等處以及玉河橋甬道欄杆牆垣均有倒卸請委員勘估興修等情當經飭委北捕通判孫炳焯會同上元縣知縣保先烈親詣

周履查勘此項工程委因年久失修適值風狂雨大以致坍塌之處甚多按工樽節估計並將兩邊朝房各十間各改蓋五間以歸節省其實需工料銀三千二百八十八兩九錢四分八釐造冊由司覆核無浮請循例在於司庫存公銀內動給興修循例請

奏前來

臣

伏查江寧省城朝陽門外東北里許有明

陵坐落鍾山之陽曠野當風摧殘較易自嘉慶二十四年修葺迄今十有餘年前據該縣詳報請修即經批司確勘實係坍塌過甚亟應修理茲據藩

司覆核具詳應請循例在於司庫存公銀內動給  
興修以資保護要工用昭

聖代加禮勝朝盛典除飭取造估計冊結詳請具

題外謹會同江蘇巡撫臣林則徐合詞恭摺具

奏伏乞

皇上聖鑒敕部核覆施行謹

奏

道光十五年十月二十七日奉到

硃批工部議奏欽此



寶應縣捐修城垣等工請獎摺子

奏爲捐修城垣營房工程驗收如式請將捐輸出力之官紳富戶開單懇

恩獎敘以示鼓勵仰祈

聖鑒事竊據揚州府寶應縣知縣唐汝明詳稱該縣城垣自道光元三等年先後間段坍塌

奏准動項修理後因逼近運河沙土浮鬆易於坍塌歷年來該城東西北角等處間段倒塌五處共計八十餘丈又舊北敵臺一座三面共長三丈五尺周身皸裂應行拆修現在倒塌缺口雖經派撥兵

附錄卷之二  
卷之二  
三  
役巡守究不能盡臻慎密且因循不辦必致坍塌  
過甚需費益多惟

國家經費有常未敢遽請動項呈請委員勘估勸捐  
興修當飭籌辦去後旋據該縣唐汝明倡捐銀一  
千兩揚河通判陳勳文亦捐銀一千兩邀集紳士  
富戶妥爲勸捐經紳士吏部尙書朱士彥捐銀三  
百兩並經董率捐辦陸續共捐銀二萬一千七百  
七十八兩零當卽購料於道光十五年四月十四  
日開工十二月二十日一概完竣飭據揚州府知  
府劉源灝親詣驗收俱係照估如式修理完整並

無偷減草率連各城門添設卡房五處計共用銀  
二萬九百八十六兩零尙餘剩銀七百九十二兩  
零因寶應縣境內黃浦等八汛營房前於道光十  
年間彙案

奏准修理仍因停工未辦卽將修城剩銀作爲營房  
工用不敷銀兩由縣捐修現已修理完竣查此項  
城垣營房印委各員及董事倡捐勸捐催督興辦  
實屬事事認真所有捐輸出力各官紳自應量加  
獎勵以昭激勸據江寧布政使楊簧開摺詳請具  
奏前來臣等覆查寶應縣城垣營房等工攸關保障



巡防因年久坍塌需費較多經該縣及紳董勸捐  
興辦現已工程完固安奠民居實屬成效已臻除  
原任吏部尙書朱士彥係屬大員不敢仰邀獎勵  
外其倡捐督修勞蹟最著之印委各員及踴躍輸  
將各捐戶仰懇

聖恩分別獎勵以爲急公者勸此外尙有寶應汛協防  
外委吳錦方高寶營經制効用吉元太在王彈壓  
不辭辛勤應由臣等並咨會河臣存記遇有把總  
外委缺出分別儘先拔補捐銀在三百兩以下各  
戶亦卽由臣等在外給獎仍飭取各捐戶履歷另

行咨部給照謹合詞恭摺具

奏並繕清單敬呈

御覽伏乞

皇上聖鑒訓示再此項工程係民捐民辦應請免其造

冊報銷合併陳明謹

奏

道光十六年八月初四日奉到

硃批另有旨欽此同日奉到道光十六年七月二十二

日內閣奉

上諭陶澍等奏官紳士民捐修城垣營房工竣請分別

獎勵一摺著吏部議奏此項工程由外捐辦著免其  
造冊報銷餘著照所議辦理單併發欽此

如皋縣捐修城垣等工請獎摺子

奏爲捐修城垣工程驗收如式捐輸出力各官紳富  
戶開單懇

恩獎敘以示鼓勵仰祈

聖鑒事竊據通州屬之如皋縣知縣范士義稟稱該境  
城垣自乾隆三十五年修理之後迄今六十餘年  
未經修理城身臃裂城腳礮岸土牛亦多損壞道  
光十一年間雨水過多愈形坍塌該縣地處海濱  
必須修葺因值停辦工程未便請項隨經查勘擇  
要應修城牆二百八十九丈應築城腳土牛礮岸

六百三十五丈倡捐廉銀六百兩並勸諭紳富捐輸遴董黃錡胡萱生等鳩工購料於十三年七月二十日開工將東門城牆城腳礮岸土牛間段修葺正在接續勸捐復又坍塌城垣八十八丈五尺連前共三百七十七丈五尺其城腳土牛礮岸亦續場二百十六丈連前共八百五十一丈四門城樓及礮臺箭梁全已傾圮水旱城門並門兵住宿更房亦多坍塌該縣復倡輸銀六百兩督同紳董黃錡胡萱生等分投勸捐興辦並率同委員等輪流稽查彈壓計自上年八月二十日興工至十二

月二十三日止一律修竣其用工料銀一萬二千八百七十二兩零當經飭委前任常鎮道李彥章驗收如式修葺完因此項工程歷時既久費用繁多印委各員倡捐勸捐督辦出力各紳董捐輸亦屬踴躍應請分別獎敘以昭激勸據江寧布政使楊簧詳請具

奏前來臣等覆查該縣范仕義首先捐廉並督紳董妥爲勸捐共得工料銀一萬二千八百兩零先後修理完竣俾資保障實屬出力合無仰懇

聖恩准予分別獎敘以示鼓勵所有捐銀在三百兩以

下各戶由臣等在外給獎再此項工程係屬民捐  
民辦並請免其報銷除飭取各捐戶履歷另行咨  
部查核外謹合詞恭摺具

奏並繕清單敬呈

御覽伏乞

皇上聖鑒

訓示謹

奏

道光十六年八月初八日奉到

硃批另有旨欽此同日奉到道光十六年七月二十六

日內閣奉

上諭陶澍等奏請將捐修城垣出力各官紳等分別獎勵一摺著吏部議奏此項工程係屬捐辦著免其造冊報銷單併發欽此





揚城捐修

文廟各工告蒧請獎摺子

奏爲揚城捐修

文廟各工告蒧懇請

聖恩分別獎敘以昭激勸事竊照揚州府及江甘二縣文廟自道光八年坍塌後因災歉頻仍未及籌捐修理

上年經前任揚州府劉源灝稟請勸諭地方官商

共捐銀一萬二千六百兩又現任揚州府趙德潏

捐銀五百兩總捕同知趙廷熙捐銀三百兩總共

銀一萬三千四百兩分委兩淮運庫大使朱佩紘

候補運判趙祖玉府學訓導陳萼江甘二縣及甘泉縣典史朱守護等勘得府縣兩學

大成殿明倫堂及

崇聖祠名宦祠鄉賢祠全行坍塌其餘東西兩廡及東西兩齋房尊經閣土地祠等處房屋歪斜牆坍棟折共計府學房屋六十六間縣學房屋五十四間均需重新建葢又南門外寶塔灣地方向有

文昌閣一座亦因年久失修倒塌必應修理隨經分飭該員等鳩工集料彈壓督修自上年五月開工現已一律完竣府學用銀五千九百六十八兩零

縣學用銀四千八百四十兩零又添修兩學祭器  
扁對等項用銀三百四十三兩零

文昌閣用銀二千十一兩零並卽於東首契買民房  
十三間給價銀二百四十七兩零買作廟產招租  
以爲歲修香燈之費統共用銀一萬三千四百餘  
兩不敷銀兩由揚州府捐墊飭據前護運司姚瑩  
到工查驗實係一律完固毫無偷減草率會同藩  
司詳請

奏咨獎敘前來臣等查定例士民捐修公所實於地  
方有裨益者捐銀千兩以上請

旨建坊情願議敘者由吏部核議等語又捐修工程倡  
捐出力各官紳歷經

奏獎有案今揚州府江甘二縣捐修

文廟各工自應分別議敘除司道府同知等官職分較  
崇所捐銀兩未敢請獎其捐輸銀兩出力稍次各  
員並捐輸三百兩以下各商人由外給獎外查捐  
銀二千兩之兩淮運庫大使宋佩紘心地明白才  
具幹練業經俸滿保舉尙未接奉部覆此次急公  
捐輸並又勸導官商同心捐濟督辦工程不辭勞

瘁應請

旨加恩以知縣陞用又揚州府學訓導陳萼督工一年  
始終其事經營稽察出力最多應請援照道光十  
三年蘇省挑濬孟河議敘從九品巢遇良督工出  
力加給六品職銜之案請

賞給六品職銜甘泉縣典史朱守讓以未入微員督率  
夫工認真妥辦實屬出力請以應陞之缺陞用尙  
有捐銀稍多之人咨部照例分別議敘以示鼓勵  
仍飭取履歷清冊另行送部臣等謹會同江蘇學  
政臣祁寯藻合詞恭摺具

奏伏乞

皇上聖鑒訓示再此項工程係屬捐辦應請免其造冊  
報銷合併陳明謹

奏

道光十八年正月初二日奉到

硃批另有旨欽此同日奉到道光十七年十二月十九

日內閣奉

上諭陶澍等奏請獎敘捐辦工程各員一摺江蘇揚州  
府及江都甘泉二縣

文廟年久未修經該員等勸捐督辦一律完整所有急  
公捐輸並督辦工程之兩淮庫大使宋佩紘著以知

縣陞用府學訓導陳萼甘泉縣典史朱守讓督工出力陳萼著賞給六品職銜朱守讓著以應陞之缺陞用此項工程係屬捐辦免其造冊報銷該部知道欽此





徐郡捐修城垣請獎摺子

奏爲捐修城垣等工驗收如式請將捐輸出力官紳  
開單懇

恩獎敘以示鼓勵仰祈

聖鑒事竊照徐州府郡城一座周長一千六百二十六  
丈五尺自乾隆十六年及嘉慶二二年間段修補之  
後迄今數十餘年未經修理日形坍塌因值停工  
期內未便請

帑舉辦前於道光十五年據前署銅山縣王文炳倡  
議捐修稟經該管道府及佐貳等官並勸諭地方

紳富一體捐助選董購料興辦該縣王文炳卸事  
後復會同現任知縣楊鴻彬接續勸捐統計該縣  
等倡捐並官紳捐貲共銀四萬五千八百九十餘  
兩自十六年秋間興工派委佐雜候補各員分段  
查催至十八年二月內一律修竣併計四城共拆  
修五十四段長一千八十六丈一尺居通城三分  
之二其未坍塌段落計五百四十丈有零俱用石灰  
補修四圍裏面隍土全行加築內外城樓並礮臺  
營房馬道等處及城中坍塌鼓樓一座均已分別  
修建通共用過工料銀四萬五千九百五十四兩

零除捐項外計不敷銀五十六兩零亦經董事捐足湊辦完整由徐州道飭委該管知府親詣勘驗俱係工堅料實並無草率偷減造具捐費出力官紳清冊移司由江寧藩司唐鑑核明開摺詳請

奏獎前來

臣

等伏查徐州府郡城垣年久坍塌經該

縣倡議捐修稟經道府等官及勸諭紳民協力捐助一律修整並將內外城樓礮臺營房馬道及城中鼓樓一併修建共計捐用銀四萬五千九百餘兩洵屬慕義急公除捐銀一千兩之現任徐州道朱襄前任徐州府知府武陵漢已據呈明不敢邀

獎又倡捐之前任徐州道王廷彥銅沛同知田寶  
裔業經病故督催勸捐之前署徐州府通判直隸  
州知州王啟炳均無庸議獎及捐銀在三百兩以  
下各戶由外給獎外所有捐銀三百兩以上各官  
紳應請分別照例獎敘以昭激勸除飭取各捐戶  
履歷清單另行咨部外謹合詞恭摺具  
奏並開列名單恭呈

御覽伏乞

皇上聖鑒敕部議覆施行再此項工程係屬民捐民辦  
應請免其造冊報銷合併陳明謹

奏

道光十九年正月十二日奉到

硃批另有旨欽此同日奉到道光十八年十二月二十

九日內閣奉

上諭陶澍等奏官紳捐修城垣等工懇恩鼓勵一摺著  
吏部議奏此項工程係屬捐辦免其造冊報銷欽此

附三考之全  
卷二十一

三

睢寧縣捐修城工請獎摺子

奏爲捐修城垣等工驗收如式請將捐輸出力官紳  
開單懇

恩獎敘以昭激勸仰祈

聖鑒事竊照徐州府屬睢寧縣城垣一座自乾隆五十  
一年請

帑興修之後迄今未經修理前據睢寧縣知縣易卓  
梅稟詳東西南北四門城垣歷久未修因值停工  
期內未能請

帑舉辦周歷查勘牆垣坍塌城身臃裂墮土坍塌四



門城樓並奎星樓營房亦多倒塌亟應逐段拆修  
以資保障經該縣首先倡捐銀五千兩典史章德  
懋捐銀四百兩教諭金南金訓導高毓岱睢汎千  
總張燾協防把總記名千總用馮景尼各捐銀二  
百兩傳集紳商富戶妥爲勸捐選擇誠實董事經  
理共計官紳商民捐繳銀錢二萬二千零八十兩  
派定董事卓鳳來張繼珩鳩工督匠並委典史常  
川赴工稽查彈壓於道光十七年五月初二日開  
工將四門城身坍塌處所計十二段其長一百三  
丈八尺五寸俱用新甄從城根石腳起全行修建

又將四門城身臞裂之處以及雉堞坍塌共十三段長二百四丈三尺添新換舊酌量拆修統計新建並拆修共三百零八丈一尺五寸其餘四百八十一丈零概係將甄縫用灰補修並將城隍全行加土填築四門城樓營房馬道奎星樓等處一律修葺全新於九月二十八日完竣共用工料銀錢二萬三千一百三十一兩五錢四分除捐繳外計不敷銀五十一兩五錢四分亦由該縣捐廉歸補造具工段細冊詳請驗收飭據徐州府委據宿遷縣林惠元親詣按段查驗俱係工堅料實一律修

整並無偷減草率情事造具官紳商民捐數清冊  
由府加結詳道核明移司由江寧藩司唐鑑核明  
開摺詳請

奏獎前來臣等伏查睢寧縣城垣年久坍塌經該縣  
首先捐廉倡修並督勸官紳商民協力捐助一律  
修整並將城樓營房馬道奎星樓等處修葺全新  
共計捐用銀二萬三千一百餘兩洵屬急公除捐  
輸二百兩以下各戶均由外給獎外所有捐銀二  
百兩以上各官紳捐戶應請分別照例獎敘以昭  
激勸除將送到履歷清冊咨部查核外謹合詞恭

281-4 375 Mir 60P 28x

摺具

奏並開列名單恭呈

御覽伏乞

皇上聖鑒敕部議覆施行再此項工程係屬官民捐辦  
應請免其造冊報銷合併陳明謹

奏

道光十九年三月二十一日奉到

硃批另有旨欽此同日奉到道光十九年三月初七日

內閣奉

上諭陶澍等奏請鼓勵捐修睢寧縣城垣等工官紳一

摺著吏部議奏此項工程免其造冊報銷該部知道  
單併發欽此

陶文毅公全集卷三十目錄

奏疏 告病 遺摺

因病陳請開缺摺子

恭謝

恩准開缺摺子

遺摺

1886/08/12

20/08/12

疏告病 遺摺

因病陳請開缺摺子

奏爲假期已滿

臣病益增瀝情懇

恩俯准開缺迅賜

簡放俾資調理而免誤公仰祈

聖鑒事竊

臣

自上年二月染患手足痿弛之證當卽

奏委藩司代書常稿嗣因病勢稍輕照常辦事迨後

感受風寒手足復形笨重夜臥不安不得已又懇

賞假一月病仍未愈復請展假兩月疊奉

諭旨



硃批曲加矜憐俾得安心調理私衷銘刻浹髓淪肌旋  
於

恩賞福字壽字麕鹿摺內欽奉

硃批渥承

慈眷當卽附片奏謝

天恩並聲明假滿之後或稍展遷延以期圖効尺寸實  
以受

恩深重圖報無由一息尙存不容坐廢滿擬春令温和  
調治可期漸效詎自去臘以來喉乾咽苦飲食少  
進正月二十八九日更添頭腦眩暈動輒昏絕二

月初間屢復眩暈十六日夜間忽又喉管湧血旋  
吐旋滿初疑積痰天明審視始知爲血噴溢竟晝  
日來血湧稍止頭眩更加醫云總由肝木失養脾  
土受剋心血大虧內風煽動所致藥餌疊投迄無  
成效每日力疾辦公間接官員倍形委頓伏思  
以久病之軀屢煩

聖念苟可勉強驚駘何敢顧惜身命無如纏綿一載沈  
疴未去新病更增精力日見衰頹心神時形耗散  
兩江地方遼闊政務殷煩縱使殫竭心思難免辦  
公竭蹶若再拖延必滋貽誤醫云病極沈雜根本

猶存祇因心不能安是以日耗日竭倘能暫息仔  
肩專心靜攝尚可望痊再四籌思與其隕越於目  
前不如圖報於日後謹卽查照屢次摺內聲敘將  
兩江總督關防兩淮鹽政印信各一顆並

王命旗牌等件委江寧理事同知伍爾莫斯特依臣標

署理中軍副將左營遊擊強謙於二月二十四日

齋送江蘇巡撫臣陳鑾接署仰懇

聖恩俯准微臣開缺調理並請迅賜

簡放以重職守臣病軀未能遠涉江湖擬於開缺後暫

留江南就醫俟心神稍定再行回籍調養一經全

愈卽當趨詣

闕廷求

賞差使以効犬馬微忱斷不敢稍耽安逸有孤  
天地生成之

德所有臣病加劇懇

恩開缺調理緣由謹瀝情據實具

奏伏乞

皇上聖鑒臣不勝惶悚待

命之至謹

奏

道光十九年二月二十四日具

奏三月二十日准

吏部咨道光十九年三月初九日內閣奉

上諭陶澍自簡任兩江總督以來勇於任事不避嫌怨  
上年染患手足痿弛之證疊經賞假俾得安心調理  
冀可速痊本日據該督奏稱入春以後沈疴未去新  
病更增竭蹶辦公恐滋貽誤籲請開缺調理察其情  
詞懇切朕亦祇得勉從所請陶澍著准其開缺專心  
靜攝一俟痊愈卽行來京請安以慰塵念欽此又於

三月二十三日奉到

硃批朕亦無可如何祇得勉從所請一俟痊愈務卽來  
京另有旨欽此



恭謝

恩准開缺摺子

奏爲恭謝

天恩仰祈

聖鑒事竊臣因沈疴增重慮滋貽誤懇

恩開缺調理道光十九年三月二十日准吏部咨內閣

鈔出三月初九日奉

上諭陶澍自簡任兩江總督以來勇於任事不避嫌怨  
上年染患手足痿弛之證疊經賞假俾得安心調理  
冀可速痊本日據該督奏稱入春以後沈疴未去新



病更增竭。臆辦公恐滋貽誤。籲請開缺調理。察其情詞懇切。朕亦祇得勉從所請。陶澍著准其開缺。專心靜攝。一俟痊愈。卽行來京。請安以慰廑念。欽此。又於二十三日。齋摺差弁回省接奉。

硃批朕亦無可如何。祇得勉從所請。一俟痊愈。務卽來京。另有旨。欽此。跪聆之下。感激涕零。莫能自己。伏念臣以草茅下士。蒙

聖主特達之知。十數年來。渥承

教誨。成全迴逾。恒格涓埃。莫效兢惕。方深如可。駑駘勉竭。何敢少存自廢。祇以久病纏綿。日加沈篤。兩江

任鉅深虞隕越不得不據實陳請開缺以重公務

仰蒙

俞允

溫諭肫肫

鑒及隱微於曲成之中仍寓矜惜之意臣何人斯倍荷  
覆載深恩一至如此惟有謹遵

慈誨專心靜攝以冀痊可再圖報効所幸

新簡督臣林則徐才長心細識力十倍於臣仰見

聖主知人善任必能匡臣之所未逮其未到任以前

特命撫臣陳鑾署理其中正明幹一切熟練臣雖暫

弛

重寄亦可放心專事調攝刻下頭眩時復舉發手足仍  
然痿弛醫云脈象虛澀已極時形歇止現交夏令  
天氣漸熱病軀孱怯未敢跋涉江湖仍就近延醫  
診治俟交秋涼再行回籍調理倘叨

恩主福庇漸獲就痊自應趨詣

宮門叩請

聖安求

實差使斷不敢藉圖安逸上孤

眷注矜憐之至意所有

微臣

感激依戀下忱謹繕摺恭

謝

天恩伏乞

皇上聖鑒謹

奏

道光十九年四月二十三日奉到

硃批卿之體質本非不足緣費心太甚氣血保無消耗  
然瀟苓可用熱燥之藥必不相宜宜慎之惟望卿不  
日全愈來京面晤以副眷注委任之衷情也卿其善  
體之欽此



遺摺

奏爲

君恩未報臣病垂危伏枕哀鳴仰祈

聖鑒事竊臣楚省菲材由進士授職編修洊歷御史給

事中巡視南漕旋授川東兵備道恭逢我

皇上親政之始上承

特達之知首蒙

簡任山西臬司調任福建旋擢安徽藩司陞授巡撫調

任江蘇巡撫

賞戴花翎並

加宮銜

昇任兩江總督二十年來仰蒙

厚澤

深仁同於

覆幬雖捐糜頂踵不能稍酬萬一前年馬齒六旬渥荷

鴻施稠疊

鈞齋駢蕃受

恩愈重稱職愈難迨去春染患手足痿弛之證疊經

賞假上煩

宸廑延醫調治冀可速痊後因病勢日增辦公竭蹶懼

滋貽誤懇請開缺仰邀

俯准

溫諭頻加由署督臣陳鑾附摺謝

恩接奉

殊批卿之體質本非不足緣費心太甚氣血保無消耗  
然薺苓可用熱燥之藥必不相宜宜慎之惟望卿不  
日全愈來京面晤以副眷注委任之衷情也卿其善  
體之欽此臣何人斯渥荷

恩諭至此伏枕碰頭涕泣不已日夜思維何敢再萌歸

志惟因



簡調督臣林則徐尙未到任署督臣陳鑾赴浦催漕是

以暫住署內調攝猶冀稍就痊可卽由江省趨叩

闕廷瞻覲

聖慈仍圖報効詎意福薄災生夏至以後痰湧氣喘日

漸沈重病入膏肓藥石無效微息僅存餘生將盡

從此長辭

聖世不獲再覩

天顏望

闕叩頭曷勝犬馬感戀臣年六十二歲止有一子陶

桃年甫八齡藉延一綫嗣孫陶文熊年亦幼穉胞

姪陶親賢年甫二十九歲捐職同知遠隔楚省門  
祚衰微零丁孤苦臣惟遺囑子孫奮勉讀書日後  
得能成立稍有寸進上報

鴻慈以補臣未盡之志則臣雖奄然物化亦瞑目矣神  
志昏迷語無倫次謹具遺摺瀝鳴哀悃曷勝依戀  
嗚咽之至伏乞

皇上聖鑒謹

奏

道光十九年六月初一日具摺本月初十日由署

兩江總督陳代

奏七月十六日奉到

殊批深堪悼惜另有旨欽此同日奉到道光十九年六月二十一日內閣奉

上諭前任兩江總督陶澍由翰林洊歷科道出膺外任迨擢授兩江總督以來實心任事不避嫌疑上年染患手足痿弛之證疊經賞假俾資調攝今春因病勢日增勉從所請准其開缺冀可專心調理醫治速痊茲聞溘逝殊堪悼惜陶澍著加恩晉贈太子太保銜照尙書例賜卹入祀賢良祠任內一切處分悉予開復應得卹典該衙門察例具奏伊子陶杲著賞給主

事俟年及歲時由吏部帶領引見將來靈樞回籍並  
著沿途地方官妥爲照料用示朕優恤蓋臣至意欽  
此



陶文毅公全集卷三十一目錄

文集 經說

禹貢三黑水說

禹貢荊州江沱九江說

禹貢梁州江沱說

禹貢浮潛逾沔說

禹貢中江北江說

周公營洛邑說

十五國風次序說



文集 經說

禹貢三黑水說

敘州府宜賓縣古夔道漢置犍爲郡治負山枕江  
滇黔要路秦惠王破滇池通五尺道漢遣唐蒙發  
卒治道自夔抵牂柯隋史萬歲征南蠻經馬湖番  
山而進宋末蒙古將紐璘侵蜀渡馬湖皆由此此  
外水之衿帶也馬湖江自屏山縣界流入郡境與  
岷江會按馬湖江卽禹貢梁州之黑水其上游大  
水有三曰打沖河曰瀘水曰金沙江也打沖河蠻  
名黑惠江又名納彝江又曰鴉龍江其水洶湧衝



擊故以打沖爲名明初討月魯帖木兒破之於打  
沖是也源出西番界在黃河源之山南地名查楮  
必拉蒙古謂之七察兒哈拉平地湧泉數十如觥  
沸散若列星滙而南左右支河十二道注之至瞻  
對入四川界南流東折繞鹽源縣東北又南至烏  
喇犍犍卽今雲南大姚縣之左却鄉與金沙江會  
瀘水源出漢沈黎郡之西古笮都境旄牛徼外西番境  
謂之可跋海周七十餘里東流至越巂廳舊建昌  
司之南十里其地有瀘山瀘沽古烏蠻所居唐貞  
元中韋皋招南蠻斷瀘水橋攻吐蕃卽此又南流

至會理州東接雲南之武定州境與金沙江會金沙江源出西藏衛地之巴薩通拉木山爲岡底斯東麓岡底斯崑崙祖山也其東麓卽古犁石山水曰犁牛河番名木魯烏蘇河收納烏藍木倫阿克達木畢拉枯枯烏蘇等河凡數十水曲折四千餘里至塔城關入雲南麗江府境曰麗水又名金沙江以水產金沙也東南逕姚安境與打沖河合又東歷武定境會瀘水於是金沙亦兼瀘水之稱又稱馬湖江水經注越嶲郡馬湖江有瀘津卽武侯南征道也李京云從越嶲至滇道經金沙江通鑑

注自嶺州西南行八百里渡瀘是也又東流逕昭  
通府至敘永廳入四川界卽馬湖府舊治又北至  
宜賓入江也計金沙發源在黃河源之西一千五  
百餘里在岷江源之西二千八百餘里凡行六千  
七百餘里與岷江會實川滇黔中間第一大水而  
禹貢不載水道提綱以此爲大江真源酈注謂馬  
湖古若水也按山海經黑水之間若水出焉盧者  
黑色加水爲瀘而金沙稱麗麗同驪亦黑也源出  
犁石犁亦黑也曰烏蘇番語亦黑也然則瀘與金  
沙皆古黑水打沖界其間則若水也三水旣會皆

可稱瀘皆可稱馬湖又有繩孫淹鮮諸稱實皆黑  
水耳源遠流長故禹貢舉以界梁州之南境也至  
黑水之說不一酈道元孔穎達杜佑皆言在張掖  
南至燉煌過三危山南流入於南海不知中國之  
山皆祖岡底斯一支由于闐羌南起巴顏哈喇至  
積石以逮西嶺而爲終南此中幹也一支由諾莫  
渾烏巴什起卓爾長山至埵城關以逮雲嶺而入  
黔粵此南幹也河在中幹之北海在南幹之南江  
在兩幹之中黑水果經燉煌當積石東北縱能絕  
河而南亦斷不能越中幹以絕江况能越南幹以

入海哉竊謂禹貢言黑水有三一雍一梁一至三危入于南海本非一處亦猶雍有沮水兗又有沮水梁有蒙山徐亦有蒙山不必強合爲一也梁州之黑水自在馬湖所收黑惠麗瀘諸大水皆因黑取義且與華陽南北相對地界截然至雍州之黑水本在張掖境經黑山下西入青海正雍州西界也其入南海之黑水樊綽蠻書以爲有四曰西洱曰區江曰瀾諾其一麗水卽禹貢黑水夫麗卽金沙何嘗入南海樊蓋誤以瀾滄爲麗水下游也按瀾滄卽瀾諾出自藏衛李元陽以爲卽黑水然亦

於三危無涉程大昌又以滇洱爲黑水謂與葉榆  
澤相貫且地近宕昌本三苗種裔與三苗之敘於  
三危相應此說較善然滇洱池潞弗流不入南海  
愚意應以唐蒙所見牂柯江當之牂柯出烏撒一  
名盤江在南幹山脊之南面其水繚繞於雲貴之  
境以達廣西爲左江至潯州北會黎平都勻定番  
之水爲右江逕梧州會離江至番禺入南海此水  
在嶺南最大盤迴四省長四千餘里正入南海粵  
人謂之黔水以其出自黔中也黔之爲名自係因  
黑取義且苗疆也禹貢或因三危之遷而名其舊

地耳聊備一說以俟博雅者正之

又按水經江過江陽雒水從二

危山東南注之是三危不止燉煌一處也

禹貢荊州江沱九江說

水經注枝江地平敞北據大江江汜枝分故名東  
過石鼓灘至焦崖凡三十里山勢逶迤欲盡又二  
十里至羊角洲而彌望皆洲江流至此如枝之析  
分爲南江北江所謂江有沱也以江心爲界北屬  
枝江南爲松滋地荊州記縣左右有數十洲盤布  
江中百里洲爲最大大江自枝江縣分流經松滋  
至江陵境其南一枝入虎渡口東南流經柳市彌  
陀市至公安縣之黃金口又南逕港關塞口楊家  
蕩泗水鋪入湖南澧州界至三汊腦而分爲二支



一出津市稍東之觀音港入澧一出安鄉交界之  
焦溪入澧皆東注於洞庭所謂沱也凡水之出於  
江而復合者謂之沱梁與荆皆有之禹貢導江東  
別爲沱又東至于澧過九江至于東陵今自虎渡  
至澧南北相距二百餘里說者遂以禹貢至澧之  
文爲不可解王晦叔謂南江在古時爲岷江之正  
流從虎渡口注澧而北江則沱水也其後北江漸  
盛南江漸微反以南爲沱北爲江矣此說甚新然  
細觀山脈從澧州至公安楊家蕩皆有岡脊惟三  
汊河無山是其過脈處及東逮安鄉華容則重起

山巒江本經流非沱可比難於穿岡脈而南果穿  
岡脈而南則當如導岍逾河之文曰逾于澧不言  
至于澧也大抵洪水之時江與澧本自相近中間  
界脈惟有楊家蕩等處一綫之隔今之相距二百  
餘里皆兩岸隄坑爲之耳澧本水名因以名地江  
行至此南岸爲澧境故曰至于澧猶言至于澧州  
云爾非謂會于澧入于澧也由此而東至巴陵之  
城陵磯而洞庭之水出焉故曰過九江也至九江  
之說不一有以彭蠡爲九江者劉歆也王莽緣此  
改豫章爲九江而鄭康成之說因之有以潯陽爲

九江者

漢潯陽縣在蘄州界內地名蘭城南接德化境

孔安國書傳與班

固地理志也孔穎達緣此謂江分九派猶河分爲

九而應劭之說如之此皆秦漢時九江非禹貢九

江也禹貢言九江者三皆在荊州而彭蠡潯陽在

揚州之域劉鄭諸儒皆北人昧於南方地形遂並

禹貢原文而昧之孔應之說尤謬江果分九則九

江卽江之正身豈得言過耶按山海經洞庭之山

帝之二女居之是常游於江淵澧沅之風交瀟湘

之浦是在九江之間然則洞庭之稱九江由來久

矣又按屈原哀郢云上洞庭而下江又曰當陵陽

之焉至今祿南渡之焉如屈原放逐江南將溯洞庭必  
先由郢下江道出城陵磯卽東陵也所言陵陽自指東陵  
之陽猶今巴陵之稱岳陽也由此南渡洞庭而浩淼無  
際故曰南渡焉如水經注江之右岸有城陵山其上有  
城蓋後人因城之故而訛東陵爲城陵耳荊州本治江  
陵而城陵與夷陵分踞東西夷陵爲楚西陵則城陵山  
之爲東陵無疑矣自川江而東除却洞庭更無九水同  
匯一處可以總名之曰九江亦更無名山在東岸可以  
稱東陵者若林三山謂廬江郡有東陵鄉無論小鄉

僻地不足為證且江至東陵東迤北會于滙果在

廬江則江漢方朝宗赴海更從何處迤而北滙耶

至會彥和以辰沅漸淑无應作灑一作澗又西澧作巫作元者非

資湘為九江朱子去无澧而易以瀟烝後人又謂

无澧不當去烝不必入但當易漸為瀟耳蔡傳亦

從曾說而三山謬謂曾氏之言無所考據不可從

不知山海經非僻書而沅湘辰叙屢見楚辭資西

漸无注於水經豈得謂之無據若林氏可謂盲人

道黑白也因論江沅而備及之

禹貢梁州江沱說

青衣江水自夾江縣西來大渡河水自峩眉縣南  
來同會於嘉定府西南之雙湖又東流繞城隅而  
北入於岷江三江會合古有合水之稱晉書桓溫  
討李勢循外水西上勢遣李福拒溫自山陽即峩眉山  
之趨合水是也按青衣江源出雅州之蒙山在蘆山縣  
界經名山洪雅丹稜青神夾江至樂山即古沫水  
也以其源出蒙山故又謂之濛水耳大渡河一名  
羊山江源出茂州西南徼外之羊山一名鐵豹嶺  
即岷山之別名也本與大江同出而大江東流在

岷山之陰大渡南流在岷山之陽故又曰陽江也  
其水自打箭爐入越嶲有羅羅河魚洞河注之又  
東至清溪縣界經鬼皮落野夷入峩眉界而三峩  
之水入之故許慎謂之澱水漢地理志又謂之澱  
水澱卽澱也殆傳寫之誤大渡河下流稱陽江亦  
曰沫水沫者水石相激噴薄如吐沫也大約蜀中  
險灘之水皆可稱沫不特青衣大渡可稱卽大江  
亦然傳言李冰鑿離堆避沫水之害是江至灌口  
亦稱沫也此二水爲禹貢所不載源流旣遠名目  
互異記載紛紜無所折衷輒爲論之於此又按大

渡自入中國過郡三行二千餘里始至嘉定其源  
本與江同而復會故疑此水卽尚貢梁州沱潛旣  
道之沱矣否則此水與大江相表裏不應禹迹不  
到也





禹貢浮潛逾河說

大要蜀中之水以大江爲經而羣水緯之大江自岷山經川西至川東禹貢南條之首也其在川南者則大渡河馬湖江爲最大卽禹貢之蔡蒙和夷也其在川北者則嘉陵江爲最大卽禹貢之潛也四川之目當指此四水言之亦有舉資水而無大渡河者不知資水較小雖有中水之稱祇係大江之別流不足自名一川不如大渡河之源遠流長也嘉陵江一名西漢水皆漢以後所改稱禹貢但謂之潛梁州貢道由此水溯今廣元逾寧羌州浮

沔湖襄以出斜口故曰浮于潛逾于沔入于渭亂于河彼時帝都在冀若不由潛便須浮海否則由荆州溯漢仍須逾河其道轉迂遠不如浮潛之便捷也史記言襄通沔斜通渭皆可以行漕然漢武穿之道果便近而湍激不可行舟卒廢其議蓋古今陵谷變遷襄沔近山多開墾沙石所壅寢失故道自禹至漢不過二千年而武帝時襄斜已不可漕况後世乎

禹貢中江北江說

中江北江聚訟紛紛其實乃一江而異其名耳禹  
貢漢水過三澨至于大別南入于江東滙澤爲彭  
蠡所謂南入于江卽今沌口之道也所謂東滙澤  
爲彭蠡者議論不一九江之鄱陽固非江水所入  
廬江之巢亦地勢太下以地勢揣之當卽今漢口  
一帶春秋時謂之漢汭今猶有後湖之稱古今地  
勢變遷昔之湖今爲陸也江水東迤北會于滙所  
謂滙者卽東滙澤爲彭蠡之滙也曰會者卽江漢  
朝宗合流之所也從此合爲大江浩然東去入于

海自漢水視之則稱北江以漢本在北而南入于江茲復北行至此以東陵之江爲南故以此爲北也既以所入之處爲南故以所出之處爲北自江視之則稱中江者以江本從南方來及至此始入中土故謂之中江實卽今之大江一水也其實禹貢凡一水而異名者多互舉以見義如漢沔漾本一水也而三名導漾則曰東流爲漢而不言沔作貢則曰逾沔而不言漾其實一水又何疑於中江北江之分耶

周公營洛邑說

周室居岐豐天下之上游形勢最強洛陽地隘南面嵩北距河東成臯西冥阨中間僅數百里耳以爲居天下之中舟車易通則何不宅汴梁與魏博反覆求之不得其意惟婁敬數語言之最有意義其言曰成王卽位周公之屬傅相焉迺營洛邑以爲天下之中也四方貢職道里均矣有德易以王無德易以亡凡居此者欲令周務以德致人不欲依險阻令後世驕奢以虐民也數語真得聖人之心事是以朱子取之否則如慕容盛之流方且以

權術曰周公可謂以小人  
之腹測君子之心矣

十五國風次序說 十四歲作

諸侯封建之域謂之國民俗歌謠之什謂之風孔子自衛反魯刪詩定樂雅頌得所而不言國風蓋已於敘次之際默寓其微意矣二南皆文王之化言周之德與周之所以王也而王者之風較重於諸侯之事故以周南首召南文王之子昭考而外惟元公與孟侯爲最著故曰魯衛之政兄弟也魯列於頌故以衛次南而邶鄘則並於衛者也然聖人之意蓋猶在周之東遷也子曰如有用我者吾其爲東周乎故繼衛而次之以王東遷之始鄭最



親且強使能如周召之夾輔則東道猶可爲觀緇  
衣詩人之意未必無厚望焉乃旣逐其弟復寘其  
母集矢王肩甘心戎首周之衰鄭爲之也此鄭之  
所以次王也夫子觀於鄭而知王業不復興不得  
不降格以從伯伯則桓公爲盛而晉文繼之嗣是  
秦穆遂霸西戎齊魏唐秦之相次以此繼之以陳  
則以楚莊之伯始於討微舒也故其詩於株林夏  
南尤有慨乎言之至於宋襄非不列名五伯顧以  
商人之遺有頌而無風且身爲楚囚斯其伯亦不  
足道矣嗟夫桓文之事豈聖人所樂道哉徒以王

邇既熄而彼假仁假義猶知出於弊王室之爲是  
以節取其一匡之功而姑寬其召王之罪不謂國  
愈非斯風愈下桓文而後無復桓文卽崛起戎蠻  
如秦穆楚莊者亦不可多得故以曹次陳而傷天  
下之無王卽以檜次曹而傷天下之無伯也是聖  
人碩果之望亦猶存餼羊之意也且夫人窮則返  
本亂極則思治風之首於周也如彼其忠且厚也  
而實託始於古邠此皆周公之制作也以此始者  
以此終風之訖於豳也聖人其猶有夢見之思也  
乎或曰季札觀樂其所歌次序與今詩畧同似周

室樂官所記如此非關聖人手訂者不知左傳作  
於邱明未必不因師說以成文若謂周官所記則  
王風雖微不應在邶鄘之後而鄭衛之淫亂反先  
於七月之艱難亦無理可言矣夫詩者雅言之首  
也即使樂官所掌無次猶當序而正之以其爲王  
迹之所存也然則以意逆志斷可識矣 大人論  
詩及此因退而爲之說

陶文毅公全集卷三十二目錄

文集 史說

蜀道形勢說

荊州形勢說

襄陽南陽形勢說

本草綱目卷之五十一  
木部三十一

文集 史說

蜀道形勢說

從寶雞渡渭清澗水自煎茶坪來注之酈注謂之  
扞水或曰卽姜水又云卽羌水也十五里益門鎮  
從此入北棧一路懸崖峭壁陳子昂詩蜀道自茲  
始雲山方浩然十五里軍陽鋪或謂卽古和尚原  
宋吳玠吳璘守之以拒金人者也十里二里關鳥  
道蛇盤峻隘難行卽古大散關曹操討張魯自陳  
倉出散關諸葛亮伐蜀出散關圍陳倉皆由此十  
里觀音堂十里半坡鋪北有數峯如石筍立雲端

泉流爲清湖河酈注扞水出周道谷東北歷大散關入渭是也五里煎茶坪坪據大散嶺之頸左水入渭右水入嘉陵江蓋中幹界脈也古和尚原當在此地勢高平西迤東險與二里關聲勢相連天然隘守也東河逕其下卽嘉陵水疑和尚原爲河上之訛也下嶺五里卽東河驛水出嘉陵谷自東而西故稱東河又西逕故道城下名故道水至鳳縣而東有黃華紫金西有小塔紅崖南有東溝野羊諸河次第注之流始大西南逕兩當至畧陽會西漢水出朝天峽也又三十里黃牛堡和尚原大

散關一帶爲全蜀門戶西走階文南出褒沔吳玠  
有云我守此敵不敢越我而進堅壁臨之彼懼吾  
躡其後是所以保蜀也其後玠駐河池於鳳縣西  
一百里之仙人關別營殺金坪以防寇深入而吳  
璘獨駐和尚原逮紹興十二年竟割和尚原以畀  
金則秦檜之奸謀也三十一年金牝徒單合喜將  
兵扼大散關游騎至黃牛堡守將李彥堅以神臂  
弓却之吳璘別遣將敗敵於寶雞渭河遂復大散  
關隆興二年金再入陝議割和尚原楊存中力言  
其不可且言吳璘在遠不及知臣若不言不特負



陸下亦有愧於璘時不能用而蜀遂不可守矣爲國者可不知地利哉

自南星東行南望山坳洞開一綫曰陳倉溝有小路可通沔縣三十里松林驛又十七里柴關嶺嶺卽紫柏山之跗也勦教匪時大軍駐此林木蕩然過嶺望紫柏山顛高出雲表自此重谿迴壑有小路緣山可達益門古陳倉道也較鳳縣稍捷但阨陘難行耳按棧道之出有四從成和階文出者爲沓中陰平道鄧艾伐蜀出之從兩當鳳縣出者爲故道漢高攻雍由之從褒城留壩以達鳳縣者爲

連雲棧漢高之南鄭由之從城固洋縣出者爲斜  
路道武侯屯渭上由之故道連雲棧至鳳縣合路  
同出寶雞韓侯明修棧道暗度陳倉蓋所修者由  
鳳縣至和尚原之道而暗率精兵由兩當至此處  
緣山路直出益門耳

涪水源出松潘衛風洞頂興龍泉逕平武江油彰  
明而來至城北芙蓉溪口安昌河之水自西南來  
注之又曰縣水又東逕三臺西會中江縣之五城  
水又東南逕射洪北會梓潼縣之潼水又東逕蓬  
溪遂寧歷銅梁定遠界至合州入嘉陵江統名爲

內水也漢志涪水過廣漢巴西二郡行千六十九里昔臧宮從涪水進拔緜竹先主由墊江今合州涪城皆道此水蔣琬所謂今涪水陸四達惟急是應也然蜀之險實在雲棧至涪則無險可守矣琬以爲東北有虞赴之不難遂自漢中還住涪蓋有鑒於武侯之崎嶇糧運欲以息民而不知其失地利也武侯以進爲守琬乃退居納寇幸時無事故無議之者然非全策也厥後費禕屯漢壽姜維耕沓中視武侯之經營漢中已落第二義逮鄧艾從陰平間道趨蜀諸葛瞻拒之止屯涪爲艾所敗

住縣竹戰沒而蜀亡矣然則涪奚可恃哉



荊州形勢說

荆楚沃野千里外帶江漢內阻山險有金城之固  
武侯亦言荊州用武之國六朝江左安危恒視上  
游然蕭繹都此而命懸他氏其餘蕭銑高賴子之  
徒旋起旋覆何者荊州之勢足以俯視東南而堂  
奧之患乃在西北若歸巫與襄陽有事則患中於  
江陵矣是蓋進取之地非可守之地也其城外平  
行別無險阻是以孫吳時嘗作堰海以遏水限敵  
宋李師夔吳獵劉申所築之上中下三海卽其遺  
制也淳祐中孟珙引沮漳之水自城西繞北入漢

遂通二海爲一而更爲八櫃以資蓄洩三百里閘  
渺然巨浸金人望而却步卽俗所稱三海九隔也  
今故跡多湮惟東北有瓦子長湖北通潛漢爲行  
旅舟航之利與城守無涉坡詩亦解觀形勝昇平  
不敢論然安不忘危守土者其可忽諸荆門州在  
象山東堡二山間爲南北咽喉陸九淵之言曰州  
南捍江陵北援襄陽東護隨郢之裔西當光化夷  
陵之衝荆門固則四鄰有恃否則由唐之湖陽以  
趣山而涉漢已在荆門之裔由鄧之鄧城以涉漢  
而趣山已在荆門之腹此外間道之可馳漢津之

可涉陂陀不能以限馬灘瀨不能以濡軌者所在  
尙多自我出奇制勝徼敵兵之腹脅者亦正在此  
因請於朝而城之厥後孟宗政謀復襄陽亦謂必  
得荆門然後可以出奇兵是荆門又荆襄二郡之  
咽喉矣

又案荊州記自枝江縣東極江津其中有九十  
九洲水經注江陵城南有馬牧城此洲始自枝  
回下迄於此長七十餘里洲上有奉城故江津  
長所居蓋江自枝江南北分流其中洲渚相連  
緜延甚長古今名目互異析之凡九十有九總



之爲百里洲。荆志云：府境諸洲皆百里洲之別名是也。自江陵而下洲渚漸少，兩岸藉隄爲防。北岸至沔陽州之茅埠口，南岸至巴陵之城陵磯，隄長各五百餘里，寸地失防千里爲壑。是以江陵等處向有九穴十三口，以洩漲勢，後俱湮廢。而荊州之水患日甚矣。乾隆五十餘年間，荊州大水，壞城漂沒，無算議者歸罪於窖金洲。民謂其種柳洲上所致，其時水已漫城，兩隄無洩。九十九洲皆在波底，雖無窖金一洲，恐亦難免。決潰故言水利於湖北，宜以江陵爲先，而漢沔

下游安危視此矣



襄陽南陽形勢說

襄陽踞東南上游扼南北咽喉歷代皆爲重鎮宋人有言守江左則襄陽不如建業圖中原則建業不如襄陽然歷觀古來如桓宣庾翼孟珙之守襄陽非不力圖恢復皆無寸進之效惟關雲長水滸樊城一時威震許都亦終敗亡而如杜預平吳于謹滅梁蒙古亡宋皆由襄陽以成破竹之勢何者襄陽雖堅已在荆郢堂奧北人得之足以俯并東南南人得之僅足以自保而已是以春秋時楚守宛葉不聞守襄陽也南陽爲周申呂鄧三國地府

治卽宛城址也習鑿齒云秦并天下自漢以南爲南郡自漢以北爲南陽然國策載秦惠王時楚魏戰陘山魏許秦以上洛敗楚南陽又吳越春秋內傳勾踐賜文種屬鏤之劍歎曰南陽之宰而爲越王之擒種郢人初令於宛故云然是則南陽之稱不自秦并天下始矣其地南蔽江漢北顧中原西通商洛東臨隨汝險陘而平可戰可守楚巫臣言申呂爲賦以禦北方若無申呂諸侯必至於漢是也大約春秋時楚最講戰守夷陵國之西門乃不守夷陵而守夔巫幽崖窮谷之中而爲宮臺以時

巡幸所以重西防也襄陽國之北門乃不守襄陽  
而守宛葉兵車時出居然問鼎中原厥後武侯守  
蜀屯漢中而出祁山卽此機法非徒顧目前者所  
知自頃襄時司馬錯拔楚黔中楚獻漢北及上庸  
地於是宛葉樊鄧隨房之境悉入於秦明年白起  
遂伐楚一戰舉鄢郢再戰燒夷陵而郢危矣謀國  
不臧自撤藩籬誰之咎哉然楚雖削弱王翦以空  
國之師倖而取之而秦亦終亡於楚七國之久未  
有如楚與燕者而楚尤強盛卜世卜年與周室相  
終始雖祝融氏之光遠有耀抑其先規爲措置固

有異於列國者歟

裕州之趙河卽堵水源出州西山麓南流四十里至葉家店始通舟楫至唐縣界入比水又西與清合而入於漢或云此水卽召渠召信臣故迹也宋唐州守趙尙寬修復之人因謂之趙渠按酈注比水又南趙醴一渠出焉則趙渠之稱久矣裕州小水皆南流入趙河裕州楚之方城漢堵陽地後魏置方城縣並置襄城郡唐改北澧州又改唐州金爲裕州州據宛葉之間爲南北咽喉淮南子天下九塞方城其一是也裕州

北行二十里爲招撫岡此處爲中幹過脈之所  
岡以北水皆北流注舞陽河入汝岡以南水皆  
南流注趙河入滄也宋太宗初轉運使程能請  
濬北河達京師以通襄漢之漕塹山堙谷凡月  
餘抵方城地勢高水不能至端拱初復議開濬  
卒不就蓋由不識地脈故開鑿徒勞矣





陶文毅公全集卷三十三目錄

文集記

三峽記

君山記

漕河禱水圖記

重修京口風神廟碑記

大龍山龍神祠孚澤亭碑記

皖城劉猛將軍廟碑記

宿州劉猛將軍顯應碑記

重修安化縣學宮碑記

卷之三十三  
一  
婺源縣重修

文廟碑記

沅江縣尊經閣記

暨陽書院增置沙田記

重修金沙書院碑記

歐陽氏家廟記

文集 記

三峽記

昔陸放翁自吳入蜀初至下牢卽訝其奇怪不可狀及至夔巫反平平無詫語王阮亭出巫山抵巴東嗤爲賸水殘山不堪著眼蓋人情乍見則驚久而習焉則忘非山水有時顯晦也余今晨自兵書峽望新灘諸山雖高崖修阻不甚奇詫以爲不及夔巫及抵空舸羣峭空涌如入化城逮黃牛一帶面目又別入蝦蟇碛更出奇觀通計此日所見有方若城者有圓若蓋者有呀若牙者有竦若翼者

有仰若缶覆若釜者有簇矗若筍尖者有跼葩駢  
萼爛若芙蓉者有單支片段森若戈戟者有牽衣  
掩袂若仙子御風者有扶筇荷蓀若老人負曝者  
有紕互若蛇螭鏘舞若鸞鳳者蓋沈雄瑰偉稍異  
夔巫而秀峭似之可以歎觀止矣按三峽之說不  
一有謂明月廣德東突者庾仲初記也有謂明月  
巫山廣溪者峽程記也有謂西峽巴峽巫峽者寰  
宇記也有謂西陵巫峽歸峽者宋肇記也惟王洙  
瞿塘巫山黃牛之說爲近是蓋川江之以峽名者  
甚多難以枚舉所謂三峽者專以在荊州者言之

耳盛宏之荊州記云三峽七百里中兩岸連山峿  
無闕處今自夔府東至宜昌將近六百里奇險盡  
在其間蓋自灑瀨堆至虎鬚灘統名爲瞿塘峽一  
名廣溪峽卽夔峽也自空亡沱至門扇峽統名爲  
巫峽其尾盡於巴東故又曰巴峽也自兵書峽至  
平善壩統名爲西陵峽其峽起於歸州而翹於黃  
牛訖於扇子故又曰歸鄉峽黃牛峽扇子峽也諸  
說紛紛斷以夔峽巫峽西陵峽爲三峽此因親歷  
其境目擊層巖疊嶂其阻且長者有此三處證以  
盛宏之荊州記確然無疑峽至西陵而盡今東湖

本夷陵州地乾隆中升爲宜昌府置今縣戰國時  
爲楚西陵邑頃襄王二十年秦白起拔我西陵明  
年拔郢燒先王墓夷陵是也有陸抗故城在江東  
南卽山爲壩四面天險地當三峽之口爲楚蜀咽喉  
形勝所必爭歷代皆置重鎮然白起王濬與隋  
楊素之下陳唐李孝恭之克蕭銑均以建瓴之勢  
成功若所據非宜則田戎步闡終歸敗亡卽先主  
之連營七百亦不免見欺小兒狼狽西走則知乘  
高因險亦視乎其人也

君山記

海內之水莫大於洞庭其峙立湖中者東則扁山  
南則磊石青山西則明山奇山團山數山中明山  
頗勝餘皆部婁不足當登臨之目獨君山周七里  
有奇蒼然帖湖心爲沅澧資湖之砥柱子往來洞  
庭數矣未及登也會有事常德而岳守陳公亦專  
人相迓遂買舟往道明山寄山團山下時秋水方  
平微風不起俯仰惟天浩然無際遙見君山鬢鬆  
若難結可望而不可卽更初始相近舟人將逕抵  
南津港半渡因風返遂泊焉月色如盤冉冉出波



中四顧蒼茫如成連之在海上也自念此山在十  
一福地不可不到我輩歷碌風塵湖山易隔詰朝  
解纜不免覲而失之遂起踏月山椒略識面目山  
寺犬聲如豹露氣襲人攝衣而返翼早北風大作  
望岳陽樓縹緲雲邊無能飛越舟人相謫惟予幸  
石尤之見留飯後從一僕入二妃廟階下叢菊盛  
開老樹蔭廟後寒翠欲滴其右爲洞庭君祠稍上  
百餘步爲二妃墓有小碣著茂草中墓上楠樹一  
株亭亭如蓋相傳犯之有蜂蛇之異按山海經洞  
庭之山帝之二女居之郭璞謂天帝之女也是則

上界天仙豈有玉棺遺蛻留蹟凡間自祖龍焚書  
博士大都不學隨口應對傳會虞姚遂使此山橫  
被髡禿不知蒼梧南狩三妃未從是以九歌所賦  
不徵釐降之文昔人謂倦勤孝威甥館久虛乃以  
白頭老婦跋涉要荒蹈濁水以捐軀望空山而掩  
涕殆不其然昌黎黃陵廟碑亦不言其葬此而小  
人無忌憚至有辟陽侯之謂悖矣由墓旁小路迤  
西有利立山奧梅曰有緣蓋言山非有緣者不至  
也蓬萊三島自在人間然名利兩航去來如織逆  
風則不能至風順又不肯至其有欣然襍被蠟屐

思游而塵心未化見遠山靈往往阻以風波或臨岸而引之使返如今日之遊不謂之有緣不得也崇勝寺隱然山之南麓恐佳境易窮故折而東迤邐過數岫則監利華容之山皆在目矣濱湖西上里許轉入山徑窈而南曲折如旋螺久迺陟軒轅臺爲山之最高處煙波浩淼駭目盪胸志言黃帝鑄鼎於此鼎成上昇故有飛昇亭竊謂鑄鼎荆山未必卽此考史黃帝南至于江登熊湘解者釋熊湘爲二山君山舊名洞庭山又曰湘山則此地自屬公孫遺蹟不必借攀髯遺弓事以文之也其

南爲酒香亭昔漢武遣欒巴求得仙酒於此山下  
哈呀林立有石方平可坐數人謂之漢武射蛟臺  
云遂下山麓東至崇勝寺羣岫環揖古木蔚然間  
作赭色云是秦火之餘僧堂下列鐵稍二各重千  
斤其文曰淳祐五年孟府十位鑄或云孟昶嘗以  
八寶鼎獻馬希範爲壽馬以賜君山僧茲卽其遺  
按淳祐爲宋理宗年號時孟珙鎮襄陽去此未遠  
其爲所造無疑寺壁懸錢南園先生書蒼勁似魯  
公爭坐位帖柳毅并在其左水甘冽四時不竭山  
寺皆飲之有刺橋大數圍空靈古拙千年物也

卽柳毅爲涇陽婦人傳書處事見小說虞初志流俗遂躡爲洞庭之神矣出寺循澗而下觀龍虎二洞石竅嵌空漲痕初落相傳昔有虎居之晝伏夜動予惟岑鬱之區靈禽是集如柳歸舜所見則有武游郎花都子之屬至若毛蟲四足無從傳翼故圖經言此山不受穢惡無猛獸况山君水處說尤不經按君山有穴通吳之包山郭璞江賦所言巴陵地道也又拾遺記云洞庭之山浮於水上其下有金堂數百間故知山本中空而二洞則往來之門戶今山之南有響沙水渴時蹬足有聲殆中空

之驗云由洞稍東高阜據湖濱舊有朗吟亭因小  
憩石畔坐數九馬金鷄諸山厯厯如畫西眺明山  
一帶昨日之所經者亦微茫若粟浮沈於輕煙薄  
霧之中夕照銜山落霞千里但聞漁歌綿邈之音  
遠起蘆荻間舟人以風息來告遂鼓柁至岳陽城  
下沽酒巴陵登樓記之

|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|--|--|--|--|--|--|--|--|--|--|

漕河禱水圖記

漕運自揚達淮經邵伯高郵兩湖間有地曰露筋  
漁洋所云湖雲祠樹碧於煙者也按祝穆方輿勝  
覽云舊傳有女子夜過此天陰蚊盛耕夫田舍在  
焉其嫂止宿姑曰吾雖死不失節遂以蚊死其筋  
見焉故名而段成式酉陽雜俎江德藻聘北道里  
記或言醉者止此白鳥咕噉血滴露筋死或言鹿  
爲蚊噉而筋見皆不及貞女事惟歐陽公憎蚊詩  
云嘗聞高郵閒猛虎死陵辱哀哉露筋女萬劫仇  
不復而米元章書廟碑亦云澤國之女嚙膚露筋



不就有帷之子氏不顯於當時祠方揭於千古庸  
夫庸婦之所傳有如昨日至我

朝康熙四十六年

聖祖南巡

御書節媛芳躅以賜而後神之貞烈乃昭然揭諸星日矣

嘉慶乙亥十一月臣澍奉

命視漕瓜儀道出祠下見棟宇摧落瓦礫溷集壞壁苔  
生而神像儼然太息久之其時漕艘歸次出江者  
甫半連日北風怒號湖冰凍結深恐貽誤漕行爰  
齋戒爲文於是月十八日齋禱於神次日風回日

暖全河水泮篙師長年踴躍奮迅二十八日各船  
出江報竣其夕水凌復合迨曉一望皓然江南人  
傳以爲異明年新漕駛行得無阻滯計所運之米  
多於上年一百五十萬有奇而行期反速至四十  
九日比余押尾北上躬拜祠下復獲順風揚帆至  
淮始息有以知神之靈昭昭也六月回京復

命仰荷

聖詢及之適節相菊溪百公與漕帥書巖李公河帥湛  
溪黎公直指厚菴阿公會奏重修祠宇因及余禱  
冰獲應一事得

旨封爲昭靈普惠之神

賜祠名貞應蓋神自唐宋以來千有餘年至是始邀  
封典其端實因禱冰事發之故倩野雲山人爲圖以誌  
神應而昭我

國家有道之祥且使他日談故實者有所考焉

重修京口風神廟碑記

國家歲漕東南米四百餘萬石贍京師而江浙居其  
大半凡糧艘之出丹徒渡揚子江者皆必自京口  
道金焦二山之間西北達於瓜步水深浪闊危磯  
介焉非東南風莫渡兼之運河鑿山而成其流資  
諸江湖而江湖又非東風不能入此顧瞻天塹者  
不能不乞靈於風伯也先是乾隆六十年侍御湘  
鄉謝公振定持節南來屢遇順風遂疏請建廟得

旨報可

御書翊靈佑順四字以

賜其時常鎮道查君淳淮揚道谷君廷珍鎮江府賀君賢  
志暨丹徒縣令林大權鎮江衛守備朱之興共襄  
厥成擇基於銀山之東北麓背崖面江爲屋二進  
堂其內而門其外繚以牆垣自是風神始有專祠  
迄今二十餘年矣漸卽頽落風雨飄搖過者危之  
嘉慶乙亥冬澍奉

命來視南漕適浙江空船回次淺阻二百餘艘亟禱於  
神一夕東風大作潮水暢入各船盡送出境明年  
正月天久不雨西風怒號重運全滯署道策君署  
守錢君致禱益虔余隨卽渡江詣祠拜甫遶門諸

公咸相詫告謂相風銅烏已回首北望矣各船揚帆卽日渡江者一百有餘時鄒平李君景嶧知縣事隨余謁祠下慨然興嘆以爲荒圯若是不足以妥神靈遂割廉俸葺而新之規制煥然有益於舊是歲漕艘多且重倍於往歲深以遲誤爲虞比及渡竣乃早至十餘日余感神貺之速復詣祠謝而李君以葺工告爰執筆記之以著神之翊佑

聖時如此其焯而李君能勤其事以答神庥爲足多也



大龍山龍神祠孚澤亭碑記

皖城之北三十餘里有山翼然若屏若幕蜿蜒而  
礪碑者大龍山也其山西麓有靈湫介兩窟間是  
曰天井爲神龍之所翕栖前明洪武中敕封天井  
順濟龍王

國朝因之循靈湫而西有祠建自明成化甲辰至我  
朝屢加修葺邦之人閔雨則禱道光四年夏兼旬弗  
雨澍爲文以禱獲應猶未溼也六月十一日晨興  
屏騶從詣山顛親禱於龍湫之上其時赤日當空  
余自集賢關騎行十餘里至祠所荒庭摧落展拜



於蒼苔瓦礫間復徒步登山約三里許始抵白馬石前俯天井而致禮焉歸途塵埃障塞余方欽欽然懼無能爲民請命以爲神羞比入城而雨足颯然忽至逮轅門則滂沱立沛矣邦人皆喜計是日往返烈日中凡六十餘里而雨大至又前後遣廬州府宋守安慶府汪守往禱輒得雨其應如響歲則大熟噫上年水災之後吾民顛沛流離元氣未復徵此雨其何以蘇念及此而神之賜大矣神之食報尤宜矣爰擇基於靈湫之右岸因崖爲廣而建亭焉名之曰孚澤以答靈貺更率屬捐廉重新

祠宇而紀其事於石系之以辭以爲邦人無量之  
庶之禱

辭曰龍山兮嵯岬鬱礪礪兮硯礪羣峭摩空兮爛  
天葩朝煙夕霧兮龍伯之所家是爲天井兮石洞  
谿訝六時不塵兮一雨皆花神之翁兮偃虬戶而  
息鯨牙神之出兮擁玉螭而掣金蛇朝神游兮淮  
浦夕神憩兮江沙阿香萍號相從兮如麻雲中之  
君兮紛歷歷以排衙顧大地之盼澤兮分瓊液與  
流霞沛醴泉爲甘雨兮盈甌婁而逮汙邪慰三農  
之厚望兮播百穀而孔嘉願靈貺之長昭兮祝滿

箒而滿車

皖城劉猛將軍廟碑記

古者八蜡有猫虎與昆蟲所謂昆蟲卽食螟螣之  
物猶猫虎之食鼠豕也稽之載記如開元中貝州  
白鳥食蝗平州羣鵲食虻蚘蟲乾祐中開封鸛鶴  
食蝗見於西陽雜俎漢實錄諸書又金史載阿撒  
在定武山堂肆攷載蕭修在秦州元成宗在揚州  
皆有羣鳥食蝗之異而蛙能食蝗故禁捕載

欽定淵鑑類函說者謂江淮間俗祀青蛙卽祭昆蟲之謂  
矣雖然昆蟲固能食螟螣而所以能食者則非昆  
蟲之爲而神之有以使之也如猫如虎類非人力

所能驅遣矧無知如蛙鳥哉道光四年夏鳳郡蝗  
廬鳳道戴君聰鳳陽府程君懷璟督州縣捕之甫  
淨已而復起閏七月十二三日余偕藩臬諸君虔  
禱於省城劉猛將軍廟其時宿州之灰古堆蝗最  
甚知州蘇元璐集民夫往捕但見青蛙無數食蝗  
且盡又有鳥雀數萬名曰練朋鵲在懷遠西界食  
蝗均一日而盡旣得道府報因以其事入告

聖心欽感

御書神參秉畀四大字命臣澍恭製扁額懸之神廟先  
是神有祠在城東江岸雍正七年

敕建乾隆中方伯陳公步瀛重修因水嘴圯焉片瓦不存  
道光三年澍擇基改建於城東三里帥字墩之西  
前大江而後龍山左右倚層阜爲股肱至是仰蒙  
賜扁復擴而大之規制益備歲以正月十三日由藩司  
致祭冬至後三戊日撫臣率屬報賽蓋卽周禮蜡  
祭時也洪惟我

國家斟元陳樞太和翔洽偶有災眚旋即消殄至德  
之感孚無遠弗届而百神効命遂有莫之爲而爲  
者其在詩曰田祖有神秉畀炎火秉畀者人而歸  
之於神者明神能使也然則蛙鳥之來非神之爲

而誰爲

天章揭之彰彰明已足安可以無紀哉神名承忠吳川  
人元末授指揮使嘗飛劍驅蝗蝗飛境外元亡自  
沈於河因封今號見於降靈錄而怡菴雜錄謂宋  
江淮制置使劉琦因驅蝗理宗封爲揚威侯天曹  
猛將之神二說皆可徵伏查

大清會典主降靈錄故廟額但題劉猛將軍云

宿州劉猛將軍顯應科記

歲甲申夏鳳郡蝗捕之甫盡而徐屬銅蕭各境來者蠕蠕不絕宿州牧蘇元璐集民夫隨廬鳳道戴聰踰境撲捕適有報灰古堆蝗復起者亟率夫馳赴但見青蛙無數且哺且吐蝗則盡死又有烏雀日練朋鵲凡數萬在懷遠西界逐蝗一日俱盡此七月十四日事也其先日余方率同藩臬禱於劉猛驅蝗之神而靈應昭然不先不後若或使之旣得道府稟報因以其事據實入告得

旨嘉悅



御書扁額神參秉昇四大字

敕於省城神廟懸挂旣而蘇牧重新州祠亦請恭摹

御扁以昭神貺念是事本起宿州州之人仰觀

奎題益凜然於

聖天子宵旰憂勞無刻不以民生利病爲念吾儕小人  
其可不勉爲良善以答

昇平而承孚佑傳曰民和而後神降之福其在斯乎爰  
敬識數語以紀顛末以爲州人後祿之綏焉

重修安化縣學宮碑記

安化學校自宋熙寧五年置縣始地在伊溪之東  
寶祐乙卯以水患改建治西山麓南向迨明萬曆  
己丑守道安陽劉魯過此言左方空闕始改東向  
厥後屢有遷改其址仍舊至乾隆己巳邑紳士王  
崇禮鄧天人等復修而規制益宏庚戌辛亥間先  
君子督建南墪於學宮爲巽方文明之位石補青  
天干雲就日於是人文蒸蒸日上自樹以嘉慶壬  
戌叨登進士蒙

恩館選十數年間邑人士多起甲科爲名翰林文武鄉試

之歌鹿鳴賦鷹揚者尤于于然接隊而來也惟古者建學如百工之居肆相與致道非以爲梯榮之具也然三升選俊之法實寓於此因材而篤必於其地卜澗卜灑古之人何嘗不遷地思良哉吾邑學宮之建以東向爲最善無可議者惟自己巳至今七十餘年棟宇門櫺漸多摧落上雨旁風見之增慄道光二年壬午冬邑侯劉君星轅學博李君彝卿于君芝圃率邑士黃德沅陶必揚阮學易龍含章等集議重修經始於

大成殿以次及

崇聖祠次兩廡次泮池次

文昌閣尊經閣魁星閣次名宦鄉賢忠義節孝各祠  
次明倫堂考棚俱整而新之增設東西坐棚及東  
西學署崇文書院咸加葺飾越五年乙酉春歲事  
費省而工倍制廓而材堅煥然巋然粲乎盛已夫  
禮樂之地教化所興昔賢每以不獲雍容揖讓於  
其間至形之慨嘆而低徊不能已憶先子修埵時  
樹甫總角實隨之讀書學宮之側今覩斯盛也宮  
牆之望依然童子時心期牽於遠宦弗克執役事  
從諸君後其可無一言以紀爰次其顛末以券吾

邑之人文莘莘勿替云

婺源縣重修

文廟碑記

凡建學以造士也三代以上聖賢盛西北而集大成於我孔子及其衰也濂溪夫子起瀟湘道南諸賢繼之而集其成者朱子也婺源爲朱子故里沐其澤者駸駸與鄒魯比隆以故言學校於南方必以婺源爲稱首婺源之學在縣治西建葺屢矣道光丁亥復謀鼎新逮癸巳落成凡六年而後竣其工爲最鉅云余同年生施君彰婺人也介董事諸人以書來請曰吾邑之學名爲修實不啻勦也

大成殿之加崇以仞計其堂之加深以尋計構星門  
之加廣以咫計楹柱之加隆以圍計階屺之加寬  
以步計木則易疏而爲縝石則易礪而爲整丹漆  
則易黯而爲鮮凡所以奠聖人之居者無弗至也  
又自學而推之名宦祠舊在戟門之側非制則移  
與鄉賢忠義相次以昭祀典之正焉校官舍舊無  
牆垣湫隘卑陋弗宅於俊則高其閣崇其墉以重  
師儒之望焉學之後負山舊有天香亭與江西德  
興縣之鴉山遙對則爲之增高以攬其秀於遠焉  
學之前隔溪舊有雙堦以象文筆明季傾圮則爲

之重建以納其靈於近焉吾婺之應童子試者兼  
五邑之數向無試院每遇邑試卽於公堂之上賃  
坐衆雜而囂則買隙地建文場以光賓興儲俊選  
焉凡吾邑之經營締構如此其勤且久者無非爲  
人文助也乞爲文記之以昭來許余惟婺處萬山  
之中由岷陽而下蜿蜒數千里至是起率山爲建  
業姑蘇臨安諸省會之祖山山海經所謂三天子  
都也其水西流五百里至饒州出彭蠡與大江會  
地氣磅礴冠於江左故篤生大賢羽翼聖道而天  
下咸知有婺源之名歷年以來餘韻所漸猶蔚然



知重經學能文章以承朱子之後今諸君子復厚  
培其學修廢舉墜鼓舞士氣勿衰入是學者春秋  
釋菜之際高山仰止景行行止可以奮然而興矣

沅江縣尊經閣記

經者常也所以綱紀人道之始終而軌一世於和平者也初未嘗以爲典籍之稱自戴記有經解一篇言詩書易禮樂春秋之教而六經五經七經九經十三經之名由此起焉蓋嘗論之古之所謂經者致治之理也惟天下至誠能經綸天下之大經而凡爲天下國家皆不外九經之目若典籍則所以發明此理者也名之曰經而典籍中皆若有古人之守綱常名教之理遂以維乎萬世而不敝斯經之理實經之用宏而經之名亦於是乎尊矣秦

火而後知尊經自董仲舒始而茂陵表章之功實不可泯其後白虎鴻都之制皆知以經爲重故漢治渾渾猶爲近古自晉儒有擬經之僭而青牛白馬家說皆稱爲經經之名既不尊而政治因以大壞宋儒崛起經之旨乃昭然復揭諸白曰顧其時之君不能知或知之而不能用用之而不能盡斯亦未可謂能尊經者也我

朝

聖

聖相承精一之傳直接堯舜一切典章文物斟酌於唐

虞三代而用其中蓋宋儒所講求者至是乃成見  
諸施行矣是以政教之隆古莫與京而養士之具  
尤爲善美凡天下學宮皆有

列聖御製及

欽頒諸書例得建閣儲之以彰尊經之化而使夫草野青  
衿之士咸得仰窺

聖學之高深優柔焉以會乎古之所謂經綸而爲天下國  
家者經學之昌可爲極盛也已沅江之有尊經閣  
始於教諭駱孔僎與其學之賢者成之地據學宮  
之後

崇聖祠之前左偏制恢而高無潮溼之患由其中以  
望則衡麓之勝隱隱如席案之橫於前資江沅水  
環抱前後蘭芷之芳可擷而數也而洞庭一湖浩  
浩湯湯尤有學海文瀾之觀焉閣成於嘉慶八年  
未有記者今冬沅邑諸君子禮予商推志乘因以  
爲請蓋

聖朝所以嘉惠經生者厚矣吾儕躬逢

盛世日手一經可不顧名而思義乎願與諸君子共勉  
之

暨陽書院增置沙田記

江陰之有書院肇於元教諭蔡以忠初以澄江爲  
名自明迄我

朝遷建屢矣乾隆三十年學使滇南李公因培拓而  
大之改題曰暨陽書院閱今六十載復就頽廢生  
徒取充數道光三年湘潭周公系英以戶部侍郎  
來視學慨然思所以振興之捐廉倡葺復檢核濱  
江沙漲之田三千餘畝議購充經費遴委縣丞姚  
儲履畝勘丈未竣事周公卒於任余來蘇時屢諭  
王署令澧及姚丞以勉竟厥緒規程一切則致書

山長李先生兆洛俾衡定焉今秋姚丞以咨部畝  
冊至且述紳士意求紀顛末喜其事之克成也援  
筆記之兼以爲諸生勗日書院之議所以佐學校  
廣教澤也今直省州縣莫不有書院率多虛設未  
能有實濟乃江陰則以學使者所駐劄目擊心籌  
如前李公與周公皆肫然以諸生之業爲業而經  
之營之勞來之飲食之一時令丞因得以附益而  
玉成之夫豈以增益升斗博諸生感激之虛譽哉  
固將大有造於諸生也夫膏火不繼無以示獎勵  
未能養而言教司牧者之責也若獎勵之資已裕

而學之不進行之不修貿貿然惟膏火是驚則亦  
諸生之恥也昔陸子靜在白鹿洞講君子喻義章  
聽者流涕朱子以爲切中隱微深痼之病此誠學  
者所宜致思矣江陰在江以南爲文章節義之區  
如往時殉節守城以一典史爲之倡而庠士紳民  
同心蹈死至數萬人其忠義耿耿歷久猶生足以  
立頑而起懦余頃採芻議謂祀典尙有遺者復按  
軼事而表章之矧諸生生長

聖世沐浴涵濡其所志當更有進於此者觀李先生所  
定規程余尤爲諸生歆焉是舉也登高之呼實賴



周公蕭令瑾等議以發其端王令澆捐貲以亟其  
成奔走履勘則姚丞之力也其董事及洲畝息金  
歲入歲出之數另書於石

重修金沙書院碑記

天下之人才萃於

京師首善之太學而郡邑之人才鄉校所不能徧育者又輔之以書院書院之廢興人才之聚散因之卽一方之風化繫焉余自翰林出官蜀晉宦轍所至雖未敢遽謂能化民成俗而於勸學造士之道每兢兢藉爲先務乙酉夏自皖江移節蘇閬卽飭各守令經理書院以廣我

國家作人之化而金壇爲鎮郡屬邑人文之盛炳耀熙朝意其後先濟美必有今不異於古所云者丙戌秋

門人戴開文諭是邑以俸滿保薦來謁詢知金壇  
自乾隆乙巳勅修書院歲久傾圮士子幾無肄業  
之地因諭開文讀聖賢書凡職所當爲務盡心力  
况教官職司訓課董率士紳雖金沙舊無監院而  
修廢舉墜不得諉爲異人任也開文回任後卽與  
邑之孝廉馮調鼎等十餘人謀所以更新之邑令  
毛德輝捐廉爲倡士紳響應相與同心鳩工庀材  
自春徂秋完繕有未竟者署令周恭壽復竭力以  
亟其成其計用銀若干而齋堂煥然一新牆垣益  
堅以固矣適周署令因公來省乞言以刊諸石余

維書院之設非徒以爲名而已在乎守土者時與  
邑人士相見勸之以孝弟忠信迪之以禮樂詩書  
經明行修日新月盛比戶有絃歌之美青衿無佻  
達之譏斯風化成而治績茂焉周令旣蒞茲事宜  
定條教立課程偕學官進諸生宣

主上德意鼓勵人才俾知果行育德期至於聖賢之域  
將鄭孔之經疏韓歐之文章司馬文富之勲猷尙  
有未足爲諸生進者化民成俗之要其在斯乎願  
與多士共勉之

281-4

1917

2506

歐陽氏家廟記

坦齋侍御立廟以祀其祖而自爲文記祖之恢先  
緒敦善行慶流於後故得備楚茨之薦思深哉凡  
建國必有不祧之祖惟家亦然君子觀其子孫之  
盛衰可以知祖德之厚薄世固未有無積累而能  
蕃昌者也侍御表章前列烈孝慈之事盡矣善繼善  
述吾以券其後之人焉



陶文毅公全集卷三十四目錄

文集記

丹徒越閘金龍四大王廟碑記

鐵鈴關文星閣碑記

重修金陵朝天宮碑記

太湖廳濬鵬鶚諸河碑記

重修練湖黃金閘暨改建張官渡閘碑記

重建尹山橋記

重修石城橋記

貽慶橋碑記



小淹石路碑記

新城陳氏義倉記

雲臺山新建陶靖節先生祠堂記

耕樂堂記

雩山呂仙閣碑記

采石磯洗月軒記

題梅子嶺亭柱記

澧州唐氏女貞節記

鴻雪因緣圖記

文集記

丹徒越閘金龍四大王廟碑記

天下名山大川莫不有神焉以主之其靈之恍惚  
著見震耀人耳目者又以川神爲最上古江婁河  
伯邈矣宋以後乃有蕭公晏公諸神之目而金龍  
四大王胙蠻爲尤盛云考之傳記神姓謝氏名緒  
宋謝太后之族宋亡自沈於水明太祖之興神助  
順焉其封在景泰七年從徐有貞之請也因其居  
金龍山於兄弟行爲四故號曰金龍四大王初建  
廟於沙灣我

朝順治二年加號顯佑通濟建廟於宿遷縣乾隆二  
十二年又加號昭靈效順廣利安民建廟於徐州  
府而民間私立之廟所在皆是蓋王者順人心畏  
敬之同於禮有弗禁矣夫死於水而爲水神者前  
有元冥後有屈大夫元冥水官在祭法爲以死勤  
事其祀宜矣屈大夫則以宗臣戀國不忍決去懷  
沙自投後人憐而祀之初亦第私祀耳後遂列於  
常典惟其忠義之氣有不可消滅也今神以戚畹  
之故抗志沈淵與屈大夫之從彭咸其義惟均廟  
食之徧江淮不亦宜乎丹徒越閘之有神廟乃皖

人之容於此者所建其基購於鎮海菴僧並居民  
紀氏自嘉慶丙子始建神殿道光丙戌又增新樓  
及左右廊廡既煥既崇有嚴有翼皖之人經此必  
奉瓣香致敬焉夫神無乎不之况是閘旁爲運河  
江潮噓噏尤賴神憑相使冬春之際潮長不涸萬  
艘銜尾無阻淺之虞則

國家實蒙其利豈但爲皖人之福已哉孝廉姜昌壽  
潘政舉乞余言爲記爰舉神之所以得祀之由詔  
之俾揭於廟石庶商人佑客皆曉然於聰明正直  
之爲神其本實由於忠義而有所觀感云



鐵鈴關文星閣碑記

古者城以盛受故曰城郭有郭廓故曰郭其附近城郭而屹立鄉市者或爲堡或爲關古人設險守國之義也元至正三十二年倭入吳爲患有平江路總管萬戶宋通團練鄉勇於楓橋之濱築土壘石負旄帶鈴扞擷備禦吳人便之前明嘉靖三十二年倭患更熾巡撫御史尙維持知縣安謙復築是關上作雉堞以發矢奔置樓櫓以資守望有設鈴索風觸有聲此鐵鈴關之所自昉也昔陰陽家言關之形勢自滄野迤邐而來支礪天平列其西

筆格楞伽聳其南高挹羣巒俯臨楓水實爲闔境之咽喉諸山之屏嶂康熙年間里紳蔣太史恭棐徐探花葆光請於郡守陳恪勤公諱鵬年者構文星閣於關之巔顏其眉曰雲漢天章陳公吾郡湘潭人也著有政績崇祀賢良厥後乾隆二十七年里人鳩工繕葺關閣一新丙戌己丑辛卯榜吳人聯掇大魁鼎第鵲起甲於天下而商賈之雲集市鬪者遂分貨別殷殷軫軫形家衰旺之說似亦不爲無助奈日久傾陔高關無存失今不治後必有以此關不修爲慨者且關固嚮者用武之地也我

朝海寓統壹中外又安又何事關爲控制予撫吳數  
載竊幸此邦俗厚風淳公暇與鄉之賢士大夫游  
邦人有以建閣爲余言者仍置閣於其上供梓潼  
神龕偃武興文之意將於是乎在爰偕梁茵林方  
伯衍雲衢廉訪率僚屬履勘基址分俸重修而紳  
士商民協力以蠲輸爲樂計垣之崇三丈六尺有  
奇周十三丈有奇閣之高又得丈六尺有奇向出  
乾巽悉從其舊夫有舉莫廢禮也矧全郡形勝之  
所繫運會之所關哉徵諸往昔驗諸將來吾知擢  
高科膺膺仕問里富庶當必有倍蓰於前之所爲



者此守土之責亦居是邦所延所企踵而鼓舞不  
已者也是役也經始於道光九年七月落成於是  
冬十二月共費四千餘金莅其事者蘇州知府王  
有慶及吳縣令熊傳栗守備張瑞堂而吾師石琢  
堂先生韓桂齡尙書吳棣華京卿尤春樊舍人寶  
首其議暨紳士徐華嶽周孝壘周聘餘趙文麟莊  
東發宋清壽許益蔡裕高誠皆有力焉因備記之

重修金陵朝天宮碑記

金陵之有朝天宮當古冶城之麓於宋爲祥符宮  
天慶觀於元爲元妙觀永壽宮至明賜今名其正  
殿曰三清殿曰大通明殿最後曰萬壽亭別館外  
周重扉峻啟辟蠶時舉聲臭斯通蓋周禮昊天  
帝之祀緯書謂之北辰耀魄寶其尊在五帝上道  
家稱曰玉皇卽耀魄寶之義宋眞宗時始爲宮觀  
以祀沿至於今薦嘉祉肅靈承爲民祈福悉於是  
焉

國家懷柔百神祝釐弗黷宮名殿制悉仍厥初歷年

滋久堂廡彫剝梁桷傾欹有風上雨侵及神居袞  
冕露立鑿觀有憊而比歲不登未遑葺治惟雩禱  
旱澇間一再至靈應不忒嘉貺聿昭癸巳之歲前  
江寧方伯今少司寇趙公始集議經營以作新見  
咨撫軍林公以次僉謂曰宜乃率僚屬割俸以俵  
前兩淮都轉婺源王君鳳生前山西太原守上元  
沈君琮等實襄厥事鳩工庀材以畚以築以塗以  
丹六殿具修四配咸建長廊曲注飛閣遙騫鼓鐘  
聲聞

御碑穹峙凡費白金八千有奇不藉度支不勞民力自癸

巳十月經始落成於甲午八月之吉制備於前財  
資於官事董於縉紳之長德工既告葳歲則大熟  
吏民謂余建節茲土始終其成不可無言爰刻樂  
石用昭對越以迓我

國家億萬年無疆之麻



太湖廳濬鵬鶚諸河碑記

天下之水利莫大於江南太湖又江南之利之大者也其洩而注海之道曰吳淞曰瀏河曰黃浦而洞庭東西山支河別港隨地得名者則有三十六浦旱潦於是乎備衣食於是乎生財賦於是乎出故江南之言水利必先治太湖治太湖不惟治其下流之吳淞瀏河黃浦而已其支河別港亦必次第治之而後小水治而大水益治道光七年余既奏請疏濬吳淞爲吳民百世之利而滙水劉君鴻翱來爲太湖同知同知治在洞庭東山之下有鵬

鵝河黃洋灣由內港以達蘇州之要道也有大缺  
口白浮頭西北諸湖下達南湖之咽喉也有南北  
望河分湖水以灌吳瀆油車諸港者也東山衣冠  
殷盛物產阜蕃往時居民交易有無於蘇道鵝鴨  
河甚便歲久而淤改由外湖涉風濤四十餘里人  
病其險嘉慶之季年善化羅君琦爲同知嘗一浚  
焉以費不繼而輟劉君至則稽成謨詢衆欲相濬  
寫慮淫漑計楫留量畚掘自十年正月賦工至閏  
四月之末畢役總隄長五千七百有四丈用石千  
七百五十四方土七萬四千六百四十五方並椿

木屨灰工食雜費爲銀萬五千一百餘兩皆出之  
義捐不以藉於度支工竣余往視乘小舟周歷上  
下登莫釐峯望全湖烟水無際夜宿翠峯寺之古  
雪居濤聲隱隱落枕上與松聲竹聲澗水聲相應  
荅瀟然如入華胥之境晨起踏諸隄縈紆若帶輕  
舠往復無顛越虞然猶未見其利也明年吳楚數  
千里大澇余已移督金陵而自蘇松來者皆言水  
大於道光三年且數尺三年之災吳人至今心悸  
而是歲顧不知災蓋太湖者宣歙茗雪諸水之總  
滙其宣泄疏暢全在支河別港而管葑泥淖黏附



壅積細民狃於小利率占以爲田故三十六浦存者無幾湖身日益高面日益淺上游水稍盛卽漲溢爲數郡患三年之患坐此今水有加而民不病則因疏諸河以繼吳淞之後故得免於昏墊也余旣列君名登之薦牘並以好義紳士徐學異葉長福葉運鵬劉運綦等名請叙得

旨報可君旋擢淮安守再擢福建臺灣道陳臬秦中去太湖數年矣百姓猶相與誦其功繼君任者爲居巢劉大烈因百姓請來乞余文紀不以縷叙始末以告後之牧於斯者

重修練湖黃金閘暨改建張官渡閘碑記

舉江浙兩省二百數十萬之漕濟之以一衣帶之水而又據最高之地當方澗之時無他水可挹徒借江湖潮一不至卽船膠於陸萬夫牽挽行日以尺寸計使者火符絡繹有司戴星奔走而汗流幸而濟泥與潮俱歲一濬五歲又大濬而隄日益高土不能遠運就隄塗附不移時還復爲灘膠如故此今日徒陽之運道情形也可不爲之長慮而深計哉丹陽練湖本曲阿後湖晉陳敏遇馬陵溪引長驪諸山八十四汊之水以溉雲陽者也自唐齊

澣鑿京口路通江而租庸轉運悉由此練湖之水  
遂更爲漕利每湖中洩水一寸卽爲運河一尺歷  
代以來盜決侵耕之禁甚嚴無如近湖之民往往  
盜湖爲田當劉晏築隄橫截之時湖已有上下之  
分迨上湖盡改民田而下湖蓄水益無多矣有田  
之民遇盛漲輒決之使入運河北漕至已無水可  
洩而黃金閘者分上湖之流由范家溝入運河尤  
咽喉所繫今廢爲土埂夏啟冬閉濟運之說爲虛  
練湖遂歸於無用嘉慶二十一年春余以視漕南來  
曾奏請建閘修湖議者難之僅於丹陽治北二十

五里之黃泥壩建閘蓋因明史言黃泥壩舊有閘  
太常少卿姜存禮嘗請修復故泥其說謂可資瀦  
洩耳不知黃泥壩下之水導源於黃金閘上之莊  
前河不治其源則其流不裕而黃泥壩北高南下  
練湖由范家溝入運在黃泥壩之南設閘於此則  
水益趨下安能迴瀾以濟上游之急是未明於地  
勢而顛倒位置者也蓋其時練湖之廢久矣一望  
荒煙蔓草憚於修濬黃泥閘之建不過稍以節江  
湖之直下而已初未計及於練湖之能濟運也道  
光五年余自皖持節撫吳迄今五載每遇挑河之

役必親自臨莅往來徒陽間籌度者數矣竊以爲  
濟運之策莫如修練湖而修練湖之益必自黃金  
閘始俾收洩有資馬陵水來不致從范家溝直瀉  
入運而湖水之源裕矣以次移建黃金閘於切近  
湖唇處使湖水開放後足資擊託而運河之水可  
以迴濟上游矣因於奏事之便陳利病欽奉

殊<sup>命</sup>安籌經久之策適值上年回空阻淺乃築土壩於  
黃泥閘之下游而掘黃金廢閘土埂以放練湖之  
水漕果大暢河水長至二尺或一尺數寸湖水才  
消二寸六分耳然後歎前人所云洵非虛語而有

戒法而不知用之大可惜也商諸節相襄平蔣公  
僉謀偕請得

旨俞允以鎮江趙守光祿董其事復黃金閘於舊陞丹  
徒吳令浚任之徙黃泥閘於稍南五里之張官渡  
丹陽朱令清耀任之方伯梁君時往督視焉起工  
於三月十五日告成於六月十七日既堅既緻有  
翼有嚴徒陽之累自今庶稍有孚乎至於練湖地  
勢正以居高得臨下之宜祇須加埭不在多濬而  
湖之東岸每遇大挑之年積土已高惟南岸宜加  
築耳西北二面則侵盜之禁宜嚴也其張官渡以

下之南薰宮城各開亦蓄洩所必事並志之以俟

後舉

重建尹山橋記

吳中古澤國支浜汊港十縱九橫闡堰而外津梁  
爲亟自蘇城出葑門南行十八里屹然虹起者則  
尹山橋也其地上承太湖之水下達吳淞瀏河分  
逮黃浦名爲山實無山蓋東西水道之咽喉也而  
運河橫穿其間自秦皇道會稽始開鑿漢武時復  
加濬以通閩越貢賦舟航往來居南北之衝其橋  
跨運河爲之高出檣帆之上工力尤鉅明天順六  
年巡撫萬安劉公督屬所建道光三年大潦圯焉  
漕艘梗流宵涉告病五年秋余自皖奉



命移蘇督辦海運往返其間慨然在念明年夏海運告竣計節省各費尙有餘與藩司賀君長齡議以補城工水利之用因檄元和何令復建斯橋七年三月興工九月落成東西長二十二丈有奇高四丈有二尺廣如其高三之一趾兩岸而洞其中翼以扶欄舍舟而徒視舊孔新陸輦波馳莫不成利何令請文以記惟春秋之義土木役雖細必書重民力也矧力不擾於民財不困於官籌度支之餘贏從容以圖利民之事用宣

朝廷德意於無窮詎非從政之大幸方將推廣次第

灑沈澹菑以大利東南之民而茲其嚆矢也爰刻  
於石以紀之

隋文帝集

卷三十四

十三

2536

281-5

重修石城橋記

邑西十里有橋曰石城正德中家七世族祖修武  
令石城公所建舊有木橋在稍東數十步石城公  
始移置今處而易以石其後圯於水毀東岸石墩  
里人因架木其上以度萬曆甲寅乙卯間復整以  
石邑令楊君以傑爲記稱橋名石城其創始靡得  
而考彼時距石城公始修之時且八九十年矣石  
而旣易以木木而旋易以石變遷旣屢傳聞無徵  
其竟昧創始之爲石城公也亦事有必至無足怪  
者嘉慶辛酉夏大水山谿暴漲斯橋復圯並圯西

岸石墩則石城公始修之碑魄然藏其中然後知  
橋名洵非無自而楊記之失於考據也歲癸亥邑  
人以橋臨孔道謀修之白其議於邑侯陳君陳君  
可其議而鄉之人亦皆踴躍從事毅然以復石城  
之舊旣乃樹碑橋右刊樂捐姓名其上而問記於  
余余惟水涸成梁王政所重賢令尹納溝念切不  
以其事無關考成而必首爲之倡此邑之福也至  
於捐貲成美服賢令尹之教伐石鳩工成以不日  
則吾邑人之好義有足多者語云莫爲之先雖美  
弗彰莫爲之後雖盛弗傳石城之蹟幾湮矣得諸

君而其名賴以不朽余知心怡而神泐者當不獨  
淫淫與與往來病涉之民已也

三十三

五

貽慶橋碑記

古者有梁而無橋毛詩在彼淇梁造舟爲梁爾雅  
梁莫大於渙梁孟子十二月輿梁成皆不以橋名  
其以橋名者率非今之橋如史記禹山行乘橋則  
直轅車也尙書發鉅橋之粟則儲粟倉也士昏禮  
笄加於橋則橫格架也戴記奉席如橋衡則井上  
桔槔也其以梁爲橋自秦昭王五十年初作河橋  
始蓋卽今之浮橋以木爲之非石也故其字偏有  
從木卽史記所言豫讓伏於橋下亦祇是木橋惟  
爾雅石杠爲倚注石橋也集韻杠通作杠聚石爲



步渡水也既曰聚石爲步則非今之架石水上作  
弓虹半月形者比齊地記載始皇作石橋欲渡海  
觀日出處其語荒誕亦非實事然則架石爲橋其  
起於秦以後乎余里小淹之東曰南牛洞其水從  
石峯山溯騰而下皆石也凡數里噴薄相陶以注  
於茱萸江江之岸又石也簣以土則齧朽以木則  
頽行者危之里人楊君公弼始橋之以石往來稱  
便乾隆癸巳圯於水修之者其嗣允升先生也嘉  
慶丙寅復圯於水修之者其孫某某等也余惟斷  
潢絕港咫尺天塹是以成周有司險之官以通川

澤之阻至於易梁爲橋支橋以石堅而可久後世  
之利固有良於先王之世者矣而猶不免屢圯於  
水是則缺陷所留有非一手足之烈也而楊氏子  
孫獨毅然肩其勞再三修之不少怠其可謂難也  
已昔先君子嘗名此橋曰貽慶蓋取文言積善  
餘慶之意也賢哉楊氏不棄其先善貽厥後余故  
樂爲道之以爲鄉里好義者勸

三十三

丁

小淹石路碑記

濱茱萸江皆山峽也其水自綏寧路山發源行一  
千三百里至安化之小淹匯爲石門潭壁立萬仞  
土人謂爲石龍渡江者也其南岸曰城牆崖尤峭  
峻行者危之而小淹地當衝要有市集行旅往來  
與夫繚纜而上者賡續不絕實爲必問之途里中  
父老每思治理顧以力微五丁功非一木未克舉  
事丁卯夏月余伯父羨周公暨同志諸君子銳意  
任之自城牆崖上距淹市計路四里有奇險者夷  
阻者通其泥窪低陷之處則甃之以石俾堅固而

平所謂道如砥直如矢者洵足以當之從此山确  
既闢水齧無虞可以永慶康衢而履之坦坦矣工  
既竣遂命余記之而以好義諸姓名泐之貞砥云

新城陳氏義倉記

新城陳太史石上以其先大夫約堂先生所置義倉記示余凡九通先生自記者五魯君仕驥記者三袁君守定記者一其倉在新城之十二都者曰豐裕穀五百石在十五都者曰妙濟穀百石曰永濟穀二百石在十六都者曰同仁穀四百石在十七都者曰綏和穀三百石在十八都者曰和義曰協和穀三百石在十九都者曰永裕穀千石在五十一都者曰義積穀二百石凡三千石皆先生成之其在豐城者費二千金則袁君名之爲廣廣仁

莊者也先生爲義若嗜欲家貲不過中人爲其子  
析箸時負債且萬金或語以姑取諸倉穀而徐復  
之先生拂然斥其人且矢其子孫其敦於爲善如  
此惟古者常平義倉之設皆以待閭閻之歉其卒  
也官吏乾沒而取償於百姓凶荒頻告未見有開  
廩而賑者也社會傾於民矣然貸則易逋散則難  
繼卽佐以平糶而強猾者詭名以多取巽悞者被  
擠而無升斗之獲則又難均而易囂斯數者皆非  
法之未良而得人之難也觀先生所以澤其鄉里  
者如此而又規畫盡善雖其子孫不得預可不謂

賢矣乎世之有養民之責者聞先生之風其亦可  
以愧勵矣先生諱守詒曾官兵部爲武選司員外  
郎



新編 漢書 卷之三十三

三

雲臺山新建陶靖節先生祠堂記

海州雲臺山古都州水經注云東海朐縣東北海中  
有大洲謂之郁洲靖節先生飲酒詩在昔曾遠  
游直至東海隅卽其地也先生嘗爲鎮軍參軍有  
經曲阿詩在庚子之前當爲隆安三年己亥其時  
孫恩起海上寇吳會及丹徒廣陵郁州間劉牢之  
以鎮北將軍鎮京口遣參軍劉裕及其子敬宣連  
擊之先生同時入幕爲參佐時事方殷其往來海  
上所必有也惟自己亥後先生自都還游斜川宿  
途中據程氏妹祭文則辛丑七月在江陵聞訃不

復至京口不知東海之游又在何時然詩中所叙如道路迥且長風波阻中途非涉歷者不知則意者牢之夙擅智畧知此山深阻四面距海慮賊航海據之或先事規往或聞警差探不必定在舟師同往也而其後孫恩果竄郁洲執高雅之卒爲劉裕大破之於此賊勢遂衰是亦未必非先事之籌度也惟先生從軍司書檄本爲貧仕無意與儕輩爭功名故曰此行爲飢驅然裕非人臣牢之晚節不終蓋早已窺見其微故又曰恐此非名計息駕歸閒居也昔東坡讀述史九章曰去之五百年吾

猶見其人也讀先生此詩不可慨然想見其志乎  
惜海隅之人無知先生此游者惟東坡和陶云我  
昔登朐山出日觀蒼涼欲濟東海縣恨無石橋梁  
其有慕於先生之游乎道光壬辰余以齎事來海  
州登雲臺陟金牛清風二頂望海作詩屬而和者  
數百人迨甲午復以奉

命巡閱至東海營歷覽東磊漁灣田橫高公諸島海天  
萬里水波不興令人有脫屣三山之意已而入宿  
城憩法起巖壑幽深爭流競秀野花琪草蔚於雲  
際時鳥發聲出林間與潺潺懸泉相響應而山田

又甚渥無水旱憂其民淳古或老死不至城市真  
別有天地非人間者明年入覲

上詢及海州帶刀佩劍之風謹對以

德教所漸雞犬桑麻海溼清宴因及巡閱所見雲臺山

後一帶景概

天容有睟謂此境與桃花源何異歸而述之海州人士

咸踴躍奮興感念

聖天子覆幬之

恩光及海表且以知靖節先生之文備在

甲覽而其遠游賦詩之地更不可以無紀也因相度法

起寺之左而建祠焉凡爲屋若干間並捐貲置田若干畝以爲春秋祭祀及歲修守祠人之餼斯東海一曠典也山川草木皆起榮光而欣

聖化靖節先生有知當亦快然於黃農之宛在

盛世而桃源不必求之武陵矣謹命筆記之而以末學所爲先生參軍辨者附錄於後云

日本書紀卷之二十一

三三

耕樂堂記

四民仰給於農而農非牛不耕賊牛是賊農也而  
愚民瞽焉何哉昔者程子與客論爲政先生憮然  
曰小人之無行也牛壯用其力老則屠之客曰不  
得不然也牛老不可用屠之猶得半牛之價復稱  
貸以易壯者不爾則廢耕矣先生曰爾言知計利  
而不知義者也爲政之本莫大乎使民興行善俗  
而衣食不足者未之有也水旱螟蟲皆不善之所  
致也大儒之言可謂深切著明矣顧水旱螟蟲之  
災猶遠而難明也至於因宰致竊其害尤切近可



觀朝犁於田夕饗于俎山欄野牧其能刻爲牛防  
乎而無賴之徒或且假迎神賽會爲由恣意椎剝  
巧避私宰之名公行牟利之計是其狙詐更甚於  
盜竊而耕者之大患矣益陽律臣胡先生觀其事  
而憫之與其里之賢者請於邑令而禁之復偕其  
弟牧堂捐基構屋於十九里之嚴家河歲時集父  
老講明約束而榜其堂曰耕樂蓋謂宰熄則盜熄  
而耕者可安其業也夫禮諸侯無故不殺牛大夫  
以下其有故亦不得殺可知也今

制惟

壇

廟大祀用太牢其餘或少牢或特豚是雖

天子有事亦不盡用牛也蠢茲鄉愚敢肆僭越斯

國法所必懲者也况又嫁其名於祭賽使神明受淫  
祀之誣而彼乃享其利馴致牛酒嘯聚其流弊殆  
有不止於盜竊者余年來待漏科垣屢欲言諸

聖主之前請重其法顧念私宰之禁律非不嚴苟不得  
其人徒滋騷擾何益今觀先生之所爲乃歎修土  
爲善於鄉其效有捷於官府之條教者使鄉里間  
咸能效法而推廣之將程子所謂民善俗而衣食

自足者卽以爲王道始基之驗可矣豈惟耕者之  
樂云乎哉余辱與先生之嗣雲閣甘園交獲聞其  
詳因爲記之以諭好義者

雩山呂仙閣碑記

仙之名始見莊子燕昭秦始皇以還其說大行劉子  
政因之作列仙傳至溯源於師皇赤松顧三代秦  
漢之仙後世渺無存者豈仙之自壽亦僅能數千  
百年而終歸於無何有之鄉耶唐以後盛稱八仙  
而八仙之中尤莫盛於純陽呂祖時時露跡人間  
其靈爽所在皆是我

朝

敕加封號列於祀典薄海內外罔不崇奉而衆仙不敢  
望焉蓋衆仙之爲仙也自度而不度世仙而不佛

自治而不治人仙而不神惟純陽脫屣塵劫翱翔  
青冥而不忘乎警世實合佛與神而一之固宜其  
獨步丹梯而非衆仙之所能及矣丹徒之東三十  
里有雩山俗名高皇山劉季奴發跡之所也泉甘  
而木茂宜爲仙眞之所棲止王九峯建呂祖閣於  
其麓而求余爲記九峯以醫名大江南北公卿倒  
屣相延致者數十年嘉慶丁卯曾募建文昌關聖  
廟於此其時制府治亭鐵公釀金以助且爲之記  
今九峯老矣又任是役其活人之心質諸神而彌  
篤有如是也是山之頂東瀟練湖北瞰大江西揖

石舟南俯大犢句曲諸名勝他日訪九峯當一陟  
其上作臨虛御風之想岳陽樓上仙人庶幾乎遇  
之



采石磯洗月軒記

大江自當塗而東洲渚漸多翠螺亭亭然立采石  
磯上引首西向不知吞雲夢者幾許余嘗過其下  
泊舟登太白樓徘徊瞻眺想見謫仙人昔日同崔  
宗之乘風泛舟其風流宛在目前因集舊句一聯  
大書於樓云偶呼明月問千古恰對青山似故人  
時同遊爲張生寶榮嘗承余言重修青山太白祠  
墓者已乃乘輿登絕頂南望望夫山山頭風雨如  
聞語應北望慈姥簫幹所生知王子淵賦語不虛  
東望牛渚則袁宏謝尚月夜諷詠相遇運船之所



與太白泛舟故事先後輝映何古人賞月獨宜於  
此地耶張生因指其下曰是生讀書處軒名洗月  
願得一言爲法且使續故事於前人余曰生寓書  
於月可謂善言月者哉夫月隨波上下冉冉騰騰  
天空氣爽萬里一碧此目中之月人人有之若乃  
濯冰壺流玉液炯靈臺兮四照證慧業於前身吾  
心有月非探根躡窟者不能知其妙也故夫自朔  
至望三五而盈日新又新如盤之浴此進者機也  
澡身之君子以之自望至晦三五而縮知自守黑  
如關之扃此退者密也洗心之君子以之惟君子

能以退爲進故虛受而明自生能以進爲退故守  
約而照不疲山之峙也川之流也形上形下無非  
是者洗月之義非卽讀書之法乎袁謝諸人固不  
足以語此卽太白眼高四海筆落千秋於此義尙  
隔數塵生其勉之

附ノ考ノ白集

卷三十四

三

題梅子嶺亭柱記

余外祖家於河曲之尾黃蓮山之陰宅下里許曰  
梅子嶺卽黃蓮山之麓舊有古梅樹故名嶺高不  
過一里溪流環之澑澑有聲達於山坳仰視黃蓮  
山巍然而尊以嶺承之如冕之有旒也其顛有小  
亭設茗竈以餉行路之渴者下嶺而南濱溪行逕  
達茱萸江溯而西抵余之居凡二十里 先君子  
嘗言往時省外舅方讀禮記途中喃喃默誦至梅  
子嶺而全部爲之一周其勤苦自律如此又小憩  
亭上作詩有藍橋杏酪人何在獨立東風日欲斜

之句蓋以悼先妣黃安人也幼時每隨侍往外家皆必由此昔人車過腹痛情有難已况罔極之恩哉悲愴之餘聊志以詩亦哀哀之告也詩曰山經梅子路陂陀一度酸心一度過不盡望雲雙眼淚一時和雨黯衣多

澧州唐氏女貞節記

唐氏女澧州人父曰錫桐母黎氏幼許字州學生  
雷開寅之子承恭承恭年十七沒於水乾隆癸丑  
八月也先是女夢日色欲暮而皓月亭亭出於波  
際方徘徊瞻望忽墜其左耳又夢承恭來與語若  
有悲意次日訃至女披髮號泣奔喪家人止之不  
可乃載以往及至呼搶投地氣絕者數四遂欲成  
服舅姑憐其幼弗許也女泣曰所以來者爲亡人  
一杯麥飯計耳不然獨不可母家老哉舅姑終憐  
其幼令女之父母諭意女怒曰奈何以女許人死

而背之令作無嗣鬼耶若必欲相強女惟一死謝耳遂止不歸方承恭沒時兄承寬之次子存愷生甫一歲舅姑察女意堅乃立以爲嗣女哺養辛瘁寒暑之災夜或十數起稍長授之書慈嚴交濟居平幽靜自持足跡罕至戶外家人亦敬其操而愛其德待之有加禮焉女年十七稱未亡人今四十有五矣其夫之昆弟孝廉承厚等從余游故余得知其詳而州人所傳乃謂女晨起梳沐見其夫影鏡中驚告其母少頃聞訃其語頗怪余以問承厚乃云得之外人此蓋重女之節者欲神其事以張

之而不知其近於誣也夫忠孝節義足以感動天地鬼神是以其事往往有出於恒情之外者方承恭凶問未至而女已夢中見之不可謂非精誠之感通有以示之兆也而究之節烈之性由於天定即使妖夢未形亦必矢死靡他以自行其心之所安而何俟於語怪也哉近歲吾邑有吳氏晚秀者許字王氏子中發未嫁而中發死欲奔喪不得則爲位而哭其父母大怒以爲不祥女哭益慟則父母詬益厲女知必奪其節遂縊而死而夫靈位身衰絰也時先君子以纂輯邑志入城聞之泣告



於令令亦泣旁坐者皆泣因使人詢其家其父母益怒標使者出諸門謂女縊鬼未嫁而喪安用節烈爲於是乃據其夫家狀詳請

旌典復以無貲格於司吏先君子病革時語及猶爲流涕澍奉諱歸里之次年言其事於史柘溪方伯方伯惻然疊飭具狀歲丁卯乃得彙題被

旌夫唐氏女與吳氏女其心一也吳氏女不幸不遇賢父母不能遂其志而至於死唐氏女雖不幸兩其舅姑父母卒能委曲以聽而爲其夫全已斷之縶則不幸而猶有甚幸者書之又以慶女之遭也

鴻雪因緣圖記

鴻雪因緣者陶子紀其游跡所至擇其山水之尤  
佳者繪以爲圖取東坡飛鴻踏雪泥之語而名之  
者也陶子生長資江之濱其山大屏樺香石峯香  
爐紫雲芙蓉烏雲稍西神山梅山稍東九岡浮邱  
其水茱萸石潭善溪伊水與夫上游之七十二灘  
下游之二十四港皆歸崑崙磅礴湍洄清冷實宇宙  
之奧區冠蓋所不至紅塵所不入陶子少賤牧於  
斯樵於斯漁於斯且耕且讀其跡較多故別爲之

圖稍長官

京師金馬玉堂黃門內掖其地

瀛臺瓊島玉泉湯池與夫黃金白玉之堂階翔鳳儀  
鸞之

宮殿陶子則簪毫曳履乘驄走馬於其間歷有年歲  
亦別爲之圖茲之所圖鴻雪云者則其宦游所至  
偶爾登臨以關河閱歷之因爲豁曾曠志之緣者  
也昔孔子亟稱於水登東山小魯登泰山小天下  
智仁之樂所由來遠矣司馬子長生長龍門世掌  
金匱石室之藏自其訪崆峒浮沅湘上會稽而文  
始奇餘如謝康樂張燕公柳子厚諸人皆以山川

之勝增長其文章至於通人志士俯仰高深開目  
洞心恢廣志氣又有進乎此者陶子年十二始浮  
資入湘就試於有司逾冠偕計北上泛洞庭過江  
漢渡淮黃歷韓魏幽燕之域三十歲後使蜀巡按  
江南往來秦齊鄒魯之郊年四十二備兵川東旋  
臬於晉藩於皖年四十六開府上江旋移姑蘇逮  
歲戊子齒正五十而斯圖成凡八十有二通計此  
四十年中於海觀其一於湖觀其二於江漢於淮  
皆窮源而竟其委於五岳則登岱望華遙揖恒嵩  
惟衡在桑梓尙未一覩而於禹貢之九州則足跡

皆已及之不止於身行萬里半天下矣叨荷

聖因

主眷馳驅所至無遠弗届因得以耳目所遇盪滌其心  
胸而才識駑鈍迄鮮開通比諸昔人有勝具而無  
勝情第以之紀行脚充包纏可矣續有所獲擬依  
次圖之浮屠三宿桑下則有餘戀茲雖一鴻爪乎  
然泥印猶存以是因緣常得無盡藏山水云

陶文毅公全集卷三十五目錄

文集序

海運全案序

江南催耕課稻編序

安徽通志序

懷寧縣志序

宿弭志序

庚午科四川鄉試錄序

補行辛卯

恩科江南武鄉試錄序

補行辛卯正科江南武鄉試錄序

甲午科江南武鄉試錄序

乙未

恩科江南武鄉試錄序

洞庭湖志序

京師悅生堂總簿序

渝城體仁堂新刻總簿序

渝城養濟院捐冊序

渝城育嬰堂捐冊序

皖城育嬰堂勸捐簿序

文集序

海運全案序

國家定鼎宅燕歲漕東南米四百餘萬石供億

京師蓋因前代會通河之舊南起江北達通州而咽

喉於淮黃交匯之清口康熙嘉慶年間屢以河患

議海運未果道光四年冬大風壞高堰清口澀明

年漕滯

詔羣臣議海運協辦大學士英和連疏陳其利六月

諭旨令覆議甫接任卽拜摺請海河分運時督

琦善



白山東奉

簡命至亦主海運議並得

旨報可七月

臣

澍因公至海上召集長年三老宣播

皇仁與約期冬歸受兌新漕八月布政使

臣

賀長齡復

往議定水腳雇值及剝兌一切章程六年春正月

沙船攢泊黃浦

臣

澍自省馳往率同大小文武相

機督辦其天津收米則尙書

臣

穆彰阿倉場侍郎

臣百春

臣

申啟賢同各員夙夜將事逮六月上旬

而起運告竣計海船一千五百六十三號裝兌蘇

藩司所屬四府一州額漕正耗米一百六十二萬

三千餘石由吳淞出崇明柰山北放大洋趨成山  
轉之采以達天津水程四千餘里往返兩次不爽  
時日屢遇風暴履險如夷間有鬆艙拋失耗米爲  
數共止八百餘石不及全運米千分之一至於正  
額顆粒無損因思古來海運如禹貢碣石入河秦  
起黃腫輓遼左乃在瀛滄登萊境內對渡關東道  
里無多唐宋偶一餽運其數更微故史不載明初  
張赫等初運三十萬最多至七十萬永樂中陳瑄  
始建倉於直沽亦止以百萬爲名其後沈廷揚自  
灌河口開洋七日抵天津一時詫爲異事其實經

營已閱年餘所運二萬六千石而已卽元代海運  
最久其初運亦僅四萬三千石行之七八年猶祇  
運米數十萬漂失動以萬計從未有初次試行卽  
裝米一百六十餘萬石自始至終不溺一入不損  
額漕一稊米如今茲所運者仰惟

聖人在位海若馮夷莫不効職而瀛民蜚客生長承平  
習於沙線操駕日精昔之望洋興歎以爲波濤不  
測者久已視爲坦途揚帆直上無礁崖之齒萃無  
港汊之彎環轉較諸內河爲易議者每謂河運費  
財海運費人由今觀之海運果費人否耶然則費

財之說舍海運亦奚以易之蘇松數府州漕額甲天下而丁船經行內河提溜挽閘剝淺般壩與夫押運交兌贖驗之費多不能省丁疲索之官官復問之民民力憊矣而官與丁亦敝使蘇屬海運遂行歲省費不啻十之四五東南民力庶有鳩乎若夫難海運者曰盜賊曰潮溼曰侵蝕實皆無可慮但患南兌易而北卸難章程不可不豫耳是役也始於集議定計成於招商雇船繼以籌費兌米終於交卸收驗以及水師之會哨委員之設局貨物之免稅餘米之收買商埠之犒勵旂丁之安置頭

緒穰繁不容無紀爰彙始事以來

詔諭章疏及咨移稟議爲海運全案若干卷以敘一時之事備將來考擇而程途之經涉船式之修造風汛之趨避亦策海者所有事也故爲圖附焉至於南北同心大小共力咸稟

聖謨執事有恪喜起之象於斯可徵則又不獨爲海運一事煒也

江南催耕課稻編序

周官職方氏揚州之穀宜稻稻人掌稼下地稻固  
東南澤穀也其類繁多悉數之不能終其物要不  
越種稉種稗四種毛氏傳曰先種曰植後種曰稗  
鄭司農云先種後熟曰種後種先熟曰稉蓋物性  
各殊有不可以天時地氣一律求者故月令七月  
以犬嘗稻豳風則於十月穫稻遲速相距中踰一  
時兼以執冬之雨不能謂夏無旱執春之陽不能  
謂秋無水故必多其種植以備不虞若左太沖所  
賦國稅再熟之稻尤吳中穀植之彰彰甚著者也

頻歲以來江湖泛漲因雨水告災者屢矣惟蘇松  
常太等屬以吳淞江挑濬深通得免於沈菑乃癸  
巳秋杪稻將熟矣忽雨雪交加旣實而空歲以大  
歉冬田積水不能種麥民皆艱食此則非江滿淤  
塞所致亦非雨雪之不宜於冬令實由築場納稼  
已愆於幽風月令之期也余旣與少穆中丞據實  
入告得

旨緩賦並設法勸捐賑濟大濬瀏河白茆以工代賑民  
始忻忻然獲拯於饑溺以俟麥秋之至然推原受  
傷之故則以吳民終歲樹藝一麥一稻麥畢刈田

始除秧於夏秀於秋及冬乃獲故常有雨雪之患  
一不熟卽無可接濟計莫如易麥而爲早稻其兼  
收則大善不幸不得其兩猶得其一焉於是中丞  
於官廨後爲田畝令老農種早稻以爲之倡而蘭  
卿觀察方權臬事手輯催耕課稻編凡早稻之種  
早稻之時早稻之法悉備昔官粵西勸民種早稻  
有效中丞今又舉早稻親試之吳民第取一麥一  
稻較其所得孰贏必能知所從事矣昔東坡先生  
在惠州爲秧馬歌以示博羅林令抃林躬率田者  
製作閱試惠州民皆施用以爲便及至江西以教



人罕有從者已復念浙中稻米幾半天下而先生  
又自有田在陽羨意欲以此教之因備言範式尺  
寸及乘馭之狀仍製一枚以寄並欲詳詢回鶻部  
木馬行水中之法以告江南人而迄今未有傳者  
豈吳越人之信從有不逮惠州之民者乎然先生  
又嘗因龍川令翟東玉求秧馬式而告以宜師古  
人使民不畏吏則東作西成不勸而自力是家賜  
之牛而人予之種也誠哉是言吾爲江南人勛之  
尤欲與江南之官吏共勛之

安徽通志序

皇上御極之元年辛巳冬臣澍恭膺

簡命爲安徽布政使將舉一方之利病而興剔之其山川風土人物官師學校財賦各大端皆不可不周知其故稽諸册府則吏抱江南通志進江南通志者修於雍正七年其時安徽尙未設布政使承明代南畿志之舊上下江總歸應天故統以江南志於安徽既不盡具又自始修至今世歷三紀事日益增未有掇拾守土而不能舉其籍旬宣之謂何臣有懼焉越癸未正月洊升巡撫爰與寮屬商修

安徽省志部居門目條舉件繫甫定議值歲大勞  
奔走撫綏未及成書乙酉夏始以其事入

告得

旨如所請行而臣旋奉

命調任江蘇比臣鄧廷楨至理前緒而恢之搜羅纂輯

凡數載始告歲以其書恭呈

乙覽

上謂是舉創始於臣而成於臣廷楨

加恩均予議叙臣例得颺言簡端竊惟安徽前江後淮

介南北兩幹之中幅輳數千里於禹貢兼跨徐揚

豫三州於春秋分隸吳楚舒宋諸國於漢交錯廬  
江九江丹陽鄣數郡其接壤也多則其得氣不齊  
而習尚亦異江北質重江南文秀其大較矣臣嘗  
周歷八郡自淝潁以北極於濰泗彌望平原田疇  
沃衍強本力穡則富教可興而果勁之餘流爲桀  
獷亡命不逞時亦竄出其間有司以爲難治至於  
宣歙皖桐舒六昔之所謂未通上國者今則爲人  
文藪名賢魁碩史不勝書彬彬稱極盛焉豈運會  
開塞有時抑亦視利導爲移易也古王者命太師  
陳詩以觀民風周官小行人以萬民之利害爲一

書禮俗政事教治刑禁之逆順爲一書是故不下  
堂階而撫綏之宜控馭之道可按籍而布臣與是  
邦父老居且五年友事其賢士大夫而董率其子  
弟兢兢之意歷久弗敢忘睹是書之成欲敬附於  
採詩陳書之義庶以佐

聖天子省方觀民一道同風之治永永無極焉

懷寧縣志序

古者列國無不有史史所紀錄總謂之志周官小史掌邦國之志外史掌四方之志蓋卽後世郡縣志所由昉矣取郡縣志而薈萃之則有省志取省志而薈萃之則有一統志是郡縣志之修尤宜先也然非敦崇實政自別異於流俗者每視爲不急之務而不肯修非貫串古今有史氏之三長者卽修焉亦不能犁然而有當安徽於直省隸江南道光元年冬余以

簡命來莅此邦小行人適四方以五物各爲一書每國

辨異之以反命於王以周知天下之故使者事也  
往時江南通志合上下江以成書紀載或不能盡  
具非有專志無以綜此邦文獻之大全余乃檄各  
牧令先修郡縣志將彙而集之而懷寧爲附省首  
邑諸所應載之事視他縣尤多王君毓芳以簿書  
之暇與邑之紳士從事焉其距舊志之修已百有  
餘年時代遼闊獻民遺老率皆就湮取證較難王  
君網羅篋簡摺拾存自開甫將成書迫於引

見之限恩息入都趙君梅繼之始獲蒞事其書囊貫古  
今粲然具備成一邑之典則其用心可謂勤矣又

所糾正舊志數十條可以知人可以論世以是爲  
省志底本而冠八郡五十餘州縣之首卽孰不先  
睹爲快哉獨惜省志之修余方奏

聞報可而適有江蘇之調未得躬覓其事喜懷寧志之  
先成於省志爲有基也爰書以弁之





宿州志序

我

國家文物昌明典章燦備伏讀

大清一統志義例精嚴各省通志成稟成式惟安徽  
自分省以來六十餘年未有全書余勅議纂修先  
檄所屬各州縣凡歲久無志者亟爲增輯並手定  
體例俾歸畫一乙酉孟春展

覲回皖道經宿州州牧蘇元璐出所輯志稟諭余余惟  
宿州卽古符離北枕徐邳南控江淮適當黃河下  
游決渠濬川歲有其役又其地四達遼闊民氣勁

悍綏輯化導較他處爲尤難蘇牧履任後凡築隄  
挑河團集保甲興立義學諸大端俱次第舉行稱  
此而爲書以其治宿者志宿其於地方之利弊民  
情之險易風俗之貞淫淳薄燭照數計口陳指畫  
知必有異於俗吏之爲之者今進其書而覽之若  
地輿水利山川風土人物食貨學校武備諸門綜  
核條貫稽考得實因歎蘇牧之能不愧是官又以  
知是書之必能信今傳後而余昨過宿州詩有因  
知政教能移俗且喜田功已命信之句益堪共證  
也蘇君勉之由此更講求古賢化民成俗之方孜

致不倦行見易瘠土爲沃壤敦健俗爲淳風於此  
上副

聖天子軫念黎元厚生正德之至意則斯志也非徒爲  
後來勸懲之所取資抑亦牧斯土者朝夕自儆之  
箴銘矣爰書以弁之



庚午科四川鄉試錄序

嘉慶十五年歲在庚午各直省舉行鄉試有

旨命

臣 澍副

臣 史評典四川試事

臣

楚南讓學由嘉慶

七年進士改庶吉士散館授編修旋以外艱歸籍  
前後供職未及二載卽荷

洪慈畀以掄才重任聞

命之下祇懼彌增謹具馳抵蜀入闈恪共襄事得士如

額選繕試錄恭呈

御覽

臣

例得綴言簡末

臣

伏思自古文章之盛視乎上

之所以教下之所以學而其要在於宗經經者恒

久之至道不刊之鴻教也經術明則人才蔚起其  
深者漸摩浸潤密移於性命之際發爲文詞必充  
實光輝粹然一衷於道由是建之設施則通經致  
用亦經正而庶民興所謂文章莫大乎是而時代  
升降之說不足言也蜀自漢以來人文最盛如司  
馬相如揚雄蘇軾父子之倫尤傑出論者謂天下  
之山水在蜀峨岷毓秀沆漢炳靈以故奇才輩出  
臣竊以爲皆經學之所致耳考漢孝景時文翁治  
蜀作講堂石室遣雋士東詣博士受經東漢興平  
中高朕作周公禮殿厥後毋昭裔有石刻十經田

元均補刻公羊穀梁二傳席升獻補刻孟子而十三經咸備若此者類能尊聖經以延教爲天下冠卽如馬揚詞賦藝苑所推而長卿之學成由於東受七經子雲作法言比論語作太元比易後儒頗譏之然其研經之功實有心得大醇之目昌黎非譏言也眉山三蘇文各名家而老泉則六經皆有論矣東坡則有易傳書傳頴濱則有詩傳雖其文各稱其所見之大小所養之淺深要皆習於經而有得焉斯所以義極乎性情而詞匠乎文理也我朝經學昌明邁於前代蜀士之奮興鼓舞涵濡



聖澤者蒸蒸日上而制舉之文代聖人賢人以立言心  
之精微通乎詞氣尤足覘其所學臣與臣評悉心  
甄拔一以經爲根柢其支離鄙僿不衷於經者弗  
敢取錄以期言爲有物學爲有用用副我

皇上樂育化成之至意區區之忱尤願與多士共勉焉  
爾

補行辛卯

恩科江南武鄉試錄序

皇上御極之十一年歲在辛卯恭逢

聖壽五旬慶期

詔開

恩科以廣登進時因江南闈場被水兼有賑務欽奉

諭旨改期九月舉行文闈鄉試並改武闈於十二年二

月補行臣例典試事爰進江蘇學政臣汪守和安

徽學政臣鄂木順額錄送上下江武生及駐防江

寧京口之滿洲蒙古與試者共一千三百三十一

人會同江南提督臣王應鳳督同提調官臣葆謙

監試官臣周繼所悉心考校先試馬箭地球次試

步箭及弓刀石三項技勇次試內場照例默寫武

經百餘字分別雙好單好字號按照外場密記所

校弓馬人材汰劣拔優衡定甲乙如額取中張彬

等六十三人旗籍薩勒杭阿等八人恭刊試錄進

呈

御覽謹拜手稽首颺言簡端臣惟聖神廣運必資乃文

乃武斯二者誠經緯世宙牟虛品物之大端矣古

者澤宮選士之法不外射以觀德敦詩說禮未嘗

區文武而畸其輕重也漢制設茂才孝廉而羽林  
期門則選六郡良家子爲之其時浸已別途至武  
舉設科則始於唐長安三年有馬射步射筒射翹  
關負重馬槍身材之英由此出焉宋明以還遞有  
增損然或先策略後弓馬或由廷臣各舉所知或  
由郡縣造詣別爲一軍或設科數年始舉行一次  
訓養無素而取具臨時難語求才之效洪惟我

朝

家法相承保大定功首崇騎射校閱之法旣備且精是以  
武功之爍超越前代中林兔罝莫非腹心干城之

選翹材輩出悉本菁莪

樂育之遺如本年江南鄉試卽有重赴鷹揚筵宴之通州

耆紳原任浙江溫州鎮總兵李景會現蒙

恩旨賞加頭品頂帶

壽考作人之盛卽此可徵臣渥承

聖訓簡閱軍實練揀材良茲於武科之選尤再三審慎

期在得人通校各場以舍矢如破觀其志氣之安

和以舉重若輕觀其技力之純固以進退步伐觀

其器局之宏深整暇復於揭曉後進而教以尊

君親上繩已接人之道俾化其囂猛悍鷙之偏而歸之

於有勇知方之域庶幾忠信爲甲冑禮義爲干櫓  
兼資文武斯無難矣是則臣所望於諸生冀以仰

酬

高厚於萬一者爾



補行辛卯正科江南武鄉試錄序

道光十二年歲在壬辰二月臣澍既奉

命補行辛卯

恩科江南武鄉試其年十月復補行辛卯正科武鄉試

會同狼山鎮總兵官臣姜長齡率同外提調江寧

布政使臣趙盛奎內提調江安鹽巡道臣葆謙外

監試升任道員江寧府知府臣趙炳言等按期校

試進江蘇學政臣廖鴻荃安徽學政臣沈維鏞錄

送武生暨江南京口將軍巴琿阿京口副都統岱

林等所送八旗滿洲蒙古駐防馬甲共一千三百



二十人試以馬射步射地毯開弓舞刀掇石默寫  
武經如額取中張永清及旗籍興魁等七十一人  
恭繕試錄進呈

御覽 世 實司監臨主試事例得賜言簡端洪維

國家造士興賢文武並重而武科之設由鄉舉登會  
試其及第出身由花翎藍翎以宿衛

周廬者亦與文士之登木天躋玉堂出入金馬門無  
異積伐累資而上咸得預奔走禦侮以備將帥之  
選可謂盛矣其在詩曰赳赳武夫公侯干城又曰  
赳赳武夫公侯腹心夫兔罝武人中林僻地舉而

用之則皆干城之選且進而膺腹心之任而况於  
壽考作人之化其以備廓紘恢綱之用者尤非邦邑之  
材所可同日語哉顧武備尙已兵可百年不試不  
可一日不厲唐臣陸贄有言人之拳勇股肱之力  
好之則出弊之則崇又云引進以崇其術業厯試  
以發其技能臣於今春閱試時見諸生技藝多優  
比至秋試而技益進馬步地毯十三矢全中勁弓  
十二力全開且有挾雙弓而並開者取中之外美  
不勝收所謂業精於勤技精於練者斯爲得之我  
皇上前年出師平定西域本年復剿辦楚粵獠匪皆肅

將

大討迅奏膚功靡一弦一矢之遺奮十盪十決之氣狼  
弧下指絕塞旋通虎旅長驅重寇失險

紹

顯謨於

列祖誕大誥於多方海鏡澄風山氛洗雨良由師出以律

勇且知方訓練講求之有素也多士淬勵

至教獲預賢科敢不倍殷精進練迹校名卽甲冑以求

忠信因干櫓而敦禮義期毋負

朝廷設科取士文武兼資之意而臣區區爲

國儲材之微悃亦藉以稍酬萬一云爾



甲午科江南武鄉試錄序

道光十四年歲在甲午冬十月各直省舉行武闈  
鄉試江南則例應總督典事臣方駐浦防汛兼閱  
河漕營伍卽於

奏報安瀾後馳返省垣進江蘇學政臣廖鴻荃安徽

學政臣沈維鏞錄送上下江武生及駐防江寧京

口之滿洲蒙古武生馬甲與試者共一千三百七

十七人督同提調鹽巡道臣積拉明阿監試江安

糧道臣唐鑑矢公矢愼悉心考校頭場馬射後接

試地毬次場步射後接試弓刀石三項技勇其合

式者入內場默寫武經合之外場密記雙單好號  
衡定甲乙如額選中民籍秦臻等六十三人旗籍  
蜚林佈等八人恭刊試錄進呈

御覽臣伏惟洪範八政八日師周官三物一爲射經國  
之道文武兼資我

國家興賢育才登崇俊乂舉凡疏附先後奔奏禦侮  
之材莫不濟濟烝烝爲楨爲幹所以扶醲化而翼  
昇平者至詳且備

皇上握符闡珍令嚴訓武伏讀道光十三年十一月欽  
奉

上諭有云武科爲掄才大典嗣後各直省考試武場當  
認真挑取練習挽強之技爲國求才用備干城之選  
又奉

諭云直省考試武場總以挽強命中爲主弓刀石自當  
並重嗣後各直省武場考試務以弓力強弱分別去  
取弓力既能挽強技勇又復優嫻自稱上選如此認  
真校閱庶可拔真才而杜倖進等因欽此捧誦之下  
敢不倍增謹凜此次考試臣於馬步十三矢多取  
全紅弓刀石三項多取頭號而尤於硬弓拔取出  
號以觀其真實力量不僅以頭號十二力卽拘爲



定格其向例八力亦為合式者則絕不入選前歲

壬辰臣兩主武試其時挽強命中之技冬已勝春

今則更加精進江南夙稱文弱之區而能開出號

弓者竟不止徐淮鳳潁諸郡洵乎風會轉移不盡

關地氣也抑臣更有進者中林野人兔冒武夫教

養之有法則赴桓皆腹心之選否則如狼如羊垂

戒亦深故必勇且知方然後能劑其血氣之強而

進之於尊尊親親長長之域於以入衛

禁廷出膺專闢答

聖天子作育之恩而副干城之厚望者端在於是臣於

揭曉日既以勛誠新舉諸生因敬本此意颺言簡  
端用示風氣之準云



乙未

恩科江南武鄉試錄序

欽惟

皇上御極之十有五年歲在乙未恭逢

聖母恭慈康豫安成莊惠壽禧

皇太后六旬萬萬壽特開文武

恩科以光孝治十月舉行武科鄉試江南例應臣澍典司

試事爰進江蘇學政臣龔守正安徽學政臣沈維

鏞錄送上下江武生及駐防江寧京口之滿洲蒙

古武生馬甲與試者共一千四百二十七人臣謹

與江南提督臣段琨率同外提調江寧布政使臣

楊簧內提調江南鹽巡道臣積拉明阿監試江安

糧道臣唐鑑等校試外場馬步毬射弓刀石技勇

密記雙單好字號合式者入內場默寫武經如額

取中民籍唐高崑等六十三人旗籍薩勒洪額等

八人恭繕試錄進呈

御覽臣伏惟庠序之設取諸養與射從古帝王澤宮造

士無非原本忠孝以養以教於以安上全下攬英

傑而收干城腹心之效其在書曰侯以明之撻以

記之周禮以五物詢衆庶一曰射取士之法固未

有不文武兼資者也自漢舉茂才孝廉而期門羽  
林以六郡良家子爲之文武之途漸分唐始置武  
舉科沿宋至明其制益詳我

國家保大定功勺般懿鑠騎射之精超越前古

皇上觀

光揚

烈

家法欽承戡平回羯掃蕩猺獠甄拔糾桓簡蒐勅銳屢奉

上諭嚴挽強命中之選儲折衝禦侮之才海內魁奇碩

彥罔不思奮鷹揚冀充虎旅

臣

自壬辰補行辛卯

並舉正科歷甲午至今凡四主武闈雙相揚解稟  
聖訓以爲去留弓則顏高之六鈞革則養由之七札既  
畢登夫果毅更相勛以止齊勉之以說禮敦詩進  
之以尊

君親上庶他日入衛

禁廷出膺闡寄皆能紹風徽於裘帶表勲伐於旂常  
以報

湛恩而宏

錫類之仁永永勿替焉

洞庭湖志序

洞庭海內巨浸也昔黃帝張樂於此本以山得名  
山海經洞庭之山在九江之間所謂辰沅漸澱瀘  
酉澧資湘也九江中五入於沅與澧資湘瀘而爲  
四同注洞庭以會江若五口然故國策又謂之洞  
庭五渚也然皆後世所命名禹貢但謂之九江曰  
九江孔殷曰九江納錫大龜曰過九江至敷淺原  
曰過九江至東陵皆指荊州無及揚州者顧自秦  
漢以來九江之稱或移之江北移之淮南移之彭  
蠡祇以禹貢有九江無洞庭遂併九江之名而紊



之揚州之域俗儒耳食入主出奴至今猶聒欲志  
洞庭此其大者不容以無攷也按漢書地理志九  
江郡秦置而未言其地酈注謂秦始立九江郡治  
壽春此蓋淮南郡治非九江也以壽春爲九江自  
元狩六年始其實壽春背淝負淮南隔濶霍與江  
絕不相涉不知武帝何由舍淮而以江爲稱竊謂  
九江立郡漢之誤沿於秦而其端則起於楚楚國  
都江陵曰郢中其後遷徙如鄢郢如郊郢如陳郢  
皆以郢名史記考烈王二十二年東徙壽春命曰  
郢是仍施舊號於新邑也洞庭九江爲附近國都

之藪郢徙而九江亦隨以徙如東晉渡江而南究南徐諸州亦因之僑置也然則其地安在曰洞庭九江在故郢之南二三百里間則僑置亦當在壽春稍南如今六安州境史記九江王英布都六卽其地已余持此論惟萬子彈峯深然之以爲前人所未及萬子博學多通戛戛獨造往時需次都門適余案上有洞庭湖志彙乃前長沙太守沈君廷瑛屬余訂定者余方巡城鮮暇因轉以屬之俾竟其事越十年而以志成告蓋是志爲華容拔貢綦世基所勅湘潭夏學博大觀增輯以遺沈太守萬

子又增之訂譌補缺倍於前書其用力勤矣余無庸多及而惟以洞庭卽九江之說質之冀達於古  
今者採正焉

京師悅生堂總簿序

京師朝陽門外悅生堂一所起於嘉慶十九年夏  
森圃給諫倡其議同時諸君子翕然一心解囊捐  
助五年於茲每歲冬春收養老病殘疾百餘人衣  
之食之宇以庇之俾旦夕就殍者得以出溝壑而  
躋於有生之域是誠可悅也已顧建堂之初肩其  
事者僅二十人人各五十金用其半而息其半贏  
子縮母期之十年以爲程旣而聞其事者多願捐  
貲以成其美且有從數千里外寄貲而來者人旣  
數倍於前所捐之貲不復限以數目於是所入漸

多所衣食亦愈衆積存之項至今歲而將及三千金矣堂事可卜其必成其本末不可以無紀今夏余將備兵川東臨發乃與閣學吳美存先生手錄各簿付之剗劂其規程有隨時損益者重加訂正仍以原引並記刻之卷首示創始之難也捐貲諸姓氏官階悉行登載不忘好善者之媿也雖諸君子各行所安初無名之見者存焉而徵文以垂之久遠激勸所在則又烏可少耶昔賢有言盡得一分心卽收得一分益又曰苟存心於利物於人必有所濟斯堂雖一隅平行之有常有基勿壞抑亦

無窮簣也擴而充之是所望於後之君子



渝城體仁堂新刻總簿序

歲己卯十二月余甫至渝巡歷城河上下將擇斯民所緩急利害者而革興之比至江北之打魚灣見有堂嵬然而高額曰體仁詢之則紳士撈瘞浮尸之所也堂內殘碑林立就其文義尙存者讀之始知其建自乾隆四年邑紳龍雨蒼韓帝簡陳志安李常菴張紹良等十一人實首其議其重修則馬軼凡與張唐汪韓諸紳耆之所爲而觀察筠亭嚴公琢堂石公實督之者也其堂中條議有舟以撈有棺以瘞有山以坎其費之入有田有土有房



舍以植其基有捐募以補其不足其司事之人公  
舉輪值周而復始蓋其意美而法亦良故行之已  
八九十年而無弊周覽之下爲嘉歎者久之夫渝  
居七省之衝凡蜀中各水如濛沫之會於嘉定馬  
湖金沙之會於敘州沱維之會於瀘州嘉陵潼渠  
之會於合州皆至重慶而匯其總波洞瀾沃澎湃  
洶湧自酈道元注水經已言其結舫而居夏水增  
盛顛沒無筭是陽侯之肆虐舊矣而拯溺之法未  
聞斯堂之建迺能舉古人所未能者而彌綸之其  
亦賢矣惜乎渝石易泐別風淮雨久之將盡歸剝

落因語以宜付諸梓可垂久兼可行遠也堂中諸紳士以爲然彙簿而以序爲請適余奉

命陳臬山西愬愬識數語以弁語云毋以善小而不爲斯舉也伯禹已溺之懷豈有异焉是在擴而充之者

日本書紀卷之三十一

三十一

渝城養濟院捐册序

曲臺之記王制於瘠鰥跛躄斷者侏儒百工各以其器食之至於孤獨鰥寡皆有常餼是知古人納溝念切其人有可食之器則因其能以爲養所謂不費之惠也其人無可食之器則推其食以爲食所謂容保之惠也二者皆有賴於上之經營布置而於天民之窮者爲尤亟故不但日有餼而餼必有常則平時養濟之所其不容以無措可知也我皇上紹登大寶

恩詔覃敷卽以各州縣養濟院爲諄諄仰見

聖人之心不忍一物不得其所傳言文王發政施仁必先無告其此意也夫渝城爲川省第一衝要五方之民總總而來人稠則無告者亦衆故養濟之院修理尤不容緩太守花公縣令仇君與余同處一載每見語以地方要務咸慨然有爲而邑之神民亦能踴躍趨公捐貲成美若惟恐其後者是誠可嘉也余喜斯院之有成而養濟之惠可及於無窮也故樂爲之序且以爲好義之士勸

渝城育嬰堂捐冊序

鰥寡孤獨謂之無告無告者非不能告者也告之而不見惻於人故謂之無告若夫呱呱而泣欲言不能則路棄之嬰兒是已於嬰兒而棄之是不能告之無告視告而不見惻之無告爲尤慘也今歲之春余甫至渝周郭而巡見通遠門內有遺棄死嬰者不勝駭怛夫孺子甫生者也其與無告之民之濱於死者異矣濱於死者猶自死而望其生而甫生者反自生而速之死是誠何心哉雖饑寒窮困容或有出於不得已者忝居民上其能忍而置

乎顧念此地塵居鱗比地大人衆雖有育嬰堂一區湫隘特甚且經費不敷有名無實方擬札致各屬與八省之民之客於斯者共襄厥事乃莅任未滿一載遽荷

聖恩擢任山西臬司惇惇就道殊悵此事之有志未逮也巴令仇君平日習聞余言深有同心臨發出捐冊以示余謂紳耆踴躍從事業有成議披閱之下爲之欣然雖冊中所載尙止巴縣一隅然四方好義之一雅不乏人當必有聞風而至者堂事之成拭目俟之

皖城育嬰堂勸捐簿序

皖城育嬰堂之建，始於前大中丞晉陵潘文敏公暨觀察都公赫公太守趙公，擇基於康濟門外濱江之干，爲舍若干，有堂有垣，有廚竈庫藏，以及器用之需，皆備。旣而中丞納公觀察台公太守謝公等，又爲之經紀而輔益之。七十年來，相沿不廢，制綦善已。余以辛巳之冬，奉

命旬宣來莅茲土，將擇吾民之利害欣戚者而次第布之，顧以

特旨清查虧欠，綜核勾稽，日無暇晷，曷頃閱公牘，始悉斯



堂之經費亦久虛矣因亟往視之則呱呱盈庭而乳者且日旰而無所得食也大抵生齒日繁從前歲收遺嬰不過百數十近則增至三百有餘而租息所出不敷數月之用主者率張以空奉路阻退避是以向議舉十二人司其事今惟某學博一人尙在亦求退不得者屢矣噫孺子匍匐入井行路之人爲之怵心况此數百煢煢者之啼飢待哺而不爲之所耶爰謀諸府縣諸君僉云惟有捐貲置產可以經久因割俸爲之倡俾諸君成之紳耆士商有好義者各以意輸於以仰體

國家保赤之仁而繇潘趙諸公善始圖終之令緒於  
勿墜詩曰無父何怙無母何恃諸君子胞與爲懷  
其勿以煦煦之仁目之則幸甚



陶文毅公全集卷三十六目錄

文集序

洪氏易通序

許氏易確序

困翁易學序

易拇序

周易實義序

毛詩禮徵序

孟子章句考年序

淮南子天文訓補注序

重差圖說序

胡光北韻學序

聲韻辨訛序

紀元通考序

蛾術編序

聖賢羣輔錄序

蘇魏公談訓序

文廟通考序

蓉湖草堂贈言錄序

蘇郡名賢像刻序

重刻輿地紀勝碑記目序

課蒙孝友錄序

易學支流序

歷朝史印序

東臯印人傳序

感應篇集證序

陰騭文引蒙序

醫方進一序

トシ考ノミヨシ  
ノ

二

文集序

洪氏易通序

昔仲尼以六藝垂教而易不列於雅言門弟子無傳焉非無傳也聖人設卦觀象繫辭焉以明吉凶剛柔相推而生變化其傳盡於是矣又曰居則觀其象而玩其辭動則觀其變而玩其占是以自天祐之吉无不利其傳盡於是矣夫卦之體八而已伏羲十言之教乃加消息無消息則無變化而易之用不行是故易之道變化之謂也變化者剛柔相推之謂也左氏之占筮焦氏之爻辰京氏之宗



朝遊魂荀氏之升降上下虞氏之旁通反對皆是道也自王輔嗣以老莊說易遁於元虛漢經師相承之遺法僅見於唐資州李鼎祚集解而不列學官至明儒來知德始以錯綜爲說而其端稍啟

國朝西河毛氏因有悟於剛柔相推之一言求之內外往來而其義大著但聚卦子母等名論者猶以不經少之嗣是惠定宇之周易述兼採九家張皋文之虞氏義耑主仲翔漢易之復興蓋無有盛於今日者然如帝乙高宗性命德行百姓等象一字一卦支離破碎反不若弼說之爲愈矣黔中洪定

山先生早入承明出典大郡淡於榮利旋賦遂初  
學易數十年韋編之好老而彌篤所著易通蒼萃  
各家宗主推易其說由乾坤生十辟卦由十辟卦  
推生以成六十四卦條理秩然而於彖傳賁之柔  
來而文剛分剛上而文柔渙之剛來而不窮柔得  
位乎外而上同者無不脗合其後世一切附贅駢  
枝之說則悉不敢以汨四聖之經旨也余於易無  
所得竊以漢人言象數宋人言義理不可偏廢無  
義理則象數爲誕離象數則義理爲虛二者交譏  
夫說經期經明而已士有以是爲門戶域於其中

斷斷相攻伐爲不可解也先生是書庶乎免矣

許氏易確序

易之爲書廣大悉備其微言奧旨未易窺也而孔子於乾獨曰確然示人易矣亦似易之義可於乾見之卽可於乾該之乃後世之論易者何其紛紜誕漫而不可紀也田何以下如孟喜之卦氣京房之納甲以及東漢諸儒所述爻辰消息升降旁通率汨於小數遞降至宋之陳邵始創爲先天圖橫斜曲直排比整齊幾類道家之符籙而易之道愈雜而愈勞夫大易首乾乾之初一畫耳一者何元也亨者元之通利者元之普貞者元之終是故元

爲善長而統天一與一爲二而成坤坤亦乾也坤  
之元亦乾之元也故乾元曰統天坤元曰承天然  
而聖人於此有憂焉憂夫一分爲二陽之數奇陰  
之數耦陽爲君子陰爲小人天不能有陽而無陰  
世不能有君子而無小人陰陽齊等君子小人勢  
均則將迭爲消長其究陽與君子之數且不能以  
相敵故作易而歸其用於乾曰乾元用九而天下  
治而其用九則曰見羣龍无首吉蓋有首則有尾  
有首尾則有間有間則有治有亂而乾之體將有  
時而毀无首者終始循環陰復生陽治以繼治人

之見之但見爲羣龍而已而固莫得其斷續之迹也於是焉出乎震以至成言乎艮皆乾之爲而羣陰包於其內斯之謂以陽治陰而陰受治於陽以君子治小人而小人受治於君子天下之治以此是故易之爲書自天道以之人事無非乾也天以是成其於穆不已聖人以是成其至誠無息伏羲之畫文王之彖周公之爻孔子之贊豈有異旨哉余嘗取乾之一卦反復尋繹而聖人作易之意宛若可見今觀許君易確何先得我心也君通筭術以易出於九宮予則謂易始乾元元卽一畫一積

爲三而乾以成三其三爲九九宮亦出乾元與君  
小異至若謂易止帝出乎震一圖河洛非二則懸  
之日月而不刊矣君名桂林號月南海州人嘉慶  
丙子舉於鄉生平著述甚富余來撫吳時君已前  
卒不及見而君之兄前山東平陰令喬林亦以經  
學聞於時近日說經之士如君兄弟之實有所得  
者蓋鮮門人將盡刊君之遺書又請祀君於鄉則  
其生平進德修業以孜孜自強不息者亦可想云

困翁易學序

義山王先生里之宿於學者也年已七十矣攜其所註易示余俾序之蓋先生之言易以彖爲主闡發義理證以人事務使四聖之心源一氣相承其學原本宋儒而不取先天之別傳亦不取圖書之雜說以爲數起河洛聖人則之亦第則其一二三四五六之數於圖書無與也彖所言東西南北七日八月之類皆無及先天八卦者說卦所言天地山澤皆大易參伍錯綜之理本無先天名目旣無先天則後天之名可不立且文王演易卽演伏羲



之易非變更其制以示異也卽如長女中女重爲  
家人此義易也文王卽以利女貞發明之孔子遂  
推及於父子兄弟先甲後甲文王易也周公卽以  
父子發明之孔子卽以終則有始釋之凡斯之類  
聖人之情先後一揆故曰知者觀其彖辭則思過  
半矣至於卦必有主如乾之元亨利貞非九五不  
足以當也故彖傳結以首出庶物推之坤主六二  
非牝馬不足以言貞屯主初九非動不足以亨屯  
與夫蒙主九二需主九五訟必有對皆可於彖辭  
消息之惟卦變一說在伏羲畫卦時初無此意而

既畫之際其情狀亦自然呈露故損益兩卦遂以卦變取名而彖傳之往來上下卽其證也學者苟卽彖與傳而深思之而後知朱子經文之旁自有註解其說不誣也蓋先生自言其意如此以視吳沆之易璿璣安溪李氏之周易觀彖其用彖則一而先生之論尤顯易可尋矣先生名文潞字坦夫晚更號困翁老於明經家貧少藏書所著述多從苦思獨索以得之往往發前人所未發嘗解易至賁其須撚髭再四忽悟曰人之一身自無而有者惟須則然然須雖生於有生之後而其本已伏於

有生之初此所以爲賁之飾也又解剝卦曰他卦言載皆取象於車剝何以言牀伏枕思之至半夜躍然起曰得之矣剝復之際亥子之交也嚮夕所載非牀而何其解乾卦利貞不分晰爲二謂彖傳如此而以文言四德爲贊易之辭另自一義與本經相比附故移乾坤文言於繫辭後以復費鄭之舊更廣王輔嗣例取乾卦彖傳列爻象前與諸卦一例明其所尊者彖而釋彖者莫如孔子之傳也凡彖曰象曰爲後人所加者不使混於四聖之文皆刪去之而空格以示區別其用力可謂勤矣

余於易溝稽無所知重違先生命因詮次其意還  
以質之先生焉



易拇序

華容萬子彈峯學易三十年成易拇一書余閱之而歎萬子治易之精也其書首圖說若干軸河洛之祕而恢之引伸觸類畢天下之能事次經說逐卦逐爻挈提要義次通說則綜括全易而曲暢旁通焉次附說辨析諸儒之同異終以例說十三篇而易之正變經緯盡矣惟易之爲書廣大悉備隨舉一端而皆可以相附故不特三才之大莫越範圍卽下至醫巫風角青烏者流亦莫不各得其似充滿包括此易之所以爲周也圖書之說闡自宋

儒後人或疑其出於方士從而攻之者衆矣竊謂  
繫辭言八卦成列象在其中韓宣子適魯見易象  
所謂象者卽圖之類也大戴禮明堂篇一九四七  
五三六一八鄭注謂法龜文也自周逮漢諸儒相  
傳之緒如此安得謂圖書無與於易耶萬子以爲  
聖人雖不因圖書畫卦而天生神物實畫卦之應  
驗故推廣之以盡其用意在借圖以明易非援易  
以明圖也其議論皆有根據於先儒所引而未發  
者言之鑿鑿余尤喜其論孟子善學易與孔子時  
中之易爲能達程朱之蘊也顧其書以拇名而不

盡主於拇余頗疑之萬子曰易首乾坤演而爲六十四卦者自震之一畫始震足也吉凶悔吝生乎動動生而足應必於拇乎始之夫易以天道惕人事者也淳故以拇致慎終于始之義焉余因思聖門傳道首推顏曾顏子言復曾子言艮但舉一卦而易之全體在其中矣然則萬子之名拇也夫奚疑



附三象ノノノノ  
名ニヨリ

二

周易實義序

昔夫子定六經以絜靜精微爲易教至於韋編之  
絕猶待學於假年蓋若斯其難也自商瞿子木傳  
之以至田何其流遂廣漢藝文志易十三家隋經  
籍志易說六十九部皆多於詩書之數唐宋以來  
愈益加多豈聖人之所難反爲後人之所易耶蓋  
易之爲書本騰天窮淵而莫可究詰人之說易者  
亦與爲騰天窮淵而莫可究詰其相尋於虛也久  
矣夫天下有一物卽有一象有一象卽有一理或  
近取諸身或遠取諸物吉凶悔吝絲毫不容假借

伏羲之畫文王之彖周公之爻孔子之傳無非教  
人卽實象以求實理而已後儒昧此舍其實而課  
之於虛若京氏之卦氣鄭氏之爻辰虞氏之納甲  
探極幽微要皆易中之卮言賸說耳而豈聖人立  
卦繫辭之本意哉秀水唐孝廉祝與余交有年其  
人肫然古質老於公車數十載旣卒之後其孤刻  
其周易實義六卷以書來乞序曰先子學易三十  
年精力悉殫於是思得公一言以爲重庶不致湮  
沒無傳焉余取而讀之字櫛句比所以爲後學啟  
其塗徑正其步趨者甚至談名理而不入於元渺

述象數而不失之支離金柅莧陸則特取說文兩  
儀四象則定從大衍主善爲師一空門戶洵不負  
實義之稱可謂深明作易之本者矣其中偶有一  
二新義要皆由深討力索而得如坤六二爻辭君  
以直方爲句與霜章囊裳黃爲韻蓋取惠氏之說  
又以大不習爲句亦猶豫九四之言大有得按諸  
象傳雖以直方釋六二而未嘗加大於不習之上  
似古讀與今無異大畜豶豕之豕君取鄭氏豉豕  
讀如互然古韻麻魚相通五上兩爻豕衢爲韻與  
詩祈父豕居韻一例似非誤文君今已矣惜不得

一與商推及此雖然易無達義聚訟彌多苟虞王  
鄭各有別解義苟可通無妨並立君之書富矣義  
備矣而余之所欲獻疑者止此益以見君之於易  
無義不實雖一字一讀而其犖犖不苟有如是也

毛詩禮徵序

六經之道同歸而卜氏言詩通於禮後明其互相  
爲用也迨後齊魯韓三家並立毛氏後出獨存康  
成作箋雖時不用毛義要亦不離其宗惟鄭深於  
禮每以禮說詩蓋漢人專門傳授恒詳於制度名  
物畧於義理不獨詩爲然而學者卽可因是以求  
三代經曲之迹與聖作明述相遇於一堂猶日暮  
也後世高談性命逃之於空虛議論日多而無當  
於實用學術之所以不能如古蓋在是矣涇川包  
孝廉世榮之說詩也但取詩之涉於禮者疏通而

證明之其於興觀羣怨之旨溫柔敦厚之教夫人  
所能道者不屑屑焉其分門別類大端倣陳祥道  
禮書及秦氏五禮通攷閱綱細目不必盡具而以  
資小學廣多識猶之五都肆也夫議禮之家紛如  
聚訟後生讀之往往不能終卷君乃條舉件繫如  
肉貫弗可不謂樸學者歟書刻於君沒之後君從  
兄世臣惜君年不永他所著未就惟此書已有定  
本亟鐫以傳之於世而君嘗與友人箋謂此書殊  
不足發明鄭氏但徵舊文供制舉家撫拾而已良  
甘苦自道之言以視世之轉相剽賊詡詡然自命

著述而居之不疑者其相去奚啻霄壤哉觀此書  
者既服其該通之學又以見其不自足之心也





孟子章句考年序

孟子七篇自考亭朱子集諸儒之大成發明其義  
昭若日星迨嘉定初天台陳壽老著孟子紀蒙十  
四卷厥後元之蘭谿金華明之河津餘干咸有闡  
解以羽翼其間惟自趙氏迄今攷孟子事蹟者舛  
錯紛紜迄魁定說夫賢者於古今名德碩人之事  
蹟猶將萃諸簡編按年詳考正其舛訛以爲表式  
况傳道之功不在禹下之亞聖孟子吾儒終身誦  
習其書心維身體而不足者其事蹟歲月曷可不  
博考是正以補先儒之未備也史記孟子列傳不

書其生卒歲月余觀孟氏譜云孟子周定王三十七年四月二日生赧王二十六年正月十五日卒壽八十四小司馬索隱留青日札聽雨紀譚諸書俱謂孟子生在定王時蓋皆本孟氏譜之說而沿其誤耳不知周定王在位二十八年無三十七年若云二十七年之訛則是年已亥至赧王十六年壬戌卽八十四矣安得至二十六年虜今距孟子卒二千一百三十餘年矣邠卿之注已無全文孫奭之疏又係僞託近代作者如鈞臺楚望孺山鳳石百詩寅谷均有纂述咸稱該博然其間罅漏孔

多爬梳尙少舛訛失攷者雖閻氏之博綜羣典亦所不免如潛邱劄記云集註所載陳氏乃陳耆卿不知朱子卒於慶元六年耆卿後於朱子恐無由取其說也諸家仍誤未易臚陳非學博而深思者尠能薈羣籍而折其衷無爲蔣子存齋著孟子章句考年一編來乞弁言余觀其書紀年書事博采羣言古事昭哲癡結具通考定孟子生於周烈王四年四月初二日卒於赧王二十六年正月十五日其言差爲可據他如據孟子外書而知孟子師於孔子之四世子上厯攷其年以證趙氏諸家孟

子親受業子思之說殊不合以孟子生於魯之陬  
邑而遷於改邾爲鄒之鄒國具有卓識又余觀孟  
氏譜以孟仲子爲孟子之子謂嘗見一書於嶧山  
道人云公孫子內有仲子問一篇乃知仲子實孟  
子之子嘗從學於公孫丑者王圻釋史亦采之今  
據孟子外書以證仲子非孟子之子益足徵考亭  
朱子從趙氏以仲子爲孟子從弟攷核之當皆學  
人所不可不知者余故樂爲之序云爾

淮南子天文訓補注序

漢淮南王安招集八公大小山之徒作書二十一篇統名曰鴻烈解爲之注者有許慎高誘兩家今許注已佚惟高注存然亦非其舊間有許注錯雜其中天文訓者特鴻烈之一篇後世陰陽五行之說多祖述於此高注或未能悉得其義例蓋疇人之學非宿學世業不能通其奧也乾隆中嘉定錢進士塘特取而爲之補注以淮南所用爲顛項厯信而有徵以八風配奇門亦足訂術家休生相次之謬惟本書所言土生於午壯於戌死於寅今卽

不用其說豈天事微渺其名以命之數以紀之者  
皆出於人之所爲可隨時而轉易乎又太陰在四  
仲歲星行三宿太陰在四鈎歲星行二宿四鈎之  
義高注詳之三宿二宿高氏無注蓋本書後文太  
陰在丑歲星舍尾箕太陰在寅歲星舍斗牛卽二  
宿也太陰在子歲星舍房心太陰在午歲星舍  
胃昴畢卽三宿也錢氏引左傳婺女元枵之維首  
以元枵次有三宿則大梁鶉火大火亦必三宿其  
餘八次僅得二宿可知輾轉相證似忘本書之已  
自注於後然淮南亦第就漢時十二宮次舍言之

揆之於今多有不合蓋恒星東移約七十年而差一度則亦未可膠柱而鼓瑟矣是書向無刻本適門人淡君春臺作宰嘉定因屬令表章之淡君因與毛上舍嶽生顧孝廉某以莊本校字句之同異而付之梓錢氏爲竹汀先生猶子好學深思喜著書卽此卷單行可以見其一斑識者無徒以陰陽五行家目之也



三三三三三

十一

重差圖說序

魏劉徽作重差具勾股之體著測量之用其自序  
云徽幼習九章長再詳覽輒造重差綴於勾股之  
下度高者重表測深者累矩孤離者三望離而又  
旁求者四望是其書本名重差後人以第一問望  
海島遂名之爲海島祕經云差者何勾差股差也  
重差者何以小勾股差爲大勾股差之率也凡望  
極高測絕深而兼知其遠者必用重差勾股則以  
重差爲率其設問有九一日望海島二日望松生  
山上三日南望方邑四日望深谷五日登山望樓

六日東南望波口七日望清淵白石八日登樓望  
津九日登山臨邑其術由疏而密始用今有繼用  
重今有其義山淺而深始以表高爲率繼以入表  
爲率繼且以前去表減景差爲率登山臨邑一問  
具三望四望之義故著於篇終由此推之凡天之  
高地之廣星辰之遠江海之深敵營之遐邇師旅  
之多寡皆可以測量知之其詳見於秦九韶數學  
九章朱世傑四元玉鑑重差之義該矣哉考隋志  
唐志皆有重差圖一卷今已不傳吳門沈弱侯欽  
斐憫古書之亡續先民之緒索隱鈎深補圖立說

繪勾股於寸紙從橫截之令同股者不同勾爰有  
勾差令同勾者不同股爰有股差而差之中又有  
差焉小差大差輾轉相求舉凡高者深者遠者無  
不可得洞然見勾股具測量之體測量著勾股之  
用可知明體達用之學備於六藝中九數爲六藝  
之一而勾股又九數之一也弱侯旣校定數學九  
章又爲四元玉鑑撰細草余嘉其好古深思而有  
得也因爲序之



胡學山韻學序

合氣爲音見於鴻烈形氣相乘而成聲見於化書  
形有肥瘠強弱氣有剛柔清濁世殊今古地歧南  
朔重脣輕脣正齒半齒而孰爲之筦攝於是等韻  
之書以出溯自魚山四十二契別爲三千餘聲至  
僧宗彥而衍爲六千其備九州之音乎舌居中爲  
宮開張爲商舌縮卻爲角舌拄齒爲徵撮口爲翳  
五音而析爲七再析爲九此顯而有徵者也然玉  
篇以影曉匣喻屬宮而韻會屬翳玉篇以幫滂非  
敷屬翳而韻會屬宮司馬文正以半商徵半徵商

爲來日陳彭年以迦佉屬牙綱各屬喉沈氏筆談  
以宮商角徵蕤當唇舌牙齒喉而近世毛先舒七  
聲類例則於五音中不用舌齒豈非等韻之學專  
憑唇吻各以方音爲是故不能盡畫一乎然等韻  
昉於西域三十六字母其從陳晉翁刪爲三十二  
李如真刪爲二十二蘭廷秀又刪爲二十後世奉  
爲反切之宗有音和有類隔有迥廣有就形又有  
開合二十四攝有內外八轉彼非此是格鬲糾紛  
要未有如我

朝清文鑑十二字頭之窮微析奧者也夫古韻之學

形聲殊部主於詁經今韻之學籟參天人長於適用吾鄉講求古韻者尙罕其人而今韻之學則有瀏陽胡學山先生光北聲音蠡測一書辨陰陽五聲析爲八音筦五方之殊言創反切之捷徑其於國書合聲相切緩讀急讀之旨尤有神解往者襄平都秋莊著黃鍾通韻

四庫書目稱之先生覃精積思行且由音韻而窮律呂以溯聲氣之元窺禮樂之奧焉不徒爲雕蟲之士譜清濁辨聲病而已也適余自江南奉

命閱伍江右乞假歸里道出長沙先生以其書寄余且



求序余方馳驅道路恩恩未有以應也既而返署  
則先生已赴道山矣生平行誼耿介年且八十猶  
孜孜好學不倦以明經終見其宗人竹塘明府所  
爲誌甚詳因亟敘之以爲吾鄉志學者勸先生別  
有詩韻循音余瞰其義例不可得則亦不敢妄參  
末議云

聲韻辨訛序

兩粟而後書契遞興篆籀既遙隸楷斯起厯稽古  
今字書如說文玉篇類篇偏旁之書所以正其畫  
廣韻集韻韻會反切之書所以辨其音爾雅方言  
釋名訓詁之書所以釋其義三者相輔而行不能  
偏廢說者謂古有宮商角徵羽而無平上去入沈  
休文創用四聲當時人已疑之古韻失傳音義遂  
淆其說固然然六經諸子具在區分界別實自較  
然大抵不外因形以求聲因聲以求義而毫釐之  
間可以燭千里之謬矣夏君以稽古之餘爲辨訛

之編句梳字櫛率出於目耕薈以手錄雖囊括尙  
未富然非剽竊緣飾者比也古者人生八歲入小  
學保氏教以六書漢興有尉律學僅年十七試諷  
書九千字以上得爲吏又以八體試之郡移太學  
並課最以爲尙書史吏民上書字或不正輒舉劾  
之是考文之事列於三重而於蒙養尤先也職訓  
課者卽是編而益精之是亦藝海導迷之筏文衢  
大章之車也乎

紀元通考序

易言結繩易爲書契百官以治謂文書也萬民以  
察謂契券也其時有甲子無年號國君之年以元  
二紀人心尙質未聞滋僞也觀秦二世登泰山立  
碑謂金石刻辭先帝所製而不稱始皇帝疑於後  
嗣之爲丞相斯等因請刻詔書以示別白蓋已患  
紀載之無辨矣高帝初以漢紀年閱世則窮於是  
有中元下元之制可見世風日下欺詐漸起年號  
之興亦時勢所至不得不然顧漢武建元實緣符  
瑞而起歷代沿之屢有更改仍多未便自明以前

在位久而年號不更者漢明宋文唐高祖太宗憲宗金世宗元世祖數君而已夫年號之紀義取正大若乃運類走軍成負人戈昌有二日之象正止一年之期穿鑿忌諱原可不必然或漫無檢核而取前代之號以紀年有同至三四次五六次不已者如漢武帝哀帝之太初晉惠帝元帝之建武唐高宗肅宗之上元元世祖順帝之至元則近在一代更爲不倫餘或號同僭竊號同外夷甚至同於盜賊如永樂爲方臘之號天啟爲元法僧之號難免有識者譏而晉康帝之建元同於劉聰恭帝之

元熙同於劉淵海西公之太和同於石勒希跡寇  
仇尤爲不可解者此宋太祖所以有宰相須用讀  
書人之歎也秀水葉子維庚著紀元通考一書凡  
古今正閏各主下逮外國至於僭賊皆釐而輯之  
經以年表緯以編韻辨前後之異同證古今之得  
失又得武進李申耆先生爲之商榷以視封演之  
古今年號錄宋庠之紀元通譜楊億之歷代紀年  
賦益詳且審矣昔孔子作春秋首重書元之義孟  
子言知人必先論世然則葉子是書之成其爲用  
豈小也哉

下  
一  
家  
公  
之  
五  
三  
三  
八

五  
四

蛾術編序

嘉定多篤學之士乾隆中錢竹汀少詹與王西莊  
光祿兩先生齊名竹汀先生學博務篤實其書凡  
一百七十餘卷行於世余撫皖時其孫師康爲教  
官復出聲類四卷余以授趙徵士紹祖校刊之西  
莊先生務淹貫所著尙書後案十七史商榷已有  
刻本又有蛾術編九十五卷馮子齡孝廉持以示  
余余公暇偶一披覽經十數日始竟網羅繁富六  
藝百氏旁推交通多所發明其言經義主鄭康成  
文字主許叔重宗尙旣正凡鄉塾虛造汗漫不根



之談攻瑕傾堅不遺餘力夫無師之學昔人所譏  
是以漢人傳授皆有專門尊奉本師罔敢弃家法  
異同之論致煩天子親臨白虎觀稱制剖決後儒  
作疏亦墨守傳注惟恐踰越苟有歧趨胥加駁難  
自世流少見多恠中實空枵徒恃私智妄生荆棘  
或偶逢半解如獲珠船而此達彼窒失諸目睫轉  
欲凌蔑故訓高自標置終墮昏蒙人復掎其後嗚  
呼是丹非素伊昔而然然則屏斥過嚴固不足爲  
先生病也先生沒後家日落同邑學者閱是書之  
散落將釀金付刻因爲序其端曰蛾術編者先生

自謂積三十年之功始克就正戴記時術之喻其  
功乃復存大堉者也綴學之士尙觀此而知所積  
以求其通哉



聖賢羣輔錄序

陶靖節聖賢羣輔錄一名四八日其書每條末皆載所見原書出處自北齊陽休之編錄後至明何文簡孟春始爲之注按靖節此錄雖係僞作究爲北齊以前人所依託其中甄述兩漢及東西晉書皆非班范史及唐人所撰之晉史也如三輔決錄張璠記謝承書之類今全書雖佚猶散見於羣籍以南北六朝及唐初諸子書並李善文選注虞世南北堂書鈔徐氏初學記歐陽氏藝文類聚太平御覽冊府元龜等書攷之大半符合何注所採僅

依據正史頗多疎漏如韋文高爲韋豹之父錄中所引文高三子見京兆舊事攷前漢書表及韋氏世系文高當名浚京兆舊事凡見御覽十七條卽文高亦見御覽文簡謂不知豈偶未深考耶又下卷八俊內有趙典范書黨錮傳云惟典名見而已考典范書本有專傳又別見郭泰皇甫規傳安得云惟以名見自相矛盾邪蓋名見者見於八俊也其實典傳亦並未及鈞黨事顧亭林亦不得其解乃謂有兩趙典是未攷華陽國志及三君八俊錄也而文簡直以典事僅見黨錮及羣輔錄是並未

全檢范書矣豈知此事見於謝承司馬彪書及常  
璩志書籍所載固有不勝錄乎如此之類均考其  
同異正其得失較何注有增不揣固陋謹附所見  
如此以質之博雅

三有之

天

蘇魏公談訓序

魏公談訓一卷宋朝請大夫蘇象先錄其祖魏公頌之遺訓也象先爲魏公長孫自少侍魏公凡朝章國故家世僚友仕宦出處吏治文章以及日用瑣屑得諸退食之訓者薈蕞爲編託始元祐丙寅時魏公方爲吏部尙書所記祇百餘事成書在靖康元年續增二百餘事則魏公沒已一百餘年矣象先宋史無傳嘗歷稽載籍子孫之追述祖父嘉言懿行爲一書者自孔子家語始後世若顏氏家訓鄴侯家傳錢氏私志范公偁過庭錄蘇欒城遺



言皆仿此爲之然闡揚其先或失之夸大反乖事實而是書所述魏公立朝本末證以宋史悉合無溢美之詞則象先之能服膺祖訓傳信於後可概見也今蘇州守蘇君鼇石爲魏公後裔偶得談訓鈔本於吳縣黃氏據其跋語又知壽松堂蔣氏有宋刻舊本取以校黃氏所校爲重雕以廣其傳求序於余余惟魏公文章政事卓卓具載宋史無事贅稱獨其世澤之長自許公顯於唐至宋而五世登科父子宰相逮鼇石又數百年猶簪纓弈弈豈非家法留遺能守之勿墜歟鼇石之爲是刻不徒

表章先烈亦以明積累之所自來也傳曰德厚者  
流光觀於家世一篇取盧柳而黜王謝諄諄惟文  
華輕薄是戒後之君子可以油然而興矣

三十三

三

文廟通考序

昔司馬遷作史記躋孔子於世家議之者曰遷知尊聖人而不知所以尊也聖人不待世家而尊也夫聖人誠不待世家而尊然遷固言高山仰止景行行止雖不能至心嚮往之尊聖人而無由而以致其嚮往焉亦奚不可也夫聖道之大與德之隆其見於門弟子之記錄者固已備矣希聖人者由其日用動作容貌辭氣之間以進窺夫性與天道之本求諸論語孟子之書固已足矣而後世乃有祖庭廣記素王事紀年譜闕里志諸書之作將

毋伊川所謂玩物喪志者乎非也凡賢人君子家世之故出處之途交遊之際足跡之所暫託手澤之所偶遺好古之士猶思廣引博徵尙論之無已况聖人者無時或忘於天下人之心又不但如賢人君子而已則凡事有相附文有相涉其願聞而樂道也更何如乎余嘗考孔子言行散見於他書者不可勝紀所見異辭所聞異辭所傳聞異辭固無足怪太史公紀五帝曰擇其言尤雅者夫非羣言畢陳又惡從得其雅者擇之是故雖莊列之臆言緯書之夸說皆足爲識大識小之資不可廢也

又自漢以來褒崇之典歷代有加至於

本朝而極亦不可以無紀往時孔子五十九代孫繼  
汾作闕里文獻考最稱詳贍然於聖蹟則比干吳  
延陵季子之碑未收於後裔則史肇宏之難不載  
於典禮則李璫從祀風撤豆籩之異失採覽者猶  
有憾焉涇川翟生漱芳乃以三十年讀書稽古之  
力重加排比自諸子百家之書二十二代之史天  
下郡國學宮之記莫不兼綜條貫都爲一編凡一  
百三十卷其但以爲洙泗之說林乎蓋亦以是致  
其嚮往也云爾夫世儒目不睹天地之全識未周

古今之蹟果於執理長於用疑其視聖人自一二  
微言心法外概棄弗道則於翟生此書不以爲厄  
言曼衍者幾希然而聖道之大與德之隆非上智  
無從窺也常人所嚮往者有時或在於粗迹故司  
馬氏世家至於今誦之不廢翟生此書旣自致其  
嚮往而亦有以廢天下嚮往者之心也則吾且以  
司馬之書卜翟生之書傳世而行遠矣

蓉湖草堂贈言錄序

蓉湖贈言錄者見亭少司馬彙其太夫人身後誌傳哀誄之文也太夫人姓惲氏爲陽湖望族其生也母氏有夢珠之祥因名之而字以珍浦曰蓉湖其老年所自號也太夫人幼慧通書史工繡能詩又學繪事於從姑冰得其族祖南田老人遺法隨父尉肥鄉時太常完顏公岱方宰是邑聞其賢淑後遂爲其子泰安知府公求婚生三子皆以才官於

朝見亭其長也太夫人以慈孝稱於家以文翰聞於



海內又得其六世祖惲遜庵先生遺書闡心性之  
要與孫夏峯李二曲諸公相出入故能內淑性情  
外達治體誨其子發名成業爲時名臣他日

國史列女傳自當采之以輝彤管冠母儀而流映藝  
林者猶其餘事卽極時世揄揚之詞尙何能助潤  
圭璋增芳蘭蕙然則少司馬之惓惓哀輯流布於  
誼何居焉爲人子而克承先志者難爲賢父母之  
子而克承其志尤難古今母賢母而子名臣無若  
吾家長沙桓公之母湛太夫人晉史母子各自立  
傳明子之賢以母成母之賢則不必以子著以今

海內仰憚太夫人之賢則所以爲其子孫者難矣  
詩曰夙興夜寐無忝爾所生記曰父母旣沒將爲  
善思貽父母令名必果况於父母之令名不待子  
貽而子之無忝者宜何如哉然則斯錄也其非徒  
表章顯揚之謂其卽書策不能讀栝椹不能飲之  
謂必使其身無忝於太夫人之子而後無忝於其  
爲臣讀其文際其志當有慙然於移孝作忠之不  
易而泣然涕慨然興者已



蘇郡名賢像刻序

顧生湘舟輯吳郡名賢像凡五百七十八人遠徵近取都爲一冊其用力勤矣大司寇桂船韓公持以示余及梁茝鄰方伯陳芝楣觀察李葛峯太守僉謂宜刻石以垂久備勸勵焉適重修滄浪亭成因於其旁擇地爲祠吾師石琢堂先生選匠氏嵌諸壁已而顧生復鐫木爲圖人綴小傳系之以贊蓋不但垂之久並欲行之遠也昔文翁爲蜀守興教化特闢講堂石室圖書古聖賢像於其中學者至今艷稱之嗣是如武梁刻像如會稽先賢像之類

皆無非以興起人之志氣使奮然有見賢思齊之意琴之文夢之日羹牆之堯恍惚中蓋亦有象矣矧於衣冠面目顯有可憑者乎昔歐公作五代史自負有善善惡惡之旨而拜王彥章畫像爲之作記慮其歲久磨滅失真亟工完理不敢有加彼朱梁跖犬耳文忠以其一槍之勇能死義猶希慕之至如此然則一鄉之賢雖不必盡與古人律揆諸善善從長之意其必有合焉可知也抑此五百七十人者爲名宦爲鄉賢爲流寓標以吳郡一國之善卽天下之善也以像爲斷其人賢而無像者不

與姑就顧生所輯者圖之云爾若謂有所去取於  
其間則吾豈敢

陽明家公全集

卷三十三

三

重刻輿地紀勝碑記目序

宋王象之輿地紀勝二百卷又別有輿地碑記目  
四卷卽全書所採各路碑刻之目錄也其書之體  
例

欽定四庫提要論之備矣顧刊本罕見傳鈔日久譌誤滋  
多車明經秋船持謙假得精校之本將以付梓問  
序於余余惟金石之書自歐陽文忠趙明誠以來  
代有著錄蓋古人之蹟不可得而見矣獨賴碑刻  
有以存之故好古之士不惜攜瓊椎齋糧糗手胼  
足胝鑿幽絕險索之於蛟龍之窟探之於猿狖之



居凡有殘輒斷褐皆必得之而後快其纒者以爲  
筆墨之娛其精者以爲考据之用然而近時所見  
之刻有不如前明所見之完者矣前明所見之刻  
又不如宋元所見之完矣雨淋日炙苔蝕蘚封歷  
歲愈多其傳愈少今歐趙錄中目存而碑亡者殆  
十二三也然後人不得見其碑而見其目猶可卽  
目以想其碑之髣髴則目之可寶也與碑同象之  
是目得秋舫表彰之其以慰藝林想望之心而爲  
學者多識之助功豈小哉秋舫邵陽人其祖太參  
公始移居江寧今爲江寧人也好古多識卽是編

足見其一斑云

陶文毅公全集

卷二十六 文集

三



課蒙孝友錄序

聖賢教人不外孝弟二者孩提知愛少長知敬其源發於秉彝之初而周於倫類著於身心以至旋乾斡坤彌綸萬象皆由此擴而充之故曰堯舜之道孝弟而已非謂此外無事正以事物甚多惟在乎恃源而往也顧蚩蚩桐子安所從辨爲正路而由之世儒茫昧於古人教弟子之法全未理會但知課以誦讀其號爲老師宿學者亦不過捃摭訓詁汎濫詞章以爲弋釣科名之具於風俗人心之本毫無與也劉生是編於史傳所載孝弟事實採

其切於用者彙爲十二卷以資訓課俾童子幼而  
習之以感發其良知良能使渙然有所持循以馴  
致於義精仁熟之域竊謂可輔小學一書而爲蒙  
以養正之大端也見者當不以吾言爲謬

易學支流序

堪輿家言起於漢晉而極於唐宋之際青囊捉脈以還衆說雜陳趙汭序風水選擇所云得陶書者爲陶得郭書者爲郭得楊會書者爲楊會真僞純駁莫辨淫巫瞽史徧天下者也顧堪輿之說雖繁總不出公劉相陰陽觀流泉二語山法水法備於此矣乃後世幽杳之談顧多託諸理氣相傳唐以前陰陽秘本皆藏於內府開元中聞喜邱延翰以天機心印進呈逮黃巢之亂掌靈臺事竇州楊筠松叔茂得其書流寓江西作疑龍撼龍三十六龍

等書其天玉經則專言理氣元空大卦八神三元  
九星等名目皆非世所習聞近日雲間蔣大鴻地  
理辨正出乃更迂其辭晦其旨謂楊公別有口授  
恠鬼輩因假爲護符人人自詭爲得鴻寶秘傳惑  
其術者舍龍脈而講元空將使沮洳糞壤皆得指  
爲三元旺地數十年來所見人家移居遷葬受蔣  
盤之禍者指不勝屈夫陰陽家言所以爲宅葬也  
大易言取諸大壯取諸大過卽宅葬所由昉也聖  
人先天弗違安死利生固非貿貿然以取之故曰  
陰陽一道也道卽理也氣依理而立理載氣以行

既曰理氣豈有無理之氣哉吾門人陳子雪樓治  
經之暇乃以經術比附疏通證明爲天玉了義陽  
宅易簡二書以江東江西之卦爲卽四正四隅以  
八神一二分配干支以五黃加向爲仿說卦出震  
見離以左旋右旋爲本月令左个右个悉從來未  
發之覆蓋至是而天玉始確然有義例可尋一切  
荒唐悠謬之說不攻自破矣陳子於諸經皆有論  
述尤好學易是書於易雖僅支流小數然因源竟  
委明白正當固吾儒卽物窮理之一端非術數家  
所能階而企也余故樂爲序之庶幾利用前民之



一助云爾

歷朝史印序

印章之起蓋自周官掌節貨賄用璽節然掌之於官以通商旅之出入則猶今州縣之印非私印也私印之流傳於世者自漢始率冶金爲之與鐘鼎款識同其筆法未易窺見今雖人人言漢法而心知其意者絕少如臯黃君楚橋乃特以此事名嘗聚石四百餘方取古今作史諸人人篆一章命曰歷朝史印凡十卷嘉慶初大興朱文正公序而行之嗣是徧遊吳越江淮一時士大夫莫不思得君片石以爲重今年夏秋間爲余作數方古雅絕倫

筆筆中鋒三代法物如將見之夫一藝成名皆必有精力存乎其間其傳之久暫亦常視以爲率秋之於弈宜僚之於丸扁之於輪彼蓋有動乎天機而不自知者至形之於言筆之於書皆糟粕也楚橋得名三十餘年今老矣技而益進乎道其視向之所著吾惡知其不以爲糟粕耶雖然上自周初下逮明季有良史數十百人一開卷而如晤焉夫以印爲印業此者之所知也羅良史數十百人於胸中以爲印則非業此者之所知也楚橋之胸有此數十百人與之往還噫此其所以能爲楚橋之

印也歟

國文大系  
第三十二卷  
文集

三三



東皋印人傳序

雉皋黃子楚橋以篆刻之學得名其所著歷代史印余既序之矣茲復以印人傳爲請印人者

國朝初周櫟園氏取同時工於摹印諸家排纂比次人系以傳楚橋踵其名而爲之者也其所錄不越雉皋自黃濟叔至范藹田十三人爲上卷皆雉產也自邵潛夫至李瞻雲十五人爲下卷則寓於雉者也各綜其生平崖略於前而以所存遺刻摹勒於後俾覽者有以髣髴其筆法而如見其人蓋楚橋之留心斯事如此宜其技有獨精矣

國朝二百年來摹印名家者可以指數而大半皆得之雉皋豈非古法之所流傳同人之所攻錯亦如宋斤魯削業固善於所聚也哉抑余聞許實夫姜自芸諸君子或以氣節著或以文章名不僅以印傳也印人之名櫟園所命觀之者以人存藝不必以藝存人焉可耳

感應篇集證序

因果之說儒者不道爲其出於二氏也不知作善降祥不善降殃感應之理昭然不爽二氏特襲其意而變其名耳言因果不若仍言感應之真切了當也太上感應篇雖出道藏而宋史藝文志載之其來已久所言皆持身理物之要古書如參同契著自術士魏伯陽而荀爽虞翻諸儒注易引焉朱子且爲之作注惠徵士棟謂魏晉以前道家之說初不悖於聖人以感應篇觀之不綦然歟毘陵趙修撰熊詔所著航中帆取太上之言加以訓釋而



博引古事爲證其書流傳海內百餘年來以爲導  
迷之筏樗林黃先生乃因趙氏之訓而更爲集證  
專以近事爲主誠以覺世牖民義取共喻古人遠  
矣語以近事尤實而可徵俾觀者觸目警心確然  
知所言之不妄卽確然知感應之非虛於以檢束  
身心而進於有善無惡之域其爲助於世教豈淺  
鮮哉

陰騭文引蒙序

帝君陰騭文傳誦者徧海內矣然或口誦而躬行或口誦而躬不能行甚至事事與之相反其故何也當童蒙時天真未鑿未能葆其源而養以正也湯誥曰惟皇上帝降衷于下民劉定公曰人受天地之中以生人之性未有不善者也特爲知誘物化則善者轉而之不善矣五經四書皆聖賢所以教民爲善之具朱子又編輯歷代嘉言善行爲小學一書以訓童蒙其於引之掖之可爲至已然聖言深遠學者或習其詞而未能了其義或了其義

而第以資其文小學爲入德之門塾師又多置不講是以爲童子者始而抱大人之器繼而失赤子之心繼而長小人之智暨壯且老則視孝弟忠信禮義廉恥皆若非吾性所固有之物機械變詐無所不至而懷世道之憂者乃刊註帝君此文連類引伸冀其一悟譬之馬已羸駕乃始謹其轡銜水已橫流而後固其隄岸不已晚乎許君石華以丁生紹中所註陰騭文見示其書不徵事迹語簡而明爲童孺所能解意欲塾師於講授經義之前授以此篇俾童蒙先入爲主終身受益置之鄉塾中

爲小學之輔將見口誦躬行蒙養正則善人多斯  
亦化民成俗之一助也因書以弁其端

陶文孝公白身

卷三十三

五

醫方進一序

醫方進一者黃子理人遇異人於江漢間之所授也理人家世文學尊人樛林先生於書無所不窺間游於醫以寄其活人之意嘗慨神解之難思求諸方外而理人果獲此編於邂逅相遇不知誰何之人其方初視若平平無奇理人謂投之輒效因刻之以傳惟古方書多傳自異人如本草靈樞素問出自神農黃帝其時岐伯俞跗雷公諸人皆達於造化之理明陰洞陽俾萬物各正其性命雖不以方名而方莫神於此矣史記扁鵲遇長桑君授

以禁方令飲上池水三十日能隔垣視人洞見五臟之癥結倉公遇公乘陽慶使盡去其故方更予以禁方五色診病知人死生夫醫如扁倉亦可謂神矣然未有無方而能療病者第其方曰禁後世無傳卽孫思邈所得龍宮三十方至今傳矣然必散之三十卷俟用者之暗中蓋思邈以濟世爲心而猶吝其傳如此無怪乎長桑君之語扁鵲令毋泄陽慶之授倉公要事之三年始能精也理人此方旣得之異人乃能肖厥考之志以傳世而濟物其志洵異於人其謂遇異人宜哉

陶文毅公全集卷三十七目錄

文集序

當塗陶文憲公文集序

重刻張太岳先生全集序

王牆東炳燭集序

礪東詩鈔序

南村草堂詩鈔序

李香畬先生詩集序

彈峰詩文集序

綠野齋文集序



周若山先生詩集序

芸香詩鈔序

楊紫笙詩序

遲雲吟館詩集序

嘉定侯氏仍貽堂集序

柳廷方遺集序

西溪草廬詩序

小容齋詩鈔序

蔣錦橋沂游雜綴序

陶笙樓剩橐序

羅庶常遺詩序

黎環齋詩彙序

鍾山書院課藝序

尊經書院課藝序



文集序

當塗陶文憲公文集序

一代之興必有一代之臣雲龍風虎相與啟發於其際明太祖以淮右布衣不階尺土而有天下觀其初起自言迫於救死未必有異於人自破采石至太平陶先生安一見決爲眞主首揭大義勸以不嗜殺太祖欣然從之明年遂取金陵贊成帝業太祖嘗言水有源事有因朕之王業惟安之謂又言朕初渡江陶安杖策謁於軍門卽以帝王事業期於初見之際贊襄軍務多歷年所宣號令則軍

民信議禮刑則體要成建陳之論以忠出納之命  
惟允雖艱難繁劇不以動其中至於牧民民安治  
吏吏治捍城禦侮寇愍成擒列郡晏安其勞則著  
並賜門帖子云國朝謀略無雙士翰苑文章第一  
家載在敕書與劉辰國初事蹟相同於處有明三  
百年規模宏遠遠軼漢唐而開其先者先生也迨  
金陵既定旁取兩浙始禮致宋濂劉基章溢葉琛  
四公先生輒自以爲不及帝亦多其能讓然四公  
者劉以謀略顯宋以文章著章葉以政事稱而皆  
未竟其用當太祖初起以一軍介羣雄間運籌帷

幄掌行機宜文字實先生尸之其後出守黃州饒  
州政蹟昭灼民爲立祠而朝廷大禮及律令皆出  
先生手然則四公者各擅其長而先生乃兼有之  
且四公之來在金陵建國之後而先生獨專其任  
於草昧艱難之始其難易亦迥殊觀敕書與門帖  
之言帝固知之深矣惜乎洪武初建先生遽卒官  
僅追贈姑孰郡公不及剖符受封而史氏所載其  
煇赫遂若反出諸公後古名臣如鄧禹之於光武  
諸葛之於昭烈其成功不必同而皆擇主於一見  
之頃如先生者三代而下豈多覩哉先生名安字

主敬太平當塗人其爲學以濂洛關閩爲主守居敬持志循序漸進之法於經史無所不覽爲文爾雅淳正有體有用在元時有辭達類鈔在中書有知新近彙赴武昌有江行雜詠守黃州有黃岡寓橐任桐城有鶴沙小紀宏治中郡守徐時中項誠之刻於太平郡齋鉛山費宏作序顧年寔遠舊板無存余撫皖時議修省志徧索之始得一本紙色灰黯首尾尙完因語當塗張生寶榮重刻以傳而論其大端於此云

重刻張太岳先生全集序

明至嘉隆時上恬下嬉氣象茶然江陵張文忠公起而振之挈領提綱綜核名實法肅於廟堂之上而令行於萬里之外其時海內殷阜號爲乂安迄今讀其奏疏及手牘諸書洞中窺要言簡而慮周卓然見之施行其精神氣魄實能斡旋造化而學識又足以恢之洵乎曠古之奇才不僅有明一代所罕覯也惟是精能之至近乎刻核勞怨不辭疑於專擅惡聲所蒙遂至巢傾而卵覆其亦可哀也已夫危疑之際聖賢所難易凡如周公而不免於



流言卒致缺戕破斧而後已歷數百年猶有執仁  
智未盡以議其後者世無孔孟安得有真是非况  
江陵地非周公而欲以天下之重自處於伊尹之  
任豈不難哉王弼洲嘗言吾心服江陵之功而不  
敢言以衆所曹惡也由是推之彼曹惡者之心豈  
獨昧江陵之功哉特劫於衆而相率爲違心之談  
耳或題江陵故宅云恩怨盡時方論定封豨危日  
見才難於虜有旨哉有旨哉江陵全集四十六卷  
原板久亡余屬江夏陳芝楣安陸李碧山兩君重  
校付梓而以浩氣吟一卷附於後蓋公會孫同儔

與留守瞿式耜臨難倡和之作亦猶

欽定明史附同敝於本傳後意也讀之知忠孝一門其來  
有自論江陵者觀此益昭然矣



王牆東炳燭集序

炳燭集十五卷金壇王牆東先生汝驤詩集也自出仕罷歸逮老數十年之詩悉萃於是中間惟秦淮雜詠楚遊草西嬉草遊梁草爲旅吟餘皆家居時作其以炳燭名集者蓋取師曠告晉平公炳燭之明愈於冥行之義先生久躋場屋自中歲始以拔貢生起家爲縣令在蜀六年而歸已過五十其集託始於此意前此固不甚作詩卽作亦不足存故曰炳燭志學之遲暮也人之才力每不能相兼李杜詩中之聖文卽不敢望退之子厚曾子固與

承叔子瞻文相鼎峙而詩則不過僅僅及格而已  
至有明以四書文設科歷今五百年雖有奇材異  
能之士束身八比童而習之皓首不能盡卽以王  
濟之金子駿陳大士之文滿天下而詩則未有傳  
焉

本朝熊次侯方望溪張曉樓諸公亦然豈皆性之所  
不近而不肯強爲抑業有專營無餘力以相及也  
牆東之於文在當時最稱澄靜細筋入骨其橐中  
虛牝諸集八比家奉之幾與金陳等顧獨不見其  
詩世亦未有知其能詩者得非爲文名所揜或以

學之稍遲不欲出以示人歟然今集中之詩反復  
味之其抒寫性情甄陶物象固與古之作者不相  
上下始知前史所云高達夫五十爲詩爲之而卽  
工者之非虛語而如退之子厚永叔子瞻文造其  
極詩亦未嘗不工世自有兼人之才力未可執一  
途以相概也蜀爲余舊宦地先生令蜀去今百餘  
年其治績已無有能道之者然觀其憶昨篇有云  
敲榜不忍鞭常懸有訴不須符牒煩口爲區判如  
家緣則忠信慈惠之風足想見矣其罷官蓋由不  
能諂事制府年羹堯之故見於魚兒曲及丙午有

感諸作可以論其世也陳令宰金壇得先生斯集  
將刊行之余嘗服膺先生之文而又喜先生之有  
詩也於是乎書

礪東詩鈔序

余年總角先子授以古詩十九首余卽日如數  
擬呈有云憶昨得君書讀之心不忘輾轉納懷袖  
恐滅又置箱先子喜之謂其初學得古意滅字  
用懷刺事亦頗知運化因舉新化歐陽礪東先生  
之論謂唐人惟玉谿生善言情尤善使事世人譏  
其獺祭乃指其文非詩也隨取篋中一詩示余曰  
此礪東見贈作稱爾所云恐滅置箱者余雖無知  
固已心識之歲甲寅先生舉於鄉頻上春官不得  
意南走粵北爲薊代山海關之遊余官翰林時始



晤先生於都門數以詩相推每道及先人舊好  
輒黯然蓋先生才氣縱橫不可一世顧獨心折

先子且極稱余不以小友視也先生博學多通其  
於書一過目終身不忘爲詩鍊骨入聲融神於氣  
初從義山以窺老杜鼻而爲昌黎澁而爲東坡晚  
乃自出一隊天馬行空神龍見首旣雄且傑而跌  
宕昭彰如風水相渙自然而成不能辨其爲杜爲  
李爲韓蘇矣余楚詩人林立近日如張紫峴周半  
帆謝薌泉周希甫唐陶山諸先生皆執耳騷壇而  
先生與寧鄉李虎軒布衣淑浦嚴樂園廉訪尤爲

先子摯交廉訪詩一再刻於關中經濟文章卓  
然在世布衣冷峭孤潔詩如其人窮老死無妻子  
其集尙存余篋而先生以山林高臥名聞海內一  
時名公詩老如蒙古法時帆嘉興錢裴山南城曾  
賓谷諸先生及臨川李松圃北溟名父子皆雅重  
先生不遠數千里致殷勤禮之或不至籜冠草履  
吟嘯於清泉白石間余識先生晚而知先生獨切  
適湘臯鄧子來金閭節署出先生書與其集感先  
世知交之誼不覺有慨乎其言也爲付諸梓氏而  
序之

附子家之各在之  
ノ三二一

南村草堂詩鈔序

余與湘臯交十餘年矣每晤則其詩必益進語云  
泰山之溜可以穿石湘臯於詩爲之若嗜慾如是  
雖欲遜而不肩於古人其可得耶湘臯之詩導源  
於魏晉而馳騁於唐宋諸老之場情深而文明氣  
疏而節古足跡半天下所交際多一時賢人大君  
子而與同里礪東歐陽子尤契深相應和如一龍  
在匣發電色而干牛斗如雙鳥偕鳴收雷聲而百  
蟲百鳥爲之不啾也湘臯嘗贈余曰君如江漢水  
力敵長河大余於二君亦云資水之發都梁也芳

風藻川蘭馨遠馥比出浦口合夫夷會雲泉千巖  
萬壑噴薄交輸礪而爲七十二灘遂而爲四十八  
溪泓而爲二十四港然後同聲並力以達於洞庭  
在沅湘間獨爲一派居然別開門戶者其源旣清  
無渾流以入之故能昌其氣而沛乎莫禦也然則  
湘臯之力據上游以與歐陽子之詩同其浩瀚也  
固宜余與二君居皆濱茱萸江酈注所言資水之  
變名也湘臯嘗輯資江耆舊集垂成而毀於鬱攸  
余深惜焉頻年攜其詩往來江湖間屢厄於水存  
者十六卷因促之付劄劂氏湘臯方歸爲校官突

兀而倚書幌吟興方滋余如季札觀樂以此編爲  
始基之矣



李香齋先生詩集序

蜀自文翁興教化爲循吏最數千年來江漢炳靈  
奇才輩出率多以文學著若吾師李香齋先生以  
文學而爲循吏尤傑然希蹤於文翁者也先生澍  
鄉試所從受薦時爲第九房得人最盛如益陽符  
鴻善化蔡信芳衡陽魏瀚郴州陳振玉臨武羅宗  
瀛皆極一時之選對卷得之稍遲乃改撥第六房  
而本房佳卷之以額滿見遺者猶多主司仍摘錄  
其文以去揭曉晉謁始知先君子卷卽在其中  
先生尤婉借不置其後各薦卷多蜚聲迭起而前



此戊午科先生在內簾以一言拔永明蔣雲寬於  
落卷中明年卽聯捷入翰林文行爲一時重人以  
此服先生藻鑑之精云先生諱方毅川北閬中人  
以成都縣學中式乾隆甲午舉人主講草堂金華  
諸書院旋官名山教諭辛亥從軍廓爾喀凱旋大  
府薦膺民社嘉慶二年丁巳赴選湖南臨武縣辛  
酉調綏寧戊辰升永綏同知庚午卒於任年六十  
先生居官廉正慈惠愛民聽訟雖得情猶婉言導  
使改過不輕予杖所至興利除弊率著成效在臨  
武置進士田以充鄉會試路費科名由之起在綏

寧設梯田法山田獲利數倍民爲生立祠在永綏  
兵革後民苗猶未輯先生乃推誠心布公道嚴約  
束禁滋擾僚屬一百三十餘兵勇三千有九百咸  
奉令惟謹四境遂安歲歉捐廉賑濟爲紳庶倡製  
藥餌以醫病者全活無筭比卒百姓哀思不已於  
東門外立祠以祀歲時享祀弗替生平儉約無嗜  
好惟好讀書筆札翩翩頃刻千言書法在東坡香  
光間人爭寶之爲詩自抒所得豪健卓犖不事規  
仿而妙與古會歲己巳以卓異入都出其集示澍  
自言吾詩亦猶人惟西征一集能面目特開澍爲

賦從軍西一章先生極賞焉尋其生平蓋古之遺  
愛詩其餘事然重先生之爲人者不能不卽詩以  
想見其平生也余門人廣漢淡君春臺刻先生詩  
集成謹敘其崖略如此冀備異日循良傳之採故  
不敢以浮辭進

彈峰詩文集序

萬子彈峰既解官乃自哀其詩古文都爲一集共若干卷刻成屬余爲之序余固深知彈峰之爲人豪放而有深湛之思生平以著述自負其於六經諸史手所鈔撮皆有成書顧獨未知其胸中復有此洋洋灑灑者傾吐之不盡也夫人各有能有不能李杜之詩爲唐一代稱首而其文不甚稱蘇老泉曾子固之於文可謂至矣而未嘗以詩名至於鄭康成孔穎達紹述遺經顏師古杜君卿網羅墜簡詩與文皆無微焉蓋天之生才常有所限制難

得而兼古之君子第勉其資之所可及而不強以力之所不勝故就其偏至之途以求造乎其極而已足矣不必以兼擅爲賢也今彈峰乃欲取古人所不能兼者以一人兼之其願力豈不誠闕大哉然余聞韓子之言曰文章一小技於道未爲尊又曰餘事作詩人則知古之所謂立言不朽者正自有在揚子雲所由恥雕蟲而不爲也余觀彈峰所撰集經史諸書豈不足以藏之名山傳之世人而藉此小技餘事以爲重乎然則此編之刻在他人爲尺璧在彈峰謂之敝帚可矣彈峰以余言爲然

乎否

陶文毅公全集

卷三十一 文集

下



綠野齋文集序

負駸駸之氣者不足以就法駕旋蟻封無他神無以馭之也矜天閑之選者與霜蹏霧鬣爭馳則蹶無他氣無以赴之也東南之士語溫文其民儒而智燕齊之士尙伉直其民武而疾治亦異焉道不同不相爲謀也未俗之吏以法律輕詩書跬步之儒或無以剗劇通變各蔽於所習不能兼也異以入者必善出廓以收者斯善擇爲學則既有然者劉君次白以才大夫能文章其氣昌奇而言不畔夫道生長燕齊以治吳越之民而不偏於所習其



固將游刃而有餘乎然君不以自熹益謙謙焉其  
於文事且日進矣

周若山先生詩集序

吾師周若山先生官楚南十八載政事之餘惟及  
詩酒時人呼爲醉髯擬之仙吏卒以疏於會計望  
吏議羈長沙十餘年始獲釋患難之頃不廢吟咏  
恬如也當事重其人延主淶江書院孜孜教誘不  
少倦所爲詩日益富適丙戌六月醴陵大水漂沒  
無筭詩帙隨波席捲去於是先生年八十矣窮老  
愈思歸遣其長君至松江視先世廬墓過金閭節  
署出先生贖橐示余蓋遭水後所收輯者曰抱膝  
吟醉髯草都梁草湘南草吟香書屋草附以詩餘

凡十一卷視全集僅十之二三尙有籠鳥鳴醒園  
草菘圃草則竟無存矣因亟爲付梓以誌佩誦而  
先生出處大畧亦見焉先生爲上海世族祖以上  
皆名諸生父贈公諱聲炯早沒母程太夫人年二  
十四而孀先生時甫四齡賴母氏茹茹苦教養  
以成家故四壁立餼爨不給以故先生甫舞勺卽  
傭書將母年十五隨伯父養齋公客共城旋應秦  
中雅中丞之聘先生奉母從行遂寄籍入長安縣  
學舉乾隆丁酉陝西鄉試丁未大挑籤發湖南嘗  
從軍籌糈奔走五溪淫潦間庚申充鄉試同考官

分第六房時澍卷從第九房改撥受薦憶壬戌秋  
自翰林假歸過洞庭謁先生於臨湘其地在城陵  
磯上禹貢東陵也大江西來大湖南來匯而北滔  
滔有朝宗之勢先生官於斯攬南紀之全勝每泛  
楫沂岳陽樓對盤中之一螺頰湖邊之九馬所謂  
文章得江山之助者歟澍嘗於樓壁見先生湖山  
遺醉夢天地寄浮漚之句而奉和有云江山容醉  
客風雨此登樓又云巴陵一湖水流不盡離愁先  
生極擊節後數年過岳州復有詩云江山又到銜  
杯處惆悵梅花小閣西其時先生以湘潭事聖誤

附錄卷之三十一  
二十一  
故及之今刻茲集原倡死在其中俯仰今昔不勝  
天涯泥雪之感風且秋矣尊鱸欲香先生賦歸在  
卽讀詩如見顏色謹撰杖以俟

芸香詩鈔序

王善舟太守沒後其門人徐彭諸君子輯其遺藁  
爲芸香詩鈔來請序善舟長於吏治循循得民心  
詩不常作然風格峻整談詩律者亦無以易也令  
於吳十餘年清苦不名一錢而詞人墨客座上常  
滿余來撫吳始拔君爲秦州牧適有海運之舉以  
君家在天津因使司交米事比竣蒙

恩加知府銜旋升補淮安府調蘇州府甫數月勤於其  
職以深夜巡視街衢感風露卒于方入

覲善舟以詩送比歸而善舟卒已旬日矣吳人哀而思

之有太守千年追白傅吳民萬口誦青天之語余  
聞而惻然以此歎吳民之直道猶存且以驗余所  
拔之幸不謬也善舟名有慶直隸舉人詩多散失  
所存僅百數十首序之俾後世不泯其姓名焉

楊紫笙詩序

昔杜少陵自言七齡思卽壯開口咏鳳凰又言甫  
昔少年日早充觀國賓今考其集則三十以前之  
作無一存者豈杜翁晚節律細而自刪之歟抑天  
才有定如曹子建李長吉之以韶齡而賦銅雀臺  
咏高軒過者固不數觀歟九疑楊季鸞紫笙自幼  
負詩名於瀟湘岳麓間弱冠以後往來燕齊吳越  
所至交其賢士大夫聞見益擴其學益富今觀其  
詩遂亦精且嫩大抵以意運才以情輔意如列子  
之御風泠然以善如仙人之嘯樹飄飄然吐雲霞



而噓冰雪雖老於吟席者未能或之先焉而紫笙  
年尙未三十也非天才異稟而又集益於多師別  
裁乎僞體安能有是然紫笙方塵華浮於實之懼  
而不敢以此自多且有不屑以此自見者觀其燕  
臺雜興云長安車馬地花落不開門又日行藏恐  
難定回首意茫然其志趣若是吾安能量其所至  
哉

遲雲吟館詩集序

商氏之序詩曰詩者志之所之也情動於中而有言是故詩以言其情也周以後漢魏之詩最盛然而代不過數人人不過數篇彼其情在乎是卽言在乎是情之所不在不強爲也後世之爲詩者吾惑焉鉢心腎鏤肝肺以按之窮日夜限晷刻以迫之廢寢食忘本業以耽之是何其情之所感無已時毋亦有可已而不已者乎夫可已而不已是直謂之爲詩役爲詩役是其詩非必情之所欲出而志之所欲言也役焉而已矣雖多且工弗尙也

若吾同年程竹盦鴻臚之詩則可謂無意爲詩而自臻其妙者乎君初入翰林爲文學侍從之臣吉士媚茲鮮不欲以賡歌鳴盛而君無詩也既改御史任言責古之名人雖避人焚草時事得失亦間有資於諷諭而君又無詩也既轉卿貳登九棘嚮用方殷古君子職思其居於此亦不能以無言而君仍無詩也顧其有詩乃多在於寬閒寂寞之時使人茫然莫測其淺深蓋君性恬澹默而好湛靜之思不與俗爲推移而卒未稍露其圭角其於仕寄也情不在是也其於詩亦寄也情之所不在不

強爲也曩京師同年讌集吳中諸君子如棣華蘭  
坡南雅退旃輩往往殘學相酬荅而君弗與及余  
撫吳而君以己丑賦歸林下始間有唱和然猶未  
足以盡君之蘊也沒後其孤慶華始裒君遺集持  
以相示且乞言余何能言君詩哉君少時從儀徵  
阮協揆試士浙江愛其溪山之勝思卜築終老屢  
形詠歌故雖在朝端不忘林壑其懷抱然也然則  
讀君詩者殆將於西溪桐廬間遇之歟

陸王家之白身

卷三十七

三

嘉定侯氏仍貽堂集序

故明通政司左通政嘉定侯忠節公諱峒曾集六卷年譜一卷弟太學生文節先生諱岐曾集八卷六子遺集六卷總爲仍貽堂集閱二百年其鄉人胡澂始刻以行世忠節公爲江西提學抗強藩分守嘉湖誅悍卒事載明史以乙酉閏六月起兵嘉定七月城破死之文節後三年丁亥殉陳黃門之難六子者忠節三子演潔澗文節亦三子沔洵泓也年譜則忠節季子澗所述始忠節殉難時演潔俱從死及文節以匿黃門被執不屈其母龔夫人

亦沈水死澣與汭皆遁爲僧同時夏彝仲父子黃陶菴兄弟皆以節著稱侯氏兼之爲尤烈焉

國朝褒錄遺忠通政公既有

賜諡太學暨六子鄉里俎豆亦至今未沫獨所遺集鬱而不彰胡君刻而傳之此其發潛闡幽扶世翼教之功甚大士大夫平居孰不言文章學問一遇家國變故或茫然喪其所守則其撰著皆欺人語耳故必於君父之大無虧然後可語於不朽也讀斯集者以此意求之則忠孝之心必有油然而生者矣

柳廷方遺集序

嘉慶庚申余與長沙柳子廷方同舉於鄉柳子自爲諸生試輒高等長沙之人嘖嘖焉蓋不但工爲制義其於詩古文辭固迥絕儕輩也長沙本省會附郭柳氏代有聞人淵源甚遠而柳子又親炙余存吾張度西諸先輩磨礪以成其業性情專益無所嗜好凡天地氣化舒慙之故古今善敗興廢之由與所值悲歡得喪之遭悉於文章發之慷慨抒寫酣嬉淋漓直欲起古人與之馳騁上下故遠近碑版屏幃鴻篇鉅製必以屬之柳子柳子亦自任



不讓與到長吟不知世更有何者足踰斯樂也蓋其用心之至如此方柳子之初舉也年已過四十然意氣甚盛座主陸文恭公尤器之以爲極所成就可繼方望溪劉耕南之後而柳子訖不得志於有司豈非韓子所謂志乎古必遺乎今棄俗尙而從於寂寞之道以之爭名於時固不利乎迨丁丑後至今則已頽然老矣然其文益工二三舊好杯酒道故談論風發猶不減壯盛時報罷後出都遂不相見距今又十餘年其子函其遺集書來請序始知柳子已卒於丙戌一再展讀不覺悄然以悲

歎故交之零落也若其文意匠縱橫變化妙乎圓  
方則文恭公之序論之學者可以得其概焉

傳心家ノ全集

卷三十一

四

西溪草廬詩序

曩余濬吳淞往來嘉定江上門人淡星亭方爲邑宰余詢以邑之良士知有張子吟樓黃子西溪者皆好善敦古誼每鄉里有義舉必先至爲之倡張子家安亭歸太僕震川先生故居在焉張子因余言卽其讀書遺址建祠立書院以掖進後學余遂迂道往過行釋奠禮因此更訪求震川後人得一人於傭保中曰玉銘置祭田百畝以贍之黃子故與忠節陶菴先生同族則亦因余言爲忠節輸田充祭貲一時好義者咸興起共得田百二十餘畝

並訪得忠節子孫於寶山之楊巷俾主祀事歸黃  
二公垂絕之緒得以復延者余以一言發其端實  
賴一子者能任事爲之督率也吳淞工旣竣余賦  
詩紀事吳中人士和者甚衆嘉定以黃生汝成爲  
最西溪之子也余固意其得於過庭之訓爲多然  
嘗攷之乾隆中嘉定詩最盛如張南華鵬翀錢竹  
汀大昕王西莊鳴盛皆名重一時所稱嘉定三先  
生也則又意流風所被其土音固然今夏余以閱  
伍再過安亭就震川書院爲一宿之憩旣俯仰前  
賢之遺徽而嘉定父老香花夾道扶攜就迂熙熙

然如旅行而晤家人忘乎其爲長官也余爲之留  
連不忍別去歎此邦風俗之淳厚亦由賢士大夫  
有以助流政教而美其化也於是羣英畢集而黃  
生汝成則奉西溪命以所爲詩質余請益余閱之  
始知西溪之於詩其造詣已如此雖求履憲於三  
先生之後而不與三先生同其步趨灑然有以自  
成爲黃子之詩蓋三先生皆早膺簪紱故雍容揄  
揚多雅頌之音黃子則碩人邁軸春酒羔羊自陶  
其風人之性情而已汝成頃又重刻顧亭林先生  
日知錄加以箋釋夫亭林氣節足媿陶菴其學問

文章亦與震川分行而並時聞其墓在崑山城外  
不封不樹爲若敖氏之餒前此余在吳門未及表  
章至今缺然以爲憾亦有能繼張子黃子而起者  
乎夫詩以道性情性情之至者將尙友賢人君子  
於千載之上而同其欣戚此詩之本也黃子之詩  
則旣得之矣余又因其子之重刊日知錄不能無  
念於亭林也

小容齋詩鈔序

宜黃洪介亭先生沒後其詩藁存夏森圃篋中數年矣曩嘗與友人朱蘭坡劉芙初諸君爲之參校互有去取最後顧南雅刪定爲十卷丁丑冬南雅乞假還吳臨行復以授余俾刻之蓋先生已矣其一生心血在是久之恐散佚將隨荒煙蔓草而俱泯斯我輩之責也爰商之森圃及諸同人捐貲付剞劂氏先生爲有宋文敏公邁之齋故題其書室曰小容齋祖父以上七世爲諸生至先生始通籍仕於



朝其爲人豪邁古直好使氣落落真詣顧獨刻意於  
詩四歲卽以能誦唐律聞長益卓犖有聲譽序聞  
乾隆己酉以選拔入都實出大興翁覃溪閣學之  
門閣學故邃於詩先生從之游益自激厲及嘉慶  
戊午舉鄉試壬戌捷禮闈入翰林一時襴衫白紵  
登壇而角藝者未能或之先也旣而假歸游洞庭  
陟廬阜往來吳楚閩越齊魯趙魏之郊所見益廣  
其詩益富又嘗典試秦中登華山絕頂信宿賦詩  
馬秋藥太常爲作圖一時名士題者甚衆余時方  
使西川先生先以詩送有云歸日浣花祠下拜詩

人難得此經過余途中懷先生亦有云天外三峯  
雨洗秋華陰騎馬昨曾游君來正及涼風候歸去  
應登最上頭其時尚未知先生果能至華山否也  
及歸出詩示之始相視而笑以爲白太傅計程今  
日到梁州之比蓋先生胸懷磊落而又好游故能  
昌其詩如此方病革時猶伏牀几手自塗改其藁  
有丁敬禮佳惡自得之意故余於是編不敢臆爲  
刊落於諸君子所刪去者多復其舊至其詩之蒼  
勁典雅真力彌滿則世自有揚子雲不患無知者  
余無庸贅



蔣錦橋近游雜綴序

文獻之書記郡國易記縣邑難記通都大邑易記  
山鄉輿壤尤難郡國類多紀載取古人成說參互  
錯綜卽可成書縣邑較約矣然通都大邑冠蓋往  
來猶多見於筆墨惟山鄉輿壤車馬罕至記載遂  
稀偶有所徵或出遙度之辭與身歷其境者終隔  
一塵以故人物往往湮沒而成書尤不易永州於  
湖南爲邊郡其山水之奇秀甲於天下然自柳子  
厚始發皇之前人不多及也永明於永州則又遠  
矣昔人云五嶺之都羅卽其地以其僻遠山川掌

故多所漏略錦橋先生爲庶常時乞假歸里耳目所及隨手劄記爲近游雜綴三卷雖亦說部之類而於文獻爲多視鄺湛若赤雅田山薑黔志差相等亞或謂先生此書疑於弛章甫敦角巾輟熊蹯登蔗蔗則又未明於拾輯之難於山鄉奧壤尤不易也先生今官比部勤於職事勾稽簿案一字不肯假易有合於古人欽卹之義是編雖一斑亦足以見其用意之不苟矣

陶笙樓剩稿序

吾宗自晉太尉桓公封國長沙祠墓在焉子孫布  
居吳楚間其在同郡者則長沙寧鄉安化瀏陽湘  
潭爲尤著以文名者代不乏人曩與季壽大令同  
寓京邸議欲拾輯之以備一家文獻未暇也季壽  
旋之官山右而麓樵適自長沙來過從時數因得  
悉其從弟笙樓之才刻苦力學戛戛然心期乎古  
而尤邃於詩與之游者如易午亭農部楊秋笛孝  
廉皆有文名每云得法於笙樓余心儀久之方謂  
有才如此木天金殿間自應位置一席不日歌鹿

鳴而來得以促膝上下其議論而昌吾家之詩亦  
一快也而不意笙樓遽貧病以死易簣時猶曰占  
一絕午亭爲余言之甚悲且言笙樓生平爲詩不  
下數千首每吟必斬絕作不經人道語及成亦不  
復省錄往往隨手散棄其門人吳勞二君搜檢遺  
篋僅得若干首恐日久併此逸也擬授諸梓而乞  
序於余余曰嘻甚矣才人之多窮也文章之遇合  
固有命乃其傳不傳亦若有命焉則何也古之人  
如向秀之注莊爲郭象所竊李長吉古錦囊中所  
嘔心肝沒後爲仇者投之溷中彼二子者皆爲人

所厄而其所作固未始不傳也今笙樓之詩諸君子方且珍重愛惜收拾於吉光片羽而所存顧僅止此則豈非命也夫昔先君子生平著作甚富偶病中爲人攫去綴輯數年亦僅得十之二三丙子乃刻之揚州所謂黃江詩存古文存者也友人鄧湘臬作跋謂嘗鼎一臠見鳳一毛已足不朽談者以爲知言今觀笙樓此集猶爲之感喟不置云笙樓名丙壽原名振笏長沙諸生嘗有二蕉餘話四卷秋笛爲刻以行世



|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|--|--|--|--|--|--|--|--|--|--|

羅庶常遺詩序

余來江南之歲聞石友在其從兄鎮江守琦署將  
作書訊之俄聞石友死於虜石友死矣白玉樓作  
記天上差樂不苦惜不得覩其筆落風雨時也明  
年柘農從江西來攜其橐行篋出以視余秋鐙半  
炮然官燭讀之相與愕然怛然驚且惻已而慨然  
歎知石友不盡也石友名瑛善化人年二十舉於  
鄉厄公車者九年嘉慶丁丑始成進士入翰林其  
人淳和清穎氣宇翛然熟於經義駢體律賦擅一  
時尤精小楷秀潤天成在吳興衡山間與柘農昆

仲尤密常主柘農所余時過其齋談論甚愜顧獨未及其古今體詩不知其清亮峻拔如是也楚之爲國也以叢木得名尤以香草見重如屈子所賦申椒桂蕙留夷揭車杜蘅芳芷胡繩嘉橘之屬與夫薜荔水中芙蓉木末泌哉其馨已而其中有九畹之蘭者尤楚之翹也觀其風苗雨葉含薰而吐葩如佳人空谷如幽士深山而識者顧目爲王者香其品貴也卽秋風萎落而沆澧公子之思猶縈於騷客余於石友遇之矣石友客死其橐佚其弟璩輯之僅得若干篇附以駢體數篇吉光片羽存

其概而已長沙白賈生賦鵬其少年往往多悲死  
余所知近日如李中翰在青易農部潤槐黃廣文  
本騏徐廣文晝堂文孝廉良策唐秀才業敬及吾  
家季壽大令笙樓秀才皆才士皆不幸早死序石  
友詩不禁慨然歎白玉樓中多楚材也



黎環齋詩彙序

環齋郵其近彙屬余論定且以詩見懷余揭其詩壁間來讀者相詫也出其彙示之則又相詫也君之詩方進未已而詫者已如是是可與言詩也已始余以辛酉春偕計北上遭君於江漢間翩翩然美少年也時且游京師冀得如馬荏平以發抒其奇踰歲無所遇刺滅而歸士大夫知其詩者多惜之然君雖不得志而其詩顧益進數年來塵甑土爨茅屋秋風飢寒憊於膚奔走癡於足舉夫蝸牛幻國蒼狗浮雲一切可惋可愕皆寄諸吟咏宜其

煩哀噍殺抑鬱而無聊矣迺觀其詩顧多蕭閒自得之趣如人賴病將雙足歇天教貧得一身閒一春臥病人初起滿地落花君獨來茶煙忽向竹中出山雨有時溪上來杉皮屋小蒼苔澀石骨秋寒老樹斜江村犬吠月徐上野寺鐘鳴船早開隨舉數則皆吐屬自然真可與言詩也已夫詩之爲道派別不同要歸於性情之正而已君之遇可謂窮矣而其詩乃如此不謂之能道性情不得也昔

先子嘗見其詩而賞之今橐中有讀先子遺集云名教當場一老在文章前輩幾人存又云消受

辦香薰沐處梅花爲骨月爲魂可謂獨知趨向者  
余擇其佳句如右足見都人士之詫賞不謬環齋  
其益知自愛也





鍾山書院課藝序

江左爲人文之藪而鍾山如龍蟠扶輿清淑之氣蓄洩於茲

國家人文化成因明制立書院歲選高材之士肄業其中儲他日通經學古之用意甚盛也余以庚寅

秋恭膺

簡命建節斯土得時以退食之暇進諸生觀其角藝四年於茲矣適院長胡竹村先生將有課藝之刻於以覘諸生詣力所就之淺深非苟爲標行卷博虛譽也夫自八比取士之法行雖魁才碩學不能不

降而就律令至其文之高下則隨時地爲轉移要  
惟以實而不以華爲能垂世而可久焉古稱揚州  
其氣輕揚而上浮江鮑徐庾所患非藻繪不足也  
我

世宗憲皇帝御書敦崇實學懸之講堂其隱寓箴砭而不  
之正鵠者至深切矣夫學何以實蓋必從衣錦尙  
絅之始以馴致於不見是而无悶之域而後讀古  
聖賢之書恍若警欬接而聲與通故發之爲文悉  
如古聖賢之所欲言而犁然有當於人人之心亦  
如親見古聖賢而聆其意中之所欲言以是出而

應有司之知其亦可矣遇與否則命也有實學斯有實行斯有實用非是則五石之瓠非不朽然大也其中乃一無所有以中無所有之人卽倖邀有司一日之知責其實用難矣哉往時盧抱經錢竹汀姚姬傳諸先生嘗主斯席皆以實學爲教數十年來流風未替今又得胡先生爲之提唱吾見其風氣蒸蒸日上也故於課藝之刻重舉

聖訓爲諸生勗焉



尊經書院課藝序

刻鍾山書院課藝將竣而尊經院長任階平太史亦彙其尊經課藝見示遂同付之梓蓋金陵有二書院一鍾山一尊經其歲取高材而廩之餼之月燬而季煉之均也則諸生之角藝於尊經與角藝於鍾山亦均也余之所以告鍾山之士者尊經之士亦備聞之復何贅焉抑余更有說夫

國家造就人才自三年大比歲科兩試之外又以書院課試輔貢舉之不逮其所望於諸生豈惟是能爲制舉之文遂謂然自足哉亦將厲之以通經學

古而致諸用也昔胡安定教授蘇湖立經義治事  
二齋一時經術極盛今書院以尊經名猶前志也  
院長太史爲翼聖先生之孫以經學世其家者其  
教人又可知也夫六經謂之經四子之書亦謂之  
經經者常也聖賢之言如天地之常道範圍而不  
過曲成而不遺約之爲四子散之爲易詩書禮春  
秋不貫通乎易詩書禮春秋而能闡發四子吾不  
信也不貫通乎易詩書禮春秋以闡發四子而能  
代四子立言吾尤不信也夫卽末可以知本有得  
於經則根茂實遂言中體要皆經之精液也無得

於經雖獵取浮華譬彼行潦之水朝盈而夕涸耳  
韓子曰約六經之旨以成文故不徒以文人見諸  
生之文其已進於是乎抑猶未也如遂沿而不止  
將他日通經致用之學其端卽於今課藝下之豈  
可以制舉之文而少之哉諸生亦顧名思義蘄克  
副乎所謂尊經者斯已矣



陸  
之  
孝  
之  
白  
身

卷三十七

三  
五

陶文毅公全集卷二十八目錄

文集序

柳林黃氏族譜序

田頭蕭氏族譜序

石磴曾氏族譜序

益陽劉氏族譜序

安化鄧氏族譜序

徐灣鄧氏族譜序

仙溪吳氏族譜序

安化二都王氏族譜序

資江王氏族譜序

益陽胡氏族譜序

板溪李氏族譜序

湘陰楊氏族譜序

澧陽皮氏族譜序

資江夏氏族譜序

楚南梁氏族譜序

小淹楊氏族譜序

石牛岡胡氏族譜序

山口姚氏族譜序

益陽羅氏族譜序

會稽陶氏族譜序

蕪湖陶氏族譜序

碧田劉氏族譜序

浮邱胡氏族譜序

益陽鄧氏族譜序

橋頭劉氏族譜序

梓梁文氏族譜序

駱學博年譜序



文集序

柳林黃氏族譜序

古者諸侯世國大夫世家其世系皆小史掌之司馬子長作帝紀世表年表一則曰子讀牒記稽其歷譜牒再則曰讀春秋歷譜牒故桓君山有云太史公三代世表旁行斜上並效周譜此譜所由昉也嗣後官譜氏族篇稍稍間出九品中正之法行氏族益重雖卑姓雜譜皆藏於官而歐陽修廬陵家譜則全法史記年表爲之於以見譜與史之表裏爲用而學士大夫有志敦宗族者所宜急矣吾

邑龍塘黃氏其譜凡數修首之者曰郭莊繼之者  
曰佐庵蓋自其祖貞利公從江西吉州始遷於此  
越九世至萬禮萬章萬石而族始分萬禮官江陵  
遂居焉萬章子元珪居白溪萬石子元瑛居山下  
元璋居柳林戶口皆蕃而元璋從明太祖以軍功  
授指揮其子孫析爲六房是爲柳林黃氏之祖方  
洪武初將軍廖永忠平章楊璟等以次平廣西湖  
南諸處而辰苗猶竊發爲害元璋奉命征討路出  
桃源之燕子岩駐馬題詩手摩崖壁其意氣慨慷  
犖犖乎鄉賢賀興隆李煥文之流亞也顧興隆得

李東陽之傳其名附見明史煥文雖無名人傳之  
縣志猶列諸人物獨元璋事跡無聞焉其軼乃見  
於桃源縣志自非無據而當日秉筆諸君子失於  
揆討則亦不能辭其咎也 先君子在日曾慨然  
於邑志之舛漏思有以更修之惟元璋之嗣篤庵  
文圃惕齋樛林數先生與有同心不幸書垂成而  
謝世先生兄弟每用傷歎今觀所修柳林族譜溯  
本尋源若網在綱益歎其宗之多賢者故成之如  
此其易而元璋之事則且跋涉山嶠躬訪而備載  
焉使當日志館中見此當不至缺畧弗道然後知



譜與史相爲表裏誠不謬也余以樛材廟名史館  
每欲按古人逸事傳之以附於司馬氏網羅放失  
之義如元璋者功烈可存固所樂聞觀斯譜之成  
不可以無言也爲序之如此

按元璋爲明太祖廟諱黃元璋以軍功仕至指  
揮在洪武時名同其君殊不可解門人海州許  
石華據沈氏野獲編謂明初避諱之法甚疏又  
據陸氏帝王廟諱年諱譜謂明人避諱惟離其  
字上下其文過時則否然不應同時而兩字之  
上下悉同攷諸桃源縣志及桃源燕子岩摩崖

與柳林黃氏舊譜皆無異文因準公羊春秋器  
從名地從主人之例存之以俟再攷

三才圖會卷之三十一

...

田頭蕭氏族譜序

蕭氏之先出於宋大夫蕭叔大心以采邑爲氏至漢文終侯何以功第一封於鄞齊梁而後世稱右族唐書載過江僑姓王謝袁蕭爲大而蕭氏七葉八相史氏尤豔稱之其居吾邑之田頭蓋昭明太子之後有諱儉者觀察湖南遂家焉後因馬氏之亂遷於江西宋神宗時開梅山置安化縣其孫國清乃由泰和轉徙於此傳四世至郟城令應福子孫益繁與余家衡宇相望互爲婚姻其族譜旣遠有所承而纂輯之舉至再至三至是復議續輯而

乞序於余余惟譜牒之修繫之地望而不惑質之  
姓氏而無疑綴之婚姻而有別古者官有世胄譜  
有世官不通歷代之說不足以言譜也史記蕭相  
國何沛豐人漢書蕭何沛人一人無籍兩邑之理  
則漢書較密顧蕭爲宋邑何爲沛產鄧在南陽世  
家年表皆無別徙蘭陵之文而今之言郡望無不  
蘭陵者漢書蕭望之東海蘭陵人亦不言其爲何  
後以故顏師古有言近代譜牒妄相託附乃云望  
之蕭何之後不知鄧侯漢世宗臣子孫具詳表傳  
長情博通古今能言其祖若實承何後史傳豈得

弗詳不然之事斷可識矣田頭蕭氏旣云鄮侯後裔而亦系郡蘭陵未知於師古之言何如今觀其全牒斷以始遷之國清爲祖蓋以傳信也國清之前至於昭明以上及鄮侯凡江西舊譜所有者仍別圖於卷首志慎也雖不可詳固亦不得而略也君子之於譜期於敬宗收族以尊其祖於以質於古所謂善爲譜者而亦無以過也余旣避其請因卽芻蕘所得者以告之傳曰公侯之子孫必復其始蕭茂族也尙思所以無忝歟



石磴曾氏族譜序

曾之先出於姒自宗聖傳孔氏之道子孫與顏孟並列爲四氏世居南武城其地在今嘉祥縣明嘉靖間嘉祥裔絕詔求得五十九世孫粹質於永豐山中遂令還魯衣巾奉祀先是十五世孫據避王莽亂自魯遷江西至是復由江西歸於魯逮我朝而世襲五經博士聖賢之澤長矣當粹質未歸時宗聖後裔已流行吳楚甚衆其在吾邑者自紹興中肇元始肇元由江西來居石磴鋪再傳至應龍以孝廉起家子孫散居縣境而上舍筠齋先生則



自其大父徙益陽之十里子孫猶歲時省墓安化  
不忘本也惟聖賢之道同於天地而傳世既久亦  
不能不與時爲盛衰以孔子之至德歷代尊崇迨  
五季之亂闔族殲於孔末惟仁玉匿外家獲免一  
髮千鈞迄今子孫以萬計然長房之裔實從宋高  
南渡居於衢其世爵在曲阜者皆次支之裔也轉  
徙變遷與曾氏略同而衣冠文物殘缺已多嘗讀  
孔氏之譜如史記所載慎字子順者譜或作謙或  
作斌已不無可疑又自晉武帝泰始三年至宋文  
帝元嘉十九年凡一百七十餘載祇有疑撫懿鮮

四世而如晉書武帝太元十一年封孔靖之爲奉  
聖亭侯宋書元嘉八年奪孔繼之爵十九年授孔  
隱之二十八年更以孔惠雲爲奉聖侯譜皆不載  
若謂舛漏則唐書世系表又與譜同斯固未知其  
孰是而孰非矣他如顏氏之譜載復聖娶戴氏生  
子歆孟氏之譜直以孟仲子爲二世祖皆未敢確  
指所據也而曾氏之譜顧猶有可述豈不以鞏肇  
諸君道德文章能言其祖故於江西之系較詳卽  
東魯大宗猶藉以資考鏡况安化分支之時距鞏  
肇未遠應龍諸公又皆彬彬有文其譜之不漏不

支瞻而有體宜矣於是筠齋先生方鳩其族人修譜而以序爲屬余於先生有孔李通家之誼微先生言固將執筆紀之且大賢裔也附名編末有厚幸焉

益陽劉氏族譜序

友人冠南翼芝兩劉子以書來京師索余序其譜  
余故諗其爲益陽茂族明初由江西遷居十里至  
其所爲譜則非數千里外所能臆說輒爲綜舉史  
傳言劉氏之文以備採擇焉蓋余考古姓氏之書  
其最難譜者莫如劉氏有始爲劉而後非劉者有  
始非劉而後爲劉者有同爲劉而異其源者有同  
爲劉而異其委者傳言陶唐之後有劉累尙巴商  
末徙封堯之故墟爲唐氏周封其後於杜陵爲杜  
氏杜伯子隰叔奔晉生士蔿爲士氏其後又爲范

氏爲隨氏北史後周賜武鄉公劉志姓宇文氏長  
廣公劉亮姓侯莫陳氏又錢鏐據吳越其民避嫌  
名改劉爲金氏此始爲劉而後非劉者也史記高  
帝五年封項伯四人爲列侯賜姓劉氏六年封婁  
敬爲奉春君賜姓劉氏又高帝以宗女妻冒頓單  
于其俗貴者皆從母姓改爲劉氏此始非劉而後  
爲劉者也東周時王朝卿士食采於劉以邑爲氏  
者則有劉康公夏獻公摯文公伯蚩以及劉毅劉  
佗劉州鳩其仕於晉者又有劉難此同爲劉而異  
其源者也劉向頌高帝云漢帝本系出自唐帝降

及於周在秦作劉涉魏而東遂爲豐公此漢祖所  
自出也其曰彭城劉氏出於宣帝子楚孝王囂而  
高帝弟楚元王交亦居彭城至劉宋時分析爲三  
帝室居綏輿里左將軍懷肅居上里豫州刺史懷  
武居叢亭里及劉道產所居呂縣凡四劉同出元  
王同曰彭城其出高帝兄代王嘉者曰宏農劉氏  
出長沙定王發者曰南陽劉氏出趙敬肅王彭祖  
者曰廣平劉氏出膠東王寄者曰平原劉氏出魯  
恭王餘者曰東平劉氏而又有梁郡劉氏出梁節  
侯暢尉氏劉氏出河間孝王開臨淮劉氏出廣陵

思王荆涿郡劉氏出中山靖王勝其他如蘭陵杼  
秋宣城陳留諸劉氏更僕難數此同爲劉而異其  
委者也夫以劉氏之蕃如此其別如此考古者每  
難言之白虎通曰人之有姓所以崇恩愛厚親親  
也又曰族者湊也謂恩愛相流湊也君子觀於族  
姓之義而因有事於譜如劉氏者果何以質之而  
不惑乎雖然譜以傳信斷自其可知者而不知者  
缺焉君子之義也揆之尊祖敬宗收族之意亦如  
是而愜耳冠南翼芝之譜旣遠有承藉而其同事  
諸君皆敬慎以有和雖未得覩其全牒固知其必

能因源竟委以衷於是也





安化鄧氏族譜序

吾邑之人皆安土重遷羣萃而州處故每都各有著姓其在四都者則鄧氏爲最鄧氏之先出南唐李從鎰後主煜第八弟也封於鄧爲王宋太宗初詔捕南唐宗室甚急其子天和逃之易李姓而以父封國爲氏其後有官楚之義陵者遂家焉又數世始來宅於茲迄今戶口以數千計蓋嘗論之五季之世壞亂已極惟南唐以宗室後裔聲名文物猶有可觀故論史者每欲以嗣正統方後主歸命時太祖旣爵以徹侯復錄用其子弟天和獨恥之

而隱居新淦之桃花溪其亦節義之流亞歟及難  
作又能跳身遠逝以全先祀合於箕子明夷之義  
其有後而能昌熾也宜哉譜凡數修前此爲之詩  
者有宋楊龜山先生爲之跋者有元吳草廬先生  
及明解公大紳一經堂記皆在焉今其族方事續  
輯而問序於余余何敢辱楊吳諸先生後顧諸先  
生於天和之節義尙鮮發明故特表而出之使知  
鄧氏之保世滋大勿替其後蓋非無自而然也維  
時職纂輯者爲某先生其祖諱天人以孝廉官興  
國州學正尤有功吾邑學校云

徐灣鄧氏族譜序

譜學始於周而盛於漢若鄧氏官譜其最先者也  
至宋臨川鄧元亞撰古今姓氏書四十卷其文散  
見於永樂大典乾隆中奉

詔開四庫館乃摘輯成編論者謂昔之官譜不可見是書

存猶可得其大略然則言譜學宜莫如鄧氏矣從  
兄蘭江先生館於益陽鄧氏適其家修譜成丐蘭  
江書請序蓋其祖元太於宋開寶中由江西太和  
遷楚邵州之石牛塘崇寧五年升邵州武岡縣爲  
軍理宗元年升邵州爲寶慶府遂世爲寶慶府之

武岡人我

朝康熙四年有諱名楚者由武岡遷新化之油溪大塘旋徙益陽十里之徐灣至今七葉矣世有簪纓數典而忘君子懼焉斯譜之所爲作也余考元亞書所載鄧氏源流謂商高宗封季父於河南爲鄧侯別賜姓曼後併於楚以國爲氏而羅泌之論又謂鄧爲仲康子國楚之北境史云阻之以鄧林者卽今之南陽實漢高密侯禹所從起是則鄧之得姓其爲妣爲子雖博雅者且難折衷而定於一是矧後之爲譜者卽今觀鄧氏舊系乃載鄧爲唐叔

虞後至吾離始封鄧侯其後爲南陽之望是又於  
妣子之外別出姬宗固有難於臆斷者矣雖然舊  
系所載乃江右舊譜之文雖不敢刪亦不可得而  
詳也由武岡而新化而益陽世次漸近是則不可  
得而略也鄧氏之譜祖元太而宗名楚以前者則  
存而弗論合於多聞闕疑之義而尊祖敬宗之意  
卽寓於其中於以媿美漢之鄧氏官譜宋之鄧氏  
姓氏書又何難故曰言譜學莫如鄧氏也



仙溪吳氏族譜序

今夫百齡之木柯十而枝百條十同葉萬同其根  
祇則一使眇其葉而曰是去本遠不由於幹可乎  
羅泌有言姓者性也山行十驛形不脫祖水行千  
里性本其處子孫十世不免性類我者諸姜性宏  
諸姚性仁張王性寬李趙性慤劉范性急嬴偃性  
雄豈聖人故爲區哉惟其原有以使之是以古者  
司商協名姓而又有世本之書以明系牒辨族屬  
如此其重也吳氏之先出自秦伯傳弟仲雍號曰  
吳仲其後因以爲氏迄今江南之吳猶能溯其世



次其徙居吾邑大橋仙溪等處則自明成化時有  
諱安逸者從常州之江陰而來蓋少誠之子邵裔  
也歷今十餘世派衍益繁其初某懼其遠而無紀  
也爲譜以類其系而乞序於余竊惟氏姓之著人  
倫之所由敘風俗之所由篤昔人以伊由唐堯眡  
出眡叔指爲繆妄若吳族之導源姬水傳世勾吳  
則無是也傳言姬之性廣又吳之字義爲大言惟  
廣惟大於義宏矣諸君旣譜其系尙論其世庶知  
所養乎哉

安化二都王氏族譜序

乾隆乙巳余年八歲先鄉賢公始攜之上學其時館二都王氏得與其族之賢人儁士游而義由先生來講學尤密先公每言先生吾石友也余時雖無知固已心識之迨後從先公應試數與先生晤備聞緒論迄今三十年如目前也戊寅夏先生以書及族系寄京師云方有事於譜俾爲之序蓋王氏之先出自周靈王太子晉有子宗敬爲周司徒時人號曰王家因以爲氏其後在秦爲武城侯離生二子曰元曰威元徙瑯琊卽晉南渡後

之烏衣王氏威之後曰霸遷居太原傳至後魏鎮  
東將軍瓊生四子唐書表所言四房王氏也僖宗  
末年瓊後該避亂入蜀遷居吳之廬陵往來什香  
荷山合田諸處明正統時有諱琳者攜子銳授徒  
安化之栗溪旋居益陽之洞沖然猶返葬江西也  
銳子濟又由洞沖定居安化二都之柑子坪椒聊  
繁衍衣冠日盛蓋其譜自宗敬以來有世次可稽  
者如此余考唐書宰相世系表及古今姓氏書言  
子晉八世孫錯爲魏將至頤凡十四世頤生翦翦  
生賁賁生離至威爲四世威至霸爲九世霸生成

咸十九世孫澤澤生永利會孫承是宗敬至霸已  
二十七世至承則五十一世矣今譜稱二十二世  
霸三十世承與史不合顧史氏之文亦不盡可據  
卽如表載錯之子賁而翦之子又曰賁翦之祖元  
而離之子又曰元其時年代未遠何至以子孫而  
襲高會之名竊意史本有誤而姓氏書因之世次  
不合亦不得遽援以議譜矣夫譜以同宗合族屬  
非以侈華腴也白樂天唐之聞人而自敘其宗派  
至謂白乙丙出自楚之白公勝年代顛倒遂貽口  
實故譜之修不易言也今先生以經濟之學聊一

發之於譜其意蓋以近而可徵者爲主故於吳楚  
之系尤詳乃其自序猶以謂二千六百餘年之舊  
系間有差謬而欲考訂於廬陵舊藏之本是其精  
慎不苟異於世之爲譜者余故不敢以調言進而  
敬致其芻蕘之說所以答先生意也兼以誌其族  
之賢者

資江王氏族譜序

王氏邑著族也自戶部昭亭先生兩娶於吾家一爲修武知縣石城公之孫女一爲雲南知事守豫公大女其時兩家子弟皆鼎盛幾幾乎珂於里而笏於牀矣互爲婚姻至今罔替余年十二隨先鄉賢公館於虎文上舍家嘉慶辛酉與萬泉學授公車北上旅邸同燈火者二載繼又與平舫明經爲兒女姻計里中戚婭多矣而於王氏羣從尤愔愔然有相親之意親以婚媾也尤親以道義萬泉舉鄉試之年余始游於痒其後十五年成進士而

余方官於翰林二人者出處相爲先後已卯冬余奉

命備兵川東順道假歸而萬泉方自寶慶教授奉諱里居握手眷然時方與其族之賢者議輯族譜尙未就也

今上卽位之初余首被

恩命擢授晉臬地居太原故王氏郡望所在下車之始卽詢其風土人民而王氏之族罕有存者蓋古今之世不相及久矣因念平生宦游足跡徧天下所見人民城郭大都非故而吾邑介在山陬其民

羣萃州處往往數百年不易其地孫孫子子婚姻  
洽比有桃源雞黍之意若吾家自吉州公以至舜  
卿王氏自子明公以至孟俊孟說皆從江右來占  
籍在安化未置縣之先非夫源遠而流長奚以致  
此於是其譜告竣而平舫自京邸以書索序且致  
萬泉諸君之命竊惟王氏之族優龍劣虎自昔已  
然姓纂言王氏新望二十有四皆出子晉後其系  
世之遠與敦宗之誼京國諸君子序之詳矣獨念  
余與王氏居同里行同倫盛衰同忻戚俯仰之間  
有不能已於言者爰因其請而發之俾覽者有所



陸文憲公全集

卷二十六

六

興起焉

益陽胡氏族譜序

家之譜猶國之史主於傳信而已嘉慶己卯秋余  
赴官川東便道歸里過姻丈胡律臣先生於益陽  
志局先生因言志者史之一體州縣雖紀一隅將  
以備史宬之採猶之譜牒爲一家之學而隋書新  
唐書皆列入史部徵文考獻要諸直筆也余重然  
其說是時令嗣雲閣方以一甲第三人及第簪毫  
入史館繼而預修

睿皇帝實錄

天子嘉其書有法

特賜召對

命爲提調官俾領館事而先生適以其時成族譜

國典家乘同時並集粲乎懿矣按譜胡氏自漢清公

元代由江西遷寧鄉之麥田六傳至思敬徙居益

陽十九里巖家河是爲先生本支之祖尊甫襟江

公於乾隆中綴族爲譜至是先生復與其昆季王

峰梧岡特堂及族之賢者續輯焉人以謂龍門之

談遷扶風之彪固不是過也余惟胡之得姓莫古

於胡曹世本載其人在五帝時宋代名賢尤多而

鄧元亞姓氏書竟遺胡氏殊不可解凌迪知辨胡

氏有二謂春秋胡國與後魏改紇骨爲胡也其實  
春秋胡國卽有姬歸二姓而圭胡出自有虞不與  
焉若唐人所譏通譜於令狐者又不足論矣然近  
代名儒如歸有光其自敘世譜亦混姬姓之胡爲  
一且言不知其何祖可見譜不易爲而徵信於古  
之尤難也今觀先生之譜祖漢清而宗思敬其餘  
從略斷自其可信者也益陽之胡蕃矣非其支皆  
從略信史之直也亦猶前者修志之意也宜雲閣  
之得所稟承而翹於史館也

附  
方  
考  
古  
三  
十  
五

卷  
三  
十  
五

三

板溪李氏族譜序

姓氏之學盛於唐而國姓迄無定論傳言老子生而指李樹爲姓史又言皋陶之後以官爲理氏傳至利正逃難伊侯之墟食木子得全遂改氏李五世孫元果娶益壽氏女生聃卽老子也竊謂改李旣始於利正不應至老子又復指李爲姓氏族博攷亦言食木子爲氏而取理同音者爲不經然於李氏得姓之源流仍未能詳也按李古刑官成周大司寇之職在虞曰士在夏曰大理管子小匡篇弦子旗爲理注云獄官也大匡篇國子爲李注云

李同理不特此也史記魏世家李克韓詩外傳作  
里克是李又與里通矣至皋陶爲李管子法法篇  
已明載之人但知李之得氏由於大理而不知古  
文理李通用遂穿鑿杜撰而爲指李與食木子之  
說其亦孟浪也已吾邑二都板溪之李其祖必通  
明洪武中由吉安遷此子孫析爲八房分居董木  
溪石牛田黃泥界等處世有冠衿今以修譜竣乞  
序於余余未獲見其譜而於史傳之言李氏者固  
嘗肄業及之太白云我李千萬葉仙翰蟠中州言  
其極蕃也如二都之李蓋千萬葉中之一葉然由

葉而枝而榦而一本之義卽於是乎在余故以李  
氏得姓之源流爲言亦庶幾務本之意云爾



附方家全集

卷三十八

三

湘陰楊氏族譜序

古者官有世胄譜有世官若世本周譜五帝系之類馬遷據以修史記唐書藝文志縷列譜牒十七家其書今多不可見至宋而歐蘇之譜作焉說者謂二家之譜皆可爲法而歐陽子之譜尤善以其精於史事其譜亦全法史記年表爲之也然則言譜學必於歐氏而尤以歐氏之史爲斷楊氏之先出自周宣所謂霍楊韓魏皆姬姓是也考唐書所載望族在關中者曰郡姓以楊氏與韋杜裴柳薛並稱楊氏之爲宰相者前後凡十一人可謂盛矣

而李肇國史補亦言楊氏自震號爲關西夫子至宋七百年子孫猶住閩鄉故宅天下一家而已以此證歐氏之史則楊氏之能世其家尤彰彰已湘陰之楊其郡望亦曰宏農顧獨不溯閩鄉而以自筠遷楚之某爲始祖自某而上至宋筠州守宜中而止宜中以上則略之年遠無徵譜所不能詳也於所不能詳者則闕之抑綦慎也每慨世俗士大夫往往能縱談古今而於先世之事茫然弗省能相識徧天下而於一本九族之親視若途人此非好務其所反亦由譜學之不講無所感發以生其

孝弟之心也今楊氏之譜乃能敬宗收族以親其所親而長其所長可不謂賢矣乎玉泉孝廉以其族方事續輯丐余爲序辭之不獲又懼於言之窳也孝廉嘗與余言史故遂以史法折衷之

附家立台身

卷二十八

法

澧陽皮氏族譜序

古者吹律定姓以記其族人比五音而五之轉生  
四時異氣殊音各二十有五故曰百姓也而又有  
氏者白虎通云所以勉人爲善也或以官或以事  
聞其氏卽知其族也惟天子能賜人以姓如嬀姁  
子姬皆堯所賜也諸侯則賜氏如魯之展氏東門  
氏是已諸侯之支子曰公子孫曰公孫公孫之子  
不敢祖諸侯而各以王父字爲氏若魯三家鄭七  
穆其最著者也自馬遷混姓氏爲一漢魏膏梁甲  
乙相矜以門第而姓氏之源弗講矣皮之姓氏於

古無考于姓編祇言其望出下邳潛夫論雖言田敬仲後有皮氏而不詳所因辨證亦但引漢皮揚及唐末之襄陽皮日休而已其得姓之原皆未之及竊謂皮非姓也而亦不聞以官與事氏其在古人以皮爲字者則如牧皮爲牧師之族鴟夷子皮潛夫論謂其出自子姓然二人者皆閭閻士不得以字爲氏卽古今人表所載司徒皮一作番亦未可爲氏皮之據惟鄭大夫子皮者爲春秋時賢臣雖左傳明言罕虎而罕氏至今無聞意者其子孫或竟以王父字氏而爲皮也夫姓氏之學微矣漢

承堯後自昔相沿而劉子元譔家史及譜攷獨辨  
其爲陸終苗裔王儉譜顏氏謂伯禽支子而魯公  
謂其無據仍以邾夷父公羊所稱顏公者爲祖是  
雖右門華族而有不敢不致其審慎者况於姓氏  
之稍稀者耶澧州之皮游鬢序者頗多近且屢舉  
於鄉矣起宗之望安知其不在是耶余主講澧陽  
適其譜竣請序因以姓氏之說告之云



|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|--|--|--|--|--|--|--|--|--|--|

281-7

資江夏氏族譜序

譜者類也類其事也其名昉於周代若世本所載於古帝王列國諸侯卿大夫之世系皆能溯其祖先以究夫得姓受氏之始則卽所以類其事也後之君子祖其意而遞加詳焉而譜之學益廣吾邑夏氏其先出於夏侯唐武宗時有諱顯者以直諫去官隱於九江因去侯爲夏氏宋太師竦其後也又數傳至孝璋乃卜宅於茲余觀史傳如秦莊襄母夏太后暨夏說夏無且夏統不一而足不應至唐時乃有去侯爲夏之事豈今茲之夏固別爲一

出耶抑其家舊帙固不能無所謬誤耶考唐書表東樓公封杞至簡公滅於楚其弟奔魯魯公給以采地爲侯因謂之夏侯氏其後去魯之沛分沛爲譙遂爲郡人而夏氏出自妘王姓書所載皆同惟元和姓纂言陳宣公生子夏後爲氏臨川鄧氏遂援其說謂夏出於媯夏御叔之後非以國氏不知左傳所稱夏氏者爲楚莊所討其族已湛矣而夏禹傳世四百易代之後安知無以國爲氏者而謂其盡出於夏南耶若謂帝王各有本氏不以國氏則虞舜氏姚而其後有虞思商湯氏子而其後有

商容又何以稱焉然則鄧氏之論未可爲據而夏  
之爲姒亦不在乎去侯與否也夫末世之譖其不  
足徵信者多矣如莆田之蔡其後京者多託於君  
謨文山跋彭和甫譜嘗慨言之若夏氏之溯系英  
公何嘗以石守道一時之激論爲芥耶推此意而  
其譖之不至於謬誤可知已以此類事吾知其必  
能有合於古也因其請爲書以弁之

山崎素庵全集

卷二十六

三六

楚南梁氏族譜序

梁氏受姓夏陽世居江右其遷楚南自元初忠秦  
始子孫散布安化武陵新化各邑分爲五支乾隆  
丙子會合族修譜迄今六十餘年丁戶益繁復續  
輯焉而丐序於余余惟古者大小宗之法備於是  
有小史之官辨世系奠昭穆小宗伯掌三族之別  
以辨親疏蓋所以尊祖敬宗收族如此其至也自  
宗法廢而譜牒之修不可不講矣人易世疏昔人  
所慨非有以聯之奚從向恒河而數沙耶顧禮有  
云同姓同宗合族屬苟非其宗固不可得而合也

同一王也則未知其爲元城歟宜春歟北海之田  
太原之姬歟同一李也則未知其爲趙郡歟成紀  
歟柳城之奚略陽之氐歟是離之未必不美而合  
之反爲傷也乃若賢者之相附則有之矣史言張  
九齡張說爲相乃與通譜系黃庭堅與會稽黃渥  
皆出婺州由七世以上失其譜以年相望與渥近  
復以兄弟合宗此卽近世合譜之說也山谷賢者  
二張名臣決非出於假借雖世次不可知而其宗  
則同故譜亦得而合也梁氏侯於漢爲膏粱華腴  
其前在晉有下軍御梁餘子養在魯有孔子弟子

梁鱣又陳留風俗傳畢公高之後居大梁有梁垣  
氏史記嬴姓分封有將梁氏與夫梁邱穀梁之屬  
凡古有而今無者或多以複改單而爲梁然已往  
者不可得詳也自忠秦以來世次可稽又非若山  
谷諸人之以年相望而爲兄弟者比譜之合也宜  
矣以此收族卽以此尊祖而敬宗余於是歎梁氏  
之澤之遠也



平家物語

卷三十一

三十一

小淹楊氏族譜序

楊氏吾姻也望衡而居江之廣不能杭一葦已卯秋其族譜成適余赴蜀請假過里時其盛奚可以無言嘗考譜之名起於周唐宋以來以譜名者衆矣義例多本之楊氏何言之古但稱某氏譜其曰家譜者自隋書經籍志楊氏家譜始也唐以後家各有譜其曰支譜者自通志藝文略楊氏枝分譜始也古譜不記塋墓亦自楊氏始隋書楊氏家譜狀併塋墓記一卷是也古譜不記生年亦始楊氏劉歆七略載揚子雲家牒以甘露二年生是也子

雲好奇字故改楊爲揚類苑言子雲於蜀無他揚  
今揚不復見亦皆雜於楊矣此猶臆度之詞德祖  
言吾家子雲則知揚故楊也說者謂楊有六族如  
後周楊突賜獨孤氏至隋復賜楊氏又莫胡胡盧  
氏改爲楊氏皆在其後者若唐叔虞之後封於楊  
又周宣王子尙父及景王之子皆以邑爲楊氏國  
語所謂霍楊韓魏皆姬姓也而宏農之楊出自晉  
武公亦以邑氏李肇國史補所稱子孫七百年猶  
住伯起故宅者其先實羊舌大夫之裔也然則言  
譜系於楊氏誠不等於無徵不信者矣吾里小淹

之楊其先亦出宏農顧世次已邈自其祖某公由興國州遷此世有詩書余垂髫時卽以文字見許於從姑丈建中先生而允升太翁尤與先君子爲道義交前輩之流風迄今未沫也其族之賢者趾其澤輯爲是譜遠稽近考惟信之從苟非可信雖漢之四世三公不敢祖也雖唐之宰相十一人不敢援以爲重也子雲之自序所出也言其祖食采晉陽後爲楊侯以難逃於華陰與唐書所敘宏農世系正同而論者猶以爲張衡有言晉大夫食采於楊爲楊氏無所謂楊侯因以歎子雲之說也

疎然則士大夫能自言其世者固不易矣若茲之  
譜其視子雲之自序也進矣義例之精夫何恁

石牛岡胡氏族譜序

益陽之族胡爲蕃余爲之序亦數矣今年玉田茂才以書來言方有事於譜而丐序於余余考胡之見於載籍者古有胡曹又路史言炎帝廟有胡真官者南遷時侍臣也氏族博考載陸終氏次子參胡董姓封於韓墟周時爲胡國楚滅之而后夔之後亦曰胡魯昭公母夫人歸氏卽胡女王符謂歸姓胡洵何世本言歸姓夔出是也他如考工記之言媠胡越世家之言宗胡又墨翟之徒有胡非子皆不詳其所自出惟平王二十六年鄭伐胡武公

日胡兄弟之國不可伐此則姬姓之胡也而後之  
言胡者多本之胡公滿夫滿受封於陳其先則姚  
墟媯水未聞以胡稱也史言大舜之後有圭胡或  
卽胡所自昉然滿爲虞闕甫之子未封陳之先未  
聞別有爵邑又不應父子異國易虞而爲胡也由  
是言之則未知胡公之稱爲國歟邑歟號與諡歟  
况於的所自姓而牒之系之哉十里之胡其系亦  
肇於胡公而世次則邈矣其可譜者曰文秀當元  
武宗時由豫章之泰和遷潭自寧而益其居十里  
之石牛岡者曰福宗生七子其季曰祖達有子四

人所謂下四房也今其族以丁繁各自爲譜祖達之裔亦議修焉而總其事於莆田先生玉田書府等參校其間蓋其譜至是凡六修矣余雖遠隔知其不盤於初也往者歸震川氏自敘其譜以爲出於胡而不知歸姓之胡爲后夔之裔且又雜引姬姓之胡子豹而以爲太史公微之不爲世家言不知於古帝王功臣何祖是不特未見世本且未見路史也余爲雲閣太史族譜序嘗言及此玉田諸君皆邃於古者更以是證之



附文家公白李  
卷三十一

三

山口姚氏族譜序

同邑姚君祖讓修其族譜成以書介魏子平階乞  
余爲序其自述源流起姚墟至於唐代甚核蓋本  
之新唐書姚崇傳至六世有正雅者由筠州官安  
成遂家桃溪又十二世日子禮當元季徙黃陂一  
傳曰南秀明正統中徙沅州再傳曰達曰運成化  
時運徙安化卽今山口姚氏是也其族散在他處  
者尙衆總以桃溪爲始祖云夫譜學之廢久矣魏  
晉六朝門閥相尙譜學於官至五季之亂故籍散  
亡多有不知姓氏之原者於是乎家自爲譜往往

造作名字妄譏爵里溷真誣祖而譜學遂以大壞  
竊謂譜之爲道上以尊祖下以收族昔眉山蘇氏  
譜及於高祖而遠祖之留眉者不及惟拳拳於一  
人之身遞降至於無服遂如塗人幸其未至於塗  
人也譜之以生其孝弟之心使之無忽忘焉其意  
亦猶是也然蘇氏譜依服制上下不過五世揆之  
於義譜與服別服有所限譜不當爲之限也今自  
高祖以上明明有名字爵里可紀而吾以親盡故  
刪之至子又將高祖刪之至孫又將會祖刪之每  
下譜一代則上刪一代仁人孝子於此得無有盡

然不忍於心者乎然則世之爲譜者苟能由流溯源一一能紀所自出而名之字之縱不必皆有爵諡可憑而繩繩有緒亦豈非爲子孫之至願哉特不得取恟恍無據之人以自誣其先焉耳姚君之爲譜能援新唐書以證地望庶幾非浮談無根者然崇傳言三子彛彛奕奕子閔宰相世系表則以閔爲彛子傳又言崇孫勗合宰相世系表則以合爲崇弟元素曾孫勗爲崇元孫均之新唐書也將誰適從乎然則世次之難明雖正史尙不盡足據况乎其爲一家之譜哉姚氏之譜雖遠溯唐虞而

斷以桃溪爲祖其諸善於收族者乎路史言諸姚  
性仁蓋夔夔允若之遺其所由來久矣更願與神  
明之裔勉之

益陽羅氏族譜序

楚南之姓莫古於羅傳言濮羅歸越皆芊分路史亦言羅熊析也後亦入楚爲羅氏羅侯氏長源號稱博雅自言所出當必不妄然其望則莫著於吾郡屈子沈於汨羅羅之名縣因此水經注江水過枝江其民古羅徙羅故居宜城西山楚文王又徙之於長沙是已數千年來子孫布居吳楚間所在多賢益陽蛇山之羅其一也宋建炎初其祖雲邃來自豫章七世至大珣爲元大帥以忠烈著迄明代而益顯若光祿卿觀江西按察使安其最犖犖

者而宗伯文介公喻義當崇禎時扶溫體仁之奸  
雪張江陵之枉文章氣節尤凜然有古大臣風尋  
其世系不可謂非詩書節義之胄也予往來資陽  
與梅亭上舍晤巡漕時孝廉有尙實襄予有勞皆  
文介公之後勁也頃以修譜來乞序予不能辭抑  
嘗考之世本言夏有武羅其後氏焉周官羅氏掌  
鳥獸亦以爲氏急就篇言顓頊之後封於羅左傳  
註羅熊姓一曰祝融之後妘姓後魏官氏志代北  
斛瑟羅氏吐羅氏並改焉是羅之爲姓亦不一矣  
而吾獨有以知益陽之羅爲芊分熊析者正因其

地得之而尤以其人之多賢徵之史言鬻熊之後  
子孫別氏者凡七十有二複氏凡八十有二其十  
三尹及氏於別邑者不在此列可謂光遠有耀矣  
若羅氏者宜其焯於大湖以南歟



下三才ノ三集

卷三ノ

三

會稽陶氏族譜序

氏族之敝起於魏晉以降之官譜膏粱華腴依附假託者多矣而吾陶獨無雜姓風俗通言氏於事則巫卜匠陶柳沖鄭樵之倫宗之此謬說也古無匠姓卜以官巫與陶以地鄭謂虞思爲周陶正亦爲陶氏尤不學之甚虞思夏諸侯以二姚妻少康者安得爲周陶正是蓋誤以虞闕父爲思也闕父之子胡公滿後裔爲陳爲田爲王何嘗有氏陶者耶尋陶之得氏實源於濟陰所謂陶邱者帝堯初封於此其後子孫居之因以爲氏朱公徙陶卽其

地也境與衛接故殷民七族分衛以陶爲首漢高祖卽位於陶而開封侯舍實從之其爲濟陰派無疑也自丞相青至公士元始世土開封大司空敦雖居河南亦距開封伊邇計自殷周逮漢陶氏之族率不出豫州境與濟陰近漢末始南徙丹陽而潯陽之派則又丹陽之分觀三國及六朝諸史傳可見嗣是以來陶氏子孫散見於吳越及吾楚者所在皆是以德行以文章以功業以高隱見者指不勝屈其不類者秀實仲文兩人耳秀實爲唐彥謙之孫避石敬瑭嫌名改焉仲文則潘氏之子見

於王弇州集而後皆各復其本姓是吾陶不但無  
雜姓且亦無不類之人也余嘗爲大司馬桓公及  
靖節先生年譜頃復得無錫陶默所爲仰止錄廣  
其例爲陶氏世譜凡史傳及各書所載陶氏胥彙  
焉猶恨書缺有間如吾長沙之陶自桓公長子廬  
江太守瞻以下迄今布居於長屬十二邑及衡永  
各境者譜牒所載賢豪魁碩代有聞人而徵之史  
策百不逮一前年余由皖移節來吳道出當塗其  
地有橫山名爲陶墓門太平郡志謂皆唐宋六朝  
以前陶氏之塚凡九十有九而能舉其名字者數

人而已其餘雖高官大爵華表巋然已無從而悉也以此知史傳多遺而數典不忘獨賴有家譜存耳會稽陶堰爲衣冠舊望如莊敏恭惠文僖文簡皆明史有傳卓卓在人耳目給諫崇道公始爲譜乾隆中明經元藻續之序言自明成化以來祀鄉賢九名宦十三鼎甲及乙科八十有奇自卿士至封疆守令凡百計可謂盛矣而皆井井羅羅可考其行事則譜之爲功大也比者內翰際堯復增輯焉而問序於余竊謂陶堰之譜善矣闕閱華矣願益勉旃世濟其美以求無忝於成陽穀林之裔庶

幾靖節所云實宗之光者乎



蕪湖陶氏族譜序

陶以地氏堯初所封在今山東定陶縣境與衛接  
爲殷民七族之首望曰濟陽其後衍爲丹陽潯陽  
二派實同出於漢開封閔侯舍高帝功臣由右司  
馬厯官中尉者也中尉總禁旅司巡徼秩最顯赫  
卽武帝改名執金吾者漢承堯後高祖爲漢王五  
年二月卽皇帝位於定陶而侯以其時從之蓋卽  
縣人陶唐之後裔也傳夷侯節侯至侯睢失國公  
士元始復家而後若少府範與李郃定大計安社  
稷司空敦與楊震同徵起至三公後漢書皆載河



南人開封故屬河南則二公爲閔侯裔無疑後世  
傳會遂謂敦孫同同生柴桑侯丹丹生長沙桓公  
侃果爾則司空爲潯陽之祖何以靖節命子詩遺  
之然靖節亦特舉其功業盛者言之所遺實多同  
見鄧名世書丹丹見桓公本傳固非無據又王隱晉  
書載丹長子操任武昌私還視丹病丹責以朝廷  
用我爲邊將取爾爲任而敢越法移行竟不見此  
一節足徵桓公父兄之賢不徒母教卽桓公子甘  
一人其九見於本傳如大鴻臚瞻郴縣伯旗光祿  
勲範皆有事實又兄子當陽侯臻武威將軍輿以

逮尙書夔咸一時有名而命子詩均未之及且其  
所謂肅矣我祖者或以爲武昌太守茂或以爲散  
騎侍郎岱散騎於惠和千里無涉而茂之名不見  
於侃傳至厥考姿城太守則並無其地當爲安城  
而其名亦逸以此知網羅放失之難而世家大族  
誠不可無譜矣丹陽之陶其渡江當在東漢時徐  
州牧謙始見於魏志其子商應未仕而猶子交州  
刺史基屢世繼起長子宛陵侯璜傳威淑及綏凡  
四世五爲交州也次子鎮南大將軍濬生臨海太  
守湮宣城內史猷顧榮謂陶恭兄弟悉南金也又

次太子中庶子抗生康樂伯回傳汪陋隱無忌史  
言兄弟咸有幹用也而猷子于湖令馥死蘇峻之  
難贈廬江太守其後遂居于湖卽今蕪湖東莞之  
陶云余嘗取其譜觀之自于湖以下十六世至唐  
大理寺評事旺而雲祜愈蕃布居宣城南陵及太  
平各屬者指不勝數其墳墓以當塗之橫山宣城  
之灣沚爲最世有簪纓如宋紹定進士開封男諡  
文簡熾鎮江錄事參軍居仁見宋史忠義傳其尤  
著者也由東莞而鶴溪辛圩李陽上下灣街口以  
逮姑山慈溪保豐朗陵其譜或分或合皆以評事

爲宗而導源於開封因思余長沙之系出自潯陽  
自柴桑侯起吳牙門將官至揚武將軍列土而封  
適與宛陵鎮南同朝長沙世子與于湖亦同時殉  
國難迨長沙爲盟主率兵勤王康樂亦左右其間  
同心滅賊彼時潯陽丹陽可謂多才又皆同出於  
開封何以諸公晉接絕無同人于宗之文意者人  
易世疏固無由衆條載羅蹶往歲壬午南陵裔青  
芝自翰林假歸謁余於皖撫署以祠額請余爲書  
念茲厥初四字蓋靖節贈長沙公語也茲觀蕪湖  
之譜更以是書之俾爲人子孫者有所興感云

陸文家公白集

卷二十八

四

碧田劉氏族譜序

譜學難而譜劉氏尤難傳言陶唐之後有劉累尙已劉累者其名非累氏劉也唐書世系表言陶唐氏子孫生而有文在手曰劉累因以爲名是爲御龍氏旣氏御龍其不氏劉明矣表又言士會子孫留秦蓋本之左傳其處者爲劉氏處卽留也竊意劉氏當作留文義始應漢因卯金之識加金同處鎰之鎰故許慎說文有鎰字無劉字徐鉉謂鎰字從金從卯出與刀屈曲相近疑卽劉字者殆非也按說文偏旁有瀏字瀏者水名蓋成周時王畿內

地以水得名者也定王弟季子食采於是因以爲  
氏若康公夏獻公摯文公伯益是也若佗若毅若  
州鳩蓋皆其族也古文簡質時或省水爲劉於卯  
金刀之說尤肖而鎰之音如之遂掇而爲一也否  
則許慎漢人不應爲字書以同文而遺其國姓也  
左傳晚出以能言國姓得列學官意其時已混瀏  
鎰爲劉而改傳以從之子政諸人特藉以證漢承  
堯後而已非不燭其謬也然姬祁自是不分而射  
陽平泉奉春之劉更無論已故曰譜劉氏尤難也  
碧田之劉其譜斷以由吳始遷爲一世推及於江

西之某君而止以前則略之無遙遙華胄之誦蓋  
昔者漢祖名邦史記不載而漢書載之太公名端  
字執嘉史記亦不載而唐書載之後儒猶以爲疑  
若碧田之譜可謂慎也惟慎故難也



下二第の三ノ

五

浮邱胡氏族譜序

余與胡子京南交最久胡氏爲益陽著姓而京南之族則自明洪武年間有貴甫者出江西高安縣來楚凡四遷始定居益陽九里浮邱之麓迄今十有三世矣京南旣輯族譜丐序於余且以胡氏得姓之源流爲詢蓋世之言胡者郡望必稱安定其地在今甘肅之平涼府余考古史胡氏之族凡數姓世本言胡曹作衣是五帝時已有此姓而大舜之後有圭胡負遂武王之女太姬所妻胡公滿是也是爲媯姓之胡平王二十六年鄭伐胡武公曰

胡兄弟之國也其後胡子豹爲楚所併故路史云  
胡子爵楚滅之姬國也是爲姬姓之胡又世本云  
胡歸姓之國夔所出左傳魯襄公三十一年立胡  
女敬歸之子子野是又爲歸姓之胡至其地之所  
在則范史云汝陰本胡國九域志開封有陳胡公  
廟而盟會圖胡在豫之郟城越世家云析酈宗胡  
索隱云宗胡邑也爲胡姓之宗考工記姁胡之笥  
注云胡子國在楚之數說者皆不言安定而自宋  
以來大儒如瑗如寅如安國無不稱安定者此亦  
如劉稱彭城李稱隴西舉其著者言之其遙遙華

胄則雖以林寶之譔元和姓纂而不能自明其姓  
所從來其他抑又何說今胡氏之族散處益陽湘  
潭寧鄉各邑指不勝屈京南乃慨然興綴族之念  
由貴甫溯而上之而世系則斷自遞遷趙家山之  
思彰爲始旣勤且慎尊祖敬宗之義於是乎在至  
於因流溯源則工史書世之職廢久矣芻蕘所舉  
聊以塞下徵之意云爾

階ノノ象ノノ全

ノノ二ノ

ノノ

益陽鄧氏族譜序

昔之善言姓氏者如魯衆仲晉胥臣鄭行人子羽皆能因源竟委瞭若指掌惟籍氏數典而忘周王譏之蓋其時秦火未焚典策具在不必見鄰子而始能言官遇柱下而始能言史也漢魏以降九品中正之法行譜悉藏於官唐末稍凌替矣至宋而有撫州鄧名世之姓氏書其書以四聲分部胡松年謂其學有淵源辭亦簡古其於本姓之源流尤詳與林寶之著姓纂不能自言所出者迥異蓋鄧出子姓自商武丁封其季父於河南爲鄧侯別賜

姓曼而鄧侯吾離嘗朝於魯其後爲楚所滅子孫  
以國爲氏世仕於楚君子稱鄧廖爲楚之良是也  
漢之中世鄧况始自楚徙居南陽新野太傅高密  
元侯禹其最顯者厥後累世寵貴侯二十九人公  
二人大將軍以下十三人中二千石列校守牧又  
不下六十餘人可謂盛矣益陽十一里之鄧自其  
祖獻由江西徙居於楚蓋高密侯裔也獻有三子  
分居寧鄉益陽其舊譜得自江西有朱晦翁序一  
篇言鄧后稷之後在殷爲曼姓至叔虞始封唐傳  
四世生變改國爲晉又五世生吾離始封鄧侯子

孫因以爲氏夫叔虞翦桐受封武之穆也其先世  
在殷爲組紺爲古公季厯安所得曼姓之稱乎此  
眞辭之不可通者闕疑焉可矣至獻以下則廬墓  
具存子姓振振紹美南陽夫何茶焉鄧生隆甲不  
遠千里走皖乞譜序其意不可孤因以鄙見所及  
者書之



陸才家公白集

卷三十三

三

橋頭劉氏支譜序

譜牒之學古有專門自周小史奠系世鄭司農謂世卽世本之屬其在魯語則曰正史書世在周語則曰司商協名姓白虎通曰古者聖人吹律定姓以記其族人秦旣滅學諸侯子孫失其本系是以劉漢之興雖云堯後而太公以上莫詳世次則譜學失官之故也魏晉置九品中正隋唐有圖譜局卽令史掌之仍用博通古今之儒知撰譜事其時官有簿狀家有簿系蓋綦重已五代之季漸卽凌弛觀鄭漁仲所志譜系凡六種一百七十部至馬

貴與文獻通考所載僅存數家閱時無幾而專門之學已多不可考奈何後之言譜者顧欲鑿漢唐而徵名規秦越而綴屬乎橋頭劉氏其先日南仲由豫章官楚之龍陽其子天麒天麟始來宅於茲二十餘葉矣族衆且滋其次房之裔近復續爲支譜祖南仲而宗天麟昭穆尊卑煥然秩然南仲以前推及於宋丞相某雖不忘所自而不敢誣也南仲以下族大丁多親近如天麒雖未能盡合而亦不病其分也以視乎鑿漢唐而徵名規秦越而綴屬者洵不可同日語矣余與劉氏諸君子遊最久

而勗齋復不遠數千里郵書爲請輒爲序之如此  
云

隋文帝集卷三十一  
三十一  
五

梓梁文氏支譜序

文氏之族出於周春秋時若蔡大夫文之錯越大夫文種楚大夫文無畏又衛將軍彌牟謂之文氏之子皆文王後也漢初廬江文黨守蜀興教化其弟子張寬司馬相如輩一時蔚然稱盛蜀人呼之爲翁而不名又越嶲太守文齊不附公孫述以郡歸漢封成義侯又西京雜記文不識家富多書文長禱家一產二男文固陽善馴野雉皆昭然見於記載者惟宋介休文彥博敘其家世乃云本姓敬避翼祖諱拆其字爲苟文二姓按說文敬字從苟

紀力反從支普木反今以苟爲苟且之苟與衛苟  
變之姓無所別而又改支爲文訛益甚矣蓋宋初  
民未知學沿襲俗書故有此失潞公巨勲元老而  
亦不加攷正宜爲鄧名世輩所譏也益陽文氏其  
先亦出文王後唐莊宗時有春元者官帳前指揮  
始占籍江西之永新信國公文山先生其後裔也  
信國有從叔曰正道始分居固塘有子六人其四  
曰存耕以明經官教諭又九傳至福道始遷居楚  
南之益陽其子某居十里梓梁巖族甚蕃科第相  
望嘗取其譜系觀之所敘如此於是其族七房僉

議修譜而太學生賢選與其同祠諸君子有事於  
支牒而以序爲請余官川東時賢選命其子來已  
諾之不可卻也因略爲詮次源流俾弁其卷





駱學博年譜序

永之爲郡在瀟湘之源嶺嶠之際其山水之奇爲天下人所共慕前代名公鉅卿寓此者相望士生其間沐浴餘風往往英犖駿發視他州爲盛少讀柳子厚諸記慨然興懷欲一至其地觀其風土人物以信古人之言然猶恨子厚居永頗久山陬水澨爬梳殆徧而未嘗一登九疑觀於簫韶女英之峰以窮其奇特奧曠之致使子厚而能至其文章必更奇其所見必益有異也寧遠駱君補山九疑之僑者也早歲登拔萃科未竟所志鐸於沅江十

餘載沅人士安其教澤學校之制煥然一新又以  
志乘缺如銳意舉而新之徵文考獻具有成帙而  
君撝謙白矢禮余爲之潤色志館挑燈相處者一  
月有餘事竣以所撰先贈翁年譜見示而以序爲  
請披閱之下具悉其淵源有自積善之慶蓋未有  
艾也昔韓子退之謂中州清淑之氣盡於嶺北蜿  
蜒扶輿磅礴而鬱積當有魁奇忠信材德之士出  
於其間厥後濂溪崛起其言果應若贈翁生平行  
誼其庶幾潛德粹修有意於鄉之先賢者乎箕裘  
克紹乃有哲嗣所謂魁奇忠信材德者非耶雖然

韓子當日蓋慨想其人而未之見徒於枯槁迷溺  
之道士津津言之而余乃躬與駱君交是余所見  
較勝於韓子也足跡雖未至九疑已於君遇之矣



陶文毅公全集卷三十九目錄

文集序

送秦少司空歸無錫序

送周希甫太守赴南河工次序

送同年彭兩峰之官滇中序

送顧南雅侍讀督學雲南序

陽明家ノ全集  
卷三十一

一

文集序

送秦少司寇歸無錫序

小峴秦公以古文名一時宦轍所至矯矯不諧於俗入爲少寇士大夫方以設施望公而公欲然動止足之思屢見

上求去至是復以疾自陳

上雖俞其請而猶

諭以復來然公之歸蓋將不復來也同志諸君念公之去無能以留則相率餞公於城南之陶然亭惟古之賢人其留足以增一時之重其去足以繫異日



之思吾讀白駒之詩一則日以永今朝再則日以永今夕且於其未去也曰繫之維之以冀其稍留於既去也曰爾公爾侯以冀其復至夫人已脫屣軒冕繫維之不可得而欲以好爵縻之謂可以去而復來也勢必不能推詩人之意亦以留之無策而姑以抒其永朝永夕之懷而已方公之兩官浙江也人士惟恐其去其在廣東與吾湖南也亦然一時之別已去而猶望其來而今且解組老矣好爵之縻知不足爲公道慧山二泉之側草屋數間繚以竹木所謂伊人於焉逍遙陶然亭上將不復

有公之車跡焉於是相與繪圖賦詩以附於白駒  
之義而屬余弁其端蓋詩三百篇古皆有序俾覽  
者得以考見當日之情事如公者固不可以無紀  
也同集者爲李宗丞宗瀚趙給諫慎畛謝編修學  
崇階樹林編修培厚劉編修嗣紹賀編修長齡唐  
儀部業謙庶常鑑家大令章瀉及余凡十一人



送周希甫太守赴南河工次序

海與河皆古運道禹貢冀州曰夾右碣石揚州曰沿于江海此海運也其他浮濟漂浮汶浮洛浮淮泗浮江沱潛漢皆達于河則河運也當日荒度之法不傳史臣第總其綱曰導自孟子釋之曰疏曰濬曰決曰排而導水之方始著夫禹之導水一而已而所以導者不同其排決之法多施之南條而北條則用疏與濬凡以各有宜也惟禹能審形勢察脈絡相水之宜而不強以制之所以爲明德也宋元以來言者紛紛不過壘隄而已築防而已而

疏濬則未之及此白圭之法非禹法也禹之治水所以去害而利卽因之其於運也可以海則海可以河則河不可以海不可以河則陸如逾洛逾沔是已後之言運者無所謂陸已而又一於河則廢海一於海則廢河此所以相持而不得其通也計國家仰東南漕以給

京師歲需四百餘萬石由大江入瓜口絕淮渡黃經運河以達通州爬灘駁淺日夜催趲僅而能至設一旦遇大災沴河且壅潰遏糧艘不行將

京師食奚出此其患豈止於河而已耶海運之法雖

怵於風濤然方遠王獻諸人所言由淮安而東歷  
麻灣海倉二口逕登萊以泊天津其間僅一千六  
百里耳地介河海之交未必非夾右碣石之遺而  
議者或猶以迂疏目之遂使官家數千百萬金錢  
歲填無底之河以苟旦夕之安而不可得嗟夫河  
以利漕也漕無息肩之地是河終無受治之時也  
夫河之遷徙無常要自有其不易者水之性利於  
下流不暢則逆逆必溢水之勢蓄於上力不併則  
弱弱必壅然則隄防雖密適以遏其流使怒耳聞  
壩雖多適以分其力使淤耳高家堰之危以洪澤

湖淤也洪澤湖之淤以黃河倒灌而入淮也黃河之倒灌以下河日積而日高也然則治河之策必自下河始下河之治必自疏淪始昔者

聖祖仁皇帝時嘗濬大通口矣

駕臨相視首

命拆攔黃壩疏海口以導河入海次閉六壩疏清口以導

淮刷黃次疏淮揚裏河開人字芒稻涇澗等河而安瀾之慶遂巍然與神禹同功惜後之在事者狃目前惜小費舉一切撈爬挑滌之具奏罷之而海口復涇河事遂以日壞比者河決碭山徐邳鳳泗

之間頓成澤國

天子覽奏至爲流涕此誠臣子竭力効命之秋也而吾郡周希甫先生適奉

特旨赴工次蓋河事棘矣導水之方自有

廷筭在先生之所職則工而已工不堅雖有神禹之指揮而亦無以收疏濬之效夫麻稽柳葦質易腐朽沙土疏浮隨築隨圯計莫若擇工之尤要者易之以石費雖倍而功不啻萬之昔人於白河之淤尙欲令運舟自擁兜杓四五具遇淺卽濬以爲省費之一策今若暫釋運舟每歲搭解京師之倉板



以載石其勞費差足相準而於冬月因駁船之暇  
滌乎懷孟太行之石可順流而下也然此特河工  
之一節耳至於相機宜審形勢終恐非疏濬之不  
爲功也先生昔守黔之大定治行第一故於茲行  
有厚望焉

送同年彭兩峰之官滇中序

庚申之秋與澍同舉於鄉者四十五人明年春禮

部會試聯捷一人方同又明年捷二人澍與喻又

三年捷二人符鴻王又三年捷三人蔣舒惠瞿家

凡四試捷八人惟澍以壬戌入史館餘皆得縣令

以去而議敘暨大挑為縣為學官者又廿餘人至

今歲而入闈僅得八人揭曉捷三人焉三人者名

皆在二甲前皆蒙

恩錄用計館選一劉教學正一蔡信而彭君兩峰復得

縣令蓋本年榜中之以知縣即用者名次自兩峰

始故事卽用皆部選自乙丑多至八十餘人部選  
無期當事建議分發因併及壬戌一科遂爲例引  
見後由部簽分各直省而兩峰獨得雲南雲南去

京師萬里仕宦所不樂兩峰長沙人由長沙西南之  
滇與北至

京師等且得便存省其父母而豔鄉里以衣錦之榮  
然則人所不樂者兩峰得之則樂也抑今之憚爲  
令滇中者不特道里之遙而尤以銅運爲苦銅運  
由滇達川經長江之險凡七八千里迺入瓜口渡  
黃道運河以至

京師其間自陸而舟而車，歷三四年始竣事，令於滇者罕得免焉。竊惟銅運

國家大計，而以邊遠一縣令獨肩重任，犖確風濤之跋涉，長年宵走之覬覦，當之者鮮不竭蹶。因而敗事者亦多矣。計惟有遞運之法，滇輸之楚楚，輸之吳，以次而魯而燕，源源相接，事不費而役不勞，似亦經

國惠下之一道，然而令之賢否不專繫此，且亦不足爲精明強幹之吏難也。昔人稱滇南風土清淑，四時景物如春，百姓安樂，葉榆西洱之間無犬吠聲。

易治之邦誠莫如滇兩峰在同年中最觥觥雅欲  
以功名見其不以爲苦而以爲樂也於其行爲序  
其樂以送之

送顧南雅侍讀督學雲南序

國家樞樞作人首重科目懋簡使臣以司文柄於是乎有學臣有考官考官以科目攬人才者也學臣以人才奉科目者也二者皆膺

特命京朝之臣以爲榮寵然考官不過司去取於一時披覽而外無餘事而學臣則綜理內外綱紀始終有跋涉之勞有校閱之瘁有關防舉劾之責往返三年其任特重於考官蓋嘗論之士爲秀才時則子弟之職也及其入官則父兄之事也爲子弟時目不覩詩書之教耳不聞孝悌之言傾家蕩產顛

覆是虞一日責以成人之事謂可以爲父爲兄而  
長養其子弟也勢必不能學臣之任猶是也去取  
無方教導無法則人材日詘其日任之以事而不  
勝處之以位而不稱甚者勢利適於中苞苴潰於  
外怨毒之不卹刑戮之不威雖從而爲之制業已  
無及矣此生民之大命而有國之通患也明其爲  
患而學臣之任不獨重於考官也乃直先於督撫  
矣同年友顧子南雅立心制行以古人自期自其  
爲秀才時則已慨然有四方之志壬申春大考翰  
詹名在一等

天子嘉之由編修超擢侍讀其年六月

命督學雲南陞辭之日

天子雍容召見語以雲南雖邊徼其民惇且文一切培  
養之法宜立蓋

天子所以俟顧子者厚矣顧子亦可藉是以報特達之  
知而造士於雲南吾聞昆明有錢南園先生澧者嘗督  
學吾楚前後六年其去弊以嚴而待士則寬其法  
制有恒而立事必豫至今人猶思之歷數前後學  
臣無出其右者顧子之是邦其不患無所取法也  
翌歲有爲考官於雲南者方將憑軾以觀顧子之



日本書紀卷之五十四

ナ

教焉

281-6

陶文毅公全集卷四十目錄

文集書

與嚴樂園先生書

覆翁鳳西方伯書

覆黃花耘孝廉書

與王萬泉書

答高麗駙馬都尉豐山君洪顯周書

再答朝鮮權晶山書

覆顧南雅侍讀書

與趙笛樓觀察書

附錄卷之三  
卷之三  
2010.11.21

覆王垣夫先生書

謝邑人公舉 先君子崇祀鄉賢書

覆秦小峴侍郎書

覆秦小峴侍郎書

與卓海帆侍御書

覆陸平泉師書

與百菊溪制府書

文集書

與嚴樂園先生書

記束髮時卽聞先子稱說有淑浦嚴先生者倜儻磊落如古陳同甫一流迨辰苗滋事先生以諸生應撫軍姜公聘與幕府謀議親督鄉兵所在有功事平徵上公車膺

天子特簡名在

九重先子暇則舉以示澍謂有志竟成自恨所處不得與共事因出篋中所藏古風一章蓋乾隆甲辰冬與先生自岳麓歸溯資江而上過小淹至寒舍

之所作也詩旨謂山川靈秀視乎其人豪傑之士  
必不以地自囿今先生既功業炳然增輝梓里而  
先子雖屢躋場屋以諸生終然名山事業識者  
咸謂可傳然則先生與先子出處不同而志與  
道則同也今年邑侯李公纂輯縣志而先子遺  
稟舊爲人所攬並先生大作亦俱散失緬惟先生  
當日與先子船頭促膝唱咏情深一時風流佳  
話允足增光藝林乞飭侍史於大集中錄出原詩  
俾得刻人邑志亦不朽盛事也

覆翁鳳西方伯書

承示敝省通志凡例體大思精文簡事核以此接  
迹馬班上規筆削洵足啟筭路之荒而難湖湘之  
色矣欽佩欽佩湖南舊志始於陳桂林相國今觀  
其書舛漏不一而足似相國固未嘗寓目者卽如  
兩漢時楚湘人物本屬無幾惟蔣琬公忠體國人  
所共知蜀志已明載零陵湘鄉人而長沙府人物  
志內竟無其名漏略至此其他可知又如敝縣人  
數尤少明史有傳二篇一爲張驥一爲李禎俱載  
安化人未分別省分然山東通志名宦總部載驥

湖廣安化人至禎傳則有禎家洮河之語其爲甘肅之安化無疑而舊志顧遺驥而錄禎且於禎傳刪去家洮河一語志以傳信又何必如此遷就相借以爲重耶他如鄭崇儉一傳亦恐是山西之寧鄉而誤入者當更考之耳至於益陽劉侍郎憲之死於逆瑾羅侍郎喻義之黜於溫體仁湘潭李宗伯騰芳之厄於魏忠賢皆忠義皎皎在人耳目羅李傳在明史本末甚具劉雖附傳而益志特詳乃劉李僅寥寥數語羅則並姓名無之此豈文獻不足耶若明陳寧之名在姦臣行同酷吏而誤信楚

紀之言比諸汲黯則又採擇未精難以爲據矣凡此皆長沙一郡之事就澍所知者言之恐別郡類此者正復不少也前承示網羅放逸已得二三百人又徧徵之江浙藏書家則此數條當已在校正之列惟新增事跡勢不能不取材於縣府志而縣府志又未必悉善不皆可憑且非熟悉彼間掌故者其去取亦未必盡當也竊謂修志一事與史不同史善惡並書志則錄其善者而已故與其取之寬而或失之濫毋寧取之嚴而其後猶可增敝縣舊志修於康熙三十年以前先君子嘗手輯續



稟沒後爲修志者率行塗改全乖體制擬再爲刪  
擇以備采取遲容奉教其趙靈伯陳滄洲楊孟班  
陳可齋彭石壘王而農諸公傳謹以呈覽至羅方  
城九峰諸公尙未有秉筆者名宦諸公俟採訪得  
後當錄送不宣

覆黃花耘孝廉書

頃接手書知與虎癡同在志局湘東三管君家兄弟竟秉其二多少潛德幽光賴茲闡發此事重大既以爲幸又以爲悚也翁方伯前函言志書體例一切多係閣下之筆良工辛苦具見一班諒非從前孟浪者比所諭名宦諸公列傳卽當託人鈔錄但館例巡撫以上乃得立傳所鈔恐亦無多仍當於外間訪之大約衆口俱同卽可秉公載入亦不必盡以見諸簡策者爲憑據蓋續纂近事與往事不同往事必徵諸前人之記載近事必參諸與人

之採訪據輿論而纂入省志卽他日統志與史彙  
之憑據也此時館中正在纂輯儒林文苑列傳湖  
湘自王夫之先生而外得入者寥寥弟雖極言之  
而亦未能多收正因無憑據之故是省志不可不  
早成送館以備采擇也至統志弟曾分任編輯其  
後經歷多手每有刪改茲將敝縣已載者另錄一  
分寄呈方伯處吾兄可就近取閱此後有當補載  
者容續寄至今祖昆仲與劉理堂前輩父子昆仲  
皆有政績聞於人口何不縷列一二事實趁統志  
尙未竣工當時示館史采入此亦爲子孫者所當

留意也

陶文没入全集

卷四下 文集

四  
一  
身  
之  
三  
集  
一  
一

五

與王萬泉書

春前接讀手書按其歲月已經年矣關河迢遞消息難通契闊當何如耶伏惟先生舉比談經春風滿座且官居寶慶門前一條水直達百花臺下仕宦而有桑梓之榮儒官而有封君之業以視鄙人碌碌京塵相去何啻倍蓰自握別後六載於斯今春改官御史旋校禮闈闈中殫心竭力繼晷焚膏念各省舉子跋涉來都遠者萬里近者千里襤被春糧餐風飲露辛苦萬端始得入矮屋簷中俯首沈吟成此數藝而以房官輕於一擲不得邀堂上

人之一盼者何限靜言思之殊可矜惻故於分到之卷非經三數過不肯批抹計本房薦卷一百二十本爲文爲策共一千五百六十篇篇俱有評記冊其落卷備卷稱是自問此心差可無歉豈意人心不同遂有以薦卷太多勞其披閱而惡之者是以本房雖得士十二人佳卷之被擯者無數而僕亦自此病矣闈中有句云出戶忽驚新翠合滿階猶惜落花多蓋有慨乎其言之也此病出闈更熾臥牀者已三閱月日來始赴都察院視事江南道爲最繁之缺所司戶部銀庫關稅漕運倉儲皆經

國大計書生本業拙於筭弄稽查一切深虞隕越  
每望南雲輒有林泉之思暉若庶常散館本擬一  
等因詩題錯寫一字一蹶至此聞已改教不日當  
與先生同僚亦不幸中之幸也



平江府志卷之五

名臣一

答高麗駙馬都尉豐山君洪顯周書

頃許君齋到雲函並繭紙蕩丸筆扇五種謂以東國駙馬豐山君之所寄發函盥誦始知豐山君因貴宗人晚窩駱皋使星歸里出示不佞詩筆欣然動嗜痴之意不遠數千里殷勤致訊矜飾有加並詢及先靖節及朱子遺跡具見緇衣好賢之雅誼雖未獲一接平生而蒹葭秋水伊人宛在已如近芝暉而親玉樹矣不佞嘗聞古人論交有形交有神交聯茵接席訂譜論年此形交也至於神交則雖山川間隔天各一方而性情通之寤寐見之風

雨蕭蕭鷄鳴嚶嚶初不以地位而稍異甚者古人  
已往且因誦其詩讀其書而慨然有尙友千古之  
想矧生並一世同處

聖皇雨露之中音問可通千里如面復何遠邇之間耶  
不佞生長楚南之長沙在洞庭衡嶽之交地直匡  
廬之西遠祖爲晉太尉桓公諱侃所謂入州都督  
是也太夫人湛氏有截髮延賓事具載晉書原籍  
鄱陽至桓公始封國長沙靖節先生其曾孫也今  
子孫散居吳楚間或有在鄱陽之柴桑或有在湖  
南之長沙或有在江南之蕪湖崑山雲祢頗繁自

靖節至不佞蓋六十餘世矣醉石尙在五柳則僅

有存者至南康距敝居尙遠而朱子帥潭州時

潭州

卽今長沙講學嶽麓山在長沙城西今有嶽麓書院爲

海內四大書院之一爲四皆朱子講學處有朱

子手書道鄉臺及整齊嚴肅四大字筆法類顏魯

公遺蹟甚多諸生肄業嘗七八百人先賢之流風

尙未沫也不佞幼隨先君子黃江翁讀書其中

一自礪碌軟紅塵中此境殆猶鴻雪矣不佞往閱

圖經見有貴邦學士洪燿書延英閣記甚古雅年

來耳溪先生詩文尤爲先師紀文達公所推許昨

又晤晚窩駱舉兩君子晚窩老成典雅駱舉清標  
玉立皆與不佞一見如故有以知貴族爲東方詩  
書之閥今接觀閣下妙墨益信高明華胄其來有  
自至於函詞珍重語摯情長尤想見劉真長王子  
敬一流人物也遠勞嘉貺愧無以爲木瓜之報輒  
付詩扇一柄對一單條六鼻烟六瓶香茗二餅趙  
帖一本萋萋之意希爲哂納

再答朝鮮權鼎山書

伴來手書具審起居佳適爲慰勇山使者稟累恩  
恩過日燈下草成一序用塞雅屬不足弁珍稟也  
貴友送行各作就其佳者略作評語於上未知有  
當否就中如華西病夫伍伯學昌黎頗得法門矣  
永獻永元兩韓生尤爲情文雙美李晚用洪大用  
筆雖未老亦是將來之秀數子詩余皆擇而錄之  
爲將來選詩之具勇山子詩文余亦錄出數十首  
覺翹然而出其類矣金秋山文筆亦爽但後半眼  
界太小趙存榮詩骨亦古而詞意未醇故不入選

不佞嘗謂東國好詩書獨具華風而詩文流傳者頗少從前以職貢來者何啻什伯至今罕有能舉其姓氏者非盡短於文墨者也以無人綜輯之抑語音障隔倡酬之事少耳今番諸君詩文之樂較盛於往歲而足下天材灑落又就質殷殷屈指記之尤不易得此行萬里良晤難期殊增悵惘來書云行人必欲一面不佞供職臺垣略少暇刻初五日午後稍可撥冗當在寓耳所示梅花新詩一篇留存敝齋爲後日選刻之地以當東國采風錄可也剪山原藁並序及貴友貽作各軸藉伴附還

覆顧南雅侍讀書

前接手書甚悉僕因手足之痛心氣大動幾成怔  
忡遲遲始作報書比雲南試差回京接誦教言今  
午又接一函係留任後得信發來者捧讀甚慰惟  
聞尊體披閱太勤竟有手胝之事此則大非所宜  
我輩上報

主知惟在此身與此心而已心宜盡而不宜耗身宜勞  
而不宜苦古人愛身有爲非以圖安逸也其進銳  
者其退速恐精神過用後將有所不繼或轉以致  
疏虞是急於酬



恩反以孤

恩也可不慎歟所示知名諸生秋闈已多捷發足見相  
士之確而前函有縣府批首多不取之語昨函又  
言官場不無怨恨以不能俯仰從令之故此二事  
須分別觀之如地方官有陵辱士子或要求干請  
自不宜俯仰若批首係地方官所取偶因小疵輒  
棄置其有弊者固不妨任其怨其無弊者又安可  
生其恨乎况批首入場往往矜持太過失其故步  
未必盡關弊竇往見批首有被遺自盡者其情亦  
覺可憫望於此等處再加子細非日邀譽於人也

清而勿刻亦體帖物情之一端耳至於愛惜士子  
自屬我輩當然之理但宜存之於心不宜出之於  
口恐俗士未能體會或以愛惜長其虛憍及至陷  
於罪戾欲救之而不能是亦不可不慮其終也林  
逆餘黨已靖滑縣已復可謂敷天之慶惟深冬無  
雪殊切懸望彭十一令楚雄本可有爲而忽動歸  
興然伊堂上俱年高卽歸亦得也

平定縣志卷之十一

十一

|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|--|--|--|--|--|--|--|--|--|--|

281-6

與趙笛樓觀察書

今春曾致一書未諭已達否比陳荔蓀袖出手書  
語長情重如晤道微惟聞近抱脊令之痛深爲惋  
惜侍亦慘遭此變僅有一弟在籍病故形單影隻  
熒熒千里外視先生之得親嘗灼艾日視含飯者  
其爲痛不尤深耶且弱妻獨子熒熒無依勢不能  
不接取來京而拚擋匪易先生其謂之何同鄉諸  
君惟彭寶臣分校京闈錦橋前輩主試江西侍於  
七月望間與歐陽坦齋石黼廷方雪浦同邀記名  
御史用約計來秋可以得缺惟此官實不易爲動

招物忌卽如江南道長李仲昭去冬劾查某僞造  
加重法馬一案彼時戶部諸人皆欲左袒於查其  
戚友皆一二品大員左掎右搯造爲謗言謂李因  
借貸不遂而劾之吠影吠聲幾致變亂黑白幸

天子神聖命成邸同訊得論如律爲查氏平日所利餌  
之人無不恨之仲昭旋又劾吏部京察不公亦得  
審實於是吏部之人大怒本年赴戶部點卯杖責  
數人而戶部之人復大怒本部堂官至乃倡言李  
御史杖書吏卽杖司官之漸浸假將及我輩有

旨下部議時七月初四日也初顏園先生方以妻喪在

告竊歎息諸公欲報去年之事而加以作弊之稱  
與莫須有何異李御史尙有言膽臺中何可無此  
人部員聞其言遂連夜辦稟議以實降四級及初  
公以初八日銷假而部議已於初六日下矣自奉  
旨暨議覆奉

旨僅隔兩日耳自來無如此之速者雖諸公去疾務盡  
然堂堂大老數人同護一書吏以逐言官殆與休  
休有容者異矣此事公論旣不平之李御史以母  
年老不辨而歸先生倘與見面不可不悉此原委  
以先生古道照人輒爲縷述如此至恃之才疏學



覆王垣夫先生書

卯秋長沙一別彈指十二年矣每憶麓山風雨斗  
酒縱談先生與先子笑貌聲音宛乎如昨今夏  
平舫明經入都出示手書語長情重如親長者之  
側爲想先生名山養重道味增腴近復纂輯宗乘  
以序見屬荒蕪之餘尙祈刪政至所示云言官任  
天下之重必爲

國家建久安長治之規斯誠愛人以德大儒之用心  
書中皆經國大計非上下千古者不能言之如此  
其鑿鑿也惟僕自顧尙未足以語此且按之時勢



亦容有未盡然者蓋

國家之事未盡捐之爲害而耗財之蠹亦不盡由於  
邊防也往者西北一帶辟地萬里戎裝戍費誠不  
能不多有所耗近則屯田日闢伊犁烏魯木齊等  
處人烟稠密與內地無異而麥麩羊豕之屬價亦  
甚賤是以內地之民視爲樂土趨之若鶩不待戍  
守而所費亦漸減矣其蒙古外藩四十九旗王公  
貝勒稽首來王匪頒有定百餘年來未之有改亦  
不俟此時始見細也至我

朝武功克捷實恃八旗勁旅若健銳營步軍營火器

營之類卽唐府兵之制也其各省營兵才力本弱  
國家亦不甚資其力但以之防守各汛亦不可少其  
操演疎懈乃將弁之咎非法有未良也計天下錢  
糧每歲可得四千六百萬官俸軍餉之外所餘六  
七百萬而已而年歲之旱乾水溢不齊蠲緩亦在  
其中是庫項本不能多有所餘也一遇軍興如川  
楚之苗匪教匪用兵幾及十年所用不下二萬萬  
兼之河道不通時有決溢堵築一切動須數百萬  
金此在前朝皆於正餉之外另派於民我  
朝則概出自官而正賦又不足以供意外之用於是

捐例不能不開蓋加賦則病在平民開捐則取之富民兩者相權勢不能不出於此是以前年開豫東例時科道交章言其不便而勢不能止然

聖明實已洞鑒其弊特以一時權宜不半載而已停止矣至治河之費每年修築實屬不貲然京師百萬生靈皆仰給於東南治河卽所以治漕是亦斷不可少之工也議者謂漕米至京一石費二十餘金官民交困不若於直隸一帶大興水利則南漕可減而河費可省此誠探本之論但溝洫之制自秦以來久廢北方沙土旣無引水之路又無儲水之

區種稻非宜且以一日而復三代之制於二千年  
以上恐利未見而民已擾矣非常之原談何容易  
竊謂我

朝之制滿漢各別而滿未嘗侵漢兵民各分而兵不  
能擾民中外一統而防秋出塞之苦不生文武一  
體而重內輕外之衅不作

乾綱獨攬而朝無權臣

萬幾日理而苟無近倖立法實已周詳綱紀無難整肅  
所以不能久而無弊者則非法之未良實以任事  
者之難其人耳京官照常供職本無設施於民在

外者莫如州縣爲親民之官州縣得人而天下咸  
理矣州縣非其人督撫例得而去之然而是非顛  
倒賢愚混置者不一而足也天下之未能悉協於  
理實由於此是以僕於甲戌冬上疏請清吏治之  
源痛言其弊又陳治河之弊三吏部重簽之弊五  
此外如靖紅鬍申保甲教習旗人以專訓課參劾  
汚吏以肅官常前後奏事數十摺多蒙

聖主採納

召見之次

特加獎訓至今夙夜捫心未嘗不且慚且奮也計此十

年間典文衡者再監場事者五巡漕查倉查庫者  
各一至於磨勘驗看差使更不一而足前此巡中  
城爲五城之首以十月而結八百餘案後巡南漕  
爲六省糧漕總滙亦以半載而辦五百餘萬石之  
米早於上年兩月爲前後十餘年所未有近掌吏  
科爲六科之首天下文官總樞案牘如鱗亦以一  
手治之未嘗假之書吏戰戰兢兢幸得免於罪罟  
此皆先人遺訓與先生昔日聚處時之緒論也  
慨憶當年曷勝洄溯因來書問近狀甚殷故敢縷  
數以答時漏下已三十刻矣

附錄

卷一

一

謝邑人八公舉一先君子崇祀鄉賢書

隔別桑梓屈指近十年矣每念吾鄉諸先生輒惓然動關河契闊之思以遠人之念鄉里知諸先生之念遠人也憶自戊辰秋赴京庚午典試蜀都甲戌獲擢御史分校禮闈乙亥復擢戶垣驄馬巡城未及一載卽奉

命督贛南漕缺塵甫息又於本年八月奉

命監試內簾接充磨勘

天恩稠疊報稱無由自維謙陋惟有竭誠可以自勉前歲莅事巾城會於廳堂大書一聯自警云繞案風



清塵盞掃除吏牘舉頭日近光明洞照吾心又書  
一聯於座右云要半文不值半文莫道人無知者  
辦一事須了一事如此心乃安然本年夏間南漕  
事竣回京覆

命江南人至於攀轅灑淚又於揚州之雨花菴設立長  
生祿位不虞之譽拊景增慚然所以戰戰慄慄不  
敢暴棄者欲以勉承先志少副鄉里諸公之望毋  
爲長者羞而已至先志之能負荷與否則行百里  
者半九十尙未能以自必也昨王平舫茂才書來  
道及我邑諸大人先生連名具呈請以先君子

崇祀鄉賢二代之直復見於今聞之曷勝感激念  
先君子篤志勵行每欲爲鄉里增光樹幟而命  
與遇違齋志未逮今諸先生乃發潛闡幽好是懿  
德此在間風者且將興起矧於其家於其子孫有  
不感泣從之者耶至小女瓊姿年甫十二未嫻女  
誡因癸酉之冬母病垂危雪夜操刀割腕療母事  
出倉卒偶獲兩全本非家門之順事蓋緣小子之  
無知而諸先生至性所孚芻蕘必采憐其小弱爾  
亦附之請

旌此種義舉彌覺令人感媿從此型方訓俗咸切觀摩

匪特寒門戢泐永矢弗諼實足徵吾邑之人心敦  
靡篤摯而諸先生善善從長之盛心尤不可幾及  
也

覆秦小峴侍郎書

芙初來京詢及起居知近日講學東林以身任道  
彼方之士何幸得此古者師儒之教繫之鄉大夫  
正其事也惟聞道高毀來竟有不識東家某者此  
則善者好不善者惡吾道之異於鄉愿在是士君  
子所言所行當期之天下後世固非一鄉所能私  
其毀譽也京尹賄項鄒李宋三公任之以前者皆  
不與可以脫然無累林泉引退在先生非以鳴高  
事後觀之竟有欲不退而不能者然後知先生之  
爲高而一疏之事有不足艷者矣澍自送別後改

官臺諫自顧識力短淺遠於事情望先生有以教我也

覆秦小峴侍郎書

春間接讀手書適奉監試內簾之

命出闈後酬應紛紛久稽裁復今歲仍否主講東林尊  
集聞已續刻若干便中尙希惠示全部以紓渴望  
此日東南尊宿惟先生與穀人先生蒼然並峙如  
魯靈光穀人先生去歲在揚相見猶復頰面豐頤  
迺郎清鵬今科鼎甲足爲稽古之榮先生遂初早  
賦道力日增海內之士談出處者莫不歎爲高見  
庶幾追蹤張季鷹賀季真一流而鄉里所宜矜式  
者也顧書中所云時有慨乎言之此則魯人呼東

家某之故轍人固有日相接而不相知者不盲於  
目而盲於心則亦無怪其然也澍供職吏科每歎  
鹿鹿未能窺見其大若毛舉細故又竊所未安竊  
念爾日銅弊甚多非一紙空言所能盡革而其害  
尤在於人心之日壞風俗之日媮若不揣其本終  
未見末之能齊也倘高識別有所及幸勿吝鍼教  
焉

與卓海帆侍御書

閱鈔知巡視中城喜不自勝非爲足下喜爲中城喜也以仁弟之才十倍於兄而謹慎沈默游刃恢恢則又兄素所心儀者也兄巡城十月毫無善狀所能自信者此心無他實欲爲地方了事不爲地方多事以求至於無事而後快至於檢點不到之處他人亦能爲我諒之以仁弟處此則於兄所短亦可全無而悉底於美善矣然兄竊有所進者仁弟前致兄書欲自處於和介之間此語至今未及奉復然亦終不敢不質之仁弟者蓋聞和介之分



莫如夷惠孔子則時中而已所謂時中者當和則和當介則介之謂非謂和與介可以合併爲一此子莫之執中而鄉愿之所以取巧也之間二字似無可著腳處兄愆尤叢集而以此言奉質者以仁弟有聖賢之資而進道未已故敢發此狂談耳至若爲政之法隨時隨地不競不絀古來治京兆者趙張韓蓋皆以精果著稱而曹平陽之論則又曰慎勿擾獄市知此二說則巡城之事思過半矣抑此兄舊令尹之言耳若仁弟之巡漕其美舉佳政甚多尙乞悉以見示俾得免於愆尤同年諸君在

京師者皆有骨肉之誼別後相思輒覺一日三秋  
而公務怱怱無片刻之暇尙未及一一作書幸爲  
兄道意並恕其不周也



覆陸平泉師書

頃摺弁於十三日回揚接奉手書敬悉福履綏安  
實深抃頌來諭一切辦公固不可苟隨流俗亦不  
可太事苛細總以持平爲當誨語諄諄敬當書佩  
徒陽開壩一摺歷任以來多係驛遞卽上屆亦係  
單摺一件用驛是以蘭渚中丞誤照辦理摺由伊  
繕發事後始知不勝惶悚對自到任以來俱係專  
差獨開壩一摺爲張公所誤仰荷

天恩改爲降留

高厚鴻慈摩頂難報擬俟將來奏事時附摺恭謝亦不

復與張公會銜矣至戲園命案一事向來城上不  
過照轉送部而已從無駁訊之事彼時卽有言何  
不將戲園封閉者澍以爲兇手現在本係雇工並  
非園主查例並無因有命案卽命主家廢業之文  
罪人不孥古有明訓何況雇工譬如一農遭事而  
令全家廢耕一士遭事而令全家罷讀無是理也  
况暫時封閉將來仍不免於求開徒使胥役從中  
誑索陽鱗到處干求旣滋拖累亦增煩聒是以過  
堂時將兇手同園主一併送部諭以將來刑部結  
案卽使園主無干亦當治以約束不嚴之罪並諭

司官先行揭示園前以示警戒竊謂威惠兼施葛  
藤豫斷古人所謂經術飾吏治或在於此而執意  
人言反以爲怪也澍於此等處所頗爲揆情準理  
斷以不滋拖累爲是若因此而蒙罪戾亦無所悔  
耳至現在漕務一切雖無城務之阻撓而總六省  
之轉輸督撫漕河兩帥以至道府守令處處俱有  
交涉事件竟無間刻兼之本年全漕有搭解米石  
較上年竟多一倍尤不易易日前西風久刮雨雪  
復稀江落潮枯軍船淺阻羽檄飛馳寢食俱廢幸  
十三日風轉潮回始得陸續催挽然已設法無數

矣今日手揮檄梟二十餘紙漏盡二鼓字蹟草率  
伏祈原鑒不宣

與百菊溪制府書

昨午接到除邪紀畧一卷敬悉英謀碩畫除患未  
形所謂不動聲色而措磐石之安者令人想見陶  
桓公韓魏公一輩人觀於籌略之精布置之善足  
昭

朝廷委用得人之媿

恩褒疊被超格膺封有自來矣至孫文定公南遊記一  
篇首尾一氣如黃河落天直走東海其間又復千  
里大曲百里小曲洋洋乎淵淵乎近古之奇作也  
惟中間亦小有未檢處如曼倩公明古平原人在



今之武定而誤以德州之平原當之岷山爲南幹  
之祖禹貢明言岷山之陽至于衡山而誤以爲中  
幹且末後總東一段言天下大勢水歸二漕山分  
三幹是已而又言大河以北水皆南流大江以南  
水皆北注此則以指喻海尙非天下之全也蓋地  
脈以山爲脊而水從兩邊界之南幹龍縱行以五  
嶺爲脊嶺以北江廣之水固皆北流若粵閩在嶺  
脊之南仍係東南流非北注也北幹龍橫行以太  
行爲脊太行之右如汾涑皆西南流太行之左如  
漳衛滹沱巨馬易白諸水皆東北流無南流者惟

沁在太行南麓故順流而下又邳宿南流則疏鑿而成非其本來也至若三幹之說昉於僧一行千餘年來莫之或易然澍竊有創論以爲仍止兩幹岷山之脈曼衍東南此南幹也其中幹北幹本係一脈從隴西來爲嶓冢經太白至終南始分支一出華潼渡砥柱起太行為北幹直走醫巫閭入海至高麗南轉浮登萊而結聚於太山一由終南趨商雒爲中幹經南汝光陳至徐州渡河經呂梁下邳鄒嶧而亦聚於太山故終南爲中幹北幹分龍之所而太山爲中幹北幹合龍之所實首尾一龍

耳其間元氣包裹條理精密此中原人物所以極  
盛而孔孟生於氣聚之處遂以砥柱萬世也澍嘗  
出使西川途中細觀山勢見太行之脈從壽陽之  
黃土嶺出脈僅如一線終南之脈從寶雞之煎茶  
坪出脈亦僅如一線計此兩大山行經數千里每  
過一峽必出一脈似此者數矣蜿蜒磅礴其大如  
彼而其細又如此造化之妙非身歷其境者不知  
僅從紙上談兵終隔一塵然非胸有全局亦熟視  
之無睹也文定此文獨有千古高處在識其小未  
檢點亦無損毫末大抵其生平剛毅之氣練達之

識皆如此可想見一班合三習一弊疏觀之真我  
朝第一流人物也謹質蠡測之私伏惟治事之暇加  
以誨正爲幸



陶文毅公全集卷四十一目錄

文集書

覆曹方伯韓廉訪書

上蔣礪堂先生書

覆賀耦耕太史書

與周石芳先生書

覆李錫民漕使書

覆黎湛溪河帥書

與姚秋農學使書

與董小槎太史書

覆劉海樹署守書

與湖廣李制軍書

與湖南嵩撫軍書

與賀耦耕方伯書

覆煦齋相國書

覆兩湖訥制軍書

覆兩湖訥制軍書

再覆兩湖訥制軍書

覆兩廣盧制軍書

致江西廉訪陳蓮士書

覆黃楚橋書

文毅公全集

卷四十一 目錄

二





文集書

覆曹方伯韓廉訪書

頃奉華函以弟所擬官鹽減價告示蒙制憲面交  
熟商仰承精心籌畫斟酌權宜並論以川省向來  
例價以錢糧之長跌出入合筭售賣若一經出示  
恐商民誤爲例價將來或有窒礙杜漸防微識度  
宏遠惟弟之所以力主此議者正以川鹽無例價  
旋減旋增私販因得以乘機而入是民病而商亦  
未必利也原減價之議所以受制於商而官亦不  
敢深問者大約不出成本

國課兩條查成本雖有遠近之不同總以場價爲最重要亦不過十數文止耳卽以巴縣江北而論上年減價文書稱巴鹽每斤場價二十三文此僞說也試思南川涪州等處亦行射蓬鹽引止稱場價十七文以道路言則彼遠而此近何以遠者賤而近者反貴是所開場價不足據也且去歲之鹽稱成本每斤三十二文減價爲二十九文月前傳到該商等又呈稱向來成本二十七文是此時所言成本較上歲相差五文較所減之價且少二文前後矛盾其僞可知竊恐上年文書名爲減價已暗

伏將來增價之根耳至於

國課本在成本內計筭查水引一張計鹽五千斤實則萬斤止徵稅銀三兩四錢零五釐羨餘三四兩不等巴縣爲鹽引最多之處每年額行鹽斤二百八十萬有奇無論四鄉之遠千萬之衆均須食鹽卽渝城丁口不下百餘萬每人月食半斤不過三四個月可了再加耗鹽一倍亦不過八九月可了苟夾帶不甚則官引方有不足之患尙何

國課之能虧乎至鹽引納課用銀零賣用錢則亦不獨川省爲然如淮蘆皆用課銀而鹽斤加價則稱

一文二文亦未聞因錢價起落有所更改竊意川鹽所以無例價之故因產鹽處較多各縣亦不止銷一處之鹽而又有巴鹽花鹽頭鹽渣鹽名目之不同非如淮蘆之鹽止一色產有定地也然亦間有例價如上歲雲陽縣減價詳文卽稱雲場部定例價每包價銀六錢八分每斤合錢十二三文又萬縣文內稱報部價值每斤定銀一分五釐均係詳定價值商民相安無事無庸另擬等語可見川鹽亦未必不可定價卽使將來認減價爲例價究與部頒有別未必不可活動卽如川鹽每包百斤

例載加耗十五斤今則每包重至一百八十斤頭  
鹽且二百斤矣未聞百姓執部例以與商人爭也  
弟因冬臘以來鹽價平而人心亦平正月以後鹽  
價起而私販復起身居此地日夜兢惕當此饑饉  
之際徒事查拏勢必私販未靖而良民先驚遠近  
傳訛恐滋事端細思散黨之法惟有減價一策上  
歲已行之有效但未出示是以可大而未能可久  
耳連日札飭尚諭再三審酌示以必行幸而半月  
以來人心復戢方建議之初已慮及商民日後或  
有嘵詞當諭該廳縣以必得商民呈請方可並將

弟所擬示彙示之商等見措詞平允利害曉然欣然具呈該廳縣懇請遵照減價由府核轉前來此本月初十日後事也其時廳縣業已出示減價弟意欲乘此徧及各屬是以將彙未發呈請憲裁茲接來諭以憲意欲令商人呈請爲妥與現在所辦情形恰相符合謹另繕該府詳文呈覽其所以尙未通詳者因尙非全局欲徐加鄭重耳惟出示一層商人呈詞未載此時若令補寫轉恐反生枝節且廳縣業已出示載明所減之價四鄉行之相安官鹽暢銷弟處告示商人前已見之外間皆知若

忽然中止勢有未可但弟處出示祇須照例廳縣  
出示稍可活動自是老成碩畫思深慮遠擬彙二  
件詳細周密洞切事宜謹當遵照辦理祇前半所  
敘

上諭原爲插牌擅寫違例字樣而言渝屬尙無此風擬  
將私梟刑例裝換數語其所減價值則廳縣告示  
有之弟處卽不必敘及至其餘各處弟處尙未行  
文飭減據陳署守言及查得上年減價案內有藩  
臺鹽道飭駁文書一件諭及所減價值尙不足以  
敵私飭令該府縣從長再議等語足見先幾灼見



附錄之三  
卷之二  
一  
早已洞燭無遺現經署守裝敘原文駁行各處俟  
覆到日再行斟酌辦理總之此次減價出示情形  
亦是時勢所在不得已而爲之其相安之處原不  
敢輕有舉動也尙希縷悉代爲稟覆用慰憲廑

上蔣礪堂先生書

川省官鹽向無定價大抵因行銷地面有一州縣而配食數處鹽斤者亦有產鹽之地又向他處場竈配鹽銷售者其間程途遠近不一鹽之名色又有巴花頭渣之別場價既有低昂運費亦有輕重加之商人以銀易鹽以鹽售錢更需計較銀錢長跌價值是以賣價悉聽商人隨時定數然商店價無準則難保不任意浮多而鋪戶輾轉販賣又勢必有所加增以致小民常虞食貴私販每多攙越殊於課食均有關礙上年蒙大人燭悉情形札飭

各屬核筭場價運費酌議平減此誠便民戢私之美政奉到憲檄後卽經前陞道嚴士鉉轉飭確查議覆去後據該州廳轉據各州縣悉就情形查議或請酌減價值出售或請仍照現價發賣先後申覆經前護道林培厚及澍核明轉移鹽道查議具詳在案本年二月間澍因聞重慶府屬江北廳巴縣等處官鹽價值較昂民間仍有貪賤食私之事而私販亦得乘機銷售漁利未能淨盡是欲杜私益民必須官鹽價值大加酌減方可以收實效當經札飭該府轉飭該廳縣等諭令商人核計

成本查照上年議定賣價再行從長計議酌量平減茲據江北廳巴縣飭據鹽商秦寅等以配銷引鹽向有四項名色花鹽每斤計需成本錢二十三文巴鹽每斤計需成本錢二十五文渣鹽每斤計需成本錢二十二文頭鹽每斤計需成本錢二十七文今情願稍折成本呈請減價等情經該廳縣查明上年議定鹽價原案分別核議巴花等四項鹽斤整包出售照現在成本每斤俱減二文其零星小店輾轉售賣按照現議各色鹽價每斤酌增錢二文以敷折耗如挑赴鄉間出賣者各計程途

遠近量加運費定以每斤每百里再加運腳錢一文各店鹽秤均以十六兩爲準聲明傳諭鹽商遵照並出示曉諭等情由府核覆前來澍查核廳縣現議各色鹽價核對上年重慶府原冊每斤俱又減價四五文民間不致食貴且經該廳縣等出示曉諭章程既著商人等亦不敢陽奉陰違現在訪察各處市集村莊均已買食官鹽私販亦俱絕跡地方俱屬靖謐至其餘重屬各州縣業經陳署守札飭查議此外夔綏忠酉石太等處澍現擬一體札飭查察情形酌量應否議減統俟查覆至日再

行稟聞

陶文毅公全集

卷四十一 文集

二



覆賀耦耕太史書

四月二十一日得花太守攜來一書情真意摯語語腳踏實地可見施行三年作別而親家所詣遂已至此雖古名賢無以過自莅任以來所得友信惟親家與樂園南雅之書大有資於身心政事時懸座陽以當箴銘也此間吏治敗壞已久綱維不整諸事疏略官場以用兵爲利而循良之意少百姓惟趨利是圖而親故之誼疎上行下效有自來矣礪堂先生諸事整飭民間始見天日而革面已多革心尙少欲求上理必資遠策觀其殷殷懇懇



求賢若渴苟有人心不忍負之數月以來蒙其獎  
誇什伯尋常言聽計從毫無成見甚至以清廉公  
正見褒且語人云他人到一處數月方悉情形惟  
陶某一到便透澈無遺自顧何人初不料先生之  
見重如此也然先生天資之高學識之精殆有天  
授非人所能爲者每鄙意所疑所思未獲一言導  
竅出人意又恰在人意中始知欲從末由顏淵  
卓爾之歎非偶然也弟初到時尙有因畏生忌造  
言相怵之人開誠布公秉直而行久之而人自信  
服今則上下已交孚矣是卽親家所言接人辦事

老實爲妙之說也。生性素銳，每以沒世無稱爲懼。然所長在此，所短亦在此。今則閱歷頗多，名心漸化。惟用人之際，外嚴內寬，多爲小人所測度。讀來書，不覺懼然自懼也。

附三卷之三集

卷四十一

ナ

與周石芳先生書

日昨閱鈔知令嗣克生已蒙

恩開復此誠曠蕩之仁爲感動者久之想賢喬梓之感  
深圖報又不知何如肫摯也克生才高識廣經此  
番磨鍊之後必當痛定思痛慎勿以

君恩爲可倖邀而不於保身立家之術切實思維也叨  
在至戚深爲克生喜白不得不爲克生懼也尊府  
深仁厚德積累自不待言惟於讀書一事悠悠忽  
忽毫不介意大有倚恃名父坐享富貴之意不知  
名門世家之子京師中落寞何限一旦失勢欲如

常人而不可得世俗炎涼大抵如斯求其可久惟有精進之一法與言及此實不能不爲慧生吾倩有餘傲也錦橋先生擢刑給鏡海耦耕一麾出守皆有大用之兆皆同鄉好榜樣近日吾湘南拔茅連茹半年來喬起無數如樂園剛亭兩先生人所共知而親家前輩大人海內人望

特詔起用受

恩尤深苟非平日自立不凡焉能至此克生昆弟其能不思肯其堂構耶僕此言蓄之已久前此不言而今始言之者正以前此當不得意之時疑於太激

而今則受寵若驚不敢不告也芻蕘之言幸勿以爲弗達時務而置之



覆李錫民漕使書

昨泐一函由陳中丞奉寄今午摺弁齎到手書並  
藁簿五本欣悉軍船回空旣早首進已渡江足見  
事機順利亦由宏才料理合宜故爾遄速如此聞  
鎮江水勢甚足重船定可無滯惟尊札所言諸事  
格越積錮太深法語巽言轉以爲嗤切中彼間情  
形益可見一篇散帳人人可主持人人不能主持  
而擔當之責不能不歸之於漕使矣如閣下可爲  
漕務得人慶然亦一年之局耳安得福星一路盡  
如子駿哉鎮江河道僕所係陳四事自以濬練湖



爲第一義而修閘則尤以橫越二處爲要害今濬湖之說旣不行而橫越二閘又復委之木商恐仍有名無實徒費工項則罪過且在於始議者矣倘得就近督率一二亦後來之幸也

覆黎湛溪河帥書

前承寄到行水金鑑當經肅謝昨復蒙賜書並覆  
奏鎮江運河摺橐一件諸紉存注敬維吾兄以間  
世之才肩重鉅之任爲秀才而不忘天下居高位  
而有若寒儒平日之所講求臨期之所規畫灼有  
神解粲若眉列前歲趨運京江偶逢涸轍旁觀者  
旣策窮於束手當事者或絲棼於亂麻徒勞往復  
祇類道謀已乃於舊橐中拾讀吾兄修理練湖一  
書不禁慨然太息以爲地方守牧能如此用心者  
罕矣如此用心而又能練達通明卓然可見之施

行者則尤僅見也。因是思所以變通之爲將來之利其抽墜出土之法則親聆之吾兄徧閱古人所議亦無計及於此者。今旣訂期興工無窮之利實賴嘉謨矣。惟是橫越一閘爲全河收蓄要害之區若來源疏通而此處關攔不住亦屬無益。必得閘底撥高下膀畧長於上膀庶潮洄不至掣退而可以回激豬婆灘之上。今乃仍歸木商修理竊恐有名無實。利於下行而不利於上濟。此事業已定議諒難更改。惟在司事者認真照料不可徒聽之商人耳。見孫制軍時尙乞詳悉陳之區區過慮之言。

亦芻蕘獻議之意也

附不孝之身

名曰一

一

281-1

與姚秋農學使書

自客冬抵皖已經半載祇以此地錢糧轉輸奉  
旨清查牛毛繭絲之中千頭萬緒近始窺見底裏果然  
名不虛傳卽如清查一事他省偶一見之而皖省  
自嘉慶七年至十九年五次清查仍未了結自十  
九年至今又已七八年未查者須續查已查者又  
須復查其間官更更換卷冊如鱗一筭偶差全盤  
盡錯其難辦者一也又如豁免一事前已奏出官  
虧五百餘萬民虧四百餘萬以五十四州縣負此  
千萬兩之重累其顛蹶自不待言今雖援

因心請免而格於部議十不能去其二三輾轉糾纏虛同  
匏繫其難辦者二也又如錢糧一事緩徵帶徵他  
省或間數歲而一見皖省則鳳泗等處自

國朝以來無歲不賑則無歲不緩無歲不帶其間又  
有成災四五分及六七八分之別其緩帶又有三  
年兩年之不同是卽在一時一手已不能畫一而  
整齊之矣又況今歲所緩之二三分四五分至來  
年而又報五六分六七分則又不得不遞緩而三  
年之帶徵或化而爲五年之帶徵從此重重疊疊  
牽纏不已而本年成災之五六分者仍當徵四五

分成災之七八分者仍當徵二三分倘不能徵之  
如數則牽率更多此皖省積欠所以無休無歇而  
愈久愈紊其難辦者三也又如漕糧漕項同徵分  
解本與藩司衙門相爲表裏號令最宜畫一乃以  
安徽全省之糧道遠駐隔省之江寧水陸迢迢文  
札諸多不便動輒歧異兼之漕督二憲相去均在  
千里遙遙請示多需時日往往坐失機宜設所批  
不同更形掣肘是以錢漕亦多舛誤其難辦者四  
也至於尋常奏銷屢經部駁今所積壓者不下數  
十百起現在亦須趕辦以此碌碌皇皇昕夕靡暇



本非利器難遇錯盤隕越之虞倍深寤寐相隔不  
遠趨晤無由自念生平知己惟先生相賞於驪黃  
未判之先耿耿寸衷辦香遙託尙希衡量少暇俾  
識楷模不勝厚望

與董小槎太史書

前奉手書如獲拱璧數月之久尙稽裁復實以故人知我未敢以書記代筆之詞草草作答而公冗如絲迄鮮暇晷碌碌至今殊深歉仄然每有人來自珂里輒敬詢起居得悉先生年來頤志林泉春風化雨樂育英才兼以名山考道造詣益深不朽之業訂以千秋翹首經幃可勝企想弟以駑駘姿連年爲馬牛走巴山晉水萬里崎嶇受

恩旣重報稱尤難上冬將赴八閩

主上以皖省錢糧膠轕甲於天下

特諭來皖清釐務在披雲睹霄一清宿瑩拜

命以來兢兢夙夜如理亂絲近始窺見底裏辦理殊不易易卽如虧空之事他省多者不過一二百萬而止而皖省從前竟至千餘萬

恩免之後尚不下數百萬災賑之事他省偶一見之而鳳泗一帶無歲不有偏災卽無歲不有緩帶錢與漕爲同條共貫之事而糧道遠在金陵商辦每難畫一督撫河漕相去俱各千里稟示亦不能如期凡此數端皆爲軼轢之由而他省所未有也兼之地夾江淮水陸交衝差使絡繹河漕災務數大端

色色非錢糧不行而通共止五十九州縣真有袖  
小不堪迴旋之勢此所以虧空甲於天下自嘉慶  
七年至十九年已清查五次而不能得其要領也  
自十九年以後又已數年兼欲溯查五次以前至  
於乾隆中歲舉百餘年之輾轉悉欲掃蕩廓清於  
一旦其爲忙碌已不勝言而

欽限甚迫九月杪卽須盡行奏出此所以日夜慄慄伏  
案勾稽如老諸生目耕之不遑也至於地方之大  
利大弊一切措置尙未遑從事誠以體立用行虧  
空未清而欲吏治之澄敘不可得也吏治不清而

欲民生之康樂不可得也區區之慮如此從前雕  
蟲篆刻蟬噪蛩吟之習非無夙癖已不暇恩恩唱  
渭城矣惟省城書院日漸廢弛不得不加整理現  
已飭屬捐貲以充膏火又安徽自分省以來尙無  
省志弟意欲俟清查告竣卽當辦理此事而事體  
重大非得如閣下之貫通今古思精慮細不足以  
舉全局而資就正是以專差請主敬敷一席以爲  
此邦人之矜式倘來歲省志議可成得以仰煩大  
筆裁削尤幸甚幸甚平叔中丞現赴潁州審辦教  
匪滋事一案弟叨庇平善於七月十一日得舉一

子行年半九十有此於菟亦足慰塵望也

1880

54

15

覆劉海樹署守書

本月十六日晚間接到十二日所發書欣悉公盡  
宣勞邢名章一案辦理妥速陳悅張愛等既已獲  
案且豫知逆情雖據稱藉詞逃回並未到官具首  
未可輕縱前此王興仁朱麻孜王友諒等俱係曾  
經到案開釋之人此次仍自外生成挂累多人所  
謂自作孽不可追者無可愛惜卽應執法以淨根  
株至於愚民習教並未豫知逆情之人則又當別  
論潛移默化責在我輩未可瓜蔓滋擾致釀事端  
也此案發覺恰在撫憲赴金陵監臨秋闈之際弟



前此所以深不放心而欲自往者正以此故今得  
廉訪親往同觀察諸公督辦妥協而閣下文武兼  
資既能見幾致決於前復能息事安人於後鄙衷  
尤深欽佩弟日前曾將潁昌新蔡教匪源流查照  
歷辦各案作爲表說交吳牧甸華帶去尊處訊案  
時亦可查照以究其根蒂也撫憲擬俟二十七八  
日闌卷膽完卽赴潁審辦此案既省千餘里押解  
之煩且審明後卽在彼處正法使餘黨知所畏懼  
於地方大爲有益而所省解費當不下二三千金  
亦可謂不費之惠至前次吳牧送去千金卽是兵

役經費非盡爲犒賞而設如將來事竣應由該縣  
籌款萬一所費不貲力不能支尙可稍爲接濟但  
不能一概委之於公反於彼未便也希諭孫令知  
之廬州高守未及另械此信可同觀也



與湖廣李制軍書

頃奉

諭旨准戶部議以湖南常平倉穀碾米運京另行買補  
還倉在司農自爲慎重

天庾起見惟揣度時勢自上年水災之後江浙各處  
聯船赴楚買米地方積穀已空且本省長岳常澧  
各屬濱近洞庭亦有水災地方元氣未復現聞米  
價二兩有餘較下江尙貴兼之近山各州縣水路  
難通雖有腳價般盤不易即使有穀可運而漕船  
僅止二三幫難於搭運勢必添雇駁船大爲州縣之

累虧空將自此而增民欠亦因之起矣種種難行之處自在高明洞鑒之中而芻蕘所及尤有難焉者查湖南山多田少宜稻之處無幾諺云三山六水一分田其地利已可概見是以通省有漕地方祇三分之一每年正兌漕糧共祇九萬五千有零視江浙大省不及十分之一誠以其地狹而出產無多也今若因礙運而採買還倉是一漕之外又添數倍之漕在有漕州縣勢已難支至若山區僻地本境之糧不敷食用平時尙仰給別處是以

列聖施恩免其漕運二百年來百姓相安無事今若以倉

穀碾運而採買還倉是倉穀化爲漕米採買之舉  
卽爲無漕之區添一漕也無論山區少穀買補無  
期萬一將來援以爲例卽開永遠之累竊恐

累朝休養生息之民從此困於騷擾矣况常平倉一空地  
方緩急失恃其接近苗疆之區尤爲可慮近來如  
醴陵平江等處多以辦漕滋事幸賴大賢在上民  
困獲甦豈可添此累民累官之事且其害終歸於  
國家關繫甚重竊以爲此舉不但今年難行卽將來  
亦不可行伏惟大前輩大人識炳幾先精權事後  
湖湘之民望切瞻依查現在直隸豐收無須接濟

臺灣運米一事尚爲贅設而本年江浙各省均係全漕似於

天儲不至有缺日昨江省接到戶部收買行月米一事經魏漕院據實入

奏卽荷

諭旨停止仰見

聖天子視民如傷必不以戶部奏准在前任滋格礙倘荷俯察羣情札商蓮舫中丞早爲覆

奏地方幸甚澍忝鄉人頗悉草野情形素恃虛懷若谷故敢抒其聞見惟希採照

與湖南嵩撫軍書

頃奉

諭旨准戶部議以湖南常平倉穀碾米運京另行買補  
還倉等因在司農自爲鄭重

天庾起見惟是揣度時勢殊有難行者輒卽芻蕘所  
見敬爲陳之查會典載湖南各縣額貯常平倉穀  
一百四十八萬七千七百一十二石以二穀一米  
計之約得米七十餘萬石各州縣多者一二萬石  
少亦六七千石卽毫無虧短而礮碓之費不貲船  
隻之雇弗易其無水陸可通者勢必踰山越嶺長



途絡繹雖有腳價何能勝用况每年漕船止有三幫今撥運之米多於漕糧四五倍縱使丁役毫無刁難亦難盡載必須添雇船隻費從何出勢必大增州縣之累其難行者一也上年大江南北猝被水災競赴楚省採買商船絡繹連檣而下民間積穀俱已糶盡不得謂之餘米之區况上年南省濱湖各屬亦有水災民間元氣未復現聞湖南米價每石約二千二百有零較之江浙時價早已過之且聞江省現有載運雜糧至楚省糶賣者是穀旣無餘而價又不賤其難行者二也從來吏役害民

其弊不一雖

功令森嚴而假公濟私者無處無之向聞湖南例價每石五錢即使盡行實給民力已屬難支况又未必能然近來醴陵平江等處因漕滋事已非一端幸賴

聖恩高厚民困獲甦而

國家採買之令亦久未施行也今此舉若行則吏雖廉而不能爲無米之炊民雖愿而不能勝打門之擾其接近苗疆之處則穀產已竭何以爲防卽稍有贏糧之區倘市價擡高貧何能救而州縣碾兌

既多賂墊採辦重須剝削其稍經理不善者勢必  
補於倉而缺於庫其難行者二也湖南一省除稻  
穀外如麥黍菽稷皆非所宜而各州縣又非盡種  
稻之區諺云三山六水一分田其爲地方已可概  
見是以每年正兌漕糧共祇九萬五千五百五十  
二石有奇不及江浙大省漕米二十分之一誠以  
其地狹而出產無多也今若因礮運而加以採買  
使民間頓增一百餘萬之累是有漕之區不第加  
數倍之漕也况湖南無漕之區居三分之一從前  
原因其山多田少不敷民食是以

列聖施恩寬免百姓相安於光天化日之下者已一百九  
十餘年矣今一旦改爲碾運是倉穀變爲漕米無  
漕之區亦變爲有漕之累也此端一開將來卽以  
爲例小民何由得生此其不可行者四也竊以爲  
湖南碾米一事不特今歲難行卽將來亦不可行  
而採買累民碾運累官官民交累其害卒歸於  
國家是太倉之一粟未必有益而湖南之虧空將自  
此而起湖南之民欠亦自此而起矣以目前尙稱  
平善之區一旦迫之使累豈不可惜伏惟裁酌而  
節宣之幸甚



與賀耦耕方伯書

徒陽運河連日西風江潮不入淺阻難行沿河甬  
撈本屬無益惟有昔年巡漕時所製鐵簸箕日來  
愈用愈精竟大得其力其法用鐵片作箕筐使堅  
銳易於入土用鐵片八九條縱橫作箕底使水去  
而沙留箕尾豎長木柄使人從船上持柄將箕斜  
插入水底箕旁左右有鐵耳用長繩二條繫之數  
十人從岸上拽之起每鐵箕四隻竟可出土一方  
較之戽水後所挑乾土更爲得力蓋載土旣多反  
借水勢助其滑溜易於上岸亦可備刮淺一法也

橫閘出江因水淺不能而漕船之畏焦山象山亦  
特甚其丁舵既與大江不習而又不善使風從焦  
山至瓜洲尙有二十里若乘東風而上未抵瓜洲  
而風轉西北彼卽不免顛觸於焦象二山之間由  
其技劣而膽怯也惟有避去焦象二山另開一道  
從橫閘出口繚挽至甘露寺下對渡瓜洲入口則  
萬無一失矣頃登北固山望視地勢見象山南接  
汝山之中間有一缺口可以開鑿成河因委員往  
視據云果有此缺可以開河名曰二缺口尙有頭  
缺口在北緊依象山之尾其缺似有石底不及二

缺口之易於興工也次日復同道府往勘所見相  
同已命簞手從象山西尾接江之處量起經陸家  
圩過二缺口東至尹家圩轉灣西南經汝山礮臺  
下過千顆柳樹家茶菴出灣子橋共計二千八百  
餘簞路長約十一二里灣子橋卽丹徒橫閘外之  
橋也此工若成需費二十萬地勢寬平出土近而  
江水易入可爲永遠之利旣可避焦象之險上達  
瓜洲甚近而船出橫閘逕此出江則內河可以不  
挑東南之累輕矣惜乎費無所出聊爲閣下一存  
其說以俟將來耳





覆煦齋相國書

昨由令孫世兄處出示尊楫曷勝企慰從來賢哲  
達觀吉人洞化程正叔之涪州點易王陽明之虎  
水談經皆以遷謫而成聖賢之學仰窺吾師浩蕩  
之懷洵足當之况有二難依依膝下天倫樂敘必  
不以離騷天問稍芥雲夢也澍鹿鹿金閭倏經四  
載昨於十一月初四日述職入都初五日入

見十八日跪

安中間疊蒙

召見十二次

聖誨諄諄實深感悚現於二十四日出都臘底當可旋  
蘇也江省頻年豐熟河務亦微有轉機漕事雖無  
善策亦敷衍無虞惟鹽務大不可支有言歸竈丁  
可無誤課者雖係探本之論然立法以人無人則  
法難自立以海運之妥善省費百餘萬添米十餘  
萬尙其不免浮議恐鹽議更難著手耳知吾師忠  
愛在心故縷及之餘不贅

覆兩湖訥制軍書

弟駐浦三月因江湖泛漲疏瀉無由繼以秋雨連綿坐淪苦海支持况瘁寢饋未遑承示辛卯岸費一事果能杜絕將來自可勿追既往應請鴻裁勘辦至鹽道請飭揚商一人赴楚督同岸商經理現在揚商祇贖數人捉襟露肘支撐辦運之不暇既無可派往之人且岸務爲鹽道專責苛索濫應鹽道且不能令行禁止而一揚商又何能獨力以禦惟祈台端飭道核實秉公辦理恤商裕課功德無涯前年

欽使所定每引岸費四錢嗣又加以緝私費一錢經委  
員王前運司會同鹽道逐款釐定共需三十餘萬  
兩公費私費皆在其中並非每引四錢專指衙門  
公需也岸務未澄腳私固不能淨若謂本商通同  
則必無之事可以理斷蓋商人具有身家卽一船  
之鹽本已屬不貲豈肯通同無賴之船戶授之以  
柄在若短發水腳知而不言則有之今則水腳已  
核實給發由監掣衙門當堂圓契會同委員點驗  
散給無從短勒往往裝滿釘封後尙有勒索加增  
由縣押開之事商人之不能剋扣已爲明證况儀

所捆場弔秤子包買砧跑風刻刻防範如弟所拏  
蔣四長子等各案不下十數起卽係接濟船私之  
人屢經

奏辦嚴懲此時除按額捆足不令以滷耗短斤外實  
無儀所透漏之私至船戶包外之夾帶本屬慣技  
但近來外江內河層層稽核如桐城之鄉紳劉姓  
勾通船戶軍犯賣私銅陵之署縣門丁賄縱船戶  
地棍售私均經弟特參革審擬以軍徒分別從重  
發新疆爲奴餘如彭澤望江等縣船戶售私地棍  
接應搶奪及捏報淹消各案均經節次嚴拏接律

懲辦在案前弊已十去八九如果到岸猶有帶私之船查出似應據實懲辦使奸頑船戶知儆商人正切感戴倘能就案懲辦不至牽連因客累主豈有反形護庇之理至於淹消盜賣地方官延閣商人不能正其苦情難訴似未便指爲通同之據蓋其自遞報呈由勘驗以迄結案需費已不可勝筭幸而詳結何敢再事呈瀆取累故不顧已破之甌忍氣吞聲補運了事其補運雖免錢糧而每千引錢糧正雜祇三四千金其鹽本運腳實需七八千金再加淹消辦案之費已幾虧萬金之本若謂商

人以此通同船戶冀圖便宜竊恐愚不至此若商  
斷之不溺斃引日之不漂失是則定例商斷專護  
引日故一遇危險卽負引而逃然而時有淹斃商  
斷漂失引日詳咨大部之事總之商人積習浮澆  
各懷私臆而不顧大局弟常所諄飭深堪痛恨若  
本無其事而地方以疑似日爲積弊多所擾累恐  
弊未除而節外之弊又生卽如船戶夾帶淹消等  
案何難卽時辨結立卽懲創乃往往有延閣一二  
年而始通詳者是何居心難逃洞鑒恐亦將有迫  
於不得不特參查辦之處至於減價蔽私最爲上



策無如有課之官引總不能抵無課之私鹽而商人成本固重尤莫重於黑費既不肯開出亦難於查辦卽如漢口呈出之岸帳卽成本之一端也弟處別無確切底帳無以應命其漢岸所呈底帳亦恐未盡確切應聽尊處查辦又來示謂該商等自取消亡官亦無如之何竊謂商之消亡不足惜而國家財賦重件究未可坐聽消亡弊在商則應懲商弊在官則應懲官庶幾稍資整頓藉圖後效伏惟大公祖大人公忠體

國日覩商疲運困與公私支絀之情形自必仰叨鼎

力維持共切同舟之誼也至若鄰私之堵緝章程  
固已周備而文武之能否實力遵奉要仗威令風  
行更不僅第一已感戴之私矣

陽明家系之系

先四十一

三三

覆兩湖訥制軍書

前接手書久稽肅復想必訝其疎懶也其時適得鹽道書與詳件專以取結爲事似於截止浮費取其貌而遺其神轉爲將來不可解之弊且於題外牽及夾私各說似乎浮費一節專爲買靜圖安挾制取利之具而非爲防弊起見非下愚所敢預聞矣是以當經駁還意欲俟該道覆到始敢奉達以免歧誤也茲復奉詢及而該道亦有書來催竊謂此件本應歸尊處查辦弟處仍係前說但得垂倣將來則已往可不必究若但以辯論爲事則除弊

而轉以錮弊卽弟以前亦何必多此一奏哉淮  
之弊極矣弟才力既不能勝而近又多病默數此  
間困敝之區惟太公祖大人能振興之計台星移  
照在指顧間是此番之整頓仍長者之自爲豫畫  
也餘詳前箋草草手覆不一

再覆兩湖訥制軍書

高郵舟次恩恩泐覆一函隨又接奉手書當此修復隄垸之際適值連年澇歉想見綢繆慮切益徵保障功崇曷勝佩頌弟駐浦兩月正值河漕兩帥同時更易一切面爲商推今甫旋抵省垣簿書塵積兼之秋冬以來陰雨連綿加以風雷霜雪致災荒成於已報秋成之後閭閻窮窘之狀在在堪憂現與少穆中丞迫切上

聞趕緊請緩勸捐心力交瘁漕船買帶蘆鹽一事實礙江廣銷數緣近年民困已甚日食不飽力難計及

鹽味已覺食之者寡若再任私鹽占據必致銷路  
更滯不得不設法整理第於兩次具陳後卽一面  
遴委道將於邳宿一帶堵截幸漕幫已知續奉

嚴旨皆靜聽按起蒙閣下照案派委文武按拏實感同  
心之助漕私既絕楚岸銷數當可望暢仰藉尊威  
再飭鹽道督率文武嚴堵川潞各路俾鄰私更絕  
銷數自益加旺矣再者辛卯岸費一事承示核帳  
查訊已檄運司飭令揚商登覆弟處亦照大咨轉  
行此事上年提揚訊明其帳內所開實因官費居  
多攸關體制弟是以請歸冰案辦理嗣奉台函復

經纒達但能截止自可寬其已往弟意不過如此  
否則帳本業已提揚弟又何必轉送楚省乎惟此  
事雖不能不以商爲解若使揚商畏累而全反其  
說竟似弟前

奏爲妄則弟又安能當此且浮費亦更無截止之日  
現查岸商供內卽有辛工火食等項不在四錢內  
並隨時開銷無一定款目之語實屬豫留地步不  
但不能禁止於將來且恐從此更滋流弊於閣下  
一番整頓之意豈不相左竊謂此事本在台駕未  
莅任以前現在各商旣供未奉減定章程以前係



照舊帳支用儘可照此結案揚商亦斷不能有異詞至於以後之事應卽如來示所云該商等恪守減定章程核實支銷其在官員役責成鹽道督飭所屬層層稽察嚴行約束倘有不遵隨時嚴辦此時毋庸多立科條徒滋案牘尊見如此實爲至精至當無可再參末議卽請台端照此奏結實爲佩切

覆兩廣盧制軍書

再承手示鹽件具仰老前輩大人精心籌度一秉  
虛公雅度摛謙情詞藹溢侍伏查西粵兩省向來  
每有爭界之事往往各持一說迄無定論蓋緣公  
私之見未明是以畛域之分各執此時淮鹽已萬  
分疲敝竭蹶莫支而粵鹽聞亦有爲難之處侍忝  
附後塵尤宜仰體大公無我之盛懷相與有成斷  
不敢固執已見囿於一偏而不顧全局也惟查淮  
鹽行銷六省粵鹽行銷七省而粵引入十餘萬不  
及兩淮引額之半課額則僅抵兩淮六分之一以

故淮鹽價貴粵鹽價賤而粵引既少故私鹽亦獨多百姓之食私非樂於食私故與官蓋也無非樂於食賤而已其勢衆其情順是以兩省常有粵鹽衝淮之事絕未聞有淮鹽衝粵之說淮鹽之不足以敵粵也久矣而地勢更足以擠之淮鹽由海濱場竈逆流牽挽以抵江西湖廣人力多公費亦多故成本尤重其勢不足以遠而粵鹽居高臨下一入湖南江西地界旣乘流破浪有莫遏之勢兼以叢山曠野處處可通欲徧地設卡則費用無出欲撤卡退居則放虎出山從何鉗制此淮卡之不

得不擇取要隘以進步爲退步之守也當

國初康熙年間改吉安行淮鹽減南雄路一萬四千三百引除其課而贛州亦由廣鹽改食潮鹽原以下游被侵而贛州距潮較近取其便民兼以防私也贛距淮遠所防之私慮其侵淮亦慮其混粵也凡官鹽無不有私而梟販則外來之私往者湖廣鹽船紛紛夾私害公賴老前輩大人設法整頓嚴查夾帶官引立見暢銷至今奉爲楷法其粵省熬鍋充斥湖南各境者亦經威令嚴查見於章奏藉資鍼砭此因水路較順故商私易帶不得不嚴至

於江運口岸則商運到省卽改從水販運往不干  
商人之事如吉安等府則灘高水陡贛私充占故  
水販裹足不前又非如商運口岸可以按引責成  
不得不堵緝私鹽以爲販路之導也通計贛引不  
多而一隅之地又在行鹽邊界何須設立多店且  
熬鍋至七百餘口皆以融銷不能定額爲名夫鍋  
店不設於腹內而設於臨邊之界融引不銷於他  
境而獨銷於臨界之邊謂非以鄰爲壑將歸於何  
處耶粵商各守各界之說歷來執爲談柄其實粵  
商力餘於界故名雖言界而意不在界轉以守界

爲暗銷之捷徑西鹽無界可守故以守爲界而亦無處非界不得不以擇隘爲禦患之重門然則粵商所謂直擣腹心者淮不挾私而來雖直擣何慮粵私如不自緝則此無數之熬鍋所出徒有損於淮而無益於粵亦正宜互相稽察以期裕課而安民也伏惟老前輩大人鑑空衡平慮周遠邇凡此台星之四照無非愷澤之功敷如尊函所指粵鹽過關毋須點驗謹已聞命泥灣設卡粵商旣多不願亦當另擇巡區至於五店裁三之議地圖旣經咨達大部似應候部覆到日核遵其熬鍋之數再

三斟酌非有定數不可前經司道議留十鍋似已  
敷用仰煩查照如能俯允施行一勞永逸庶可省  
往來公牘之煩也

饒之便先託齋還俟鄙冗稍抽卽當製序奉正也



陸王義之身

卷四十一

四

|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|--|--|--|--|--|--|--|--|--|--|

饒之便先託齋還俟鄙冗稍抽卽當製序奉正也



覆黃楚橋書

接來書及麓山寺碑雙鉤本具見好古佳致芝楣  
方伯處兩本俱好其一本無冊面者尤佳惜脫字  
甚多不甚完全僕所藏有一本最好在方伯二  
本之上又舊藏陳恪勤公一本孫平叔白小山何  
仙槎諸公會賞之各有跋然其中多有剪補及俗  
手填壞之字只可節取又一本係泐損之字然形  
質宛然可備參考今並送覽擇其善者從之可也  
此碑現在岳麓書院之旁僕嘗在其下摩挲觀玩  
頗能識其真贗前此閣下攜示之本乃摹刻之俗

本不但神韻迥殊而且字畫多舛與孔谷園所刻  
皆贗作也其中如蓮花禪師或作慧性禪師今各  
本俱在細觀實不相肖蓮花之與慧性均屬妄揣  
又如有霑大根霑字下截碑文早泐爲霑爲霑均  
難懸揣此類皆不如闕疑爲妥也此等苦無古本  
可校文苑英華未載此篇若全唐文則荒謬尤甚  
竟訛錯十餘字如開皇九年亦訛爲開元其可笑  
尤甚也茲閱來本極費匠心而僕意尙有未愜者  
北海書如俊鷹如利劍從無一笨滯之筆尤能化  
板爲活一切貌爲古拙或平板如筭子者皆其所

絕無而痛除者也此碑因模糊已久屢爲無知俗子用刀鑿鑿以致間有板拙之筆不可因其僞而成誤也僕以事冗不能逐一細校所望細心審爲之斯文幸甚將來刻成後如果佳善必當不逕而走不患洛陽之紙不貴也若如外間所鑄俗本則又不必多卻一番舉動矣此事洵非老手不辦相距稍遠倘有疑難方伯處當可商榷耳

此碑之陰有贊十餘段均係北海所書其上計于京不偶茲會之贊係刻於碑側頗有搨者其碑陰有甄石圍之故搨者絕少僕處尙有其文爲友人

胡墨莊持去容寫信回長沙覓到後與英英披雲  
一段同刻此時切勿上石也

陶文毅公全集卷四十二目錄

文集 跋 書後

尙書辨偽跋

楊椒山先生手書跋

陸文恭公手書忠宣奏議跋

區田觀穫圖跋

東祝堂遺詩跋

周文忠公硃卷跋

朝天宮劉淵然醮壇篆符碣跋

劉淵然鍾山朱湖洞天告行碣跋



陶氏家法全錄  
卷四十二  
光福寺舊募疏跋

聶蓉峯箴吏篇四十首跋

賢母圖跋

聖教序跋

黃秋士重寫錫山竹爐圖跋

陶氏族譜恭跋

先贈公莫江制義恭跋

陶淵明述酒詩書後

嘉定縣安亭鎮新建震川書院扁其旁爲陶庵爲

畏壘亭以復先生故蹟因題其後

書江寧屈子祠堂碑記後

惠氏四世傳經遺像書後

題卓海帆收藏成親王書後

題陳山仲像後

題栖心閣扁後

書何祖柱所輯趙恭毅公自治官書後

書騎馬小像後



文集 跋 書後

尙書辨僞跋

古文尙書之僞自吳才老朱晦翁發之其後論者益衆若吳澄書纂言及吾鄉羅喻義是正一編皆止注今文削古文不錄雖各自有見然爰書不立無以斷獄梅鸞尙書考異閻若璩尙書疏證則又專攻古文於今文鮮所發明陳第毛奇齡之屬復起而持其長短迄今談者無以別黑白而衷一是也石嶺唐先生是編於今文亦加疏釋特意在古文句梳字筥審音叩節以排之故以辨僞爲名其

中精義層出能使讀者渙然相說以解如辨虞書  
不宜稱古舜夏書不宜稱古禹伊訓於嗣王之前  
不宜有暨湯之語旅葵在武王之世不宜有太保  
之目皆直捷了當南山可移此判不移而其有功  
名教者尤在辨虺誥秦誓之文以爲湯方口實是  
懼而虺懼于非辜畏禍叛君口實甚矣聿求元聖  
與之戮力幾疑五就桀時計出反間誓師稱王狗  
儼然吳楚之僭號時哉弗可失豈慮紂改圖耶蓋  
自僞書行而湯武之心迹不明久矣雖學如蘇軾  
猶不免有非聖之論毛氏但爲古文辨冤而不知

湯武之冤誰爲之而誰辨之也哉先生惟以今文  
與古文對較而真僞之跡自見其所摘發不外本  
書無考據家支離牽強之習以視梅閻諸人不啻  
過之至若危微精一爲帝王心法之要京山郝氏  
始創異議謂古聖賢口中無此竊謂僞書多取古  
語足成之人心道心二語見於荀子解蔽篇旣明  
云道經之言矣精一執中二語亦見馬融忠經安  
知非出古書而偶遺逸正不必以目見所未及遂  
並其義理可通者而亦訾之也先生諱煥善化人  
力學敦行爲吾鄉宿儒其子仲冕孫鑑皆以學行

陽明先生全集 卷之二

名於時能世其業云

楊椒山先生手書跋

楊忠愍公手書四種阮芸臺先生得之藏於焦山  
俾毅烈之氣與海風石色互相映發真可謂椒山  
無意合焦山也



一  
二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十

三

陸文恭公手書忠宣奏議跋

座主蕭山陸文恭公生平孤介不妄交游門庭如水澍出門下最早得以時親緒論讀書談藝之下尤肫肫以世道人心爲亟每言雲汀任事宏毅吾所不及澍深以爲愧而仰窺期望之殷不敢不勉公好學不倦日課一詩兼作小楷數十行寒暑無間斷所鈔忠宣奏議一部持擇極精鶴孫持以見示猶儼然想見公之蘊抱不凡無事不以古賢自淬礪至於心正筆正所書四冊自始至終字畫端整無一筆稍懈其堅定不移之概亦於此可徵鶴

孫其世守之勿替

孫其世守之勿替

區田觀穫圖跋

區田之法蓋卽畹田遺意漢志謂之代田趙過能  
爲之田一晦三畹歲代處故曰代田是也志言后  
稷始畹田廣尺深尺曰畹長終晦一晦三畹播種  
於畹中苗生葉以上稍耨隴草因墮其土以附苗  
根比盛暑隴盡而根深耐風與旱一歲之收常過  
縵田晦一斛以上漢武時河東三輔太常民皆便  
代田爲其用力少而得穀多也嘗歎漢藝文志農  
家者流書凡數十種必多后稷以來傳授遺言而  
今皆無考獨賴班志此篇言深耕易耨之法頗詳

惜自按粟都尉以後無復舉而行之者吳門潘子  
功甫以名父之子精心緝古旣慨然捐其田二千  
五百晦爲義莊以贍鄉里復舉區田法口講手畫  
於義莊試行之輒效余得其米嘗爲詩以謝今歲  
吳民效其法者漸多當常田刈麥蒔秧時其苗已  
蓬勃高二三尺許雖有水旱不更憂由此廣之將  
使盡地力協天時菽粟如水火以惠我農人粒食  
無窮卽以襄鄙人敦耕所未逮簡便易行孰謂古  
法不可復哉功甫有說甚晰崑山王椒畦孝廉爲  
作區田觀穫圖因書前詩其上而綴其緣起如此

以質諸留心民事者

日本書紀卷之二十一

卷之二十一

六

東祝堂遺詩跋

勝國末年楚南當兵燹之衝一時文章之士率以  
節義自持埋沒不彰者多矣如馮根公陶仲調郭  
些庵王而農周仲聲郭幼隗皆名賢大手筆也如  
吳道行見可子愉古度楊會英嘉生彭日浴孺子  
陶顯功膚仲張聖型子疇車以遵孝思潘應斗章  
辰嚴首昇平子瞿龍躍天門石之琨元美季嗣先  
勗初劉瑄他山廖國遴孟符周星九煙朱慈祚愷  
郎楊啟華禹心王二南放叟陳來學開之夏光洛  
梅巢周聖楷伯孔皆焯有才名此內惟平子議論



不能悉淳伯孔以迫脇沒於亂識者惜之其餘則  
皆節義文章也二百年來吉光片羽所存無幾甚  
至有不能舉其姓名者可慨也夫茲乃復見迺錫  
陳先生之詩先生諱宏範長沙諸生慷慨負奇氣  
入

國朝洪經畧嘗倚以招撫黃州各寨先生志在靖亂  
事訖洪以偏沅副將薦不受飲酒賦詩游詠江湖  
閒以老此卷爲先生自書東祝堂五言律橐氣格  
蒼老拔出於同時竟陵諸子外自成一家書法亦  
沈著亦俊快超然入古不落宋以後窠臼想見其

志趣不凡也詩凡四十二首其六世孫庶吉士本  
欽懼手澤之湮也重裝爲二軸太原邢學士雋藻  
爲之傳而相國吳縣潘公尙書蕭山湯公記之道  
州大司空何公歙縣閣學程公爲之賦詩是亦足  
以傳矣本欽復攜以見示因敬識數語以廣吾鄉  
文獻之徵云

附二家之全

周文忠公硃卷跋

山陰周文忠公以天啟甲子舉順天鄉試其硃卷藏於家裔孫調梅館余所攜以示余卷每幅墨格有縱無橫長闊頗異於今式面頁號戳及膽錄對讀各關防略與今同首場四書文三篇易經文四篇第二場論表各一判語五第三場策五道而缺其第四問後數頁每行間多有濃圈密點及評語甚晰考試官用墨筆同考官用藍筆是科順天考試官爲鄞縣李康先句容王祚遠房考則不知何人也卷前幅有總批二段蓋兩試官所加又首藝

題前一行有小戳印考試官右庶子李七字而無  
王殆不可解豈各卷先由兩人分閱而後彙定取  
中耶公文有真氣有內心每篇皆有見到語卓然  
想見其爲人公以崇禎戊辰成進士入翰林癸未  
同考官闈中竟得嘉定黃蘊生先生與公先後殉  
國難可謂有師有弟亦洵乎文章有神也因並識  
於此

朝天宮劉淵然醮壇篆符碣跋

明成祖命道士劉淵然建醮朝天宮淵然刻石爲小碣篆符於其陰猶稱洪武三十五年十月其時成祖甫入革除建文年號也碣藏玉皇像座中五百年來人無知者道光十三年十二月初九日乙巳重修朝天宮像得之復加整理藏內焉



劉淵然鍾山朱湖洞天告行碣跋

此碣亦淵然刻藏玉皇像座中末題永樂四年十  
一月初十日丙寅於鍾山朱湖洞天告行考史是  
月己巳甘露降孝陵松柏醴泉出神樂觀殆亦精  
禋所格歟書云惟天陰隲下民相協歟居今重新  
斯宮亦庶幾爲民祈福之義云爾



平三才の三才

二

光福寺舊募疏跋

光福寺銅像觀音大士於宋仁宗時浮水而來禱  
雨輒應此冊爲明嘉靖中僧立本募緣疏當時名  
士往往挂名其間三百年來其徒猶守藏勿替於  
彼法爲不壞外緣亦足備吳中文獻之一端云

附子家  
卷之二

三

聶蓉峰箴吏篇四十首跋

右詩聶蓉峰太史爲其門人袁君出宰時作也凡於愛民禮士治獄卹災諸要務無不洞悉利弊而尤諄諄於尙廉務實善哉言乎竊謂天下者府州縣之積也我

朝進士釋褐授縣令其上者或由翰林部曹出守郡蓋治民莫親於縣令而察吏莫親於郡守督撫司道總其成而已故守令得人天下可得而治也蓉峰爲崇祀名宦環溪先生之孫世傳治譜自其爲主考學政所至有聲今以二十餘年舊史氏始得

出典郡不可謂非遲滯者矣然苟出其素蓄以繼  
文翁召父之後卽由是而封圻台輔佐

聖天子理萬民正百官雖以治一郡者治天下可也今  
讀其詩考其言愈有以信夫蓉峰之能爲循吏爲  
名臣也因誌數語而歸之

前跋已寫就未及寄去而蓉峰適奉檄權紹興守  
下車之始卽重修戴山書院親課各屬生童口講  
指畫夜以繼日復建立育嬰堂增置義學大修三  
江閘以興水利凡有益於民繫於士習文風莫不  
立見施行如飢渴之於飲食也一時政聲大振溢

於鄰省以勞致疾甫卸事遂卒百姓號泣如失慈  
父母改建五賢堂爲六賢堂奉蓉峰遺像入祀焉  
計自道光八年四月抵任至七月病卒在任前後  
不及四月境內大治百姓歌舞洵可謂能行其言  
者矣惜乎不竟其志無由徧惠於東南之民也爲  
之於噫不置云

二二二二二二二二

一

賢母圖跋

賢母圖者本陳居中所作自敬姜至尹和靖之母  
凡十人人爲一幅嘉定士民購以進其邑令淡君  
爲母夫人壽君宰嘉定數年任滿援例爲觀察當  
入都赴選適母夫人七秩嘉人戀戀購是圖以獻  
比諸闕宮之祝壽母云人孰不欲顯親身爲民牧  
鍾鼎之養章服之榮皆其所固有所不可要致者  
斯民愛戴之忱旣以父母之稱奉之於吾而因以  
推其所自出父吾之父母吾之母苟可以爲吾父  
母娛求之如不及是謂不以一身之仕達顯其親



而以一國之名譽顯其親乃顯之至者焉君爲子  
庚午典蜀試所得士暨宰嘉定又值予撫江蘇門  
人也而兼屬吏其所以發名成業皆母夫人所教  
予旣臚而序之矣雖然予序之百千言猶不若嘉  
人之一言也君能得此於嘉人則君之實有造於  
嘉人嘉人之實有不忘於君君之賢果信也於是  
焉歸善於親而以子之賢益成其母之賢其榮爲  
何如哉君母生平未嘗至嘉定於圖中諸母髣髴  
之嘉人以是爲壽亦可謂善頌善禱者歟

聖教序跋

右軍墨蹟貞觀中收入內府者猶三千餘件懷仁當右文之世所見旣富持擇亦精湊合展縮妙入神品刻石累年始就黃長睿謂所見右軍遺帖與碑字纖微克肖當時翰林侍書輩競相效學流傳何啻千萬今右軍真跡不可見矣而佳刻亦日亡此本墨光奕奕神采奪目當爲武關構紙之遺臨池家其寶諸



黃秋士重寫錫山竹爐圖跋

錫山竹爐圖凡四乾隆中毀於火

純廟命補之永奔名山等諸球圖矣黃生復寫此又當爲

聽松庵中添一佳話也



陶氏族譜恭跋

右族譜從兄蘭江先生所修而 大人參定者也  
其義例之精筆削之當蓋嘗以呈之當代名公先  
生皆爲許可鴻篇鉅序詳哉言之可不須小子贅  
獨念自 吉州公來簪纓易奕而忝竊清班實自  
小子澍始自顧譴劣微前人之培植則不至是然  
遲遲乃應將所謂時其聚以著今日之盛耶先是  
乾隆乙未 大人以 先大父命家叩人問輯有  
成帙猶以爲支譜未廣也戊戌乃倡之於族會歲  
歉中止嘉慶庚申秋闈歸 大人命澍赴茅坪復

議其事適榜發報捷者至議遂定迄壬戌臘假歸  
甫及殺青綜計始末皆若有數焉使澍得以贊襄  
其事也此固由先人默佑之靈而將來族衆之  
昌熾亦可豫券矣若夫尊祖敬宗收族譜之所以  
修也諸父兄弟當必深知其意而不僅以譜爲綴  
拾名字紀輯生沒之具已也小子澍亦惟夙夜識  
之不敢忘

先贈公黃江制義恭跋

先贈公生平著述甚富未嘗輕棄其稟言此吾一番心血他日稍暇當刪定存之辛酉春不孝偕計北上壬戌成進士入翰林中賀客雜還稟爲誰何氏攫去求之經歲不可得不孝追維手澤負贅日深今春乃從友人劉冠南秀才假得所鈔制義並記憶夙所誦習者其百餘篇都爲一帙嗚呼先贈公苦心孤詣淹貫精醇爲文幽杳沈摯力追先輩其視塗模粉飾苟且以弋科名者泊如也當夫握槩懷鉛詞雄薈萃抗心據櫨凡馬皆空哲匠



宗工每深詫賞而棘闈屢薦輒外孫山文章憎命  
達自古歎之矣茲所存不及十之三然觀之者卽  
一滴水可知大海味也不孝日侍左右無能窺見  
萬一近乃稍有所知而山頽木壞罔極徒悲百年  
遺橐天留在抱向深山掩淚看讀元好問詩輒盡  
然不知涕之何從也

陶淵明述酒詩書後

按淵明述酒詩自韓子蒼湯東澗發其端而詞意

未悉至以羊勝為梁孝王羊勝之事以卜生善斯

牧為魏文侯事卜子夏皆牽附無義不如黃文煥

注為善至平王去舊京以下則注家無一得其意

者蓋自篇首重離照南陸至重華固靈墳此述晉

室南渡之後偏安江左浸以式微素礫自修清即子美所謂渚清

沙自以喻偏安江左氣象蕭颯也至零陵而王氣遂盡南嶽無餘雲謂零陵

也零陵在衡湘間故以南嶽為言篡弒已成敘述明顯流淚抱中

歎以下乃再三反覆以痛之神州獻嘉粟西靈為

我馴此用穆天子傳西王母諸國獻禾獻芻諸事  
謂西晉全盛時五胡未亂四夷賓服也而今不可  
見矣次則苻勝亂楚而沈諸梁董師復之謂東晉  
初有王敦蘇峻之亂卽有陶侃溫嶠之功國猶有  
人也而今亦不可見矣又下則山陽禪魏猶獲令  
終不事急急翦除而今亦不可復見矣至於萬乘  
求爲匹夫不得此牧人所以不願爲君也平王去  
舊京以下謂晉自遷江左而中原沒於鮮卑劉裕  
平姚泓修復晉五陵置守衛國恥甫雪而篡弑已  
成也峽中納遺薰薰謂獯鬻史記五帝本紀作葷

粥周本紀作薰育鞏獯並通峽蓋邾廓成王定鼎  
于邾廓今洛陽峽邾通也晉五陵在洛陽不敢顯  
言五陵故曰雙陵蓋亦以峭之二陵亂其辭其實  
若除宣景文三王不數則武惠二帝正雙陵耳三  
趾乃曹魏受禪之祥左太沖魏都賦莫黑匪烏三  
趾而來儀注延康元年三趾烏見於郡國裕受禪  
時太史令亦陳符瑞天文數十事也王子愛清吹  
以下則以子晉棄位學仙願世世勿生天王家之  
歎也朱公練九齒閒居離世紛乃遭亂世而思遐  
舉之心也天容自永固謂天老容成與下彭殤爲

對言富貴不如長生卽楚辭思遠遊之旨也

嘉定縣安亭鎮新建震川書院扁其旁爲陶庵爲  
畏壘亭以復先生故蹟因題其後

震川先生有慕於陶靖節因以名其室今予復慕  
先生爲揭還此扁以寓景仰兼識數典不忘之意

云爾

陶庵

震川先生以嘉靖壬寅卜居安亭至是一百八十  
八年矣尸而祝之社而稷之果與先生當日名亭  
之意相應然則士忠不志道耳安在荒江寂寞之  
濱無知已耶書此以勗後來

畏壘亭



書江寧屈子祠堂碑記後

漢書地理志言屈原放流作離騷漢興吳王濞招致天下之娛游子弟枚乘鄒陽嚴夫子之徒興於文景之際而淮南王安招賓客著書嚴助朱買臣文辭並發故世傳楚辭然則吳之文章實由屈子發之百世之師其祀於吳官矣今此祠雖造端於方外實吾道不可少之舉事有曠百世相感者非歟



平二考ノ三集

名目二二

三三

惠氏四世傳經遺像書後

東吳惠氏以經學世其家乾隆中葉海內之士知鑽研古義由漢儒小學訓詁以上溯七十子六藝之傳者定宇先生爲之導也乃其先樸庵先生已有左氏春秋補注研谿先生有易傳春秋問禮問詩說半農先生有易說禮說春秋說大學古本說皆足以引伸墜緒扶翼雅言而半農先生爲粵東學政用五經試士士習丕變彬彬然多通經至今粵人思之以配食韓子云余撫吳六年於名賢碩德未嘗不訪求其遺蹟嘗取元龍仲孺定宇三先

生像刻入滄浪亭今其裔世昭復以三先生及樸  
庵四世遺像乞題夫畫像之興肇於成都禮殿所  
以圖寫先賢志其嚮往至子孫之摹繪祖父不過  
一家之私而已苟其人無可存將姓名且付子虛  
而像於何有若惠氏諸先生經師人師士林瞻仰  
所謂先睹爲快者非歟展挹之餘德暉如對聞其  
家紅豆樹已枯復茁君子之澤於世昭兄弟望之  
矣

題卓海帆收藏成親王書後

太白作蜀道難愉快迷離若有神鬼出沒其間成  
邸此書亦天真爛漫不可湊泊洵古今奇作有美  
必合者也海帆蜀人來往劍門棧道間此種境界  
猶或遇之

詒晉齋主人以書妙天下海帆同年得之最多茲  
觀所藏便面其畫之妙亦復如是可寶也

書家有氣骨神韻數者以氣爲主而骨與神隨之  
韻則尤難非襟懷超妙而涵養之深者不能右軍  
以後惟虞永興蔡君謨足以語此成邸書初學趙

子昂中間偶涉歐臨湘非其本色晚乃直入永興  
之室觀此卷可見其詩亦秀韻可誦足稱雙絕

題陳山仲像後

山仲陳先生者蓋前代隱君子也觀袁君所作行  
略庶幾好行其德者歟人固有希跡古賢而名不  
出於鄉里者然而天之報之必厚焉不於其躬於  
其子孫其將蒸蒸日上盛哉莘田重摹遺像並書行  
略其上亦可謂數典不忘矣其像之前幅有女史  
王端淑舊贊題曰壬子乃明神宗之四十一年端  
淑爲山陰王季重女嘗言八男不易一女者其詞  
尤清麗可觀云

東洋文庫  
和蘭文庫

三ノ

題栖心閣扁後

趙芸浦先生嘗臥病夢至一精舍竹徑翛然甫欲入有僧止之曰子他日栖息於此無遽也其後以太夫人諱歸里偶步城西有古觀音庵恍若夢中所見因語僧築室其旁命曰栖心閣未幾事而先生卒於京師遂葬焉今其嗣駕部君以遺言歸竟前願並繪先生像於其中而屬予補書閣額予惟先生之葬京師有戀闕之意乃心復欲栖神故鄉至性所存莫非忠孝之遺生天成佛殆又不足論已



阿彌陀佛  
卷之二  
三

|  |  |  |  |  |  |  |  |  |  |
|--|--|--|--|--|--|--|--|--|--|
|  |  |  |  |  |  |  |  |  |  |
|--|--|--|--|--|--|--|--|--|--|

書何祖柱所輯趙恭毅公自治官書後

武進趙恭毅公申喬以進士爲商邱令內遷部郎  
乞假歸用安溪李公薦

特起浙江布政使旋

授巡撫調湖南偏沅巡撫在任八年入總臺憲轉戶部尙

書掌

國計十餘年卒贈太子太保祀湖南名宦常州鄉賢  
皆有專祠雍正時祀賢良祠公爲政嚴厲摘發如  
神名重天下而楚人尤稱頌之當吳三桂據衡州  
時民苦征役公至始大滅火耗革徭役一切無藝

之征悉汰焉民困獲蘇閭閻尸祝雖婦人童孺無不知有趙撫院者百數十年來未之或衰也公治事悉出親裁從不假手書吏亦不延幕友在湖南時書吏何祖柱者長沙攸人日侍公几案心佩公之爲政於一切奏疏文告皆手鈔之彙爲二十卷又補輯其莅浙及入臺總戶部時各稟爲四卷以附焉先是湘鄉人士有趙公實政錄之刻比何祖柱書成而公撫楚時政績大備其令睢陽時無留心掇拾者故事蹟無傳在浙亦然僅嗣君熊詔輯彙案略存一卷以此觀之楚人之報公深矣

書騎馬小像後

乙酉正月余自皖述職入都遇畫士孫姓爲余作  
騎馬小照比成與余不甚肖而肖同里王立堂先  
生偶黃茂才德汲見之亦謂酷似其舅以語先生  
之嗣君遂來轉乞爲青箱之守因舉以贈之先生  
諱崇綱乾隆丁酉拔貢以四庫館寫書勞議敘州  
同在籍候選嘗主講中梅書院余時甫舞勺隨  
先君子黃江公修塔在城先生一日來過適見余  
岷思吟大加歎賞立成一詩贈余兼呈先君子  
云一經授爾爾應珍不爾還思責子人筆陣有鋒

須自勵書田無價詎言貧食牛具力評非假懷橘  
與悲語見真我欲從茲呼小友莫教蘭玉點纖塵  
先是署縣余公肇錫觀風拔予卷有小兒學語半  
未成聞聲已具食牛力之評故先生詩及之詞意  
珍重期許之中義存箴警可想見前輩風概云

陶文毅公全集卷四十三目錄

文集 辨 攷 雜說 策問

靖節先生爲鎮軍建威參軍辨

靖節先生書甲子攷

開梅山攷

雜說

庚午科四川鄉試策問



文集 辨 攷 雜說 策問

靖節先生爲鎮軍建威參軍辨

按顏延之有晉徵士尋陽陶淵明誄云先生卒於元嘉四年春秋六十有三以厯推之生於晉哀帝興寧三年乙丑其詩言投耒去學仕是時向立年向立者將近三十是以吳斗南何燕泉皆謂太元十八年癸巳先生年二十九爲江州祭酒也迨義熙元年先生年四十一從彭澤縣棄官歸遂不復仕則歸去來辭所序乙巳十一月也中間兩爲參軍一鎮軍一建威其歲月皆無可考趙泉山謂佐



鎮軍在乙未非也以歸園田居詩六載去還歸徵  
之當從乙巳逆數至隆安三年己亥爲六載本集  
有始作鎮軍參軍經曲阿詩在庚子五月從都還  
之前其詩有登陟千里及山川行役之語知爲參  
軍時奉使馳驅之作所以知參軍不始庚子而始  
己亥者以庚子詩有久遊戀所生及一欣侍溫顏  
再喜見友于等語若其年始出五月卽還是離家  
不過數旬安得云久遊而一再欣喜若渴語之津  
津耶計先生爲鎮軍參軍正孫恩在會稽起事寇  
海上至丹徒旋竄郁洲故參軍往來使事較多持

劉牢之以鎮北將軍開府鎮京口督軍擊賊其不稱鎮北而稱鎮軍者晉書王恭傳載都督以北爲號者累有不祥故桓沖王坦之刁彞不受鎮北之號恭表讓軍號而實惡其名然則牢之正當恭之後持節都督諸軍鎮京口而鎮北適有時忌先生爲其僚佐不稱鎮北而稱鎮軍正禮所謂從俗從宜也夫何疑焉至李善注文選引臧榮緒晉書宋武帝行鎮軍將軍此因其時別無以鎮軍稱者故以臆謂鎮軍卽裕耳後世如葉少蘊輩或遂疑先生爲真仕裕皆因善注之誤耳不知裕置留臺行

鎮軍將軍在元興三年甲辰三月先生方以憂居  
尋陽明年三月爲建威將軍劉敬宣使都安能未  
釋服而遽爲裕出耶先生辛丑七月假赴江陵聞  
父訃祭妹文言昔在江陵重罹天罰是也頻年宅  
憂在里故有懷古田舍詩癸卯十二月與敬遠詩  
復言寢迹衡門下邈與世相絕又言高蹈非所攀  
謬得固窮節以此推之其肯遠涉以干裕哉若劉  
敬宣則牢之之子與先生爲世好本傳敬宣與諸  
葛長民破桓歆於芍陂遷建威將軍江州刺史鎮  
尋陽其就近以參軍辟先生宜也通鑑劉敬宣在

尋陽聚糧繕城未嘗無備何無忌等雖敗賴以復  
振明年乙巳三月乘輿反正於江陵留臺備法駕  
遣尙書陶夔迎帝至尋陽達於板橋而先生亦銜  
建威命使都經錢溪有詩是時安帝復辟光復舊  
物故有眷彼品物存義聲都未隔之句其使都自  
爲奉賀復位而往第考史劉毅嘗有憾於敬宣及  
敬宣爲江州以無功不宜先毅等辭裕不許毅使  
人言於裕曰敬宣不豫建義聞已授郡實爲過優  
尋復爲江州尤爲駭惋敬宣不自安自表解職是  
先生此行或因賀復位而卽爲建威表求解職耶

敬宣旋以宣城內史召還而先生亦於八月以叔父夔薦赴彭澤在官八十日卽歸矣其時又有建威將軍劉懷肅者當桓元西潰餘黨四百人襲破尋陽城劉毅遣懷肅討平之及劉毅等擊破馮該懷肅追斬之於石城乙巳三月桓振自鄖襲江陵懷肅與戰於沙橋斬之其人多隨劉毅在江陵非先生所從爲參軍者也至先生之不屈於裕史言自高祖王業漸隆不復肯仕觀其贈殷晉安爲太尉參軍云語默自殊勢亦知當乖分其詞極決蓋先生自入牢之幕與裕同官早已察見其不臣之

心迹是以拒之甚深至牢之北府兵最有名幕內  
人才亦衆又嘗由鎮北進號前將軍晉制左右前  
後四軍爲鎮衛軍又開府位從公爲持節都督者  
增參軍六人文獻通考將軍總敘云漢有三鎮之  
稱魏有鎮北之號其將軍以下屬官有長史有參  
軍而參軍之目又有五曰兵曹曰騎曹均晉置又  
有錄事參軍倉曹參軍冑曹參軍注並云晉元帝  
爲鎮東將軍置謂之衛佐並爲美職此又牢之可  
稱鎮軍而得辟參軍之明證也考晉書牢之參軍  
著於時者劉裕而外尙有張暢之劉襲併先生爲

四而先生名尤高以時方競武故史不載而但見於詩然下視諸人已不啻鳳皇之於飛鳥矣

靖節先生書甲子攷

按淵明詩文於晉標年號宋惟甲子之說自沈約著於宋書而李延壽南史李善文選注相承無異五臣云意者恥事二姓故以異之猶約說也至宋僧思悅始創新論謂詩中並無標晉年號者所題甲子蓋偶記一時之事豈容晉末禪宋前二十年輒恥事二姓所作詩但題甲子以取異哉由是王復齋會季狸吳師道宋景濂郎仁寶諸人起而和之而先生之隱衷與史氏之特筆幾爲所汨此所謂以不狂爲狂也按北齊陽休之序錄言先生集



先有兩本行於世一本八卷無序一本六卷次序  
日編比顛亂兼復闕少蕭統所譏八卷合序日誅  
傳而少五孝傳及四八日然編錄有體次第可尋  
是昭明之前先生集已行世五柳傳云嘗著文章  
自娛頗示己志則其集必有自定之本可知約去  
先生僅十餘年必親見先生自定之本可知竊意  
自定之本其日以編年爲序而所謂或書年號或  
僅甲子者乃皆見於目錄中故約作宋書特爲發  
其微趣宋元獻私記云隋經籍志宋徵士陶潛集  
九卷又云梁有五卷錄一卷唐志陶泉明集五卷

今官私所行本凡數種與二本不同有八卷者卽  
梁昭明太子所傳合序傳誅等在集前爲一卷正  
集次之亡其錄錄者目錄也是先生集別自有錄  
一卷而沈約云文章皆題歲月者當是據錄之體  
例爲言至唐初其錄尙在故李善等依以作注後  
乃亡之遂凌亂失序無從校勘耳假令先生原集  
義熙以前亦止書甲子永初以後或并紀年號休  
文無端造爲此說則當時之人皆可取陶集核對  
以斥其非豈有慙齊梁陳隋俱習焉不察李延壽  
反采入南史李善又取爲選注哉休之謂昭明編

錄有體次第可尋竊意昭明白加揆校必依先生  
自定之目一以編年爲序若如今本孰能尋其次  
第思悅等但據題上所有甲子爲說不知今集自  
庚子至丙辰十七年詩止數首而壬寅甲辰丙午  
丁未辛亥壬子癸丑甲寅乙卯等年俱無一篇辛  
丑遊斜川詩轉不在編年之內其非舊次亦可見  
矣余門人涇縣趙紹祖謂先生未必首首題年號  
甲子不過於一年所作之前題之而阻風赴假等  
詩蓋偶書甲子於題首後人刪其每歲所標之甲  
子而此數首甲子以在題上故不刪其說近是若

宋景濂謂先生清節不待書甲子而後見則似未  
審所爭書不書者非甲子乃晉宋之年號也不書  
宋號正孤臣惓惓故朝託空文以見志者王厚齋  
謂與箕子稱殷祀陳咸用漢臘同意真先生曠代  
知己異說紛紛可以息其喙矣



開梅山攷

曾子固元豐類稿中有本朝政要策內南蠻一篇  
言宋興嘗設廣捷之兵習標牌之器其後又益澄  
海之師皆以備蠻之爲疆場害也蓋及其輒動而  
我之所以威附之術可得而談者有用兵深入伐  
而克之興國之初翟守素之平梅峒是也有兵已  
克破赦四伐之咸平之間曹克明之收撫水是也  
有計能屈之納以忠信章聖之世謝德權之靖宣  
州是也蓋兵不足以克則赦不能以來計不足以  
屈則信不能以收此古今之通理而智謀者之所

易觀也今溪峒往往爲東南之憂而議者不謀威  
器一機懷之以利是見其一未見其二也云云據  
此則翟守素之平梅峒固嘗深入而克之惜史缺  
有間不可得而詳耳其命翟守素之詔則玉海亦  
載之從來譚吾邑掌故者皆以章惇開梅山爲稱  
首而不及翟守素之績故書此以備修邑志者之  
稽攷焉

雜說

小時見一時文有云瀟湘雲夢之間其人多詐不知何本或云此因楚人多詐一語而杜撰耳按楚人多詐語出史記酈食其傳所謂多詐者乃謂齊非謂楚也且楚亦秦漢時之楚非春秋時之楚也酈生傳云漢王欲捐成皋以東屯鞏洛以拒楚酈生因曰今田廣據千里之齊田間將二十萬之衆軍於歷下諸田宗強負海阻河濟南近楚人多變詐足下雖遣數十萬師未可以歲月破也臣請說齊王使爲漢而稱東藩夫項羽起江東都彭城爲



西楚而齊阻河濟所謂南近楚者指徐邳淮陰之地今江蘇北境徐州淮安揚州等府是也揚州人或舉此語以誚湖廣因戲謂之曰子何爲數典而忘也聊記之以儆不讀書而妄談者

閩百詩著四書釋地頗有可採而將八股時文連篇累牘載入殊乖典雅至其子詠謂孟子言南蠻馭舌卽今之永州人亦載入釋地中夫春秋時楚都郢中在今之湖北江陵縣永州在其南相隔千有餘里其爲楚地已在羈縻之列逮孟子時楚徙都陳且東遷於壽春矣北距滕國不過三百餘里

是以文公行井田而許行陳相之輩皆聞風自楚  
而至以其相去甚近也若謂許行爲永州人則江  
陵距孟子時之楚已千餘里更南去千餘里而至  
永州乃能負其耒耜朝發而夕至殊非情理且楚  
東徙時秦已取郢郢及洞庭五渚永州更在洞庭  
之南八百餘里已非楚地中間更隔宋魏諸國安  
知滕之行井田而涉遠以至哉 此釋地其有譽  
兒之癖乎

阿彌陀佛

一

庚午科四川鄉試策問

問漢儒說易皆有師承其以彖象文言雜入卦中始於何人李鼎祚之集解分割序卦之文以冠各卦吳澄之纂言雜取繫辭傳之語謂爲文言錯簡不疑於亂經歟書有今文古文而又有中文其名何昉武成錯簡朱子與程子不同禹貢九河蔡傳與朱子各異其去取當何從歐陽氏謂孔子刪詩或刪其一章或刪其一句一字能綜舉否毛詩小序流傳最久宋儒詆之者如朱子鄭樵王質尊之者如呂祖謙范處義說各不同能分別言之否春

秋三傳所載經文如盟蔑盟昧尹氏君氏之類互有異同可悉數諸左氏於獲麟之後書及悼之四年公穀於襄二十一年書孔子生皆非筆削之本經諸如此類能詳言歟大戴禮記存者四十篇其與小戴同者何篇小戴四十九篇隋志譚小戴所定祇四十六篇其三篇爲何人所增

聖朝經學昌明多士研習有素蓋以所業著於篇

問陳壽三國志苟張比之遷固王通目爲高簡是壽固良史才已然壽本蜀人何以蜀志反多缺畧志之名起於漢書以紀天文地理禮樂刑法諸典

制壽乃名全書爲志而並不作志於例宜否開濟如武侯而貶以將畧非其所長忠雅如蔣琬而詆以未盡治小之宜所論當否寇蜀帝魏壽爲晉臣統緒相承尙爲有因司馬光資治通鑑亦仍其說豈別有見歟習鑿齒漢晉春秋欲以正統予蜀劉知幾章望之之論亦然張栻經世紀年以先主繼漢獻而附魏吳於後蕭常郝經之續後漢書亦然能詳舉其文歟裴松之之注三國志多於原書數倍果有功於壽歟後人又有三國志辨誤一卷於陳志裴注皆加訂正亦有可採歟知人論世尙論

所資多士潛心史學將以備

彤廷著作之才其以稽於古者言之毋臆

問守令爲親民之官有養則必有教漢書載循吏  
六人後漢書載循吏十二人其能以興學校修庠  
序爲任者凡幾人舊唐書循吏四十人新唐書循  
吏十五人其以增興學舍著者爲何人論者謂兩  
漢循吏雖多惟董仲舒相江都有儒者氣象而漢  
循吏傳不載韓愈令山陽守潮州皆著異績而唐  
循吏不載豈以二人皆大儒不可以吏目之歟宋  
儒如周濂溪之在南安程明道之在晉城朱子之

制壽乃名全書爲志而並不作志於例宜否開濟如武侯而貶以將畧非其所長忠雅如蔣琬而詆以未盡治小之宜所論當否寇蜀帝魏壽爲晉臣統緒相承尙爲有因司馬光資治通鑑亦仍其說豈別有見歟習鑿齒漢晉春秋欲以正統予蜀劉知幾章望之之論亦然張栻經世紀年以先主繼漢獻而附魏吳於後蕭常郝經之續後漢書亦然能詳舉其文歟裴松之之注三國志多於原書數倍果有功於壽歟後人又有三國志辨誤一卷於陳志裴注皆加訂正亦有可採歟知人論世尙論



所資多士潛心史學將以備

彤廷著作之才其以稽於古者言之毋臆

問守令爲親民之官有養則必有教漢書載循吏  
六人後漢書載循吏十二人其能以興學校修庠  
序爲任者凡幾人舊唐書循吏四十人新唐書循  
吏十五人其以增興學舍著者爲何人論者謂兩  
漢循吏雖多惟董仲舒相江都有儒者氣象而漢  
循吏傳不載韓愈令山陽守潮州皆著異績而唐  
循吏不載豈以二人皆大儒不可以吏目之歟宋  
儒如周濂溪之在南安程明道之在晉城朱子之

在南康其所設施能舉數諸文翁以文學化蜀其  
後高暎仿其治法增設禮殿繪古聖賢像於其中  
王素席益皆嘗摹之爲圖能詳言諸他如李膺王  
商以修學爲先與夫吳資廉范張詠趙抃皆卓然  
有治績在蜀能縷述諸我

皇上澄敘官方大法小廉多士生際

昌期當通經致用將因言以覘所蘊焉

問文章家談藝之作始於典論其後論列益繁鍾  
嶸詩品所分上中下三品位置果悉當歟三品之  
中各系以小序謂某人源出某人其說不傷於武

斷歟陶潛渾然元氣論者或稱陶謝或稱陶韋或稱陶柳三人之詩果與潛相近否韓愈稱李杜文章光燄萬丈而謂六朝衆作等於蟬噪然李白平生低首謝朓杜甫自云頗學陰何豈六朝亦有不  
可廢者歟元白齊名論者謂元不逮白蘇黃齊名論者謂黃不逮蘇然歟否歟釋皎然詩式之分爲五格張爲之主客圖呂居仁之江西宗派圖果不  
易之論歟他如司空圖之詩品嚴羽之滄浪詩話歐陽修之六一詩話李東陽之懷麓堂詩話多有  
精言多士含英咀華根情苗言將和聲以鳴

國家之盛有所心得其備言之

問書爲六藝之一鍾王而後墨蹟益繁其傳刻之多莫如蘭亭當以何本爲最二王並稱觀世說所載其父子間議論各有不同何歟虞褚歐薛唐稱四家顏柳諸人魄力益雄論者謂唐人無不工書能各舉其得力之由歟宋米芾著海岳名言極詆歐薛顏柳又詆同時蘇黃諸人而自詡其書爲刷字果確論歟明楊慎墨池瑣錄於顏米皆有不滿而獨推趙子昂爲得晉人法董其昌初頗詆趙晚乃稱其功力之深將趙書固二王之後勁歟書家

論斷有分爲九品者見於何書又有神妙能三品  
之日始於何人劉次莊摹刻閣帖各加釋文於字  
旁其先有創此例者始於何時孫過庭書譜寶泉  
述書賦朱長文墨池編姜夔續書譜諸所論列足  
爲考鏡之資歟

聖世同文之化光於曩古臨池執筆多士童而習之其  
條析以對

陶文毅公全集卷四十四目錄

文集 贊 銘

開元寺二石佛贊

東方生畫像贊爲唐陶山先生作

開平王像贊 有序

陸朗夫中丞像贊

王司馬德政圖贊 有序

洞崖先生像贊

陶桓公像贊 有序

魁星贊

劉先生贊

有序

印心石屋主人畫像自贊

平面日晷銘

端硯銘贈劉生鼎盛

海曙樓銘

文集 贊 銘

開元寺二石佛贊

一名維衛 一名迦葉 晉建興中浮海至吳

我聞賢劫過去佛七維衛其始

即毘婆尸佛之別名

迦葉其

卒常寂光中無去來迹清淨法身非形相質云何

幻化現此拳石凌涉波濤驚走愚哲謂石是佛點

頭何默謂海能浮寶筏可息此種因緣不可測識

峰飛靈鷲塔涌寶級風輪願輪卽空而色苦海願

海是二而一我語尊者乞大慈力河順東流烽銷

西極卽此闔浮成極樂國尊者寂然示我雙膝說

法旣終天花雨室





東方生畫像贊爲唐陶山先生作

抱該博之識而自託於滑稽處親近之地而自遠  
於塗泥王母欲笑細君是貽其視王公貴人直等  
之如彼雖道足以召泰階六符惜乎不竟其施於  
虜此古之東方先生耶吾於衡岳之麓陶山之陰  
彷彿乎遇之



開平王像贊 有序

王姓常氏名遇春字伯仁懷遠人年二十三仗  
劍從明太祖破采石扼陳友諒虜張士誠平山  
東河南遂下大都走擴廓帖木爾西定秦隴俘  
元孽於塞外師還柳川病卒初封鄂國公沒贈  
開平王太祖嘗手疏王戰伐以授宋濂令爲傳  
稱開國之功王居十之六七云今其十五世孫  
元翰以王遺像索題秀眉修目面赭赤而微黝  
鼻堅挺鬚長不及寸兩耳軒張綴金環焉王卒  
時年四十此作三十許人龍袞繡衣貌婉儻而

有英銳之氣想見凌煙閣中非常人物也爲之  
贊曰

鎮鄒之山逆淮西上屹爲荆塗蟠根鉅壯神鋒天  
挺乃誕英豪奇呈燕領胸有豹韜仗劍從戎奮戈  
赴敵電掣雷轟所向必克杯吞江漢席捲勾吳長  
驅河朔遂越飛狐西邊月下角崩夜走掃穴犁庭  
獲其遺醜恥雪百王勲警千古雖不永年剖符錫  
土功名之際善處爲難公忠謙遜步武中山昔在  
大唐尉遲敬德英姿颯爽是稱鄂國亦越有宋鵬  
舉魁魁亦稱鄂國及王而三王之神勇古今罕比

不意留侯乃如女子馮公倚樹祭侯投壺成功不  
居視此畫圖



陸朗夫中丞像贊

縮金符紆華裾獨立無人撫卷踟躕似愍大道之  
蕪沒思返之於厥初慈烏啞啞白華油油臥不釋  
衣色養惟柔功名所從出豈不在乎內行之克修  
開衡岳千重雲飲湘江一杯水曾無異人老書生  
耳公在長沙福我楚疆我來吳下親公梓桑邈芳  
徽之難卽瞻遺像以旁徨





王司馬德政圖贊 有序

同年王觀察希白出示尊甫咸齋先生德政圖  
一冊乃先生由平湖宰升海防同知臨去時邑  
士張誠所作以識遺愛者圖凡八幅各繫本事  
於後曰講堂課士曰賢墓崇封曰橫橋導水曰  
乍浦築臺曰寒郊瘞骼曰儉歲賑饑曰城西纂  
志曰湖東建亭言皆紀實不爲虛美古循吏設  
施於茲可見宜其口碑載道也希白由翰林作  
宰游升今職入都時特蒙

召對不次之遭有以知析薪之澤遠矣系之贊曰

茫茫且蘭唐蒙所通山川磅礴氣象巖崑靈秀既  
闢瑰瑋爰鍾篤此英賢起家儒素學道愛人澤流  
恩煦豈弟君子謳思弗去至今當湖頌聲載路載  
路維何下車造士西蜀講堂鴻都經市芄芃棫樸  
蒸蒸桃李餼稟是資譽髦鵠起鵠起既奮景行維  
賢龜趺蝕雨馬鬣凝煙壟無犯柳田爲封綿堂堂  
清獻印此心源心源所印治行遙接乙巳旱災遺  
黎靡子弛禁通商糴乃無閉澤靜鴻噉民忘菜色  
菜色雖羸遇春而蘇道殣莫掩終委溝渠文軫枯  
骨莊悲觸醜職修蜡氏感澈明幽明幽交感政成

一貫乃命山川乃徵文獻事從其信傳戒其濫抗  
手賈耽希風班掾寇恂借王渙猶思轍雖莫柅  
口尙餘碑播諸圖畫遺愛永垂其圖誰作熙河張  
子條修件繫敷陳懿美乍浦臺高橫橋波駛樂只  
無疆令聞不已令聞不已世德作求公侯復始燕  
翼貽謀越人善禱吳亦能謳緇衣繼美奕葉揚麻



洞崖先生像贊

白箬之奧黃蓮之垠峰回溪互有石縱橫其橫伊  
何截然如城天門中開巍乎若傾有螭如蟾蹲於  
高冥石洞訝然下臥仙靈山空無人水流有聲白  
雲來往浩乎英英噫此佳處誰與爲盟或曰其中  
大隱是貞沈默好學其書滿籟發爲文章石色硜  
硜與水相忘因風乃成家風克篤且讀且耕步履  
旣康面目斯清彼何人斯曰吾伯父洞崖先生



陶桓公像贊 有序

公諱侃字士行鄱陽人徙家尋陽漢高帝功臣  
開封侯舍之後也父丹吳揚武將軍母湛氏公  
幼稟慈訓起家樅陽令仕至使持節侍中太尉  
都督荆江雍梁交廣益寧八州諸軍事封長沙  
郡公諡曰桓追贈大司馬公性宏毅孤根特立  
有網維四方之志值晉南渡掃除亂孽再造王  
室忠義之氣橫秋霜而貫白日史言公勤於吏  
職闔外事千頭萬緒綜理細密筆翰如飛門無  
停客嘗語人曰大禹聖者乃惜寸陰至於衆人



東坡先生集卷之四  
當惜分陰又曰老莊浮華非先王之法言無益  
實用君子當正其衣冠攝其威儀何有蓬頭養  
望自謂宏達耶家傳載公好學善談論尤明詩  
易御覽復引別傳言公釐明詩書春秋足徵公  
志在聖賢嚴斯道之防且有功經學不徒勲高  
百代爲有晉第一純臣也石頭城爲公摧蘇峻  
之所遺列在人茲於其前博山之陽闢書舍肖  
公祀之用志景仰因以惜陰之義爲多士有志  
於學者勗像成敬爲之贊曰

於鏢桓公緒衍濟陽八州作督七族重光身鎮地

軸手扶天綱投袂而起大義勤王千里肅清遂奠  
苞桑長沙開國像繪武昌嫉時清談力闢老莊習  
勞戒逸百箴是將竹頭木屑布置精詳擣搗博具  
投之汪洋語其忠順希跡孔明意存法外功在旂  
常每懷古哲莊語日彊尺璧非寶百鍊彌剛鬼鬼  
石城遺烈在望樹之精舍惜陰是名斯聖賢之徒  
歟邈山高而水長

三才圖會

魁星贊

睢其目齟其齒藏其毛黎其趾有神報陰

魁星名徵

詣此豈管鉅於金而擊不靈奚斗大於印而髮猶  
指傀形詭貌託廬陵之朱衣宰祿司文弼梓潼之  
亞子燭炮三條花飛萬紙記得簾前見者如是如  
是

附子考

卷四

劉先生贊

有序

先生益陽十里人恢廓磊落鄉里有事多咨之  
率片言以解乾餽之愆用是衰息族姓尤睦緩  
急有無求之立應嘗建宗祠置地若干所歲時  
率族人致祭雍雍有古法次君翼芝與予少同  
硯席條舉先生事蹟屬予一言書諸家乘乃拜  
手爲之贊曰

謂先生爲名路人歟而弗瓊其鞶謂先生爲山中  
人歟而弗桐其冠楛於家庭模於閭里其可見者  
如此於戲先生非今之人也古之志士



印心石屋主人畫像自贊

而眉龐而髯長仙心儒素而佛腸手此一卷烏奕

書香



卷之三十一

三

平面日晷銘

周官建國辨方正位月令勤民率作興事二十四  
方二十四氣晷以測時三者咸備候氣之瑄寒燠  
或愆指南之鍼癸丁或偏維晷之綫日日景界節  
有贏縮景無弗屆維晷之表用正地中南北旣定  
辨乎西東所以者何有極高度黃赤經緯於是而  
步天以運行人以法測厥道有常所司罔忒迺知  
民性物則是依豈其嚮化而與令違曷觀於天流  
行不息誰其代工而鰥厥職撫茲平晷惜乃分陰  
礪石垂模爰告盍簪

Table with 12 columns and 1 row. The table is mostly blank, with some faint, illegible markings in the rightmost column. The right edge of the page contains vertical text: 卷之四 (Volume 4) and 四 (4).

端硯銘贈劉生鼎盛

端石一方質粹而光曾與予入金閭上玉堂試墨  
黼座勿燦然助予之文章劉生得此其寶藏



海曙樓銘

中國山川盡於東而離照卽生於東天地所以成  
始而成終故觀天地之大於海觀海於日出觀日  
出於臨溟峻極之山所居高則所見大大則反其  
木矣九能之士登高能賦山川能說可以爲大夫  
而禮仲夏之月君子則以居高明遠眺望豈非觀  
聖人之道必去耳目之近而返從其朔者哉雲臺  
山踞東海中其脈來自岱宗故與日觀峰對峙又  
隔海爲成山巒則登萊斗入大海秦漢所祀日主  
處爲古寅賓出日之所相望鼎立而皆不若雲臺

四面際海於觀日出尤奇其可無樓樓其可無銘

銘曰

日出博桑聖出東方萬物以昌維百谷王

陶文毅公全集卷四十五目錄

文集 神道碑 墓誌銘

刑部侍郎小峴秦公神道碑

陝西按察使司按察使晉贈通奉大夫布政使銜

樂園巖公墓誌銘

護理陝西巡撫陝西布政使司布政使陶山唐公

墓誌銘

賞翰林院編修前山東按察使司按察使琢堂石公墓

誌銘

封朝議大夫汪君墓誌銘



戶科掌印給事中蔣公墓誌銘

山西平陽府知府韓君墓誌銘

山西蒲州府同知陳君墓誌銘

趙琴士徵君墓誌銘

安徽無爲州學正

誥封中憲大夫例晉通議大夫河南按察使司按察使

張君墓誌銘

內閣中書李君墓誌銘

封翰林院庶吉士蔣先生墓誌銘

傅明經墓誌銘

聶上舍墓誌銘

封奉直大夫孫君墓誌銘

趙母李太恭人墓誌銘

彭母黃太宜人墓誌銘

章宜人墓誌銘

長女瑞姿墓誌銘

附一ノ家心三集

卷四一三

一一

文集 神道碑 墓誌銘

刑部侍郎小峴秦公神道碑

嘉慶十五年刑部侍郎秦公以目疾乞骸骨歸士  
大夫送者載道咸望其再出而公遂家居講學以  
終道光元年某月也享年蓋七十有幾云惟無錫  
秦氏世稱有人

聖祖開鴻詞科時與睢州湯文正公同舉以進士改編修  
官左諭德學者稱蒼峴先生是爲公高祖官翰林  
院侍講以理學事

世宗學者稱南沙先生是爲公從曾祖

高宗朝仕至刑部尚書太子太保諡文恭治五禮明五刑  
為世名臣是為公從祖公不嗣前德得古文法於  
蒼峴得經術於南沙得

朝章

國憲於文恭公漉液融根涵泓龐碩嶷嶷樹立績學  
彌成乾隆二十九年中順天鄉試四十一年

純廟東巡獻賦

行在

授中書公於內閣以中書遷侍讀為軍機章京於外歷溫  
處道杭嘉湖道浙江湖廣東按察使於九卿為

光祿寺太常寺卿都察院左副都御史於府尹爲  
順天府於六部爲戶部郎中累官兵部刑部工部  
倉場左右侍郎又嘗知會試貢舉故事非進士出  
身不命公以舉人異數也凡仕中外三十四年以  
按察司刑部最久事無滯刃以直與法用意至到  
於浙於廣屢平反海盜之以良被誣者於湖南於  
浙屢爭收成之不復報災與軍興之不敢請賑者  
折疑似之獄於一色一言爭讞成之案或至再至  
三每有所救正然亦以是多齟齬不合擢浙藩入

見遂乞內用

天子知其才且伉直由京卿遷府尹旋畀以司寇執法如  
故遇不可以次紙爲疏言雖多格於時議而去位  
後刑部歲更條例猶時見諸施行如公言顧公意  
恒自謙方

仁廟竦意嚮用卽以年乞致仕未幾又以疾請解職  
天子雖勉從所請仍

論候痊愈起用而公竟不復出矣里居十數載布衣蔬食  
蕭然如寒士比卒人猶以爲未竟其用云公諱瀛  
字凌蒼號小峴晚自號遂菴言遂其初志也好汲  
引士類孜孜講藝不少倦治古文法尤嚴遺言以

墓誌屬新城陳司業用光以墓表屬予予重違其  
意又嘗辱公寵銘其先人敢辭不文用揭公於錫  
山之阡以表公之清德以世秦氏之望



三十一

三十一

原  
书  
缺  
页

3255-3286页